

Deuxu Rybe
Tyyriti



New Testament in Karajá (BR:kpj:Karajá)

Deuxu Rybe Tyyriti

New Testament in Karajá (BR:kpj:Karajá)

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 21 Feb 2024 from source files dated 29 Jan 2022

55ce0bcd-101e-52a3-984e-847027efe150

Contents

MATEU	1
MARKU	66
LUKA	100
JOAÕ	159
AÕHEBO ROTÏÏNYRE	204
ROMA-Ò	266
1 ORITXI-Ò	294
2 ORITXI-Ò	317
ALATXIA-Ò	334
EFESU-Ò	342
FILIPÍ-Ò	350
ÒLÒSÒ-Ò	356
1 TESALONIA-Ò	362
2 TESALONIA-Ò	367
1 TXIMÒTXI-Ò	370
2 TXIMÒTXI-Ò	377
TXITU-Ò	382
FILEMO-Ò	386
HEBREU-Ò	388
Txiau	407
1 PEDRO	414
2 PEDRO	421
1 JUAÕ	425
2 JUAÕ	432
3 JUAÕ	433
JUDAS	434
APOCALIPSE	437

Mateu Deuxu Rybe Wihikỹ Tỹmyra, Mateu Tyyritidỹỹdu

¹ Kaheka Jesuisi Kristu labiehekỹ rare. Juhuu tahe Abraõ heka Davi labiehekỹ rare. Iribi tahe Davi heka Jesuisi Kristu labiehekỹ rare.

² Ibutumy ilabiebohonimy arelyykre. Juhuu tybynimy arelyykre idi iriõrenimy: Abraõ, Ijai, Ijaõ, ³ Juda, Peresi, (Peresi seriõre tahe Zera inire. Isereny tahe Tamara inire.) Esraõ, ⁴ Araõ, Aminadabe, Nasaõ, Salmaõ, ⁵ Boasi, (Raabe, Boasise rare.) Obede, Rute, Ijese, Kie.

⁶ Davi hãwyy heka Uria hãwyy juhuu raremyhỹ. Iribi Davi-wana roire. Salomaõ iriõre rare. Tii heka Roaboaõ tyby rare. ⁷ Idi Abia reare. ⁸ Idi Asa, Josafa, Joraõ, ⁹ Uzia, Jõtaõ, Aka, Ezekia, ¹⁰ Ezekia, Manase, Amo, ¹¹ Josia, Jekonia, taseriõre-wana.

¹² Babilonia-ribi rohonyreu tahe tiiboho reare, Jekonia riõre wahe: Salatieli (Tii Babilonia-ki reare.) Zorobabe, ¹³ Abiude, Eliaki, Azo, ¹⁴ Sadõki, Aki, Eliude, ¹⁵ Eliaza, Matỹ, Ijaõ, ¹⁶ Ijaõ tahe Jyje tyby rare, Jyje tahe Marie hãbu. Jesuisi tahe Kristu Deuxu deõdỹỹna rare.

¹⁷ Kia labiehekỹ sõwe tahe 14my rare, Abraõ-ribi Davi-õ wahe. Tule labieboho 14my rasõwerenyre Davi-ribi Babilonia hãwã-õ ridyreny ixideewimy aõkõ ròte-õ. Ixyby 14my rasõwerenyre. Iribi tahe Jesuisi reare.

¹⁸ Kawese heka Jesuisi Kristu reare. Juhuu Marie Jyje-wana roikremy rare. Tii ijadõmaule tahe Deuxu Tyytybytyhy ribõtõnyre. ¹⁹ Jyje hãbu õbiti rare. Tai tahe riixãwididỹỹnykemy rõhõtynyre. Kia õmo-õ rarybeõlere tuu. ²⁰ Kiau ýju tamy rarybere tarasina-ki: —Jyje, Davi riõre riõre. Ahãwyy, Marie, biteõnyõke. Tuu bexihãwyynykre. Iriõre dori Deuxu Tyytybytyhy riõre rare. ²¹ Jesusimy raninykre. Kiani tahe irybereny rare: tarasadu. Ibutumy iny dori iõraruna-ribi ritakre.

²² Iwese Deuxu rybe ihetxiu rarybere wese tahe tii wiji riwinyre. Kia wese ihetxiu rybe rare:

²³ —Ijadõma rabõtõnykre. Iriõreni heka Emanueli rarekre.

Kiani tahe irybe-ki kia rare:

Deuxu iny-wana ratxireri.

²⁴ Iribi tahe Jyje dexixade tarasina-ribi. Iwese Inynyrỹreny tuu tamy rarybere wesemy heka tii riwinyre. Tii-wana ratxiõre. Tii aõhe risỹnyõre. ²⁵ Uladu reare xiery tii aõhe rira. Tamy niõ riwahinyre, Jesuisi wahe.

2

¹ Belē hāwā-ki Jesuisi reare, Judeia bedē-ki wahe. Iòlò Herodi iòlòm̄y raremyhỹ. Iu reareu, Hābu Erytyhy mahādu taina tỹmyramy robirenyre. Tai tahe iòlò mahāduō doidenyde biura-ribi Jerusalē hāwā-ò. ² Tiiboho rỹr̄axirenyre: —Iule judeu mahādu iòlò aōbo kaki reare. Jiarỹboho itainamy rabirenyre tahe nadoidenyde riwowydynyrenykemy. Kaiboho teerytenyde aōbo titxibo ratxireri?

³ Tahe inyō Herodiko relyyrenyde. Herodi kia roholareu sōwemy riòtiinyre. Tule ibutumy Jerusalē hāwā mahādu riòtiinyrenyde. ⁴ Tahe Herodi ibutumy dinodu mahādu ributunyre: Xiwena wahidỹỹdu dinodu, bedē ywina tyyriti erydu mahādu tule. Tahe tamyreny rỹr̄axire: —Titxibo Kristu reakemy timybo tyyriti-ki ròritidỹỹmy roire? ⁵ Tiiboho tamy rarybere: —Judeia bedē-ki, Belē hāwā-ki wahe. Kia tahe ihetxiu rybedu riritinyre.

⁶ —Kai Belē hāwā mahādu. Judeia bedē hāwāō. Kai hāwā yja iny rōhōtinyre. Tahe inatyhy aōkō rare. Kai hāwā nihikỹre. Aribi dori dinoduō rōhōnykre. Wamahādu iòlòm̄y ronykre. Idinodumy rarekre, judeu mahādu dinodu wahe.

⁷ Tahe Herodi heka biura mahādu ributunyre ibutumy iny-ribi wasimy. Tamy rỹr̄axire: —Tiutxubo taina rōhōnyre? Tahe rirawyònyre. ⁸ Tamyreny rarybere: —Kaiboho boibenyke Belē hāwā-ò. Idi tahe uladu-ki mahabenykre. Iu wadee manarybebedenykre. Jiarỹ tule tamy arakre ariwowydynykemy. ⁹ Biura Hābu Erytyhy mahādu roholarenyde. Tahe roirenyre. Ryki ixityre tainamy robirenyre. Uladu tyrehekỹle ritoosònyre. ¹⁰ Iu tahe sōwemy reysarenyde. ¹¹ Hetō-ò rehemynyre. Tahe ralorennyre. Uladu rare Marie-wana. Tahe tatiowotimy reserenyde riwowydynykemy. Isarenny riraynyre tamy riwahinykemy: womati tỹr̄r̄hỹhỹkỹ, hee aderòna, aderònatyhy wana. ¹² Idi tahe Biura Hābu Erytyhy mahādu rarasinnyre. Deuxu tamy rarybere: —Kaiboho Herodi-ò bōdōsebenyōke. Tai tahe rywitxira-di tasubederenny-ò ròdōserenyre.

¹³ Biura mahādu tahe ròireny rahudi tahe Inynrỹ ỹju nade Jyje-ò rybemy, irasina-ki tamy rarybere: —Ariòre, ise-wana bidyke Egito bedē-ò. Herodi dori uladu rubudỹỹmy ratxireri. Adeē tiu ararybekreule kaò bōdōdōseke. ¹⁴ Tai Jyeboho rummy rahenyrennyre Egito bedē-ò. ¹⁵ Herodi rubusỹtybymy tahe dōdōsedenyde. Tii riwinyre iwese ihetxiu tyyriti rarybere wese, Deuxu rybedu rybe wahe:

—Wariòre Egito bedē-ribi nadidyde.

¹⁶ Herodi reburere. Biura Hābu Erytyhy mahādu dori tii riitxenanyre. Tai ibutumy uladu rirubunyre Belē hāwā-ki, tule ijō iòhò hāwā-ki. Ibutumy howȳtòdu rirubunyre inataō beòra ijòdikeki tahe rirubunyōre. Tai Jesuisi rirubunykyemy risȳnyre, iwese tii rareu Biura Hābu Erytyhy mahādu tamy rarybere. ¹⁷ Kiamy ta r̄yire iwese Deuxu rybedu rarybere wese, Jeremia wahe:

¹⁸ —Rama hāwā-ribi ibru-ò iny roholamyh̄yre. Rakeli rare. Tii robumy h̄yre. Ibutumy iriòre ituere. Tai robumy h̄yre. Inyō riteysanyōtyhy iriòre rurureki.

¹⁹ Herodi tahe rurureu, Inynyr̄ȳ ȳju heka Jyje rasina-ki tamy nade. ²⁰ Tamy rarybere: —Bòòsebenyke judeu bede-ò. Uladu ise-wana bidyke. Kia rirubunykyemy risȳnymyh̄yre tahe, rurure.

²¹ Tahe Jyjoboho ròirenyre judeu bede-ò. ²² Akelau tahe Herodi riòre ronyre iòlòm̄y, tyby deròw̄my. Tai kowa-ò Jyje ròirenyōre s̄my. Rasina-ki rybeō rieryre Kalileia-ò ròirenykyemy. Tai tahe ròirenyre kowa-ò. ²³ Nazare hāwā-ki ras̄nyrenyrene. Kia tahe riwinyre iwese Inynyr̄ȳ rybedu ihetxiu rarybere wese: —Nazare ludu tii rarekre.

3

¹ Kiau Judeia bederahy-ki Joaō Sebedȳȳdu heka iny-ò rarybemyh̄yre: ² —Deuxu Iòlòna bededȳȳnana iòhòm̄y ratxireri. Aòraruna-ribi biixāwibenyke, bexirāh̄ike! ³ Joaōmy heka Isaia ihetxiu riritinyre kawese:

Inyō bederahy-ki ryr̄yri: —Inynyr̄ȳ dee ryòbiti biwinyke. Biywinyke ryō tamy kanakemy. ⁴ Joaō kamelo radetyy ityy rare. Iròdutyy iwereysanare. Seihik̄yle bidi-wana ir̄ys̄na rare. ⁵ Ibutumy iny tamy ròirenyre irybe-ò roholakemy iòhò hāwā-ribi, Jerusalē, Judeia, Jordaō bero-ribi wahe. ⁶ Tamy òrarunamy relyyrenyrene rabadewomy tamy relyyrenyrene. Tai tahe Joaō heka bero Jordaō-ki tii riratysebenyrene. ⁷ Fariseu mahādu, saduseu mahādu doide tamy riratysebenykyemy. Kiau Joaō tamyreny rarybere: —Hemylala mahādu! Deuxu aòhòk̄ymydȳȳnana-ribi mahenybenyōtyhy. Aòhe inatyhy? ⁸ Juhuu aòwihik̄y widȳȳna biwinybeny. Tai tahe iny rierykre kaiboho aòraru-ribi inatyhymy texihutenyete. ⁹ Fariseu mahādu, kaiboho tahòtintenyete: Abraō heka inylabiehek̄yreny rare. Rikirāh̄iōtyhy. Deuxu-ò kia aō aōk̄ō rare. Tamy wikeki mana-ribi Deuxu heka Abraō riòkòreō riwinykre. ¹⁰ Woma tahe òwòru-ribi iòhòm̄y r̄yira. Òwòru bederaty wiwihik̄y ihoōkeki, kedesekre.

Rasõkre. Woma heka Deuxu aõhõkỹmydỹỹnana wese rare. ¹¹ Jiarỹ bedi araratisebedỹỹnyra aòaruna-ribi texirãhĩteki. Jesuisi tahe Deuxu Tyytybytyhy-di ròratisebedỹỹkre heòty-wana riratysebenykre. Tii waratyre awityhymy ratxireri. Jiarỹ riwaixỹrunymy watxireri iwa ariwykeki. ¹² Tii maixõmo risykre. Maixõmo ributunyre tahyna-ò. Irỹnysi heòty-di riworonykre. Heòty itueõna heka rare.

¹³ Idi tahe Kalileia bede-ribi Jesuisi nade bero Jordaõ-ò. Tii Joaõ-ò nade riratysebenykre. ¹⁴ Joaõ aõkõmy rarybere: — Jiarỹ tahe aõ aõkõ rare. Kai biwaratysebenyke. ¹⁵ Jesuisi tahe tamy rarybere: —Deuxu deewina heka kia rare. Rikiwinykre. Tahe Joaõ riratisebedỹỹre. ¹⁶ Ròratisebenymy rahudi tahe Jesuisi ròtuõra. Biuwetyy rarayre Jesuisi tahe bòðenimy robire, itxi dobehede, Deuxu Tyytybytyhy wahe. Rybeõ biu-ribi narybede: ¹⁷ —Kia heka Wariòre rare. Jiarỹ heka sõwemy tukure. Idi wadeysareri.

4

¹ Idi tahe Deuxu Tyytybytyhy heka Jesuisi ridyre beder-ahy-ò. Tai Satanasi riurihikemy tamy rehemynyre. ² Jesuisi heka 40 txumy, 40 rummy heka aõ rirỹsỹõhyy bede idi rỹire. Sõwemy heka rama risamy tai raremyhỹ. ³ Taile Satanasi tamy nade. Tahe iurihiximy tamy rarybere:

—Kai inatyhy Deuxu Riòre ahãte wana heka mana-di orotx-umy biwitziranymy biwinyke ahinamy.

⁴ Tahe Jesuisi dirawyònyde: Deuxu Ritidỹỹna-ki kiamy roire: —Iny heka orotxudile aõkõ irumy rỹirakre. Ibutumy Deuxu rybedile iny irumy rỹirakre. ⁵ Idi Satanasi heka Jesuisi ridyre Jerusalẽ hãwã-ò. Templo heto ratyre tahe ritidire.

⁶ Tahe tamy rarybere:

—Kai inatyhy Deuxu Riòre ahãte wana heka katyre-ribi ixi-di behukre bede-ò. Buruõtyhy heka besekeki. Deuxu taỹju kiditeònykre aramykemy. Bede-ò aõkõ beseke.

Ijõ tyyriti rarybere:

—Deuxu araywinykre taỹju-di. Tii ýju kiditeònykre tebò-di ariijekemy. Awa ritõmonyõtyhy manatyre-ki.

⁷ Jesuisi rirawyònyre: —Tyyriti tule rarybere:

—Deuxu uritere biurihiõke.

⁸ Iribi Diabo heka Jesuisi ridyre hãwãlòð-ò. Tamy ibutumy bede iòlòna riteòsinyre. ⁹ Tahe tamy Satanasi rarybere: — Beseke atiwotimy tahe biwawowydynykeki, adee kia ibutumy iòlòna wiwihikỹ ariwahinykre. ¹⁰ —Make Satanasi, Jesuisi rarybere: —Tyyriti rarybere:

—Deuxu-ò sohojile deàlàna, wowydyna biwahinyke. Tiile bityhynykre. Deòdu tamy sohojile mabeke.

¹¹ Satanasi tahe Jesuisi-ribi rexitare. Ÿju mahādu rehemynyre iyrubudŸŸmy.

¹² Joaō òludu heka ròtenawo-ki ritidira. Kia Jesuisi roholareu, Kalileia bedè-ò ròðsere. ¹³ Nazare-ribi rare Kafanaō hāwā-ki rasŸnykremy rare. Tii aho-ki iòhòre, Kalileia aho wahe. Zebulō bedè, Natali bedè tahe inatxi hāwā ibiòwa rare.

¹⁴ Kia tahe Isaia Tyyriti rarybere wese:

¹⁵ —Zebulō bedè, Natali bedè, Jordaō bero kowawe-ribi ijà-ò. AhohokŸry-ki. Kai judeukōdu mahādu bedè rare, Kalileia wahe.

¹⁶ Iny kowasŸ mahādu bedè luru-ki rasŸnymyhŸre. Tahe tiiboho loosònahakŸmy robirenyre. Bedè lurusŸ mahādu-ki tahe Deuxu loosòna ritoosònyre.

¹⁷ Iribi tahe Jesuisi ritelenyre Deuxu rybe ritŸnynykemy. Tii rarybere: —Aðraruna-ribi bexirāhĭke. Deuxu Iòlòna bedèdŸŸnana dori iòhòmy ratxireri.

¹⁸ Kalileia aho ijāti-ki Jesuisi rariamy ratximyhŸ. Tahe inatxi waxidu seriòremy robire, Simaō Pedro, tule Andre ijōre. Rià-di utura rimymyhŸreny. ¹⁹ Jesuisi tamyreny rarybere: —Bodoike wahemy. Iny wadee bimykre. Iwese araerynanykremy bimykre. ²⁰ Aōwesele tahe tarià ririrenyre. Jesuisi-wana roirenyre. ²¹ Roirenyre tahe inatxi ijō seriòre-ki Jesuisi robire. Txiau ijōni rare. Joaō ijōre. Tiiboho Zebedeu riòre roire. Tiiboho talawo-ki ronyrenyre rià riywinyrenymy. Jesuisi tamyreny rarybere: —Wahemy bòðoike. ²² Tai tahe tybyreny ririrenyre. Jesuisi hemy ròirenyre.

²³ Ibutumy Kalileia bedey-ki Jesuisi rariamyhŸre. Tii judeu dohodŸŸna heto-ki rarybemyhŸre. Deuxu Iòlònamy ritŸnynymyhŸre, Rybe WihikŸ TŸmyra wahe. Sōwemy webinadu mahādu riteytenyre. ²⁴ Jesusimy iny relyyre ibutumy hāwā hāwā-ki Siria bedè ibutumy. Tai tahe sōwemy webinadu mahādu didydenyde tamy, iny tyytybybina-di, iny iumy imyremyrehekŸ wahe. Jesuisi ibutumy iny riteytenyre. ²⁵ Iny sōwehekŸ riheludunyre, Kalileia bedè-ribi, Debòwiò hāwā-ribi, Jerusalē-ribi, Judeia bedè-ribi, tule Jordaō bero kowa-ribi.

5

¹⁻² Jesuisi inumy sōwemy robireu, raòwònyre hāwālò ratya-ò, IerydŸŸna mahādu tamy doidenyde. Taile rierynadŸŸnymy ronymyhŸre. ³ Deuxuko-ki iny ibinamy rŸimyhŸre. Kia iny tuu rexierymyhŸre, teysatyhy rare. Tii deysana sōwemy tai ratximyhŸre, Deuxu Iòlòna heka ihōrōrenymy rarekre.

⁴ Robumy rŷirakeki teysamy heka rŷirakre. Ibedewona wiòhedŷŷna rybe-di heka tamy kanakre.

⁵ Kia inytyhy-di widee ratxireri, tii heka teysahyummy ratx-
imyhŷre. Ibutumy heka iny ihòròlehekŷle rŷirakre. Bede bede
heka ihòròmy rarekre teysamy rarekre.

⁶ Inyò-ò òbitinamy lobiximy rurukeki tahe teysamy rarekre.
Deuxu tamy òbitina riwahinykre.

⁷ Inyò ruxetòena-di ratxireri. Deuxu heka tamy rux-
etòena-di rarekre.

⁸ Inyò irayky òbitimy ratxikeki tii heka teysamy rarekre. Tii
dori Deuxumy robikre.

⁹ Inyò ywina-di wiwana rŷirake teysamy rarekre.
Ywinaò-di rarekré, teysamy rarekre. Tii dori rarinikre:
Deuxu riòremy.

¹⁰ Inyò aòhòkŷmy dŷŷnana reuròkeki, tii dori òbitimy
rurukeki, tii tulesŷ teysamy rarekre. Deuxu Iòlòna dori
ihòròmy rarekre. ¹¹⁻¹² Inyò umyreny relyykeki uritere hekŷle.
Ruirybe-di umyreny relyykeki, aòhòkŷmydŷŷnana adee
riwahinykre wana, tai tahe beysakre. Awimy mohòtinykre.
Kai dori biu-ò mahenykre. Tai tahe beysakre kai awimy
nohòtykre. Uritere nohòti rosarenyòmy. Kia wese tule
Deuxu rybemy rybedu aòhòkŷmy rotŷŷnyre. ¹³ Kaiboho
heka saawesemy atximahãtenynte, jyyra wesemy wahe bede
mahãdu iny-ò, kai dori kiamy bede mahãdu tewiòhenanynte.
Auri tahe urihimyo biònonykeki tahe aurihixina heka
urihimyoòlemy releke. Kaa jyyra urile idi adehu rŷikre
iny ityre rariakremy. Awiòhedŷŷna biònonykeki tahe
aõma aòkõ beleke. ¹⁴⁻¹⁵ Kai loosõna wesemy atximahãte
kabede mahãdu iny-ò. Hãwãò hãwãlò raty-ki roiikeki,
tiu heka rexiwòòtyhy itŷnyhy roimyhŷke. Loosõnaò iny
ritoosònykeki, tule heka tiu heka hyna rawoò-ki roiòtyhy
roosòmy. Aõma roosònanymyhŷre ibutu heto jurajuramy heka
ibutu ritxuxanymyhŷre. Aõma tamana-ki rŷimyhŷreki wahe.
¹⁶ Kaiboho tule amahãdureny awiwihikŷmy robikeki tahe
Deuxu-ò wowydyna riwahinykre.

¹⁷ Jiarŷ heka anaòde bede ywina tuededŷŷmy. Anade aõ
Deuxu dee rybedu tuededŷŷmy aòkõ heka anade. Anade
ibutumy aõmybo rarybere widŷŷmy. Timybo rarybere
wese heka ibutumy tuu rotŷŷnymy rarekre. ¹⁸ Inatyhymy
adeereny ararybekre bede ywina tyyritiy-ribi tiu ijõ iòòtyhy
ijõ sohoji ritiwedena yreõ reseòhykre. Ibutumy roikre
aõhebo rotŷŷnymyhŷreò bede konanako-txi. ¹⁹ Inyò tòhòti
urihimyoò bede ywina rosakeki rexidelenymyhŷre iny
ribedeerynyòkemy iny ritohonyòmyhŷkemy. Hãbu tahe iyjamy
Deuxuko-ò rarekre, Deuxuko-txi. Inyò rityhynymyhŷre

irybe iny rybedeerynymyhÿre. Tii tahe Deuxu Iòlòna-ò nihikÿmy rarekre. ²⁰ Kaiboho aõma fariseu mahãdu-ribi awityhymy ixi-di mohõtinybenykeki. Tiu heka Deuxu Iòlòna-ò aròterenyõmy. Kaiboho heka awi toite aõma fariseu mahãdu judeu mahãdu wedu ratyre heka awi boibeke. Kia aõkõkeki tahe malòbenyõtyhy.

²¹ Ihetxiu bede ywina Tyyriti kawesemy rare:

—Kai inyõ birubunykeki heka iòwynamy iny akanarubunyke.
Kia heka bede ywina heka rare.

²² Tahe warybe urihimyò iwitxira bede ywina-ribi. Kai inyõ-ò maraykynykeki. Tai tahe brebunahakÿ-ki tate. Abiòwa-ò bininikeki itxÿtemy. Tamy kai marybekeki: —Kai aõki awiõre. Tai tahe akÿnadykre heka aõma ywisidÿÿduko-ò araòwynykre. Inyõ-ò kai makýaranynykeki kai brebuna-ki texilòròmy tate. Kai inyõ deramy mabekeki uriteremy nodu tamy marybekeki, tai brebuna-ki tate. Inyõ òsÿny aradykre wisidÿÿdu mahãdu-ò. Inydee ratyhymy mabeke wana aõkõ raremy marybekeki, heòty kònana bede-ò make lau brebuna-ki tate. Iòhãrure kai heòty bede-ò makemy. ²³ Kaki aõma nieru xiwena wahidÿÿna-ò behemynykeki inyõ-wana aõhe widee botÿÿnykeki òhòti rosaõlemy ahãte wana. ²⁴ Deuxu heka axi-wena tewahinyõhyymyhÿte aõma xiwena bire-ki heka birike. Tahe biijeke aseriõre juhú. Aõma wana biòbitinybenyke widee marybebenyke. Iribi tahe tamy bedehemynyke xiwena wahidÿÿna-ò wahe tadevenymy atximahãte wana hãbuò-ò. ²⁵ Aõma tai tahe iòraru-ki aòludumy relera wana. Tamy behemynyke aõma timybo tii-wana widi biywinykemy timybo adeve biòwynykemy tamy heka bitobiny òrale heka aõma rieryke urenana. Aradyhemy aõma ywisidÿÿna ube-ò, idi ywisidÿÿna mahãdu, idi soldado. Tai tahe bitobinyke bede rierykemy. ²⁶ Inatyhy heka adee ararybekre ròtenawo-ki malòkeki. Tiu heka aòlòkòmy aõma iòwy mahumy adi ròhõtinkyre. Idi mohõtinkyre xiery heka bòhònyke.

²⁷ Juhú ihetxiu heka kaweselemy Tyyriti-ki rarybere:

—Òtaõmy!

(Bede ywina tyyriti-ki wahe.) Kawesemy heka jiarÿ rebedeerynywãhãre. ²⁸ Òtamy ròhõtinkykeki hãwy-ò retehekeki òtamy rexinohõtinkykeki. Tai heka tii òta òraru riwinymyhÿre. Iwese iwitxira hãwy-wana roireri yrubule taheka òta òraru riwinymyhÿre. ²⁹ Arueõ òraruna-txi araatykeki, bitake. Awityhymy biu-ki malòke kawesekile heka awire, Deuxusÿ-ò malòke wahe. Arue wiòmy tahe awiõmy biu-txi arue yremy heòty bede-ò make tahe ibinatyhyre. ³⁰ Tule eraõ bitake iurelemy era-di make biu-txi. Aumy ibutuhukÿlemy heòty

bede-ò rakehãrele tahe awiõre. ³¹ Bede ywina heka kawesemy rõhõnyre iny-ò juhuu wahe:

—Inyõ tahãwyy ixi-ribi riteõnykeki rixãwididỹnyra tamy tyyritiõ riritinymyhỹre. ³² Iwixira rybe-di jiarỹ arukile tahe hãbu tahãwyy riatyra. Inyõ uritere òta òtana òraru-ki ixi-ribi tahãwyy riteõnymyhỹre. Tai tahe hãwyy roimyhỹre hãbu wixira hãbuõ-wana. Tai tahe òta òtadumy kia hãwyy rininire. Adỹỹwe òraru-ò riteõnyre tahãwyy riteõnyre uritere òhyynaòle. Tai tahe tii adỹỹwe òrarunaòle heka riteõnyre. Taile heka hãwyy hãbu wixiramy heka roimyhỹre ahãbuõ tahãwyy uritere hyynaòle riteõnymyhỹre mahãdu hãbu heka. Tii heka tule òtadumy relemyhỹre hãwyy òta òtaduõ heka roireki wahe.

³³ Juhuu heka ihetxiu kia wesemy Deuxu tamyreny kia rarybere:

—Taholatenyte kiamy Deuxu heka uritere ruiõmy atximahãbenyke Deuxu-ò biwinybenykemy marybemy bimyekeki biwinybenyke.

³⁴ Tahe jiarỹ heka kiamy adeereny ararybekre. Aõwidỹỹmy ixi-di nohõtirenõmy ryberenyõmy iwidỹỹmy. Ixinohõtidiỹỹmy ryberenyõmy ariwinykre biwawiòhenanyke wana biu-ribi wawiòhenanykre wana. Uritere heka tuu ryberenyõmykre kia wesemy biubrò-ki aõkõ biu dori Deuxu rynana rare. ³⁵ Kiamy uritere rybeõmy bedebrò-ki aõkõ aõ biwinykemy aõmy mabekemy. Bede dori Deuxu idi ratximyhỹre rare. Deuxu waa elehyna dori bede rare. Jerusalẽ hãwãbrò-ki tule aõkõ, tii dori Iòlòtyhy hãwã rare. ³⁶ Tule arade-di widỹỹmy uritere dori rybeõmy kai dori awitxiranyõtyhy arade iura-ò ilyby-ò urile araykywydynakile tuu ratxike. ³⁷ Aõma araykywydynakile heka tuu riwixiranykemy idi tahõtinyinmyhỹte. Kiamy heka tarybemahãte iwidỹỹnamy teuremy tarybemyhỹte: —Kohe, kiale ariwinykremy marybeke ada aõkõre, ariwinyõtyhymy aõbo. Kiamy marybekeki iratylemy kohe, aõkõre myỹ aõbo. Sõwemy marybekeki tahe aõbina binahakỹle heka rõhõnykre.

³⁸ Ihetxiu bede ywina rõhõnyre.

Inyõ wixira rueõ ribinadỹỹnykeki, iny wixira tule iwesele riwinyke. Kia widỹỹdu rue heka ribinadỹỹnyke. Rue heka wilemy raòwynyre rueõwilemy. Juhu tasỹ ýjuõlemy raòwynyre. Jiarỹ tahe rebedeerynyre kawesemy.

³⁹ Inyõ aõbinamy adee riwinykeki, aõ aõkõ tamy biwinyke. Inyõ aòsỹny rihetenyekeki, tule iwyò-di beake rehetenykemy.

⁴⁰ Uritere aòludu-ò ixiòwydỹỹõmy. Aõma ijõ atyy ritakeki heka tule tamy arahana biwahinyke. Inyõ sohoji urixinamy adee ixidinymy reake wana. Inatximy heka tii-wana beake.

⁴¹ Inyõ ixitòedỹỹmy aõ aribi riwykeki tamy biwahinyke tule

inyō aribi aō huòtemy riwyke wana. ⁴² Abròrò itue-di tamy òkeseōmyke iwòde-ki ihuòtemy biwahinyke.

⁴³ Ihetxiu heka taholatentyte kawesemy:

—Kai heka aō hāwā ludu mahādu luumy heka madònymyhỹke. Aòludumy aki ratxike wana tukumy atxike teramy atximahāke. ⁴⁴⁻⁴⁶ Tahe iwitxiramy ararybekre. Aòludu heka arabedeerynyke. Tukumy mabekemy inyō aōhòkỹmydỹỹnana rotỹỹnyreri wana tamy rexitòenyke. Kia wese-ki heka inytyby riòremy mabeke, Deuxu riòremy wahe. Tii dori juu riòlòdỹỹnymyhỹre inybina tyre-ki wahe. Tule iny wiwihikỹ tule-ki aōma biu heka tule riteònymyhỹre. Aōma iny òbitikòdu mahādu tule-ò. Tule òbiti mahādu tule riteònymyhỹre. Aōma tukumy ahāte sohoji ratximyhỹre sohojile kai itukukeki. Kia heka awi aōkō rare ibutumy òraru mahādu heka tule riwinyremyhỹre kia wese. Aōma urile rybedỹỹ azry mahādu, Aseriòre mahādu. ⁴⁷ Tulesỹ kia aōma aōkō rare aōma tule heka judeukòdu mahādu dori tule riwinyke, tii Deuxu rierykōre. ⁴⁸ Òbitityhymy kaiboho boibeke. Aōma jiarỹ heka arabedeerynyrenyneri biu-ki inytybyreny ratximyhỹre dori òbitityhy rare.

6

¹ Wahisidỹỹna wiwihikỹ kai hāburu-ki iwahisidỹỹōmy iny-ò. Kai itxerenaōnamy biwahinymyhỹ. Aōkòkeki tiu inytybyreny-ribi bitaōtyhy aōwy awahisidỹỹna.

²⁻⁴ Kai biwahinykeu iny adee aōmybo rurumyhỹreó. Uritere ibutumy iny itxerenamy iwahidỹỹōmyhỹ. Inyō-ò òbiti mahādumy riwisỹnymyhỹre mahādu, kia wesemy heka tii riwinymyhỹre heka. Dohodỹỹmy heto-ki tuu riwinymyhỹre kia wesemy tule ibutumy hāwāhākỹ ruetyawetyamy tuu riwinyrerimy ihỹre. Inatyhy dori adee rarybereri: —Aōma wahisidỹỹnatyhymy heka adee rarybereri: —Wahisidỹỹnaō ixidee ritamyhỹre. Aōbo Deuxu wahisidỹỹnaō heka adee riwahinyōtyhy. Tai heka Deuxu wahisidỹỹnatyhy riwahinyōtyhy tamyreny. Iny-ò aō biwahinykeki, abiòatyhy-ò belyyōke. Wasilemy tamyreny awiòhedỹỹna biwahinyke. Iny tybyreny dori ibutumy aōna aōna ròtena rieryre aōwahisidỹỹna adee kidiwahinykre.

⁵ Iwese budu mahādu riwinymyhỹre wese uritere iwidỹỹōmyke. Kia wesemy aōkō heka bexitòenyke. Ibuturu-ò rexitòenymyhỹre dohodỹỹna hetowo-ki heka lamamy rexitòenymyhỹre. Hāwāy-ki dori rexitòenymyhỹre ibutu itxerenakemy. Inatyhymy heka adee rarybere: —Atarasana ibutumy ritare. ⁶ Inatyhy dori ritare.

—Bexitòenykeu malòke aheto jurawo-ò. Ixi-di biijòtòbònyke. Ierykònamy boo ratximyhÿreò heka bexitòenyemy myike. Ibutumy heka boo aõbo wasimy iny riwinyriwinymyhÿremy robimyhÿre. Tai-ki tahe bede ywina wihikÿ heka adee kidiwahinykre. ⁷ Tule rexitòenyemyhÿreu uritere irehemy idi lamaõmy uritere ixityre ixityremy tamy ixitòedÿÿõmy wiwesewesehyyle. Judeukõdu mahãdu dori kawesemy riwinymyhÿre. Kiamy heka raraykywydynanymyhÿre aõma rexitòenyre ehehekÿkeki heka roholatyhykemy rohõtinyemyhÿrenyure uritere widÿÿõmy iwese tii riwinymyhÿre wesemy. ⁸ Inytybyreny dori rierymyhÿre aõmybo iny raraykynymyhÿré. Inyboho heka rexitòenyemyhÿreu rierymyhÿre aõmybo inyboho rurumyhÿrenyure. Iny sõwemy rarybemyhÿrele aõkõ heka tii roholamymhÿre. Aõmybo iny rurumyhÿrenyure, heka bexitòenybenyke. Kia wese:

⁹ Wahareny, biu-ki atximahãte. Anityhy iny ibutumy rityhynykemy idi rierykemy watzireri.

¹⁰ Aiòlòna heka wymy kanake. Iny adeewile riwinykemy iwese biu-ki relemyhÿre wese.

¹¹ Wadeereny txuõ txuõ rÿsÿna bidiwahinyke.

¹² Waòrarunareny õhõtiri-ribi bitosadÿÿnyke. Iwese jiarÿ inyõ òraruna wanohõti iribi aritosadÿÿnymyhÿre wese.

¹³ Isiratyhy urihixina-ribi heka biwayrubunyke, òraruna-txi reseke lau. Aõna aõna bina-ò bidiwaijebenyeke. Iòlòna, ruru, loosõna heka ahõrõhy rare. Kie.

¹⁴⁻¹⁵ —Inyõ ariixãwidinykeki iaõbina-ribi. Tule inytybyreny riwaiixãwididÿÿnyke. Deuxu iòraruna-ribi riixãwididÿÿnyke. Beinareheke wana.

¹⁶ Uritere aòsÿny bededtidÿÿõmy iwese budu mahãdu rÿira wesemy. Tai heka byreõmy iny-di txuu rÿimyhÿremy widi retehemyhÿre. Wiji õhõtireny reake. Heka raòwynyra inarehena irareny. ¹⁷ Tai narehereheu tainarehenyeteu. Atarina-di ahãtemy beake aòsÿny bisuhòke. ¹⁸ Inywitxira heka anaeryõtyhy kai tenarehemy atxiteri. Inytybyreny sohojile heka rierymyhÿre. Inyõ tuu robiõtyhy. Tii tahe ibutumy aõna aõnamy robimy wasimy rÿiramy. Iribi tahe tii araòwynyrenyke.

¹⁹ Aõna aõna butudÿÿõmy tyy, nieru, aõna aõna wiwihikÿ butudÿÿõmy kabede-ki. Txudòera dori ibutumy kabede-ki tuu riroxike aõna aõnamy. Aõma rararÿÿnyke iaõmydÿÿna ibutumy rararÿÿnyke rahuke. Wasidu tamy ralòke. Iaõmydÿÿna-ò sõweò wyremy rasinyke iaõmydÿÿna-di. ²⁰ Kaki ibatudÿÿilemy heka biu-ò bibutunyke. Tai heka txudòera aõ riròõtyhy tule rararyõtyhy. Tule wasidu

aõkõ rare. ²¹ Titxibo aõmydÿÿnana ratxireri iwesele taheka arayky ratximyhÿre. Biu-ki aõbo ada bede-ki aõbo. Aõma bede-ki araykywydyna ratxireri wana heka kakile taraykywydynante. Biu-ki araykywydyna ratxireri wana heka biu-ki heka arayky aõmydÿÿna butuna raykywydyna ratximyhÿre. ²² Arue heka loosõna wesemy rare. Aumy dee itÿnykeki heka aumy ibutumy loosõna-di tÿximy rarekre. ²³ Aumy ibinakeki tahe bede loro-ki matxike. Aumy bede lorohokÿ-ki ratxikeki ibinatyhymy matxike aõma butunale-di iny rõhõtinykeki heka tiu Deuxu iny riwiõhenyõtyhy. Deòdumy heka releõtyhy. ²⁴ Inatxi wedu-ki dori inyõ rityynyõtyhy. Tule heka tii roholamyhÿre ijõ-ribi tahe tõhõti rosamyhÿre. Inyõ Deuxu deòdumy releõtyhy tii aõna aõna butunadile rõhõtinyinymyhÿreki. ²⁵ Tai heka tuu rarybereri adeeremy. Uritere nohõtiryõmy arÿsÿnamy tule atyymy, idi matykynykemy. Aumy dori rÿsÿna ratyre aõnityhymy ratximyhÿre. Tule aumy tyky ratyre aõnityhymy ratximyhÿre. ²⁶ Nawii-di inihe betehebentyke. Tiiboho heka aõðworumy aõkõ ròbròmyhÿrenyke. Aramyre heka aõma tarÿsÿna wydymy bederahymy tarÿsÿna riyrubunyõhyymyhÿre heto nihikÿ-õ. Deuxu biu-ki ratximyhÿre heka nawii riyrubunymyhÿre irÿsÿna tamy riwahinymyhÿre. Kaiboho tahe iratyretyhy toite, Deuxu-ki wahe. ²⁷ Sõwetyhymy maraykywydynanykeki aõbohe, arumy aõbo arirarehemy mariake. Aõkõre. ²⁸ Uritere nohõtiryõmyke atyymy. Betehemyhÿ inihe noijasa-di. Aõma tiiboho heka raaõmysÿdÿÿõhykymyhÿre. Tai tyky wihikÿ-di rexitynyke. Tyy ixidee riwinyõtyhy. Ihãre tahe Deuxu ritynywihikÿre heka tyy wihikÿ tamy riwahinyreri. ²⁹ Salomaõ heka itykynihikÿra. Ihãre tahe ityky heka awityhy aõkõ rare. Noijasa heka iratyre ityky wityhyre. ³⁰ Deuxu heka noijasa ritykynymyhÿre aõma noijasa heka wijilemy idi ihÿre. Biurasõmy tahe ixãwilemy reamyhÿre, risõra. Tii heka tyky adee kidiwahinykre. Nohõtiryõmy tahe. Tii dori adee kidiwahinykre tykyõ. Aityhyna dori ibutetyhyre heka. ³¹ Tahe raykyõmy nohõtioõmy titxiribibo arÿsÿna bidiwykré, atyky amona. ³² Tyhydÿÿdukõdu mahãdu heka kiaõle heka ritõhõtidiÿÿnymyhÿre. Inytybyreny heka rierymyhÿre aõmybo tarumahãte. Ibutumy heka araerymyhÿre aõmybo taruterimahãte. ³³ Tii Deuxu aõma dÿÿnana sohojidile. Manaykynykeki heka tii ibutumy adee riwahinykre. ³⁴ Uritere nohõtiryõmy aõbo biurasõ kia aõmydÿÿnana-õ. Rÿire dori sõwemy wiji biaõmysÿdÿÿnanykremy biwinykré. Iwitxiramy bidiwinykre iwitxira aõmydÿÿnanaõ.

7

¹ Iny wixira wixira-di ywisidỹỹõkeki. Aywisidỹỹna wesemy heka Deuxu ruxetõena-di ywisidỹỹmy araywinykre. ² Iny teywinyamahãte wesemy heka Deuxu araywinykre. ³ Kai heka õwõru nihikỹereõ arue-ki ijõdikiki, aõherekibo bederarasi sõmo-di inywixira rue-ribi bitakemy atxiteri. ⁴ Tai heka kai bobiõtyhy itarasa-ki wahe. Arue-ki dori õwõruere ijõdireki heka bobiõtyhy. Õwõru ere dori aõraruna sõwemy rỹire wesemy heka atximahãte. ⁵ Kai texibõnyteri. Aõraruna-ribi juhuu bexiõbitinykre. Idi tahe aseriõre õraruna-ki biwiõhenanykre. Aõraruny-di rierymy idi õbitimy betehekre iõraruna-ribi iixitarasadỹỹmy biwiõhenanykemy.

⁶ Inyõ heka utura rati mana wiwihikỹ-di rehuõtyhy aõma ixỹni herina-txi. Ixỹni dori ityre rariake tahe riõnonyke adee heka kanakemy wahe. Iwese tule heka ijõrõsa-õ biwahinydỹỹõmyke. Rybewiwihikỹ hãbu õrarudutyhy-õ iwahisidỹỹõmyke.

⁷⁻⁹ Rexitõenykeki tahe bitake kia. Biekeki tahe tai mahake. Bihetenyekeki heka iny adee riraynyke ijõtõbõna. Inyõ heka Tyby-õ rỹsỹnaõmy rexitõenykeki, mana heka tyby tamy riwahinyõtyhy. ¹⁰ Uturaõmy rexitõenykeki tahe hemylala binahakỹ tamy tiu riwahinyõtyhy. ¹¹ Kai aõna aõna wiwihikỹ biwahinyke heka teerymyhỹte auladu-õ wahe, hãbu õrarudu hãrele wahe. Aõbo heka tule Deuxu inytybyreny inydeereny riwahinyke aõna aõnaõ wihikỹõ. Rexitõenykeki tahe tamy ariwahinyke. Inytybyreny heka tamy riwahinyke. Iwese iny wixira teyrubunymahãte wesele heka iny araywiny my xixi-di tahõtinyinmahãte wese. ¹² Tule kai aõwiwi inyõ ixidee aõhebo rotỹỹnymyhỹkemy taruteri, kiaweselemy tamy botỹỹnymahãke. Kia heka Moisesi bedeywina tyyriti-ki roire. Kiale Deuxumy rybedu mahãdu ribedeerynyre.

¹³ Biu bedeywihikỹ kia ryỹijõhỹtỹdile malokre. Heõty ijõ bederyijõ heka nihikỹ rare. Iny kia ryhykỹ irumy rakre heka isirare iny ibute kowa ralore. ¹⁴ Irumy nonona ijõ tahe ihỹtỹre. Ryy heka ihỹtỹre heka ibutere iny ryhỹtỹ-di rõtedu timy bedeydỹỹkõdu-õ.

¹⁵ Bexiijebenyeke kia mahãdu lau Deuxu rybe rybedu mahãdu tyhymy aõkõ lau wahe. Budoeni wese ratximyhỹre inytyhy wesemy. Tawo-ki tahe inatyhy rare ahola debore wesemy heka ratximyhỹre. ¹⁶ Teeryte wesemy ibederaty-õ betehkeki. Hede-õ heka uvamy figomy tule tiu iratyõna. Iaõmydỹỹna-õ bierybenyeke tibo roirẽ. ¹⁷⁻¹⁸ Tii heka bierybenyeke aõhebo rotỹỹnyre wana teerytenyete. Tii heka riixenanyõtyhy kia aõma matyty matynimy heka tiu biixenanyõtyhy. Tule betehkeki, bierybenyeke aõwesele heka

òwòruõ bierybenyke. Aõma bederatyõ birÿsÿkeki tiu heka bederaty wihikÿõ arÿsÿõna òwòru ratyy-ò, bederatybinahakÿ tule rierykre. ¹⁹ Òwòruõ bederaty wihikÿmy raratynyõkeki heka hemy raòròròke rokoke. ²⁰⁻²¹ Kia weselemy heka iny teerytenyete. Aõhebo iny rotÿÿnyke wahe. Tai tahe terytenyete heka, tetehetenyerikile wahe. Òbiti mahãdu wesemy rarybemyhÿre. Tahe òbitimy aõkõre ihÿre. Sõwemy heka iny tawedumy riwaninire. Ihãrele tahe biu-ò ralòõtyhy. Deuxu tyhydÿÿdule tahe ralokre. Ywisidÿÿnatxu heka kawesemy wadee rarybekre. ²² Sõwemy iny wahe: —Wanyrÿ, Wanyrÿ, jiarÿ hewa iny iwitxira sõwemy aijyy rarybemy rare wahe. Tule heka tyytybybina reteõnomy rarewãhã. Tule deytenu wiwihikÿ heka ani-di rewinyemyhÿre. ²³ Tai tahe jiarÿ tamy ararybekre heka: —Kõrehe, kaiboho aõ wamahãdumy aõkõ atximahãte. Umy reerykõre. Waribi bexitake. Aðraruna dori sõwere.

²⁴ Kawesemy heka iny bede eryna ratximyhÿre. Warybe-ò roholamyhÿreu heka aõwesele riywinomy rityhynomyhÿre. Kia hãbu hetowidÿÿdu wesemy heka rare. Iheto heka manatyre-ki riwinyre. Tii heka ibedeery sõwemy ihÿre. ²⁵ Biu heka beðra heka rariamyhÿre. Iu tahe biu rejuxunomyhÿre, yhy rebonyre. Tahe tiu reseõtyhy manatyre-ki dori riwinyre. ²⁶ Warybe ijohonadu tahe iwitxiramy ihÿre. Hãbu itxÿte tahe warybe-ribi aõwesele tõhõtireny rosamy reamyhÿre. Kaiboho aõbedeeryhykÿ aõkõre roire. Tii heka iwese hãbu ÿnarakile heto riwinomyhÿ wese rare. ²⁷ Biu risebenykeu, beðra rareareu, yhy rebonyreu tahe iheto reseke, ibutumy iõre, rahura.

²⁸⁻²⁹ Ibutumy heka Jesuisi rybe erysydÿÿna-ò bede riòtiinyre. Tii heka hãbu erysydÿÿdu wesemy tii ribedeerymyhÿre. Aõ judeu wedu wesemy aõkõ ribedeerynyre.

8

¹ Tiu hãwãlò-ribi dobehedeu, sõwemy heka iny ihemy doidemye webinadu, tybina heka tamy nade. ² Wowydyna rybe-di heka tamy rarybere: —Adee wikeki heka kai biwateytenyke. Jesuisi dirawyònyde: ³ —Wadee awire, arateytenykre. Tahe tamy tebò ritytere tamy reerimy. Itybybinana riteytenyre. ⁴ Tahe Jesuisi tamy rarybere: —Boholakre, iny-ò uritere rybeõmy.

Kai tahe makre xiwena wahidÿÿdu-ò xiwenaõ biwahinykre. Idi tahe Moisesi bede ywina raryberewesemy xiwenaõ biwahinykre. Kai tahe iny rierykemy heka yteny ratximyhÿre.

⁵ Jesuisi Kafanaõ hãwã-ò rehemynyreu heka hãbu soldado weduõ tamy rehemynyre. Tii tahe Jesuisi-ò rexitøenyre: ⁶ –Wadeòdu biteytenyke raterenymy ratxireri waheto-ki. Sõwemy aõhøkõmy rotÿÿnyreri. Ibinatyhymy roireri rexisir-anymy raratykõhykylemy. ⁷ Tai tahe Jesuisi tamy rarybere: –Rakakre, tai ariteyteynykre. ⁸ Idi soldado wedu rariwyønyre: –Aøkõre, Kai hãbu wiwihikÿ tate. Jiarÿ tahe hãbu aõ aøkõmy jiarÿ watxiwãhãre. Waheto-ò manalòøtyhy. Karibile mary-bekre tamy taile taile tahe wadeòdu reytekre. ⁹ Jiarÿ dori reyryre. Jiarÿ heka tule hãbu weduõmy watxiwãhãre. Soldado heka sõwemy riwatyhynymyhÿre. Iny sohoji-ò aõma rakremy rarybemyhÿré heka, ramymyhÿre. Tule ijõ dee rarybemyhÿre: –Manake, tai tahe namyhÿde. Ijõ dee rarybemyhÿre wana: –Kai biwinyke, idi riwinymyhÿre. ¹⁰⁻¹¹ Tai tahe Jesuisi ribedeøtiidÿÿnyre irybe-ki wahe. Tahe rarybere erydÿÿna mahãdu-ò: –Judeu mahãduy-ki tai rahaõre ijõ-ki kahãbu wesemy inatyhynana sõwerekí. Sõwemy heka judeukõdu mahãdu rityynykre kia weselemy. Ijõ txu aõ wiji aøkõ heka riroxirenyke: Abraõ, Ijai, Ijaò-wana biu-ki heka riroxirenyke bedeludu iny mahãdu-wana. ¹² Judeu mahãduõ ròirenyøkcre tamy. Tule kaibohoõ tahe aõhetykrebo. Ijõ mahãdu dori bedelorohokÿ-txi resekre. Taiki tahe irynamy rurykre aøkõmydÿÿnana-ò. ¹³ Taita Jesuisi soldado dinodu-ò rarybere: –Makre, timybo wiji tahøtinymy tetyhynyte wesemy heka rarekre. Iurele teòdu reytere.

¹⁴ Iribi tahe Jesuisi Pedro heto-ò ralòre. Iriðre lahi heka aõma rubuna nihikÿ roimyhÿ. ¹⁵ Tahe Jesuisi rimyre tebò-di tamy rerire. Idi tahe irubuna iribi ròhønyre. Tai tahe tii ronyre. Ronymy tahe rÿsÿna riwinymyhÿ tamyreny. ¹⁶ Txiorotyhymy inyõ didyde aõma tyytybybina nihikÿ-di ratximyhÿõ. Iu Jesuisi sohoji rybeõmy rarybereu tahe aõwesele iribi ròhønyre. Kia webinadu didyde, tule reytere. ¹⁷ Iwese ihetxiu Isaia ryberiti rarybere wesemy heka tule riwinyre:

Jesuisi riwinyre. Kiamy wahe. Wabinanareny waribireny riwyre. Inatyhyre.

¹⁸ Iny sõwemy ributunyreu. Tai tahe taerydÿÿna mahãdu-ò tii rarybere: –Rokoiirenyhe kanawe-ribi ijã-ò. ¹⁹ Tai judeu mahãdu, bedeywina bederydÿÿduõ tamy rarybere: –Awana arakre titxibo makreu heka ahekile anakre. ²⁰ Tahe Jesuisi dirawyønyde tamy heka rarybereri: –Ijòrò heka ihãloo dire, ibÿtÿ dire, nawii bÿtÿ isÿ dire. Tahe jiarÿ, Deuxu Riðre Hãbutyhyhykÿ wahe, wahetoõre, waherinaõre. ²¹ Ka ijõ iheludu mahãduõ tamy rarybere: –Wanyrÿ, waha heka rurura. Tai heka juhoo arituunykre. ²² Tamy rarybere: –Manake,

wijile biwaheludunyeke. Rubuõmy rÿira, rubu mahãdu heka rituunykenyeke idi ratxireri.

²³ Jesuisi hãworo-ki ronyre tahe reurore. Ieryredÿÿna mahãdu riheludunyenyeke kia lawokile. ²⁴ Ahobetya-ki tahe yhy debore nihikÿ tamyrenye rehemynye. Tahe òbò nihikÿmy resemÿÿre. Uritereribile yhyhykÿ bee riòbònyra hãwò rilÿmyneke iòhòtyhyre. Jesuisi tahe ròròmy roimÿÿ iu. ²⁵ Tai tahe ierydÿÿna mahãdu heka riixixadÿÿnyre. Tamy raryberenyre: —Biwayrubunyeke, Wanyrÿ. Aõkõkeki, rukurunyeke. ²⁶ Jesuisi tamyrenye rarybere: —Aõherekibo kaibo ho taberutenyteri? Aityhyna sòwe aõkõ atxitenyteri. Jesuisi tahe rÿimy reare. Yhy debure-ò, òbò-ò rarybere: —Biyryke, bede binahakÿ. Tahe aõwesele ibutumy riyryra. ²⁷ Ierydÿÿna mahãdu urile ribedeòtiinyre. Tiibo ho raryberenyre: —Aõhãbubo tii ihÿre. Òbò, tahe yhy-wana tamy roholare. Iwese tii rarybere wese rityhynye. Irybemynale riwinyre.

²⁸ Kalileia aho ijò weribi ijana-ò ritehemynye. Kowa bede heka Kadara inire. Tule hãbu inatxi heka tyytybybina-di tai rasÿnyrenye wabedewo-ki. Kiary-ki tahe ibutumy iny ruberure. Iribi tahe ròhònymy reare. ²⁹ Aõwesele heka ryrymy roirenyre Jesuisi-ò rarybekremy: —Aõwe wadireny Tate, Deuxu Riòre? Kai aõbina binahakÿmy wahòròdÿÿõmyke. ³⁰ Tahe kowa-ki ixÿni juramy riroximy rÿimÿÿ. ³¹ Tyytybybina tahe Jesuisi-ò rexitòenyre: —Biwatòenybenykeki, ixÿni jurawomy aralorenkyemy biwateònyke. ³² Tahe Jesuisi rarybere: —Bòibenyeke hãbuwo-ribi. Tahe ròirenyre ixÿniwo-ò. Ixÿni jura tahe ibutumy rejuxunye ijòtira-ribi. Berawo-txi tahe rabòròròre. ³³ Ixÿni-di itxeredu mahãdu tahe hãwã-ò roirenyre ijyymy. ³⁴ Kia hãwã ludu mahãdu tahe roirenyre Jesuisi-ò itxeremy. Tai tahe tamy rarybere ibede-ribi ròhònykenye.

9

¹ Ribererenyeke aõma hãwò nihikÿro-ò reuròrenykenye kanawe-ribi ijã-ò. Tai tahe Jesuisi tahãwã-ò rehemynye. ² Tai tahe didydenyde weryrybòò byre-di idi betyky-di ramyrenymy roimÿÿre. Tahe hãbu mahãdu inatyhyna Jesuisi rieryreu heka hãbu dee rarybere: —Waexi, beysake, aòraruna dori reixãwididÿÿnyra. ³ Tai tahe ritidÿÿna bederydÿÿdu mahãdu retehereri. Ixideele heka rarybemahã: —Kia heka ibinamy Deuxumy rarybereri. ⁴ Iyky Jesuisi rieryre tahe tamyrenye rarybere: —Kai aõbo ibinamy waki tahateri arayky-ki. ⁵ Tímybo heka kaibo ho tahòtinyteri. Aõma iòraruna ariixãwidinyke aõbo ada iumy ariteytenyeke aõbo? Aõbohe

isiratyhyre wadee tahõtinyte wahe. ⁶ Deuxu-ribi waruru dire. Kabede-ki heka òraruna ariixãwididỹnyke jiarỹ heka Deuxu Riòre Hãbu tyhyhykỹ rareki wahe. Tamy rarybekre: —Myike, abyre bimykre ta mariakre asỹ-ò. ⁷ Tai tahe hãbu aõwesele rỹimy reare. Tahe taheto-ò rare. ⁸ Tahe bedede inysõwetyhy heka ribedeõtĩdỹnyre. Deuxu heka wowydyna riwahinyre. Tii iny-ò ruru riwahinyreki wahe.

⁹ Jesuisi iribi rariamy rare. Tai tahe tii Mateu-wana heka witxi reare ryki: —Jiarỹ heka nieru butudỹỹna heto-ki ranymahã. Jiarỹ rebutunymahã aõma inyòwydỹỹna heka rebutunymyhỹre. Iu Jesuisi wadee rarybere: —Manake waerydỹỹnaõmy heka beleke. Tai tahe jiarỹ tii-wana heka rare aõwesele heka ihemy rare.

¹⁰ Tai jiarỹ retobinyre kanakemy waheto-ò. Waheto-ki riroxikemy taerydỹỹna mahãdu-wana. Tai tahe sõwemy heka iny waery mahãdu dòidenyde, òrarudu nihikỹ mahãdu wahe. ¹¹ Tule heka fariseu mahãduõ tai ratximyhỹ. Tahe Jesuisi erydỹỹna mahãduõ kiaõ-ò heka rarybere: —Aõherekibo Jesuisi òrarudu nihikỹ mahãdu-wana riroxireri? ¹²⁻¹³ Tai Jesuisi roholarehe tamy rarybere: —Aõma òhotibedu heka, webinadu mahãdulemy aõnityhymy rarumahãre. Òhotibedu-ò kanakemy. Binadu mahãdu-ò tahe tiu ararariòwyõtyhy aõma òbiti widỹỹdu mahãduòle heka anade. Warurumy rurumyhỹle mahãdu ariwiòhenanykemy anade. Aõ awihikỹmy ixi-di rõhõtinyrerìò aõkõ wahe. Deuxu Ryberiti-ki tahe kaweselemy roire:

Ixiwe heka wadee awiõre aruxetòena wadee awire.
Kaiboho bierybenyke aõbo katyyriti rare.

¹⁴ Tahe Jesuisi-ò rarybere Joaõ eryna mahãdu: —Aõherekibo Joaõ Sebedeỹỹdu kia erydỹỹna mahãdu renarehemyhỹre rexitòenykreu. Fariseu mahãdu erydỹỹna heka tule heka renarehemyhỹre. Ihãrele taheka aõherekibo abedeerydỹỹna mahãdu heka tiu iwesemy riwinymyhỹre. Aõherekibo ka. ¹⁵ Taita Jesuisi dirawyònyde: —Iu iny inyhãwyymy roimyhỹre heka iny reysamyhỹre. Aõma kia weryrybò hãwy kialiina heka teysamy ratxirerimyhỹre. Tiu rirubunyõhymyhỹre teti-ò. Tahe aõutxumy tahe weryrybò hãwyymy heridu heka inyõ ritakremy ratximyhỹre. Iu tahe renarehekre heka. ¹⁶ Uritere inyõ deratyby ritòbònyõtyhy tyytỹmyra-di. Inyõ itòbòna tỹmyra-di ritòbònykeki, raykake heka iura ranihikỹke. Aõma iwesele rare aõma vỹ tỹmyra iròdutyy tỹmyrahakỹle ritidikre. Aõma itỹmyra-ò heka iròdutyy itỹmyrahakỹle raykake. ¹⁷ Aõhe tiu vỹ tỹmyra iròdutyy tyby-ò rihynyõtyhy. Inyõ kia wesemy riwinykeki taheka raykake heka rejuxunykre irube. Ihyna

heka rabinake. Vĩi wihikỹ taheka aõma iròdutyy tỹmyra hyy-nawo-ki ka awimyy rỹike.

¹⁸ Iu dohodỹỹdu hetoõ bede erydỹỹduõ heka Jesuisi-ò nade tariõre rurureki wahe. Tai ta Jesuisimyy reàlære tamy heka rarybere: —Aõma wariõre rarurura wahirari wahe. Kai waheto-ò manake wariõre ruru-ribi biixixanykremy. ¹⁹ Tahe Jesuisi taerydỹỹna mahãdu-wana roirenyre tii wana wahe. ²⁰⁻²¹ Tahe hãwyy rõhõtynyre heka: —Jikarỹ heka ityky reroti-kò karirikrekule karekytekre.

Tii dori ihãlubu rihyõhyy raremyhỹre waò inatxi reurò beòramy. Iòhòmy iribi reare. Ireroti wereysanakile rimymy resere. ²² Taita Jesuisi ròõsemyy reare. Tuu robire tamy rỹraxire: —Lerỹ, awi heka rare. Aityhyna heka arateyteynyre. Inatyhymyy teyteta. Tai tahe hãwyy aõwesele reytemyy reare. ²³ Idi tahe aõwesele rehemynymyy reare. Judeu wiuna be-deerydỹỹdu heto-ò rehemynyre. Tai heka hãwyy sõwemy robumyy rỹimyhỹ rubura-ki rawiunymyy rỹimyhỹ. ²⁴ Tai tahe Jesuisi tamyrenyy rarybereri: —Bòibenyyke hewahe. Hirarihikỹ heka ruruõhyky roireri. Urile heka rõrõmy roireri. Tahe iny rutzuenyyre. ²⁵ Tai iny sõwemy ròhònnyre iribi. Tahe Jesuisi ralòre titxibo hirarihikỹ roireriò. Debò-ki rimyyre tahe riteytenyyre. Rerixare ixyby. ²⁶ Ibutu bede bedemyhe inina-ò roholare. Kia deytana riwinyraò.

²⁷ Tahe hãbu ruetà inatxi Jesuisi riheludunyyre heka. Kia hetoy-ribi wahe. Tamy heka raryberenyre: —Kai heka iòlò Davi riokore tate. Tai tahe ruxetòena-di biwawotòenyke. ²⁸ Idi tahe Jesuisi taheto-ò ralore tai rasỹnymyy ratximyhỹò. Iny mahãdu ihewomy rare tahe ralòre. Tamy rarybere: —Inatyhymyy aõbo tetyhynytenyyte, ixyby arãitxeredỹỹnykeò. Ti-iboho raryberenyre: —Kõhe Wanyrỹ, retyhynyre. ²⁹ Jesuisi rarybere: —Ainytyhynadireki arue tabita. Aõwesele robirenyre. ³⁰⁻³¹ Jesuisi heka rarybere tarurumyy tamyrenyy uritere ijyyõmykremy. Tai tahe aõma ròirenyre ibutuko re-lyyrenyyre.

³² Idita tako-ò rexidorunymyy reareki tasỹ kia hãbuõ-txi reare tyytybybina-di ratximyhỹò. ³³ Tahe Jesuisi-ò didydenyyde hãbu irybeõna kia tyytybybina òraru-ki wahe. Jesuisi tuu òlòdỹỹnyre iribi. Iule tahe hãbu aõwesele heka rarybere iroo-ki. Kia iny ibutumyy ribedeòtiidỹỹnyre. Timy heka rarybeõhyyre iko-ki juhuy raremyhỹu. Tuu rabiõhe iwesedỹỹnadumyy. ³⁴ Idi tahe fariseu mahãdu rarybere: —Tyytybybina-di ratximyhỹre. Tai heka tyytybybinahakỹ reteõnymyhỹre iny-ribi. Ihãrele heka Satanasi-di ihỹre. Tyytybybinatyhy wedu heka ratximyhỹre.

35-36 Idi tahe ibutumy hāwā hāwā-di Jesuisi rariamy rare ròbedeerydỹmy. Judeu mahādu dohodỹna heto-ki relyymyhỹre, Rybewihikỹmy. Tai Iòlòna kia ritỹnynymy tuu relyymy. Ibutumy iny bina bina kia heka riteytenyre. Iny nade ihewo-ribi. Sōwemy heka iny aōna aōna bina binahakỹ riwinymyhỹre idi rỹimyhỹ. Titxibo rakre heka rieryōhykymyhỹre ta aōna aōna òraru-ki idinoduōreki wahe. Tai tahe Jesuisi riwotòenymyhỹre ibutumy tiiboho dori budoeni wese ratximyhỹre, itxeredu ihoōreki. ³⁷ Tai tahe taerydỹnana mahādu-ò Jesuisi rarybereri: —Iny heka maixōmo sōwehekỹ rỹira wese heka iny ratximyhỹre. Aōma ibutelemy heka arixidu rỹira. ³⁸ Bexitòenyke Deuxu-ò. Tii heka bederomy maixōmo rỹira wedu rare. Bexitòenyke tamy aōbo maixōmo arixidu-ò kiditeònykemy. Irybe-di heka raaōmysỹdỹkre ibedero-ki. Ibutu bedero-ki heka idi raaōmysỹdỹkre.

10

¹ Ributunyre Jesuisi aōma tawa-ò inatxi reurò kia bede erydỹna mahādu. Tamy heka ruru riwahinyre. Aōma tyytybybina riteònykemy. Tule tamy riwahinyre ibutu binana deytana heka riwahinyre tamy.

² Kia heka tadeòdỹmahādurenynimy ararybekre. Juhuu heka Simaō Pedro. Juhuu heka Simaō inire, ihewomy tahe Pedromy naninide. Andre ijō. Tii heka Pedro seriòre rare. Txiau, Joaō-wana heka Zebedeu riòre rare: ³ Filipi tasỹ ijō rare. Idi tahe Bartolomeu ijōre. Tome ijōre. Mateu ijōre, jiarỹ wahe. Jiarỹ nieru tarasaduō rare, imposto tarasadu wahe. Ijō Txiau tasỹ Afeu riòre rare. Tadeu ijōre. ⁴ Simaō ijōre. Tii Kana bede luduō rare. Judasi Isariò ijōre. Tii heka Jesuisi tyhedỹdu rare.

⁵ Jesuisi taerydỹna mahādu waòinatxi reruòmy riteònyre. Tamyreny rarybere: —Judeukōdu mahādu-ò aōkōkre reteònyre. Aōma Samaria mahādu hāwā heka ralòōhyymyhỹre.

⁶ Kaiboho heka bōibenyeke judeu mahādu-ò sohojile. Tiiboho Israeli riokore mahāduō ihỹre. Aōma budoeni reòsamyhỹre mahadu wesemy tiiboho ratximyhỹrenyre.

⁷ Aōma tamy marybebenyeke: —Deuxu Iòlòna biu-ki heka aōwesele kedehemynykemy ihỹre. ⁸ Webinadu mahādu heka biteytenyeke. Aōma iny rubu-wana witxi beakeki, biixixadỹnyke rubu-ribi. Tykybina yjy yjyhykỹ-ribi iny biteytenyeke. Tyytybybina inywo-ribi biteònyke. Iwese aō tetate wese iòwykō heka ijō-ò biwahinymahāke, iòwykō wahe.

⁹ Uritere nieru wydyōmy, womati tỹrỹrỹhỹkỹ nieru aōkō, prata womati nieru aōkō, cobre womati nieru aōkō wahe.

¹⁰ Aōma anieru hyna nihikỹ wydyōmy, awa ijō wydyōmy, ijō dera wydyōmy. Aōma òwòru arirana wiòhedỹna wydyōmy.

Aõmysÿdÿÿdu taòwy riwykre. Kia òbitire. ¹¹ Hetoõ malòke. Kia heka arayrubunykre. Adee riwahinykre ibutumy aõmybo rarumyhÿkre. Iu hãwã-ò malokreu, hãbu ityhydÿÿdu mahãduõ biijekre. Taihyy bonykrehyy tahe iwitxira hãwã-ò iribihyymy makre. ¹² Iu hetoõ-ò malòkeu Deuxu ywina tamy marybekre, Deuxu deysanamy wahe. ¹³ Kai awimy ityhydÿÿdu hetomy rÿike wana, biwahinyke aalàna tamyreny. Kai òbitimy aõkõ atxiteri wana tahe uritere tamy Deuxu deysanamy tamy wahidÿÿõmy. ¹⁴ Aõma tii arybe-ò roholaõkeki, kai hãwã-ribi bexitake taheto-ribi wahe. Tahe iribi bòhònykeu tahe awabrybyxi biubÿtÿnymy bòhònyke. Tii tahe tamyreny rioimyhÿre. Aõma tamyreny ibinatyhykre. ¹⁵ Inatyhymy heka adee ararybekre. Sodoma hãwã mahãdu, Komora hãwã mahãdu inatyhymy heka ibinare tamyreny tahe isiraõkre aõhòkÿmy dÿÿnana wahe. Aõma kia hãwã arybe-ò raholara heka kia ratyre heka tamy isiraõkre. Kia hãwã tahe aõnityhymy aõhòkÿmy rotÿÿnykre. Ywisidÿÿna txu heka rÿekreu wahe.

¹⁶ Iwese budoeni ijòrò aholay-ki rÿikre wese heka kaiboho boibekre. Hemylala erydÿÿna wesemy heka maraykynykre. Idi tahe sòwemy aõma ywina-di maraykynybenykre bòtòwesena-di. ¹⁷⁻¹⁸ Uritere inatyhy heka aramykre araròtenykre dohodÿÿna hetowo-ò adì ralokre. Waòraru-ki heka bede dinodu mahãdu heka araywisidÿÿnynakre. Judeukõdu mahãduko Rybewihikÿ Tÿmyra rarybekre. Tiiboho arahãtenykre. ¹⁹ Aõ heka belyyke ikoreny ibutumy roholakemy. Aramykeu heka uritere nohòtiõmyke aõmybo marybekremy ywisidÿÿna-ki wahe. Bede heka ariwahinykre rybe ibededÿÿnanau. Rybeõmyke, urile rybeõmyke. ²⁰ Kai ixiwanale aõkõ marybeke. Aõma Deuxu Tyytybytyhy arãwiòhenanymyhÿreny. ²¹ Inyõ heka taseriòre rityhenykre. Tybyõ tule tariòre rityhenykre. Aõma iriòre tasÿ tyby-ò iky reakre idi rirubunykre. ²² Ihyy ibyrymy heka aluu aõkòkre waòraru-ki. Ibutumy iny deramy rarehyyke waòraru-ki: Inyõ tule òbitimy rarekreki, ikonanatxu-u, Deuxu Iòlòna-ò ralokre. ²³ Tahe anatakre. Aõma hãwãhãkÿõ-ki atxikeki mahenykre ijõ hãwã-ò. Ihewoludu ikonana hãwã hãwãhãkÿ-ribi behemynyke-ribi tahe adòòsekre. Judeu hãwãhãkÿõ-ò behemynykrekõule tahe adòòsekre, jiarÿ Hãbutyhyhykÿ wahe.

²⁴⁻²⁵ Aõma bedeerydÿÿdu mahãdu tahe aõma ierydÿÿna mahãdu ratyre rare. Tule iwedu deòdu ratyre heka ihÿre. Iwesereny tahe boibebenykre. Tahe awedu tate. Inyõ tahe riwarinimyhÿre Satanasi, Belisibu wahe raremy. Tahe iwe-sele heka iny araninikre waweselemy, ibinatyhyre wahe. ²⁶⁻²⁸ Jiarÿ adee wiji relyreri. Biurasòm y heka tuu bedelyykre

ibutu ijohonanamy adeeremy relyyreri. Wasimy wijirumy adeeremy relyyre. Biurasòmý tahe ibutu ijohonanamy tuu belyybenykre. Uritere ilau brebuòmý. Aõbo wasimy rýire heka ibutumy ratýnykre. Uritere ilau brebuòmýke. Adeelekre rirubunykre atyytyby ta rirubunyõtýhy. Iruruõre dori atyytyby rirubunýké. Deuxule tahe bityhynyke. Tii dorihe iruru-di heka rare. Tii bede luru-txi heka atyytyby bede luru heõtý-txi heka adi rehuke. Bityhynyke idile maraykynyke. Hãbu lau brebuòmý hãbu aõbina bina riwinymyhýre lau brebuòmý. ²⁹ Nawiiõ iny riwymyhýre womati nieru iyja-di, iòwy riõre iny heka riwymyhýre. Ibutumy heka Deuxu nawii rieryre sohoji sohojimy. Tiu heka Deuxu rieryõhyymyhýre nawii sõmo rurumyhýreu heka tiu rieryrykõmy idi reteheõtýhy. Kiawese aõbo tahõtínymahãte. Aõkõre, inatyhymy idi retehemyhýre. Ijõ rurumyhýreu heka tuu robimyhýre. Aõma Deuxu heka anaerymyhýre nawii sõmo ratyre heka aumy rierymyhý. ³⁰ Ara erymy heka aõma arati-ki tiwesebo radeti rýimyhýre heka rierymyhýre. ³¹ Breburenykõmykre, kaiboho dori nawii ratyre Deuxu-ò toite. ³²⁻³³ Kai marybeke: –Jiarý retyhynyre dori tahe umy arelyyke. Jiarý heka umy ararybeke inynyrý dee biu-ki wahe. Iny sõwehekýy-ki riwatxiõnykeki tule aratxiõnyke jiarý Wahako-ò. Jiarý heka suò anade.

³⁴ Aõ ywina wydumy aõkõre heka anade. Jiarý heka ywina aõkõre diwyde. Bedejeiejidýmy anade iribi wadee wou rýikremy. Hãbu heka tybe òludumy rarekre.

³⁵ Tule hãwyy tadi òludumy arisynykre. Tule iriokorese tariòrelahi òludumy arisynykre. Aõma inyõ òludu heka tasý mahãdu òludumy rarekre.

³⁶ Boluu adireny boreny heka boibekre. Kia lumy heka boibekre. Tai tahe iratyremy boibekre aõkõkeki tahe waluuõkeki tahe wahõrõ mahãdumy aõkõ boibeke.

³⁷⁻³⁹ Kaweselemy boibeõkeki. Tai tahe kai wahõrõ mahãdumy aõkõhe mabekre. Aõma biyrurubunutyhykeki tahe kai ihãrele aõkre. Aõma kai waðraru-ki aõhõkýmy botýnykeki wadee waaõmysýdýy òraru-ki inyõ anarubunykeki aõhe adee rutýnykeki. Tai tahe aumy ròhõnykre inyõ tasý-ò aradykeki iwese tii tasý-ò riwadyra wesele heka aradykre.

⁴⁰ Tii riwadyra wana Deuxu heka ridymyhýre riwateònyreki wahe. ⁴¹ Deuxu rybeduõ bidybenykeki. Tii Deuxu-ò arãwahinykre. Deuxu adee uriiõno kadiwahinykre. Adeeremy kidiwahinykre. Wahisidýy na ritakre wese heka tule kai bitakre. Adeeremy ararybekre. Deuxu hõrõ mahãdu heka bimymahãbenyke. Aheto-ò bidybenyke hãbuwi ihýrenyre. Tiiboho dori wese uriiõno ritarenykre

wesele kaiboho bitabenyke. ⁴² Kai uladu-ò bemonað biwahinykeki bedi imonamy. Tai tahe kanakre inatyhymy adee aõ kidiwahinykre. Kai waòraru-ki ityhydÿÿdu-ò bee biwahinykeki, inatyhymy heka aòwy adee kanakre.

11

¹ Jesuisi heka rexihure aõma taerydÿÿna mahãdu waðinatxi bederydÿÿna-ribi. Kia bede ywina tamyreny riwahinyre. Rexihureu tahe rare ròhònyre iribi hãwã-di. Aõma rybe ritÿnydÿÿmy rakremy hãwã hãwã-ò.

² Idi tahe ròtenywokile heka iu Joaõ roimyhÿ. Aõbo Jesuisi tahe iu aõna aõna wiwihikÿ ritxienymyhÿreu heka Joaõ tamy roholare. Ròtenywo-ki roimyhÿ-ribi. Idi tahe Joaõ taerydÿÿna mahãdu riteònyre Jesuisi-ò dÿÿraximy: ³ —Kohe, anaraðdenyde tate. Aõma Deuxu deòdÿÿna wahe kanakre aõbo ihewo-ribi. Ariraðrenykre aõbo urihimyò. ⁴ Tai Jesuisi ri-rawònyre: —Aõma bòðebenyke ixbyyle Joaõ-ò. Belyybenykre ikò aõna aõna wiwihikÿ rewinyre arureny-ki tule tabite wamyreny. ⁵ Aõma iruetãhãkÿ heka. Reruedÿÿnymy rare wahe. Itiere tasÿ retinywãhãre dinoduhukÿ ityy reytemyhÿre. Aõma ijõ Rybewihikÿ Tÿmyra roholaðhyymyhÿre tasÿ tule rei-johonadÿÿnyre. Aõma rubu tule rubu-ribi reixixadÿÿnyre. Rybewihikÿ Tÿmyramy heka retÿnydÿÿnyre ibutu iny-ò wahe, iny aõkõ mahãdu-ò wahe. Tule Joaõ-ò marybebenyke kaweselemy wahe. ⁶ Maratyhybenykeki, beysabenyke.

⁷ Iribi ròhònyreu tahe Jesuisi heka rarybere Joaõ bededÿÿnanamy. Aõmybo wahe Joaõ-di ròhòtinyrenyre aõmy tuu bedi nohòtinyrenyre tamy itxereny bederahy ròirenyreki wahe. Otxirarade wese yhy-ki tahòtinyteri. ⁸⁻⁹ Ada aõma hãbu urimynodutyhymy aõbo idi ròhòtinyrenyre. Aõma butòre wesemy idi ròhòtinyrenyre. Ada iwitxiramy aõbo idi tahòtinytenyete hãbu tyywihikÿdiremy idi rahòtinytenyete. Iòlò taheto wihikÿ-ki ratximyhÿre. Aõkõre, kia iny heka aõ Deuxu rybeduðomybo tahòtinytenyete. Inatyhy tii kia rare. ¹⁰ Iratyre heka tii rare. Aõma dori Tyyriti-ki rarybemyhÿre:

—Tii heka wako-ki kadehemynykreky ratximyhÿre, wamy relyykemy, wary riywinymyhÿre.

¹¹⁻¹⁴ Inatyhy heka rare. Tii heka ibutu hãbu ratyre ratximyhÿre. Ihãrele tahe heka Deuxu Iòlòna-ki heka ijõ iny iratyre ratximyhÿre. Hãbu binahakÿ heka Deuxu Iòlòna-ò raaõbinanymyhÿre. Joaõ rexidelenyry rybe itÿnydÿÿmy rexidelenyrehyyle heka ritelemy ralore. Tule wiji nalòmehÿde sòwemy. Iu Joaõ rehemynykoõle heka tuu rarybemyhÿre ibutu Deuxu rybedu mahãdu heka tuu rarybemy raremyhÿ. Tule Moisesi bede ywina kia rarybere. Tii Eliasi wesele ihÿre.

Tetyhynytenyte aõbo. Iwese Deuxu rarybereri wesemy heka tii nade. ¹⁵ Inyõ ierysomy rurukeki, roholake wiji. Aõmybo ararybekre kainomy tiwesebo rÿimyhÿremy. ¹⁶ Tiiboho heka iwese weryry uladu risinymyhÿre wesemy ihÿrenyre. Kiamy heka tiinamahãdu-ò rarybemyhÿre: ¹⁷ —Jiarÿboho heka aõma wiunawihikÿ-di rawinymyhÿrenyre. Idi tahe teysatenyõhyymãhãtenyte. Tahe wiuna bederarysyna-di heka rawiunymyhÿrenyre. Ta bedewoõhyymahãtenyteri. ¹⁸ Joaõ Sebedÿÿdu heka riroxiõre. Vÿimy riõõre. Inywesereny tai tarybetenyte: —Tii raitxÿtemy ihÿre. Tyytybybina-di ihÿre. ¹⁹ —Jiarÿ Deuxu Riõre heka rehemynyre Hãbutyhyhykÿ wahe. Jiarÿ reroximyhÿre. Reõmyhÿre tahe kiaboho heka waluu aõkõ heka toite. Urile heka wamy tarybemyhÿtenyte wabyre nihikÿremy wabemomohõkÿremy. Aõma òrarudu kia liinatyhy heka jiarÿ rare. Aõ ikõkõlemy heka taraykynymyhÿtenyte ihãrele taheka õbitilemy ixi-di tanohõtityhÿtenyte.

²⁰ Jesuisi heka sõwemy aõwihikÿmy riwinomy raremy. Ihãrele heka imahãdu rityhynyõhyymyhÿre heka. Kia Jesuisi heka rarybere kia hãwã mahãdumy. ²¹⁻²² Orasi hãwã aõ heka adee binatyhymy kanakre amahãdu-ò wahe. Besaida hãwã mahãdu, kaiboho aõna aõna wiwihikÿmy tabitenyte ahãwãreny-ki. Tiu heka ixi-txi õhõtireny reaõhykymyhÿre. Jiarÿ aõma Tiro hãwã-ki Sidõ hãwã-ki aõna aõna wiwihikÿ ariwinyre wana inihe heka ixi-txi tõhõtireny reare iniheka saumy tyky rexytynyre tule brybysi ixityrereny heka rexi-humy. Sidõ hãwã Tiro hãwã heka urihimyo adeereny isirakre. ²³⁻²⁴ Kafanaõ hãwã mahãdu! Kaiboho heka tule ixixireny õhõtireny reaõhykyre. Aõma kaiboho heka awireny ixidireny tahoõtinyamahãtenyte, awityhyremy. Kaiboho heka òhòtenamy bekoabenykre bedebina heòtyhykÿ-ò dori be-sebenykre. Sõwemy dori aõwihikÿmy kaiboho tabitenyte. Deysana wiwihikÿ-di wahe. Tiu heka ixi-txi õhõtireny reaõhykymy aõrarureny-txi. Aõ wiwihikÿ Sodoma hãwã-ki rewinyre wana wahe. Tiu heka rabinaõhyyre inihe heka wiji-ò. Aõkõ botÿÿbenykre aõma Sodoma hãwã ratyre heka aõhõkÿmy botÿÿnybenykre, Deuxu ywisidÿÿnatxu.

²⁵ Tahe Jesuisi rexitõenyre Deuxu-ò: —Waha, biu bede-wana iwedu atximahãte. Kai uladu-ò aõna aõna tetÿnnyte. Tewõmahãte heka kia ibedeeryhykÿ lau heka tewõmahãte. Kai ixi-di bedeeryhykÿmy rõhõtinyhÿre lau wahe. ²⁶ Tii heka adeewinare. ²⁷ Ibutumy heka Waha wadee riwahinyre tii heka riwaeryre. Jiarÿ tule tii reeryre. Aõma ixidee wikeki inydee ariteòsinyke. Timybo Waha rare. ²⁸ Elehydÿÿmy buruke aõbo? Manake wadee. Jiarÿ heka araelehinykre. ²⁹ Walõtityreherina ixidee bitidibenyke. Tai tahe wawana

maaõmysÿdÿÿbenyke. Arabederynykre heka ywina-di. Aritidiõtÿhy heka aõ utxiehekÿ atyrereny. Elehyna adeereny ariwahinykre awo araykyreny-ò. ³⁰ Aaõmysÿdÿÿna adeereny rewahinymyhÿre isiraõre heka. Iutxiemy aõkõ rare.

12

¹ Sabado txuu, judeu elehynatxu Jesuisi rariamy ròirenyre maixõmoni oworu-ki. Tahe rekoarenyre aõma maixõmoni oworuro-di heka irenyre. Kia heka tahe Jesuisi taerydÿÿna mahãdu heka riarimyhÿre aõma riyrenykremy rama rahu-raki. ² Iu-ki tahe fariseu mahãduõ retehemy ratximyhÿre. Tiiboho tahe rarybere kia Jesuisi-ò rarybere: —Kia hewa brebuna rare aõma sabadotxu riwinymyhÿré: —Aõherekibo aerydÿÿna mahãdu iu riwinyrereri. ³ Tahe Jesuisi tamy rÿÿraxire aõma ijyymy ikoreny relyyre iwese Davi riwinyre wesemy heka riwinyrereri ramy rahureu. ⁴ Davi riki heka ralòre Deuxu dohodÿÿna hetowo-ò heka ralore. Tai tahe rirÿsÿmyhÿ kia aõma xiwena-ki heka riymy. Kia orotxu heka aõma xiwena-ò hidÿÿna mahãduòle rÿÿmy. Tahe ihãrele heka riyrenyre heka. Tajoi mahãdu-ò riwahinyre. ⁵ Kia wesemy aõma tariakõte bede ywina tyyriti-ki wahe. Aõma xiwena wahidÿÿdu heka rityynyõhyymyhÿre. Aõma sabadotxu kia wahisidÿÿna. Xiwena bede ywina wahe. Iu dohodÿÿna hetowo-ki ratximyhÿu. Tii heka sabadotxu bede ywina rityhynyõhyymyhÿre. Tahe heka aõbina bina riwinyrenyõhyymyhÿre. Kia tahe heka tule heka bede ywina tyyriti heka ritidÿÿna roire. Idi tariatenyõte. ⁶ Inatyhymy heka adee ararybekre. Inyõ kaki ratxikeki jiarÿ heka kaki heka inyõ ratximyhÿre aõma dohodÿÿnahakÿ heto-ki wahe. Dohodÿÿdu mahãdu ratyre heka watximahãre jiarÿ wahe. ⁷ Kiamy heka ritidÿÿna rÿÿmyhÿre. Jiarÿ heka xiwena luure ihãre tahe sõwemy heka iratyre ruxetõena luure. Jiarÿ aõma xiwena luure ihãre tahe iratyre heka aõma ruxetõena luure sÿ. Kaiboho terytenyte wana. Aõma heka ibinamy tarybehynnyhÿte inyõ teòsamy ratxikeò. Aõma aõ riwinyrenyõhyyre. Kiamy wahe. ⁸ Jiarÿ dori Deuxu Riòre Hãbu watximyhÿre. Jiarÿ tule aõma sabadotxu wedu wãhãre.

⁹ Tai tahe Jesuisi nade heka ixyby aõma tohodÿÿnareny heto-ò. Ralòre heka sabadotxu. ¹⁰ Hãbuõ ratximyhÿre debò binare. Debò rayjayja ihÿmyhÿre. Tahe fariseu mahãdu heka Jesuisi-di mynamy ratximyhÿre. Aõ rybebinamy rarybeke òraru-ki rimykeny. Tai tahe rÿÿraxire Jesuisi-ò: —Timyrebohe brebuna aõbo sabadotxu deytetÿÿ ada aõkõre aõbo. ¹¹ Tai ta Jesuisi rirariwònyre: —Kaweselemy røkõhõtinyrenyke. Kai heka aõmy abudoeni sohojilere. Sabadotxu heka reseke hãlooro-txi aribi. Timybo mohõtinyke aõma bitake

hãlooro-ribi. Inatyhyre aõbo. Sabadotxu hãrele bitake. Kohe, inatyhyra. ¹² Hãbu heka budoeni ratyre heka iõwy rare. Aõma sabadotxu aõwaxinyre heka reyteke. ¹³ Tai hãbu-ò rarybere Jesuisi: –Ebò biditytyke. Debò ritytyra ta wiwesele debò relere awimy. ¹⁴ Fariseu mahãdu heka wii ributunyre, iribi rõhõrenyreu wahe. Widee raryberenyre: –Aõma timybo rikisỹnyrenykre rikimynyrenykre rikirubunynyrenykre.

¹⁵ Tahe Jesuisi rierymyhỹ kiamy rarybermyhỹreny heka roholamyhỹ. Tahe Jesuisi rierymy heka. Iribi irehemy ratximyhỹreny hãrele, rierymy heka. Iribi tahe rexitare heka hãwã-ribi wahe. Idi heka ihemy heka rare rihe-ludunyre. Sõwemy heka webinadu ihemy rare. Ibutumy riteytenyre. ¹⁶ Teyteydỹna mahãdu-ò rarybere: –Uritere itỹnydỹỹõmykremy tuu ijyyõmykremy inyko-ò. ¹⁷ Ihexiu Isaia tyyriti-ki heka kawesemy rỹimyhỹre. Tii heka Deuxu rybeduõ rare.

¹⁸ –Kaheka Wadeõdu rare. Tuure heka jiarỹ, tii heka retare. Rehixinyre. Tii heka deysana wadee riwahinymyhỹre Tatytybytyhy tamy ariwahinykre. Ywisidỹna txuu heka ibutuko-ò relyykre.

¹⁹ Tii heka rryryõtyhy rebureõtyhy heka inyõ-wana widee. Tiu heka inyõ roholaõtyhy irybe dee. Ryki heka inyõ irybe-ò roholaõtyhy.

²⁰ Aõma bõtõreõ irybõhõmy roikeki. Tii raõrõõtyhy. Tx-ueõtyjurà loosõna urihimyòkeki heka tiu ruriõtyhy eleti-di. Tii ritakre iaõbinana, inatyhynaõ binana wahe.

²¹ Ibutumy heka irarõsõna iribi ritakre.

²² Hãbu rybeõ ruetãõ heka iny didydenyde Jesuisi-ò wahe ralõmyhỹreki wahe. Tii tyytybybina iwo-ò ralõmyhỹreki wahe. Jesuisi tyytybybina riteõnyre. Tai irue heka awimy relere rarybere. ²³ Ibutu iny sõwe heka heka ribedeõtiidỹnyre. Widee tahe raryberenyre: –Ka heka Davi riore riõre õsana rare, Deuxu deõdỹna wahe. ²⁴ Tahe fariseu mahãdu-ò roholare. Tahe rarybere Jesusimy: –Tii inatyhymy tyytybybina riteõnymyhỹre inywo-ribi. Aõma tyytybybina wedu ruru-di heka riteõnymyhỹre. Belisibu ruru-di wahe. ²⁵ Jesuisi heka rieryre iraykyreny. Tai tahe tamy rarybere: –Ijyymy heka tamy rarybere. Iõlõna mahãdu wiribi ibutumy rexihixinykeki tahe rexihukre ibutumy wiribireny. Tahe hãwã mahãdu taijoiy-ribi rexihixinykeki, awi aõkõ rare tai wahe. ²⁶ Wiribi rexihixinyke wana. Tule awi aõkõ rare tai wahe. Aõma Satanasi rexideõnykeki tahe tayreny-ribi rexitake. ²⁷ Belisibu ruru-di tyytybybina ariteõnyke wana

aõdibohe aheludu mahãdu riteõnykemy ratximyhÿre. Tii-boho heka aywisidÿÿdurenymy ratximyhÿre. ²⁸ Jiarÿ Tyytybytyhy ruru-di ariteõnykeki heka kaiboho arurunareny Deuxu-ribi nade. Iõlõna adeereny rehemynereri. ²⁹ Inyõ heka hãbu rurutere hetowo-txi ralõõtyhy wasimy wahe. Tai rawasinymy ratximyhÿkeki tahe urile juhuu hãbu ritaataake. Idi tahe iheto-ribi aõdibo rawasinyke. ³⁰ Inyõ wabiõwamy aõkõ ihÿre wana heka, waõludu rare. Inyõ wawana ibutumy ratxiõmyhÿre wana tahe raybåtãmehÿre. ³¹ Inatyhymy jiarÿ adee anarybekre. Ibutu õraruna kanaixãwididÿÿke. Hãbu aõtxile aõbina bina rarybemyhÿre. Sohojile taruxãwidÿÿõtyhy. Aõtxile inyõ aõbina binamy Deuxu Tyytybytyhy rarybekeki. Tii aõraru rataõtyhy. Kia heka õraruna tiiehyymy rarekemy ihÿre. ³² Hãbutyhyhykÿ heka Deuxu riõremy aõbina binamy iny rarybekeki, wamy wahe, tii tahe ixãwidina dire. Deuxu Tyytybytyhyhymy rarybekeki, tii tahe iixãwidinyõhyre. Tiehyy kia õraruna-di rareke. ³³ Jesuisi rawesenanyre iny õwõru wese rare. Õwõru awimy rÿike wana, tai heka iratywihikÿõ-ki iny rahake. Ruru rasunymyhÿre raruburerimy ihÿre. Kia tasÿ iratywimy aõkõ rÿike ibinamy. Aõma õwõru iny rierymyhÿre aõbo iribi iraty dejuxunymyhÿde õraru-ki iny rierymyhÿre, awire. ³⁴⁻³⁵ Kaiboho heka hemylala mahãdu wesemy atximyhÿtenyte. Kaiboho heka abinatyhymy ahãtenyte. Timybo heka kaiboho aõwiihikÿmy marybebemyke. Arayky aõbina bina hakÿlemy tõhõtinyteri wana. Tai taheka ary tuu rõhõnyke ary tuu rarybeke. Aõma hãbu wihikÿõ ratxiremyhÿre wana aõnana wiwihikÿle tarayky-ki riyrubunymyhÿre. Tii heka rarybemyhÿre. Hãbu bina tahe tarayky-ribi ibinalemmy rarybemyhÿre. ³⁶ Ibutumy aõmybo iny rarybemyhÿre heka ywisidÿÿna txu tuu rarybemyhÿre rierymy timykibo tuu rarybere wahe. ³⁷ Õrarukibo rarybere: —Arybe õraru-ki heka ywisidÿÿna-ki atxiteri. Bitakemy aõbo ada aõkõre aõbo.

³⁸ Bedeerydÿÿdu mahãdumy heka fariseu mahãduõ tamy rarybereri: —Erydÿÿdu, wadeereny biteõsinyke awiihikÿõ. ³⁹ Jesuisi dirawyõnyde: —Iny kamahãdu heka ibinatyhy rare aõ awiihikÿ rexitõenymyhÿre. Abina binale wahe. Aõ wihikÿle bobiõtyhy. Tahe sohoji aõwiihikÿõmy heka mohõtinyke. Jonasi widÿÿna wahe. ⁴⁰ Jonasi Deuxu rybeduõ widÿÿna wahe. Tii inataõ txu inataõ rummy uturahakÿ wona-ki ihÿmyhÿwesemy. Iwese Deuxu Riõre Hãbutyhyhykÿ bede-ki rarekremyhÿ wesemy inataõ txumy inataõ rummy. ⁴¹ Ninive hãwã mahãdu heka roholarenymy tõhõtirenny reare. Iu Jonasi rybe ritÿnydÿÿreu wahe. Tahe inyõ kaiboho tamy taholatentyte. Sõwemy heka iny Jonasi ratyremy ihÿre. Ihÿrele kaiboho ixitxirenny õhõtirenny reaõre. Ninive tamahãdu tahe

ibinany adeereny rarybekre. Ywisidÿÿnatxu wahe. ⁴² Iòlò Hãwyyõ heka ibòò irehe-ribi nade. Aõma Salomaõ bede erydÿÿna-ò roholakemy. Kaiboho heka inyõ-ò taholatenynte. Salomaõ ratyre heka sõwe inihikÿ ihÿre. Ihãrele ta ixitxi nohõtireny reaõre. Ywisidÿÿnatxu heka Iòlò hãwyy ibinanamy kÿnarybekre umyreny wahe. Ywisidÿÿnatxu. ⁴³ Aõma tyytybybina hãbu-ribi rõhõnykreu tahe elehydyÿÿna riijekre. Aõma bedebinana tòteehekÿ tahe tuu reakre. Ihÿre tahe tai rahaõhykre elehyna-ki wahe. ⁴⁴ Tai tahe ixidee rybekre: — Aròðsekre kÿhe. Iribi ranywÿhÿreò anakre. Tai tahe kia hãbu-ki rahara. Tyyrahakÿmy iwo-ki iruxeramy. ⁴⁵ Tai tahe ijõ-txi reare. Debò inatxi reurò tyytybybina-txi iratyre tyhy wahe ibinare. Tai tahe ridyke tahãbu-ki rasÿnyrenykemy. Kia hãbu heka iwese juhu raremyhÿre ratyre ibinamy ratximyhÿre. Kaiboho heka kia tyytybybina wese atximyhÿtenynte.

⁴⁶ Jesuisi tahe ijõ-ò rarybere ijõ ijoi-ò, tai tahe ise rehemyntyre, iseriðreboho-wana. Sõwemy iny mahãdu-ò heka rarybere. ⁴⁷ Inyõ tamy rarybere: —Inyõ heka arãijereri adi ahelyÿÿna. Kie heka rehemynyreri adee rarybekemy adi ratxireri. ⁴⁸ Jesuisi dirawyònyde: —Mota heka nadireri, mota heka waseriðrereri? ⁴⁹ Tai tahe tebõhe riteòsiriteòsinyre taerydÿÿna mahãduõ-ò. Ka heka nadi rare. Ka heka waseriðrere. Ka ijõ heka waseriðre. ⁵⁰ Wahadeewi riwinymyhÿreki tahe, tii heka nadi rare. Waseriðre rare. Waha dori biu-ki ratximyhÿre.

13

¹ Itxu taheka Jesuisi rare heto-ribi Kalileia aho ijà-ò. Tahe tai ronyre. Tahe rexiterenyre Jesuisi iny ribedeernymy. ² Tai ibututyhymy heka iny wirotyre. Tai tahe Jesuisi rexitareny urihimyo hãworo-ò ronony rexitaranyre. Iny sõwehekÿ mahãdu tahe aho ijãkile heka roholamy rÿimyhÿre. ³ Tii heka relyymyhÿre aõma ijyyõ relyyre: —Aõna aõna wese ijyy rawesenanyre. Hãbu alòbòromy rara. Tii heka alòbòròna dehuu rare. ⁴ Ijõ heka idi rehumyhÿu heka ijõ ryro-txi resere. Nawii heka riròmyhÿre riore heka. ⁵⁻⁶ Ijõ tahe rejuxunyre aõma manarutysu-txi. Tii tahe raumynyre aõwesele. Iraruxiðlemy heka rÿimyhÿ suu ibutureki. Idi bedetòtee rimoadÿÿnyre. Idi tahe rurure. ⁷ Òwòrudÿÿ resere edey-txi. Idi ta ruhunyre edewanale. Idi tahe ede riòdesedÿÿnymyhÿre. Tai heka raratynyðlemyhÿre. ⁸ Ijõ tahe resere suwitxirawihikÿ-txi. Tai tahe sõwemy raratynyre. Sohoji òwòruty-ribi tahe 30my raratynyre iraty wahe. Ijõ 60my raratynyre iribi. Ijõ ta 100my raratynyre. ⁹ Tahe Jesuisi heka rarybere: —Kia boholatyhymy bonyke. Òhõtirenydikeki boholabenyke.

10 Tai tahe ierydÿÿna mahâdu Jesuisi ritÿÿraxinyre: —Aõherekibo kai ijyy-di bierynanykemy atxiteri, rawesenanyreri wahe. 11 Tai tahe dirawyõnyde: —Kaiboho aõmybo Deuxu reerynanyre kaiboho bierybenyke. Ijõ mahâdu tiu ijyy rieryõtyhy. Kaiboho dori Deuxu Òlõna teerytenyte. 12 Hãbuõ iaõdikeki ijõ heka iratyre tamy ariwahinyke. Tai tahe sõwemy tamy rauhenyke. Tahe hãbu ihoõkeki ibutelemy ijõdikeki heka kiale iribi ibutumy aritakre. 13 Retehemy ihãre tahe robiõhyymyhÿrenyre tahe ririõhyymyhÿre. Tai heka ijyy-di reerynany watzireri. 14 Iwese Isaia tyryiti-ki roire wese heka tiiboho ihÿrenyre: —Roholamyhÿre, roholamyhÿre ihãre tahe rieryõhyymyhÿre. Retehemy ihãre tahe tiu robiõhykymyhÿre.

15 —Irayky tererenyreki wahe rieryõre heka. Òhõtireny heka ritõbõnymyhÿre ta ijohonana-ribi. Tarue ribrenymyhÿre robike lau. Tahe wadee ròõseõtyhy. Aõkõre heka ariteytenykemy idi watzimyhÿre. Tibo heka terareny aõkõre.

16 Jesuisi ijõ relyymyhÿre tamyreny: —Kaiboho heka eysamy atxitenyteri. Kaiboho heka bobibenyke tahe bierybenyke. Aõmybo kaiboho tabitenyteri heka, taholatenyteri wahe. 17 Ihetxiu mahâdu, hÿÿna mahâdu wahe, tuu lobiximy riwisÿnymyhÿre. Aõma aõwobo kaiboho taholamyhÿtenyteõ heka roholakemy riwisÿnymyhÿre tahe roholaõhyymyhÿre. 18 Tahe boholake heka adee aritÿnynyke aõbo ijyy rare. 19 Òwòruty ryro-txi resemyhÿre heka iny ijoireny wesemy ihÿre. Ijohona tuuwesemy wahe. Tibo roholamyreny ihÿre tahe rieryõhyymyreny. Aõma Satanasi heka nade tai tahe warybe heka iribireny ritamyhÿre. 20 Ijõ manarutysu-txi resemyhÿ mahâdu tahe ijõ ijohonadu wesemy heka roire. Tiiboho heka deysana-di roholamyhÿreny. 21-22 Tai tahe urihimyòle rityhynymyhÿreny aõhõkÿmy dÿÿnana kanakeu tahe aõwesele riatyke ririmy reake. Kia edey-txi resera tasÿ aõma ijõ ijohonadu mahâdu wesemy heka rare. Tiiboho heka aõma 1000 nierule aõnityhymy idi rõhõtinyinmyhÿreny nierudile. Tai tahe rexibedewonymyhÿreny. Tiu heka Deuxu aõmydÿÿna riwinyõhyymyhÿre, Deuxu Rybe riwiõhenanyreny. 23 Kia suwitzira wihikÿ-txi resera wana tahe iwitxira ijohonadu mahâdu wesemy heka rare. Tiiboho heka roholamyhÿreny rityhynymyhÿre sõwemy Deuxu dee roholamyhÿreny heka. Ijõ 100my wesemy raratynyre. Ijõ 60my raratynyre ijõ 30my raratynyre. Iny sohoji sohojiõ heka Deuxu-ò aõ riwinyrerimy ihÿre.

24 Idi tahe iwitxira ijyymy relyyre Jesuisi tamyreny: —Deuxu Iòlõna heka kia wesemy ihÿre. Oworudu heka aõma

alòbòròna wihikỹõ ritòbrònymyhỹre taoworuro-ò. ²⁵⁻²⁸ Tahe iòluduõ rummy heka tamy nade. Tahe iu ibutumy iny ròròmyhỹreu, asibinaty-di tamy rehure. Tai tahe alòbòròna asibina-wana ruhunyre kia aõma ede wana wimy urilemy. Taiki tahe kia aõma oworudu kia aõmysỹdỹỹdu mahãdu. Tuu heka ijyy-di nade tuu ijyymy. Idinodu rarybere: —Aõma waòludu heka kia riwinyre wadee. Idi oworudu narybede: —Aõhebohe arotỹnyrenykre? Ta idile aõbohe arisiherenykre araxirenyre. Tai tahe rirawyònyre: ²⁹⁻³⁰ —Aõkõre wahe, kia ibutumy alòbòròna rirarutxinykre. Ixinamy heka ratybienykre tii-wana wiurilemy kia maixõmo arixina bededỹỹnamy bede relerekeu tahe iribi raarike. Ararybekre heka tamy kia aõma oworu-di raaõmysỹdỹỹkreò. Juhu delemy asi arisykre. Tahe ritoonykre. Idi tahe maixõmo heka riarikre kia maixõmo hetowo-ò riyrubunykre.

³¹ Tahe Jesuisi ijõ ijyy wixiramy relyymyhỹre: —Aõma Deuxu Iòlòna heka aõma alòbòròna sòmo sòmo wesemy ratximyhỹre. ³² Aõma raumynyreri heka aõma òwòru iyjatyhymy ibutumy òwòruty-ribi rariewesele relemyhỹre.

Taiki tahe kia nawiile tuu rýtỹnymyhỹre kia òwòru-ò.

³³ Uri paõ uri ixìòlòdỹỹna heka Deuxu Iòlòna wesemy heka kia ihỹre. Hãwyy heka paõ riwinymyhỹreu, riurinymyhỹreu tahe ibutumy raubýtỹmyhỹre kia ibemy.

³⁴ Tai tahe rexiòlònymyhỹre Jesuisi heka sòwemy tuu relymy raremyhỹ. Iu iny ribedeernymy raremyhỹu. Tiemy heka Jesuisi relyyhy raremyhỹ iu ròbedeerydỹỹmy raremyhỹu. ³⁵ Deuxu rybedu dori ihetxiu rarybere:

—Jiarỹ ijyy-di rebedeernymyhỹre. Aõma tuu relyymyhỹre heka ierykõna rare. Tiuhe rieryòhyymyhỹre. Iu bede rexideelenyrauhyyle.

³⁶ Idi tahe Jesuisi rexitare iny sòwey-ribi rexitare. Hetoõ-ò heka ralore. Tai tahe aõmybohe wakoreny inihe bedelyyke. Aòludu inybo arasỹnyremy. Kia ijyy heka aõma hãbu ede-di rehure ioworu-ò, taòludu oworu-ò. Kia inihe wadee bitỹnynyke aõbo rare wahe. Kia ijyy telyyté. ³⁷ Tai tahe Jesuisi tii dirawyònyde: —Kia hãbu alòbòròna wihikỹ ribòrònyre heka Deuxu Riòre Hãbutyhyhykỹ, rare wahe. ³⁸⁻³⁹ Ioworu heka ibutu bede heka roimyhỹ wesemy roimyhỹre. Aõma alòbòròna wihikỹre heka ityhydỹỹdu iwese rỹrawesemy rỹira. Asi tahe kia ityhydỹỹdukõdu mahãdu wesemy heka ihỹre. Aõma kia iòludumy rarybereri tahe kia Satanasile heka ihỹre. Kia iyresynamy rarybereri aõbo bedekonana heka tuu rininimy heka tuu rarybereri. Kia ýju heka iyresydumyhỹ tuu rarybereri. Kia rimykre ede riorokremy rarybereri heka aõma ityhydỹỹdukõdu mahãdu heka tuu rininimy rarybereri. ⁴⁰ Ritakre

heka rihitxinykre. Heòty bedehékỹ heka idi rehukre risòkre iu wahe. Iwesele taheka bedekonana heka rarakre. ⁴¹ Deuxu Riòre, Hãbutyhyhykỹ heka aõma ýju riteònykre ibutu iny ributunykremy.

Ityhydỹdukõdu mahãdu ijõ iny òraruna-txi rityhedỹýdu mahãdu heka ibutumy ributunykre widee. Ibutumy aõbina bina widỹýdu wahe.

⁴² Idi tii rihukre. Tai tahe ryrykre aõkỹmy rotỹýnykre tai. Robumyhỹre taju. ⁴³ Kiau aõma

Deuxu hõrõ mahãdu tahe Waha Iòlòmý ronymyhỹre kie ronykre. Tiiboho loosòny wesemy heka ritoosònanykre txuu loosòna wesemy.

Õhõtirenydikeki ibutumy heka boholabenyke.

⁴⁴ Deuxu Iòlòna tahe nieru wesemy ratximyhỹre. Aõma nieru heka hynaõ-ki rahara nieru-di tỹximy aõma surawo-ki idi hãbu ixbybi riwore. Tai tahe tii reysatyhymy ròðsere. Kia ibutumy taaõmydỹýna-di heka rohonyre. Kia bedero riwykremy.

⁴⁵⁻⁴⁶ Ijõ tahe tule Deuxu Iòlòna wesemy ka ratximyhỹre. Iwese ixitura wydydu ihỹre wesemy heka Deuxu Iòlòna ihỹre. Iwydydu heka iijese ijesemy riwymyhỹre. Aõwi riererimy riererimy heka tai rahamyhỹre iruxera-ki tii tahe riwymyhỹre. Kiau tahe tai rahare aõ òwyhykỹõ-ki heka rahare. Tii idi tahe rohonyre ibutumy taaõmydỹýna-di idi tahe kia iwydymy idi ratxireriò riwre.

⁴⁷ Riàõ wese heka tule Deuxu òlòna ihỹre. Aõma rià-di iny rehumyhỹre wana heka ibutumy utura rimymyhỹre. ⁴⁸ Kia aõma idi tahe idi raixỹnymyhỹre riarimyhỹre iky-ribi. Aõma awi-di awihe riarerimy iky-ribi. Ibinare rihitxinymy iribi. ⁴⁹ Kia bedekonana tahe iweselemy heka rarekre. Kia aõma ýju heka riarikre awi heka ibinau-ribi riarikre. ⁵⁰ Rehukre heòty bedebinakỹ-ò wahe. Tai ki tahe rirajuamyhỹkre ta aõhõkỹmy rotỹýnymyhỹkre. Txuu rikyinyhỹkre

⁵¹ Tahe Jesuisi tamy rỹýraxire: –Kiamy ibutumy teerymyhỹtenyte? Tiiboho riraòwònyrenyre: –Kohe, reerymyhỹrenyre. ⁵² Idi Jesuisi rarybere: –Inyõ bede ywina bederydỹýna heka rityhynyre, waheludu rarekre wahe. Tii tahe iwese hãbu butudỹýdumy ratximyhỹre wese heka ronymyhỹre. Tii heka ibutudỹýna heto-ribi ritamyhỹre, tasỹ mahãdu-ò riwahinykemy. Aõ tyby aõ tỹmyra. Ibutumy heka ritamyhỹre.

⁵³ Tahe iribi Jesuisi rexitareu, ⁵⁴ tahe tahãwã-ò ròðsere. Judeu dohodỹýna heto-ki ribedeerynyre. Tahe ibutumy ribedeòtiidỹýnyre. Tiribibo heka tii bedeeryna rierymyhỹre: –Timyrekibohe aõwihikỹ rierymyhỹre. Tii kỹny heka aõma

òwòru besedỹwidỹdu riòre heka rare. ⁵⁵ Jyje riòre wahe. Marie heka tule rare ise wahe. Txiau, Simaõ, Jyje, Judasi-wana iseriòre ihỹre tule wahe inatyhy? ⁵⁶ —Iseriòre hãwyy heka tule kaki rasỹnymyhỹre inatyhy. Timyrakibohe aõna aõna ikõkõ rierymyhỹre. ⁵⁷ Tahe rityhynyõhyymyhỹre heka tai wahe. Jesuisi tamyreny rarybere: —Deuxu Riòre Hãbutyhyhykỹ heka tiu tauludu wijirana hãwã-ki inyõ rityhynyõtyhy rybeduõ ihetomy ijirana-ki. ⁵⁸ Tai tahe aõna aõna wiwihikỹ heka tai riwinyõhyyre, rityhynyõmyhỹreki.

14

¹ Kia bedeu tahe Herodi, Kalileia iòlò, Jesusini-ò roholare. Aõikõkõ heka riwinymyhỹre. ² My heka rarybere teòdu mahãdu-ò: —Kia Joaõ Sebedỹỹdule aõbohe rubu-ribi riixixadỹỹnyre. Tai tahe tii aõikõkõ riwinymyhỹre. ³ Herodi tahe juhuu Joaõ ròtenawo-ki riteònyre. Tii taseriòre hãwyy òraru-ki kia wesemy riwinyre, Herodia òraru-ki wahe. Herodia heka Filipi hãwyy rare. ⁴ Juhuu Joaõ Herodi-ò rarybere: —Awi aõkõ rare. Kai dori aseriòre hãwyy-wana atxiteri. Uritere heriõmyke. ⁵ Tai tahe Herodi heka Joaõ rubudỹỹmy riwisỹnyre. Urile ruberumy judeu mahãdu lau. Tamyreny Deuxu rybeduõmy rỹiramy Joaõ Sebedỹỹdu rare. ⁶ Herodi kai beòramy bede reareu tahe worana bedehesi ritxienyrenyre. Herodia riòre ijadõma heka iko-ò resemyhỹre. Iixe-ki tahe awimy Herodi rahare, Ijadõma luure wahe. ⁷ Tii tahe tamy rarybere kanakemy. Aõmybo wadee bexitòenykre. Inatyhymy adee ibutumy ariwahinykre. ⁸ Tai ise ijadõma-ò rarybere: —Aõma bexitòenykre: Sebedỹkỹdu ratilemy tamy bexitòenykre. Tai tahe ijadõma tamy rexitòenyre: —Wadeke bidiwyke Joaõ Sebedỹkỹdu rati, pratoro-ki. ⁹ Tai tahe iòlòhe rabadewore. Ibutu ijohonaru-ò dori tuu rarybere ijadõma-ò. Tahe ibutumy riwinyke rỹire. ¹⁰ Tahe ihãrele iòlò heka soldadoõ riteònyre ròtenawo-ò kia Joaõ rati resymy. ¹¹ Inyõ diwyde pratoro-ki. Ijadõma-ò heka riwahinyre. Tahe tii tadi-ò idi rare. Riwahinyre. ¹² Idi tahe Joaõ erydỹỹna mahãdu dioryde iumy, riwykremy, rituunykremy. Iribi tahe roirenyre Jesusiko relyre.

¹³ Kia roholareu tahe Jesuisi ròhònyre ixisohojilemy bederahu-txi. Hãwò-di rexitaranyre rare. Iny sòwemy bededi ròirenyre ihemy titxibo iru-ki rakemy. ¹⁴ Rehemynyreu tahe iny sòwehekỹmy Jesuisi robire. Tai tahe Jesuisi riwotòenyre. Ibutumy riteytenyre webinadu mahãdu. ¹⁵ Tahe ratxioronyre. Tahe ierydỹỹna mahãdu tamy nade. Tamy rarybere: —Txuu ratxioronyra. Bederahy-ki dori atxiteri. Iny tahe biteònykre hãwãõ-ò tai rỹsỹna ixidee riwykemy. ¹⁶ Tahe

Jesuisi rirawyònyre: —Aõkõre, ariteònyõtyhy jiarỹ. Kaibohole tahe aõ tamy bidiwahinybedenyke. ¹⁷ Jiarỹboho kỹny diwatxiõnyreri iruyre orotxu-di, utura inatxire. ¹⁸ Tai tahe Jesuisi narybede: —Bidiwahiny wadee. ¹⁹ Jesuisi tahe ibutumy iny asityre-ki ronykemy risỹnyre. Orotxu inaubiõwa, utura inatxi rỹire, utura-wana rimyre tahe ritehere biu-txi àlana Deuxu-ò riwahinyre. Idi tahe paõ riyreyrenymyhỹre teòdu mahãdu-ò riwahinyre. Idi rare iny sõwehekỹ-ò. ²⁰ Ibutumy iny riroxirenyre ihãre rihydyre. Kia iuhe-di ierydỹỹna mahãdu 12 weriri ritỹxinyre. ²¹ Hãbumy 5000 òsana rỹimyhỹre. Ihãre tahe uladu-di rariaõhyyre hãwyyboho-di.

²² Tahe Jesuisi taerydỹỹna mahãdu riteònyre aho kanawe-ribi ijã-ò reuròrenykemy hãwò-di. Jesuisi tahe rarire iny sõwehekỹ mahãdu rirybedỹỹmy. ²³ Jesuisi heka iny tahetoreny-ò riteònyremy rahudi tahe tii raòwònyre hãwãlò ratyy-ò ixitòedỹỹmy. Taihyyle idi bede roronyre ixi sohojihyyle. ²⁴ Kiaule hãwò ahotya-ki rare. Òbò nihikỹy-txi ixinalemy ratximyhỹre. Tiò tiò òbò riwelòrò riwelòromy idi rehumyhỹ. Yhy deade txura-ribi. ²⁵ Rudile tahe Jesuisi biura-di heka rare taerydỹỹna mahãdu-ò, beratyredile heka rare. ²⁶ Iu Jesuisile betyredile tamy rarau tahe, tiiboho heka ruberurenyre. Rirajuarenyre: —Worỹsỹ òsana inydee rareri. ²⁷ Tai tahe Jesuisi rarybere: —Aworeny bitamadỹỹnybenyke. Jiarỹle watxireri. ²⁸ Tahe Pedro rarybere: —Wanyrỹ, inatyhymy kai atxiteriwana heka wadee manyarybeke betyre-ki arariakemy. ²⁹ Tahe Jesuisi tamy rarybere: —Manake wahe. Aõwesele tahe Pedro hãwò-ribi ròhònymy reare, Jesuisi-ò rakemy. Betyre-ki rariare. ³⁰ Yhylemy tahe robure. Tii urile ruberure. Tai ijirahakỹlemy riwisỹnyra berahatxi-ò. Tai tahe Pedro rarybere: —Biwatakewa Wanyrỹ. ³¹ Tahe Jesuisi rimyre: —Ainatyhynakỹny ibutelemy atxiteri. Aõherekibo heka tiwatyhynyõteri. ³² Idi hãworo-ò wiwana rorukurenyre. Yhy ruhure. ³³ Ierydỹỹna mahãdu Jesuisimy reàlãre. Inatyhymy heka kai Deuxu Riòretyhy tate.

³⁴ Tai tahe reuròrenyrene Kenesare bede-ò. ³⁵ Ibutumy iny kowa Jesuisi rieryrenyrene. Ti ibutumy webinadu mahãdu-ò relyyrenyrene Jesuisimy. Tahe hãwã ikõkõ-ribi ritelenymy didydenyde. ³⁶ Tahe Jesuisi-ò rarybere. Ixinamy watyky-ò rerike, awimy relerenykemy. Ibutumy tamy rerire heka reytere.

15

1 Jerusale hãwã-ribi bede ywina bede erydỹỹna mahãduõ dehemynyde Jesuisi-wana rarybekemy. Tiiboho-wana tule fariseu mahãduõ dehemynyde. Tiiboho heka Jesuisi-ò

rỹraxyrenyre: ² —Aõherekibo aerydỹna mahãdu tebõreny risuhõkõreri roxiko-ki. Inydeereny kia bede ywina rare. Aõherekibo rityhynyõreri ihetxiu lahi rybe. ³ Jesuisi ri-rawyõnyre yỹraxina-di: —Aõherekibo kaiboho Deuxu rybe tetyhynyõteri kaiboho lahirybele tetyhynytenyte. ⁴ Deuxu bede ywina kawesemy rarybere:

—Boo adi-wana ibutumy heka bityhynybenyke. Inyõ rybe-bina tadi-õ tyby-õ rarybekeki. Tii tahe ruruke, tuu bede ywina rybe wahe.

⁵ Kaiboho tahe kawesemy tebedeerynytemy tewitxiranyte: Inyõ tadimy tybimy rarybekeki Wanieru Deuxu-õ wahisidỹnamy. ⁶ Tai tahe inieru-ei tyby tadi-wana riwìhenanyõre kia bede ywina witxira tewinymahãte. Deuxu bede ywina rityhynyõreki. ⁷ Kaiboho itxerenadu mahãdu atxitenyteri. Isaia inatyhymy umy rarybereu:

⁸ —Kia mahãdu wadee rybe-di riwadealànanyrenyre. Wowydyna wadee riwahinymyhỹrenyre. Inatyhymy aõkõ heka kai tarybemahãte. Arayky dori Deuxu-ribi irehemy ratximyhỹre. Teerytyhyõlemy heka atximahãte.

⁹ Iwowydyna heka wadee aõ aõkõ rare. Wabede ywina ribedeerynyõtyhy. Texibedeerynymahãtenyte abede ywinarenydile.

¹⁰ Jesuísí rexidelenymy ribedeerynyre: —Boholabeny warybe-õ. ¹¹ Brebuna roxina-di biroxibenykeki, aõ adeereny ibinaõtyhy aõ aryrenymy ralõmyhỹre aõkõ heka ibinare. Ryribi rõhõmyhỹre heka ibinare, arybe wahe. ¹² Tai tahe Jesuisi erydỹna mahãdu Jesusiko rarybere: —Fariseu mahãdu kỹny tamy awiõre kia wiji tuu tarybeta wahe. ¹³ Tahe Jesuisi rarybere: —Aõhere aõkõ rare. Timyre aõkõ rare. Ixinamy tuu raryberenyre. Iorutere-di nohõtirenyõmy. Kia fariseu bedeeryna lòbòròna wese rare. Waha ribòrònyõre. Ibutumy waha ribòrònyõre suribi mahãdu ritakre. ¹⁴ Inatxi hãbu ruetà widee ryò ritỹnynymyhỹre wese. Hãwãry-ribi wiwanale hãloo-txi resekre. Tiiboho ixinamy biribenyke. ¹⁵ Tahe Pedro Jesuisi-õ rỹraxyre: —Wakoreny inihe biditynynyke, roxina brebuna ijyy wahe. ¹⁶ Kaiboho ibutu wese atxitenyteri. Teeryõtenyte. ¹⁷ Ibutumy iny aõ rirỹsỹmyhỹre weryri-di ramyhỹre tahe rõhònymyhỹre. ¹⁸ Tahe inyõ rybebinamy rarybemyhỹre. Tii iwo ibinare, irayky ibutumy ibinare tai wahe. ¹⁹ Raykywydyna binahakỹ-ribi heka òtaõtana, rubuna, wasina, ruina ujõmo inyry-ribi rõhònymyhỹre. ²⁰ Kia aõmydỹnana iny risurisumyhỹre, inydee ibinare. Tahe roxinako-ki iny tebò risuhõmyhỹré, kia tahe aõ aõkõ rare, ibina aõkõ rare.

²¹ Iribi tahe kia-ribi ròhònyreu tahe Jesuisi rare irehetytymy Tiro hãwã-ò Sidò hãwã-ò. ²² Kana bede hãwyyò tamy nade. Tahe tamy rexitòenyre: —Wahĩ, Davi riòkòre, biwaruxetoènyke hewa. Waritxòre heka tykytyby bina-di iwoku-ki ratx-imyhỹre. Anohòkỹmy heka idi rotỹkỹnymyhỹre. ²³ Tahe Jesuisi aomy rarybeòhyre tamy. Taerydỹỹna mahãdu tahe rarybere: —Biteònyke hewa. Inyboho dori riixiranyrenyteri. ²⁴ Jesuisi tahe rarybere: —Jiarỹ Deuxu riwateònyre judeu mahãduòle, tabudoeni mahãdu iõre mahãdu wese wahe. ²⁵ Hãwyy ixityre nade. Tatiowotimy resere. TAhe ixityre tamy rarybere: —Biwawikòhenanyke hewa, Wahĩ. ²⁶ Jesuisi rirawyònyre: —Awiòhedỹỹna kia wese rare aõma hãbuò tariòre-ribi rỹsỹna riwyrã tahe idi rehura ijòròsaòle. Kiawese rarekre, jiarỹ arawiòhenanykeki. ²⁷ Hãwyy rarybere: —Inatyhy rare. Kuladu-ribi ano rỹsỹna resemyhỹre bedetxi, tiki tahe itxòròsa ritxòre idi riwymy reakamy riròmyhỹre. ²⁸ Inatyhymy Jesuisi rirawyònyre: —Kai ainatyhyna sòwere. Adee ariwinykre aomybo textitòenyteri. Iule iriòre reytemy rare.

²⁹ Tahe Jesuisi ròsere ixityre Kalileia ahohokỹ-ò. Raòwònymy rare hãwãlò-ò. Iratytyre ronyre. ³⁰ Sòwemy heka iny webinadu didyde: itiere mahãdu, iruetà mahãdu, irybeò mahãdu, aõ ikòkò heka bina bina witxira witxira idi rare. Jesusiko-ò heka ritidirenyreki ibutumy riteytenyre. ³¹ Iny ruetà rỹira mahãdu itxeretyhymy riwinyre. Rarybekòmy rỹira mahãdu, rarybemy rỹimyhỹ teysamy. Itiere rỹira mahãdu, rariamy rỹimyhỹ. Tai ibutumy iny ribedeòtiidỹỹnyre heka tahe judeu mahãdu Deuxu-ò wowydyna riwahinyre.

³² Jesuisi rarybere taerydỹỹna mahãdu-ò kanakemy. Tahe tamyreny rarybere: —Jiarỹ kỹny rewotòenyteri kainy mahãdu rỹireridi. Inataò txumy bede riera waki. Aõ heka ihokòre rirỹsỹrenykemy. Iòwedỹỹkòlemy ariteònykeki heka ijò re-seke ryrowetyakile. Rama riatyke. ³³ Tai tahe ierydỹỹna mahãdu rarybere: —Inyboho bederahy-ki, titxibo heka rỹsỹna arimykre iny sòwehekỹ-ò ariwahinyrenykremy? ³⁴ Tahe Jesuisi tamyreny ritỹĩraxinyre: —Tiwesebo roxina-di atxitenyteri. Tahe rirawyònyre: —Debò inatxi reurò orotxu sòmo sòmomy idi watxireri utura deyre ijò rare. ³⁵ Jesuisi rarybere ibutumy iny ronykemy. ³⁶ Tahe tí rexitòenyre Deuxumy reàlàre. Orotxu, utura-wana riereerenyre tahe taerydỹỹna mahãdu-ò riwahinyre idi rakremy. ³⁷ Ibutumy riroxire heka kia iny sòwehekỹ ta rihydyre. Tabyre rahudi tahe riarire ierydỹỹna mahãdu. Tai tahe rahure tỹxihikỹlemy. Debò inatxi reurò weririmy heka ritỹxinyrenyre. ³⁸ Tahe 4000 hãbumy riòwenyre, kia txuu wahe. Uladu, hãwyy-di rariaòhyre. ³⁹ TAhe Jesuisi iny-ò rarybere tasỹ-ò ròòsekemy ixyby. Iribi tahe Jesuisi

hãwò-di reuròmý rare Magadã hãwã-ò.

16

¹ Fariseu mahãdu saduseu mahãdu nade Jesuisi-ò iurihixidÿÿmy riitxenanyrenykemy: —Aõbedeerydÿÿnabo heka biu-ki iribi rexitòenyre. Biwateòsinyke heka aõwiihikÿ-di biu-ò jiarÿboho arieyrenykre, kai inatyhy tate wahe. ² Idi tahe Jesuisi rarybere: —Kaiboho heka awirenyre biuwetyky erysy-ki. Jesuisi rarybere: —Kia rybe tarybemahãte. Txiorotxumy heka biuwetyy isòhòkÿra-ki, biurasòmý tahe awimy txu kedeakre. ³ Biurasou ibede lyby lybimy txu-di kedeakeki tahe biu ròahyyhy bedede txu rariakre. Myhe tarybemahãte. Kaiboho heka iwitxira aõhebo rotÿÿnykre heka teerytenykoõlemahãtenynte. ⁴ Iny kamahãdu heka ibutumy ibina binare. Tiu heka rityhynyõhyymhÿrenyrene. Rexitòenymhÿrenyrene heka biu-ò rityhynykemy. Tahe riwahinyõtyhy heka aõma bedeerynaõ. Kia Jonasi-ò bedeeryna rareõle tahe tamy rakre heka. Tahe Jesuisi rexitamy rare iribireny.

⁵ Idi tahe aho weribijã-ò reuròrenyreu tahe, tõhõtireny rosare tarÿsÿnarenen-ribi. ⁶ Jesuisi tamy rarybere: —Fariseu mahãdu, saduseu mahãdu iurina-ò bexiebenyke. ⁷ Ierydÿÿna mahãdu tahe widee rarybere: —Tii kia rarybere iny orotxu diwyõdeki. ⁸ Jesuisi roholare aõmybo raryberenyre tahe tamyreny rarybere: —Aityhynarenen urihimýòre. Aõherekibo orotxumy jiarÿ rarybererimy tahõtintenynte? ⁹ Tiu kaiboho bierybenyõtyhy. Iruyre orotxumy remyre. Idi 5000 hãbumy reòwenyrene. Ihãre tahe weriri txÿxi tÿxihikÿlemy rÿimyhÿre rauhenyrene. Itxi aõbo õhõtireny reakõmyhÿre. ¹⁰ Ixityreu tasÿ 4000my reòwenyrene, debò inatxi reurò orotxu-di. Ixiyrubule rauhenyrene. ¹¹ Jiarÿ orotxumy rarybeõre. Fariseu mahãdu, saduseu mahãdu urina-ribi bexiebenyke. ¹² Tai ierydÿÿna mahãdu rieryrenyrene aõmybo rarybemyhÿmy Jesuisi heka fariseu saduseu bedeerydÿÿnamy rarybereri.

¹³ Idi tahe Sesaria Filipi hãwã iòhòmý rehemynyrene. Jesuisi rÿÿraxire taerydÿÿna mahãdu-ò: —Iny wamy rarybereri. Mobo heka jiarÿ raremy heka wadi rÿireri. Jiarÿ Hãbutyhyhykÿ rare, Deuxu Riòre wahe. ¹⁴ Ijõ kÿny rarybemy rÿireri: —Kai riki heka Joaõ Sebedÿÿdu atxiteri. Ijõ riki Elia atxiterimy adi rÿireri. Ijõ tahe Jeremiamy adi rÿireri. Ijõ heka Deuxu rybeduõ riki heka atxiterimy adi rÿireri. ¹⁵ Tai tahe Jesuisi rÿÿraxire taerydÿÿna mahãdu-ò: —Mowexe waxirerimy wexe wadi tahõtintenynteri. ¹⁶ Simaõ Pedro heka rarybere: —Kai Kristu atxiteri Deuxu deòdÿÿna heka tate. Kai heka Deuxu Riòre tate. ¹⁷⁻¹⁸ Tahe Jesuisi rirawyònyrene Pedro-ò: —Inatyhymy

Pedro tate, Waha, biu-ki Mana ani rare. Boholake, ratx-
imyhÿrele kia adee riteòsinyre. Iny aòkò kia adee riteòsinyre.
Wadohodÿÿna mahãdu kia mana tyre-ò ariwinykre. Rubu
dori heka tiu ituedeòna. ¹⁹ Waiòlòna rayna heka adee ari-
wahinykre. Kabede-ki aòwidÿÿ adee binakeki tule biu-ki
ariijònykre. Aòtxiletixibo aòwidÿÿmy burukre tasÿ biu-ki tule
adee ariwinykre. ²⁰ Jiarÿ inatyhymy Deuxu deòdÿÿna rare.
Tuu ijyyrenyòmyke.

²¹ Iribi tahe Jesuisi itÿny relyymy taerydÿÿna mahãdu-ò.
Rurukremy heka relyyre: —Arakre heka Jerusalè-ò. Tai
heka matuari mahãdu, ònosòna bedeeryna mahãdu, xiwena
wahidÿÿdu mahãdu-wana riwarubunykre. Inataò txu-di tahe
ixyby rubu-ribi adexixakre. ²² Idi tahe Pedro heka Jesu-
isi ridyre ijò erydÿÿna-ribi tahe tamy rarybere: —Aòkòre,
Wanyrÿ, tiu heka tiiboho ararubunyrenyòtyhy. ²³ Tahe Jesuisi
rarybere Pedro-ò: —Waribi bexihitxinyke. Kai heka Satanasi
weselemy atximahãte. Iwese kai taraykynymahãte heka aò
Deuxu deewinamy aòkò tuu tahòtinymahãte hãbudeewile rare.
²⁴ Idi tahe Jesuisi rarybere taerydÿÿna mahãdu-ò: —Inyò
wawananomy rurukeki, ixi-ribi heka tòhòti rosake. Nomy ru-
rukeki heka taitxeò rimyke idi tahe wahemy kanake. ²⁵ Inyò
wahemy rariakemy ixi-di ròhòtinyhyke wana heka irumy
inonana irehemy ixi-di ratxikeki heka tii ihãrele ruruke. Inyò
taumy riònonykeki waòraru-ki tai tahe tii ròtake. ²⁶ Inyò heka
ibutumy aòna aòna bede-ki ributumykeki. Tahe ihãrele heka
tii ruruke. Tule umytuedeòna riònonyre. Aò tarasana tamy aò
aòkò rare. Iny iruna riòwynyòhyymyhÿre, ixyby tamy kanake
wahe. ²⁷ Jiarÿ, Deuxu Riòre, Hãbutyhyhykÿ dori kanakre wana
aòwesele. Taÿju loosòna-ki tii kanake.

Iny ibutumy ariòwynykre bibutumy aòbo iny riwinymyhÿré
heka aòwihikÿ aòbina bina.

²⁸ Iu jiarÿ, Deuxu Riòre, Hãbutyhyhykÿ, kanakeu tahe inyò
kaibohoò tuu robikre, Iòlòmy kanakreu.

17

¹ Reare heka debò sohoji reurò txumy. Tahe Jesuisi ridyre
Pedro, Txiau, Joaò-wana. Joaò tahe Txiau seriòre rare. Tahe
raòwònyre tiiboho-wana hãwãlò ratòhòkÿ ratyy-ò. Inyò
heka tii wana raòhyyre. ² Ikoreny-ki tahe Jesuisi rexiwitxi-
ranyre. Iòsana heka roosòre. Txuwesehekÿle relere iòsana
heka ratÿrÿrÿnyre. Ityky tasÿ rauranyhÿkÿre. Tahe roosòna
itoosònadihikÿre. ³ Iu tahe tuu robire Moisesi rubu, Elia
rubu, Jesuisi-wana widee rarybemyhÿreny. ⁴ Tahe Pedro
tamy rarybere: —Awire, Wanyrÿ, kawese watxirenryeri kaki.

Adee wikeki hetomy ariwinyrenykre ijō adeekre, ijō ta Moisesiōkre, ijō Eliaōkre. ⁵ Iu Pedro rarybereriule tahe biuwetyky urahakỹ relere. Iyribile rybeō narybede: —Kia heka Wariōre waluu heka rare. Boholabeny irybe-ò. ⁶ Idi tahe ierydỹỹna tamy roholareu, tahe ruberure. Tahe reserenyire iōsanareny bede-ò. ⁷ Jesuisi tamyreny nade: —Breburenyōmyke hewa bodorukubedenyke heka. ⁸ Reteherenyire tahe Jesuisi sohojile tai rỹire.

⁹ Iribi tahe diberenydenyde hāwālò ratyy-ribi, Jesuisi narybede: —Uritere waijyyōmyke inyko wiji tuu tabitimy. Iu jiarỹ, Deuxu Riōre Hābutyhyhykỹ, rubu-ribi riixixanykreu tahe tuu belyykre. ¹⁰ Tahe ierydỹỹna mahādu Jesuisi-ò rỹỹraxire: —Aōherekibo tarybetenyteri —Elia juhūu kanakemy ako-ò juhūu kanakemy. ¹¹ Jesuisi rirawyōnyre: —Inatyhy rare tii juhūu kanakre. Ibutumy heka bede riywinykre. ¹² Tule ararybekre kiamy: —Elia nade tahe ihārele heka iny rieryōhyre. Aōhōkỹmy risỹnyre. Iwese Elia aōhōkỹmy risỹnyre wesele tahe Deuxu Riōre Hābu heka aōhōkỹmy risynykre, jiarỹ wahe. ¹³ Tai tahe Jesuisi erydỹỹna mahādu rieryrenyire aōmybo Eliamy tii raryberemy Joaō Sebedỹỹdule tahe Jesuisi rarybere.

¹⁴ Iribi tahe dṑsedenyde iny sōwemy riraōmy rỹimyhỹre. Hābu-ò nade Jesusiko-ò tatiowomy resere: ¹⁵ —Wanyrỹ, ruxetōena wariōre-di biwahinyke. Irayky awimy aōkō ratximyhỹre. Bera-txi resemyhỹre. Heōtyru-txi resemyhỹre. Ibutumy aōna aōna riwinyrerimy ihỹre. ¹⁶ Aerydỹỹna mahādu-ò heka adidyde tahe tiu riteytenyōtyhy. ¹⁷ Jesuisi rirawyōnyre tamyreny: —Kaiboho isira mahādu atxitenyteri. Aō heka inatyhyna heka akireny ijōkōre. Tiwese bede dỹỹnana bohe araōludunyrenykre. Bedese inihe bididy uladu wadee. ¹⁸ Tahe Jesuisi rarybere kia uladuwo-ki ratximyhỹò: —Iribi wa boho nyke! Tahe uladu reytemy reare.

¹⁹ Idi ierydỹỹna mahādu Jesuisiōle rarybere: —Aōherekibohe jiarỹboho tyytybybina iribi reteōnykōreriri? ²⁰ Aōmareki kiehe ainatyhyna ibutetyhyreki òwōruty sōmowesele ainatyhyna dikeki heka kai aōwiwihikỹ biwinyke. Kai hāwālōō-ò marybeke: —Iribi bexitake! Tai tahe hāwālò rexitake iwitxira suò. Aō aōkō adee isirake, ainatyhyna direki wahe. ²¹ Kia tyytyby bina iwitxira rare. Isiratyhyre heka. Kaiboho bexitōenybenykeki, binarehebenykeki, ixiery tyytybybina biteōnybenyke.

²²⁻²³ Kalileia bede-ki Jesuisi taerydỹỹna mahādu-wana ributunyre. Tai Jesuisi rarybere tamy: —Jiarỹ, Deuxu Riōre Hābu, rare. Tai inyō riwahinykre hābubinaō-ò warubudỹỹmy. Inataō

txu-di tahe rubu-ribi adexixakre. Tai tahe ierydÿÿna mahãdu rabadewo nihikÿre.

²⁴ Iu tiiboho heka Kafanaõ hãwã-ò ritehemynyreu, inyõ Pedro-ò nade. Tii dohodÿÿna õwy butudÿÿdu rare. Tahe rarybere: —Awedu aõbohe tii rexiòwynykekõ. ²⁵ Pedro rirawyõnyre: —Tii riòwynymyhÿre. Tai tahe Pedro rakemy reare. Iu Pedro tuu Jesuisi-ò rarybekemy hetowo-ò raloreu, Jesuisi juhuu rarybere: —Moribibo iòlò rexitòenymyhÿre òwydÿÿnamy. Mynydu mahãdu-ribi aõbo ada ta taijoiribile aõbohe rotamyhÿre. ²⁶ Pedro tahe rirawyõnyre: —Mynydu mahãduòle rexitòenymyhÿre. —Inatyhy rare, Jesuisi rarybere. Ijoi mahãdu òsana riòwynyõhykymyhÿre. Jesuisi rarybere: —Ihãre tahe ròkòòwydÿÿkre. ²⁷ Òbitimy rakaòwònyrenykre. Kia Templo heto òwymi. Ibinamy kia iny-ò ariwinyõtyhy. Kai heka makre ahohokÿ-ò awaxi-di behukre. Juhu utura kanakrele heka bidimykre. Idi iry biraynykre. Tai nieruõ-ki mahake. Iribi biditamy tahe makre iny òwydÿÿmy.

18

¹ Iule tahe Jesuisi erydÿÿna mahãdu tamy rehemynyre rÿÿraxire: —Mobohe Deuxu Iòlõna-ki nihikÿmy rarekre. ² Jesuisi heka ratximyhÿ uladuõ ibire-ki. ³ Idi tamy rarybere: —Kai uladu weseleõmy mabeõkeki, Deuxu Iòlõna-ò malòbenyõtyhy ⁴ Uladu wese maraykynybenykeki heka, tii tahe Deuxu Iòlõna-ki inatyhymy rÿirakre. ⁵ Kai waòraru-ki uladu kawesemy biwiòhenanykeki tiwawiòhenanymahãte ⁶ Kai uladuõ òraruna-txi resekemy risÿnykeki, kai abinatyhymy atximahãte. Inyõ õy ritakamy reroti-di aratakemy heka inyõ adi rehuke bera-txi. Tii tahe awityhyre adee.

⁷ Sõwemy heka aõna aõna rÿira wary-ribi iny riatykemy. Tii adee ibinatyhyre. Tiiemy heka tuhy rarekre. Inydee heka ibinakre heka. Wary-ribi riòlòdÿÿnymyhÿre heka tamy ibinakre. ⁸ Ebò òraru-ki tahe wainatyhyry-ribi bexitakeki, ebò biòròmý idi behuke. Awityhyre heka adee Deuxu Iòlõna-ò malòkre sohoji ebòdile. Inatxi ebò-di heòty bedebina-ò malòkeki, awiõre heka. ⁹ Tule arue sohoji òraru-ki kia òrarunamy beseke lau, urile bitake idi behuke. Arue wiò-di heòty bedebina-ò malòheny arue-di wiòle. Biu bedewihikÿ-ò malòke tahe awire heka arueyremy. ¹⁰ Iny nihikÿ ityhy iny yja mahãdu heka tuuõre. Uritere heka iweserenyõmy atxibenyke kaiboho bexiije benyke tamy. Iny aõkõ mahãdu dori tii iÿju dire heka. Iÿjurený heka Deuxuko tii ibutumy relyymyhÿre turený. Idi õhõtirený-ribi bosabenýõke. ¹¹ Jiarÿ Hãbutyhyhykÿ rare, Deuxu Riõre wahe. Ityhydÿÿdukõdu mahãdu ibutumy aritakemy anade. ¹² Rakawesenanykre heka kaijyy wesemy.

Rakarybekre heka kahābu 100 budoeni ijōdire wesemy. Sohoji heka iōre iy-ribi. Kia hābu idi itxeredu tahe iy-ribi iōre rakre ijesemy. Iuhe tahe hāwālò-ki riroxiny ririre. ¹³ Tai rahakre wana heka teysamy ratxikre. Kia sohoji òrarukile reysakre. ¹⁴ Iwesetyhylemy taheka inyō iōōtyhy Waha-ribi. Tamy dori kia ibinare.

¹⁵ Inyō adee rexiòrarunykeki tahe tamy makre rybemy. Uritere inywitxirako-txi rybeōmy tuu. Tahe tamyhyylemy marybeke. Aityhydỹỹdu seriòre heka arybe-ò roholakeki, tahe ixi-txi tōhōti reake wana, ixi dee ibinamy rōhōtinyra wana, tai tahe kai ixyby tii-wana ityhydỹỹdu seriòre biòwamy beleke. ¹⁶ Aōhe wana tahe arybe-ò roholaōhykre, tahe ixityre make inyō wana rexibiòwanymy.

Iny inatximy ixihe-ki bidyke. Tii tahe arybe-ò ijohonaduke inatyhy raremy arybera-txi resekemy wahe. Iu dohodỹỹna-ki rarybekreu, tai tasỹ tii rarybeke teòsamy aōkō ratximyhỹrelemy rarybeke. ¹⁷ Tii irybereny-ò roholaōkeki, tai tahe dohodỹỹna mahādu-ò belyyke. Tii irybereny-ò roholaōkeki, tai tahe biteònyke. Tii iwese òrarudu mahādu heka adee rarekre, bede dinodu-ò nieru wydydu wese wahe. ¹⁸ Iwese kaiboho waityhydỹỹdu mahādu kabede-ki rōhōtinyre wesele, tule araykywesetyhyle Deuxu biu-ki rōhōtinykre. Aōbo adee kabede-ki aōwidỹỹ ibinare ada awire heka tule biu-ki ibinamy rarekre, awimy rarekre. Arybe riwitxiranyōtyhy kowa biu bede-ki. ¹⁹ Iwitxiraōmy adeeremy ararybekre: —Ijō titxibo inatxi ada inataō ityhydỹỹdu seriòre wiweselemy raraykynykre. Waha-ò rexitòenymyhỹreki iwese rexitòenyre wesele heka tamy riwinykre biu-ki. ²⁰ Titxibo waniòraru-ki inatxi, inataō wii ributunykre heka, jiarỹ taile watxireri.

²¹ Tahe Pedro rỹỹraxire Jesuisi-ò: —Bede erydỹỹdu! Waityhydỹỹdu seriòre heka wadee rexiòrarunykeki, tiwesebo sōwe ariixāwidỹỹnykre ixi-ribi debò inatxi reurò, my aōbo? ²² Jesuisi rirawyònyre: —Aōkōre, debòinatximy aōkōre, 490 wesemy wahe. Ixityre ixityre biixāwidỹỹnykre. ²³ Deuxu Iòlòna kawesemy rare: —Iòlòō heka teòdu mahādu kia contamy robikemy idi ratxireri. Tiwesebo inieru-di rasiranyre wesemy wahe. ²⁴ Sohoji teòdu juhū dehemynyde. Sōwemy heka tevedỹỹna ratximyhỹre, 1000,000 womati tỹrỹrỹhỹkỹ nieru wahe. ²⁵ Inieruōre heka iòwydỹỹna wahe. Idi rohonykemy heka iwedu riteònyre deòdu mahādu wesemy. Tariòre-wana tahāwyy-wana ibutumy deòdumy roirekemy. Aōbo tai rỹimyhỹ heka ibutumy idi rohonyre. ²⁶ Tai kia deòdu heka tatiowotim� resere kia iòlòko-txi: —Waiòlòreny,

txioinihe biwaraðkre ariðwynykre ibutumy. ²⁷ Tai tahe iòlò riwotòenyre aõma ixinahykylemy ritusanyre. ²⁸ Tai tahe kia hãbu he rare kia urihimyò tamy radevenymyhÿò heka rexinohõtídÿÿnyre. Tai tahe hãbu lòtikile rimyre. Rierenymy resere ribòòrarytxynyre: —Bidiwaðwynykre kÿnyhe wijityhyle. ²⁹ Tai tahe tatiowomy resere, rarybere: —Txioke inihe ariðwynykre ibutulemy. ³⁰ Tai tahe rirutyre ròtenawo-ò idi riòtenyre. Riwotòenyreõhyyre. ³¹ Itxeredu mahãdu heka rabadewore tai tahe ibutumy relyyre iòlòko. ³² Tai tahe ixityre tamy rarariðwyre tamy rarybere: —Aõherewe, deòdu binahakÿ, jiarÿ araixãwididÿÿnyre ibutumy inatyhy? Kai dori xitòedÿÿna wadee tewinyta. ³³ Aõherekibohe aleina kia adee nadevenymyhÿde kia teixãwidinyòta, iwese jiarÿ araixãwidinyre wese. ³⁴ Tai tahe tii rimyre reburere itere iòlò, tai imynomy riteònyre rotenawo-ò riðwynykre xiery riòlòdÿÿnykremy. Tai aõhòkÿmy rotÿÿnymyhÿre. ³⁵ Jesuisi rexihura narybede: —Kiawesele heka adeereny rarekre. Ityhydÿÿdu seriòre taseriòre riixãwidinyòkeki heka iwesele heka waha adi riwisÿnykre.

19

¹ Jesuisi ibedeerydÿÿna-ribi rexihureu, Kalileia bede-ribi ròhònyre. Bero Jordað weribijà-ò reurore, Judeia hãwã bede kanawe-ribi ijà-ò rehemynyre. ² Tai tahe sòwemy iny webinadu mahãdu rÿire. Idi tahe ihemy rare. Ibutumy riteytenyre. ³ Fariseu mahãdu imynomy idi riwisÿnymyhÿre aõbinamy rarybekeki rimyky. Tai tahe tamy dÿÿraximy namyhÿde aõsirahakÿmybo: —Iny bede ywinareny tahãwyy riteònymyhÿre urirybelemy, wiribi reseky. ⁴ Jesuisi di-rawyònyde: —Ritidÿÿnamy aõbo tariaõmyhÿte idi?

—Deuxu ibutu widÿÿdu heka juhoo hãbu hãwyy-wana riwinyre.

⁵ Idi tahe rarybere:

—Hãbu heka tybyboho-wana tadiboho-wana wiribi rexihitxinymyhÿre tai tahe tahãwyywanale wii ributunymy rÿira.

⁶ Inatxi heka sohoji weselemy rarekre, hãbu tahãwyy-wana. Deuxu heka hãbu tahãwyy-wana ributunyre, inyò heka tiu rihitxinioÿtyhy. ⁷ Tahe ijòmy fariseu mahãdu ritÿÿraxinyre: —Aõherekibo Moisesi kawesemy juhoo rarybere:

—Hãbu tahãwyy riteònykeki juhoo urile tyyriti tamy riwahinyke riteònykekoki.

⁸ Tahe Jesuisi kawesemy rarybere: —Kaiboho heka ieryna urihimyòlereki aõ isirareki heka kia riwinyre. Juhoo tahe kawese aõkò rÿire. ⁹ Aõmale tahe ixinamy riteònyke ixi-ribi

òta òtadule heka aõwaxiny tuu riteònyre ixi-rihi. ¹⁰ Tai tahe ierydỹna mahãdu rarybere Jesuisi-ò: —Tahe kiawesekeki heka uritere heriõmy hãwyyõmy, hãbuõmy. ¹¹ Jesuisi tahe dirawyònyde: —Kaa bede eryna heka aõ ibutuhukỹ-ò aõkõ tureri aõma Deuxu bede eryna tamy riwahinyhỹreòle heka tureri. ¹² Aõtxi-ki tahe tuu hãbuõ rỹira hãwyyemy heridumy aõkõ rỹira. Ijõ hãbuõ tahe tiemy tunodumy rỹirerimy ihỹre. Iwixira hãbu-ò rexiwahiny my rỹireriki heka tuu rỹirerimy ihỹre. Ijõ tahe tuu rỹirerimy ihỹre aõma Deuxu aõmysỹdỹna òraru-ki wahe. Kaa rybe tahe inyõ tahe rityhynykeki tii inatyhymy rityhynyke.

¹³ Inyõ didyde uladuõ Jesuisi-ò tamy rexitòenykemy tebò iraty tyre-ki roirerilemy. Ierydỹna mahãdu tahe uritere iixi-radỹõmyke. ¹⁴ Tahe Jesuisi rarybere: —Ixinamy kanamyhỹke uladu wadee. Uritere itinysỹrenyõmy. Uladu wesemy dori Deuxu Iòlòna ròtedu mahãdu ratximyhỹre. ¹⁵ Jesuisi tahe iratytyre tebò ritidire tamy rexitòenyre. Idi tahe Jesuisi rare.

¹⁶ Aõu tahe hãbuõ Jesuisi-ò nade: —Erydỹdu, aõhebo arotỹnykre. Aõma, timykibo umytuedeõna aritakemy wahe. Aõwidỹ wiwihikỹbo ariwinykemy. ¹⁷ Jesuisi rarybere: —Aõherekibo wadee aõwiwihikỹmy widỹ tỹraxiteri? Iny sohojile awi rare, Deuxule wahe. Kai bede ywina ibutumy bityhynyke, umytuedeõna hakỹ-ò molokre. ¹⁸ Aõbedeywinabo arityhynykre? Tahe Jesuisi rirawyònyre:

—Rubudỹõmy, Òta òta widỹõmy, wasiõmy, ruiõmy,

¹⁹ Adi boo-wana bityhynyke, iwese ixiluure wese heka abire-ludu mahãdu luuke.

²⁰ Hãbu rarybere: —Kia heka aõu aõu jiarỹ retyhynyre. Aõijõmybo arotỹnykre? ²¹ Jesuisi rirawyònyre: —Kai òbitimy mabekekile aõmydỹna-di ibutumy. Kia idi bohonyke òwy tahe biwahinyke urimynodu mahãdu-ò. Tai sõwemy aõna aõna biu-ki ahõrõmykre. Iribi tahe biwaheludunye. ²² Iu hãbu kia roholareu tahe rabadewonihikỹre inieru sõwereki heka rabadewore.

²³ Tai tahe Jesuisi taerydỹna mahãdu ribedeerynyre: —Isiratyhyre heka biu bede-ò ralòke aõma ityhy nihikỹkeki. ²⁴ Isirare heka aõma kamelo tyy rurena òtummy ralòke heka isirare, inatyhy? Tai tahe aõma ityhy mahãdu ralòke tarasanamy reake heka isirare. ²⁵ Jesuisi erydỹna mahãdu ribedeòtiinyre kai-ò roholareu. Tai tahe rõhõtinyre: —Aõkõre isiratyhyre tuu ròte. Inyõ tarasanamy reaõtyhy. ²⁶ Jesuisi tamyreny retehere tahe rarybere: —Inatyhy rare hãbu-ò isirare. Deuxu dee tahe isiraõle rare. ²⁷ Tai tahe Pedro rarybere: —Jiarỹboho ibutumy aõmydỹnarenny adiridenyde. Araheludunymy watxiwãhãre. Aõma ritarennykre? ²⁸ Jesuisi tahe dirawyònyde: —Kiamy heka

adee ararybekre. Jiarÿ Deuxu Riòre Hãbu tyhyhykÿ wahe. Kaiboho heka tule borukubenyke aiòlònaryna-ki iu ibutumy ratÿmyrakreu. Kaiboho iny sohoji sohojimy judeu ijoiò biy-wisidÿÿnanybenykre, waijoi waòinatxi reurò mahãduò wahe. ²⁹ Inyò kia ibutumy aòbo waòraru-ki ririmyhÿre iwese taheto ririmyhÿre waòraru-ki, taseriòre, tadi, tyby, uladu, taoworu, ririmyhÿre. Kia sohoji sohoji-ribi heka aò sohoji sohoji òwymy 100 ritakre. Tule umytuedeòna ijòmy ritakre. ³⁰ Inyò nihikÿmy ityhymy ratxirerimy ihÿre, tii iyjalemy relekre, aòma aòkò tai relekre. Tule iyja nihikÿmy relekre. Sòwemy urimyn-odu kaki rÿirerimy ihÿre tahe biu-ki inihikÿmy rarekre.

20

¹ Jesuisi tasÿ riteòsinyreri ijyyò timyrebo Deuxu Iòlòna. Hãbu aòmÿsÿdÿÿdu heka oworu widÿÿmy heka riteranymy tamy rarybemyhÿre: ² —Aòmamy araòwynykre, sohoji prata womati nieru, iwese ibutumy raòwynymyhÿre wese, sohoji txuòwy wahe. Tai tahe tii raaòmÿsÿdÿÿre uva oworu-di raaòmÿsÿdÿÿmyhÿ. ³⁻⁴ Idi tahe tii reare 9 horau tule, txutyeyu tule, titxibo iaòmÿsÿdÿÿna rÿireri titxibo hãbu teaòmÿsÿdÿÿmyhÿò. Tahe tuu robire urile ratximyhÿmyhe idi retehemyhÿ. Tai tahe tamy rarybere: —Maaòmÿsÿdÿÿke hewa, waoworu-ki. Ikonana txu heka òbitihyky araòwynykemy adi watxireri. ⁵ Tiiboho raaòmÿsÿdÿÿre tule. Txutyeyu tasÿ ixiyrubule ijò riteranyre aòma iwese kia juhuyu ijò-ò rarybera wesele. ⁶ Txuinyòbira-ò ijò rimyre, tule ijò txiorotxure. ⁷ Iruyre hora-ò ijò tasÿ riteònyre. ⁸ Tahe txiorotxumy ròhònyra tahe kia iòwydÿÿdu tamy ryryre. ⁹ Tahe 1 womati nieru tamy riwahinyre, sohoji hora raaòmÿsÿdÿÿre mahãdu wahe. ¹⁰ Tahe txusohojimy raaòmÿsÿdÿÿre tahe iratyre ròtakremy ixi-di ròhòtinyre. Tahe tule riòwynyra iwese ijò riòwynyra weselemy, 1 womati nieru, sohoji sohoji wahe. ¹¹ Tai tahe rimyre nieru urile tamy rexibinanymy rarybere: ¹² —Kowa heka sohoji horale raaòmÿsÿdÿÿhãrele heka 1 teòwynyta. Jiarÿ boho tahe txuhyy raaòmÿsÿdÿÿra, bede tòtee-ki wahe. ¹³ Tahe iwedu rarybere: —Wabiòwa, adeeremy rarybera. Wiji 1 womati nieru ariwahinykremy heka inatyhy? Tuheka adeeremy rewahinyre. Aribi rawasinyora. ¹⁴ Boibenykre heka ibutumy araòwynyneri. Wiwesetyhylemy heka araòwynyrenyneri, iwese rarybere wese. ¹⁵ Hora sohojilemy raaòmÿsÿdÿÿraò sohojimy wanieru ariòwynykre inatyhy. Tamy wanieru ariwahinykemy ixideewimy, aòhe inatyhy? Aòherekibo tebureteri? Jiarÿ urihimyò raaòmÿsÿdÿÿraò wawiremy tarybetenyteri wahe. ¹⁶ Jesuisi tahe rexihure

kia rybe-di, kiamykre bede: —Ikoludu heka ihewoludu-ò resekre. Ihewoludu tasỹ iko-ò resekre.

¹⁷ Tai tahe Jesuisi ròwònyre Jerusalē hāwā-ò. Iny-ribi tawaò inatxi reurò mahādu rihitxinyre. Tamy relyyre timybo aõhebo rotỹnykremy Jerusalē hāwā-ki: ¹⁸ —Jiarỹ, Hābutyhyhykỹ adee ararybekre: —Inyõ riwawahinykre aõma-ò Xiwena wahidỹydu wedu mahādu-ò. Tule diwatyhenykre judeu wedu mahādu-ò. Tahe riwarubunykmey heka tiiboho wamy rarybekre ijõ iny-ò. ¹⁹ Tii heka riwamykre tahe riwawahinykre Roma iòlò-ò, judeukõdu mahādu iòlò wahe. Ibinatyhymy aõhebo riwasỹnymy riwahetenyre. Itxeò nihikỹ-ò riwata-madỹnykre. Tahe txu inataõ-di rubu-ribi areixixanykre.

²⁰ Zebedeu riõrese Jesuisi-ò nade. Tatiowotimy resere tahe rexitòenyre aõmybo Jesuisi-ò tariõre-wana nade. ²¹ Jesuisi tamy rarybere: —Aõbo rare hāwyy rarybere: —Waritxòre inatxi hābu rare. Tikiboho kỹnyhe, aikòlònykuna rynana-ki ronykre awana. Ijõ aruruna-txi, ijõ ahywe-txi wahe, kai aikòlòkuna-kò malokreku wahe. ²² Jesuisi heka iriõre-ò rarybere: —Kaiboho aõmybo textitòenyteri teerykõleter. Kai Txiau, kai Joaõ, teerytenyte aõbo aõhebo wadi rotỹnykre arurukre dori jiarỹ kaiboho tulekre? Tiiboho dirawyònyde: —Tulekre. ²³ Tahe Jesuisi rarybere: —Inatyhy rare kaiboho tule aõhòkỹmy botỹnybenykre. Tahe mobo warora-txi ada waruruna weribi rynana-txi ronykre. Jiarỹ reerykõre. Wahale heka rieryre. Tiile tamy riywinyre. ²⁴ Idi tahe debòwiò ierydỹyna mahādu kia rieryre aõmybo Txiaku Joaõboho rexitòenyrenyrá. Tai tahe tiiboho rakyarananyrenyre. ²⁵ Tahe Jesuisi ibutumy taerydỹyna mahādu tamy kanakemy rarybere: —Iny iòlò iruru dire. Ibutumy dinodu tahe kia weselere —taijoi mahādu riteònymyhỹre. Teòdu mahādu riteònymyhỹre. ²⁶ Tahe aõ tuukre aõkõ heka rare ayreny-ki. Inyõ dinodumy ixidikre heka deòdumy rarekre. ²⁷ Kia iny nihikỹmy ixi-di rexinhòtynyreri tasỹ aõ aõkõ tii rarekre. ²⁸ Iwese jiarỹ riwinyre wesemy heka rarekre. Hābutyhyhykỹ aõ dinodumy aõkõ anade. Iwese deòdu rỹira wesemy heka nade waumy riwahinykremy rubu-ò kabede-ki. Tai sòwemy iny ritakre.

²⁹ Iu Ijeriò hāwā-ribi ròirenyreu, tahe sòwemy iny riheludunyre. ³⁰ Inatxi iruetāmy heka rononymhỹ iu Jesuisi ibire-di rareu. Tiiboho roholarenyre kia Jesuisi raremy. Rexidenyryre ryryre Jesuisi-ò: —Davi riokore, wadee hewa ruxetòena biwahinyke. ³¹ Tai tahe iòhòmny iny iribi rỹimyhỹ rarybere: —Txioke inihe, biyryke! Ixityre ryryre tarurutyhy: —Inynyrỹ Davi riokore, Biwawotòenyke hewa. ³² Jesuisi tamy rarybere: —Aõwexe adeereny ariwinykre. ³³ —Wanyrỹ, Kai wa bidiwaruenykre warue biraynykremy. ³⁴ Tahe Jesuisi

riwotòenyre iruebymy reare tebò-di. Aõwesele tahe ruòmy reare. Tai tahe Jesuisihe riheludunyre.

21

¹ Jesuisiboho tahe rehemynyrenyre Jerusalẽ hãwã iòhòmy. Betabaji hãwã-ò heka rehemynyre. Kia Oliveira hãwãlò-ribi irehemy aõkõ ihÿre. Tahe Jesuisi inatxi iny riteònyre hãwã-ò, taerydÿÿna mahãdu wahe. Tamy rarybere: ² —Juhu hãwã dele-ò malokreule aõma bobikre, jumenta tariòre-wana. Tahe bitaanalawekre ta bididykre kaò. ³ Inyõ aratyÿÿraxinykre wana, tai tahe kiamy bisÿnykre aõma: —Wawedu hewa idi ratxikemy røhòtinyreri. Tai ki tahe ahemy kiditeònykre. ⁴ Kia ihetxiu ritidyÿÿna tuheka relemy roimyhÿre. Kamy rarybere: ⁵ —Marybeke heka Jerusalẽ hãwã-ò:

—Deuxu Iòlòna heka kanakre adeereny wahe. Tii inihikÿ wesemy aõkõ kedehemynomy, jumenta tyre-ki heka kedehemynykre.

⁶ Tahe ierydÿÿna mahãdu riwinyre iwese Jesuisi rarybere weselemy. ⁷ Didyde tahe jumenta tariòre-wana. Ihetyreny jumenta tyre ritidire. Jesuisi ityre ronyre tahe idi rare. ⁸ Tahe inyõ sòwemy-ribi tahetyreny-di rehumyhÿre iryko-txi idi rariakemy ityre-di. Ijõ tasÿ hereru-di iryko-txi rehure iryube hetymy ityre-di rariakemy. ⁹ Sòwemy tai iny rirajuamy rÿimyhÿ iko-ò, ihewo-ò:

—Iòlò Davi riokore heka sòwemy iny wowydyna tamy iny riwahinyreri. Tii Deuxu Riòre Hãbu rare. Deuxu deysana heka tamy biwahinyke!

¹⁰ Jesuisi hãwãy-ki rehemynyreu, ibutumy iny ribedeòtiidyÿÿnyre: —Mohãbuwe kia ralòreri Jerusalẽ hãwã-ki wahe? ¹¹ Tai tahe iny mahãdu rarybere: —Aõkõre, kia Deuxu rybeduò rare. Jesuisi inire Kalileia bederibi Nazare hãwã-ribi dehemynyde.

¹² Tahe ralore Deuxu dohodÿÿna heto-ò. Tai kia aõna aõna-di rohonyreri heka riteònyre. Kia aõma nieru wiuròna iòwòruwebese tahe riatyre. Kia aõma bòtòe dohodÿÿdu ryna ibutumy ritxiwire riatyre. ¹³ Tahe Jesuisi rarybere: —Deuxu Tyyriti rarybere:

—Dohodÿÿna heto heka waha heto rare, ixitòedÿÿna heto rare. —Kaiboho heka inywasidu mahãdu-di tetÿxinytenyta.

¹⁴ Sòwemy iny itiere, iruetà, nade Jesuisi-ò dohodÿÿna heto-ò. Jesuisi taile riteytenyre. ¹⁵ Tahe xiwena wahidyÿÿdu wedu tuu robire. Tule judeu bede ywina bede eryna mahãdu robireu tahe, aõma uladu templo-ki ryrymy rÿimyhÿò aõma: —Davi riokore heka Deuxudeewina rare. Tai tahe kia rybe-ò reburerenyre. ¹⁶ Tiiboho tahe raryberenyre Jesuisi-ò: —Kai

aõbo taholate aõbo rarybereri. Jesuisi rirawyònyre: —Kohe, raholare. Kaiboho teeryòtenyete:

—Uladu dori wowydyna tamy riwahinykre. Tiu aõbo tari-
atenyòhyymahâte kia Tyyriti-ki.

17 Tahe Jesuisi iribi ròhònyre Betÿnia hãwã-ò. Taile tahe ruu idi rÿire.

18 Biurasò txumy tahe tii dòòsede Jerusalẽ-ò. Tahe rama risare iu. 19 Òwòruõ tai rÿire. Tai tahe diaride figoraty-ò. Tahe iratyõre, txirule rÿire. Tai Jesuisi rarybere òwòru-ò: —Tiu heka kai maratynyòtyhy aõwesele tahe irade rairuxÿrure. 20 Tai tahe ierydÿÿna mahãdu heka ribedeòtiidÿÿnyre: —Timykibo heka aõwesele rairumyròmy reareri. 21 Tahe Jesuisi tamy rarybere: —Kai ainatyhyna ijòdikeki heka iwesele biwinyke. Iratyre biwinyke. Kaiboho heka bitxiõnyòkeki kaa hãwãlò-ò dori marybekre kiamy: —Iribi bexitake tahe aho-ò boikre. Tai hãwãlò-ò aõwesele heka ahoro-ò roikre. 22 Aõtxile kai bexitòenykre heka adee ijò rÿikre. Bityhynytyhykeki, tahe ibutumy bitake.

23 Tai Jesuisi dehemynyde Deuxu dohodÿÿna heto-ò. Tai tahe ròbedeerydÿÿmy ratximyhÿ. Tahe xiwena wahidÿÿdu mahãdu, tule judeu bede ywina erydÿÿna mahãdu tule tamy dÿÿraximy nade. Tai tahe Jesuisi-ò rÿÿraxire: —Morurudibo heka kai aõmydÿÿnana tewinymahâte? Mobo heka arateranyre kia biwinykemy. 24 Tai tahe Jesuisi tamy rarybere: —Kai aõbo myÿraxikeki wadee tai ako tuu arelyykre. Kai dÿÿraxinaõmy bidiwatÿnynykeki tahe, adee tuu arelyykre. 25 —Joaõ Sebedÿÿdu heka morurudibo nade morybekibo tuu tadiwinymahâte wesemy. Morybekibo Joaõ iny risebenymyhÿre. Deuxu Rybe-ki aõbo ada iny rybe-ki aõbo. Tai tahe widee rarybe raryberenyre: —Aõma Deuxu Rybe-ki tuu ròsebedÿÿmyhÿre. Mykeki rakarybenykre taheka: —Aõherekibo tetyhynytenyòte myle tii risÿnykre. 26 Aõmamy rikisÿnyrenykeki: —Iny rybekile tii tahe nade. Myÿ rikisÿnyrenykeki tasÿ kia ijoi inydeereny rakyarananyke. Joaõ Sebedÿÿdu dori ibutumy iny rityhynyrenyre moma tii Deuxu deòduõ ratximyhÿre heka. Rakarybenyòkre tahe. 27 Tai tahe Jesuisi-ò raryberenyre: —Aõkõre, reeryrenyõre heka irawyòdÿÿ titxiribibo iruru nade. Tahe Jesuisi rirawyònyre: —Tule jiarÿ ÿÿraxina adeereny aritÿnynyrenyòtyhy. 28 Ijò Jesuisi relyyre: —Timybo maraykynybenykre ka ijyymy arelyykre. Hãbuõ heka inatximy iriòre raremyhÿ. Tariòre dela-ò rarybere: —Dàa, maaõmysÿdÿÿkre waoworu-ki, wiji wahe. 29 Tahe tamy dirawyònyde: —Waha, araòkre hewa. Ihãrele tahe tawo rirahòrere rakremy. Tahe rare. 30 Idi tahe tyby rarybere

helỹna-ò: —Kai tule makre waaõmysỹdỹỹna biwinykremy: —Dei wahe, arakre araaõmysỹdỹỹkre. Ihãrele tahe tii raõhyyre. ³¹ Adeereny inihe araỹraxikre. —Tibohe weryrybò aõma tybyrybe rityhynyre? Tai tahe dirawyònyde: —Juduludule irybe rityhynyre. Tai tahe Jesuisi tamy rarybere: —Iny òrarudu tyhy heka wydena-wana ralòkre biu bede ròtena-ò. Ihãrele tahe kaiboho birònybenyòtyhy. ³² Joaõ Sebedỹỹdu dori adeereny rarybere. Ihãrele tahe kaiboho ixitxireny aòrarureny-txi òhòtireny reakemy Deuxu bityhynykemy. Kai-boho heka teramy tekoamahãte tahe sòwemy òrarudu mahãdu wydena mahãdu rityhynyreny. Kaiboho tuu tabitenyete ihãrele teerytenykòte.

³³ Ijõ ijyymy arelyykre:

—Hãbuõ heka uva oworuhukỹle ritòbrònyre. Tahe òtityna riwinyre. Tai tahe utà riwinyre yrubudỹỹdu mahãdu itxerenamy.

Tai tahe rihuòtere oworu wahe hãbu mahãduõ-ò. Tii tahe rabetỹiny my rare taheto-ribi. ³⁴ Iu uva bederaty kia siredenamy bede reareu, riherehe txuramy ixidee ritxuakemy wahe. ³⁵ Tai tahe huòtedu mahãdumy heka teòdu mahãdulemy raòhòtere. Ijõ tahe rirubunyre ijõ manadile tamy rehunanymy rỹimyhỹ. ³⁶ Iribi tasỹ teòdu mahãduõ didyde sòwetyhymy juhuna ludu ratyre. Tahe ixbyle tuu raòhòtere juhuu iwese tuu rotỹỹnyra wesele. ³⁷ Tahe iwedutyhy ròhòtinyre: —Aõma wariòrele kòri ariteònykre. Tai tahe wariòre rityhynykre heka. Tahe tariòre diteònyde. ³⁸ Tahe huòtedu mahãdu weryrybòmy robireu, tahe wideereny rarybere: —Kaa heka iwedu riòrele rare. Aõma iwedu rurukreu iaõna aõna, ioworu heka ixideereny rikimyrenykre. ³⁹ Tahe rirubunyreny iumy-di rehurenre oworuro-ribi. ⁴⁰ Tahe Jesuisi rarybere: —Adeereny araỹraxikre aõbo iwedu tamyreny riwinykre huòtedu mahãdu-ò iu tii rehemynykre wahe. Timybohe tii riwinykre? ⁴¹ Tiiboho dirawyònydenyde: —Kia rirubunykre ibutumy hãbu bina. Inywitxira-ò huòtenamy ele elemy wijuramy riatykre-ò riwahinykre. ⁴² Tahe Jesuisi tamy rỹỹraxire: —Kaiboho aõbo Ryberiti-di tariaõletenyteri:

—Mana-di heka heto widỹỹdu rehumyhỹre kia manale heto hàtxi-ki ritidimy roimyhỹre. Jiarỹ kia mana wese rare. Inynyrỹ Deuxu kia riwahinyre. Tai awi heka rare. Ijõ riwiòhenanyre, mana wahe.

⁴³ Tahe Jesuisi tamyreny rarybere: —Tule jiarỹ adeereny ararybekre: —Deuxu Iòlòna heka aribi ritakre. Tahe inywitxira-ò aribi riwahinykre. Inyõ txura wylemy riwahinykremy Deuxu-ò. ⁴⁴ Kia iny mana tyre resemyhỹkre

heka tii heka wiòròmy ixòdumy rare. Mana inytyre re-sekeki tasỹ iny risurusurunya. ⁴⁵ Inyõ roholakeki kia aõbo aõma xiwena wahidỹỹdu mahãdu roholamy rỹimyhỹ tule fariseu mahãdu. Tule rexierymyhỹrenyre tiiboho Jesuisi turenyle rarybereri heka rierymyhỹrenyre. ⁴⁶ Tai heka tii mahãdu rimykyemy idi riwisỹnymyhỹ tahe iny sõwehekỹ lau ruberumyhỹrenyre. Iny mahãdu dori idi rõhõtiny tii Deuxu rybeduõ ratximyhỹremy.

22

¹ Jesuisi heka rexidelenyre ijyymy relyykyemy: ² –Timybo Deuxu Iòlòna rare ijyymy heka relyykre. –Iòlòõ heka tariòre herinamy worana bedehesi riywinyre. ³ Iaõmydỹỹnana ròrarukõmy rỹidi tahe teòdu mahãdu iòrysmy roire. Rexihumy rỹireriki iaõmydỹỹnana, kanakremy wahe. Tahe òrysyna noderamy reare. ⁴ Ijõ riteònyre teòduõ iny ritobinykremy. Aõhere tahaka, wabroreni kỹnyhe rerubunyre heka. Ibutumy heka waaõmydỹỹna rehumy rỹireri. Tahe kedeade kedeake heka kòdòidenyke heka. ⁵ Tahe timy heka irybe rityhynyrenyõhyyre. Iny sohoji sohoji tatyryesi-di ijohona-ò, ijõ taaõmysỹdỹỹna-ò rea reare, ijõ taoworu-ò reare. ⁶ Ijõ lobidỹỹna reburere teòdu mahãdu dee. Tii teòdu dee heka rawobinare. Ijõ aõbina bina heka ritxienyre ijõ rirubunyre dori. ⁷ Tai tahe iòlò reburere lobidỹỹna mahãdumy bina bina raòhòtedỹỹnyre, rirubunyre. Ihãwã ritoonyre. ⁸ Tai iòlò rarybere teòduboho-ò: –Waworana bedehesi rexihumy rỹireri ibutumy. Kia iny mahãdu ijoi juhoo retobinyra heka aõ ibina heka roire. Urile riòmysanymyhỹrenye. ⁹ Tai tahe ibutumy boibenykre hãwã-ò ibutumy iny-txi bekoabenybekre heka bitobinybenybekre ibutumy waworana bedehesina-ò kedeade kedeakremy. ¹⁰ Tai tahe didyde iny wiwihikỹ, iny ityhy iny bina mahãdu. Hetowo tahe ritỹxire tỹmyra mahãdu-di. ¹¹ Tahe iòlò ralore hetowo-ò kia iny mahãdu dee rybemy. Tahe tii robire hãbuõmy kia worana bedehesi kia tykyõmy ratxirerimy. ¹² Tai tahe tamy iòlò rarybere: –Waliiny, aõherekiwe worana bedehesi kia tyky-di aõkõ atxiteri? Kia tahe hãbu rybeõmy riijere. ¹³ Tai tahe iòlò aõma rarybere teòdu mahãdu-ò: –Bimybenyke kaa hãbu. Waa bitaataabenyke imy behubenyke tahe idi diòlòdỹỹmy idi rehukre luruhukỹ-ò. Tai Aõhòkỹmy dỹỹnana-ki tai txuraruti rikyikyiny. Tai rahinykre. ¹⁴ Tai tahe Jesuisi rarybere: –Sõwemy iny heka kidirahukre tahe ibutemy kanaarikre.

¹⁵ Tai tahe fariseu mahãdu ròhònyre wii rotyre. Aõbinamy Jesuisi rarybekeule heka rimykyemy idi rỹimyhỹ. ¹⁶ Kia aõma fariseu ijoiõ heka riteònyre Jesuisi-ò. Tule Herodi

ijoi mahādu riteònyre. Rỹraxyre Jesuisi-ò: —Erydỹdu, kai heka hābuwi tate, hābu òbiti. Kai heka tòbedeerydỹmahāte Deuxu deewinamy. Awire aōbo ariòwynyrenykre Roma hāwā mahādu dinodu-ò. ¹⁷ Kai heka ixinamy aōma adee iny rarybererimy ihỹre. Timybo iny raraykynyrerimy ihỹre. Iny bede ywinareny aōbohe ixinamy nieru aōna aōna òwydỹnyamy ròhònyke aōbohe awire? ¹⁸ Tai Jesuisi heka rierymyhỹ aōma awimy aōkō tai rahareri heka rexierymyhỹre: —Kaiboho òbitimy aōkō toite. Aōherekibo heka kai biwaitxenanybenkemy wamynomy wadi atxitenyteri? ¹⁹ Timybohe nieru-ki rakaharenykre aōna aōna òwydỹnyamy. Biditeòsinyke kia-ò arierykremy. Tai tahe tamy riteòsinyre womati nieruò. ²⁰ Tahe Jesuisi ritỹraxyre: —Motyytybybo koa rỹire. Monibo ityre-ki koa roire? ²¹ Tai tahe rirawyònyre: —Roma hāwā iòlònile tai roire. Tai tahe Jesuisi rarybere: —Tibo Roma hāwā iòlò nierubo heka tamy biwahinykre. Tibo Deuxu nierule tasỹ tamy biwahinykre. ²² Tai tahe urile ribedeòtiidỹnyre. Tai ririrenyre ròirenyre.

²³ Tahe kia txule saduseu mahāduò heka dòidenyde Jesuisi-ò. Rityhynyòhyymyhỹre kia aōma rubu-bibi ixixana heka rityhynyòhyymyhỹre, saduseu mahādu wahe. ²⁴ Tamy rarybere: —Erydỹdu, Moisesi tyryiti heka kawesemy ribedeerynyre:

—Aōma hābumy hāwyy heridumy roikeyi aōbohe timykibo hāwyy uladu-di ratxikeki. Hābuò iriòrekò-di rurukeyi tai tahe iseriòre heka iriòrese tyby-wana roikeyi. Tai heka kia hābu rubuweleu, kia deròwymy heka uladu ritybienyke.

²⁵ Aōu heka debò inatxi seriòremy kaki rasỹnyamy raremyhỹ. Telareny heka roire hāwymy tahe iriòrekòlemy rurure. Tahe ihāwyytybyhe kia iseriòrewanale roire. ²⁶ Ihelỹna sỹ tule rurure. Kia heka ibutumy debò inatxi reurò tii-wana roihyyre iriòrekòule. ²⁷ Tahe hāwyy heka tule rurure. ²⁸ Tai tahe kia ruru-ribi rexixakreu tahe, tiwexe ihābukre? Ibutumy dorihe tii-wana heka roilehekỹlera. ²⁹ Tai tahe Jesuisi rirawyònyre: —Kaiboho teerytenykòlemahātenyete timybo Tyyriti-ki roimyhỹre. Deuxu ruru tule teeryòte. ³⁰ Tiu iny rubu-ribi rexixakreu iwitxiramy rexixakre. Yju wesemy ronykre. Timy heka hābumy hāwymy roiòtyhy. ³¹ Kaiboho heka tetyhynytenyòhyymahātenyete rubu-ribi ixixana. Idi heka tariatenyòhyymahātenyete timybo Deuxu rarybere? ³² Kiamy heka rarybere: —Jiarỹ heka Abraò Deuxu rare. Ijai Deuxu rare. Ijaò Deuxu jiarỹ rare. Tii heka iru mahādu Deuxu heka tii ihỹre rubu mahādu Deuxu aōkō wahe. ³³ Iu iny sòwe ribedeerynyre, tahe urile iny ribedeòtiidỹnyre.

³⁴ Fariseu mahādu doidenyde Jesuisi-ò wii rotyrenyde. Roholareki wahe aōma saduceu mahādu ribedeòtiidỹnyrenydeki.
³⁵ Bede ywina erydỹna mahāduõ rỹraxire heka aōmybo Jesuisi-ò. Tii rimyky heka idi riwisỹnomy kia rybe-binaōmy rirawyònykeki rimyky. ³⁶ Tahe rỹraxire: — Erydỹdu, tibohe aōbo bede ywina kia-ribi aōnityhymyhewe bedeòtiidỹnyratximyhỹre. Wakoreny inihe tuu bedelykre. Tibo kidiòtiidỹnyratximyhỹre. ³⁷ Tahe Jesuisi dirawyònyde: —Iny Deuxureny iny iòlòreny luuke heka. Ibutumy awo-ribi heka iluuke, ibutumy aruruna-ribi, ibutumy arayky-ribi luuke heka. ³⁸ Tii heka inatyhy bedeòtiidỹnyratximyhỹre ibutu bede ywina-ribi. ³⁹ Ijõ ihelỹna tahe iwesele heka rare: Iwese ixiluure wese heka ibutu luuke. ⁴⁰ Ibutumy Moisesi bede ywina heka juhū rare. Tule Deuxu rybedu mahādu erydỹna heka iribile rare. Kia bede ywina inatxi-ribi heka ibutumy iny bede eryna ròhònyre. Kia inatxi bityhynomy bohonykeki iuhe heka tetyhynmahāte.

⁴¹ Iu fariseu mahādu iweroramy rỹimyhỹò tahe rỹraxire Jesuisi tamy: ⁴² —Mobo Deuxu deòdỹnyratximyhỹre, Kristu wahe? Moriòrebo tii ihỹre. Tai tahe tiiboho rirawyònyrenyde: —Moma Davi riokore òsana. Tahe ijõ Jesuisi rỹraxire: ⁴³ —Tai tahe aōherekibo Davi heka Wanyrỹmy rininire Deuxu Tyytybytyhy irybe riwiòhenanyreu wahe. Davi dori kawesemy rarybere: ⁴⁴ Deuxu wawedu-ò rarybere.

—Bodonyke warurunawe-ribi, jiarỹ heka aòludu mahādu-di arawo-txi.

⁴⁵ Davi tawedumy Kristu rininirehāre, timykibo Kristu iriokore riokorekre. ⁴⁶ Tahe inyõ heka Jesuisi rirawyònyòhyre. Tai tahe ruberumyhỹre tamy rỹraxike lau.

23

¹ Jesuisi heka iny sōwe nihikỹ ribedeerynyhỹ taerydỹna mahādu-wana. Tii rarybere: ² —Judeu bederydỹdu mahādu heka Moisesi bede ywina bede erydỹna mahāduõ rare. fariseu mahādu tule bede ywina riwinymyhỹrenyde. ³ Iwese ribedeerynyre wese tahe bityhynkre. Uritere iwese tii riwinymyhỹre wese uritere iwidỹõmy. Aōwidỹmy rarybemyhỹrenyrehāre tahe aōwitxira heka riwinymyhỹrenyde. ⁴ Tiiboho heka atyreny riòdònyhikỹmyhỹre bede ywina. Ihāre tahe rityhynyrenyòhyymahārenyde. ⁵ Aōma òbitimy ratxike sỹny heka iny tamy roholamyhỹre ixi-di ratxirerimy ihỹre. Aōma walabu riòreõ heka rỹimyhỹre axiò-ki bede ywina heka ritidimy roimyhỹre ityky ijeti retydyna bede ywina-txi tōhōti reakemy tuu riwinyrenyde. Sōwemy heka iretydyna riwinyrenyde. ⁶ Ronymyhỹreu heka ikoòhòkỹle ronymyhỹre,

worana bedehesina r̄yi-wana wahe. Dohod̄ȳna heto-ki heka tule ronymyhȳre, iko-ò tuu rexis̄nymyhȳ. ⁷ H̄aw̄y-ki iny tamy ryrymyhȳre: —Waeryd̄ȳdu, Habimy, kia tahe irybe-ki bede eryd̄ȳdu rare. Tii tahe tamyreny awire. ⁸ Tai tahe Jesuisi tamyreny rarybere: —Kaiboho heka uritere Habimy inyō adeereny irykōmy ih̄yke. Deuxu sohojile bede eryd̄ȳdu heka rare. Ibutumy kaiboho seriōre wesemy atximah̄atenyete. ⁹ Kasu-ki taheka inyō heka tiu wahamy inyō widee rarybeōtyhy Deuxu biu-ki ratximyhȳrele tuu bininibenyke heka. ¹⁰ Uritere Wawedu mȳ inyō kia nid̄ȳōmy. Deuxu deōd̄ȳnale heka awedu ratximyhȳre Mesia wahe. ¹¹ Anihik̄my ixi-di mohōtinykeki tahe, kia iny biwiōhenanyke. ¹² Kia ityhy rare ixi-di rōhōtinymyhȳre, tii heka ihewo-ribi rabadewokre. Ihewo-ribi tahe aōma aōkō relekre. Kia iaōkōmy ixi-di rōhōtinykre tahe nihik̄my heka relekre. ¹³ Belàh̄axe! Kaiboho itxenad̄ȳluku. Ibi-ina adeereny kanakre, kai bede eryd̄ȳna mah̄adu, fariseu mah̄adu. Kaiboho uritere iny rōted̄ȳrenyōmy Deuxu Iōlōna-ō. Kaiboho birōnybenyōtyhy tule iny rōted̄ȳ-ō biebenyke. Kaiboho bexis̄nybenyke òbitinamy. ¹⁴ Aixitōed̄ȳna rehereheki wahe h̄aw̄a ube-ki. Kaiboho urile iny teitxenanyamah̄atenyete. Aōma wytese urimynodu heka iheto-ribi teteōnymah̄atenyete kaiboho heka abinarenyre. Tai heka kaiboho yla aōkō aōhōk̄my bot̄ȳnybenykre. ¹⁵ Belàh̄axe! Kaiboho ibutumy iny aratyhynyrenykemy ixi-di tahōtinymah̄atenyete. Tai heka iny tes̄nymah̄atenyete òrarudutyhymy wahe ixiratyre heka teijirad̄ȳnymah̄atenyete. Aōraru-ki heka aōhōk̄my bot̄ȳnybenykre. Iny-di atxikemy heka tahōtinymah̄ate. ¹⁶ Kaiboho ruetà mah̄adu wesemy kai ah̄ate. Kaiboho heka kia wesemy tebedeerynytenyete. Inyō heka Deuxu bede eryna heto riwawiōhenanykeki heka aōna aōna ariwinykre. Mȳ marybebenykeki, heka aō aōkō heka rare. Deuxu dohod̄ȳna heto womati t̄yr̄r̄ȳh̄k̄y-di marybekeki heka, tii heka rityhynyhyy. Ibutumy heka kia bede ywina òta òta tewinymah̄atenyete. ¹⁷ Kaiboho heka bede eryd̄ȳdu bede erytyhykō mah̄adu atxitenyteri dohod̄ȳna heto kia-ò ralòkeki. Aōbo bedeōtiid̄ȳna tyhyre womati t̄yr̄r̄ȳh̄k̄y aōbo ada dohod̄ȳna hetole aōbo teeryōte, Deuxu Dohod̄ȳna heto wahe. ¹⁸ Kaiboho tule tebedeerynyete kawesemy. Inyō tarybe inatyhy-di rarybekeki, tai heka kia xiwena wahid̄ȳna-di rarybekeki, tai tahe tii rityhynyōkeki, awira. Tahe tii xiwena wahid̄ȳna tyre-ki rarybekeki tahe, tii òbitimy heka rarybeke. ¹⁹ Kaiboho ruetà mah̄adu wese, kaiboho heka eryd̄ȳnakōdu mah̄adumy toite. Aōbo awityhyre? Xiwena wahid̄ȳna aōbo ada ityre-ki wahid̄ȳna roimyyhȳre aōbo? ²⁰ Wahisid̄ȳna heka wiwesele

rare. Aõma xiwena tyre-ki roire wana tule wiwesele rare. Aõma xiwena tyre-ki roiõre wana wahe heka aõ aõkõ rare. Xiwena utàle heka rierymyhÿre inatyhy rare. Myheka kai mararybekeki heka tai tahe kai heka xiwena utàlemy tarybeteri. Ibutumy iny ityre-ki rÿire bohomy tule heka tai tuu tarybeteri. ²¹ Deuxu dohodÿÿna heto òraru-ki kai koityhyxemy marybekeki heka tai heka kai dohodÿÿna hetomy tarybeteri hãre tahe Deuxu iwo-ki ratxirerilemy tuu tarybeteri. ²² Biu òraru-ki ka koityhyxenyteri marybekeki, Deuxusÿmy tarybeteri. Tii dori tarynana-ki ronyreri. ²³ —Belàhàxe! fariseu mahãdu! Kaiboho heka itxenadÿÿdu mahãduõ toite. Tule bede ywina bede erydÿÿdu mahãdu. Adeereny heka ibinamy ratxikre. Arÿsÿna uri juraõ heka kai Deuxu-ò tewahinyte, hortelã, erva-doce, cominho wahe. Kaiboho heka aõninihikÿ tetyhynytenyõhyymahãtenynte. Iwese òbitina, ruxetõena, inatyhyna kia-ribi heka õhõti losamyhÿre ibutumy. Aõmydÿÿna jura wahisidÿÿna heka awi rare. Tahe tule uritere õhõti losaõmyke aõwitzira-ribi wahe. Aõbo bedeõtiidÿÿnare bede ywina-ki. Kaiboho heka bede erydÿÿdu toite hãre tahe teerytenyõte. ²⁴ Belàhàxe! Kai hãbuõ wese rare. Tiiboho imona berareny-ribi ohoruxõmo riarimahãre. Ihãrele tahe tiiboho iròdu nihikÿ rirÿsÿmyhÿre. Iwesele kaiboho tule terÿsÿmyhÿtenynte. ²⁵ —Belàhàxe fariseu mahãdu, bede ywina bede erydÿÿna mahãdu. Amona deoreny tesuhõmahãtenynte iwe. Iwo tahe ka isuhukÿlemy rÿimyhÿre. Itxenadÿÿna rÿire. Aõma aumy weselemy heka kia ratximyhÿre. Aõma aumy heka webòròsityy tyrare heka. Araykywo-ki tahe ibutu itxenadÿÿ heka tai rÿimyhÿre. ²⁶ Belàhàxe fariseu mahãdu! Kaiboho taruetà mahãdu. Kai mona hynawo bisuhòke heka biòtinyke. Aõma bisuhòke ihÿre tahe arayky bityranykre. Tahe ibutumy heka aumy ryranykre. ²⁷⁻²⁸ —Belàhàxe fariseu mahãdu! Kaiboho heka koityhyxenyteri. Rubu heto wiwihikÿ ixideereny tewinymahãtenynte. Kaiboho heka iwesetyhylemy toite. Aõma webòròsitylydu heka iruxeramy idi toite. Aõma aworeny-ki tahe aõma iny rubu idi ròhòkÿdileka atxitenyteri mahãtenynte. Ibutumy aõbina bina awo-ki arayky-ki idi atxiteri mahãtenynte. Aumyreny-ki heka tykywihikÿ texitykyny mahãtenynte. Aõma hãbu wihikÿwesemy. Hãbu òbitimy matxibenyke myheka iny adi ròhõtirenkemy heka tuu texitykynymahãtenynte. Araykywo-ki tahe arimyrenywo-ki tahe ibutu itxenadÿÿna-di heka toite, òrarudu mahãdu toite. ²⁹ Belàhàxe! Tai heka kaiboho Deuxu rybedu mahãduõ rirubunyre. Kaa nohõti ijaranamy tuu tewinymahãtenynte. Awabederenywo-ki heka noijasa ruxerahakÿle tetidite. ³⁰ Kaiboho heka tarybemahãtenynte. —Tiu

wahareny riwinyre wese heka ariwinyrenyōtyhy. ³¹ Kiamy tarybeteu heka hābu bina riòremy texininite. Bowesele toite. Iriòre toite. ³² Iwese juhuu ibinamy riwinyre wese heka iwesetyhyle aōhebo tatỹỹnymahātenyete. ³³ Iwese hemylala deborehekỹ wesemy heka kaiboho atximahātenyete. Boreny tule iweselere. Timybo heka kaiboho heòty bede-ribi mahenybenyke? Kaiboho heòty bede-ò boibenyke. ³⁴ Adeeremy ariteònykre aōma Deuxu rybeduō hābu erydu, tyryiti erydu wahe. Kaiboho bidirubunybedenykre. Ohodỹỹna heto-ki ijō bidihetenybedenykre awaru hetenaō-di. Itxeòtyre-ki ijō bidirubunybedenykre. Ijō heka biheludumykre hāwā hāwā-ò tamy ibinamy riwinykremy. Aōhōkỹmy dỹỹnana heka tamy biwahinybenykre ijō hāwā-ò rakreu. ³⁵⁻³⁶ Kia heka hābu ibutumy rurure tyby òraru-ki wahe. Dohodỹỹna hetowokile rirubunyrenyre. Kaiboho Abeli juhuu terubunytenyete ikonana tahe Zacaria, Barakia riòre wahe. Òbityhy juratya-ki heka tuu tewinytenyete. Wijinabòdu mahādu tai aōhōkỹmy rotỹỹnykre. Ibutumy ibinamy kai atyre-ò kedeseekre. ³⁷ Jesuisi ikonana tahe rarybere: —Jerusalē hāwā mahādu, kaiboho heka terubunytenyete Deuxu rybemy rybedu mahādu. Jiarỹ heka aramykemy adi rewisỹnyreri wariòre wesemy tahe waderarenyre kaiboho. Iwese hānieō iriòre ridyre wese idewo-ki. ³⁸ Aheto heka ixisohojilemy rỹimyhỹre. ³⁹ Kaheka ararybekre adeeremy: —Wamy heka bobiòtyhy ixityre. Kai heka Deuxu deòdỹỹna bidykreule wamy bobikre. Iu rarybereu, Deuxu deysanamy, wamy bobikre.

24

¹ Iu Jesuisi ròhònyreu dohodỹỹna-ribi, ierydỹỹna mahādu tamy rarybere dohodỹỹna heto itxeremy ròikemy, eleri-ò wahe. Tai tahe Jesuisi dirawyònyde: ² —Inatyhy rare, awi heka rare. Urile tahe kidiixāwididỹỹnykre heka. Timy heka manaō wityre-ki roiōhyykre. Ibutumy bede-ò idi rehukre. ³ Iribi tahe Jesuisi rehemynyre Oliveira hāwālò-ò heka ronyre. Tai tahe erydỹỹna mahādu tii ritỹỹraxinyre iny sōwe-ribi: —Tiubohe ibutumy kedeixixāwididỹỹnykre. Tiuboho ibutumy bede konanadỹỹnamy reakre. Timybohe rikieryrenykre kai bedehemynyke aōma bede ibutumy rexihukre. ⁴ Tahe Jesuisi tamy rarybere: —Uritere inyō aitxenadỹỹōmykre. ⁵ Sōwemyhe iny itxenadỹỹnamy rỹirakre. Jiarỹ Kristu rare, Deuxu deòdỹỹna heka jiarỹ rare, myheka adee kanarybekre. ⁶ Kaiboho heka boholamy mabekre iny aōbina ròhònymyhỹkre: boholamahākre. Ihāre tahe iny rarybekre aōma: —Karibi heka aōbina urihimyò ròhònykre. Myhe rarybe-mahākre. Ihārele tahe kòdòòseōkre aōma ikonana urihimyò.

Ibutumy heka kia wesemy relekre. ⁷ Aõma kia wesemy heka bede roimyhỹ rarekre aõbo iny witxira witxira heka ibutumy iòlòna heka riteranymyhỹkre. Aõbinamy. Tai heka raaõbinanymy rỹirakre. Aõma rama ijara reakre. Bede ibutumy ramytatakre hãwãõ-ki. ⁸ Kia heka iwese hãwyy uladu dese wesemy robumyhỹre wese tukre. ⁹ Adeereny heka aõhõkỹmydỹỹnana tiiboho riwahinykre aõma wani òraru-ki wahe. Ijõ kaibohoõ heka ararubunyrenykre. ¹⁰ Sõwemy heka iny riatymyhỹkre wary-ribi heka riatymy ririmyhỹkre. Wii rityhenymyhỹkre. Widee rakyarananymyhỹkre. ¹¹ Rybebina rybeduõ heka sõwemy kedehemynykre tahe kia heka sõwemy iny riitxenanymyhỹkre. ¹² Iu heka òraru nihikỹ iu ròhònykremy roimyhỹre. Sõwemy heka luuna-di rỹiramyhỹ katahe wiji ixãwikre heka ihomy aõkõ relekre. ¹³ Kia idi hyy rỹirakre ikonana-ò. Tii mahãdu tahe tarasanamy reakremy rỹira. ¹⁴ Ibutumyhe kia iny-ò rybe tỹnydỹỹnamy reakremy rỹira, Deuxu Rybewihikỹ Tỹmyra wahe. Ibutu iny witxira witxira heka roholakre rybe wihikỹ-ò. Kia rahudi hikỹle heka taheka kedehemynykre heka ikonana. ¹⁵ Aõbinahakỹ tyhybohe ibinatyhy rỹikre. Tii heka rỹikre heka aõma Deuxu ubetyre-ki, Deuxu isỹ-ki, kiaweselemy heka rỹikre. Bieryke aõbo kia rare. Bieryke aõbo kia rare Danieli heka Deuxu rybeduõ ihetxiu kiamy heka rarybere:

¹⁶ —Judeia mahãdu bede-ribi tahe kia bihenybenyke. Ibutumy heka bõibenykre hãwãlò bede-ò biòturònykre.

¹⁷ —Kia bededỹỹnanau heka tiu aõ bimyõtyhy ahetowo-ribi. Tiiemy heka ròhònyhykyle rakre aõwesele wahe.

¹⁸ Iu bedero raaõmysdỹỹkreu heka tiu kòdòòseõtyhy tatyky itxemy. ¹⁹ Tule aõma hãwyy bòtòmỹ rỹira kia bedeu aõhõkỹmy rotỹỹnykremy rỹira. Kia tohouã-di ratxireri tahe tamy isirakre heka itybiedỹỹ idi rakeò heka isirakre. ²⁰ Bedejutytykõkemy heka bexitòenyke ahena mahenykeu. Tule sabado txu aõkõkemy bexitòenyke. ²¹ Tiu heka aõhõkỹmy dỹỹnanamy iny rotỹỹnyõhyymyhỹre kaa aõhõkỹmy dỹỹnana nihikỹmy. Tule tiu tuu robiõhyymyhỹre. ²² Kia Deuxu irokorehemykre wana heka ibutumy iny ituekre. Kaa urihimyòlekre wana tahe kai Deuxu hõrõ mahãdule tuukre. ²³ —Aõma Mesia heka kowa-ò rehemynyra, Deuxu deòdỹỹna wahe. Ihãre tahe kai heka inyõ adee rarybekeki tahe tetyhynyõhyte heka. ²⁴ Kia iu kedehemynykreu tahe aõ Kristu tyhy aõkõ heka rarekre. Aõma rybedu itxenadỹỹdu heka tule aõna aõna wiwihikỹ riwinykre. Aõma ityhydỹỹdu dori riitxenanykemy idi riwisỹnykre: ²⁵ Boholake, juhuu dori adee relyreri ibutumy aõhebo rotỹỹnykre. ²⁶ —Aõma arateòwarinyre dori tuu. Kia Mesia, Deuxu Deòdỹỹna heka ròòsereri. Beteheke beder-

ahy-ki, tule hetowo-ki. Iu tahe timy heka tamy itxeremy raõtyhy inatyhy aõkõreki. ²⁷ Iu jiarỹ Deuxu Riõre Hãbutyhyhykỹ arehemynykreu ibutumy heka rierykre loosõna delaana wesele heka wadehemynyna heka rarekre biu ibutumy ritỹxinykre. ²⁸ Iwese aõ rubu roimyhỹre, rara heka tamy rabutumyhỹre. Kaiboho rierykre iu rehemynykreu. ²⁹ Iu kia bede dỹỹnanamy reakreu tahe txulyby heka kòdòhònykre. Ahãdu tule rybynykre. Taina tule ixewesehekỹle kanakre. Ibutumy ramytatakre biu-ki. ³⁰ Iule tahe kia wadehemynynamy iny robikre. Sõwemy heka hinana ibrunana bede bedemy rỹirakre. Ibutumy heka iny robikre wadehemynynamy biuwetyky-ki, jiarỹ dori, Deuxu Riõre, Hãbutyhyhykỹ rare. Loosõna ruruna sõwekreu, tahe arehemynykre. ³¹ Tule waturõna-di, ýju aditeònykre iu, ajurõna wodỹỹhỹkỹ-di. Tahe ibutumy wahõrõ mahãdu he ixidee aributumykre bede bede-ribi, ibutu rehetyhy-ribi wahe. ³² Jesuisi tule relyyre: —Ijyyõmy heka ako arelyykre. Kai heka ibede erynamy bimykre. Iu kia figueira òwòru hãbu wiji tybiehekỹ. Kia aõma iruru tỹmyra rurunymyhỹré. Tule aõma txirubò tỹmyra ròhònykre. Tiu tahe bierykre. Kai iòhòra bohe wyra. Myhe tamy besekre. ³³ Iwesetyhyle taheka kai heka bierykre. Aõma wadehemynyna ròhòny relekre wahe aòbitikre wadehemynyna iu, aõhòkỹmydỹỹnana wahe. ³⁴ Tiu kia bededỹỹnanaule heka bedekõnyra rexihukre. ³⁵ Biu heka bede-wana ituekre warybe tahe aõu aõu heka rỹihyymy rarekre. ³⁶ Inyõ heka rieryõhyymyhỹre. Tiubo txuu ruu kai konany rỹimyhỹre wahe Ýju dori tiu rieryõhyymyhỹre. Aõma, jiarỹ Deuxu Riõre dori rieryõre. Aõma Waha Deuxule tahe rierymyhỹre. ³⁷ Noe bededỹỹnana wesemy heka rỹimyhỹkre iny risinykre kia bedeu. ³⁸ Ibutumy heka worana bedehesi rỹikre kiau. Lisisò tahe rỹikre. Herina lisina aõma hãwyymy herina. ³⁹ Tahe Noe bededỹỹnana wesemy heka reakre. Iu heka beòra rariare. Tahe rityyhynyõhyyre tiiboho. Tahe heka raòwònyre rariare ibutumy ituere. Iwesele tii heka rarekre heka, wadehemynyna Deuxu Riõre Hãbutyhyhykỹ wahe. ⁴⁰ Inatxi hãbu heka oworu-ki raaõmysỹdỹỹkre. Ijõ heka rakre dynamy reakre. Ijõ tahe rarikre. ⁴¹ Tule inatxi hãwy heka raaõmysỹdỹỹkre heto-ki ratxikre mai risyrenykre. Ijõ heka dynamy reakre ijõ heka rarikre. ⁴² Tai heka iny rexiywiny rỹimyhỹkemy rybe roimyhỹre awedureny kanakreki. Tiubo rehemynykre, teeryõte. ⁴³ Aõma hãbuõ kanakeki heka tiu aõma hãbuõ itxeredumy ronykeki heka, tiu hãbuõ iribi rawasinyõtyhy. ⁴⁴ Bexiywiny heka wadehemynyna biijemy bonyke, jiarỹ Deuxu Riõre Hãbutyhyhykỹ wahe. ⁴⁵ Ijõ Jesuisi relyyre: —Inyõ tadinodu deòdutyhymy ratxikeki,

tii aõmysÿdÿÿna riwinyhyy rononymhÿke tamy. Itheto riywinyhyyke. Teòdu mahãdu txuõ txuõlemy riywinymahãke. ⁴⁶ Kia riwinykeki, deysamy rarekre teòdu rehemynykreu. ⁴⁷ Inatyhymy ararybekre: —Kia deòdu tadinodu aõmydÿÿnana ibutumy idi riywinykre, riyrubunykre. Tii ibutu wedu rarekre. ⁴⁸⁻⁴⁹ Ibinamy tahe tii røhõtinykeki, kiawesemy riwinykre: Deòdumy raòhòtemyhÿ, lisilemy rononymhÿ, riroximyhÿ momodu mahãdu-wana riõmyhÿ. Tii ixidee rarybekre: —Wawedu kedehemynyõtyhy, aõtxile ariwinykre. ⁵⁰ Iu rehemynyõkremy røhõtinyreu, iwedu kiaule rehemynykre. ⁵¹ Tai tahe raòhòtebinakre. Heòty bede-ò riteònykre, Iwese itxena mahãdu tii riteònykre wese. Kia-ò rahinykre, robukre, txuraruti rikyikyinymy aõhøkÿmy dÿÿnana òraru-ki.

25

¹ Jesuisi ijø relyyre: —Kia txu heka Deuxu Iòlòna ka ijyy wesemy rarekre. Debòwiò ijadòma heka hãbumy herina riraòmyhÿrenyre. Iny sohoji sohoji heka toosòna riwyre iximynamyna. ²⁻⁴ Iruyrela tahe tõhòti reare aõma adÿÿ-di ritÿxinykemy. Ihony tahe tõhòti rosare iruyre wasÿ, ijø tule ihyna-ki riwykemy. ⁵ Weryrybò rehemynyõre, tai tahe ijadòma mahãdu ele rihynymy rÿimyhÿ tehemynyna riiraòmyhÿrenyre. Iny sohoji sohoji heka toosòna riwyre iximynamyna. ⁶ Tai tahe rarybera: —Tÿmyra mahãdu-ò wahe rehemynyreri. Birybenybenyke ruwetya. ⁷ Tai tahe ijadòma mahãdu he riturenymy rÿimyhÿre. Toosò itÿnytyhymy rookemy. ⁸ Kia ijø tahe tõhòti rosare mahãdu tahe uritere riijere. Itoodÿÿmy idi riwisÿnymyhÿ. Aõma widee he rexitòenyre: —Urihimykò inihe wahòrò-kò biditxiwike karihukòtekre. ⁹ Tai tahe kialemy risÿnyre: —Anokøre wadehunale dokuri rÿire. Bikòryke tahe ijø itxe tahe. Maa. ¹⁰ Idi tahe ròireny iõbradÿÿmy. Tai titxi tai rohononymhÿreò. Iòrysmy iõbradÿÿmy ròirenyra rookile tahe dehemynyde kia tÿmyra mahãdu wahe. Tahe rironyrenyre ibutumy riroxikemy. Riratòbònyrenyre. ¹¹ Tai tahe kia iruyre ijadòma iõbradÿÿmy rare tahe dehemynyde: —Wahì, itxòtòbòna wadeke bidirakynybedenyke! ¹² Tai tahe kialemy rirawyònyre: —Jiarÿ umyreny reeryõre. Kie riki ijyy. ¹³ Tahe Jesuisi rarybere: —Tai kaiboho bexiywiny my ahãbenyke wadehemynyna biijebeny. Teerytenykòte dori tiubo adòòsekre.

¹⁴ Tii ijø rarybere: —Ijø ijyy my adeereny arabedeerynykre timybo Deuxu Iòlòna raremy. Inyõ heka rakemy ratximyhÿre ijø bede-ò ratÿinykemy. Tii tahe taaõmydÿÿnana ririre teòdu mahãdu-ki. ¹⁵ Tanieru tahe tamy riwahinyre timykibo isiraõmy nieru ritamyhÿre myheka tamy riwahinyre. Ijø-ò

5000 riwahinyre. Ijõ-ò 2000 riwahinyre. Ijõ-ò 1000 riwahinyre. Idi tahe tii rare tabede t̃yinamy. ¹⁶ Kia iruyre ritara heka aõna aõna riõbranymyh̃yre. Diwymyhyre tas̃y idi roho-nyrerimy ih̃yre. Tai wylemy heka inieru rabuture. Ijõ ixityre iruyremy ritxienyire iratyretyhy. ¹⁷ Kia ijõ inatximy tamy riwahinyre tas̃y tulere aõwesele raaõmys̃d̃ỹỹre ta ròtare tule ijõ inatximy ixityre. ¹⁸ Kia sohojimy tamy riwahinyre tahe urile riyrubunyire inieru hãloole riare tamy tahe riyrubunykemy heka riare. ¹⁹ Sõwemy rabeledỹỹnana-ribi tahe iwe-dureny dehemynyde. Tahe tamyreny rarariòwyre takõtareny riòbitinykremy. ²⁰ Iruyre riwyre heka debòwiò diwyde: —Beteheiny wawedu ijõ iruyre anieru tyre rebutunyre. ²¹ Tahe tawedu sõwemy riwowydynyre iaõmys̃d̃ỹỹna wiwihik̃ỹmy ròhònyraki wahe. Kiamy heka tamy rarybere: —Òbitimy idi taaõmys̃d̃ỹỹteki heka. Sõwemy heka adee ariwahinykre riywinykemy. Aõwaxinyhe bitelenykre aõmys̃d̃ỹỹna. Kai heka wawana beysanihik̃ỹkre. ²² Idi tahe kia inatximy ròtaré s̃y dehemynyde: —Beteheke, inatxi tas̃y inaubiòwa ixityre adee rewinyra. ²³ Tahe iwedu rarybere: —Awityhymyhe taaõmys̃d̃ỹỹta! Kai heka deòdu wihik̃ỹ tate. Kai ibutedile sõwemy tewinyte tahe sõwemy ixityre adee ariwahinykre riwahinykemy. Kai heka wawana beysanihik̃ỹkre. ²⁴ Kia sohojimy tamy riwahinyre tahe rarybemyhe retximyhy: —Kai heka hãbu nieru tarasaery heka tate. Aõ taaõmys̃d̃ỹỹteri-ribi aõkõ heka nieru tetamahãte. ²⁵ Tai heka jiar̃y raberumahã alau watxireri. Tai heka rewore iny lau. Tahe tii sohojidile ratxireri. ²⁶ Iwedu rarybere: —Kai heka eoruxerere, awi aõkõ heka tate! Inyõ tehuòtekõta heka idi urihimyò ityre ròtakelemy wahe. Kai tiwaeryte wahe. ²⁷ Aõherekibo banco-ki aõkõ tetidite. Kia huòteòwy wanieru-ribi ritarerimy ih̃yre. ²⁸ Bitabohe kia nieru-di atxitere, tahe kia debòwiò ritaraò wahe biwahinykre. ²⁹ Kia òbitimy raaõmys̃d̃ỹỹra heka sõwetyhymy ròtakre. Kia òbitimy raaõmys̃d̃ỹỹõmyh̃yre kia heka ròõnod̃ỹỹkre. ³⁰ Kia deòdu bimybennyke. Tii dorihe ibinatyhyre inihe bede luruhuk̃ỹ-ò idi behubenykre. Tai heka tii aõhõk̃ỹmy rot̃ỹỹnykre rahinykre.

³¹ Jesuisi tahe ikonana rarybere: —Iu jiar̃y, Deuxu Riòre Hãbutyhyhyk̃ỹ, arehemynykreu heka Waiòlònary-ò aronykre. Arehemynykre wãyju mahãdu-wana. ³² Ibutumy heka bede iny mahãdu wako-ki ributunykre. Iwese budoeni itxeredu heka tabudoeni, buddè-wana wiribi rihitxinymyh̃yre wese heka bede iny mahãdu wiribi arihitxinykre. ³³ Wabudoeni heka warurunawe-ribi aris̃ỹnykre. Buddè tahe wahywe-ribi arihitxinykre. ³⁴ Idi tahe waruruna ludu-ò ararybere: —Manake hewa, beysabennyke. Waha Iòlòna-ò rokonykre. My-

heka tamy ararybekre. Juhuu bedeu ihetxiu heka ywimy adireny kia r̄ymyh̄re. ³⁵ Rama tahe riwasanyreu r̄ys̄na wadee tewahinytenyete. Iu bemy rarureu, wadee tewahinytenyete. Jiar̄y heka tori rare as̄-ò tiwadytenyete. ³⁶ Jiar̄y heka watykyhoho aōkōu, kaibohole wadee tewahinytenyete. Binamy r̄imy rarewāhā, waroramy tadōitenyete rōtenawo-ò. ³⁷ Tai tahe òbiti mahādu rarybekre: —Wanyr̄y, tiu taheka ramamy heka wadeereny teate —Adee rewahinyrenyete? Tiubo heka bemy tarumy tatemahā adee rewahinyrenyete? ³⁸ Tiubo heka kai torimy tatemahā idi wahetoreny-ò aradyrenyete. Tiubo atykyōmy tatemahā-di, tyky adee rewahinyrenyete. ³⁹ Tiubo rōtena-ki t̄imy tatemahā-ò ada webinadumy tatemahā-ò, aroramy rōirenyete. Wanohōti atxi reaōhyymyh̄re. ⁴⁰ Tai Jesuisi rarybere: —Jiar̄y, Iòlò, tamy ararybekre: —Iu kaiboho waityhyd̄ȳdu seriòre mahādureny-ò waòraru-ki tewinymy toitemahāu, wadeele tuu tewinytenyete. ⁴¹ Idi tahe kia wahywenawe-ribi ludu tamy ararybekre: —Boibenyke karibi kaiboho heka abinarenyete heòty bede-ò ihyymy boibenykre ixi-di ariteònykre. Diabo tatytybybinas̄y-ò idi boibenykre. Deuxu is̄y tamy riwinyete. ⁴² Tiu rama riwasareu r̄ys̄na kaiboho wadee tewahinytenyōhyyete. Iu bemy rarureu heka ijō wadee tewahinytenyōhyyete. ⁴³ Torimy rarewahāu, tiu tiwatobinytenyōhyyete. Tykyō wadee tewahinytenyōhyyete. Binamy r̄imy rarewāhā rōtenawo-ki wororana webinadumy tahe tōiōhyyete. ⁴⁴ Tai tahe kiamy rarybekre: —Wanyr̄y, tiubohe tuu rewinyrenyēkōre. Wanohōti heka reaōhyymyh̄re aramamy rubuna-txi, abemy rubuna-txi, torimy tatemahāu, atykyōmy tatemahāu, rōtenawo-ki webinadumy tatemahāu wahe. ⁴⁵ Tahe jiar̄y Iòlò tamy ararybekre: —Kaiboho heka waityhyd̄ȳdu seriòreō tewiòhenanyōmahātenyete tai heka tiwawiòhenanytenyōte. ⁴⁶ Tahe Jesuisi ikonanamy rarybere: —Tai tahe tii tiuhyymy rakre heòty bede-ò, aōhōk̄ymyd̄ȳnana-ò. Òbiti mahādu heka umytedeōna-ò rakre.

26

¹ Kia taijyy rahudi tahe Jesuisi taerymahādu-ò rarybere:
² —Ixityre inatxi txu-di tas̄y aōma Pascoa worana bedehesimy r̄yikre. Kaiboho tahe kia teerytenyete. Iu iny riwatyhenykre Deuxu Riòre Hābu wahe. Irahu-di tahe itxeònihik̄y-ò riwatamad̄ȳnykre. ³ Tahe aōwesele heka xiwena wahid̄ȳdu wedu mahādu ributunyete heka judeu wedu mahādu-wana wahe. Kaifa heto wii rotyete. Xiwena wahid̄ȳdu mahādu wedu wahe. ⁴ Wiwana heka raryberenyete: —Timybohe Jesuisi aōhebo rikis̄nyrenyete aōma teburemy ijiranakōnahak̄yle. Timybo rikisiraōnyrenyete,

rikimyrenykre, rikirubunyrenykre. Urile iny tuu rierykõre. ⁵ Pascoa worana bedehesi rỹireu tahe aõkõlemy idi rỹire. Kia worana bedehesiko-ki iny raaõbinanykeki dori ibutuhukỹlemy heka raaõbinanyke.

⁶ Jesuisi heka rare Betỹnia hãwã-ò hãbu tykybinaõ-wana heka isỹ-ò rare, Simaõ heto-ò wahe. ⁷ Iu iheto-ki rirox-imyhỹreu tahe hãwyyõ tamy rare aderõna lỹnyrehekỹõ-di manaurahyna-ki. Tai tahe Jesuisi tyre ritxiwire, irati-tyre. ⁸ Ierydỹỹna mahãdu heka urihimyõ heka rebure riõre iõraru-ki. ⁹ Iõwy nihikỹtyhyre dorihe. Tai heka tanieru uriterehekỹle rahuraki heka tai rawobinamy. Idi rohonykewile heka rare aõma iõwy tahe iny aõkõ mahãdu-ò riwahinykewihikỹle tii rõhõtinyre. ¹⁰ Tahe Jesuisi rierytyhymy aõmybo tuu raryberenyrerimy: —Aõherekibo kaiboho ibinamy tarybetenyteri hãwyy-ò. Aõwidỹỹnana wihikỹ wadee riwinyreri. ¹¹ Aõma kaiboho heka urimynodu mahãdu-wana ihyymy boibekre. Ibutulemy awanareny jiarỹ watxiwãhãde. ¹² Tii heka wahãloodỹỹna riwaywinyra aderõna watyre ritxiwireu. Kia tahe wadee riwinyre. ¹³ Boholake, iny itxi tõhõti reahyy rỹirakre iõraru-ki. Rybewihikỹ Tỹmyramy ritỹnydỹỹmyhỹkre heka rierymyhỹkre bede bedemy wahe.

¹⁴ Iribi tahe Judasi Isariò, tii waò inatxi reuròõ rare, tii heka ròhõnyre ierydỹỹna mahãduy-ribi. Tahe rare xiwena wahidỹỹdu mahãdu wedu-ò. Tahe tamy rarybere: ¹⁵ —Adeereny Jesuisi ariwahikre wana heka tiwesebo biwaõwynybenykre? Kiamy tahe 30 prata womati nieru myhe tamy riwahinyre. ¹⁶ Judasi kia ribile rarunymy raremyhỹ dohodỹỹnaõmy Jesuisi tamy riwahinykremy. ¹⁷ Pascoa worana bedehesi rỹireule rexidelenyre, Paõ iuridỹỹkõ, kia txu rỹimyhỹ wahe. Jesuisi erydỹỹna mahãdu tai ritỹỹraxinyre: —Titxiwexe rikirỹsỹkre Pascoa worana bedehesi jiarỹboho dori ariwinyrenykemy? ¹⁸ Tahe Jesuisi rirawyõnyre: —Hãbuõ hãwãhãkỹ-ki ratximyhỹre tii riwaeryre. Tahe tamy marybekre: —Wawedu kỹny rarybereri aõma aheto-ki heka Pascoa worana bedehesina rirỹsỹkremy taerydỹỹna mahãdu-wana. Ibededỹỹna dori iõhõre riki. ¹⁹ Tai tahe taerydỹỹna mahãdu kia riwinyre idi kowa worana bedehesi rỹsỹna riwinyre.

²⁰ Bedesõmy tahe tai riroximy rorukumyhỹreny, taerydỹỹna waò inatxi reurò mahãdu-wana wahe. ²¹ Aõma inyõ heka riwatyhenykremy ratximyhỹre. Jesuisi heka tuu rarybere: ²² —Mowexe tii rarekre. Tiiboho rabadewomy roire, tai tahe widee rarybere: —Jiarỹ kõaõboka. ²³ Tahe Jesuisi rarybere: —Kia wawana pratoro tebò rearerile taheka tiikre. ²⁴ Iwese Deuxu Tyyriti-ki Rybe roire wese heka arurukremy jiarỹ

Deuxu Riõre Hãbutyhyhykỹ watxiwãhãre. Kia hãbu riwaty-henykre tahe tamy heka ibinatyhykre. Ratybienykõre wana inihe awityhyre. ²⁵ Tai tahe Judasi ityhedỹỹdu rarybere: — Erydỹỹdu, jiarỹ aõbohe rare? Tahe Jesuisi tamy rarybere: — Kaityhy wahe tate. Kaile tarybeta.

²⁶ Tai tahe Jesuisi orotxu sohojiõ rimyre ibutumy riroxireu, tahe riyreyrenymyhỹre tahe inysohoji sohoji-ò riwahinyre. Tai tahe tamy Jesuisi rarybere: —Kia biybenyke heka. Waumy wese heka kia ratxireri. ²⁷⁻²⁸ Idi vỹ monahynaõ rimymy rexitõenyre Deuxu-ò. Idi tahe tamy riwahinyre iribi sohoji sohoji riõrenykemy. —Biõrenyke kaa dori wahãlubu wesemy ratxireri. Tai sõwemy iny biu-ò rahenykre Deuxu dee. Ibutumy òraruna ixãwididỹỹmy heka tuu rõhõnyra. Wahãlubu heka Deuxu, iny-wana wii riwoãxinykre rare. ²⁹ Tahe boholake warybe-ò. Awanareny heka ixityre vỹ monamy ariõõtyhy. Kia Waha Iòlõna-ò dehemynynahykyle tahe awanareny ixyby tuu ariõkre.

³⁰ Idi tahe wiuõ rawiunyrenyre idi tahe Oliveira hãwãlò-ò rõirenyre.

³¹ Jesuisi tamyreny rarybere: —Wijiru heka ibutumy kai-boho biwaribenykre. Tyyriti-ki heka roire kiawesemy: Budoeni-di itxeredu rirubunykre. Ibutumy budoeni raubỹtỹkre bede bedemy.

³² —Waixixana kỹnyikreu tahe Kalileia bede-ki awanareny aratxikre. ³³ Pedro tahe rarybere: —Ibutumy ararirenykre wana tahe jiarỹ aõkõre. Ararirenyõtyhy. ³⁴ Tai Jesuisi heka Pedro-ò rarybere: —Kai heka hãnie dele robukõdile biwatxiõ-ribi bexihukre, inataõmy wahe. Tuu wijiru rarekre. ³⁵ Pedro dirawyõnyde: —Aõkõre wa, arurukre heka tahe urile aratxiõnyõtyhy. Tule ibutumy ijõ ierydỹỹna tule Pedro wesele rarybere.

³⁶ Tahe Jesuisi ridyrenyre bederaty oworuõ-ò, aõma Kesemani ninadu-ò ridyre: —Kakile bonykre arakre dori ix-itõedỹỹmy kowa-ò. ³⁷ Tahe Jesuisi heka Pedro ridyre ixi-wana. Tule Zebedeu riõre wiwana ridyrenyre. Tahe Jesuisi rabe-deõtidiỹỹre aõhõkỹmy rotỹỹnyre bedeõtidiỹỹ òrarukile. ³⁸ Tii tahe tamy rarybere: —Kaki wawanale atxibekre. Watyytyby heka tỹxihikỹlemy bedeõtidiỹỹ-di ratxireri. Waki bexiebekre. ³⁹ Urile tahe tako-ò rariareu tahe resere bede-ò. Jesuisi tahe tyby-ò rarybere: —Waha, rubu mona waribi bitake adeewikeki. Aõkõkeki tahe ariõkre, arurukre adeewilemy aõhebo arotỹỹnykre. ⁴⁰ Idi tahe dõðsede kia ierydỹỹna inataõ tai rõrõmyhỹõ heka ixyby dõðsemy nade. Jesuisi rarybere: —Pedro! Kai heka timy sohoji horamy adi bede rỹiõtyhy wawana. ⁴¹ Bexixaruhyy atxibeke bexitõenymy. Aõkõkeki

tahe òraruna kanamykre. Kai heka òbitimy matxikemy tahõtinyamahâte. Aumy tahe ibinare heka arurukõre wahe. ⁴² Ixityre rare rexitòenykemy. Tahe Jesuisi rarybere: — Waha, adeewinale ariwinykre. Aõhõkỹmydỹñana monamy heka ariõkre. Kia mona waribi bitaõkeki ihãrele heka arurukre. ⁴³ Tai dòðsede tai rõrõmyhỹrenyòle heka nade. Tii-boho ixixamy rỹiõhyyre. ⁴⁴ Tahe ròðsere ixbyble ikonanamy. Iweselemy rexitòenyre tyby-ò. ⁴⁵⁻⁴⁶ Idi tahe dòðsede taerydỹñana mahãdu-ò rarybere: —Bexielehynybeny. Watyhedỹñdu naderi. Rexihumyhe rare. Hãbubina mahãdu rehemynyre. Jiarỹ Deuxu Riðre Hãbutyhyhykỹ, wahe. Bexixabeny, rakakre watyhedỹñdu dori rehemynyteri.

⁴⁷ Tahe Judasi dehemynyde waðinatxi reuròð wahe. Jesuisi rarybereu, tii nade sòwemy hãbu-di mayrehe-di, òhòte-di tõnori-di widotyde. Judeu mahãdu wedu tahe iteòdỹñdure xiwena wahidỹñdu wedu wana wahe. ⁴⁸ Juhuu Judasi tamyreny bedede riywinyre. Kamy rexirybenymy: —Iòsỹny-ò aruwokrele heka tiikre. Tiile bimynybenykre. ⁴⁹ Tahe Judasi rarybere: —Rareri, Wawedu. Iòsỹny-ò ruwore. ⁵⁰ Tahe Jesuisi rarybere Judasi-ò: —Iò, aõwaxiny aõbo biwinykre iwidỹñmy tateri. Tahe Jesuisi imahãdu rimyre. Ritaataare. ⁵¹ Tahe Jesuisi mahãduõ mayrehe-di rimymy resere. Tai hãbuõ-ò reare. Tai tahe tõhõtyle rikòròmy idi reare, xiwena wahidỹñdu wedu deòduõ wahe. ⁵² Tahe Jesuisi tamy rarybere. Aõkõre amayrehe birutyke irasirahanawomy. Kia dori inyõ maydese rimymy resekre heka tule rurukre maydeselemy. ⁵³ Karibi ixitarasamy arurukeki dori wahaòle ararybekre. Tai tahe waha sòwemy ýju kiditeònyke, 12 aõbinadu ijoi mahãdu wahe. Kia teeryõtenyete. ⁵⁴ Ihãrele tahe ibutumy tuu bededỹñana relekre iwese ritidỹñna-ki roimyhỹre wese. ⁵⁵ Tahe Jesuisi rỹñraxire tamyreny: —Aõbo jiarỹ raremy wadi tahõtinytenyteri. Wasidu aõbo. Kai dori waðrysomy tehemynte maydese-di, tõnori-di. Aõherekibo wahe. Jiarỹ heka arabedeerynyrenyre txuõ txuõlemy wahe Deuxu dohodỹñna heto-ki. Aõherekibo taile tiwamytenykòte kowa watxiwãhãure. ⁵⁶ Kia ibutumy Deuxu Ritidỹñna-ki roimyhỹre. Tai tahe tuu bededỹñana relekre iwese Deuxu rybedu mahãdu rarybere. Ibutumy aõna aõnamy rotỹñnymy raremyhỹ. Tai tahe taryberahu-di. Ibutumy iery mahãdu iribi tahe robỹtỹre.

⁵⁷ Tiiboho heka Jesuisi ridyrenyre Kaifa heto-ò, xiwena wahidỹñdu wedu wahe. Tai ibutumy judeu mahãdu wedu ributumy bedede ywina erydu mahãdu tule wahe. ⁵⁸ Pedro irehetyty-ribi riheludunyre. Iheto ube-ki tahe ronyre yrubu dỹñdu-wana. Tahe rehere aõhebo rotỹñnykremy. ⁵⁹ Xiwena dinodu mahãdu tahe ributumy Jesuisimy raruikremy heka

ruijemy. Aõma rirubunykre òbirele heka tuu rarybemyhÿ. ⁶⁰ Tahe inyõ-ki heka rahaõhyyre turybedu wahe. Iny sõwemy tahe relyyre. Ihãrele rirubunyõhyyre. Iroona-ribi tahe inatxi hãbu dehemynde. ⁶¹ Tai tahe kiamyhe tuu relyyre: —Aõma Jesuisi rarybere: —Aõwesele heka Deuxu dohodÿÿna heto ariatymy idi areake. Inataõ txudi tasÿ ixityre aditamadÿÿke, ibutumy adiwinnye. ⁶² Tai tahe xiwena dinodu heka Jesuisi-ò ryyraxire: —Aõbo marybekre kia umy ijyy rohonyreriki? ⁶³ Jesuisi tahe rybeõlemy ronyre roholare. Ixityre tamy rÿÿraxire: —Kai heka inatyhy tyhymy Deuxu Riòremy kai atximahãte. Mesia aõbohe kai tate? Deuxu riwaeryre inatyhymy rarybereri. ⁶⁴ Jesuisi dirawyònyde tamy: —Kaile kia tarybete. Ibutumy iny-ò ararybekre: —Kaiboho ibutumy bobibenynkre

Deuxu Riòre Hãbutyhyhykÿmy, jiarÿle wahe. Tii heka Deuxu rurunawe-ribi heka ronykre. Iribi tahe kanakre biuwetyky-ki. Jiarÿle wahe tiire.

⁶⁵ Tai tahe xiwena dinodu tatyky riykare. Reburere kie: —Aõhere tahaka. Deuxumy heka ibinatyhylemy tarybemahãte. Ijõ iny-ò aroholaõkre, rexihura! ⁶⁶ Ibutumy kaiboho irybe-ò taholatenyteri, inatyhy? Aõbo rikiwinnye tii ibinatyhyre dori, rikirubunynrennye tahe. ⁶⁷ Tahe iòsÿny-ò rarybexinyre. Rihetenyre. ⁶⁸ Tamy ihetedÿÿdu rarybere: —Marybeke Kristu, mobo arahetenyra inihe.

⁶⁹ Pedro tahe ube-ki rononymhÿ. Tahe ijadõma heka deòduõ tamy rehemynnye: —Kai anõbo Jesuisi Kalileia ludu-wana atximahã. Kumymy rabire. ⁷⁰ Iny ibutuko Pedro rarybere: —Aõkõre, aõmybo arybe reeryõhykyreri. ⁷¹ Tai tahe rare ijõ-ò. Ijõ ijadõma deòduõ rarybere kamahãduko: —Inatyhymy heka tiki Jesuisi Nazareludu mahãduno tiki rare. ⁷² Ixityrele Pedro ritxiõnyre: —Reerykõre wahe hãbu. Tiu heka rabiõwãhãre. Inatyhy rare. ⁷³ Idi hãbuõ heka narybede tamy: —Inatyhy rare. Kakÿny irybe weselemy tarybeteri, Kalileia rybe wahe. ⁷⁴ Tahe Pedro rarybere: —Jiarÿ reerykõreri, tuu heka rabiõwãhãre. Deuxu riwaeryre inatyhymy rarybereri. Iule taheka hãnie hãbu robumy reare. ⁷⁵ Tahe Pedro tõhõti itxi reare. Jesuisi rarybere weselemy heka tii riwinyra. Ritxiõnyre. Tai tahe Pedro ròhònymy reare heka rahinyhyyre.

27

¹ Ijõ biurasò ruidile tahe rÿire. Xiwena wahidÿÿdu wedu ributumynnye judeu mahãdu wedu-wana. Timywexe aõhe rikisÿnyrennye. Rikirubunynrennyemy heka idi watxiwãhãre. ² Roma dinodu-ò òsana rikidyrennye. Tahe tiiboho Jesuisi ritaataare idi ridyrennye tamy, Pilato-ò.

³ Judasi heka rieryre. Tai tahe tii rabadewonihikÿre rityhenyrekwahe. Tai tahe raraykynyre tawo-ò raòhòrere. Tahe nieru òkesedÿÿmy idi ròhòtinyre. Tahe nieru diwyde, 30 prata womati nieru tahe riòkesedÿÿnykremy judeu wedu mahãdu-ò, Xiwena wahidÿÿdu mahãdu-ò. ⁴ Tahe Judasi rarybere: —Ixãwirahe, jiarÿ raòrarunyra hãbu òbitityhymy ratximyhÿre retyhenyrekwahe. Tahe judeu mahãdu dinodu rarybere: —Jiarÿboho, kia aò aòkò rare. ⁵ Tahe Judasi nieru-di bedetyrele rihure. Tahe ròhònyre iribi. Tahe rare. Rerotihikÿ-di rexibòtòtaare. Rexirubunyre. ⁶ Tai tahe xiwena wahidÿÿdu wedu riwyre nieru bede-ribi: —Aòwexe kanieru rikiwinyrenykre? Dohodÿÿna hetowo-ò rikirutyrenyke heka aòkòre. Aòma dori rare rubuòwmy iwahidÿÿ heka rare. ⁷ Urile suòle rikiwinyrenykre idi. Tai tamy wabede rikiwinyrenykre. Aòma tori kaki rurukreu tahe rikitoonyrenykre tamyle wahe. Tai tahe tiiboho riwyrenyre aòma butxi widÿÿna subede heka riwinyrenyre. Kia heka inire suni wahe. ⁸ Kia bedero tahe rininire aòma Hãlubu Bederomy heka rininire. Wiji tule ini rare. ⁹⁻¹⁰ Iwese Jeremia tyyriti-ki roire wesele heka tii riwinyre:

Tahe 30 —Womati nieruò-di heka bedero riwyre butxi-widÿÿdu-ribi. Iwese kai riwateònyre wese. Kia iòwy rare judeu mahãdu-ò tamy riwahinyre wahe. Txiòdÿÿna òwy wahe.

¹¹ Jesuisi heka Pilato, bede dinodusÿ-ki ratximyhÿ. Pilato tahe tamy rÿÿraxire: —Kai aòbo judeu mahãdu iòlò atxiteri? Jesuisi dirawyònyde: —Kai tuu tarybeta. ¹² Xiwena wahidÿÿdu wedu heka tamy rarybere: —Jesuisi rirawyònyòhyyre. Judeu mahãdu wedu-ò tule rirawyònyòre. ¹³ Pilato tahe tamy rarybere: —Kai aòbohe rybe-ò taholate. ¹⁴ Tule tamy Jesuisi dirawyònyòhyyde. Byy! Urile Pilato ribedeòtiidÿÿnyre. ¹⁵ Pascoa worana bedehesi bededÿÿnana tikiemy tuure. Ròtenawo-ribi heka sohoji beòra beòrahyyle ixinamy inyò rexideònymyhÿ, inysòwe rybe òraru-ki wahe. ¹⁶ Kia beòra tahe hãbu ibinatytyre ròtenawo-ki rÿire. Baraba inire. Ibutumy iny tuu rieryre. ¹⁷ Aòma Pascoa worana bedehesi rÿireu ibutumy iny ributumy. Tahe Pilato ritÿÿraxinyre: —Tibohe ixinamy ariteònykre Jesuisi Kristu aòbo ada Baraba aòbo? ¹⁸ Tahe iny heka ibutumy urile Jesuisi Kristu luure heka. Tai tahe judeu dohodÿÿdu wedu mahãdu tahe aòkò tamy waritimy rityhenyrenyre. Pilato kia rieryre. ¹⁹ Iu tabede ywina dohodÿÿna-ki Pilato rÿireu, ihãwy tamy tyyriti riwahinyre. Kawese heka rarybere aòma: —Ixinamy Jesuisi bitekònykre. Anobinatytymybo dokuri rarasino txu wadi reakareri. Jikarÿ anohòkÿmy dÿÿkÿnana sòwemy ratÿÿkÿnyre Jesuisi kòraru-ki

wahe. ²⁰ Iny sōwehekỹ-ò heka xiwena wahidỹỹdu mahãdu wedu rarybere: —Kaiboho mararybebenyke: —Baraba ixinamy biteònykre. Tiiboho dirawyònyde: —Jesuisi birubunykre. ²¹ Iribi Pilato rarybere: —Tiwexe ixinamy ariteònykre? Tiiboho dirawyònyde: —Baraba biteònykre. ²² Pilato tahe rỹỹraxire: —Aõhebo tahe arotỹỹnykre Jesuisi-di, Kristu-di? —Itxeò nihikỹ-ki bitamadỹỹnykre. Birubunykre. ²³ Pilato tamy rỹỹraxire: —Aõbinahakỹ aõbo riwinyraki? Tai tahe ibutumy iny rirajuamy rỹimyhỹ: —Birubunyke kia bitamadỹỹnykre. ²⁴ Pilato iny sōwe-di aõ riwinyõhyyre aõbinatyhy òsana ròhònykremy idi rōhõtinyre, tai tahe inyõ rarybere: —Bee kidiwykremy baciaro-ki. Tahe tebò risuhore iny sōwehekỹko-ki. Tamy rarybere: —Jiarỹ kỹny waòraru-ki aõkõ heka rurukre. Kaiboho heka irubudỹỹ erydumyhe boibekre. ²⁵ Tahe ibutumy iny rarybere: —Awire, iny-boho heka irubudỹỹdu erydumy rokoirekre, tule wariòreny òraru-ki wahe ihãlubu rejuxunykre. Soldado ridyre itxeò nihikỹ-ò ritamadỹỹnykremy rirubunykremy. ²⁶ Tai tahe Pilato heka Baraba riteònyre ixinalemy. Iribi tahe Jesuisimy raòhòtere.

²⁷ Pilato soldado mahãdu urile idi juhu risinyre, soldado tyamy ritidire. Pilato heto-ò ridyre. ²⁸ Ityky iribi ritare tahe aõma tykysò-di ritidire heka juhu rihetyntyre. ²⁹ Iòdỹỹmy tahe idi ede lòrilòrihikỹ irati-ò ridekremy. Òwòruõ tebò-ò ritidire. Tai iko-ò resere tatiowotimy. Raryberenyre: —Awire, kai judeu Iòlòtyhy. ³⁰ Ityre rarybexinyre. Òwòru rimyre tahe iratimy tuu raòhòtere. ³¹ Iribi ritarenyrenyre ihõrõ itykyle ixityre rirutyre ityre-ki. Idi tahe ryò ròirenyre.

³² Iu ròhònyreu, hãbuõ Sireni bede luduõ-wana witxi reare. Tamyhe rarybere Jesuisi itxeò riwykemy.

³³ Tahe Kòkòta hãwãlò-ò rehemynyre. Aõma, rubu ratityby wesemy heka rare. Tai tahe Kòkòtamy heka rininimyhỹrenyre.

³⁴ Tii vỹ riurinyre bee ihyra-wana, idi tahe Jesuisi-ò kia riwahinyre.

Iurihi-di teramy reare.

³⁵ Tahe itxeò nihikỹ-ki ritamadỹỹnyre. Irahu-di tahe itty heka ritxuatxuaenyre wimy rarudeòsanyre tibo iwydydukemy.

³⁶ Idi tahe retehemy rorukumyhỹrenyre. ³⁷ Irati tyre-ki tahe ritidỹỹnaõ roire:

—Kia Heka Jesuisi Rare, judeu Iòlò Mahãdu.

³⁸ Tule wasidu brebunahakỹ tii-wana ritamadỹỹnyrenyre itxeò hòkỹ-ki, ijõ iruru-ribi, ijõ ihywe-ribi. ³⁹ Iny ibire-di reamyhỹ idi risinymyhỹ kamy rexirybenymy: ⁴⁰ —Kai in-ihè bexitake, kai Deuxu Riòre tateki. Bodobeheke itxeò

nihikỹ-ribi. ⁴¹ Kai heka arurudiremy iximy tarybemahãte. Dohodỹna biatykemy heka iximy tarybete tahe inataõtxu-di heka biwinykemy tarybeta. Tule xiwena wahidỹdu wedu mahãdu idi risinyre. Tii tahe rarybere: ⁴² –Tii heka iny iwitxira witxira aõbina bina-ribi ritamyhỹre ihãre tahe taaõbina bina-ribi rexitaõtyhy. Tii heka aõ judeu mahãdu iõlõ aõkõ rare. Myheka tuu rarybemyhỹ. Kia itxeõhõkỹ-ribi kedexiberesedỹnykekile tahe rikityhynyrenykre inatyhymy. ⁴³ Tii heka iximy rarybemyhỹre Deuxu Riõre raremy, Deuxu rityhynymyhỹremy. Reketeherenykre inihe aõbo Deuxu riwìhenanykremy wahe. ⁴⁴ Wasidu mahãdu kia itxeõ nihikỹ rỹire iwesele heka tamy rarybere.

⁴⁵ Txutyeyu tahe bede luruhukỹ bede reare, txioro tirehehekỹule bede kamy reare. ⁴⁶ Kiaule tahe bede ratỹnyre Jesuisi iu rryre:

–Eli Eli Lema Sabatani.
Kiamyhe rarybere:

–WaDeuxu, WaDeuxu, aõherekibo waribi õhõti rosare?

⁴⁷ Tai tahe iny sõwe mahãdu irybe-ò doholade. Ijõ kiamy narybede: –Eliasi-ò hõwa rryreri. ⁴⁸ Kia ele elemy riwinyre noseõ. Idi tahe vñõ riryry tamy idi riteõnyre. Teõrehemy riwinyre bemy rimonykremy. ⁴⁹ Ijõhe raryberenyre: –Txiokre inihe inatyhymy aõbo reketeherenykre inatyhymy aõbo Eliasi iwiõhenadỹmy kanakremy aõbo inihe. ⁵⁰ Jesuisi ixityre rirajuare. Rurure. ⁵¹ Kia dohodỹna heto-ki heka ixiwõtenaõ rỹimyhỹre ierykõna. Tahe urile idi ixiwanale ruamy reare iratyre-ribi bede-ò. Suuhe ramytatare. Mana rabõhõbõhõnyre. ⁵² Wabede hãlooõ heka riraynyre. Deuxu hõrõ mahãdu sõwemy rubu-ribi riixixanyre. ⁵³ Wabede-ribi rõhõnyrenyre. Iu Jesuisi rubu-ribi riixixareu tahe Jerusalẽ-ò rõirenyre. Tai tahe sõwemyhe iny tuu robire. ⁵⁴ Tai heka soldado dinoduõ ratximyhỹ idi rethemy. Tule soldado mahãduõ tii-wana ratximyhỹre. Ibutumy tuu robirenyre. Tai tahe tabrebu-ribi narybedenyde: –Tii inatyhymy Deuxu Riõre heka rare. ⁵⁵ Hãwyyõ tule rethemy ratximyhỹre irehe-ribi idi. Aõma hãwyy Jesuisi riwiõhenanymy raremyhỹ heka idi rethemyhỹre. Tiiboho Kalileia bede-ribi doide. ⁵⁶ Marie Madalena, Marie Txiause Jyjese, Zebedeu riõrese tule tai ratximyhỹ.

⁵⁷ Bedesõmy Jyje rehemynyre. Tii ityhy heka rare Arimatea hãwã luduõ ratximyhỹre. Tii Jesuisi tyhydỹduõ ratximyhỹ. ⁵⁸ Tai Jesuisi umy rexitõenyre Pilato-ribi. Tai tahe Pilato rarybere: –Tamy biwahinykre. ⁵⁹⁻⁶⁰ Tahe Jyje linho tyky rirahanany. Tai tahe aõma wabede tỹmyrahakỹ riamy roireriõ heka rituunykremy idi rara. Idi mana nihikỹ ritidire

txiò. Idi ròirenyre. ⁶¹ Marie Madalena ijõ Marie-wana taile retehemy ronyre wabede-ki.

⁶² Ijõ txu tahe fariseu mahãdu wedu tule xiwena wahidÿÿdu wedu heka Pilato-ò sexta feira rahudi tahe, judeu mahãdu elehyna txu wahe ituere. ⁶³ —Jesuisi irumy raremyhÿu tii rarybere:

—Rubu-ribi heka ariixixanykre inataõ txu-di.

⁶⁴ Ruimy rare tahe ihãrele tahe biyrubunyke iwabede. Aõkõkre-wana tahe ierydÿÿna mahãdu heka iumy riwykre. Tai tahe rarybere: —Tii rexiixixanyre. Tai tahe ibutu rityhynykre iruina. Kia ibinatyhymy rarekre. ⁶⁵ Tai tahe Pilato riteònyre soldado mahãduõ txiò-ki. Tamy rarybere: —Awimy biyrubunyke! ⁶⁶ Kia bede erynaõ heka tamy ritidire. Txiò-ribi resekreule heka rieryrenykre. Tahe soldado mahãdu riyrubunymhÿre.

28

¹ Ijõ txu rudile tahe Marie Madalena, Marieõ-wana rare ihãloona-ò itxeremy, domingo, nobiutxu wahe. ² Aõwesele tahe iu suu ramytatare. Wanyrÿ ÿju heka dobehede biu-ribi iu. Tahe hãloo ijò-ribi mana ritamy ityre ronyre. ³ Iòsÿny heka urile ritoosònyhÿkÿre. Ityky tasÿ iurahakÿre. ⁴ Idi itxeredu mahãdu heka aõma ruberunihikÿrenyrene. Urile rõhõtiberemy reserenyrene. ⁵ ÿju rarybere hãwyy-ò: —Uritere berebuõmyrenyke. Kai aõbo Jesuisi teijeteri, inatyhy? Aõma itxeò ritamadÿÿnyrenyrene wahe. Reeryre kia. ⁶ Aõkõre kaki aõkõ heka ratxireri. Tii dori rubu-ribi rexiixixanyrene iwese tii iximy rarybere wese wahe. Beteheke inihe iherina tyby-ò tai juhu roimyhÿò. ⁷ Make karibi ele elemy ierydÿÿnako belyykre tii rubu-ribi rexiixixanyraki. Tii heka rara Kalileia-ò tamy wirotyreriò. Matahe, relyyra dorihe adeereny. ⁸ Tai tahe rakòrunyrenyrene, hãwyyboho. Ruberumy ròirenyrene tasÿ reysamy ròirenyrene. Ierydÿÿna mahãdu-ò heka riijemyhÿre aõma ÿju rybemy ikoreny relyykemy. ⁹ Iu rakòrunyrenyraule tahe wii reòbynyra. Jesuisiwanale heka itxi rekoare. Idi tamy rehemynyrene iòhòmy. Iwa rimyrenyrene tahe riwowydynyrene. Jesuisi tamy rarybere: —Toiteri aõbo! ¹⁰ Uritere breburenyõmyke. Boibeny tahe ijyymy waityhydÿÿdu mahãdu seriòre-ò heka Kalileia-ò aròirenykemy. Tai tiiboho-wana wii areòbynyrenykemy.

¹¹ Tai tahe tiiboho ròirenyrene. Kiaule tahe wabede soldado itxeredu rehemynyrene xiwena wahidÿÿdu wedu-ò wahe. Tahe ibutumy relyyre iko. ¹² Tai tahe nieruõ riwahinyrene ruiõmy relyykemy. ¹³ Tamyreny raryberenyrene: —Ierydÿÿna mahãdu

heka ridyra watÿireny reòbylemy. ¹⁴ Tai tahe bedede dinodu rierykreu heka aã adee beleõtyhy aõbinahakÿõ. ¹⁵ Tai tahe nieru sõwemy riwyrenymy tahe tuu ròirenyre ruimy. Wiji dori tuu ijyy rÿira. Ibutumy judeu mahãdu kia rybe-ò rityhynymyhyre.

¹⁶ Idi tahe ierydÿÿna mahãdu ròirenyre Kalileia-ò. Tiobo Jesuisi riteõnyrenyremy juhutyhy. ¹⁷ Jesuisimy robirenyreure tahe tiiboho bedede-ò reserenyure tahe riwowydynyrenyure. Ijõ mahãduõ riseõnylemy idi rõhõtinyinmyhyre. ¹⁸ Tai tahe Jesuisi iòhòtyhymy tamyreny relere kiamy tamy rarybere: — Waruruna heka ibutu ratyure ratximyhyre kabede-ki tule, biu-ki tule. ¹⁹ Tai kaiboho waha deòdumy boibenyke ibutumy iny bedede bedede mahãdu-ò, bedede bedede konanana-hakÿ mahãdu-ò ihyy behemynybenyke. Waityhydÿÿdumy heka bitxienybenyke. Wahanimy, tule Deuxu Riorenimy, tule Deuxu Tyytybytyhynimy, tahe bõratisebedÿÿnybenyke wadeòdurenymy, Waha, Ityytybytyhy, Iriòre kaboho deròwymy wahe. ²⁰ Ibutumy aõbo wabede ywina adee rewahinyredi bibedeerykre. Uritere nohõti losarenymyõmy awanarenymyhy dori ararekre bededÿÿnanahy rekehemynykre.

Marku Deuxu Rybe Wihikỹ Tỹmyra, Marku Tyyritidỹỹdu

¹ Kaki heka Rybe Wihikỹ juhu kaki roire. Ka Rybe Wihikỹ Jesuisi Kristumy heka rarybereri. [Tii heka Deuxu Riòre rare.]

² Myheka Isaia tyyriti-ki kia rybe rỹire:

Deuxu rarybere: –Boholake, waòwàdàdu ariteònykre akomy. Tii ary riwinykre.

³ Tii rryrymyhỹ bederahy-ki: –Kai biwinykre rywihikỹ Wanyrỹ dee. Òbiti tamy biwinyke.

⁴ Joaõ Sebedỹỹdu bederahy-txi taile ihỹmyhỹ rybe tyyriti ritỹnynymyhỹ. Tii sebenaõmy riòbitinymyhỹ. Kia riwinykemy ixi-txi tòhòti reakemy taòraru-txi kia Deuxu ritakemy.

⁵ Ibutumy Judeia bedede ludu mahãdu Jerusalẽ hãwã mahãdu-wana rare bederahy-ò. Taòrarumy relyymy rahudi tahe, Joaõ risebenyrene bero Jordaõ-ò. ⁶ Joaõ rexytyynyre kamelo rade tyy-di, tule iròdutyy wereysana iwetya-ki roimyhỹre. Irỹsỹna raremyhỹ, seihikỹle bidi-wana. ⁷ Joaõ rybe tyyriti ritỹnynydyỹmy rarybemyhỹ: –Jiarỹ aõ aõkõ rare, waruru-di aõkõ. Inyõ wahewomy kanakre tahe iruru waruru ratyredỹỹnadu rare. Waratyre awityhyke. Jiarỹ riwaixỹrunumy watxireri iwataana ese-ki. ⁸ Jiarỹ bedi arãsebenyrene. Tii heka Deuxu Tyytybytyhy-di arãsebenykre.

⁹ Kiatxu Jesuisi nade Nazare Kalileia bedede ludu-ribi. Joaõ tii risebenyrene Jordaõ bero-ò. ¹⁰ Tii bera-ribi dotuodeu biuwetyky rarayre. Deuxu Tyytybytyhy heka bòtòe wese tamy dobehede. ¹¹ Deuxu rybe-ò roholare biu-ribi: –Kai heka Wariòre waluu tate. Adi wadeysawihikỹreri.

¹² Aõwesele Deuxu Tyytybytyhy heka Jesuisi riteònyrene bederahy-ò. ¹³ Tii bederahy-ki 40 txumy bedede idi rỹire. Satanasi aõhòkỹmy risỹnyny Jesuisi raremyhỹ. Iròdu deborehekỹ tai rỹiramyhỹ. Ýjurenny iyrubudỹỹmy rehemynyrene.

¹⁴ Joaõ rare ròtenawo-ò, idita Jesuisi Rybe Wihikỹ ritỹnynykremy dehemynynde Kalileia-ò. Jesuisi heka Rybe Wihikỹ ritỹnynydyỹre: –Deuxu Iòlòna bedede-ò wahe. ¹⁵ Jesuisi rarybera: –Bedeỹỹnanahe bedede reara. Deuxu Iòlòna bedede iòhòra. Kaiboho ixi-txi òhòtirenny reake aòrarurenny-txi bityhynybenyke Deuxu Rybe Wihikỹ.

¹⁶ Jesuisi aho ijàti-ki rariamy ihỹmyhỹ. Tii robira tuurenny taseriòre-wana ihỹmyhỹ-ò, Simaõ Pedro, Andre-wana. Tii-boho rehumy ihỹmyhỹrenny rià-di. Tiiboho heka waxidu roire.

¹⁷ Jesuisi rarybera tamyreny: —Kaiboho bodoibedenyke wahemy. Tai tahe araerynanyrenykre iny rimykemy utura temyta wese. ¹⁸ Tahe aõwesele rià ririrenyre. Roire Jesuisi-wana. ¹⁹ Iko roire Joaõ, Txiau, taseriòre-wana. Tiiboho heka Zebedeu riòre roire. Tiiboho hãworo-ki ratximyhÿreny rià riywinymyhÿreny. ²⁰ Jesuisi tamyreny rarybera: —Wahemy bòðoike. Tahe aõwesele tybyreny ririrenyre teòdu-wana. Tahe tiiboho roire Jesuisi-wana ierydÿÿnamy roirekemy.

²¹ Tiiboho rirònyrenyre Kafanaõ hãwã-ò. Judeu mahãdu aõmysÿdÿÿna txu aõkõ. Jesuisi ralore judeu mahãdu dohodÿÿna heto-ò erydÿÿmy. ²² Kowa mahãdu urile bederiòtiinyre irybe-ki. Tii heka irurutyhy-di rierynanyre, ierydÿÿdu mahãdu wese aõkõ rohodÿÿnanymyhÿre. ²³ Kia bedeu heka hãbu tyytybybina-di ratximyhÿre dohodÿÿna heto-ki. Tyytybybina hãbuwo-ribi rarybere: ²⁴ —Aõhebo wadi botÿÿnykre Jesuisi Nazare ludu. Biwahubenykre aõbo? Jiarÿ araeryre mobo kai tatehe, kai heka hãbuõtyhy inatyhy Deuxu-ribi kai tate. ²⁵ Jesuisi tarurumy rarybere: —Kai rybeõmyke. Iribi bòhònyke tyytybybina. ²⁶ Tyytybybina hãbu riatyre riworÿsÿworÿsÿnylemy. Tyytybybina ryryre rybe iteremy, idi ròhònyre. ²⁷ Ibutumy iny ribedeòtiinyre. Ritÿÿraxinyre ijõ: —Aõwexe ratxireri, aõerydÿÿnatÿmyrabo ratxireri. Tii riteònyre tyytybybina. Tyytybybina Jesuisi rityhnyre. ²⁸ Ityhynina Kalileia bede bedemy reare.

²⁹ Tahe dohodÿÿna heto-ribi ròhònyrenyre. Jesuisi, Txiau, Joaõ-wana roirenyre Simaõ, Andreboho heto-ò. ³⁰ Simaõ riòre lahi roimyhÿ rubunamy. Tahe aõwesele tuu relyyre Jesusiko. ³¹ Jesuisi rimyre tebò-ki, tahe, aõwesele irubuna ixãwira. Idi tahe hãwyy tamyreny bede redere.

³² Txu ralòmy rahudi, ibutumy tamy didydenyde inybina bina. Tule iny tyytybybina tamy didydenyde. ³³ Ibutumy iny hãwã ludu iheto ijõ wirotyre. ³⁴ Tii ibutumy binana òta òta riywinyre. Sõwemy tyytybybina riòlòdÿÿnyre. Tyytybybina Jesuisi rierymyhÿre. Tai tahe Jesuisi riijõnyre tyytybybina rarybekeò.

³⁵ Rudile Jesuisi rare bederahy-txi rexitòenykremy. ³⁶ Simaõ, ijõ mahãdu-wana Jesuisi ijesetyhymy roire. ³⁷ Tiiboho Jesuisi raharennyre. Tamy rarybere: —Ibutumy iny arãijereri. ³⁸ Jesuisi tamyreny rarybere: —Rokoikehe rekexinoranyrenyke hãwã wixira-ò. Jiarÿ tamyreny rybe tyyriti aritÿÿnykremy. Iurenana tahe jiarÿ anade. ³⁹ Jesuisi rare ibutumy Kalileia bede-ò. Tyytybybina iny-ribi riteònyre. Tule dohodÿÿna heto-ki tii rybe tyyriti ritÿÿnyre.

⁴⁰ Hãbu tyybina mahãduõ Jesuisi-ò nade. Tii tatiowotimy resere Jesusiko-ò. Tahe Jesuisi-ò hãbu rarybere: –Adee awikeki tahe, biwateytenyke. ⁴¹ Jesuisi juhu urile riwotønyre. Tii hãbu ritorunyre. Tahe rarybere: –Wadee awire, atyy awimy relekre. ⁴² Tahe aõwesele ityybina reytera. ⁴³ Jesuisi hãbu riteønyre. Rarybere: –Kai tahe inyõdee rybeõmykre. ⁴⁴ Kai bexiteòsinykre Deuxu aõmysÿdÿÿdu-ò. Iwese Moisesi ròerynadÿÿnyre wese, kai bexiteòsinykre. Kia heka inydee deòsinamy riteòsinyre. Kia iny rieryke timybo teytemy atximahãtemy. ⁴⁵ Tahe hãbu rare ibutumy inyko relyyra. Kia heka Jesuisi tahe uritere hãwãhãkÿõ-ò ralòøhyre. Tahe bederahykile rarire. Ibutumy iny tamy rare ibutumy bede bede-ribi.

2

¹ Tiutxuõmybo Jesuisi dòòsede Kafanaõ-ò. Idi tahe rybe reare rehemynymy ratximyhÿ heto-ki. ² Tahe iny, aõriòre aõkõ, tamy wirotyre heto ijò-ò. Tahe Jesuisi relyymyhÿ Deuxu rybemy. ³ Hãbu inaubiòwa heka hãubina-di tamy detyydenyde. Kia hãbu rawòronyryre taumy-ki. ⁴ Jesuisi-ò rehemynyõhykylere iny sòwerekì. Tahe raòwònyrenyryre idi heto ratyytyre-ò. Hetotyryriraynyrenyryre tahe reru-di diberesedÿÿnydenyde byretyre-ki Jesusiko-ò. ⁵ Jesuisi rieryre hãbu rityhynyrenyryre, tai rarybere hãubina-ò: –Waexi aòraru-ribi araxitarasadÿÿnyre. ⁶ Bede ywina erydÿÿ mahãdu rorukurenyryryre, ixideele rarybemy rÿimyhÿre: ⁷ –Aõherekibo hãbu kiawese rarybereri. Tii iòwe òwelemy rarybereri. Deuxu dee aõbina binalemy rarybereri. Mobo tahe òraru-ribi iny ritake. Deuxule òraru-ribi iny ritake. ⁸ Jesusile roholaòlere ihãrele rieryre aõmybo raryberenyryre. Tai tahe Jesuisi tamyreny rarybere: –Aõherekibo kiawese tarybetenyryryre. ⁹ Tibohe isiraõtyhyre, tuu ararybeke: –Aòraru-ribi anaixitarasadÿÿnyre ada myike, abyre bimyke, mariake. ¹⁰ Kaiboho bierykemy Deuxu Riòre Hãbutyhyhykÿ irurudire iny òraru-ribi iny ritakemy. ¹¹ Tahe hãubina-ò rarybere: –Boholake, myike, abyre bimyke tahe makre aheto-ò. ¹² Tahe hãbu rÿire, tabyre rimymy tahe rare ibutumy inyru-ò. Ibutumy bede riòtiinyre tahe reàlàre Deuxumy. Ibutumy rarybere: –Tiu heka aõmy kawese rabiòhyymyhÿre.

¹³ Jesuisi rare ahohokÿ ijà-ò. Ibutumy tamy doide. Tii iny ribedeerynyre. ¹⁴ Levi, Afeu riòre, ronymyhÿ nierumynydu hetowo-ki. Jesuisi ibire-di rareò, tii robira. Jesuisi heka Levi-ò rarybere: –Waijoimy mynake. Tahe rÿimy reare Jesuisi ijoi-ò ralore.

¹⁵ Jesuisi taerydỹna-wana rorukure Levi hetowo-ki. Tule nierumynydu mahãduõ rononymhỹre òrarudu-wana. Ibutumy riroximyhỹrenyre. Sõwemy heka kia iny mahãdu Jesuisi rihe-ludunyre. ¹⁶ Bede ywina erydỹ mahãdu, lahi rybe-di erydỹna mahãdu tuu robirenyra. Idi raryberenyre Jesuisi erydỹna mahãdu-ò –Aõherekibo tii riroxireri òrarudu-wana, nierumynydu-wana. ¹⁷ Jesuisi roholareu, tamyreny rarybere: –Iny ibinaõkeki tahe luaaidu tamy kanaõtyhy. Tahe iny ibinakeki, tamy kanake bina-ò. Òbiti mahãdu itxemy aõkõ anade. Tahe òrarudu mahãdu itxemy anade.

¹⁸ Joaõ erydỹna mahãdu, lahi rybe-di erydỹdu mahãdu-wana byreõhyky txuu tutyhyle rỹimyhỹrenyre. Tahe roire Jesuisi dỹraxidỹmy. Inyõ Jesuisi ritỹraxyre: –Aõherekibo Joaõ erydỹna mahãdu byreõmy rỹiõmyhỹre. ¹⁹ Jesuisi rirawyõnyre: –Heriduõ, itxeredu-wana ratxireriu, byreõmy rỹiõtyhy tutyhylemy. ²⁰ Tiutxulemybo tahe heridu iribi kanatakre, tai tahe byreõmy kỹnyikre tutyhylemy. ²¹ Moheka tyytỹmyra dòbõna ritidikre tyytyby-ò. Idi inatyhymy dòbõna rayjakre tahe tyytyby sõwemy raykake. ²² Moheka òteti bederatyruube tỹmyra rihynymyhỹre iròdutyy walabuutybywo-ò. Idi tahe raberyrõnymyhỹreu, urile iròdutyy walabuu raykake tahe irube rejujuke. Tule iròdutyy walabuu ribinadỹnymyhỹre. Irubetỹmyra awire heka iròdutyy walabuu tỹmyrarokile.

²³ Judeu elehydỹnareny txu Jesuisiboho riri-ranymyhỹrenyre maixõmo wesena oworumy, tai ierydỹna riòromyhỹrenyre riroxirenykemy. ²⁴ Tahe lahi rybe-di erydỹdu mahãdu rarybere Jesuisi-ò: –Aõherekibo aerydỹna mahãdu riwinyreri aõwidỹna aõkõ karare sabado txu. ²⁵ Tahe Jesuisi tamy rarybere: –Kaiboho aõbo teriranyõletenyta tyyriti-di. Iwese Daviboho-wana aõhebo rotỹnyreri aõmy rekoarenymahãu, rama rahumyhỹrenyu. ²⁶ Tii ralore hetotyhy-ò. Tai tahe orotxu sira ybina riyre, tule tamahãdu-ò riwahinyre. Kia tahe Deuxu deòdule rirỹsỹmyhỹre. Kia Davi aõhebo rotỹnyre Abiata heka Deuxu deòdu wedurau. ²⁷ Jesuisi tamyreny rarybere: –Sabado txu heka rawidỹre inydee, iny tahe rawidỹõre sabado txu dee. ²⁸ Deuxu Riòre Hãbutyhyhykỹ tahe sabado txu wedu rare.

3

¹ Ixityre Jesuisi ralore dohodỹna hetowo-ò. Hãbu debò binahakỹõ tai ratximyhỹ. ² Lahi rybe-di erydỹdu mahãdu Jesuisi retehemyhỹrenyre. Jesuisi sabado txuule riteytenykeki, tiiboho rarybekemy aõbinabinakibo raharenykemy Jesuisi. ³ Jesuisi heka hãubina-ò rarybere: –Manake. ⁴ Tahe Jesuisi

ijõ mahãdu-ò rarybere: —Aõwihikỹwidỹỹ awire ada aõbinalemy widỹỹ awire. Tibohe awire, itarasa-ki aõbo ada rubu-ki aõbo. Hãbu mahãdu urile riyryre. ⁵ Jesuisi tamyreny retehere raõbinamy. Tii heka iaõna aõna riwotõenyrenymyhỹ. Jesuisi hãbu debò bina-ò rarybera: —Ebò biterenyke. Tai tebò riterenyreu, aõwesele awimy relere. ⁶ Lahi rybe-di erydỹỹdu mahãdu rara Iòlò Herodi mahãdu-ò. Tiiboho raryberenyre timybo tahe Jesuisi rirubunyrenyke. ⁷ Jesuisi rexitare taerydỹỹna mahãdu wana aho-ò. Tahe sõwemy iny Judeia mahãdu, Kalileia mahãdu riheludunyre. ⁸ Ibutumy aõna aõna roholare Jesuisi riwinyreò. Tahe sõwemy tamy nade: Jerusalẽ hãwã mahãdu, Idumeia hãwã mahãdu. Iny Jordaõ bero ijà-ribi tule nade. Tule iny Tiro hãwã, Sidõ beà hãwã-ribi iòhòmý tamy nade. ⁹ Tahe Jesuisi taery mahãdu-ò rarybere: —Walawò bidwykre. Iny sõwemy dori rehemynyreri. Kidiwawotõmonykre òsana. ¹⁰ Ibutumy bina mahãdu ibymy tebò reareri ixideytedỹỹmy. Urile iny sõwemy riywinyre dori. ¹¹ Tyytybybina Jesuisi reteherenyreu, urile iko-txi resere ryryreri: —Kai Deuxu Riòre tate. ¹² Tai tahe Jesuisi rarybere tyytybybina-ò, uritere iteòsidỹỹõmykemy.

¹³ Tii raòwõnyre bederatòòmý. Tahe taerydỹỹna-ò ryryre tibo tamy reòbykemy. Tahe tamy nade. ¹⁴ Tahe ierydỹỹna waòinatxi reuròmý rarunyre tii-wana rarekemy, rybe ritỹnynydyỹkemy. ¹⁵ Tule iruru-di rarekemy inybina riteytenykemy. Tule irurudikemy tyytybybina riteònykemy. ¹⁶ Kie ierydỹỹnanirenyre: Simaõ, (tii tahe Jesuisi ijõni riwahinyre, Pedromy) ¹⁷ Txiau ijõ, tii Zebedeu riòre rare. Kia seriòre Jesuisi rininirenyre, Boanejimy, inireny. Kia heka irybereny rare, Biumytxy riòrereny. ¹⁸ Ijõ heka Andre, Filipi, Bartolomeu, Mateu, Tome, Tadeu, Txiau. (Kia Txiau heka Afeu riòre rare.) Ijõ Simaõ iwitxira, (tii brebuòmý rybe-ki, tasubedeluudu wahe.) ¹⁹ Judasi Isariò ijõre, kia heka Jesuisi riwahinyre iòludu-ò.

²⁰ Tahe Jesuisi nalode taheto-ò. Ixityre iny sõwemy tamy nade. Tai tahe Jesuisi taerydỹỹna-wana riroxiõhyyre. ²¹ Idi tahe Jesuisi leinarený itxỹtesana roholarenýreu, riòryrenýre. Tiiboho raryberenyre: —Jesuisi itxỹte iòhòlere. ²² Bede ywina erydỹỹ mahãdu doide Jerusalẽ-ribi rarybemyhỹrenýre: —Belisibu idi ratximyhỹre. Tyytyby wedu ruru-di tyytybybina iny-ribi riteònyreri. ²³ Jesuisi inyko ijyymy relyyre: —Timy taheka Satanasi rexiteònykre Satanasi. ²⁴ Iòlòna wiribi rexihitxinykeki tahe, rexihukre ibutumy wiludu. ²⁵ Tahe sỹro luduõ wiribi rahitxikeki, rỹiõtyhy. ²⁶ Satanasi rỹikeki reburemy, tii ixiòbitile rexirubunyke. ²⁷ Inyõ heka hãbu rurutere hetowo-txi ralòõtyhy. Tai rawasinykeki, urile iny ritaataake.

Urile hãbu rataataakeki, iròòbomy iny rawasinyke. ²⁸ Inatyhy jiarỹ adee ararybereri, ibutumy òraru heka kanaixãwidinykre hãbu dee aõtxile aõbina binamy rarybemyhỹre. ²⁹ Kia inyõ aõtxile aõbina binamy Deuxu Tyytybytyhymy rarybekeki, tiu heka òraru rataõtyhy. Kia òraru riwinyre tiiehyymy rarekemy. ³⁰ Jesusimy kiamy narybedenyde: –Tii heka tyytybybina dire.

³¹ Tadi tahelỹna-wana nade. Tahe ahanakile ritamanyre. Tamy riteõnyrenyire òrysymy. ³² Iny sõwemy iwerora-di ronyre. Tahe Jesusise-ò rarybere: –Adi aseriòre-wana ahanakile nyide, araijereri. ³³ Jesuisi rarybere: –Mowe nadi rare, waseriòreboho rare. ³⁴ Juhu urile idi retehereri iwerora-ki. Tahe rarybere: –Betehekre, kaiboho ibutumy kaki nadiwese-re, waseriòre wese toite. ³⁵ Inyõ aõna aõna riwinymyhỹkeki, Deuxu dee awira. Kia heka nadi, waseriòre roire.

4

¹ Jesuisi ròòsera ahobero ijà-ò iny dohodỹmy. Sõwemy iny wirotyre. Tai Jesuisi ronyre hãworo-ò tahe rexitaranyre ahoro-ò. Aho ijà-ò iny wirotyre ijohonamy. ² Tii aõna aõna sõwemy roerydỹnanyre ijyytyhydile. Kaa ijyymy tii relyyre: ³ –Boholake, alòbòròna-di dehudu rara alòbòrònamy. ⁴ Alòbòròna-di rehumyhỹu, ijõ ryro-txi resere. Tahe nawixõmo rirore. ⁵ Ijõ rejujure manarutàsutxi. Tahe aõwesele raumynyre iraruxiõlemy su dori ibutere. ⁶ Irauxiòreki, bedetòtee alòbòròna rimoenyre idi rurura. ⁷ Ijõ oworuty resere edehu-txi idi ruhunyre edewanale. Tai tahe ede-ò riòdesenyre tai raratynyõlere. ⁸ Ijõ resere su witxira wihikỹ-txi. Kia tahe raumynyre. Tahe sohoji oworutyõ 30my iraty raratynyre. Ijõ oworuty 60my raratynyre. Ijõ tahe 100my raratynyre. ⁹ Tii rarybera: –Kaiboho aõbo õhõtidiirenyre, inatyhymy warybe-ò boholake. Adee awikeki, bierybenyke.

¹⁰ Iny robỹtỹreu, ijõ rarilere ierydỹna mahãdu-wana. Tiiboho rỹrãxire Jesuisi-ò: –Aõhekemybo telyyta ijyymy. ¹¹ Jesuisi tamyreny rarybera: –Deuxu Iòlòna rybemy Deuxu araerynanykre. Kia heka tuu teeryõmahãte. Kowaboho-ò jiarỹ urile ijyymy relyyra. ¹² Tai tahe kia wesele relyyra. Iny retehemyhỹkemy tahe robiõhyymyhỹre. Roholamyhỹre ta, rieryõhyymyhỹre. Tai tahe ralòkemy aõkõ, taòraru riixãwididỹnakemy aõkõ.

¹³ Tii tamy rarybere: –Kaiboho aõbo teeryõhyyletenyteri ijyy. Ihãre tahe timykibo bierybenyke ijyy ibutumy. ¹⁴ Aloborodu rehumyhỹ alòbòròna-di. Kia oworuty heka rybe wese rare. ¹⁵ Oworuty ryijãti ludu heka iwese uriijohonadu wese heka rare. Rybe-ò roholarenyreu, Satanasi nade rybe iwo-ribi

ritakremy. ¹⁶ Manarutàsu ludu iwese iny reysamy roholareri. ¹⁷ Iny urihimyòle rarorehenymyhÿre iraruxi sòwewòreki. Idihe rasirara irybe. Tule iny ralahatxinamyreki, ihyye tahe riixãwidinyra. ¹⁸ Ede rawo ludu iwese iny wixira roholareri. ¹⁹ Tiiboho taaòmydÿñadile ròhòtinymyhÿre. Sòwemy nieru-di ratxikemy rexinohòtinymyhÿre ta nieru riitxenanyymyhÿre. Ijò aóna aónadile rexinohòtinymyhÿre. Kia aóna aóna rybe rirarutxinymyhÿre. Tai tahe rybe raratynyòmyhÿre. ²⁰ Suwihikÿ ludu iwese iny wixira roholareri. Kia inatyhymy rÿireri heka raratynyre alòbòròna raratynyre wese. Ijò raratynyre 30my, ijò tahe 60my raratynyre. Ijò tahe 100my raratynyre.

²¹ Tii rarybera tamyreny-ò: —Uritere loosòna ideòmyke butxi worawo-txi ada herina raworawoò-txi aòbo. Loosòna bidekre bedewiò-ò. ²² Inyò iwòteòmy aóna aóna tiiehyymy. Tiutxulemybo ratÿnykemy ihÿre. Iwòteòmy atximahãbenyke aòu bodobikemy atximahãtenyete. ²³ Kaiboho aòbo òhòtidirenyre, inatyhymy boholaake. ²⁴ Tahe Jesuisi tamyreny rarybera: —Kaiboho inatyhymy boholaabeny tamy taholamahãtenyeteò. Urihixina iwese teòteri wesele, kai biwykre. Ihãre tahe biwykre ijò teòta-ribi ritamy. ²⁵ Hãbuò ijòdikiki tamyle rawahidÿÿke, tahe hãbuò ijòòkeki iribi ratatyhyke.

²⁶ Jesuisi relyyra kia ijyymy: —Deuxu Iòlòna kia ijyy wese rare. Hãbu rehumyhÿre alòbòròna-di suò. ²⁷ Hãbu rummy ròròmyhÿre txulemy rexixamyhÿre. Tii rieryòlemyhÿre timybo alòbòròna ratybienymyhÿre. ²⁸ Suu ixi dee sohojile raratymyra. Juhuu iòle ramyhÿre. Idi tahe raratynymyhÿre, ihewonau, tahe, iraty rasònymyhÿre. ²⁹ Bederaty rasònymyhÿreu, iyresydu riteònymyhÿre. Mayrabu-di riòròkemy bederatysò butudÿÿna dori rexihumyhÿre.

³⁰ Tii rarybera, Deuxu Iòlòna wexe aòwesere. Aò-ò wexe rikioirenykre. Tiwexe ijyy kawesere. ³¹ Kia heka mostardaty wesere. Tii heka iylatyhymy ratximyhÿre kabede-ki. ³² Tahe tii raumynymyhÿre wana, ireitòbòròdÿÿ ratyre rarururunymyhÿre. Tahe nawii tamyle rasÿnymyhÿre. Iubòròrò rawolemy taheto riwinyre.

³³ Tahe Jesuisi Deuxu rybemy rierynanymyhÿre. Kia ijyy wese sòwemy ijyy rierynanymyhÿre. Kialemy iny-ò Jesuisi relyymyhÿ ibutummy tamy reny ritynynymyhÿreki. ³⁴ Kia-ò riòbitinyòlere ijyyò. Tahe iny-ribi irehemy taerydÿÿna-ò riòbitinyre.

³⁵ Iu txu txiorolemy Jesuisi rarybere taerydÿÿna-ò: —Rikiòhòrerenyke kowa weribi ijà-ò. ³⁶ Sòwemy iny rarire aho ijà-ki. Tahe taerydÿÿna tamy ralore. Roire hãwò-di. Tahe ijò

hãwò idi ratximyhÿre. ³⁷ Tahe bede binahakÿ rexidelenyrene yhymy. Tahe òbò hãwò rihãtenymyhÿ tai ritÿmynykemy rite-
lenyre. ³⁸ Tai tahe Jesuisi ròròmy roimyhÿ tòro-ki irati tarahy-
natyre-ki. Tai tahe riixixanyre. Ijò rarybere: —Waerydÿÿdu,
adeehe awimy aõbo iny ituerenykre. ³⁹ Rexixamy Jesuisi.
Tii yhy riixãwididÿÿnyre. Tii ahohokÿ-ò rarybere: —Biyrke!
Tai bede ruhuwihikÿre. ⁴⁰ Tamyreny rarybere: —Aõherekibo
kaiboho taberutenyteri? Deuxu aõbo tetyhynyõmahãtenyte?
⁴¹ Tai tahe tiiboho bede riòtiinyrenyra. Tahe widee rary-
berenyre: —Mowexe tuu yhy ahohokÿ-wana irybe riy-
winyke.

5

¹ Ritehemynyrenyre ijò berohokÿ weribi ijàna-ò. Kowa
heka ibutumy hãwãhãkÿ Kadarena inirenyre. ² Jesuisi
hãworo-ribi resereu, hãbu tyytybybina-di robire ròhònyreri
wabede-ribi. ³ Kia heka tiemy rasÿnymy raremyhÿ
wabede-ki. Katahe wiji moheka womati reroti-di
rataataaõtyhy. ⁴ Aõdorihe òhòõre tebò iwa rataataare
womati reroti-di. Tiiemy heka rimoenymyhÿ. Teòruty
ludu tawararu ludu tule ritòtynymyhÿre iyresymy. Moheka
iruruõre iny erydÿÿmy. ⁵ Txuu ruu-wana heka tii rasÿnyre
wabedewo-ki. Tii rariamyhÿre bederatòõmy. Tule rirajuamy
tai rexihãtenyre mana-di. ⁶ Tai tahe Jesuisimy robireu,
tii raijaranyre Jesuisi-ò. Resere tatiowotimy Jesuisiko-ò.
⁷⁻⁸ Jesuisi tyytybybina-ò rarybere: —Iribi bòhònyke. Tahe
tyytybybina rarybera: —Aõwe wadi tate. Kai, Jesuisi,
ibutumy inyõ dee inyratyre tate. Kai Deuxu Riõre tate.
Lãhãmy lãhã, uritere aõbina binahakÿmy wahòròdÿÿõmykre.
⁹ Jesuisi ritÿÿraxinyre: —Mobohe anire. Tyytybybina
rirawyònyre: —Wanireny sòwetyhyre wasõwerenyreki. ¹⁰ Urile
karibi wateòdÿÿrenyõmykre. ¹¹ Tahe kowa-ki ixÿni juramy
riroximy rÿimyhÿ bederatòò-ki. ¹² Ibutumy tyytybybina
rexitòenyrenyre: —Biwateònybenyke ixÿni jurawomy
aralòrenykemy. ¹³ Tahe Jesuisi riteònyre. Tyytybybina
aõwesele ròhònyre tahe ixÿniwomy ralore. Ixÿni jura tahe
raòrunyre rejuxunyre ijòtira-ribi. Berawo-txi tahe rabòròròre
ahohokÿ-ki. Inatxi mil ixÿni rabòròròre. ¹⁴ Ixÿni-di itxeredu
reare ijyymy ibutumy hãwã hãwãmy relyyrenyre. Tahe iny
dirahude tamy itxeremy. ¹⁵ Tiiboho Jesuisi-ò doideu, tuu
robirenyra hãbu tyytybybina-di raremyhÿ. Tii rexitÿynymy
ronymyhÿre. Tii heka òbitimy ròhòtinymyhÿre. Tai iny
mahãdu rabedeòtiidÿÿnyre. ¹⁶ Tiiboho tuu robirenyre,
ijò-ò relyyrenyre ixÿni ijyymy, timybo aõhebo rotÿÿnyremy
hãbu tyytybybina-di ratximyhÿre. Tule relyyrenyre

timybo rotÿÿnyre ixÿni jura. ¹⁷ Iny rexitòenyre Jesuisi-ò rexitakremy isureny-ribi. ¹⁸ Jesuisi hãworo-ò ralore. Tahe hãbu tyytybybina-di ratximyhÿre, rexitòenyre Jesuisi-wana rakemy. ¹⁹ Tahe Jesuisi idy derare. Tamy rarybera: —Mahe asÿ-ò, aijoi-ò belyyke aõna aõna Deuxu adee riwinyremy, iwese tii araruxetòenymyhÿre wese. ²⁰ Tahe hãbu rare Debòwiò hãwãreny-ò. Ibutumy Jesuisi aõna aõnamy ixidee riwinyremy relyyre. Ibutumy iny ribedeòtiidÿÿnymyhÿre.

²¹ Ixityre Jesuisi rare ahohokÿ weribi ijà-ò. Ixidee iny sòwemy ributunyre. Tii heka ihÿmyhÿ ahohokÿ ijà-ki. ²² Tahe dehemynyde tamy dohodÿÿna heto weduò. Ijairu inire. Tii Jesuisi robireu, resere tatiowotimy iko-txi. ²³ Ijairu rarybere Jesuisi-ò: —Wariòre irubu iòhòtyhylemy roireri. Kai manakre tamy ebò bitidikremy. Tai awimy relekre, ruruòtyhy. ²⁴ Tahe Jesuisi tii-wana rare. Iny sòwemy tule rare iòhòkile tamy rÿire.

²⁵ Kia heka hãwyyò binamy ramyhÿre. Ihãlubu rejuxunymy raremyhÿ. Beòra waòinatxi reuròmy rejuxunymyhÿre, rihuòhyy raremyhÿ. ²⁶ Tii aòhòkÿmy rotÿÿnymyhÿre sòwemy òhotibedu mahãdu-di. Tahe awimy rotÿÿòlemyhÿre. Urile tanieru ibutumy rahure òhotibedu mahãdu-ki. Awimy releòlemy, ire bede-ò resere. ²⁷ Tahe roholare Jesuisi nina-ò tahe iòhò-ki nade inyy-ki. Idi ihewo-ribi rimyra ityynora-ki. ²⁸ Hãwyy ixidee rarybemyhÿre: —Kriile itykynora-ki karimykeki, karekyteke. ²⁹ Tahe aòwesele ihãlubu ijera ixãwire. Ixidee awimy ròhòtinyre. ³⁰ Jesuisi rieryre iruru iribi ròhònyremy, tai rarybere: —Mobo watyynora rimyra. ³¹ Tahe ierydÿÿna raryberenyra aòherekibo tuu tarybeta ibutumy taheka iny abirelemy rÿireri. ³² Jesuisi retehemyhÿre urile mobo rarekemy. ³³ Hãwyy rierymyhÿ aòhebo rotÿÿnyre. Tii ruberumy Jesusiko-ò resere relyykemy iko. ³⁴ Jesuisi rarybera: —Lerÿ, atyhydÿÿna kÿnyhe aratara. Mahe, kai dori texiywinyta.

³⁵ Tii rarybemyhÿò, dohodÿÿna wedu deòdu rehemynyrenyri. Tiiboho raryberenyra: —Wawedu, Ijairu, ariòre rurumy roireri. Aòmybo tahe Erydÿÿdu-di atxiteri. ³⁶ Jesuisi kia-ò roholara tahe rarybera dohodÿÿna wedu-ò: —Brebuòmy, urile bityhynykre. ³⁷ Jesuisi-wana roire, Pedro, ijò Txiau, ijò Joaò. Joaò heka Txiau seriòre rare. Kaòle heka reòbyre tii-wana rakemy. ³⁸ Dohodÿÿna wedu heto-ò dehemynydeu, ixiyjadÿÿ-ò roholara, robureriò, rirajuarerì. ³⁹ Jesuisi ralore tahe rarybera: —Aòherekibo tabutenyteri. Hiraririkÿ rurumy aòkò roireri. Tii urile ròròreri. ⁴⁰ Juhu urile tai rutxuenyrenyra Jesuisi-ki. Tahe Jesuisi ibutumy iny riòlòdÿÿnyra hetowo-ribi. Tahe ise, tybyle, ixidee rimyrenyra ratxirenykemy. Tahe tamy

rirònyrenyire tai hirarihikỹ roimyhỹò. ⁴¹ Jesuisi hirarihikỹ debò rimyre tahe rarybera: —Talita kumi. (Katahe iwitxira rybemy rarybera. Kiamyreri heka, mynyikemy.) ⁴² Aõwesele hirarihikỹ rỹimy reara. Tahe rariara aõmyreki iwyra waòinatxi reuròm ywyramy. Tahe urile bede riòtiinyrenyire. ⁴³ Jesuisi riteranyire moõ rierydỹỹkemy aõkõ. Jesuisi tule rarybere: —Rỹsỹna tamy biwahinykre.

6

¹ Jesuisi dexitade kowa bede-ribi. Tahe tauladu tybiena hãwã-ò dehemynyde. Taerydỹỹna mahãdu riheludunyire. ² Sabado txumy rierynanyire dohodỹỹna heto-ki. Sõwemy iny roholamy rỹimyhỹ bede riòtiinymy. Tahe rarybere: —Tiribibo kia hãbu aõna aõna bede rieryre. Aõbedeeryhykỹbo ratximyhỹre. Timyta heka bedeòby riwinyre. ³ Kia aõbohe aõwidỹỹdule ratxireri, Marie riòrele. Tiiboho aõbohe Txiau, Jyje, Judasi, Simaõ, seriòrebohohole ratxirenyreri. Terỹboho aõbohe tule kakile ratxireri. Ibutumy iny heka Jesuisi derarenyre. Irybe rityhynyõre. ⁴ Jesuisi rarybere tamyreny: —Deuxu rybedỹỹdu heka tyhydỹỹna ritaõlekre tahãwãreny-ribi, taijoi-ribi, tasỹ-ribi. ⁵ Tahe Jesuisi kowa-ki bedeòby riwinyõlere. Urile tebò ritidire inybina bina tyre, taile riteytenyre. ⁶ Jesuisi urile bede idireny riòtiinyre rityhynyõlemyhỹrenyreki. Tahe Jesuisi reurore hãwã hãwã-di erydỹỹmy.

⁷ Tii ixidee ributunyire tawaòinatxi erydỹỹna mahãdu. Tii riteònyre inatxi inatxi iubỹtỹnyre. Tamyreny taruru-ribi riwahinyre tyytybybina deòdỹỹki. ⁸ Jesuisi tuu rarybere: —Urile biwykre adebõna. Uritere orotxu aõkõ, nieruhyna aõkõ, nieru wereysanawo-ki aõkõ, iwydysyrenyõmykre. ⁹ Uritere waubehetyõmy noõmykre. Uritere inatximy wirawomy tyy-di ixityydỹỹõmykre. ¹⁰ Hãwã-txi malòkeki, tiiemy taile bonykre tiubedemybo iribihyyle bòhònykre. ¹¹ Titxi behemynybenykeki, uritere iny erarenymy reakeki, roholàõkeki, txiòrare, urileta awareny bitòtynykre bede erynamy. ¹² Tahe tiiboho roire. Rybe ritỹnydỹỹmyhỹre iny ixidee rexirahĩrenykeny. ¹³ Tyytybybina irehemy iny-ribi ririradỹỹnykeny. Sõwemy inybina tyre òlỹre ritxiwire. Tai tahe riteytenyre.

¹⁴ Kia heka iòlò Herodi roholara. Jesusini dori erynatyhymy raremyhỹ. Tahe ijõboho rarybemyhỹreny: —Joaõ Sebedỹỹdu rexixara rubu-ribi. Ijõ rarybemyhỹreny: —Eliale ratxireri. ¹⁵ Ijõ rarybera: —Deuxu rybedỹỹdu ratxireri. Deuxu rybedỹỹduõ wese heka ratxireri. ¹⁶ Herodi roholareu aõbo Jesuisi riwinyreu, rarybera: —Kia hãbu Joaõ ratxireri.

Kia heka irati reorore heka rare. ¹⁷ Kia heka iòlò Herodi riteònyre imynamy. Idi tahe ritisanyre ròtenawo-ò. Taseriòre hãwyy òraru-ki kia riwinyre. Filipi iseriòreni rare. Iseriòre hãwyyini Herodia rare. Herodi, Herodia-wana roire iseriòre riòrese-wana. ¹⁸ Juhuule Joaõ rarybere Herodi-ò: —Kai aõkõre aseriòre hãwyy-di mabeõtyhy. ¹⁹ Herodia tamy icy reamyhỹ rirubunyky ratximyhỹ tahe aõkõhyllere. ²⁰ Herodi tahe Joaõ rityhinyre. Tii rierymyhỹre Joaõ hãbu wihikyõ ratximyhỹ. Tai riyrubunyre ròtenawo-ki. Herodi Joaõ roholareu, urile bede riòtiinyre urile roholawihikyõre. ²¹ Kia txuu ibeòra reare Herodi lisina berenamy riwinyre. Tahe ibutumy hãwã dinodu, soldado wedu mahãdu, tule ibutumy hãbu ninihikyõ Kalileia mahãdu-ribi rihuòtere. ²² Ijadòma ralore resere, Herodia riòre. Herodi, iny huòtedu mahãdu-wana tamyreny awire. Iòlò ijadòma-ò rarybera: —Aõtxile aõma wadee bexitòenyke, adee ariwahinykre. ²³ Inatyhymy adee ararybekre. Waaõna aõna iweeremy bexitòenykeki, adee ariwahinykre. ²⁴ Ijadòma tadi ritỹraxyinyre aõmybo tahe tamy rexitòenykre. Ise rarybera: —Joaõ Sebedỹkỹdu rati kai bexitòenykre. ²⁵ Tahe ijadòma ròsere iòlò-ò. Tahe ijadòma rarybera: —Joaõ Sebedỹkỹdu rati kai biwahinykre hyna tyre-ki. ²⁶ Iòlò sòwemy rabadewore irybe-ki. Rexitxiõnyõlere iny dori sòwemy ibire-ki. ²⁷ Iòlò soldado rariare Joaõ rati òrysmy. Tahe irati riorore ròtena-ki. ²⁸ Tahe irati diwyde besetyre-ki. Ijadòma-ò riwahinyre, tahe ijadòma tadi-ò riwahinyre. ²⁹ Joaõ erydỹna rieryreu tahe, nade iumy òrysmy. Tahe iumy riwyre wabede-ò.

³⁰ Jesuisi erydỹna mahãdu ròserenyre Jesuisi-ò. Tahe relyyrenyra ibutumy aõmydỹnana tule ibutumy rierynanymyhỹre. ³¹ Jesuisi tamy rarybere: —Inyboho sohojile rokoireny bederahy-txi ixielehydỹmy. Tii dori rarybera tamy heka byrena iòhòtyhyõlere tamy roxina raòhòõlere. Iny sòwemy tamy wii reutydynyneri. ³² Tahe tiiboho sohojile hãwò-di roire bederahy-txi inyõ-ò. ³³ Iny sòwemy tuu robira ròhònyrerimy. Tahe iny ibutumy hãwã hãwã ludu raijaranyre tòròsòna-ò. Tiibohole juhu rehemynyre iko-ki. ³⁴ Jesuisi rororeu, tahe inymy sòwemy robire, riraòreriò. Jesuisi tamy ratòenymyhỹre. Tiiboho dori iwese budoeni idi itxereduõmy rỹireri wesemy. ³⁵ Txuu raloreu, ierydỹna mahãdu Jesuisi-ò roire. Tiiboho rarybere: —Ka kỹnyhe bederahy roire txuuke rexihura. ³⁶ Kai tahe iny biteònykre hãwã hãwã mahãdu-ò rỹsỹna ixideereny õbradyỹmy. ³⁷ Jesuisi tamyreny rarybera: —Kaiboho tamy rỹsỹna biwahinykre. Tahe raryberenyre: —Timybo tahe inyboho 200 prata womati nieru-di orotxu rikiõbranyrenykre. Timy wexe tamyreny rỹsỹna rikiwahinyrenykre. Jesuisi

tamyreny rarybera: ³⁸ —Tiwese orotxu bohe r̄yire. Maa tamy itxeremy. Idi tahe rieryrenyreu, rarybera: —orotxu iruyre, utura inatxi. ³⁹ Idi tahe Jesuisi iny rabòròhòk̄y asityre rorukukremy. ⁴⁰ Idi tahe iny rabòròhòk̄y wii rirareare, ijō s̄iwētamy, ijō 100my. ⁴¹ Jesuisi orotxu utura-wana rimyre tahe retehere biu-ò Deuxu-ò rexitòenyre. Idi tahe orotxu reòròòròre. Riwahinyre taeryd̄ȳna mahādu-ò riwykremy iny-ò. Tule utura inatxi wirarea riwahinyre iny mahādu dee. ⁴² Ibutumy iny riroxire. Rihydymy r̄ȳimyh̄ȳ. ⁴³ Idi tahe rit̄xinyre waðinatxi reurò weririmy orotxu yre yre utura-wana rauhenyredi. ⁴⁴ Kia heka rer̄s̄ȳre 5000 inymy r̄ys̄ȳna-di.

⁴⁵ Juhu Jesuisi riteònyre taeryd̄ȳna mahādu ixiko-ò kanaijōwe-ribi ijà-ò, Besaida hāwā-ò. Tii tahe ririre iny riteònykremy. ⁴⁶ Tahe riteònyreu, tii rare ixitòed̄ȳmy bedè ratòhòk̄y-ò. ⁴⁷ Txioro bedesou hāwò ahotya-ki ratximyh̄ȳre. Jesuisi suki ratximyh̄ȳre ixisohojile. ⁴⁸ Tahe yhy rebònymyh̄ȳ iutedereny-ribi. Hāwò rariaõlemyh̄ȳ. Tahe Jesuisi tuu robire txu ijera iòhò-di. Tahe betyredile tamyreny rariare. Jesuisi iratyrereny wese rariakre. ⁴⁹ Tahe tuu robireu, betyre-di rariareriò, tiiboho unis̄ȳna rōhōtinyreny, rirajuarenyre. ⁵⁰ Tahe ibutumy tuu robira ibutumy ruberurenyre. Jesuisi aõwesele rarybere: —Utile beysabeny, breburen̄ȳomy. Jiar̄yle watzireri. ⁵¹ Tii ralore tamyreny hāworo-ò. Yhy urile ixāwire. Ieryd̄ȳnaboho bedè riòtiinyrenyre. ⁵² Tiiboho ruberurenyre, orotxu bedèòbyna dori rierykōrenyre.

⁵³ Tiiboho riòhòrenyre, ritehemynyre Kenesare-ò. Kia-ki hāwò ritisarenyra. ⁵⁴ Tahe hāworo-ribi ròtuòreriu, ibutumy iny Jesuisi rieryra. ⁵⁵ Juhu raòrunyrenyre bina bina mahādu òrysymy. Idi tahe didydenyde roholarenyre titxibo tai Jesuisi ratximyh̄ȳò. ⁵⁶ Tii raloreu iny hāwā-ò aõbo ada hāwāhāk̄y-ò aõbo ada bedero-ò aõbo, tiemy iny bina bina mahādu iryko-txi ritidire. Tai tamy rexitòenihik̄ȳre tamy debò reakemy ityynora-ò. Ibutumy tamy debò reareu, tahe riteytenyre.

7

¹ Jesuisi-ò ributumy fariseu mahādu lahi rybe-di eryd̄ȳdu mahādu wahe. Tule bedè ywina eryd̄ȳ mahāduributumy. Jerusalē-ribi ritehemynyleri. ²⁻⁵ Jesuisi eryd̄ȳna mahādu tebò risuhòomy riroxireri. Fariseu mahādu, Bedè ywina eryd̄ȳ mahādu-wana Jesuisi-ò rit̄ȳraxinyrenyre: — Aõherekibo aeryd̄ȳna tebò risuhòomy riroximyh̄ȳrenyre. Aõherekibo ihetxiu bedè ywid̄ȳnana rityhynyõleri. Lahi rybe-di eryd̄ȳdu mahādu judeu mahādu-wana ihetxiu

iwidỹ̃nana riwinymyhỹrenyre. Tii heka tebò tiu suròduõmy
riroxiõmyhỹre. Tiiboho aõna aõna wydyna heto-ribi
dòðsemahãdeu, tiu heka ròhõõdile riroxiõmyhỹre. Sõwemy
iwidỹ̃nareny rityhynymyhỹre. Bemona butxi, womati
bese-wana risuhõrenyre. ⁶ Jesuisi tamy dirawyõnyde: —
Isaia juhuule rarybere tiwesebo kaiboho toite. Kaiboho
itxenadỹ̃du toite. Riritinymy rỹire:

—Kaiboho riwawowydynymyhỹre tary-di. Tahe awo-ribi
waluuõlemyhỹre.

⁷ Kaiboho riwawowydynyre tahe watxi nohõti ijeraõlerenymy.
Kai teerynanyteri erydỹ̃na-di iny nohõti-ribi
namyhỹdeõle.

⁸ Kai Deuxu erydỹ̃na tyhydỹ̃õmy. Iny erydỹ̃nale tety-
hynytenyte. ⁹ Tii tamyreny rarybera: —Kaiboho aõbo ijõ
bihõrõnybenyleke, biaõmysỹnybenyke. Deuxu rybe bede ywina
kaiboho tetyhynyõlemyhỹtenyte. Arybe bede ywinale tety-
hynyõlemyhỹtenyte. ¹⁰ Moisesi rarybera:

—Kaiboho biytyhynybenyke adirybe-ò, tybyrybe-ò. Inyõ
tadimy tybymy iehehemy rarybekeki, aõtaxiny ruruke.

¹¹ Kaiboho teerynanyteri hãbuõ-ò tadi tybywana-ò rary-
bekemy: —Wanieru waribi bitaõke. Ariwahiny dori Deuxu-ò.
Wanieru heka korbỹ rare. (Korbỹ heka uri wahidỹ̃na
rare, iwixira rybe wahe.) ¹² Jesuisi rarybehymy rare: —
Kiwese rierynanymy raremyhỹ, kaiboho uritere hãbuõ tadi-
boho-ò aõmydỹ̃õmy rarekemy. ¹³ Kawese ityhydỹ̃renyõmy
Deuxu rybe, aerydỹ̃na òraru-ki. Sõwemy aõna aõna kawese
tatỹ̃nytenyte. ¹⁴ Tahe Jesuisi ixityre rarybera inysõwe-ò: —
Bodoholabenyke, ibutumy bierybenykemy. ¹⁵ Aõbo iny-ò
ralõmyhỹre, kia tahe iny risunyõlemyhỹre, inywo-ribi tahe
namyhỹde kia tahe iny risunymyhỹre. ¹⁶ Inyõ bierybenykeki,
boholawibenyke. ¹⁷ Tahe iny-ribi ròhõnyreu, heto-ò raloreu,
ierydỹ̃na mahãdu tahe tamy rỹ̃raxire ijyymy. ¹⁸ Tii tamyreny
rarybere: —Kaiboho tule aõbo teeryõmahãtenyte. Aõbo
iny-ò ralõmyhỹre, kia iny risỹnyõlemyhỹre. ¹⁹ Tawotyhy-ò
dori ralõõlemyhỹre. Urile weryri-ò ralõmyhỹre idi umy-ribi
ròhõnymyhỹre. (Ibutumy rỹsỹna tahe awire riki.) ²⁰ Tule
rarybere: —Aõbo iny-ribi namyhỹde, kia risurisunymyhỹre.
²¹ Inywo-ribi tahe ròhõnymyhỹre ibutumy nohõtinana bina-
hakỹ. Kia heka rare nohõtinana binahakỹ: òta òtalemy,
wasilemy, rubudỹ̃lemy, ijõ hãbu riòrese ridymy, ²² ibutumy
aõna aõna wedu iny ratyrekemy, binamy ròhõtinymyhỹre,
ruilemy, aõbina binaõle, itxeredu, aõbina binalemy rybedu,
tule itxỹtelemy. ²³ Kia heka ibutumy bina bina inywo-ribi
namyhỹde. Kia heka iny rexisunymyhỹre.

²⁴ Jesuisi rexitare. Tahe r re Tiro hāwāreny-ò, Sidō beà hāwā hāwā-ò. Tahe tii ralore hetowo-txi tahe moõ rierykõdi ixidire hetowo-txi. Ralòrau tahe, rexiwòke aõkõ. ²⁵ Jesuisi tyhynina-ò hāwyy roholare, tahe tamy nade, tatiowotimy resere. Iriòre-riki tyytybybina dire. ²⁶ Kia heka hāwyy Grego mahādu rare. Ilahinanire heka Siru Senisia. Tii Jesuisi-ò rỹraxyre tyytybybina iriòre-ribi deòdỹmy. ²⁷ Tahe Jesuisi tamy rarybere: —Txioiny, juhu inihe uladu mahādu riroxikre. Wadee awiòre uladu-ribi rỹsỹna ritake ijòròsa-ò. ²⁸ Hāwyy rirawyònyra: —Inatyhy rare, Wāhĩ. Kurile rỹsỹna kyre kyre rejumamahāre. Kòwòruku bese-ribi, kuladu-ribi. Kiamy heka itxoòròsa rirakuximyhỹre. ²⁹ Tahe Jesuisi tamy rarybera: —Kia rybe òraru-ki heka kaa tarybeta tyytybybina ariòre-ribi rohonyra. Kia bòðekre aheto-ò. ³⁰ Hāwyy taheto-ki rehe-mynyreu, iriòre-ki rahara byretyre-ki roire. Hāwyy rieryre tyytybybina iribi ròhònyre.

³¹ Tai tahe Jesuisi ixityre rexitare Tiro hāwāreny-ribi, Sidō beà hāwā reny-ò rara Kalileia aho-ò. Tii raremyhỹu, Debòwiò hāwā hāwā reny ririre. ³² Tahe tamy didydenyde hābuõ nohõtityõ. Tii roholaõlemyhỹre. Tule awimy rarybeõhyylemyhỹre. Tahe rexitòenyrenyra Jesuisi-ò, tebò ityre ritidikemy. ³³ Jesuisi tii ritare inysòwehekỹ-ribi tahe tebò ritidire tōhòti-ò. Tahe rarybexinyre tahe idi tòròtòbymy reare. ³⁴ Tahe Jesuisi tarue ruwyre biu-txi, ele-di reare. Tahe rarybere: —Ebata. (Kia heka rybe riwiuròsòdỹmy rare, —Biraynyke.) ³⁵ Aõwesele tōhòti riraynyre. Tòròtò riykoykonyre. Tii aõwesele awimy rarybere. ³⁶ Jesuisi rarybere: —Uritere iny-ò ijyyõmykremy. Ihārele tahe ibutumy kiamy iny-ò relyymyhỹre. ³⁷ Idi bede riòtiinyrenyre. Tahe raryberenyre: —Ibutumy tii riteytenymyhỹre. Tii nohõtity aõwesele roholamyhỹre. Hābu rybeõ aõwesele rirybedỹnymyhỹre.

8

¹ Kia txuu ixityre iny sòwemy ributunyre. Kiau tule aõrỹsỹnamy ijòðhyllere. Jesuisi taerydỹna mahādu ixidee ributunyre. Tahe tamyreny rarybere: ² —Jiarỹ inysòwe rewotònyreri. Tiiboho txuu inataõ waki rỹireri byreõlemy. ³ Jiarỹ byreõlemy ariteònyrenykeki, ryrowetyakile reserenykre iòderawyrinymy. Tule, iny sòwemy irehe-ribi nade. ⁴ Ierydỹna tamy ñirawyònyde: —Tymyaka inyboho tamyreny orotxu rikiwahinyrenykre kabederahy-ki. ⁵ Tii ritỹraxyre: —Tiwesebo orotxu kai ijòdire. Tiiboho rarybere: —Debò inatxi reuròmny. ⁶ Jesuisi iny sòwemy risỹdỹnykremy sutyre-ò. Tii

orotxu debòinatxi reuròm̃y rimyra. Tii rexitòenyreu tahe ri-orore. Tahe riwahinyre taerydỹ̃na mahādu-ò riwykemy iny sōwe-ò. ⁷ Tule utura ibutemy rỹimyhỹ. Tahe rexitòenyry rahudi tahe taerydỹ̃na-ò rarybere: —Kaa tule biwybenyke iny sōwe-ò. ⁸ Tiiboho riroxirenyremy tahe rihydymy ratximyhỹ. Iyre yre rauhenyry riwyrenyry weriri debò inatxi reuròm̃y riwyrenyry rỹ̃ximy. ⁹ Inaubiòwa mil iny iòhòm̃y rỹimyhỹ. Tahe Jesuisi rexideòwarinyry iny sōwe-ò. ¹⁰ Tii ralore hāworo-ò taerydỹ̃na-wana. Tiiboho roire Damanuta hāwāreny-ò.

¹¹ Lahi rybe-di erydỹ̃du mahādu nade fariseu mahādu wahe. Tiiboho tamy nade rybe òbitidỹ̃my. Tiiboho rỹ̃raxirenyra bede erydỹ̃naò kiditeòsinykremy. Lahi rybe mahādu rierykemy tii inatyhy rare urenana. ¹² Tii raelewesenanyry tawo-ki rarybere: —Aòherekibo kaa iny mahādu rỹ̃raximyhỹre bede erydỹ̃namy. Inatyhymy jiarỹ ararybekre: —Bede erydỹ̃na heka tamy rawahidỹ̃òtyhy. ¹³ Tahe idi Jesuisi rexitare. Hāworo-ò ralore. Idi rohorere kanawe-ribi ijà-ò.

¹⁴ Ierydỹ̃naboho tahe tōhōti rosare orotxu wydysy-ribi. Sohojityhyle heka orotxu roimyhỹ hāworo-ki. ¹⁵ Jesuisi tamy ribedeerynyry: —Beteheiny, biyrubuny, lahi rybe mahādu, Herodi mahādu-wana wirỹsỹna uri-ribi. ¹⁶ Jesuisi erydỹ̃na mahādu ixideele rarybere: —Aòherekibo Jesuisi kia rarybereri. Inyboho iorotxurenyōreriki òsana. ¹⁷ Jesuisi heka rieryra tahe rarybera: —Aòherekibo raryberemy orotxu ijōōremy. Kaiboho aōbo teerytenyōte. Kaiboho aōbo arawoxierynyrenyōre.

¹⁸ Kaiboho aōbo arueōrenyry. Tabiōletenyteri. Kaiboho aōbo itxi òhōtireñy reaōlereri.

¹⁹ Jiarỹ 5000my iny-ò orotxu reareareu, tiwesebo weririmy orotxu yre yre-di ritỹxinyre. Tahe tiiboho rirawyònyre: —Waòinatxi reurò weririmy. ²⁰ Tahe debòinatxi reurò orotxumy reòròra 4000 inymy, tiwesebo weriri orotxu yre yre-di ritỹxinyre. Tiiboho rirawyònyre: —Debòinatxi reuròm̃y. ²¹ Tahe tamyreny rarybere: —Timyrekibo tahe teerytenyōte.

²² Dehemynyde Besaida hāwā-ò. Tahe hābu ruetà-di tamy didydenyde. Rexitòenyrenyry tamy debò reakemy. ²³ Jesuisi tebòm̃y rimyry tahe ridyry hāwā-ribi bederahy-ò. Iruetyry rarybexinyre. Tebòm̃y tamy reare. Tahe ritỹ̃raxinyre: —Aōmybo aōbo tabiteri. ²⁴ Hābu tahe biu-txi tarue riukora, tahe rarybera: —Hābumy rabira, òwòru wese rỹireriò, rariareri. ²⁵ Ixityrele Jesuisi tebò reare irue-ò. Hābu heka irue reyteramy òbitilemy retehereri. Robire irehetyhy-ò itỹnyhỹkỹlemy. ²⁶ Tahe Jesuisi riteònyry isỹ-ò urile ihāwā-ribi ròòseòm̃ykre.

²⁷ Jesuisi taerydỹỹna mahādu-wana ròhònyrenyire Sesaria Filipi hāwāreny-ò. Ryki taerydỹỹnareny-ò ritỹỹraxinyre: — Mowe hābureny wamy raryberenyra jiarỹ raremy. ²⁸ Tiiboho rirawyònyra: —Joaõ Sebedỹỹdu riki, ijõ Eliasi riki, ijõ riki Deuxu rybedỹỹduõ. ²⁹ Tahe Jesuisi tamyreny ritỹỹraxinyra: —Kaiboho, mobo tarybetenyte jiarỹ raremy. Tahe Pedro rirawyònyre: —Kai Kristu atximahāte. ³⁰ Tii raraybinihikỹmy ixi-ki rarybera: —Inyko wamy ijyyõmykre.

³¹ Jesuisi rexiranyre erydỹỹmy: —Deuxu Riòre Hābutyhyhykỹ heka aõna aõnamy aõhòkỹmy rotỹỹnynihikỹkre. Matuari mahādu heka ixideramy ryanakre. Tule Deuxu aõmysỹdỹỹdu wedu, Bede ywina erydỹỹ mahādu ixideramy ryanakre. Jesuisi kudurukre idi tahe txu inataõ rỹidi kedexiakre rubu-ribi. ³² Idi tahe iòrurehekỹlemy tamy rarybere. Pedro iny-ribi Jesuisi ritare, tahe tamy rarybere: —Kawese rybeõmyreke. ³³ Jesuisi ròõsemy reare, retehemỹỹ taerydỹỹna-ò tahe Pedro-ò rarybere: —Bexitake wako-ribi Satanasi. Kai dori Deuxu ijoi aõkõ atximahāte. Kai hābu ijoi tate. ³⁴ Jesuisi ributunyre iny sõwehekỹ, taerydỹỹna-wana tahe rarybere: —Inyõ wahemy kanakeki, ixideele rexirahĩke, tahe taitxeò rimyke riwaheludunykemy. ³⁵ Mobo taumy tarasamy rurukeki, riononykre. Tahe aõtxile iny waluukeki, Rybewihikỹ luukeki, taumy wadee riononykeki, kia heka taumy ritakre. ³⁶ Aõbo tahe awire, ibutumy aõna aõna bitake tai aumy biononyke. ³⁷ Aõbo tahe iny riwahinykre taumy wydyna òkesena aõbo. ³⁸ Kai wijinabòdu òrarudu mahādu rare, òta òtadu rare. Aõtxile iny walau warybe lau raixỹrukeki, tule Deuxu Riòre Hābutyhyhykỹ ilau kanaixỹrukre tii nadeu ýjuwihikỹ-di boo wowydyna-ò.

9

¹ Tii tamyreny rarybere: —Inatyhymy adeereny ararybekre. Ijõõ kaki ratximyhỹre ruruòtyhy Deuxu Iòlòнау taruru-di kedehemykreu.

² Tahe debò sohoji txuu rỹidi, Pedro, Txiau, Joaõ-wana Jesuisi ridyre. Tiiboho sohojile bederatò-ò roire. Jesuisi tamyreny rexiwixiranyre. ³ Ityy heka urile rabòòranyre. Iurahakỹmy relere suròna ratyre heka rauranymy ritoosònyre. ⁴ Tahe tamyreny dexitỹnynyde Eliasi, Moisesi-wana tahe rarybemyhỹre Jesuisi-wana. ⁵ Pedro rarybere Jesuisi-ò: —Wawedu, awityhymy inihe kaki ratxirenyreri tahe rikiwinyrenykre inataõ hetomy, ijõ adee, ijõ Moisesi-ò, ijõ Eliasi-ò. ⁶ Pedro rieryõlemyhỹre aõmybo rarybekemy rubberumyhỹremy. ⁷ Nonoe dobehede iubòròna bede ritòbònyre. Tahe rarybere reare rybeuni iy-ribi: —Kia heka wariòre

waluu rare. Kaiboho tamy boholabenyke. ⁸ Tiiboho reteherenyre tahe inyō robiōlerenyre. Jesusilemy robirenyre.

⁹ Dobeheheu tahe inydee Jesuisi rarybere: —Uritere inyō-ò tuu ijyōmykre aōmybo tobitemy. Uritere Deuxu Riōre Hābutyhyhykỹ rubu-ribi rexixareu, tai tahe tuu belyybenykre. ¹⁰ Kia rybe wasimy riworenyre. Ixideerenyle wii ritỹraxyrenyrene: —Aōmybo rarybereri, rubu-ribi rexixamy nade. ¹¹ Tiiboho tamy rỹraxyrenyrene: —Aōherekibo bedede ywina erydỹ mahādu rarybere Eliasi juhu kanakremy. ¹² Tii rirawyōnyrene: —Inatyhymy, Eliasi juhu nade. Ibutumy aōna aōna riywinykremy. Tewesebo raritinanymy rỹreri: —Deuxu Riōre Hābutyhyhykỹ aōna aōnamy aōhōkỹmy rotỹraxyrenyrene. Tahe tii inydee awiōhyykre. ¹³ Adeereny ararybekre: —Eliasi nade. Tule iny ixideewilemy tamy riwinyrenyrene. Kaheka iaōmydỹnana riritinanymy rỹire.

¹⁴⁻¹⁵ Jesuisi dehemynydeu taerydỹna mahādu-ò, tahe robire iny sōwehekỹmy tahe bedede ywina erydỹ mahādu taerydỹna-wana ritxiōnymyhyrene. Tahe Jesusimy robireu, tahe tiiboho riumysaōnyrenyrene. Raōrunyrenyrene irybedỹmy. ¹⁶ Tamy rỹraxyrene: —Aōmybo tamyreny tatỹraxynteri. ¹⁷ Inyō rirawyōnyrene: —Erydỹdu, wariōre adee redyreri. Tii tyytybybina rybeōhōkỹ-di ratxireri. ¹⁸ Tyytybybina rimyreu tahe riatyre bedede-ò. Idi tahe urile txuu riyiyinyrene. Tahe tii rubureriwesele roire. Aerydỹna-ò jiarỹ rarybera tyytybybina riteranykremy, tahe tiiboho iruruōhyymyhyỹ. ¹⁹ Jesuisi tamyreny rarybere: —Tiwesebededỹnanabo wijinabōdu ityhyōlemy rỹira. Tiwesebededỹnanabo awanareny ariijekemy. Wadee uladu bididyke. ²⁰ Tahe didydenyde Jesuisi-ò. Jesusimy robireu tahe tyytybybina urile raitxỹteitxỹtenymy resere. Idi tahe urile bedeki rara òhōremy raratymyhyỹ rybexi irywomy rōhōnymyhyỹ. ²¹ Jesuisi rỹraxyrene uladutyby-ò tiubedemybo taheka kaa binana tamy dehemynyde. Tii rarybere: —Uladuylauke idi rōrarunyrene. ²² Tiwese wese aōkō idi rehure bera-ò, heōty-ò rahukemy. Aō biwinykeki, jiarỹboho biwawiōhenanyke wijile. Kai biwaruxetōenybenyke. ²³ Jesuisi rarybere: —Kai bityhynykeki, ibutumy aōna aōna rỹimymyhyỹ. ²⁴ Aōwesele uladutyby rryrene idi tahe rarybere: —Jiarỹ rityhinyrene, biwiōhenanykre aōbo rauhenyrene. ²⁵ Jesuisi iny sōwemy robire wii rotyrerimy, tahe riteranyrene tyytybybina-ò: —Kai tyytyby rybeō tule roholaō iribi bōhōnykre, tiu ixityrene malōōtyhy. ²⁶ Tyytybybina rryrene. Uladu ritxỹtenyrene idi tahe rōhōnyrene. Uladu rubuwesele roire herimy. Tahe iny sōwemy rarybere: —Tii rurura. ²⁷ Jesuisi rimyre tebō ritamadỹnyrenyrene tahe uladu rỹire lamamy. ²⁸ Heto ralorenyreuierydỹna mahādu tamy rỹraxyrenyrene: —Aōherekibo jiarỹboho

tyytybybina riteònyõrenyra. ²⁹ Tamyreny rarybere: —Kaiboho bexitòenybenykeki byreõna-di bonybenykeki, kiawesele heka ròhònyke.

³⁰ Iribi ròhònyreu, Kalileia lowysy-di roirenyre. Jesuisi heka inyerydỹderamyhỹ tai ratximyhỹki. ³¹ Taerydỹỹna mahãdu Jesuisi rierynanymyhỹre. Jesuisi tamyreny rarybere: —Deuxu Riõre Hãbutyhyhykỹ heka rawahidỹỹkre hãburenyõ-ò. Tii hãbureny rirubunykre. Idi tahe txu inataõ txuu rỹidi tahe kedexixakre rubu-ribi. ³² Tiiboho rierykõlere tahe ru-berurenyre tỹỹraxidỹỹki.

³³ Idi tahe rehemynyre Kafanaõ-ò. Ralore heto-ò. Jesuisi tamyreny rỹỹraxire: —Aõmywe widee tarybetenyteri ryro-ki. ³⁴ Tiiboho urile roholarenyre rybeõlemy. Ryro-ki dori rarybemyhỹ mowexe wiribi aõnimity ròhònykre. ³⁵ Tahe Jesuisi ronyrenyredi, Jesuisi taerydỹỹna mahãdu ributunyre erydỹỹmy: —Inyõ juhuludumy rarekemy ratxikeki, tai heka tii ihewoludukre. Tule tii reakre ibutumy deòdumy. ³⁶ Tahe Jesuisi uladuõ rimyre risỹnyre iubetya-txi tahe taerydỹỹna-ò rarybere: ³⁷ —Moõ uladu kawese wadee riwiòhenanykeki, riwawiòhenanyre. Moõ riwawiòhenanykeki, tule wateòdỹỹdule riwiòhenanyre.

³⁸ Joaõ tamy rarybere: —Erydỹỹdu, jiarỹboho tuu rabirenyra inyõ tyytybybina-di ani-ò rehureriò. Tahe iny mahãdureny aõkõ rare. Tahe jiarỹboho tamy reijõnyrenyre iny mahãdureny dori aõkõ rare. ³⁹ Tahe Jesuisi rarybere: —Bijõnybenyõkre. Inyõ wani-di bedeòby riwinykeki, wanimy heka ibinamy rarybeòtyhy. ⁴⁰ Iny òluduõkeki, tii heka iny ijoi rare. ⁴¹ Inyõ beò adeereny waninamy riwahinykre-wana, kai waerydỹỹna dori tate, inatyhymy adee ararybekre. Tii tawahidỹỹna ritakre. ⁴² Inyõ kaa uladu ityhydỹỹdu riatykre òraruna-txi, kia heka tamy awire tòti-ki myna ritaamy idi bera-txi rehure. ⁴³ Ebòle araatykeki òraruna-txi, juhuule adee awire ebò biòròke. Kia heka awityhykre iny welytyle ralokre biu-ò, tahe awiòtyhykre heòtytòteehekỹ-ò ralòkeki debò inatxi-di. ⁴⁴ [Tai mohõ ruruõtyhy. Heòty ruruõtyhy.] ⁴⁵ Awa araatykeki òraruna-txi, juhuule adee awire awa biòròke kia awire iny rariake awa sohojilemy, awiõre heka heòtytòteehekỹ-ò ralokre awa inatxi-di. ⁴⁶ [Tai mohõ ruruõtyhy. Heòty ruruõtyhy.] ⁴⁷ Arue araatykeki òraruna-txi, bitake idi behuke juhuule adee awire arue sohoji-di Deuxu Iòlò biu-ò ralokre, tahe awiõre heòtytòteehekỹ-ò ralokre arue inatxi-di. ⁴⁸ Tai mohõ ruruõtyhy. Heòty ruruõtyhy. ⁴⁹ Ibutumy iny heka heòty-di rijyyranykre. ⁵⁰ Jyyra heka awire, saa wahe. Urile taruru riononykeki, tiwesebo tarỹsỹna uri ixybyle tawo-ki bitidikre. Kaiboho ibutumy widee eysarenylere.

10

¹ Jesuisi iribi rexitare. Tahe rare Judeia bede bede-ò, tule Jordaõ kanawe-ribi ijà-ò. Iny sõwemy tamy ributunyre, tahe tiiboho Jesuisi rierynanyre. Tii reðarimy tuu ratximyhÿre.

² Tamy lahi rybe-di erydÿÿdu mahãdu dehemynydenyde irutaadÿÿrenemy. Tahe tamy rÿÿraxinyre: —Hãbu aõbo tahãwyy ririleke, awire aõbo ibinare aõbo. ³ Tahe Jesuisi tamyreny rirawyõnyre: —Aõrybe bede ywina-di Moisesi rierynanyre. ⁴ Tahe tiiboho Jesuisi-ò dirawyõnydenyde: —Tii rierynanyre iny tahãwyy ririkemy. Urile juhUU hãwyy bede erydÿÿna rybe tyyriti riwinykemy, idi tahe tahãwyy ririkemy. ⁵ Jesuisi tamyreny rarybere: —Õhõtityre dori Moisesi kia rybe bede ywina adee riwahinyre. ⁶ Juhu bedeu Deuxu riwinyre hãbu, hãwyy-wana.

⁷ Iurenana tahe hãbu tadibohosÿ-ribi ròhònymyhÿre tai roimyhÿre hãwyy-wana.

⁸ Hãbu inatyhy hãwyy-wana roimyhÿreu, sohoji tyhylemy radenymyhÿre.

Iny inatxi inymy aõkõ rÿimyhÿre, sohoji tyhylemy rÿimyhÿre.

⁹ Hãbu hãwyy-wana Deuxu ributunyreu, iny iwitxira wiribi ritòhòriarienyõtyhy. ¹⁰ Hetowo-ki tahe ierydÿÿna ritÿÿraxinyre kia rybe-ki. ¹¹ Jesuisi tamyreny rarybere: —Aõtxile hãbuõ tahãwyy ririkeki tahe ijõ-wana roiukeki, kia heka òtadu rare. ¹² Hãwyy tahãbu ririkeki tahe ijõ hãbu-wana roiukeki, kia heka wedena rare.

¹³ Tiiboho tamy didydenyde uladu tamy debò reakemy. Tahe ierydÿÿna riononymy rarybere tamy idyrenyõmykre.

¹⁴ Jesuisi kiamy robireu, rikyaranyre rarybere: —Txiò, ki-didyke uladu wadee. Uladu wese dori Deuxu Iòlòna rare.

¹⁵ Inatyhymy ararybekre: —Moõ heka uladuwesemy Deuxu Iòlòna ralòõkeki, kia heka Deuxu Iòlòna-ò ralòõtyhy. ¹⁶ Tahe Jesuisi rexiranyre uladu manamy taaxiò-ò rimyre. Tahe tebò iratyytyre ritidimy tamyreny rarybewihikÿre.

¹⁷ Tahe Jesuisi rydi raloreu, hãbuõ tamy reare. Tahe hãbu iko-txi resere tatiowotimy. Rarybere: —Erydÿÿdu wihikÿ, aõwexe ariwinykre biu-ò hena aritakremy tiiehyymy umywi-hikÿ-di ararekremy. ¹⁸ Jesuisi tamy rarybere: —Aõherekibo wihikÿmy wadee tarybeta. Hãbu awiõre. Deuxu sohojile tahe awire. ¹⁹ Bede ywina kai teeryte: rubudÿÿõmykemy, tule òta òtaõmykemy, wasiõmykemy, tule ruiõmykemy, iny wii itxenadÿÿõmykemy, adi bityhynykemy, boo tule. ²⁰ Hãbu tamy rarybere: —Erydÿÿdu, kia bede ywina rewinyhyylere, uladu-ule wiji-ò. ²¹ Jesuisi tamy retehere tuu reðarire tahe rarybere: —Kai sohoji aõmydÿÿnale aki nasiranyde. Kai makre, ibutumy aõna aõna-di bõhònykre, idi tahe idi biwahinykre iny aõkõ

mahādu-ò. Kia tahe aōmydŷŷnadikre biu-txi. Tahe manakre biwaheludunykre. ²² Kia rybe-ki heka hābu rabadewore. Rexitare ibedewomy urile iaōna aōna sōwetyhyreki.

²³ Jesuisi retehemy iwerura-di tahe rarybera taerydŷŷna-ò: —Kia iny iaōna aōna sōwemy rŷireri, tamy Deuxu Iòlòna-ò ralòke isirare. ²⁴ Ierydŷŷna mahādu bededeòtiinyrenyre irybe-ki. Jesuisi ixityre rarybere: —Waexiboho, isiratyhy rare Deuxu Iòlòna-ò ralòkemy. ²⁵ Kamelo tyyrorenawo-di ralòkemy isirakeki, kia-rihi isiratyhyre iny iaōna aōnadikeki ralòke Deuxu Iòlòna-ò. ²⁶ Tiiboho bedede ratiinyre sōwemy. Widee rarybere: —Mobo tahe iòraru-rihi iny ritakre. ²⁷ Jesuisi iwerora-di retehere tahe rarybera: —Inatyhymy kōaōboka hābu-ò isiratyhyre. Deuxu-ò tahe ibutumy aōna aōna isiraōre. ²⁸ Pedro rexiranyre rarybere: —Boholake, jiarŷboho ibutumy rerirenyra araheludunykremy. ²⁹ Jesuisi rarybere tamy: —Inatyhymy adeeremy ararybekre. Moō waluukeki, rybewihikŷluukeki, kia heka ririkre: heto, taseriōre, tyby tadi-wana, tariōre, tabede, ibutumy ririkre. ³⁰ Wijile itarasamy rarekre: 100 sŷmy, 100 seriōre, 100 tybyboho, 100 tadiboho, 100 tariōreboho, 100 tabede. Iny tamy rarybebinanykre tule. Ijō bedede kanakre tahe taumy tŷmyra-di tiemy rarekre. ³¹ Tahe sōwere juhu ludu ihewomy rōhònykre. Ihewo ludu ijō iko-ò rōhònykre.

³² Tiiboho rydi raòwònyrenyre Jerusalē hāwā-ò. Jesuisi heka rare ikorenymy. Ierydŷŷna mahādu bedede ribedeòtiinyre. Tiiboho Jesuisi riheludunymy ihewo-rihi. Tahe Jesuisi reraōmyhŷ idi rare waòinatxi reurò taerydŷŷna mahādu-wana. Tii relyyre ixityre aōbo ixidee kŷnyikremy. ³³ Boholabenyke inyboho roirenyreri Jerusalē-ò. Kowa, jiarŷ Deuxu Riōre Hābutyhyhykŷ, inyō riwawahinykre Deuxu aōmysŷdŷŷdu mahādu wedu-ò, bedede ywina erydŷŷ mahādu-ò. Kia warubudŷŷmy riwawahinykre tori-ò. ³⁴ Tiiboho kidiwalahikre. Watyre kanarybexinykre. Òhòte-di kidiwahātenykre. Idi tahe kidiwarubunykre inataō txu-di. Tahe rubu-rihi adexixakre.

³⁵ Joaō, ijō Txiau, wii Zebedeu riōre, tamy nade. Tahe rarybere: —Erydŷŷdu, kai aōma aō wadeeremy biwahinykre. ³⁶ Jesuisi rarybere: —Aōbohe jiarŷ adeeremy ariwahinykre. ³⁷ Tahe tamy rarybere: —Kai, aiòlònasŷ-ò kedehemynykreu, aruruwe-rihi aronykre, waseriōre ahywewe-rihi ronykre. ³⁸ Tahe Jesuisi rarybere: —Kaiboho teeryōlemahāte aōmybo textiòdenyteri. Kaiboho aōbohe wabemona-di biōbenyke idi Jerusalē-ò adiōkremy wahāredi. Kaiboho aōbohe wasebena-di mohōlebenyke idi jiarŷ anohōkremy wāhāredi. ³⁹ Tiiboho dirawyònyde: —Kohe tulekre. Jesuisi tamyreny rarybere: —

Bemona-di ariōkre kaiboho tule idi biōbenykre. Sebena-di jiarỹ adohōkremy, kaiboho tule idi mohōbenykre. ⁴⁰ Tahe mobo wabire ronykre ruruwe-ribi hywewe-ribi kia heka jiarỹle ariwahinyōkre. Kia tahe iyubudỹỹmy rỹreri Deuxule kidiwahinykremy. ⁴¹ Tai debòwiò erydỹỹna mahādu heka Joaō-ò, Txiau-ò tamyreny iky reare. ⁴² Jesuisi tamyreny ryryre tamy kanakemy, tahe rarybere: —Kaiboho teerytenyete toriweđu irurusōwe dire. Iny nihikỹ heka inymy deòdu luure. ⁴³ Jesuisi kiamy rarybere: —Kia wese tahe aworeny-ki aōkōkre. Kaiboho aōtxile mobo bōityhynyhykre, ijō iny deòdumy rarekre. ⁴⁴ Mobo juhutyhy rarelekre, deòdumy rarekre. ⁴⁵ Deuxu Riòre Hābutyhyhykỹ nade teòdu sōwekemy aōkō tahe ixilemy reòdunykeny. Nade taumy wahidỹỹmy sōwemy iny tarasamy.

⁴⁶ Idi tahe roire Ijeriò hāwā-ò. Jesuisi taerydỹỹna-wana iny sōwehekỹ-wana ròhònyrenyra. Tahe rahare Bartimeu ruetāhākỹ-ki. Bartimeu tahe Timeu riòre rare. Tii ronyre rywe-ribi aōna aōnamy rexitòenyneri. ⁴⁷ Tii roholare Jesuisi Nazare ludu kia rare tahe tamy ryryra: —Jesuisi, Davi riòre, wadee maruxetòekre. ⁴⁸ Sōwemy tamy rarybere: —Rybeōmyke. Tahe aōhe-wana tii rarybemyhỹre: —Davi riòre wadi mawotòeke. ⁴⁹ Jesuisi riyryre tahe rarybere: —Tamy byryke wadee kodoikemy. ⁵⁰ Tahe rexitareu rỹire, wylemy nade Jesuisi-ò. ⁵¹ Jesuisi tamy rarybere: —Aōmybo kai taruteri adee ariwahinykremy. Tahe hābu ruetāhākỹ tamy rarybere: —Wawedu, ixityre arobikremy. ⁵² Jesuisi tamy rarybere: —Makre, atyhydỹỹna kai arateytenyra. Kialehe rare. Aōwesele ixityre tii robire. Tahe Jesuisihemy rare, ryki.

11

¹ Jerusalē iòhòmý ritehemynyrenyreu, tahe inatxi taerydỹỹna riteònyra hāwā-ò. Inatxi hāwā-ò iòhòmý, Betabaji, Betỹnia-wana. Kia-ò Oliveira hāwālò roire. ² Jesuisi rarybere: —Kaiboho boikre kowa hāwā-ò. Kowa-ò birònykreu jumentinho mahabenykre. Moheka ityre rariaōlemy ratximyhỹre. Bieseke, wadee bididyke. ³ Inyō adeereny rarybekeki: —Aōhekremybo idi atxitenyteri. Tahe tamy marybebennykre: —Wanyrỹ tuu rurureri. Ixityre kaò kidiòkesedỹỹnykre. ⁴ Tahe hābu roire. Jumentinho ryro hetoijò-ki ritisanymy rỹimyhỹ. Tai riesere. ⁵ Kia hāwā mahādu rarybere: —Aōherekibo jumentinho kaiboho tetatenyta. ⁶ Tai tiiboho Jesuisi rybe tamy riwahinyra. Tai hāwā mahādu jumentinho riwahinyre. ⁷ Tahe ridyrenyrene jumentinho Jesuisi-ò. Tiiboho tatyreny ritidirenyre jumentinho tyremy. Tiiboho risỹnyrenyrene Jesuisi ityre-ò. ⁸ Ijōboho tahe horerule ritidire ryromy, ijō tahe tauwòhi ryromy ritidire ityre

rariakemy. ⁹⁻¹⁰ Ihewo ludu, iko ludu rawyhyrarònyreri, tule ryryreri: —Tii heka wowydyna rare. Tii heka Wanyrÿ niwesekey naderi. Wowydyna rare iny labie Davi Iòlòna. Kai Iòlòna kanakre. Wyhyrarò biu-txi kodoholakre.

¹¹ Kia wese Jesuisi ralore Jerusalè-ò. Dohodÿÿna heto-ò ralore, ibutumy retehere, idi tahe ròhònyre txiorotyhyreki. Tahe Betÿnia-ò roirenyre.

¹² Ijò txu biòwamy tahe Betÿnia-ribi rexitarenyreu tahe tii rama rahure. ¹³ Òwòru figueira rademy robirenyre irehe-ribi. Tahe tamy ritehemynyreu iraty-ki raharenyòlere, aòmyreki figueira raty bededÿÿnanamy aòkò bede rÿimyhÿre urenana. ¹⁴ Òwòru figueira-ò Jesuisi rarybere: —Tiu heka moò araty ritòòtyhy. Tahe ierydÿÿna roholare.

¹⁵ Tahe ritehemynyrenyre Jerusalè hãwã-ò. Tahe Jesuisi dohodÿÿna hetowo-ò ralore. Tahe kia-ribi aòna aòna-di ro-honymyhÿre mahãdu, òbradu mahãdu diteònyde. Tahe nieru wibydyÿdu mahãdu, òwòrubesedyÿ-di Jesuisi rehure. Bòtòe dinodu mahãdu rynana-di Jesuisi rehure. ¹⁶ Inyò heka ritxydyÿnyòlere dohodÿÿna hetowo-ki. ¹⁷ Rierynanymyhÿre tahe tamy rarybere: —Raridÿÿòlemy aòbo rÿireri:

Waheto kòaòboka inatyhymy ibutumy iny witxira witxira dee ixitòedÿÿna hetomy rÿirakre. Waheto tewinytenyete wasidu hetowesele.

¹⁸ Bede ywina erydyÿ mahãdu, Deuxu aòmÿsydyÿdu wedu mahãdu roholarenyreu, ròhòtinyrenyre: —Tìmybo inyboho Jesuisi rubudyÿmy rokiwisÿnykre. Tiiboho ruberumyhÿrenyre iny sòwemy dori bede riòtiinymyhÿ ibedeerydyÿnareny-ki.

¹⁹ Txioromy dehemynydeu, tiiboho rexitarenymyhÿre hãwãhãkÿ-ribi.

²⁰ Txu ròhòny-di, rehemynyrenyre òwòru figueira-ò. Tiiboho robirenyre rarubumy rÿireriò, taru-wana, tararoti-wana. ²¹ Pedro xixi-txi tòhòti reare tahe rarybere: —Erydyÿdu, betehe inihe aòma òwòru figueira rarubumy rÿire arybebina-di tamy tarybetaki. ²² Jesuisi dirawyònyde: —Kaiboho Deuxu bityhynymyhÿbeny. ²³ Inyò rarybekeki kaa bede ratòòhòkÿ-ki: —Kai myike, adi adehu rÿikre berohokÿ-ki. Tahe irybe heka kedelekre. Tai inyò rityhynykeki, tumy heka kedelekre. Tahe uritere iseòdyÿòmykre urile bityhynykre, irybe heka kedelekre. ²⁴ Iurenana adee ararybekre: —Aòtxile aò bexitòenykre, kia heka bitakre. Bityhynykeki, inatyhymy bitake. ²⁵ Kaiboho textitòenytenyteri wana aòbo inydee aky reamyhÿre kia biixãwididyÿnymyhÿke ratximyhÿre, Deuxu dori riixãwididyÿnyke aòrarureny-ribi. ²⁶ Kai iny witxira òraru biixãwididyÿnyòkeki, boo biu-ki ratximyhÿre aòraru riixãwididyÿnyòkre.

27 Tiiboho ixityre doide Jerusalē hāwā-ò. Riri-ranymyhÿrenyreu dohodÿÿna hetowo-ki, bede ywina erydÿÿ mahādu, Deuxu aōmysÿdÿÿdu wedu mahādu, matuari mahādu tamy doide. 28 Tiiboho tamy ritÿÿraxirenyre: —Mowe ateòdÿÿdu kia aōna aōnamy tatÿÿnymyhÿte. 29 Jesuisi dirawyònyde: —Adeereny tule araÿraxikre. Kaiboho bidiwawyònykeki, tahe jiarÿ akoreny ÿraxina arelyykre, aōrudibo aōna aōna rewinyumyhÿre. 30 Tahe Jesuisi ritÿÿraxinyre: —Ratysebedÿÿna, Joaō hōrō, kia heka tiribibo nade, biu-ribi ada hābu mahādu-ribi. Kia manarybeke. 31 Tiiboho widee rarybera: —Biu-ribi inyboho raryberenykeki, tai tii rarybekre: —Aōherekibo tahe tii tetyhnytenyòte. 32 Hābu-ribi inyboho raryberenykeki, iny aruberumyhÿrenykre. Ibutumy iny rityhnyre Joaō heka Deuxu rybedu raremyhÿ. 33 Tai tahe tiiboho raryberenyre: —Inyboho reeryòreny. Tai tahe Jesuisi rarybera: —Hebo, jiarÿ adee arelyyòtyhy modeòdÿÿdubo jiarÿ watrixiri.

12

1 Iribi tahe Jesuisi tamyreny ijyy-di rierynanÿmyhÿre: —Hābu uva oworuò wese ròbròre. Tahe riòtitynyre. Tahe hāloo riare oworuubetya-ki, ruÿdÿÿnymy. Tahe utò riwinyre. Idi tahe rihuòtere hābu mahādu-ò. Tahe rexitare tasÿ-ribi ijō bede-ò. 2 Tahe bederatysiredemy bededÿÿnana rehe-mynyreu, iwedu teòdu riteònyre bederaty ritakemy. 3 Huòtedu mahādu teòdu rinyreny, riheteny tahe riteònyre ixihyykemy. 4 Ixityre oworuwedu teòduò riteònyre. Kia heka irati riheteny ta tamy rawobinarybeny. 5 Ijō riteònyre. Kia heka rirubunyreny. 6 Tahe oworuwedu iriòre soho-jilere, tahe iluumy raremyhÿ ihewomy tii riteònyre. tahe wedu rarybere: —Wariòrele heka tiiboho rityhnyrenykre. 7 Kia huòtedu mahādu widee raryberenyre: —Kia heka wedu aōna aōna tarasadu rare. Rikirubunykre tahe iaōna aōna inydeerenykre. 8 Tahe rinyreny idi rirubunyre tahe idi rehurenny oworu-ribi. 9 Jesuisi ritÿÿraxinyre: —Aōhebo tahe oworuwedu rotÿÿnykre. Tii kodoikre huòtedu mahādu hudumy, tai tahe oworu riwahinykre inywitxira-ò. 10-11 Ritina-di aōbo tariaòletenyte kia ryberiti:

—Mana-di hetowidÿÿdu rehura. Kia mana heka hetohàtxi-ki ritidimy doide. Kia heka Wanyrÿ riwinyre kia iny ruereny dee aōna aōna nihikÿ rare.

12 Tai ijohonadu mahādu Jesuisi mynomy ratximyhÿ tii dori rieryre ixidee lau Jesuisi ijyymy relyymyhÿre. Tiiboho ruberurenny iny sōwehekÿ lau. Tahe rexitarenny, rexixāwidinyre.

13 Idi riteònyrenyrene Lahi rybe-di erydÿÿdu mahãdu, Herodi mahãdu-wana tamy imynamy irybe-ki. 14 Tiiboho rarybere Jesuisi-ò: —Erydÿÿdu, jiarÿboho araerymy adi watxiwãhãrenyrene kai inatyhy hãbu tate. Iny ibutumy adee wiwese wiweselere. Inatyhymy iny-ò Deuxurymy teerynanymahãte. Tahe tiiboho ritÿÿraxinyrenyrene: —Awire aõbo ada ibinare aõbo nieru rawahinymyhÿre bede dinodu-ò. 15 Timybo tahe, rikiòwyny aõbo ada aõkõre aõbo. Jesuisi rierymyhÿre tõhõtinanareny, tahe ritÿÿraxinyra: —Aõherekibo kaiboho tiwaurihitenyteri. Wadee womati nieruõ bidiwy waitxerenamy. 16 Tahe tamy diwydenyde. Tahe tii ixityre ritÿÿraxinyra: —Kawe moõ tyytarasana rare, katahe moõ tyyritina rare. Tiiboho dirawyònyde: —Kiahe bede dinoduhõrõ rare. 17 Jesuisi rarybere: —Hÿdebo, bede dinoduhõrõ tahe tamy biwahinybeny tule tahe Deuxu aõna aõnahõrõ tamy biwahinybeny. Tiiboho bede riòtiinyrenyrene.

18 Saduseu mahãdu tamy nade. Kia heka iny rubu-ribi rexixamy aõkõre-riki rierynanymyhÿre. Tiiboho ritÿÿraxinyrene Jesuisi: 19 —Erydÿÿdu, Moisesi raritinyra bede ywina-di: —Hãbuõ rurukeki, tahãwyy iriõre ijõdiõkeki, tahe kia hãwyy tahãbu seriõre-wana roike. Iriõredikre taseriõre rubuòwymy roikre. 20 Seriõre debòinatxi reurõmy raremyhÿ. Juhuu ijõ roire hãwyy-wana. Tahe tii rurure iriõreõlemy. 21 Tahe ihewo ludu iseriõre wytese-wana roire. Tii rurure iriõreõlemy. 22 Ihewoludutyhy tule ibutumy roire wytese-wana, tahe ituerenyrene iriõreõlemy. Iròòbymy tahe hãwyy tule rurure. 23 Ixixanau tahe mohãbubo tuu rarekre. Ibutumy dori wytese-wana roire. 24 Tai tahe Jesuisi tamyreny rarybere: —Kaki kaiboho teòsamy toite aõma ritina teeryòtenyteki. Tule Deuxururu teeryòtenyete. 25 Ixixanau heka moõ roiõtyhy. Ibutumy iny ÿju wese rarekre biu bede-txi. 26 Kaiboho aõbo tatyyritinytenyõta iny rubu-ribi kedexixakremy. Kia heka raritinyrny rÿire Moisesi tyyriti-ki, òwòrusõmo ijyy-ki rÿimyhÿ. Iwese Deuxu rarybere Moisesi-ò: —Jiarÿ heka Abraõ Deuxu rare. Ijai Deuxu rare. Ijaò Deuxu jiarÿ rare. 27 Jiarÿ heka rubu mahãdu Deuxu aõkõ rare, tahe iru mahãdu Deuxu jiarÿ rare. Kaiboho teòsamy toite.

28 Bede ywina erydÿÿ mahãduõ nade ijohonamy. Tahe tiiboho widee raryberenyry roholareu, Jesuisi tamyreny ri-rawyònywihikÿreu, tahe tii Jesuisi-ò ritÿÿraxinyrene: —Tibo rybe bede ywina juhuure. 29 Jesuisi ri-rawyònyrene: —Ka heka juhu ludu rare: —Boholake Israeli mahãdu, judeu ijoi mahãdu wahe. Wanyrÿ, iny Deuxu sohojile rare. 30 Kia aDeuxu luuke ibutumy awo-ribi, aumytytyby-ribi, ibutumy aruru-ribi. 31 Ka heka ihewo ludu rare: —Kai abireluduluuke iwese

ixiluuke wese. Ijõ bede ywina heka ka ratyreõre. ³² Tahe Bede ywina erydÿÿ mahãduõ rarybere: —Inatyhymy kai tary-beta. Deuxu heka sohojile ratximyhÿre. ³³ Ibutumy awo-ribi iluukemy. Ibutumy aruru-wana iluukemy. Tule ibutumy aeryna-wana iluukemy. Iwese kai ixiluure wese, abire ludu mahãdu luukemy. Kia heka ibutumy iròduxiwelo ratyre rare. Ibutumy wahidÿÿnaloodÿÿna ratyre rare. ³⁴ Jesuisi rieryre kia hãbu rirawyõnywihikÿre tai tamy rarybere: —Kai heka Deuxu Iòlõna-ribi irehemy aõkõ. Tai tahe ibutumy ilau ruberure tÿÿraxidÿÿki.

³⁵ Jesuisi dohodÿÿna heto-ki rierynanymyhÿreu, rarybere: —Tymybo Bede ywina erydÿÿ mahãdu rarybemyhÿre Kristu Davi riõre raremy. ³⁶ Davi rarybere aõmybo Deuxu Tyyty-bytyhy tamy narybedemy: —Wanyrÿ rarybere Wanyrÿ-ò: —Bodony warurunawe-ribi. Txiõhe rare, aõludu awarawo-txi aritidikre. ³⁷ Tahe Davile Wanyrÿ rininire. Tymybo tahe Davi iriõremykre. Tahe iny sõwemy deysana-di roholarenymy.

³⁸ Tii rierynamyhÿreu, rarybera: —Bexiemyhÿbeny bede ywina erydÿÿ mahãdu lau. Tiiboho heka tyyrehe-di riraluurenyre. Tiiboho heka rybedÿÿlluurenyre hãwãhãkÿ riranaki. ³⁹ Dohodÿÿna heto-ki juhurnana luurenyre. Tule ta anarÿÿ rÿiwana, juhu ryanadile tamyreny awire. ⁴⁰ Tiiboho tule wytese urimynydu aõna aõna ritarenymy. Ixitòedÿÿna rehehekÿ rexitòenymyhÿrenymy. Tiiboho heka aõnihikÿmy aõhõkÿmy dÿÿnana riõwynyrenymy.

⁴¹ Jesuisi retehemy rÿimyhÿ dohodÿÿna heto nieruhyna ratya-txi. Tii retehere tymybo iny sõwemy tanieru-di tamy rehumyhÿ. Tahe ityhynihikÿ tamy sõwemy nieru-di rehure. ⁴² Tahe nade wytese iaõkõdu mahãduõ tii rare. Tii inatxi nieru sõmo-di rehure. Tanieru tahe nierukonana rare. ⁴³ Jesuisi ryryre taerydÿÿna-ò: —Inatyhymy adee araybekre. Kowa heka wytese nieru-di rehure ibutumy iny witxira ratyre. ⁴⁴ Kaa mahãdu ibutumy nieru-di rehure rauhenyredile. Tahe wytese idi rehure ibutumy tanieru-di rexihumy taumy-ribi idi rehure.

13

¹ Dohodÿÿna heto-ribi ròhõnyreu, ierydÿÿna tamy rarybere: —Erydÿÿdu, beteheke inihe mana nihikÿ-ò, hetohokÿ-ò. ² Jesuisi rirawyõnyre rarybere: —Kaiboho betehebemykre heto nihikÿ-ò. Kia heka mana ijõ wityre-ki rÿiõtyhy, ibutumy heka kedejuxunymy.

³ Oliveira bederatòòhòkÿ-ki tii ronyreu dohodÿÿna hetoko-txi, tahe Pedro, Txiau, Joaõ, ibutumy tamy doide rÿÿraximy iny-ribi irehemy. ⁴ Wakoreny bedelyyke, tiubo

kia kŷnyikre. Ibutumy aōna aōna kŷnyikre wana tibo iny bedeerynyrenykre. ⁵ Jesuisi rexiranyre tamyreny rarybere: —Kaiboho anaitxenanydenyheny lau bexiebenyke. ⁶ Sōwemy dori roikre wanimy rarybemy rarekre: —Jiarŷ dori Kristu rare. Tahe iny sōwemy anaitxenanykre. ⁷ Kaiboho wounarybe-ò, aōbinarybe-ò, boholakreu, breburenyōmykre. Kia heka kanakremy ratximyhŷre. Urile bededŷŷnana ikonanamy aōkōhyylemyhŷre. ⁸ Uritere inylahinarenny, ijōlahinarenny-wana wii kidiaōbinanykre. Tule iòlòna mahādu ijō iòlòna mahādu-wana wii kidiaōbinanykre. Bede bedesu ijō hāwā-ki kanamytatakre. Tahe aōkōre rama kedeakre. Kia heka juhu aōhōkŷmydŷŷnana rarekre.

⁹ Kai bexiekre anamydenyheny lau. Tiiboho anawahinydenykre aōludu wedu-ò, iòlò-ò. Tiiboho anahatenydenykre dohodŷŷna hetowo-ki. Kiabohoko-txi wadee kaiboho kedelyykre inatyhymy aōna aōna rŷiremy. ¹⁰ Rybewihikŷ juhū ibutumy bede hāwā hāwā-ò kidityndŷŷnykre. ¹¹ Tiubo aradyrenykeu, urile nohōtiōmy aōbo kaiboho marybebemykre. Kiautyhyle aōmybo rarybekremy bierykre. Kia tahe marybekre. Kai dori aōkō tarybemahāte, Deuxu Tyytybytyhy tahe rarybemyhŷre. ¹² Seriòre seriòrele wii kidirubunykre. Tyby heka tariòre kidirubunykre. Uladule tadi, tyby kidirubunykre. ¹³ Ibutumy heka iny iy kedeakre wani òraru-ki. Kia heka ikonana-ò riijekreu, taumy tarasanakre.

¹⁴ Aōna aōna binahakŷ kanakreu, ibutumy rahukemy. Tiiboho kanakeu itxinonana-txi aōkō rarekemy, kaiboho mahenybenykre bederatòhòkŷ-ò, Judeia hāwā hāwā-ki ratxikeki, mahenybenykre. ¹⁵ Inyō hetotyre-ki ratxikeki, urile ròteōmy aōna aōna wydysymy. ¹⁶ Inyō bedero-ki ratxirekeki, uritere òkeseōmy ty òrysymy. ¹⁷ Kobexeheny hāwyy bòtòmy rŷira, tule hāwyy tariòre ritònymy rŷira. ¹⁸ Bexitòenykre kia kanaheny bededŷŷnana sirau. ¹⁹ Aōhōkŷmydŷŷnana kanakre tiu heka tuuòre. Juhule Deuxu bede riwinyreule wiji tuu yrubule bede roimyhŷre. Tiu heka kiamy bede roiōtyhy aōhōkŷmydŷŷnanamy. ²⁰ Deuxu bede iòhōmy rirawetyyòròkeki, moheka irumy ròhònyōtyhy. ²¹ Inyō adee rarybekeki: —Kaki heka Kristu ratxireri. Kowa-ki ratxireri. Uritere ityhydŷŷōmy. ²² Sōwemy Kristu kanakre, urile Kristu inatyhy aōkō rarekre. Tule Deuxu rybedŷŷdu kanakre. Kia Deuxu rybedŷŷdu inatyhy aōkō rarekre. Tiiboho heka bedeòby riwinykre tule bede eryna. Deuxu hōrō riitxenanykemy inatyhymy kōaōboka. ²³ Kaiboho warybe biyrubunykre. Adee ibutumy juhuule reòbitinyre.

²⁴ Idi webòhòna rŷira txuu, aōhōkŷmydŷŷnana itue-di,

txuu heka rurunykre. Ahãdu tule rurunykre.

²⁵ Taina heka kedejuxunykre biu-ribi. Biururu
raðweðwenykre.

²⁶ Iny retehekre Deuxu Riòre dehemynyna-di. Biurawe-
tyky-ribi kodobehekre. Kia heka lobixina kanabòðranykre.

²⁷ Tahe taÿju kiditeðnykre tawedu ijoihõrõ butudÿÿmy.

Kidibutunykre ibutu bede bede konana-ribi, tule ibutu biuko-
nana-ribi.

²⁸ Tahe figueira òwòru-ribi erydÿÿna bierybenykre. Tahe
iruru raixinykreu tahe, txiru ròhònykreu, tai tahe biery-
benykre wyra iòhòneri. ²⁹ Tule kia aõna aõnamy bobibenykreu,
tii iòhòlereri. Ijòkile wese nyide. ³⁰ Inatyhymy adee arary-
bekre, kia wijinabòdu itueðtyhy aõna aõna rÿikre hãrele. ³¹ Biu,
bede-wana ituekre, tahe warybe itueðtyhy. ³² Moõ heka ri-
eryðtyhy tiubededÿÿnanamybo tii kòdòðsekre. Tule ÿju biutxile
rieryðre. Tule iriòre rieryðre. Tule tyby sohojile rierye.

³³ Kaiboho bexieke, beteheke. Kai dori teeryðtenyte tiube-
dedÿÿnanamybo kòdòðsekre. ³⁴ Kedehemynykremy dori iwese
hãbu tÿimy rarewese tii rexitareu, ririre tadeòdu. Tadeòdulemy
tule ridyre itxeredu retehemyhÿkemy. ³⁵ Tahe betehe in-
ihe teeryðteri dori tiubo kanakre heto wedu, txioromy ada
ruwetya aõbo, ada hãnie hãbu rryry-di aõbo, ada txумы aõbo.
³⁶ Betehe inihe iny araraòòlemy tii rehemynyreri aki rahakre
atÿi-ò. ³⁷ Aõna aõnamy jiarÿ rarybemyhÿre, rarybera ibutu-ò:
—Biijebeny.

14

¹ Kia-ribi inatxi txумы riuhenyмы ratxireri anarÿÿ
kodohònykremy. Kia anarÿÿ wehityhynamy heka iny ratya-di
reare. Tule orotxu anarÿÿ kia ròhònyre. Tule Deuxu
aõmysÿdÿÿdu wedu mahãdu tule bede erydÿÿdu mahãdu
Jesuisi rimykemy ratxireri idi rirubunykemy. ² Tiiboho
rarybemyhÿrenyre: —Kiahe aõkõre anarÿÿ rÿireriu, iny sòwemy
inydeereny kana aõbinanyheny.

³ Jesuisi Betÿnia hãwã-ki ratximyhÿu, Simaõ tyybina
heto-ki ratximyhÿre. Jesuisi òwòru besedÿÿbire-ki roimyhÿ.
Tahe hãwyy aderòna òwynihikÿ-di lÿnyrena wihikÿ-di nade.
Tai ihyna riwebòhònyra tahe Jesuisi ratityre-ò ritxiwira.

⁴ Inyõreny rexiykaranyke. Tahe widee rarybera: —
Aõherekibo aderòna rahura. ⁵ Inywitxira tahe iòwynykewi
sòwemy nierумы kia-ò. Kia nieru-di tahe iny aõkõdu-ò
rawahidÿÿnykre. Tahe tiiboho rexibynyreri hãwyy dee. ⁶ Tahe
Jesuisi rarybere: —Txìðhe rare, uritere ixibyðÿÿðomyke. Tii
heka aõwihikÿbo wadee riwinyra. ⁷ Kiamy aõu aõu iny aõkõdu
rÿikremy. Aõule heka tamy aõwihikÿ biwinybenyke. Jiarÿ

tahe, aki aõu aõu aõkõlekre. ⁸ Tii heka rexikonanany my ròwidỹyre. Aderòna-di watyre ritxiwire wabede-ò jiarỹ raõule. ⁹ Inatyhymy adeereny ararybekre. Aõtxile Deuxu Rybewihikỹ iny relyykre. Kia-ò kahãwyy ijyymy relyykre, ibutumy iny idi rõhõtinkyremy aõbo riwinyredi.

¹⁰ Tahe Judasi Isariò Deuxu aõmysỹdỹỹdu-ò rara Jesu-isi tamy rawahidỹỹkemy. ¹¹ Tiiboho tamy roholarenyre, reysare. Tahe tamy nieru riwahinykemy riurenanyre. Tahe Judasi riijemyhỹre aõu aõu bedewihikỹ tamyreny riwahidỹỹnykemy.

¹² Juhu orotxu anarỹỹtxure budoeni xiweloo rirubuny rahudi tahe Jesu-isi erydỹỹna mahãdu tamy rarybere: —Titxibo anarỹỹ rỹsỹnamy biroxikemy atxiteri. Jiarỹboho kowa-ò aroikre. ¹³ Tahe Jesu-isi tamy rarybere: —Kaiboho boikre hãwãhãkỹ-ò. Tahe hãbu-wana wii biòbonykre butxi-di riwyreriò. Tahe tii biheludunibeny. ¹⁴ Aõtxile hetoõ-txi ralòke, kaiboho marybebenyke hetowedu-ò: —Waerydỹỹdu rarybera: —Titxiwexe anarỹỹ rỹsỹna arirỹsỹkre waerydỹỹna-wana. ¹⁵ Tii heka adee kiditeòsinykre hetowowitziraõ biu-txi. Ibutumy rexihumy rỹire inydeereny. Kowa rỹsỹna inydeereny biywinykre. ¹⁶ Tahe ierydỹỹna rexitare. Roire hãwãhãkỹ-ò. Tahe ròhònyre iwese Jesu-isi relyyre wese. Tahe ibutumy rexihurenyre anarỹỹ-ò.

¹⁷ Txiorou Jesu-isi nade taerydỹỹna waòinatxi reurò-wana. ¹⁸ Tiiboho òworubesedỹỹ riroximahãu, Jesu-isi rarybere: —Kaiboho wawana teroxitenyteri sohojiõ biwawahinykre. ¹⁹ Tahe urihimyo rexiranyre rabadewomy. Tahe widee raryberenyre: —Jiarỹle heka ariwahinykre. ²⁰ Tii rirawyònyre: —Kaiboho, waòinatxi reurò mahãdu sohojiõ. Kia mahãduõ orotxu-di wawana rebenymyhỹ besero-ki. ²¹ Inatyhymy Deuxu Riòre Hãbutyhyhykỹ rakre iwese iritina rỹirewesele. Kobexeheny kowa hãbu heka kidiwahinykre. Tamy iny awire kedeãõlede.

²² Tiiboho riroxireriu, Jesu-isi orotxu rimiry, raorore, rexitònyre, tahe tamyreny riwahinyre. Rarybere: —Ãhãxe, kia heka waumy wese rare. ²³ Tahe vỹhynamona rimiry, rexitònyre, tahe tamyreny riwahinyre. Ibutumy ibute bute iribi tuu riòrenyre. ²⁴ Tamyreny rarybere: —Kia wãhãlubu wese rare. Kia hãlubu heka rybe tỹmyra ywidỹỹna hãlubu rare. Kia inyboho kidinohõtijuadenykre. Wahãlubu heka kedejuxunykre iny rabòrònihikỹ dee. ²⁵ Inatyhymy ararybekre: —Ariõõtỹhy heka òtetibederatyrube tỹmyra ihyy tahe tiutxumybo Deuxu Iòlõna-ki ariòkre.

²⁶ Deuxuwimy rawinyrenyre, tahe rexitarenyre Oliveira bederatòhòkỹ-ò.

²⁷ Jesuisi tamyreny rarybere: —Kaiboho ibutumy wijirumy biwaribenykre. Kia heka iritina rỹire.

Itxeredu tahe riròrenykeki, budoeni rahenykre.

²⁸ Tahe rubu-ribi adexixakreu, arakre akomy Kalileia-ò.

²⁹ Pedro rarybera Jesuisi-ò: —Ibutumy ararikeki, arariòtyhy.

³⁰ Jesuisi tamy rarybera: —Inatyhymy ararybekre. Wijirumy hãniehãbu inatxi kydrykreule, kai iny witxira-ò biwatxiõnykre inataõ bedemy. ³¹ Tahe Pedro rarybera tarurutyhymy: —Aõkõre, aratxiõnyõtyhy, ihãrele tahe awanale arurukre. Ijõ mahãdu tule kia wese rarybera.

³² Tahe roire Kesemani hãwãmy ninadu-ò. Taerydỹyna-ò rarybera: —Biwaraòmý bonykre kakile. Kowa-ò arexitòenykre. ³³ Tii ridyrenyre Pedro, Txiau, Joaõ-wana. Jesuisi rexiranyre rabadewomy ihyy rexitòenyre. ³⁴ Tahe tamy rarybera: —Watyytyby heka rabadewomy ratxireri rubuhyy-ò. Kaki bonykre biijemy. ³⁵ Tahe iko-txi urihimýò rareu, resere. Rexitòenyre: —Waha, adee arexitòenykre. Adee awikeki, kia òraule tiu waròteõna. ³⁶ Tii rarybere: —Waha, adee ibutumy isiraõre. Kia bemona inyhe waròbi bitake inihe. Tahe wadeewi wadeewi-ki aõkõ watxireri, tahe adeewi-ki. ³⁷ Tii rehemynyre tai rahare ròròrenymy roireriò. Rarybere Pedro-ò: —Simaõ, Tarõteri aõbo. Biijeõtyhy sohoji òramy bededỹynana. ³⁸ Biijebenykre, bexitòenykre, uritere rutaanamy ròteõmykre inatyhymy atyytyby irurudire tahe ade iruruõre. ³⁹ Tahe Jesuisi ixityre rare rexitòenyre ixiwesele. ⁴⁰ Ròòsereu, ijõ-ki rahare ròròmy ixiwesele, irurureny rautxienymyhỹ dori. Tiiboho rierykõre idi rirawyònyrenyre. ⁴¹ Tahe ixbyyle ròòsere tahe rarybere: —Morõbeny bexielehynybeny. Òra iòhòreri. Kia heka Deuxu Riòre Hãbutyhyhykỹ kanawahidỹỹkre òrarudu mahãdu-ò. ⁴² Bitỹmynybenyke, rokoireny, walòsedỹỹdu iòhòmý rareri.

⁴³ Tii rarybereriu, aõwesele Judasi nade. Kia heka waòinatxi reurò mahãduõ rare. Tii-wana doide hãbu mahãdu mayrehe-di, òhòtemy debõna. Kia heka hãbu mahãdu doide matuari mahãdu-ribi, Bede ywina erydỹỹ mahãdu-ribi, Deuxu aõmysỹdỹỹdu wedu-ribi. ⁴⁴ Lòsedu tamyreny juhúu bede eryna riwahinyre. Kawese heka rarybere: —Kowa heka inyõ-ò aruwokre, tii heka hãbu rare. Bimybenykre, birarenybenywhikỹkre. ⁴⁵ Judasi rehemynyrenyreu, tahe rarybere: —Wedu, wedu. Tahe tamy ruwore. ⁴⁶ Juda ijoi Jesuisi rinyra. ⁴⁷ Kia ijoiõ mayrehe ritare tahe Deuxu aõmysỹdỹỹdu wedu deòdu nohòti riorore. ⁴⁸ Tahe Jesuisi dirawyònyde: —Kaiboho mayrehe-di tiwaòrynyteri wasidu-wesemy aõmy, òhòte-di. ⁴⁹ Jiarỹ tahe dohodỹỹna heto-ki watximyhỹ txuõ txuõlemy adeereny

araerynanywãhãdenyde. Kowa-ki heka tiwamyõlemyhÿtenyde. Tahe aõbo iritina-ki rÿireri, kia heka kÿnyikremy. ⁵⁰ Ibutumy ierydÿÿna mahãdu ririrenyre, rihenyrenyde.

⁵¹ Kia heka hãbuõ riheludunymyÿ tyy tayredile rexi-tyynymy tiiboho ridyrenyde. ⁵² Tii tahe tyy ririre tahe rahenyre tadelemy.

⁵³ Deuxu aõmysÿdÿÿdu wedu-ò tiiboho Jesuisi ridyde. Bede ywina erydÿÿ mahãdu, matuari mahãdu-wana ributunyre.

⁵⁴ Pedro riheludunyre irehetyhytyhymy. Rehemynyre Deuxu aõmysÿdÿÿdu wedu heto-ò. Tai tahe ixitõteenymy heòtywera-ò rorukumyÿ heto itxeredu mahãdu-wana. ⁵⁵ Deuxu aõmysÿdÿÿdu mahãdu wedu, tule dohodÿÿdu mahãdu alobixidu riijemyhÿre aõlemy Jesuisi òludu relyymyÿre,

Kia òraru-ki rirubunynyky. Rahaõre. ⁵⁶ Sõwemy iny ruimy relyymy rÿimyhÿ. Iruinarenymy wiribi hitxi hitxilera.

⁵⁷ Ijõ mahãdu rÿimyhÿre relyyrehãre ruimy rarybere: ⁵⁸ — Inyboho irybe-ò roholarenymy: Jiarÿ heka dohodÿÿna heto ariixãwididÿÿnykre kia heka hãbu iwidÿÿna rare. Txu inataõ-di ijõ ariwinykre iwidÿÿnaweseõre. ⁵⁹ Kia heka aõmybo tuu relyyrenyremy irybe wiribi hitxi hitxire.

⁶⁰ Deuxu aõmysÿdÿÿdu mahãdu rÿire inysõwetya-txi. Tii Jesuisi ritÿÿraxinyre: —Kai aõbo biwarawyõnykre aõmybo relyyrenyreri adee òludumy. ⁶¹ Tii rerawyõnyõlere ixyby tahe Deuxu aõmysÿdÿÿdu mahãdu ritÿÿraxinyre: —Kai aõbo Kristu tate, Deuxu wityhy riõre. ⁶² Jesuisi rarybera: —Jiarÿ heka. Kaiboho betehebenykre

Deuxu Riõre Hãbutyhyhykÿ Deuxu rurunaweribi-ò ronyreri. Kaiboho tii betehebenykre Deuxu Riõre Hãbutyhyhykÿ biuwetyky-ribi naderi.

⁶³ Deuxu aõmysÿdÿÿdu wedu ityy riykara idi rarybera: — Aõherekibo ijõ alobixidumy iny rururenyreri. ⁶⁴ Kaiboho taholatenyta aõbina binalemy rarybereriõ aõmybohe kaiboho tahõtinymyÿtenyde. Ibutumy heka tawo riraõhõrerenyru budukremy. ⁶⁵ Tahe ijõ ityre rybeximymy rarutaara rexiruehetynyre tahe tule rihetenyre. Tahe rarybere: —Mota làhã arahãtenyru. Idi tahe heto itxeredu tule rihetenyre.

⁶⁶ Pedro heka ratximyhÿ bedeube-ki tahe ijadõma dehemynyde, Deuxu aõmysÿdÿÿdu deòdu. ⁶⁷ Pedro rexitõteenymyÿ heòtywera-ò tahe ijadõma tamy retehere. Tahe rarybera: —Kai tule Jesuisi Nazare ludu-wana atximahãte. ⁶⁸ Tahe tii rexitxiõnyre: —Jiarÿ reeryõre aõmybo kai tarybeteri. Tahe Pedro hetowo-ribi rònõnyre. ⁶⁹ Ijadõma ixyby ixyby itxeremy rarybere kowa ijoï-ò: —Kowa heka tii mahãduõ rare. ⁷⁰ Tahe tii ixityre rexitxiõnyre. Ixybyle kowa ijoïõ Pedro-ò rarybera: —Inatyhymy kai ijõ mahãduõle tate.

⁶³ Deuxu aõmysÿdÿÿdu wedu ityy riykara idi rarybera: — Aõherekibo ijõ alobixidumy iny rururenyreri. ⁶⁴ Kaiboho taholatenyta aõbina binalemy rarybereriõ aõmybohe kaiboho tahõtinymyÿtenyde. Ibutumy heka tawo riraõhõrerenyru budukremy. ⁶⁵ Tahe ijõ ityre rybeximymy rarutaara rexiruehetynyre tahe tule rihetenyre. Tahe rarybere: —Mota làhã arahãtenyru. Idi tahe heto itxeredu tule rihetenyre.

⁶⁶ Pedro heka ratximyhÿ bedeube-ki tahe ijadõma dehemynyde, Deuxu aõmysÿdÿÿdu deòdu. ⁶⁷ Pedro rexitõteenymyÿ heòtywera-ò tahe ijadõma tamy retehere. Tahe rarybera: —Kai tule Jesuisi Nazare ludu-wana atximahãte. ⁶⁸ Tahe tii rexitxiõnyre: —Jiarÿ reeryõre aõmybo kai tarybeteri. Tahe Pedro hetowo-ribi rònõnyre. ⁶⁹ Ijadõma ixyby ixyby itxeremy rarybere kowa ijoï-ò: —Kowa heka tii mahãduõ rare. ⁷⁰ Tahe tii ixityre rexitxiõnyre. Ixybyle kowa ijoïõ Pedro-ò rarybera: —Inatyhymy kai ijõ mahãduõle tate.

⁶⁶ Pedro heka ratximyhÿ bedeube-ki tahe ijadõma dehemynyde, Deuxu aõmysÿdÿÿdu deòdu. ⁶⁷ Pedro rexitõteenymyÿ heòtywera-ò tahe ijadõma tamy retehere. Tahe rarybera: —Kai tule Jesuisi Nazare ludu-wana atximahãte. ⁶⁸ Tahe tii rexitxiõnyre: —Jiarÿ reeryõre aõmybo kai tarybeteri. Tahe Pedro hetowo-ribi rònõnyre. ⁶⁹ Ijadõma ixyby ixyby itxeremy rarybere kowa ijoï-ò: —Kowa heka tii mahãduõ rare. ⁷⁰ Tahe tii ixityre rexitxiõnyre. Ixybyle kowa ijoïõ Pedro-ò rarybera: —Inatyhymy kai ijõ mahãduõle tate.

⁶⁶ Pedro heka ratximyhÿ bedeube-ki tahe ijadõma dehemynyde, Deuxu aõmysÿdÿÿdu deòdu. ⁶⁷ Pedro rexitõteenymyÿ heòtywera-ò tahe ijadõma tamy retehere. Tahe rarybera: —Kai tule Jesuisi Nazare ludu-wana atximahãte. ⁶⁸ Tahe tii rexitxiõnyre: —Jiarÿ reeryõre aõmybo kai tarybeteri. Tahe Pedro hetowo-ribi rònõnyre. ⁶⁹ Ijadõma ixyby ixyby itxeremy rarybere kowa ijoï-ò: —Kowa heka tii mahãduõ rare. ⁷⁰ Tahe tii ixityre rexitxiõnyre. Ixybyle kowa ijoïõ Pedro-ò rarybera: —Inatyhymy kai ijõ mahãduõle tate.

⁶⁶ Pedro heka ratximyhÿ bedeube-ki tahe ijadõma dehemynyde, Deuxu aõmysÿdÿÿdu deòdu. ⁶⁷ Pedro rexitõteenymyÿ heòtywera-ò tahe ijadõma tamy retehere. Tahe rarybera: —Kai tule Jesuisi Nazare ludu-wana atximahãte. ⁶⁸ Tahe tii rexitxiõnyre: —Jiarÿ reeryõre aõmybo kai tarybeteri. Tahe Pedro hetowo-ribi rònõnyre. ⁶⁹ Ijadõma ixyby ixyby itxeremy rarybere kowa ijoï-ò: —Kowa heka tii mahãduõ rare. ⁷⁰ Tahe tii ixityre rexitxiõnyre. Ixybyle kowa ijoïõ Pedro-ò rarybera: —Inatyhymy kai ijõ mahãduõle tate.

⁶⁶ Pedro heka ratximyhÿ bedeube-ki tahe ijadõma dehemynyde, Deuxu aõmysÿdÿÿdu deòdu. ⁶⁷ Pedro rexitõteenymyÿ heòtywera-ò tahe ijadõma tamy retehere. Tahe rarybera: —Kai tule Jesuisi Nazare ludu-wana atximahãte. ⁶⁸ Tahe tii rexitxiõnyre: —Jiarÿ reeryõre aõmybo kai tarybeteri. Tahe Pedro hetowo-ribi rònõnyre. ⁶⁹ Ijadõma ixyby ixyby itxeremy rarybere kowa ijoï-ò: —Kowa heka tii mahãduõ rare. ⁷⁰ Tahe tii ixityre rexitxiõnyre. Ixybyle kowa ijoïõ Pedro-ò rarybera: —Inatyhymy kai ijõ mahãduõle tate.

Kai dori Kalileia mahādu tate. ⁷¹ Tii inatyhytyhyrybemy rarybera: —Jiarỹ reerykõre hābumy tarybetenyeri. ⁷² Tahe hānie hābu ryryra, inatxi hewoludumy. Ta Jesuisi rybe-txi Pedro tōhōti reare. Iwese Jesuisi rarybere: —Inatxi hānie ryrykredi, ihewoludukomy ryrykre, wadee bedexitxiōnykre inataōmy. Pedro tahe iribi rexitareu, rahinyre.

15

¹ Txuu reareu, Deuxu aōmysỹdỹỹdu wedu, matuari mahādu, Bede ywina erydỹỹ mahādu ibutumy ributumy. Tahe Jesuisi ritaataare tahe ridyrenyre Pilato-ò. ² Pilato Jesuisi-ò ritỹỹraxinyre: —Kai aōbo judeu iòlò tate. Tii rirawyònyre: —Kai ka tuu tarybeta. ³ Deuxu aōmysỹdỹỹdu mahādu wedu rarybere Jesuisi aōna aōna awimy aōkõ riwinyre. Tahe Jesuisi riwawyònyōhyllere. ⁴ Pilato ixybyle rỹỹraxire: —Kai birawyònyōtyhy aōbo. Kai aōbo taholaleteri aōmybo tiiboho autedé-ò raryberenyre. ⁵ Tahe Jesuisi rarybeōhyllere tahe Pilato urile bede riòtiinymyhỹre.

⁶ Kia heka juhū iny deòwarixina rare hābu ròteduō ritakemy anarỹỹtxuu. Aōtxile iny tamy rexitòenyke. ⁷ Ròtenawo-ki raremyhỹ inyō Barabamy ninadu-ki. Tii tahe inywitzira aōbinadu mahādu-wana ratximyhỹ. Kiamy inydinodu òraru-ki aōbina rỹireki, tii iny rirubunyre. ⁸ Iny sōwehekyky-ki doide, tahe rexiranyre ixitòedỹỹmy: iny deòwarixina kòdòhònykre. ⁹ Pilato dirawyònyde: —Adeereny ariòlòdỹỹnykekõ aōbo ka judeu iòlò. ¹⁰ Tii rieryre dori Deuxu aōmysỹdỹỹdu mahādu wedu tamy Jesuisi ridyrenyre iwobinanareny lau. ¹¹ Deuxu aōmysỹdỹỹdu wedu inysōwe riixitòedỹỹnyre Baraba riòlòdỹỹnykemy. ¹² Pilato ritỹỹraxinyre ixybyle: —Aōhebo tahe idi arotỹỹnykre. Kaiboho tuu teninimyhỹtenyete judeu iòlòmy. ¹³ Tiiboho rirajuarenyre: —Bitamadỹỹnyke itxeò nihikỹ-ò. ¹⁴ Ta Pilato tamyreny ritỹỹraxinyre: —Aōbina taka riwinyre. Aōhe-wana ixityre rirajuamyhỹrenyre: —Bitamadỹỹnyke itxeònihikỹ-ò. ¹⁵ Pilato inydee aō riwahinykemy rōhòtinyra, tai ta Baraba riòlòdỹỹnyre. Idi tahe Jesuisi riyhytanymy rahudi, riteònyre itxeònihikỹ-ò riukòrenykemy.

¹⁶ Soldado ridyrenyre heto woube-ò. Tai tahe ibutumy soldado ributumy. ¹⁷ Tahe tyysòborehekỹ-di rityynyrenyre. Tahe ede rataana ritidire ira-ò. ¹⁸ Tahe rirybenyrenyre: —Adee nihikỹre judeu iòlò. ¹⁹ Tahe rihetenyre bòtòre-di irati-ò, tahe ityre rarybexinyre tahe rỹire tatiowotimy rityhynkemy. ²⁰ Tahe tyysòbore iribi ritara, tahe ityyle tamy ritidira. Inatyhymy ridyrenyre itxeònihikỹ-ò riukòrenykemy.

²¹ Kowa-di rekoarenyre hãbuõ. Simaõ Sireni inire. Kia heka Alexȳdre, Rufu-wana tyby rare. Tii nade bedero-ribi. Tiiboho tahe riitxyydỹnyre itxeò-di retyykemy.

²² Riwyrenyre bederahy-ò Kòkòta ninadu-ò. Kia heka iwitxira rybe rare. Kia heka rubu ratitybyho wese rare. ²³ Tiiboho v̄i riurinyre òwòruburu-wana. Tahe tii tuu riõõlera. ²⁴ Itxeònihikỹ-ò raukòrenymy rahudi tahe ityy wirarea ri-tyre, tahe ityy-di rarudeòsanyre tibo iny sohoji sohoji ityy ri-wykremy. ²⁵ Biurasò txu Jesuisi itxeò-ki raukore. ²⁶ Iratya-ki tahe ritina rỹire: JUDEU IÒLÒ. Kia heka iny tuu rarybe-myhỹrenyre. ²⁷ Tahe tii-wana inatxi wasidu itxeònihikỹ-ò riherinanyre, ijõ ruruweribi-ò, ijõ hyweweribi-ò. ²⁸ Tahe rotỹnyre aõbo Deuxu ritina-ki rỹire wese: Tii ratximyhỹ òrarudu mahãdu-wana. ²⁹ Iny reareare tara riohowimy rarybere aõbina binamy: —Kobe, kai korihe dohodỹna heto biatykemy inataõ txudile tahe ixityre bidiwinykre. ³⁰ Kaile inyhe bexitakre itxeò-ribi. ³¹ Iwesehyyle Deuxu aõmysỹdỹdu wedu, bede ywina erydỹ mahãdu-wana widee raryberenyre. Jesuisinimy raujõmorenyrer: —Tii iny wixira ritare, tiile tahe rexitaõtyhy. ³² Kristu, judeu Iòlò, bodobe-keke itxeò-ribi jiarỹboho arobirenykremy, tai tahe araty-hynyrenykremy. Tule wasidu tii-wana raukòrenyre itxeò-ki Jesuisimy raujõmorenyre.

³³ Txutyeyu ibutumy bede rurunyre. Tahe roire txu kaò re-
semy. ³⁴ Kiaule tahe Jesuisi rarybeterenyre: —Elòi, Elòi, lema
sabatani. Kia heka iwitxira tybe rare. Kia rare: —WaDeuxu
waDeuxu, aõherekibo kai tiwarite. ³⁵ Ijoiõ heka tamy rohol-
areu, rarybere: —Tii heka Eliasi-ò rryreri. ³⁶ Hãbuõ reare
bexi ritỹxinyre v̄i juberere-di idi tahe ritidire tabòtòrejura-ò.
Riwahinyre Jesuisi ritòkemy. Tahe rarybere: —Deinyhe tamy
inyhe reketehereny Eliasi kanakremy aõbo inyhe itarasamy.
³⁷ Jesuisi rryre irariemy idi rurure. ³⁸ Dohodỹna hetowetyy
raykare inatxi weryna tyymy, biu-ribi, bede-ò. ³⁹ Soldado
dinodu Jesuisiko-txi ratximyhỹre. Tahe rurureu, irubumy
robire. Tahe rarybere: —Ka heka inatyhymy Deuxu riòre
rare. ⁴⁰ Tule hãwy mahãduõ retehemy rỹimyhỹ irehe-ribi,
tòwysyreny-ki, Marie Madalena, Marie (Txiause, Jyrese tii
rare. Txiau heka Jyje hewoludumy rare.) Salome tule ihỹre
ijõ-wana. ⁴¹ Kia heka Jesuisi Kalileia raremyhỹu, tiiboho tahe
sõwemy iny-wana doide Jerusalẽ-ò.

⁴² Txioromyhe dehemynyde. Wirareasanatxu rare.
Kia heka sabadotxukokile rare. ⁴³ Jyje Arimatea hãwã
ludu dohodỹdu nihikỹõ rare. Tule heka tii riraõmy
ratximyhỹ Deuxu Iòlòna. Tii ruberuõlemy rare Pilato-ò
Jesuisiumy ixitòedỹmy. ⁴⁴ Pilato rabedeòtiidỹnyre

Jesuisi rurumy roimyh̃di tai ryryre soldado dinodu-ò. Tai Pilato ritỹ̃raxinyre, Jesuisi rurumy roimyh̃di. ⁴⁵ Soldado rarybereu Jesuisi rurumy roiremy tahe Pilato riteònyre Jesuisiumy Jyje-ò iwahidỹ̃my, ⁴⁶ Jyje ritare itxeònihikỹ-ribi tahe ritỹ̃tenyryre tyyurahākỹ-di. Idi tahe ritidirenyre mana hãloo wabedewo-ò. Tahe mananidikỹ-di riijõtòbònyra. ⁴⁷ Marie Madalena, ijõ Marie Jyjese reteherenyre titxibo tii ritidirenyreò.

16

¹ Tahe nobiutxu, Marie Madalena, ijõ Marie-wana ihewoludu Marie, Txiause, Salomese-wana rare. Tiiboho l̃nyrena riõbranyrenyryre. Tahe roire Jesuisibymy idi rekoakremy l̃nyrena-di. ² Juhutxu semana bededỹ̃nanau txuu deadeule roire wabede-ò. ³ Widee raryberenyre: — Mowexe mana ritakre ijõ-ribi. ⁴ Tahe tuu robirenyre. Mana nihikỹ ritamy rỹire. ⁵ Wabede-ò rirònyrenyryre, robirenyre weryrybòweselemy rononymh̃y ruruweribi-ò. Ityy urahakỹmy rononymh̃y. Tahe tiiboho bede riòtiinyrenyryre ruberurenymy. ⁶ Tii tamyreny rarybera: —Uritere breburenyõmy. Kaiboho aõbo teòrytenyta Jesuisi Nazare ludu. Kia itxeò-ki rurure. Tii aõkõ kaki ratxireri. Rexixara rubu-ribi. Betehebenny inihe tai ritidiraò. ⁷ Makre. Marybekre ierydỹ̃na-ò tule Pedro-ò. Tii rakre akorenymy Kalileia-ò kaiboho tuu lobiximy boikre tuu adeereny raryberemy. ⁸ Tahe tiiboho rihenyrenyryre wylemy wabede-ribi ruberumy. Tiiboho moõ heka rarybeõhylyrenyryre ruberumyh̃yrenyki.

⁹ Juhutxu semana bededỹ̃nau Jesuisi rubu-ribi rexixare. Idi tahe juhuu àsitereribile rexitỹ̃nynyryre Marie Madalena dee. Kia-ribi heka juhuule ritare debò inatxi reurò tyytybybinamy. ¹⁰ Tii rare Jesuisi-wana raremyh̃y mahãdu-ò. Tiiboho rabadewomy ratximyh̃yreny, rahinymyh̃yreny. ¹¹ Tamyreny relyyreu iwese Jesuisi tamy rexitỹ̃nynyryre wese Jesuisi irulemy ratximyh̃ymy tuu robireke, rityhynyõlerenyryre.

¹² Jesuisi rexixamy rahudi tahe, iwitxiramy rexisỹ̃nynyryre inatxi erydỹ̃na-ò. Tiiboho heka roimyh̃yrenyryre bedero-ò. ¹³ Tahe dòòsede relyyrenyryre taijoi-ò, tahe tule rityhynyõlerenyryre.

¹⁴ Tahe waòsohoji reurò erydỹ̃na-ò Jesuisi àsitereribile rexitỹ̃nynyryre. Tiiboho riroximyh̃yrenyò rexitỹ̃nynyryre. Tahe Jesuisi tamyreny rarybera: —Aõherekibo kaiboho iny wamy robira mahãdu tetyhynyõteri. ¹⁵ Kaiboho boibenyke ibutumy bede bede-ò Rybewihikỹ bitỹ̃nynykremy. ¹⁶ Inyõ Rybewihikỹ rityhynykeki, idi kidisebennykeki, tii Deuxu ritake. Inyõ rityhynyõkeki, Deuxu ixi-ribi riteònykre iõraru-ki. ¹⁷ Kia bede

eryna ityhydỹỹdu kidiheludunykre. Tiiboho tyytybybina kiditeònykre wani-ki. Tule heka tiiboho itỹmyra rybe kanarybedenykre. ¹⁸ Hemylala rimyrenyreu, aõhe rotỹỹnyõlere tule rubuna monamy riõkeki, rotỹỹnyõlere. Tiiboho tebò ritidirenykre bina mahãdu-ò tahe riteytenykre.

¹⁹ Idi tahe Jesuisi tarybe rahuredi, Deuxu ridyre biu-ò. Tahe ronyre Deuxu ruruweribi-ò. ²⁰ Tahe tiiboho roire ibutumy bede bedemy tai bede ritỹnynyrenyreu. Wanyrỹ ri-wiòhenanyrenyreu tahe bede eryna-di irybe ixidee rimyrenyreu ihelududỹỹdu mahãdu-ò.

Luka Deuxu Rybe Wihikỹ Tỹmyra, Luka Tyyritidỹỹdu

1-3 Wyla, Teòfilo. Adee heka watyyriti ariwahinykre timybo Kristu rotỹỹnyre. Tuu lobixidu mahãdu tuu relyymyhỹre-ribi, jiarỹ ire ariòbitinytyhykre. Kia heka jiarỹ adee reritinytyhyỹre, waiòlò, iwese ibutumy reeryrenyrene juhu bededỹỹna-ribi. Aõma inatyhymy kia rotỹỹnyny rare wahe. ⁴ Kia wese wahe. Iwese iny adee relyyre wese, jiarỹ adee arelyyre inatyhymy aõbo rotỹỹnyre. ⁵ Zacaria heka Deuxu xiwe wahidỹỹdu rare, Abia ijojì wahe. Iriòrese Isabeli tahe tule xiwe wahidỹỹdu riokore mahãduõ rare. Kiau heka Herodi judeu bedesỹ iòlòmy raremyhỹ, Araõ riokore mahãduõ wahe. ⁶ Wiwanale heka awirenyre Deuxuru-ò. Òbitihyy heka ratximyhỹrenyrene ibutumy Deuxu bededỹỹnanako-ò. ⁷ Tiiboho iriòreòhyyre. Ihãwyy Isabeli heka rasenadunyrene, uladu herina dori awiõre. Ihãbu tule ramatuarinyrene.

⁸ Aõutxumy tahe Zacaria raaõmysỹdỹỹnynytyhyỹre aõma templo-ki. Kiatxu heka iròtenatxumy bede rỹimyhỹre templo-ò. Tahe iwo-ki ratximyhỹre. ⁹ Hewydysi lỹnywi ritoonynytyhyỹ Deuxu kia deàlànamy, iwese riwinynytyhyỹrewesehyyle. ¹⁰ Iu ahana-ki tahe sòwemy iny rexitòenynytyhyỹ. ¹¹ Iu Zacaria xiwena ruruwe-ribi loosòna-ò rỹireu, hewydysi lỹnywi ritoonynytyhyỹre. Tahe aõwesele ýjuõ rexitỹnynyrene Zacariako-ò. ¹² Tii tuu robireu heka rexiraõmy ruberumy reare. ¹³ Ýju rarybere: –Brebuõmykre, Zacaria. Deuxu roholare aixitòedỹỹna-ò. Tai heka adee ijyymy rareri. Ahãwyy Isabeli rariòrenykre. Kai heka Joaõmy bininikre. ¹⁴ Tai kaiboho heka iura heka beysabenyke sòwemy; ijõ iny tule reysakre iòraru-ki. ¹⁵ Tii heka hãbutyhyhykỹmy rarekre Deuxu dee tiu heka vỹ riòòtyhy mona hàrihikỹ riòòtyhy. Deuxu Tyytybytyhy. Juaõtykymy ralokre tii reareu. ¹⁶ Sòwemy heka aõma Israeli mahãdu Deuxu rityhynykre iòraru-ki wahe. ¹⁷ Tii heka hãbutyhyhykỹmy rarekre Deuxu rybedumy Elia wesemy. Tii heka aõma Deuxu deòdỹỹna juhuru rehemynyny reacre ikòlemy iny ywisidỹỹnakre rehemynykre juhuru, aõma Deuxu Tyytybytyhy dehemynyna riijemy tuu rehemynyny rakre. Tii bede ywina riòbitinykre inyy-ki. Tyby tariòre-wana wii riwoxinykremy. Tii heka iny ribedeerynykre aõma òbitimy rỹirakremy. Deuxu lumy rỹirakre aõma ilahireny rỹira wesemy juhuru.

¹⁸ Zacaria rarybere ŷju-ò: —Jiarŷ ramatuarinyre timykre heka? Hāwyy tule rasenadunyre ihārele òsana tukre. ¹⁹ ŷju rarybere: —Jiarŷ Gabrieli watzireri, Deuxu deòdutyhy wahe. Tii heka diwateònyde kaò adee rybemy wahe. ²⁰ Kai tetyhynyòhyyteri tai kai marybeòkre uladu reakre xiery tahe marybekre. Kaa adee rarybereri dori òbitimy rarybereri warybemynamy ibutumy rŷikre. ²¹ Iny riraòmy rŷimyhŷ Zacaria òlòna, tahe raroorehenymyhŷ. Iroorehena rieryòhyyemyhŷreny. Dòhònydeu ta, rybe-ki rexisiranymy rarybeòhyyre. ²² Tii rehemynyreu tamy rybeòhykyre rahòra. Idi tebò-di raramynyre urile rybe riwisŷnymy rarybeòhykymyhŷre aòma timybo aòhebo rotŷŷnyrá heka riòbitinkemy heka rarybeòhyyemyhe timyrabo. ²³ Tahe taaòmysŷdŷŷna rihudi, taheto-ò ròòsere ixyby.

²⁴ Idi tahe Isabeli rabòtònyre iruwyyre ahādumy bede riijere rexiwòmy. ²⁵ Isabeli rarybere: —Deuxu awi heka rare, ri-watare waixŷruna-ribi. Kuladu wadeke riwahinyreri.

²⁶ Ijò ahādu tahe Deuxu Gabrieli riteònyre Nazare hāwā-ò Kalileia bede-ò. ²⁷ ŷjuò heka rybe-di ijadòma-ò. Kia ijadòma heka wii ritobinymy rŷireri tybyboho iseboho Jyje-wana roikremy. Jyje heka iòlò Davi kia mahāduò rare. Ijadòma tahe Marie inire. ²⁸ ŷju heka kiamy rarybere: —Beysakre Marie! Inynyryŷ heka awana ratzireri. Bedeòbyhykŷ adee kidiwahinykre. Tii arāwowydynyneri. ²⁹ Kia rybe-di tahe Marie rexiraykynyre. Tii rieryòmy aòmybo rare. ³⁰ Tahe ŷju tamy rarybere: —Marie, Brebuòmy! Deuxu teteysanyte. Kai awi heka rare. Tii aòwihikŷbo adee kidiwahinykre. ³¹ Kai heka mariòrekre, uladu heka Jesusimy raninikre. ³² Tii heka hābu nihikŷ rarekre. Tii Deuxu riòremy raninikre. Deuxu heka tii iòlòmy risŷnykre, iwese Davi alabiehekŷreny ronyre wese, tii ronykre. ³³ Tii heka ibutu Ijaò mahādu iòlòmy rarekre. Iòlòna heka tiu itueòtyhy. ³⁴ Tai tahe Marie ŷju-ò rarybere: —Jikarŷ heka ijadòkòmatyhy watzireri. Timyki-bohe krabòtònykre. ³⁵ Tahe ŷju rirawyònyre: —Tyytybytyhy adee kanalokre. Deuxu ruru heka adee kanakre. Tai heka kia uladu Deuxu òbiti riòremy raninikre. ³⁶ Nohòti lusaòmy anymy-ribi Isabeli riki bòtòkòmy rareke-ribi tahe bòtòmy ratzireri. Debò sohoji reurò ahādumy iahādu. ³⁷ Deuxu dee heka tiu aò isiraòre. ³⁸ Marie rarybera: —Jikarŷ Wahī dekòdu rare. Anomybo tarybeteri ka ibutumy rekyrubun-yreri. Wadeke awire. Anowaxina tuukre irybemynamy karotŷkŷnykre. Idi ŷju rikòmy reare.

³⁹ Idi ta tii heka Isabeli roramy rare. Zacaria sŷmy Judeia bede hāwālò hāwā bede-ki. ⁴⁰ Iu Marie rehemynyreu tahe wii rirybenyreny: ⁴¹ Tiu kia aòbo uladu Isabeli kia-ki iule

rexiwatxinymyhỹ Marie-ò. Isabeli heka tỹxiykỹle Deuxu Tyytybytyhy-di ratximyhyỹ. ⁴² Riajuamy rare deysana-di sõwere: —Kai hãwyy ibutu-ribi deysana rarekre. Auladu tule deysana rarekre. ⁴³ Anoherekibo Wahĩse waroramy naderi. Jikarỹ ano anokõ rare. ⁴⁴ Adeke rahokujareku, kuladu wawoku-ki rexilòrelòrenymyhyỹ tabedesa-di. Tai tahe Isabeli rỹỹraximy ratximyhyỹre Deuxu Tyytybytyhy-di. ⁴⁵ Kai bekysabenyke kia tetyhnyteki. Deuxu rybe dokuri adeke nade. Iwese tiki raryberewesele ibutумы rãikre. ⁴⁶ Marie rarybere: —Jikarỹ wawoku-ribi Wahĩ rewokuwydynyre. ⁴⁷ Wawokuribityhy wadekysareri Wahĩ watarasadu dokuri rare. ⁴⁸ Ihyky tahe tiki tekòdu-ribi walanokonakona-ribi tõhõti rosakre. Tahe iny ibutумы hãwyky dekysanamy riwaninikre. ⁴⁹ Deuxu dokuri anomydỹkỹnana wiwihikỹ wadeke riwahinyre. Tii tahe ityhy rare.

⁵⁰ Tikiemy inydeke ruxetòena riwahinymyhyỹre iny tamy wowydyna riwahinyreki.

⁵¹ Ixityhy nohõtidu mahãdu tiki rehure. ⁵² Bede ikòlò sõwemy tiki rehure. Tule iny ianokõ mahãdu Deuxu riwikòhenanymyhyỹre.

⁵³ Rama risamahãdu deke rỹsỹna tiki riwahinyre.

⁵⁴ Irybe tahe tiki rityhinyre anobo tiki inytybyreny deke tiki raryberemy. Tikiboho tahe Deuxu riwikòhenanyre.

⁵⁵ Ruxetòena tahe Abraõ deke riwahinyre tule tikiemy iriokore deke riwahinymyhyỹre.

⁵⁶ Marie tahe inataõ ahãdu Isabeli-wana riwyrã. Idi tahe tasỹ-ò ròðserã.

⁵⁷ Bededỹnana Isabeli-ò rehemynyre. Iriòre reakremy ratxireriu, Iriòre reare. ⁵⁸ Isỹ mahãdu heka teysana-ò roholarenyre, iery mahãdu tule rabedesarenyre tamy Inynyrỹ raruxetòenyredi, Inynyrỹreny ruxetòena tamy riwahinyreki.

⁵⁹ Tahe debò inataõ txu-di, uladu notyky resynamy bede rỹire. Zacaria raninykemyre. ⁶⁰ Tai tahe ise rarybere: —Anokõre, Joaõmy rarekre. ⁶¹ Isỹ mahãdu rarybere: —Joaõmy ninadu taheka ijõkõhykyre insỹreny-ki. Anoherekibo tuukre? tai tuu raninike wahe. ⁶² Tuu Zacaria-ò rỹỹraxireny: —Momybo raninykre? ⁶³ Tahe Zacaria tababese riòreõ rimyre. Riritinyra kia: —Joaõ heka inikre. Tahe ijõ mahãdu ibutумы ribedeòtiidỹỹnyre. ⁶⁴ Iu tahe Zacaria rarybere Deuxu riwowydynyre. Tahe ibutумы isỹ mahãdu heka ruberure.

⁶⁵ Ibutумы heka tii relyymy raremyhỹ Judeia mahãdu hãwãlò nihikỹmy. ⁶⁶ Ibutумы tamy roholaré heka raryberenyre: —Timybo uladu rarekre? Inynyrỹ idi tarukimy iweribikre.

⁶⁷ Tahe Deuxu Tyytybytyhy heka Zacariatykymy ralore. Tahe Deuxu aõmydỹỹnanamyhe relyyre timybo

rabededỹĩnananykremy. Tii rarybere:

68 —Judeu mahãdu Deuxu awi rare. Tii dori taijoi roramy nade.

69 Iwiòhedỹĩmy tulemy tarasadu tyhy Tii heka Iòlò Davi mahãduy rare. 70 Deuxu Rybedỹĩdu mahãdu kia wesemy tuu raryberenyre.

71 Inydireny òludu mahãdureny-ribi riki iny ritarenykre. Iny-di heka raruxetòerenyra.

72 Tahe iny-ribi tõhõtireny rosaõhykyra. Tahe rarybekre timybo raryberemy inytybyrenemy. 73-75 Tii heka iny ritarenykemy inydireny ratxireri inyòludureny-ribi. Kia-ò heka rarybere inylabiereny Abraõ-ò. Tai heka rikiwiòhenanyrenyke brebuõlemy. Òbitimy iko-ò rakatxirenyhyykre. 76 Kai wariòre Deuxu rybedumy mabekre. Kai heka mabekre Deuxuhukỹ rybemy rybedumy. Kai heka bõhònykre

Inynyrỹ-kò iry biywinykremy.

77 Asỹ mahãdu-ò marybekre biu-ò hena kanakremy ihỹre. Deuxu heka tõhõti rosakre iòrarunareny-ribi. 78 Iny Deuxureny dori inydeereny ruxetòedu rare. Tii heka biu-ò hena ibutu-ò kidiòkre, tarasana wahe.

79 Kia bede lurumy rỹira mahãdu biuloosònamy robikre. Zacaria rybe tahe rikonananyre. Loosòna ywinary-ò tahe ritỹnynykre.

80 Ihewo-ribi tahe uladu ratybienyre taumy-di Deuxu tyhydỹĩna-ki tule. Tii heka bederahy-ki raremyhỹ. Tiutxumy rexitỹnynykremy judeu mahãdu-ò.

2

1 Kia mahãdu iòlò Augusto inire. Kia heka ibutumy bede-ki inyni rityyritinykemy bede riywinyre. 2 Kurina heka Siria bede dinodu rare. 3-4 Jyje heka Nazare hãwã-ki rasỹnyny raremyhỹ. Tai tahe Kalileia bede-ribi tiiboho roirenykemy Judeia bede-ò. Iòlò Davi dori tai reare, Belẽ hãwã-ki. 5 Jyje tahe rare, tii dori Davi ijoimy rareki. Marie bõtòmỹ tii ridyre tai ihãwyy. 6 Tahe Belẽ hãwã-ò rehemynyre. Tahe herina roxina heto ihoõre herina tamyreny. Taihe awaru roxina heto-ò roire. 7 Tai hãwyy ratohouãsenyre. Idi rihetynyre awaru roxina hynaro-ò ritidikemy.

8 Iu tahe budoeni-di itxeredu mahãdu bedero-ki ratximyhỹreny. 9 Idi tahe ýjuõ tamy nade Deuxu-ribi. Deuxu loosòna tamy ritynyre. Ruberurenyre. 10 Ýju tamy rarybere: —Brebuõmyrenyke. Rybe wihikỹ-di adee rehemynyreri. Ibutumy iny reysakre ka rybe-di. 11 Atarasadu heka ratohouãnyra Davi hãwã-ki, abiu-ò hedu wahe. Tii heka Kristu

rare, Inynyr̃reny wahe. ¹² Kaiboho heka awaru roxinaõ-ò inihe bòike itxeremy. Tai heka tohouã roireri tyy-di rarahananymy. ¹³ Iule tahe sōwemy ŷju widotyde Deuxu dee rawiunykremy, kiawese rawiunyrenyre riwowydynyrenymy:

¹⁴ —Biu-ki Deuxu loosona ratxihyymyh̃re.

¹⁵ Tahe ŷju ròðserenyre biu-ò. Budoeni-di itxeredu mahādu widee raryberenyre. Wylemy Belē-ò ròkòirenykre itxeremy kia aõmyd̃ŷŷnanamy Deuxu inydee riteòsinyreriò. ¹⁶ Tahe roirenyre idi tahe Marie, Jyje-txi rekoarenyre. Tuu ro-birenyre. Tahe broreni dòròtòhòhyna-ki uladu roire. ¹⁷ Tai tahe budoeni-di itxeredu mahādu timybo ŷju tamy raryberamy, rarybere. ¹⁸ Tai tahe ibutumy kia tamy roholaré ribedeòtiinymy r̃yire. ¹⁹ Marie heka tōhōti itxi reare. Tahe sōwemy raraykywydynanymy ronyre. ²⁰ Budoeni-di itxeredu mahādu ròðserenyre rawiunyrenymy Deuxu-ò Deuxumy reàlāre ibutu òraru-ki. Iwese ŷju raryberewesetyhyle heka ibutumy r̃yire.

²¹ Iribi tahe txu r̃yireu tahe rare Jesuisi notyky orokrè. Debò inataõ reurotxu r̃yireu Jesuisi notyky raorokremy raywire. Tahe rininirenyre Jesuisimy iwese ŷju rarybere myna.

²² Xiwena r̃yikemy bede r̃yire Moisesi bede ywid̃ŷŷnamyna. Aõutxumy tahe dehemynyde Marie Jyje-wana kia idi riwinyrenykemy. Tahe Jyje ridykemy Jerusalē-ò idi ratxireri. Tai uladu-di roirenyre Deuxu-ò riteòsinykemy. ²³ Kiamy heka Inynyr̃ Ritid̃ŷŷna-ki roire.

Weryrykeki, Deuxu dee rawahid̃ŷŷkre. Tii uladudelaa weryrykreki.

²⁴ Iwese tule bòtòe inatximy rawahid̃ŷŷkre ada bòtòerurà inatxi heka xiwenamy reakre Moisesi bede ywid̃ŷŷna myna.

²⁵ Hābuõ tai ratximyh̃re Simeaõ inire. Jerusalē hāwādu wahe. Deuxu rityhynymyh̃re hābuwi rare. Tii Kristu riraòmyh̃re Deuxu deòd̃ŷŷna wahe. Ijoi aõbina bina-ribi tarasadumy Deuxu Tyytybytyhy heka tai ratximyh̃re. ²⁶ Deuxu Tyytyby ihetxiu tamy rarybere: —Kai buruõtyhy Deuxu deòd̃ŷŷnamy bobiõdi. ²⁷ Iu Jesuisise tyby-wana rehemynyreu Deuxu Tyytybytyhy heka Simeaõ riteònyre kowa-ò. ²⁸ Simeaõ uladu taāxiò-ki rimyreu. Tahe Deuxu riwowydynyre:

²⁹⁻³¹ —Kiamy heka Wanyr̃ Iòlò arybe retyhynyre timybo tarybete wahe. Ibutumy dorihe tewinyta. Tahe aõwaxinyhe arurukre. Abiuòhenamy heka rabira. Tii ibutu iny tarasadumy rarekre biu-ò hena wahid̃ŷŷdu wahe.

³² Kia heka ibutumy iny-ò loosona tewahinyta judeukõdu mahādu-ò. Tai judeu mahādu tahe wowydynamy tii rarekre.

33 Tai tahe Jyje Marie-wana bede riòtiinyre aõmybo rary-bereki. 34 Simeaõ tahe Deuxu deysanamy tamyreny rary-bere: –Deuxu biu-ò henamy heka kia uladu rare. Sõwemy judeu mahãdu tarasadumy rarekre, tule sõwemy tasỹ ituekre. Kia heka Deuxu deõsina rare. Sõwemy heka Jesusimy rakyararybenynykre. 35 Ibutumy iny rayky-ribi heka ibutumy ritỹnynynykre. Bederyry sõwemy bieryke tai aõhõkỹmy botỹỹnykre. 36 Tule Deuxu rybe erydỹỹnaõ rehemynyre. Ana inire. Hãwyy rare. Tii heka Faneli riõre rare. Asere mahãdusỹõ rare. Tii heka rasenadunymy raremyhỹ. Ijadòmamy raremyhỹu heka roire hãbu-wana. Debò inatxi reurò beòralemy heka tii-wana raremyhỹ tahe tii rawytesyre. 37 Tii 84 beòramy heka bede idi rỹire wytesyre. Tii Deuxu dohodỹỹna heto-ribi ròhònyõhyymyhỹre. Tii heka rex-itòenymyhỹre rummy txummy tabyreõ-di. 38 Tahe tii rehemynyre Deuxu dohodỹỹna heto-ò. Deuxummy reàlære. Idi Jesusimy imahãdu-ò rarybere tii tarasadumy rarekremy.

39 Iu Marie, Jyje-wana ibutumy bede ywidỹỹnamy ituereu, riòõserenyre tahãwã-ò Nazare-ò. 40 Jesuisi raumynymyhỹre beòra beòramy. Iruru, ibede eryna sõwemy ijõdire Deuxu dori idi tarukimyhỹre.

41 Pascoa worana bedehesi riòlòdỹỹnyre Jerusalẽ hãwã-ki. Jesuisi tyby heka iseboho roihyymyhỹrenyreny tamy. 42 Tule Jesuisi waòinatxi reurò beòra-di ridyrenyreny tamy. 43 Worana bedehesi rexihureu kidiòkesedenykremy doide. Tahe Jesuisi naride Jerusalẽkikhikỹle. Tiiboho rieryrenyõhyyre naridemy. 44-46 Taijoiirenywanale ratxirerilemy idi rõhõtynyrenyra. Txusohojimy heka bede idi rỹidi, rierenyreny. Tai rahaõhyrenyra iijesemy diòkesedenyde Jerusalẽ-ò icyby. Inataõ txu-di tahe tai nahadenyde, Deuxu dohodỹỹna hetowo-ki wahe. Tii heka bede erydỹỹdu mahãdu-wana ronyre. Roholamyhỹrenyreny irybe-ò ronymyhỹreny. Tule rỹỹraximyhỹrenyreny. 47 Tii heka ibutumy rirawyònymyhỹre. Tii dori bede ery nihikỹ rare. 48 Iseboho tahe bede riòtiinyrenyreny tai ronyreki wahe. Ise tamy rarybere: –Waritxòre, anoherekibo kai ikykyreny-ki tanyte. Anoherekibo tuu wadekereny tewinyteri aijesereny-di watxireri. 49 Tahe Jesuisi rirawyònyre: –Waijeserenykõmyke. Waha heto-ki watxireri, Waha aõmysỹdỹỹnamy reywinyhy watxireri. Kia aõbo teeryõhytyente. 50 Tiiboho rieryrenyõhyyre aõmybo Jesuisi rarybereri. 51 Idi tahe dòõsedenyde Nazare-ò. Tahe Jesuisi tyby rybe rityhynyhyymy raremyhỹ. Tahe Jesusise kia ibutumy riyrubunyhyymy raremyhỹ tarayky-ki.

52 Jesuisi tahe raumynyre. Bede erytyhymy relere. Ibutumy he iny iluure. Deuxu wowydyna-di ihỹre.

3

¹ Tiberiò heka waiyre beòramy iòlòmý raremyhỹ. Poncio Pilato heka Judeia bede dinodu. Ijõ heka Herodi inire. Inataõ inymy heka bede dinodumy raremy. Herodi heka Kalileia bede dinodu. Iseriòre, Filipi tahe Itureia bede, Traconite bede-wana dinodu rare. Ijõ iny tahe Lisỹnia inire. Tii Abileni bede dinodu rare. ² Anasi, Kaifa-wana heka inatxi hãbu roire. Tiiboho wiwana xiwena wahidỹỹdu wedu raremyhỹ. Kia bedeu heka Joaõ rehemynyre bedero-txi. Tii iny-ò Deuxu rybe tỹnydỹỹdu rare. Zacaria riòre rare. ³ Tii kia bede ibutumy rybe ritỹnynyre, Jordaõ beroweramy ibutumy wahe. Kia wesemy rarybere: —Aòraru-ribi bòhònyke. Maratisebenyke. Tahe Deuxu aòraru riixãwididỹỹnykre. ⁴ Iwese Isaia ròritidỹỹre wesemy heka wiji rỹire.

Inyõ heka ryrymyhỹ bedero-ki.

Kia:

—Inynyrỹry bexiywinybenyke. Ryòbitihikỹ biwinybenyke. Hãloo bitỹxinybenyke wimyny biijaranybenyke. Iry iòweòwena ramyhỹre heka, biòbitinybenyke.

⁵ Iratòratòkeki, wimyna biijaranybenyke. ⁶ Ibutumy iny heka Deuxu biu-ò henamy robirenykre. ⁷ Sõwemy iny nade riratisebenykremy Joaõ-ò. Tahe tii tamyreny rarybere:

—Kaiboho hemylalaweselemy toite. Deuxu ykarana-ribi bexitabenyke, aòwiihikỹ.

⁸ Uritere kawese ryberenyõmykre: —Abraõ dori iny labiereny rare. Tai tahe ibutumy awityhy rare inydeereny.

Jiarỹ dori adeereny ararybekre: —Deuxudeewikeki, Tii kia manadile iny riwinyke. Abraõ dee ijõ riòreõmy kia manadile riwinyke. ⁹ Woma heka òwòruraruti riòròmýhỹre. Kia raratynyõkeki heka, raòròkre. Heòty-di wòmý ririradỹỹnymyhỹke. ¹⁰ Tai tahe iny rỹỹraxire Joaõ-ò: —Timybohe rakatxirenykre. ¹¹ Tai tahe rarybere: —Inyõ tõre inatximy ijõdikeki, sohoji iny ijõ-ò riwahinyke. Irỹsỹnadikeki, tule ritxu-atxuaque ijõkõ mahãdu-ò. ¹² Iny witxiraõ Joaõ-ò rehemynyre. Tiiboho nieru tarasadu mahãdu rare bede dinodu-ò. Tai rỹỹraxirenyre: —Timybo aõhebo rokotỹỹnyrenykre. ¹³ Joaõ rirawýnyre: —Uritere aõnihikỹmy itarasarenyõmykre. Bede ywidỹỹna tyyriti myna ta tuukre. ¹⁴ Tai tahe soldado tamy rỹỹraxire: —Inyboho tahe aõhebo rokotỹỹnyrenykre. Joaõ rirawýnyre: —Inyõ biteranyõtyhy adee nieru kanakemy. Inieru dori ahõrõ aõkõ rare. Beysake, adinodu-ribi tiwesebo nieru tetamahãte-di. ¹⁵ Tahe kia iny mahãdu raraykynyre Joaõ-di. Kowa aõbo hãbu Kristu ihỹre. ¹⁶ Tai heka Joaõ rarybere: —Jiarỹ heka bedi araratisebenyreri. Ijõ wahewo-ribi kanakre tahe woratyre inihikỹ rarekre. Tii heka awityhy rare. Jiarỹ heka raixỹruwãhãre iwataana aritake lau. Tii

heka akanaratisebenykre Deuxu Tyytybytyhy-di. Heòty-di tule wahe. ¹⁷ Iti tebò-ki ratxireri. Maixõmo ruxity hitxina-di wahe. Tii heka ritakre. Maixõmo riyrubunykre ihyna-ò. Iruxyty tahe ritoonykre. Kia heòty heka tiu ruriòtyhy. ¹⁸ Aõ heka Joaõ rarybere. Sõwemy aõna aõnamy iwesele rarekemy. Dohodÿÿna wihikÿ-di tamyreny rarybera. ¹⁹ Bede dinodu Herodi heka taseriõre riõrese-wana roire. Aõbina binahakÿle riwinyre kia. Tai tahe Joaõ tamy rarybere: — Kia awi aõkõ rare. Ibina heka rare. Sõwemy aõna aõna bina tule tii riwinyre. ²⁰ Tai Herodi heka Joaõ mynymy riteranyre ròtenawo-ki roikemy. ²¹ Joaõ ixiwesehyyle rex-itÿmyranamy iny riratisenbenyre. Tahe tule iny wixirahe-ki Jesuisi riratisenbenyre, Jesuisi rexitòenyreu, biuwetyhy rarayre. ²² Biuwetyky-ribi tahe Deuxu Tyytybytyhyle dobehemy nade bòtòerurà wesemy. Biu-ribi rybeò-ò iny roholare: —Kai heka Wariõre tate. Aluure heka jiarÿ wadeysatyhyre. ²³ Jesuisi 30 beòramy raremy taaõmysÿdÿÿna tyhy ritelenyreu, iny heka Jyje riõrelemy röhòtinymyhÿre. ²⁴ Jyje heka Eli riõre rare. Matate, Levi, Maki, Janai, Jyje, ibutumy labiehekÿ Jyje rare. ²⁵ Ijõ tahe Matatias, Amos, Naum, Esli, Nagai, ²⁶ Maate, Matatias, Semei, Jyje, Joda, ²⁷ Joana, Resa, Zorobabe, Salatieli, Neri, ²⁸ Meki, Adi, Cosã, Elmadaõ, Er, ²⁹ Josue, Eliézer, Jorim, Matate, Levi, ³⁰ Simeaõ, Juda, Jyje, Jona, Eliaki, ³¹ Melea, Mena, Matata, Natã, Davi, ³² Ijese, Obede, Boasi, Sala, Nasaõ. ³³ Aminadabe, Adimim, Arini, Esraõ, Peresi, Juda. ³⁴ Ijaò, Ijai, Abraõ, Tera, Nakò, ³⁵ Serui, Raau, Faleki, Eber, Sala, ³⁶ Aina, Arfaxade, Sem, Noe, Lamei, ³⁷ Metusalë, Enoi, Jarete, Maleleel, Aina, ³⁸ Enosi, Sete, Adaõ. Tii tahe Deuxu juhuu riwinyre iriõre wese.

4

¹ Bero Jordaõ-ribi Deuxu Tyytybytyhy heka Jesuisi diòòsedÿÿnyde Tai heka tule bederò-ò rexykyknyra. ² Tahe Satanasi Jesuisi riurihire, 40 txu-di wahe. Aõ heka rirÿsÿòhyre Jesuisi kia itxumy txu rÿireu wahe. Idi tahe sõwemy rama risare. ³ Satanasi tamy rarybere: —Kai Deuxu Riòretyhy tate-wana heka, mana bitxienykre hinamy. ⁴ Tai Jesuisi dirawyònyde: —Deuxu Rybe tule kiamy rarybere.

—Hãbu hewa byre sohojiribile aõkõ irumy rÿimyhÿre.

⁵ Tai Satanasi heka Jesuisi ridyre heto ratyti tyre. Ibutumy hãwãhãkÿ ritedsinyre bede bede rÿirá. ⁶ Tahe Jesuisi-ò rarybere: —Kai biwalàhànanykeki, ibutumy aõna aõna adee ariwahinykre, ibutumy hãwãhãkÿ dinodumy tule wahe. ⁷ Wahõrõ heka rare. Inyõ-ò aõtxile ariwahinykre. ⁸ Idi

tahe Jesuisi dirawyònyde: —Deuxu-ò sohojile walàhàna biwahinykre. Kiamy Deuxu Rybe rarybere. ⁹ Idi Satanasi Jesuisi ridyre Jerusalē hāwā-ò. Biu-txi tahe rỹire, Deuxu dohodỹyna heto tyre-ki wahe. Tii narybede, kai Deuxu Riòre tyhy tate wana heka bexiwatxixinyke inihe karibi hetoratyti-ribi. ¹⁰ Ÿju riki arayrubunykre wa. Deuxu taỹjuò bede riywinyre aramykemy. ¹¹ Tule kia rarybemyhỹre Deuxu Rybe.

Awa riki manaõ riwotõmonyõtyhy.

¹² Tahe Jesuisi dirawyònyde: —Tule Deuxu Rybe rarybere: —Inyõ heka Deuxu uri urihixiõtyhy. ¹³ Rexihure tahe Jesuisi urihixina. Tahe Satanasi heka Jesuisi ririre. ¹⁴ Idi tahe Jesuisi ròsere Kalileia bede-ó. Deuxu Tyytybytyhy ruru tahe tii-wana ratximyhỹre. Ibutumy heka kia hāwā-ki ibededỹynana rierymy hỹreny. ¹⁵ Jesuisi heka dohodỹyna heto-ki ròbedeerydỹmyhỹre. Ibutumy tuu rarybere. Tuu realàmy rarybemy rỹimyhỹ. ¹⁶ Iribi tahe Jesuisi ròsere tai raumynyrèò, Nazare hāwā-ò. Sabado txuu tahe dohodỹyna heto-ò reamy raremy iwesehyyle. Tii tahe lamamy rỹire tyyriti-di rariakremy. ¹⁷ Tahe tamy Isaia tyyriti riwahinyrèò. Tahe Jesuisi riijemyhỹre rybeõ idi rariakemy. Tai idi rariare:

¹⁸ —Wanyrỹ Tyytybytyhy waki ratxireri. Rybe Tỹmyra wihikỹ inyko arotohodỹykremy. Iny aõkõ mahādu-ò rybe wihikỹ ararybekemy riwatare. Tule iny ròtena-ki rỹira mahādu, jiarỹ ariòlòdỹnykemy. Kiamy heka tamyreny ararybekre. Tule ruetỹmyra ariwahinykre ruetà mahādu-ò. Iny idi rarỹỹnomyhỹre mahādu-ribi, aritakre idi risinomyhỹreki. (Aõna aõnamy risỹnyrenomyhỹreki wahe.)

¹⁹ Tibedeubo Inynyrỹreny tajoi ritakremy ararybekre. ²⁰ Idi tasỹ ixyby riwerasenyre. Tahe riwahinyre ixyby kia hābu riyrubunomyhỹreò. Tii ronyre. Ibutumy kia dohodỹyna mahādu idi retehemy rỹimyhỹre. ²¹ Tahe Jesuisi ritelenomy rarybera: —Wiji idi rariará heka aõbo tamy ibededỹynanamy roire. Kia aõbo ritidỹyna-ki roireri ihetxiu. Kaimy tahe wiji rarybereri, jiarỹ heka tii rare. Tii adeereny tyyriti rariará wahe. ²² Tai tahe bede riòtiinyreny. Kia tahe aõmybo raryberakí. Tahe widee raryberenyre. Kaa heka Jyje riòrele ratxireri. ²³ Tahe Jesuisi ixityre tamyreny rarybere: —Aõu kaiboho wamy tarybetenyteri rybeõmy, myỹ manarybeke: Kai bexideytenyke, hàri, òhotibedu. Kiamy aõbohe wadee manarybebennykemy atxitenyteri:

Iwese Kafanaõ bedeki tewinyte wese ariwinyrenykeny wadi atxitenyteri, ahāwā-ki.

24 Adeereny inihe tuu ararybekre. Rybe t̄nydȳdu heka òmo rityhynyòtyhy ihãwãreny-ki. 25-26 Tahe iwitxiramy ararybekre. Ibedeu kia raremyh̄u, s̄owemy heka rama reamy raremyh̄ judeu s̄y mahãdu. S̄owemy wytese mahãdu heka ramamy rurumyhȳre. Biu heka roaõhykyre tai inataõ beõra weeremyh̄ wahe Sareta hãwã heka Sidõ bede-ki tii ras̄ynymyhȳre. Tahe Deuxu bede riywinyre Eliasi rakemy iny sohoji wytese-ò, r̄ys̄yna riwahinykelemy wahe. 27 Eliseu bedeu heka s̄owemy tybinadu r̄ymyhȳ. Sohoji inyle riteytenyre. Naamy heka inire. Tii heka Siria bede luduõ rare. 28 Kia dohod̄ȳna mahãdu heka ibutumy iu tamy rakyarananyre. 29 Rymyrenyre heka Jesuisi. Idi ret̄yhirenyre hãwãlò ratya-ò ridyrenyre. Idi rehurenykemy riwis̄nyrenyre. 30 Tahe Jesuisi inys̄owehek̄y-txi ralore. Idi rahenyre. 31 Iribi tahe Jesuisi rare Kafanaõ-ò, Kalileia bede-ò. Sabado txuõ txuõlemy heka Jesuisi iny ribedeerynymyhȳre. 32 S̄owemy heka iny ribedeerynymyhȳre mahãdu tamy awimy r̄yira, irybe dori awireki wahe. 33 Hãbuõ raremyh̄ dohod̄ȳna hetowo-ki tyytybybinahak̄y-di tahe taumywo-ki ratximyhȳ. Tai tahe tii ryryre: 34 –Jesuisi, Nazareludu, aõhebohe ijoï bis̄nykremy atxiteri? Biwahubenykre aõbo? Jiar̄y heka araeryre mobo taté. Kai heka Deuxu deõdu atxiteri. 35 Tai tahe Jesuisi tamy rarybere tyytybybina iumywo-ki riirykemy. Iribi riòlòd̄ȳnyre. Tahe idi rehure iutyde-ò idi iribi ròhõnyre. Hãbu aõhe ris̄nyõhyre. 36 Ibutumy heka iny ribedeõtiid̄ȳnyre. Iny sohoji sohoji widee rarybere: –Aõrybemy aõwe tii rarybereri? Timybo iny-ribi tyytybybina riteònyke. 37 Ibutumy timybo Jesuisi riwinyre, iyyynamy reare. 38 Tahe Jesuisi ròhõnyre Simaõ heto-ò idi rare. Simaõ riòrelahi webinadumy roire rubuna-di. Tai Jesuisi-ko tuu relyrenyre. 39 Tai Jesuisi ibireweribi-ò rare. Tahe irubuna iribi riòlòd̄ȳnyre. Tahe tii ritamad̄ȳnyre. R̄ys̄ynaõ tamy riwahinyre. 40 Ibutumy iny tawebinadu mahãdu didydenyde. Ibutumy Jesuisi riteytenyre tibò iratityre rilidimyhȳre. S̄owemy iny tyytybybina-di r̄yireri mahãdu riòlòd̄ȳnyre. 41 Iu tahe ryrymy reamy r̄ymyhȳ: –Kai Deuxu Riòretyhy tate. Tii Jesuisi rierymyh̄ tii Deuxu deõdu raremy, tyytybybina wahe. Tai Jesuisi tamy rarybere rybeõkemy. 42 Txu ijiramy Jesuisi rare bedero-txi ixisohojile. Iny s̄owemy riijemyhȳ. Itxi rearenyreu, iatysy deramy rekoamyhȳreny. 43 Tai Jesuisi rarybere tamyreny: –Jiar̄y heka Rybewihik̄y T̄myra arelyykre iwitxira hãwã Deuxu Òlõna T̄myramy arelyykre. Tuu Deuxu diwateònyde. 44 Jesuisi ibutumy Judeia mahãdu bede bedemy dohod̄ȳna r̄yiraki rotohod̄ȳmyhȳre.

5

¹ Jesuisi tahe aho ijà-ki rÿire Kenesare aho ijà-ki. Iny heka sōwemy Deuxu rybe-ò roholakemy iu rÿimyhÿ. ² Tii robire hāwòò inatximy roinyimyhÿre. Waxidumy mahādu heka rirahure rià-di risuhòreri. ³ Idi tahe rimyre hāwòò. Simaō hāwò heka rare. Tii tahe ixi-di ritaranyre beroro-ò. Tai tahe tii rexidelenomy relyyre. Kia iny rÿimyhÿ mahādu heka ribedeerynomy relyymyhÿre. ⁴ Rexihure rybe-ribi. Idi tahe Simaō-ò rarybere: —Make wa bera-txi. Rià bitidike. Bimykemy utura. ⁵ Tahe Simaō rirawyònyre: —Wanyrÿ, ruu wa wadireny aōkōhykylemy bedewadireny rareri, uturamy ho aōkō. Tarybete urenana anakre. Aritidikre heka rià. ⁶ Tahe ritidireu tahe, rià utura sōwemy rimyre, kia rautxienyre. Tule riykamyhÿ rià. ⁷ Talawò biòwa mahādu-ò rryyre: —Bòdòibedenyke bidiwawiòhenanybenykemy. Inatxi hāwò heka rÿxire. Ritÿxinyre utura-di. Ihy berahatxi-ò ijiramy riwisÿnymyhÿ ilawòreny. ⁸ Simaō tuu robire. Tii Jesuisi ratximyhÿre tahe tatiowomy resere Jesusiko-txi. Simaō Pedro rarybere: —Wanyrÿ, aribi kÿny iòhòmy arÿiòtyhy. Jiarÿ heka waòrarudimy rare. ⁹ Simaōboho bede riòtiinomy rabadewore aōma utura sōwemy tamyreny riwahinyraki wahe. Tii tuu iximy rarybere. ¹⁰ Ibutumy tiìboho mahādu ribedeòtiidÿÿnyrenyre Zebedeu riòre kia Txiau, Joaō-wana. Jesuisi rarybere Simaō-ò: —Brebuōmyke heka ikonana-ò heka utura bimyōkre. Wadee dori maaōmysÿdÿÿnykre hābu wadee bimykremy. Tamyreny biwatÿnynykre. Iwese utura temymyhÿte wese, wadee hābu wiji bimykre waerydÿÿna mahādumy rarekremy. ¹¹ Tahe waxidumy mahādu ibutumy kaa tawaxi tarià iu ririra Jesuisi riheludunykremy.

¹² Ròirenyre rirònyrenyre ibutumy hāwā-ò. Idi tahe hābuò rare ityyjyhykyle. Hābu Jesuisi robireu tahe resere iko-txi, rexitòenyre: —Wanyrÿ, adeewikeki biwateytenykre. ¹³ Jesuisi tamy tebò ritetemy rarybere: —Kohe, arateytenykre. Tii reytemy reare. ¹⁴ Tai Jesuisi rarybere tamy: —Inyō-ò tahe ijyyōmykre. Xiwena wahidÿÿdu mahādu-ò make. Tai maxiwekre tuu Moisesi bede riywinyre myna. Xiwenaō heka biwinomy biwahinykre. Moisesi rarybere wese wahe. Iny mahādu-ò heka biteòsinykre. Kia riteòsinykre teytetamy. ¹⁵ Tahe ihārele Jesuisi ibutumy rieryre. Sōwemy iny heka wirotyre raholakremy. Ijō nade aōma iwebinaduna ibina-ribi riteyteuykemy. ¹⁶ Tahe Jesuisi iribireny aōma rexitòenykremy rexitare.

¹⁷ Ijō txuu ròbedeerydÿÿmyhÿu, fariseu mahādu, bede ywina rybe bede erydÿÿduō-wana ronymyhÿreny. Ibutu hāwā hāwā-ribi dotydenyde wese tahe sōwerenyre, Kalileia

bede-ribi Judeia bede-ribi, Jerusalē hāwā-ribi. Deuxu deytēna Jesuisi-ki ratximyhỹ. Jesuisi hāwālò-ribi dobehede tii-wana, taerydỹ̃na mahādu-wana wahe. Tahe sōwemy iny iube-ki ributunymy rononymyhỹre. ¹⁸ Iny mahāduō heka hābu iumymy manadu kididydenykemy ratxireri Jesusiko-ò ritidirenykemy. Idi tahe hābu webinadu wahe Jesuisi-ò rakemy bede riywinyre. Inatyhyle riatyhynyre. ¹⁹ Inysōwerekī tahe tamy rehemynyrenyōtyhy. Tai tahe hetoratyti-ò raòwònyre hābu webinadu-di. Iribi tahe diberesedỹ̃nyde reroti-di. ²⁰ Jesuisi robire, rieryre aōma rityhynymy ratxirenyreri. Hābu-ò Jesuisi rarybere: —Wy, aòraru heka raixāwidỹ̃nyra. ²¹ Tahe fariseu mahādu he widee raryberenyre: —Mobo kia hābu ratxireri, timyhe tu kia irybeōna rybe-di. Deuxu-ò kia rybe ibinatyhy rare. Deuxu sohojile òraru-ribi iny riixāwididỹ̃nymyhỹre. ²² Tahe Jesuisi rierymyhỹ timybo rexinohòtinymyhỹreny. Tai rarybere: —Aòherekibo kia wesemy texiraykynytenyteri. ²³ Tibohe irutaōre webinadu-ò rybe: —Aòraruna reixāwididỹ̃nyra ada myimy mariake aōbo. ²⁴ Deuxu Riòre Hābutyhyhykỹ jiarỹ rare. Tai waruruna wadee Deuxu Riòre òraruna ixāwididỹ̃nyamy. Katahe bierybenykre inatyhymy aōbo rarybereri: —Myike, abyre biwymy asỹ-ò ta mahe. ²⁵ Hābu tabyre rimymy tahe aōwesele tasỹ-ò rare. Deuxu riwowydynymy rare. ²⁶ Sōwemy iny ribedeòtiidỹ̃nyreny. Riwowydynymy rỹimyhỹ. Tiiboho raryberenyre: —Aòwitxiramy wiji inyboho robirenyra. Tiu juhuu tukōre-ribi wahe robirenyra.

²⁷ Iribi tahe nieru bede dinodu nieru mynydumy robire, Levi heka inire. Tii heka raaōmysỹdỹ̃nymyhỹ titxibo nieru tarasana-ki. Jesuisi tamy rarybere: —Manakehe wawana. ²⁸ Tahe taaōna ibutumy ririre, idi ihemy rare.

²⁹ Levi tahe taheto-ki roxinaō riòlòdỹ̃nyre Jesuisi dee. Tamy rehemynyre nieru arisidu mahādu, tule fariseu mahādu. Ibutumy iny iarixina mahādu. ³⁰ Kia fariseu mahādu kia bederydỹ̃dumy mahādu tyyritirybedỹ̃du mahādu kie heka aōbina binahylemy rarybereri Jesusimy. Jesuisi terydỹ̃na mahādu-wana kiamy rarybereny: —Aòherekibo kaiboho teroxitenyteri, nieru arixidu-wana, iòrarudu sōwe mahādu-wana. ³¹ Jesuisi rirawyònyre: —Iny awimy ratxireri-wana, òhotibedumy reaōmyhỹre. Webinadu mahādule ta tuu reamyhỹre. ³² Òbiti mahādu-ò aōkō heka jiarỹ anade rybemy. Tiibohole heka ixi-txi tōhòti reakemy idi watxireri.

³³ Tahe tiiboho Jesuisi-ò rarybere: —Joaō heludu mahādu roxiōmy txumy rỹire. Tule tiiboho rexitòenyreny. Sōwemy rexitòenymyhỹre fariseu mahādu erydỹ̃na tule. Tahe aijoi

tahe riroximyhÿrenyrene riõmyhÿrenyrene. ³⁴⁻³⁵ Tahe Jesuisi tamy rarybere: –Hãwyyemy heridu tÿmyra ijoi ratxikeki heka tiu itobidÿÿnana mahãdu wahe. Kia heka riroximyhÿke. Kia tahe tÿmyra iribireny ratakreu, iijoi mahãdu renarehekre. ³⁶ Tyky tÿmyraõ tiu tykytyby dõbõnamy iny ritidiõtyhy. Timyki dori wii wiõbydÿÿõna. ³⁷ Vÿi tÿmyra heka tiu aõirõdu tyky watxiwe yla tyby-õ rarareõmyhÿre, tukeki ta kia raykacre idi vÿi urile rejujukre. ³⁸ Vÿi tÿmyra heka hyna tÿmyra-õ rararemyhÿke. ³⁹ Inyõ vÿi tybyhykÿ riõkeki, itÿmyra rexitõenyõtyhy. Kiamyki rybe. Vÿi tyby dori itÿmyra-ribi awi rare.

6

¹ Judeu elehydÿÿnymyhÿreny txu kia idi rekoarenyre maixõmoho-di. Ierydÿÿna mahãdu rimyra maixõmo, maixõmo, debõ-di riroxitytxiwimyhÿ riyemy idi rare. ² Fariseu mahãdu tuu robire. Tamy rÿÿraxire: –Aõherekibo kia wese tewinyteri. Kiamy heka iwidÿÿõmyke bede ywina rybe rarybemyhÿre judeu elehydÿÿnymyhÿrenytxumu. ³⁻⁴ Jesuisi tamyreny rarybere: –Ihetxiu Davi tamahãdu-wany rama risareu, Deuxu dohodÿÿna hetowo-õ rirõnyre. Tai Davi xiwena rÿsÿnale taijoi-wana rirÿsÿre. Xiwena wahidÿÿdule heka irÿsÿdure, inywitxira ta aõkõ. ⁵ Jesuisi ritÿnynyrene tamy: –Hãbutyhyhykÿ jiarÿ rare, Deuxu Riõre wahe. Kiata sabado wedu jiarÿ rare, elehydÿÿnymyhÿrenytxu wedu wahe.

⁶ Ixityre ralore dohodÿÿna mahãdu heto-õ rõbedeerydÿÿkemy. Hãbuõ tai rare tebõ rabinamy. ⁷ Tahe fariseu mahãdu Jesuisi-õ retehere. Riteyteynykemy kia hãbu webinadu judeu elehydÿÿnymyhÿrenytxu. Rxiwodohonanyre. Kiatxuu tii riwinyrekeki tahe ribinanyke judeu elehydÿÿnymyhÿrenytxu, riwinykeki wahe. ⁸ Jesuisi rierymyhÿre aõmybo tiiboho raraykynyrenyteri. Jesuisi tamy rryre, –Aõma hãbu debõbina-õ: –Mynyike ini, ityareny-txi. ⁹ Tahe fariseu mahãdu-õ Jesuisi rarybere: –Arÿÿraxikre inihe adeereny, awire adee ka hãbu debõ ariteytenyke sabado txuu. Aõbo adeereny awire sabadotxu widÿÿ. Aõwihikÿwidÿÿmy aõbo ada aõbina widÿÿmy. Rubu-õ wahidÿÿ aõbo ada rubu-ribi itarasa aõbo. ¹⁰ Retehere! Ibutu-õ idi hãbu-õ rarybere: –Ebõ inihe biditeõsinyke. Tiu hãbu tebõ riteõsinyreu tahe, reyttere. ¹¹ Reburerenyrene heka. Timybo Jesuisi risÿnyrenykeny rexinohõtynyrenyrene.

¹² Idi tahe Jesuisi heka hãwãlõraty-õ rare ixitõedÿÿmy Deuxu-õ. Rureherehemy heka tamy rexitõenymy bede idi rÿire. ¹³ Txuijaramy tahe ludu mahãdu-ribi waõinatxi reurõ taheludutyhy mahãdu ritare. Tarybemy rybedumy rininirenyrene. ¹⁴ Sohoji ijõ heka, Simaõ inire, Pedromy idi

ranire, ijō tahe Andre rare, iseriōre. Idi Txiau, Joaō, Filipi, Bartolomeu. ¹⁵ Mateu, Tome, Tadeu Txiau, (Kia Txiau heka Afeu riōre rare.) Ijō Simaō Kana bedeluduō rare, tasubedeluudure. ¹⁶ Juda Txiau riōre, ijō Juda Isariō tahe Jesuisi tyhedỹỹdu rare. ¹⁷⁻¹⁸ Jesuisi dobehede bedero-ò hãwãlò-ribi. Tahe sōwemy iny iheludu mahãdu tii-wana rỹimyhỹ. Judeia bedede mahãdu Jerusalẽ hãwã mahãdu. Tule Kalileia bedede, Tiro hãwã, Sidō hãwã mahãdu. Tiiboho wii ributunymy hãwã mahãdu Jesuisi-ò roholakemy idi reytekemy. Kia tai ròteytedỹỹmyhỹ. ¹⁹ Ibutumy Jesuisi tyky-ò tamy adereximy risỹnymyhỹre adeytena iribi ròhònymyhỹ.

²⁰ Tamyreny retehere tai ibutumy rierynanyreny: — Kaiboho aōkōreny-ki, beysebenyke. Deuxu Òlona dori ahōrōreny rare. ²¹ Rama arasareri-wana beysabenyke. Bi-hydumy dori mabekre. Tule tahinyteri wana beysakre ihewo-ribi. ²²⁻²³ Beysamy butxuenyke, inyō umy radònykeki tule. Kaiboho dori Deuxu Riōre tetyhynytenyete jiarỹ ti-ire, Hãbutyhyhykỹ Riōre wahe. Kia mahãdu eramy ijira Riōre rỹikeki beysake. Beysa tyhyki tai. Biu-ki dori aōwiwihikỹ bitakre. Deuxu rybemy rybedu mahãdu tule rotỹỹnyreny iòraru-ki. ²⁴ Kobe làhãxe kaiboho ityhy mahãdu abedesanareny dorihe rexihura. ²⁵ Kobe làhãxe ahãdyreny mahãdu, aramasanareny dori rehemynyre. Kobe làhãxe abedesareny, ahinanareny dori abrunareny rehemynyre. ²⁶ Kobe làhãxe atyhydỹỹ sōwereny tule dori. Ilabiereny rybemy rybedutyhy aōkō rityhynyreny.

²⁷ Warybe-ò taholatenyteriki inihe ararybekre. Aòludu luumy atxibenyke amykyaradureny-di, awimy idi mabeke. ²⁸ Ibinamy aōma umy rarybekeki aōbinahakỹ riwinykeki, tamy bexitòenykre Deuxu-ò. ²⁹ Aòsỹny-ribi anahatenykeki iyre-ribi iwyòdỹỹmy tamy bexirahòreke. Inyō atyky riwykeki tule tamy arahana biwahinyke. ³⁰ Iwese aōtxiu aōna inyō adee rexitòenykeki, tamy biwahinyke ixyby iribi iwydykōkemy. ³¹ Aōbina inyō adee riwinykōkemy atximahãte. Iwese tiu kia aōhòkỹmy inyō isỹdỹỹòmykre. ³² Kai aluu mahãdu sohojile iluuòmyke; òrarudu mahãdu dori tuu rỹimyhỹre. ³³ Kai aery mahãduòle tawotòemahãte, timyki Deuxu-ribi aō atarasaōna. Iny itxỹte iehhe mahãdu dori widee rawotòemyhỹre. ³⁴⁻³⁵ Òrarudu mahãdu heka widee rihuòtemyhỹre. Iribi tahe iwesele ixyby kidiwykemy idi riwisỹnymyhỹ. Kai ta buhuòtemyhỹke idi tehuòtete ixyby iraròsòkōmyke. Tukòkeki ta Deuxu-ribi aō atarasaōna. Aòludu luumy atximahãbenyke. Tai Deuxu-ribi aōwiwihikỹ bitakre. Tai Deuxu wihikỹ riòremy mabekre. Tii dori inywi-ò inybina-ò awire. ³⁶ Awimy kaiboho boibeke, iwese boreny awimy biu-ki ratximyhỹre wese.

³⁷ Inyõdee kyarakõmyke tai Deuxu adee rakyarananyheny. Inyõ taðraruna biixãwididỹnyõkeki, Deuxu tahe aðraruna riixãwididỹnyõkre. ³⁸ Ainytyhyke inyõdee imyna Deuxu adee rainytyhynanyhykre. Deuxu ibutumy aõwi adee riwahinykre. Tiwesebo tõwahite wesemyna idi Deuxu adee rõwahikre.

³⁹ Aõmybo ribedeerynyre ijyyõmy relyyre: —Inyõ ruetã heka riwiðhenanyõtyhy iwitxira iny ruetã. Tukeki heka hãloo-txi wiwana resekre. ⁴⁰ Ierysỹdỹỹ iðrysỹdỹỹdu, kia ratyre aõkõ ratximyhỹ. Kia uladu ratyyritinyre nihikỹmy tahe erysydu tiu taerysỹdỹỹdu ratyre ratxiõmyhỹre. ⁴¹⁻⁴² Òwòrukre nihikỹ aruety-ki roire. Aõherekibo aseriõre ruety-ribi òwòru rỹnysiõ tarasamy tewisỹnyteri. Kia heka itxenadỹỹdu tate. Juhuu òwòrukre aruewo-ribi bitakre. Idi tahe betehemy iruewo-ribi aõsõmo bitakre. ⁴³⁻⁴⁴ Òwòru wihikỹ tiu bederaty binaõ riwahinyõhyymyhỹre. Tule òwòru binahakỹ bederaty-wimy raratynyõmyhỹre. Òwòru raerymyhỹre iraty-ò itxere rỹimyhỹreu, beraty-ò retehemy awire ada ibinare aõbo beraty-ò retehemy awire ada ibinare aõbo. Figoraty uvaraty tiu iwitxira òwòru-ribi raheõmyhỹre. ⁴⁵ Hãbuwi heka aõwimy rotỹỹnymyhỹre iwo-ki tuu rỹimyhỹremyna. Tule hãbu bina aõbinamy rotỹỹnymyhỹ iwomy tuu rỹimyhỹremyna aõbina bina. Inyõ dori aõmy raraykymyhỹremyna rarybemyhỹre.

⁴⁶ Kai rarybere boholaõkeki aõbo biwinykeki. Uritere wanidỹỹõmy. Wanyrỹmy tiwaninimyhỹtenyete tahe warybemynamy atxõhyylemyhỹtenyete. ⁴⁷ Tiwese hãbu warybe riwinyre wese adee ararybekre. Tiu heka ariteõsinykre. ⁴⁸⁻⁴⁹ Hãbuõmy akoreny arelyykre. Tii warybe-ò roholare idi imynany rotỹỹnyre. Tii kiata taheto riwinyre manadelemy ria-di. Beðra iheto reseõhyyre manatyre-ki relereki wahe. Ikõmyta warybe-ò roholakõre, kawese rotỹỹnyre. Taheto uritere sukile riwinyre. Beðrau ta, urile resere. Ikyhynakõreki wahe. Kiamyta rotỹỹnyre warybe tyhydỹỹdu-ò idi ityhydỹỹdukõ-ò.

7

¹ Jesuisi tarybe rahu-di tahe Kafanaõ hãwã-ò rare.

² Tai Roma soldado dinoduõ tai ihỹmyhỹ. Teòduõ tahe binamy irubu iòhõmy roimyhỹ. ³ Soldado dinodu Jesuisini-ò roholareu tahe, iðrysymy rarybere. Taita judeu mahãdu kia matuariõ rexitõenyre aõma kididykremy riteytenykremy kia webinadumy roireri. ⁴ Tahe Jesuisi nade juhu be kiamy Jesuisi rarybere: —Ka hãbu heka awi biwiðhenanykre heka. ⁵ Ka hãbu

heka waijoi luu nihikỹ rare ihyymy ta dohodỹyna hetoõ riwinyre waijoi-ò. ⁶⁻⁷ Tai tahe Jesuisi rare tiiboho-wana. Tehe-myny sỹ iòhòmy rare. Idi tahe ryrowetyakile Jesuisi-wana wii riòbynyre. Aõma soldado dinodu kia biòwa-ò wahe. Rarybere he aõma soldado dinodu kiamy rarybereri: —Noõmy heka. Ihãrele teka awimy rareòle heka bedehe mynyke. Awi tate timy heka anaixiranyõtyhy dori raixỹruwỹhỹre alau adee ix-itòedỹỹ-ò aõma dori adee rybe rỹikekile aõweseleke wadeòdu kia reytemy reake. ⁸ Jiarỹ dori inydee radỹỹdu jiarỹ rare. Aõbo riwinykemy. Kia riwinyre warybemynale kia heka jiarỹ rare. Wadeòdu-ò rarybewãhãraki heka: —Kia biwinybenyke. Riwinymyhỹrenyre. Kai tule marybeke, beyteke. Tahe aõwese reytemy reake. Robedeòtiidỹỹnyre, kia tuu rarybereki wahe. ⁹ Jesuisi ròkesereri kia rarybemyhỹò wahe: —Jiarỹ ka tiu judeu mahãduy-ki. Hãbuõmy rabiõ watyhydỹỹnamy. Rabireri riwatyhynreri rabireri. ¹⁰ Soldado dinodu deòdu ròòkesereri. Ixyby reytereri idi ronyre.

¹¹ Jesuisi rare terydỹỹna mahãdu-di ijõ hãwã-ò. Naĩ hãwã-ò heka rare. Kiemy rahyymy heka rahyyre. Sõwemy iny iheki rare. ¹² Hãwã ijò-ki rehemynyreu tahe kia ibutumyle rehemynyre. Sõwemy iny rubudu rareò wabede-ò. Weryrybòò rurure. Ise, wytese, heka iriòre sohojihyylere. Iny sõwemy heka riheludunyre tahi-di taibru-di. ¹³ Tai Jesuisi tuu robireu, idi rexiwòtenymy kamy rarybere: —Ibrukõmyke! ¹⁴ Jesuisi debò ritidire caixaõ-ò. Iu idi itxyydu ruhurenyre. Idi tahe rarybere: —Weryrybò, bexixake wahe. ¹⁵ Weryrybò rexi-xamy reamy ronyre. Idi rarybere. Tai tahe Jesuisi ise-ò riwahinyre. ¹⁶ Ibutumy tasỹ mahãdu ribedeòtiidỹỹdunyre. Tai tahe Deuxu riwowydynymyhỹreny: —Ebe, aõherewe, Rybedu nihikỹ kỹnyhe wixijumy inydeereny rehemynyre. ¹⁷ Kia taheka bede bede hãwãmy Jesuisini reare.

¹⁸ Joaõ heludu mahãdu ibutumy tuu relyyre iko. ¹⁹ Inatxinareny Joaõ riteònyre Jesuisi dỹỹraximy kamy wahe: —Kaiwe nodu aõbo tate, ada txiò aõbo ini nodutyhy ariraòrenykre? ²⁰ Idi Jesuisi-ò ròirenyre tuu itỹỹraxidỹỹmy; —Kai we nodutyhy tate? Ta txio aõbo ini ijõ ariraòrenykre? ²¹ (Iu ta Jesuisi yla aõkõ webinadu, binanamy binana mahãdu riteytenyra, tyytybybinamy ykydu mahãdu, iruetà mahãdu sõwemy tule.) ²² Irahudi ta Jesuisi rarybere Joaõ ijoi-ò: —Bòòsebenyke. Ibutumy kamy tabitenyta taholatenyta Joaõko-ò tuu belyybenyke: —Iny ruetà bina mahãdu retehererimy, Iny rutiàre mahãdu rariarerimy, tyybinamy binana mahãdu reytererimy, iny nohõtity mahãdu roholarerimy. Iny rubu mahãdu heka rubu-ribi rexixarerimy, urimynodu mahãdu heka Rybewihikỹ Tỹmyra-ò roholarerimy. ²³ Iny bedesa heka

rare, warybe tyhydÿÿdu mahädu.

²⁴ Joaõ heludu mahädu iribi rõhõnyreu tahe Jesuisi rarybere Joaõ bededÿÿnanamy: —Aõmybo wahe Joaõ-di tõhõtintytenyte aõmy tubedi nohõtintyrenyre tamy itxerena bederahy tõitenyteki wahe. Otxirarade wese yhy-ki idi tahõtintytenyte.

²⁵ Aõma häbu urimynodutyhy aõbo tahõtintytenyteri. Häbu tyywihikÿdiremy tahe tahõtintytenyte. Iwese iòlò taheto wihikÿ-ki ratximyhÿre wesemy aõbo tahõtintytenyteri.

²⁶ Wadee manarybeke aõbo betehékemy tahõtintytenyteri. Deuxu rybeduõmy aõbo tahõtintytenyte. Inatyhy tii rare. Kia ratyre heka tii rare. ²⁷ Aõma dori tyyriti-ki rarybemyhÿre: —Tii heka wakoki kadehemynykemy ratximyhÿre, tamy re-

lyykemy, ryõ riywinymyhÿre.

²⁸ Inatyhy kaa rare. Tie heka ibutu häbu ratyre ratximyhÿre. Ihärele tahe inyõ Deuxu Iòlòna-ki ratxikeki heka iratyre ratximyhÿre. ²⁹ Tahe nieru butudÿÿdu mahädu kia-ò roholare. Tule sõwemy iny kia-ò roholare. Tiiboho Deuxu bede ywina tyhydÿÿdu mahädu roire. Tule Joaõ Sebedÿÿna mahädu roire.

³⁰ Fariseu mahädu tahe, bede ywina erydÿÿdu mahädu tahe Deuxudeewina dera rare. Tai Joaõ-ò ratisebemy roiõtyhy.

³¹ —Mowesebo heka wijinabòdu mahädu wesemy ratxireri. ³² Uladu mahädu wesemy tiiboho ratxireri. Tiiboho ijõ uladu mahädu-ò ryrymyhÿre: —Inyboho rawiunyre, tahe kaiboho teseõtyhy. Wobina wiu rawiunyre tahe kaiboho tahinyõtyhy. ³³ Joaõ Sebedÿÿdu renareherenyõmy rÿire, vïi riõõre. Ihäre tahe kaiboho tarybete: —Tii tyytybybina-di ihÿre. ³⁴ Häbutyhyhykÿ jiarÿ rare, Deuxu Riõre wahe. Jiarÿ reroximyhÿre tule reõmyhÿre. Tai tahe tarybemahäte jiarÿ wabyre nihikÿlemy wamomohõkÿremy. Jiarÿ riki õrarudu li-

inatyhy heka jiarÿ rare, nieru tarasadu liina wahe. ³⁵ Ihäre tahe aõikõkõlemy heka taraykynymyhÿtenyte ihäre taheka õbitilemy ixi-di tahõtintymahätenyte.

³⁶ Fariseu mahäduõ heka Jesuisi ritobinyre taheto-ò roximy. Jesuisi tahe rare idi ronyre roximy. ³⁷ Kia hãwã-ki tahe hãwyyõ rasÿnyre, wydena wahe. Tii heka Fariseu heto-ki riroxirerimy roholareu, tii tule rare. Tahe hyna õwyhykÿ rimyre. Alabastro aderõnahynani rare. ³⁸ Hãwyy tahe Jesuisi hewomy ronyre, iòhõmy. Tahe aderõna ritxiwire iwatyre. Tule iwa-ki ruworuwõmy ratximyhÿ irube-di iwa risuhõra idi irade-di rabunyre. ³⁹ Fariseu kiamy robireu, ixideele rarybera: —Kia häbu Deuxu rybeduõ aõkõ rare. Tuukeki tii hãwyy rieryke aõhãwyybo tii ratxireri. ⁴⁰ Jesuisi tahe fariseu-õ rarybere: —Simaõ, adee ararybekemy watzireri. Simaõ tahe rarybere: —Manarybeke Waerydÿÿdu! ⁴¹ Tahe Jesuisi rarybere: —Nieru huõteduõ heka inatxi häbu-ò nieru

riwahinyre. Ijõ 500 rihuòtera, ijõ tahe 50my rihuòtera. ⁴² Idi tahe hãbu inatxi nieruõhyymy rÿire òòsemy tanieru tamy. Tai tahe nieru huòtedu riwotòenyrenyrene tahe ritusanyre, wiwana iòwy riixãwididÿÿnyre. Tibo huòtedu ilàhànadÿÿdu tyhyre. ⁴³ Simaõ dirawyònyde: —Kia òsana 500my rihuòtere. Tahe Jesuisi rarybere: —Inatyhy rare. ⁴⁴ Jesuisi tahe hãwyy, ri-ijemy, tahe Simaõ-ò rarybere: —Kahãwyy ini bidiijeke. Jiarÿ nadehemynydeu, tii tarube-di wawa risuhòra. Kai beeò tadiwyòte. Tii tarube-di riwawasuhòra. Iu tarade-di riwawarabunyra. ⁴⁵ Kai tiwawehityhynanyõte rehemynyrau, tii tahe riwaatyõhyymy ratxireri. ⁴⁶ Kai warade-ki òlÿre tetxiwiòta tii tahe aderòna wawatyre-ki ritxiwire. ⁴⁷ Tai tahe adee ararybekre. Tii inatyhymy waluure. Taòraruna ixãwidÿÿna-ki. Inyõ iòraruna ibutemy raixãwidÿÿnymyhÿreki, tii inatyhymy aõkõ taòraruna ixãwidÿÿdu luure. Ijõ tahe inatyhyhykÿlemy taòraruna ixãwididÿÿdumy reamyhÿre. ⁴⁸ Tai Jesuisi hãwyy-ò rarybere: —Aòraruna reixãwididÿÿnyre. ⁴⁹ Tai roxidu mahãdu widee raryberenyre: —Mohãbubo kia rare? Tii òraruna riixãwididÿÿnyrerimy. ⁵⁰ Tahe Jesuisi hãwyy-ò rarybere: —Athydyÿÿnamy textarasadÿÿnyte aòraruna sòwe-ribi biu-ò hena tetateri. Mata hÿny.

8

¹ Rexideleny raremyhÿ ralòralòmý hãwã hãwã ikòkòmý reamy rare kia aõma Deuxu Rybewihikÿ Tÿmyra relyymy rare. Tai ierdÿÿna mahãdu waòinatxi reuròmý idi ròirenyre. ² Tule hãwyyõ tiiboho wana ròirenyre Ijõta Marie Madalena heka rare. Juhuu tahe tyytybybinahakÿ-di raremyhÿ. Idi debò inatxi reuròmý tyytybybina iribi riòlòdÿÿnyre. ³ Ijõta Joana Kusa hãwyy rare. Tii iòlò Herodi heka aõmysÿdÿÿdu heka rare. Tule ijõ hãwyyõ Susana inire. Idi tule ihona hona Jesuisi taijoi-wana ibutemy tanierureny-di riwiòhenyrenymyhÿre.

⁴ Idi iny sòwemy titxiribibo dirahude kia-ò. Kia mahãdu-ò heka Jesuisi ribedeerynyre ijyyòmý. ⁵ Alòbòròna-di dehudu heka ròhònnyre taoworu-ò. Alòbòròna-di imahãdu ijõ ryro-txi resere. Tai heka iny rariamyhÿre alòbòròna tyre-ki. Nawii tule tuu riroximyhÿ. ⁶ Mana rotysu-txi ijõ rejuxunyreri mana rotysu-txi suu dori ibututere tai tahe iraruxiòlemy raumynyre. ⁷ Ijõ tahe edey-txi resere. Raumynyreu tahe edemy riòhÿtÿnyre. ⁸ Ijõ resere suwi-txi. Tai ta raumynyre idi sohoji alòbòrònaty-ribi 100my raratynyre. Jesuisi tamy rarybere: —Kaiboho òhòtirenidykeki heka inatyhymy warybe-ò boholabenyke.

⁹ Tai tahe Jesuisi-ò rÿÿraxinyrenyrene: —Aõwe kaa tekewesenanyteri? ¹⁰ Jesuisi rirawyònyre: —Kaiboho heka teertyenyte

aõbohe wasimy ijyy rare Deuxu dori adeereny ritÿnynynyre. Kia tahe rare, Deuxu Iòlòna aõmydÿÿnana wahe. Ijõ iny-ò tahe rarybere ijyy-di relyyre.

Tai robikre tahe, rieryõtyhyke. Roholarenkyre tahe rieryõtyhyke, timybo juhoo Deuxu rybemy rybedu mahãdu rarybere wese.

¹¹ Aõmybo kia aõijyybo kia rare wahe. Alòbòròna heka Deuxu Rybewihikÿ wese rare. ¹² Ryyro-txi resere heka ijohonadu wesemy rare. Deuxu ijyy heka resera ede sõwey-ki. Tii heka Deuxu Rybe-ò roholamyhÿre mahãdu wese rare. Idi tahe Satanasi heka ritamyhÿre iworeny-ribi. Tai rityhynrenykyõmy idi biu-ò rahenyõkremy. ¹³ Ijõ tahe manasuõ-txi resere heka, kia Deuxu Rybe-ò roholamyhÿre mahãdu wese rare. Rybe-ò juhoo roholamyhÿre deysana-di rityhynymyhyre. Kia manatyre resera heka irarutiõhykre. Iny mahãdu wese heka rare. Idi ikyhynakõreki, iwodelòlòtõmoreki urile tatyhydÿÿna riatymyhyre. ¹⁴ Ijõ tahe edesuyky-txi resere heka, kia Deuxu rybe-ò roholamyhÿre, idi iworekena sõwemy, iaõdelòlòtõmomy, idi ityhyna wahe urile riòhòtÿnymyhyre. Tai ròwiòhenadÿÿõhyymyhyre Deuxu tyhydÿÿna-ki. (Kia tahe alòbòrònaõ ede yky-txi resera tahe iny umy wixira wesemy heka rare. Iny umy tyhyna idi ratxireri heka kia wesemy kia ede-txi iny reseremy. Aõma kia inytyhyna ratxireri. Tiu heka ityhydÿÿna riòlòdÿÿõtyhy. Kia alòbòròna tahe tai heka rokuõtyhy.) ¹⁵ Kia ijõ alòbòròna suu witxi-txi reserá tasÿ iwixira inywesemy rare. Kia ijohonadu aõma rierymyhyre. Irayky-ò ralòmyhyre. Kia iwotyhywo-ò õbitimy ratxireri tahe, õbitilemy aõ riwinymyhyre. Iwese kia alòbòròna sõwemy raty rawahinyre wese tahe tii rare. ¹⁶ Ijõ ijyy tahe kiamy roire. Uritere inyõ loosònaõ rideõmykre butxi rawo-txi ada herina rawoõ-txi aõbo. Loosòna bidekre bedewiõ-ò. Tai tahe ibutumy bede ritoosònanykre. ¹⁷ Aõ heka tai wasimy ratxiõhyymyhyre. Aõutxumy dori ibutumy erynamy rarekre. ¹⁸ Tahe bexijebenykre ijohona-ò. Kia sõwemy idi rÿirerimy ihÿre heka sõwemy rimykre. Kia urihimyò iwo-ki rÿireri heka iribi ritakre. Idi ibutumy rÿireri heka iribi ritakre. Urihimyò iribi iny ritakre. Urihimyò iwo-ki rÿireri heka hulemy iribi ratakre.

¹⁹ Jesusise, tariòreboho tamy doide. Tii ròbedeerydÿÿmyhÿki isirare tamy dehemysÿ iny sõwe òraru-ki. ²⁰ Tai inyõ Jesuisi-ò rarybere: —Adihe wa aseriòre boho hewa ahanakile ratxireri umy robikemy ratxirenyreri. Adeerarybekemy. ²¹ Tai Jesuisi rarybere: —Waseriòre wa kia Deuxu rybe erydÿÿnaõ rare. Kia tamy roholamynyrela heka rityhynymyhyrele heka nadi wesele rare. Tii-wana iwese waseriòre wesele rare.

²² Iribi tahe hãworo rorukurenyreu Jesuisi rarybere: – Ròkòireny kanawe-ribi ijà-ò. Idi tahe roirenyre. ²³ Jesuisi ròròmy tòru-ki. Idi tahe yhynihikỹ òbònihikỹ-wana tamyreny reare. Ruberurenyre tiiboho rỹmyrenyke lau. ²⁴ Tai tahe wylemy riixixanyreny: –Erydỹdu, Erydỹdu rekekoarenkyre berahatxi-ò. Idi Jesuisi donomy deademy tahe yhy dee rarybere: –Biyryke, Biyrykewa. Yhy ruhummy resere. Òbò tule ruhummy ibutummy riyryre, iny rurukre. ²⁵ –Kaiboho tiwexe ainatyhynareny? Tiiboho rabedeòtidỹỹmy ruberummy widee raryberenyre: –Aõhãbuwe kaa rare. Yhyhykỹ dori òbò dori irybemy reòbyreri.

²⁶ Kanawe-ribi ijà-ò rehemynyrenyre Kerase bedè-ò kalileia aho weribi-ò. ²⁷ Hãbuõ heka tamyreny dobehede hãwãhãkỹ-ribi tamyreny dobehede. Tiiboho riòtyrònny hãwãro-ribi iu ta tyytybybina-di ratximyhỹre hãbu tiu rexitynyõhyymyhỹre taty-di hyymyhỹre. Kiamy wabedekihyyle ratximyhỹre. ²⁸ Jesusimy robireu tahe bedetxile resere tairy-di ryryre: –Aõhebo biwasỹnykre Jesuisi. Kai Deuxutyhy Riòre atxiteri. Uritere aõhòkỹmy wasỹdỹỹomykre. ²⁹ Tahe Jesuisi heka tyytybybina iribi riòlòdỹỹnyre. Sõwemy dori riuwinyre hãbu rimymyta. Riuwinyre idi rihure. Tai heka tii uritiere womati reroti-di ritaataamy riijemyhỹre. Ihãre tahe ixi-ribi riòròmnyhỹre. Tai bedero-txi reamyhỹre tyytybybinamy rawonymy. ³⁰ Idi tahe Jesuisi rỹrãxire tamy: –Mobo anire? –Sõwemy wanire. Tyytybybina sõwemy dori tuu rexiykynyreki. ³¹ Tiiboho raryberenyre: –Uritere bedebinahakỹ-ò wateòdỹỹrenyõmykre. Uritere sỹu-ò noõma rarekremy hãlootxi-ò. ³² Iu tahe ixỹni juramy riroximyhỹ hãwãlò-ki. Tai tyytybybina mahãdu Jesuisi-ò rarybere: –Biwateònyõke. Kowa ixỹnijura-ò biwateònybenyke aralorenkykremy. Tai Jesuisi riròtenyrenyre. ³³ Iu kia hãbu-ribi tyytybybina ròhònyrenyreu tahe ixỹniwo-ò ralòreki wahe. Raòlònyra ijò-di rejuxunyre taraò wahe. Ibutummy ahoro-txi rejuxunyre. Ibutummy rururenyre berahatximy. ³⁴ Ixỹni-di itxeredu mahãdu ibutummy rajiranyra hãwã-ò tule relyyrenyre tuu iny rasỹnymyhỹre mahãdu-ò. ³⁵ Tai iny dirahude tamy itxeremy. Idi tahe rare Jesuisi-ò. Hãbu robimyhỹrenyre tatyky-di rononymhỹ ibutummy rexiywinymy Jesuisi-ribi iòhòmny ronyre. Kia iny mahãdu heka sõwemy ruberure rabedeòtiidỹỹnymyhỹre. ³⁶ Ibutummy relyyre. Kia tyytybybina timybo aõhebo rotỹỹnyremy. ³⁷ Kia Kadara bedè ludu kia mahãdu tahe rexitòenyre Jesuisi-ò iribi ròhònykremy, ilau ruberurenyreki wahe. Idi tahe Jesuisi ròkòsere ixybyle reare hãworo-ò. ³⁸ Hãbu tahe rexitòenyre Jesuisi-wana rakremy,

kia tyytybybina-di iwo-ki ratximyhÿ wahe. Tamy rarybere: ³⁹—Aõkõre bõkese aheto-ò. Ibutumy belyyke aõbo adee Deuxu riwinyremy. Tai ta ibutumy hãwã hãwã-ò relyyre aõhebo Jesuisi risÿnyremy.

⁴⁰ Kia iny sõwehekÿ mahãdu heka teysa-di rimyre ridyremyhÿre riraòhyymy ratximyhÿreny. ⁴¹ Kia hãbu dohodÿÿdu hetowo erydÿÿdu tahe nade Jesuisi-ò. Tii heka dohodÿÿnana dinoduõ rare. Ijairu inire Jesuisi-ò sutxi resere: —Mynake wasÿ Jesuisi ⁴² Jiarÿ wa wariõre sohojile rare waòinatxi reuròmÿ iwyra. Tii ka rurukremy roireri. Idi ta Jesuisi rare isÿ-ò. Sõwemy iny Jesuisi riheludunyre.

⁴³ Hãwyyõ raremyhÿ heka hãwyy webinadu rare iòhò Jesuisi rexisÿny waòinatxi beòramy heka idi ròhònÿre hykyky hãlubu ratxireri. Tiu heka inyõ reteytenyõhyymyhÿre luahidÿÿdu, òhotibedu mahãdu he risiranyre. ⁴⁴ Tai tahe Jesuisi tykysi-ò reare. Tai ta aõwesele reytemy reare. ⁴⁵ Jesuisi rarybere: —Mowe watxi reare? Ijõ rarybereri: —Erydÿÿ mahãdu aõkõre, jiarÿboho aõkõre. Pedro rarybere: —Aõheta sõwe iny kaki rÿireri. Timykibo tuu tÿÿrayiteri. ⁴⁶ —Jiarÿ dori reeryre. Mobo watxi rearaule reytera. ⁴⁷ Tiihe hãwyy ratxiremyhÿ ramytatamy. Tamy ramytatamy heka tamy rehemynyre. Iõraò rexibedenyre. Ibutumy iko tuu relyyre. Aõherekibo itxi reriramy. ⁴⁸ Tai tahe Jesuisi tamy rarybere: —Lerÿ, atyhydÿÿna myna teyteta. Ta bexiywinymytahÿny maa!

⁴⁹ Kie raryberemyhÿwanale tasÿ iny witxiraõle dehemynyde. Kia aõma dohodÿÿna wedu heto-ribi dehemynyde. Ijairu-ò rarybere: —Ariõre wa rurura. Uritere ta òhotibedu-ò ijiraõma ixinamy tii rakre. ⁵⁰ Jesuisi kia-ò roholareu tahe Ijairu-ò rarybere: —Urile bityhybenykre. Breburenyõma tii reytekre. ⁵¹ Tii rehemynyre heto-ò. Jesuisi ralõre iny deramy reare. Tii wana rake lau. Kia uladuse, uladutyby, Pedro, Txiau, Joaõ wana kiale ralõre tamy tiiboho wana. ⁵² Ibutumy rasÿbinamyhÿ Jesuisi rarybere: —Ibryrenyõmyke hewa rurumy aõbo roire, urile rõrõmy roireri. ⁵³ Ibutumy rieryrenyreri tiiboho urile tai idi risinyrenyre rurumy roimyhÿki. ⁵⁴ Jesuisi ihãre ta hirari debò-ki rimyre. Tai tahe idi rarybere: —Hirari, bexixamy, bodonyke. ⁵⁵ Ityytyby aõwesele ixityre tamy ralore. Dexixade, donyde. Rÿsÿna hirari-ò riwahinykemy Jesuisi rarybere. ⁵⁶ Tai tahe tybyboho sõwemy rabedeòtidÿÿrenyre rabedesarenyre. Jesuisi rarybereri: —Urile wamy ijyyrenyõmykre. Aõbo adeereny rewinyramy.

9

¹ Jesuisi tahe tawaòinatxi reurò taerydÿÿna mahãdu ribu-

tunyre. Taruru tamy riwahinyre tyytybybina iny-ribi ritakremy. Tule iny webinadu mahādu riteytenykre. ² Tule rarybere tamyreny: —Kaiboho belyybenykre Deuxu kia Iòlònamy tule webinadu biteytenybenykre. ³ Aō awanareny wydyrenyōmykre debòna aōkō, aōna hyna tule aōkōre. Tule rysynake aōkō, nieruke aōkō. Ainatxityyke aōkōkre. ⁴ Hāwā-ki hetoō-txi malòkeki taile bonykre. Hāwāribihyyle bōhònykreu, kia heto-ribi bexitakre. ⁵ Ibinamy aramyrenykreki, urile bixitakre. Idi òlòna-ki, awa bitòtynykre ibinamy tai tahateny-taki. ⁶ Tiiboho ròirenyre hāwā sōmo sōmo-di Rybewihikỹ Tỹmyramy relyyrenykemy ròirenyre. Tule iny webinadu ibutumy iteytenyrenyre hāwā hāwā-di.

⁷ Idi tahe iòlò Herodi ibutumy heka aōna aōna rierymy ratximyhỹ. Tai tii bede ryy rieryōhyymy ratximyhỹ aōbo riwinykre. Roholamyhỹre heka iny rybe rybe-ò. Joaō heka rexixamy ratxireri. ⁸ Ijō tahe kiamy rarybereri: —Eliasile ratxireri. Ijō rarybere Deuxu rybemy rybeduō ratxireri. ⁹ Tai tahe Herodi kiamy rarybereri: —Jiarỹ heka Joaōra resymy rewahinyre. Mobo ratxireri iwese Joaō raremy wese he ratxireri. Moobo ta kiamy raholamy watxireri. Tai Herodi tuu robikemy riwisỹnymyhỹ.

¹⁰ Jesuisi eryna iko relyymyhỹreny ibutumy aōbo aōhebo rotỹnyrenyremy tabededỹnana. Jesuisi riòlònyrenyre ijō hāwā wixira-ò, Besaida hāwā-ò wahe. ¹¹ Tai iny sōwemy hekỹ rieryōlemy idi ta rieryreu tahe sōwemy ihemy rare roirehe. Jesuisi he ributumy ikole relyyrene. Deuxu Iòlòmỹ relyymyhỹre. Tai ròteytedỹmyhỹ webinadu mahādu. ¹² Aōtxu tahe katxioromy Jesuisi eryna mahādu, waòinatxi reurò mahādu tamy raryberenyre: —Bede biywinyke ibutumy iny rỹireri hāwā-ò tarỹsỹna òbradỹmy. Inyboho dori bedero-ki ratxirenyreri. ¹³ Tahe Jesuisi rarybere: —Kaibohole rỹsỹna biwahinybenyke. Rirasỹnyrenykemy ierydu mahādu diwyònydenyde: —Aōheretahaka, iruyre orotxu idi inatxi uturale heka roireri. Aroikemy aōbo wadireny atxiteri rỹsỹna òbradỹmy inysōwe-ò. ¹⁴ Txibo 5000 hābu sōwemy heka rỹimyhỹ. Jesuisi rarybere: —Bihitxinybenyke 50 iny heka iny bisỹnybisỹnybenyke. ¹⁵ Tii myna ieryna mahādu rotỹtynyrenyrene. ¹⁶ Idi tahe Jesuisi utura inatxi, orotxu iruyre rimyrene. Biu-txi reteheremy rexitòenyrene. Deuxu reālāre tamy rexitòenyryriyrenyriyriwahiny taerydỹna mahādu-ò. Riwyrenyrene tahe riwahiriwahinyrenyryriidi roire. ¹⁷ Ibutumy riroxirenyrene idi rihydyrenyrene. Ihāre ta waòinatxi reuròmỹ hyna ixyby rỹximy rauhenyrene. Idi ierydỹna mahādu ixyby ributumyrene.

¹⁸ Jesuisi heka ixisohojile rare ixitòedỹmy. Ierydỹna

mahādu heka irarò-ki r̄imyh̄ r̄ijemy r̄imyh̄. Idi tahe tamy nade t̄ȳraxy: —Mobohe jiar̄y raremy wamy raryberenyre? ¹⁹ Tai narybedenyde: —Ijō Joaō Sebedȳnami adireri. Ijō ta Eliasimy adireri. Ijō ta juhū Deuxu rybedu mahāduōmy adireri. ²⁰ Jesuisi tamy rarybere: —Adeereny tahe. Mobe jiar̄y watxireri. Idi Pedro rirawyōnyre: —Kai Kristu tate, Deuxu deōdȳna wahe. ²¹ Tahe Jesuisi tamy rarybereri: —Uritere tuu iny-ò ijyykōkremy. ²² Jiar̄y Hābutyhyhyk̄y, Deuxu Riōremy, aōhōk̄my arot̄ȳnykre. Judeu wedu mahādu, xiwena wahidȳydu wedu mahādu, bede ywina erydȳydu mahādu waderamy reakre. Jiar̄y arurukre. Inataōna txu-di arexixakre. ²³ Idi ibutu-ò rarybere: —Wahemy kanake mahādu urile ixi dee rexiijōnykre. Txuō txuōlemy taitxeò rimymy kidiwaheludunykre. ²⁴ Waōrary-ki rubudu heka biu-ò hedukre. Tukōkeki urile ixinany inatyhymy rurukre. ²⁵ Aōmydȳnanami iny ritakeki, tahe taumy riōnonykeki, kia heka aōmy aōkōkre. ²⁶ Inyō raix̄yrukeki warybe lau tule jiar̄y Hābutyhyhyk̄y, Deuxu Riōre wahe, tai ilau araix̄yrukre. Deuxuko-ò ȳjuko-ò iu adehemynysȳ Deuxu Iòlòna-ki wahe. ²⁷ Inatyhymy heka adeereny ararybekre. Ijō kaki rare. Deuxu Iòlònami robikre tarubukōtyre

²⁸ Tahe debò inataō txuu r̄yidi, Pedro, Txiau, Joaō-wana Jesuisi ridyre. Tiiboho sohojile bederatò-ò roire Deuxu-ò rexitōnykemy. ²⁹ Jesuisi rexitōnyreriu tii tamyreny rexitwixiranyre iu rexitōnyreu ityy heka urile rabòtòranyre. Iurahak̄my relere. ³⁰⁻³¹ Tahe tamyreny dexit̄ynnyde Eliasi, Moisesi-wana tahe rarybemyh̄re Jesuisi-wana. Jesuisi rubunamy Jerusalē hāwā-ki widee rarybemyh̄reny, kia Deuxu bedeywid̄ȳnana myna. ³² Pedrobohe rōrōrenyereri. Idi tahe rexixarenyre, tiiboho Jesuisi loosōnami robirenyre. Eliasi, Moisesi-wana tiiboho tuu robirenyre. ³³ Rōireriu, Pedro rarybere Jesuisi-ò: —Wawedu, awityhymy inyhe inybohe kaki ratxirenyereri tahe rikiwinyrenykre inataō hetomy, ijō adee, ijō Moisesi-ò, ijō Eliasi-ò. Pedro rieryōlemyh̄re aōmybo rarybemyh̄. ³⁴ Tai rarybereu Nonoe dobehede iubòròna bede ritòbònyre. Pedro, Txiau, Joaō-wana rubberumyhȳrenyremy. ³⁵ Tahe rōhōnymy reare rybeuni iuribi: —Kia heka Wariōre waluu rare. Kaiboho tamy bohōlabenyke. ³⁶ Tiiboho reteherenyre tahe inyōmy robiōlerenyre Jesusilemy ta robirenyre. Tahe rybeōmy r̄yirenyre. Iu inyō-ò aōmy raryberenyōre tuu.

³⁷ Tai tahe ijō txu ratò-ribi dehemynydeu iny sōwehek̄my Jesuisi-ò ròirenyre. ³⁸ Inyō rarybere: —Erydȳydu, wariōre adee redyreri. Beteheke wariōre sohoji-ò. ³⁹ Tyytybybina rimymyh̄reu tahe riatyre bede-ò. Idi tahe urile txuu

riyiyidỹ̃nymyhỹre. ⁴⁰ Aerydỹ̃na-ò jiarỹ rarybera tyytybybina riteònykremy, tahe tiiboho riixãwidỹ̃nyõhyreny. ⁴¹ Jesuisi tamyreny rarybere: –Tiwesebededỹ̃nanabo wijinabòdu ityhyõlemy rỹira. Tiwesebededỹ̃nanabo akynyreny-ki ariijekemy. Wadee uladu bididyke. ⁴² Tahe didydenyde Jesuisi-ò. Tahe tyytybybina urile riitxỹteitxỹtenymy resere. Idi tahe urile bede-ki rexiraòhòhòremy sutxi resere. Idi rarybexinymy. Rybexi irywomy ròhònymyhỹ. Jesuisi tahe tyytybybina iribi riòlòdỹ̃nyre uladu riteyteyre. Idi uladu tyby-ò riwahinyre. ⁴³ Ibutumy iny Deuxu aõwidỹ̃na-di bede riòtiinyre.

Jesuisi taerydỹ̃ mahãdu-ò rarybere:

⁴⁴ –Boholatyhyki warybe-ò, Deuxu Riòre Hãbutyhyhykỹ heka rawahidỹ̃kre hãbu mahãdubina-ò. ⁴⁵ Tiiboho rierykõlere. Kiamy dori ilaureny riwore. Tahe ruberurennyre tỹ̃raxidỹ̃ki.

⁴⁶ Ryro-ki ierydỹ̃na mahãdu widee rarybemyhỹre: –Mowexe wiratyre ityhykremy. ⁴⁷ Jesuisireny rexiraykynymyhỹreny rieryre. Idi tahe uladuõ rimymy rarybere. Jesuisi uladuõ wana ronyrenyra. ⁴⁸ Tahe taerydỹ̃na-ò rarybere: –Moõ uladu ka wese wadee riwiòhenanykeki, riwawiòhenanyre. Moõ riwawiòhenanykeki, tule waha riwiòhenanyre. Mobo deòdumy reakre, tii ibutu ratyrekre.

⁴⁹ Joaõ tamy rarybere: –Erydỹ̃du, jiarỹboho riòlòdỹ̃nyrerimy tuu rabirenyra inyõ tyytybybina-di animy rehureriò. Tahe iny mahãdureny aõkõ rare. Tahe jiarỹboho tamy reijõnyrenyre iny inyijoirenyre aõkõki. ⁵⁰ Tahe Jesuisi rarybere: –Bijõnybenyõkre. Inyõ inymyrenydòdukõkeki, inyweribireny-ki tii rare.

⁵¹ Tahe Jesuisi bededỹ̃nana iixihidu iòhòmy idi biu-ò rakreu, tii Jerusalẽ hãwã-ò rakremy rexiywinyra. ⁵² Tahe takomy inybuta bede riywinyre. Tai itỹhinamy rutòmy Samaria hãwã-ò. ⁵³ Tai tahe Jesuisi deramy rekoarennyre Jerusalẽ-ò ramyhỹreki. ⁵⁴ Txiau Joaõ-wana kia rierymy tahe narybedenyde: –Wanyrỹhỹkỹ, adee wikeki heòty biu-ribi ityrenny kedesekeky aritxuhorenykre risõrennykremy. ⁵⁵ Tahe Jesuisi irybereny-ki ibinamy rahare tahe reburemy taò riòsere iribireny. ⁵⁶ Idi ta iwitxira hãwã-ò roire.

⁵⁷ Tahe Jesuisi taerydỹ̃na mahãdu-wana roirenyreu, hãbuõ tamy rarybere: –Ihyymy awana arakre titxibo makreu, ahẽkile arakre. ⁵⁸ Tahe Jesuisi tamy rarybere: –Ijòrò heka ihãloo dire. Nawii tỹtỹ dire. Tahe jiarỹ, Deuxu Riòre wahetoõre, Hãbutyhyhykỹ rare hãrele. ⁵⁹ Tahe ijõ hãbu-ò rarybere: –Biwaheludunyke. Tahe tii dirawyònyde: –Wanyrỹ, Waha heka rurura. Tai tahe juhoo arituunykre. ⁶⁰ Jesuisi rarybere:

—Txioinihe, rubu mahādu wii rituunyke. Kai tahe makre Deuxu Iòlònamy belyykre. ⁶¹ Ijō rarybere: —Wanyrỹ, arahe-ludunykre. Urile juhuu wasỹ mahādu arawehityhynanykre. ⁶² Tai Jesuisi dirawyònyde: —Inyō ritelenykeki, tahe ixyby òòsemy rexinohōtinykeki, tii waheludu mahāduōmy rareōtyhy.

10

¹ Jesuisi 72 hābu heka ritare inatxi inatximy tako-ò tihāwāhāwātxibo rakreò bedè riywinyre. Kiamy tamyreny rarybere: —Waijyymy rybemy boibenyke. ² Kiamy heka tamyreny rarybere: —Waaōmysỹdỹỹna heka inihikỹ-di isirare. Iwese maixōmo iny riòròmyhỹre wese heka waaōmysỹdỹỹna rare. Maixōmo oworu heka inihikỹre, idi aōmysỹdỹỹdu heka ibutere. Tai oworuwedu-ò aōmysỹdỹỹdumy bexitòenybenyke, Deuxu-ò wahe. ³ Kiaboho heka budoeni wesemy iyreny-ki boibeke. Kia-ribi nohōti losaōmykre. ⁴⁻⁵ Tai heka bexiijebenykre anierureny wydyōmy. Aōna aōna renyhynykeō aōkō awareny wydyōmy iny-ò ryberenyōmy iny iny-ò ryberenyōmy, rywetyatyamy abededỹỹna nodỹỹmy. Inyheto-ò malokreu Deuxu deysanamy birybenybenyke. ⁶ Tii adee awirenykre wana heka teysakre kahetoludu. Tai tahe ixibyle adee Deuxu deysana ròòsekre adee awiòhyykeki wahe. ⁷⁻⁹ Aōma hāwāō-ò malò-wana uritere deuròsò deòròsòōmy matximahāke. Tai tehemynymy atxiterikile bexiijemahā tetxilemy. Uritere rỹsỹna òta òtaō aubeò ritidi wana uritere rybeòlòōmy. Birỹsỹmy rybeòlemy. Awiòhedỹỹmy ruruke wana bimymyhy aōbo adee riwahinymyhyre. Iny raaōmysỹdỹỹmyhyre heka ròtamyhyre. Kia wese heka biwinymyhyke. Birỹsỹmahāke aōbo adee riwahinymyhyke. Binaō roiwana biteytenymahābenyke. Kia wesemy tamy marybeke: —Deuxu Iòlòna heka iòhòmy ihỹre. ¹⁰⁻¹¹ Hāwāō-ò birònykeki, inyō aradyrenyòkeki, boibenyke hāwāky-di. Myỹ marybebenyke tamyreny: —Aōbo wawa-ki hāwā-ki rỹireri. Wawa aritòtynykre bryby iribi ròhònykremy. Adeereny ariteòsinykre nohōti ijaranamy tamyreny. Nohōti losarenyōmy Deuxu Iòlòna adeereny iòhòmy dehemynyde. Tahe kaiboho teramy tekoatenyte. ¹² Aōma ywisidỹỹnatxu heka tiiboho aòhòkỹmy rotỹỹnyrenykre. Jesuisi rarybere: —Tiro hāwā Sidō hāwā heka awimy aribireny ròhònykre. ¹³ Kobe làhāxe kai Korasĩ hāwā, tule Besaida hāwā. Òhotibe ayreny-ki rỹire, kia heka Txiru hāwā, Sidō hāwā tule kire-wana taō òta òtareny-ribi rexiatyrenyre. Tiiboho tykysausuhukỹtyre rexisỹnyre bryby-di rexierenyre. ¹⁴⁻¹⁵ Òhotibetxumy heka Deuxu raruxetòenykre Txiru hāwā mahādu, Sidō hāwā mahādu! Kaiboho tahe aòkore. Deuxu

araruxetòenyōkre. Kai Kafanaō hāwā yludu mahādu aōbo adeeremy rotỹnykre. Biu-ò aōbo bōibenkyre. Aōkō heka heòtybina bede-txi heka boibenyke. ¹⁶ Tahe Jesuisi taerydỹna mahādu-ò icyby rarybere: —Inyō aradyrenkyre wana tasỹ-ò. Iwese riwadymyhỹre wesele, aradyrenkyre. Moo adeeremy roholamyhỹre iyubu wadee roholamyhỹre. Wana tahe waderalemy reamyhỹre. Waderamy reamyhỹre tahe tule Waha deramy reamyhỹre. Deuxu wateòdỹdu wahe.

¹⁷ Tanonanareny-ribi iribi tahe kia erydỹna mahādu ibutumy dòsedenyde. Tiiboho heka teysa nihikỹny dòidenyde. Tybybinanahakỹ heka irybe-ki rōhònyhỹre irybereny-ki. Riòlòdỹny myhỹreny wana Jesuisini-di heka rōhòny myhỹre kiamy Jesuisiko-ò tuu relyyreny. ¹⁸ Tii rarybere tamyreny: —Bexiije benyke jiarỹ dori Satanasimy biu-ribi rabire, biudelaa wesemy reseremy tuu rabire. ¹⁹ Inatyhy rare waruruke nyderi rewahinyre. Tai hemylala tyre-ki mariabenykeki. Tiu inyō ruruòtyhy itytibòrò nihikỹ arawerenykeki, tiu buruòtyhy. Tule kai aòludu rururatyre arurureny-di boibekre. ²⁰ Ihārele tahe uritere deysarenkyōmy atxibenyke ka ruru òraru-ki tyytybybina deòdỹna, ruru wahe. Kaiboho dori anireny raritiny roimyhỹre biu-ki kia ta ateysanarenykre.

²¹ Iule tahe Jesuisi reysare heka Deuxu Tyytybytyhy iwomy reareu. Kiamy rexitòenyre: —Waha, kai wa biuwedu tate ibutu bede wedu tate. Umy reàlāmy watzireri tamy retòenyre. Wadeysamy watzireri ka aōma dỹnana bederaremy nihikỹ iribi tewòmy atxiteriki wahe. Tamy hete iwese iny uladu wesemy rityhynomyhỹre heka. Tai tahe tamy ritỹnynomyhỹre. Kia adeewimy tuu rare. ²² Jiarỹ heka ibutumy Waha wadee riwahinyre. Inyō rieryōhy myhỹre Waha wahe. Waòrarukile tahe iny rierymyhỹre. Mobo Waha rare wahe. Waòrarukile dori rierymyhỹre. Ijō aritỹnykemy watzireri. Tai tahe tiki tule riery iruru. Taile rierykre. ²³ Rexitòenomy rahudi tahe wasimy iwòtemy heka rarybere taerydỹna mahādu-ò: —Kaiboho heka sōwemy aōwiwihikỹny tabimyhỹtenyde. Tai kaiboho beysabenyke. ²⁴ Ihetxiu heka Deuxu rybedỹdu wana kia aōmysỹnanamy iòlò mahādu wana. Kaireny aōmydỹnanamy robikemy risỹnyre, tahe aōkōhyre. Wijile heka tuu robireri aòrarureny-ki. Tule tabitenyteri kaiboho ratximyhỹ inatyhymy aōbo òbitimy Jesuisi ijyy-ò roholarenkykemy tahe aōkōhyre.

²⁵ Moisesi bede ywina rybe-di rāire Jesuisi lýřraxidỹmy. Iwese kai ixiluure wese, iny witxira luuke! Tii tahe Jesuisi rihixidỹmy rarybere: —Aōhebo arotỹnyke biu-ò arahenykemy. ²⁶ Jesuisi dirawyònyde: —Timybo kỹnyhe Moisesi

bede ywina tyyriti-ki roimyhÿre? Timybo tuu manarybekre.
 27 Tii tahe diwyònyde timybo tyyriti-ki roimyhÿre myna:

—Deuxu adinodureny, ibutumy awo-ribi iluuke, ibutumy
 arayky-ribi aruruna-ribi, ayky-ribi heka iluuke. Tule
 ibutumy iny ixiwesemy idi atximahãke.

28 Tai tahe Jesuisi tamy rarybere:

—Kai inatyhymy tarybeteri tai inatyhymy mahenykre biu-ò.

29 Kia hãbu heka rexiòbitinykemy idi ratxireri. Taita rarybere
 Jesuisi-ò: —Mobota waeryre? 30 Tahe Jesuisi ikò relyyre
 ijyymy. —Judeu mahãdu hãbu heka ratÿinamyhÿ Jerusalë
 hãwã-ribi, Ijeriò hãwã-ò. Iribi tahe kia wasidu mahãdu
 rimyrenyrene. Inieru ibutumy iribi ritarenyre. Ityy hÿre
 raòhòtere irubudÿÿle rasiranyrene ririre. Tahe ruruòki rÿimyhÿ.

31 Aõma judeu xiwenawahidÿÿduõ heka idi rare. Tahe hãbumy
 robire. Idi hãbu-ribi irehemy rexiemy reare. Tahe tÿtxi
 rerikòle rare raty resere. 32 Hãbuõ rehemynyrene tiie-ki do-
 hodÿÿna wiòhedÿÿduõ rare, Levita wahe. Tule ratyresemy
 ririre. 33 Tahe ijõ nade Samaria bede hãwã luduõ heka
 rare. Judeu mahãdu heka Samaria mahãdu luukòre. Idi
 tahe kia judeu mahãdu roimyhÿ. Tahe Samaria mahãdu
 hãbu sòwemy riruxetòenyrene. 34 Idi tahe tamy rexitÿmynymy
 tahe iwotòmona rituahinymy ritaataamy iwotòmona. Idi tahe
 ka hãbu relyymy idi rare. Aõma ijumenta tyre-ò ritidimy.
 Idi rare rirarehu tahe heto-ò ritidikremy ririkremy ridymy
 heka idi rare. Rummy heka ritòenyrene hykyky idi bede nade
 awimy risÿnykemy. 35-37 Rudile heka heto òwy-di iwedu-ò heka
 nieru riwahinyrene riòwynyrene inatxi womati nieru. Tamy rary-
 bere: —Biwiòhenanyrene idi mabekre adòòsekre riròkre. Moma
 arÿnaderenykre Arÿnadebenyrene heka adiòwynyrene adòòsekreu
 wahe. Ka hãbuhe rarybere: —Hãbu bireludu ratxireri. Kia
 taruxetòenyreneri tiòsinyrene waha tieka idi hãubireludu ratxireri.
 Wimy raòludumyhÿre hãrele taheka riwiòhenanyrene. Jesuisi
 tamy rarybereri. —Iwesele biwinykre iweseke hãbu riwinyra
 weselemy biwinykre. Kai aõhebo botÿÿtyhy mahake. Iwesele
 wahe. Jesuisi rÿÿraxire: —Mobo hãbu aõtxino biòwa rare?
 Mobo ibireludu wahe? Bede ywina erydu tai rirawyònyrene: —
 Iwiòhedÿÿdu wahe.

38 Jesuisi, ijõ mahãdu-wana ròirenyrene. Hãwã-ò rirònyrenyre.
 Hãwyyõ rare Marta inire. Tahe ridyre tasÿ-ò tai
 ratxirenykemy. 39 Tahe Marta heka iseriòre dire. Marie inire.
 Marie urile ibire-txi ronyra aõbo tarybeke roholakelemy.
 40 Marta heka raelelemy ratxireri. Aõna aõnale rotÿÿnymyhÿle
 riwinymy taile rare ratximyhÿ. Tai tahe nade Jesuisi-ò
 rarybere: —Jikarÿ sohojile wa watxireri waseritxòre
 riwawikòhenanykòhykyreneri. Kai anobohe kòbitimy tai tahateri.

Tamy marybeke riwawikòhenykemy. ⁴¹ Tai tahe Jesuisi he tamy rarybereri: —Marta, Marta, aòherekibo kai taelelemy teamy atxiteri? ⁴² Sohoji aòmýdýñnale heka awire. Marie awityhy aòmýdýñnana ixidee rimyre. Kia moo iribi ritaòtyhy. Riwinymyhý awityhyreki wahe. Tamy rarybeòtyhyò wadee roholareri iribi ariòlòdýñnyke wahe.

11

¹ Tiutxubo Jesuisi rexitòenymyhýre, iny rieryòlemyhýre. Jesuisi rexihudi, ijoi rarybera: —Biwaerynanybenykre iwese textitòenyteri wese, Joaò tahe tajoi rierynanyre. ² Tai rierynanyre. Kai bexitòenykeki, kawese marybekre:

—Waha, ani ibutumy tamywimy. Wylemy mynake iny òlòdýñmy.

³ Rýsýna txuò txuòlemy biwahinybenykre.

⁴ Inyòraruna biixāwidinykre, iny iwitxira-dori taòraruna ariixāwidinykre. Waatysyrenyòmy òraruna-txi.

⁵ Jesuisi heka taerydýñna mahādu rierynanyre ijyy-di: —Kai arýsýnaòmý bonykeki, abiòwa-ò make ruetya rexitòedýñmy rýsýnaò huòtemy bidiwykemy: —Wy, ahina inataò wadee bidihuòteke. ⁶ Wabiòwa rehemynyreri bedetýi-ribi. Aò heka wawahisidýñkònare. ⁷ Tii òsana myý adee rarybekre:

—Wadee ixitòedýñnyke ruetyahakýmy. Arýiòtyhy wahe-rina-ribi rexiyrubunymy heka rāireri. Ibutumy iny heka rōrōmy rýireri. Uladu, tule iumy rōrōmy rýireri. Wadee ixitòedýñnyke. ⁸ Rexitòenyhyhy tai hyhyhy rýikeki tai ihārele rýike. Abiòwatòenamy aòkò kýnyhe rýike. Textitòenyterikile rýike. ⁹ Tai heka adeeremy rarybereri. Bexitòenykeki, biwyke. Biijeke aòbo teijeteri, tai tahe mahake. Ijòtòbòna bihetenyeke tahe adee riraynomy tahe malòke. Tai tahe adeeremy rarybera. Ibutumy rexitòenymahāke, tamy riwahinymahāke. Ibutumy iny riijemahāke, tai rahake. Iny rihetenymahāke riraynyke. ¹⁰ Tai adeeremy rarybere: —Ixitòedýñki iny aò rimymyhýre. Aòitxe-ki aòtxi ijara rýimyhý. Ijò-di ròtemy ijara-ki iny ralòmýhýre. Ijò-di ròtemy ijara-ki, iny ralòmýhýre.

¹¹ Uladuò tyby-ò uturamy rexitòenykeki aòbo, hemylalaò tyby tamy riwahinyke irýsýnamy? Timyki tuukòna! Kaiboho kiamy aòbo botýñnybenykre? Timyki tuukòna! ¹² Uladuò tyby-ò hāniesimy rexitòenykeki aòbo, itytibòrò tamy riòkre. Timyki tuukòna! ¹³ Kaiboho aòbina binahakýdile tahòtinymahātenyté, aòwihiký aòbohe ariòreremy-ò biwahinyke. Boreny aratyre heka bede rieryke, Deuxu wahe. Tamy bexitòenybenykeki, tii Deuxu Tyytybytyhy adeeremy riwahinyke.

¹⁴ Ixityre tasý hābuò raremyhý irybeòmý. Jesuisi taile ratximyhý tahe tyytybybina riòlòdýñnyre iribi. Iu

tyytybybina iribi rohonyreu tahe, hãbu rarybere kia rybeõmy ratximyhÿre wahe. Tahe iny sõwehekÿ mahãdu sõwemy idi rabedeõtiimy rÿire. ¹⁵ Inyõ tahe, inysõwehekÿ yluduõ tahe kiamy rarybere: —Kia diabo ruru-di, Belisibu ruru-di heka iribi riõlõdyÿnyre. Tii tytybybina mahãdu wedu rare. ¹⁶ Ijõ tamy rarybere: —Jesuisi, araeryrenykre inihe aõ biditeõsinykre wadeeremy. Inatyhy aruru biuludu ratximyhÿre. Widÿÿnaõ inihe wadeeremy bitÿnynye kialemy heka rarybemyhÿre urile riurihimy tamy aõ itxerenamy riwinykelemy. ¹⁷ Jesuisi tahe rierymyhÿ aõmybo raraykynymyhÿreny. Tai heka tamy tuu rarybere: —Kia iny mahãdu wiribi hitximy raraykywydynykeki, tii tahe rexihuke itueke, sÿ mahãdu tule wahe. ¹⁸ Timybo Satanasiboho bedewidee ribinanymyhÿrenykreki, awityhymy roirekre. Jiarÿ araeryrenyteri timybo taraykynytenyteri. Aõma Satanasiruru-di tytybybina ariõlõdyÿnykemy tarybetenyteri heka reeryteri. ¹⁹ Kia riki ariwinykeki, kaiboho tule wawesele tewinytenyete. Timybo? Mobo awiõhedÿÿdureny rare? Satanasia aõbo? Kaiboho boibenyke ixitõedÿÿmy awiõhedÿÿdureny-õ. ²⁰ Jiarÿ Deuxu ruru-di ariõlõdyÿnykeki, kaiboho bexiijebenyke, Deuxu Iõlõna tahe adeeremy iõhõra. ²¹ Hãbu deburehekÿ tadebõna-di taheto riyrubunykeki, rexityhynymy ronyke. Iaõmydÿÿna ibutumy iyrubudÿÿnamy rÿike. ²² Tahe ijõ kedehemynye iratyre teburetyhy, tahe iaõmydÿÿna ibutumy iribi riwyke. ²³ Iny wawana aõkõ ratxirerimy ihÿre, tii heka waribi hitximy ratximyhÿre. Iny wawana aõkõ ratxireri, tii tahe aõtxile ramyhÿre ixideõna. ²⁴ Jesuisi ijõ ijyy relyyre: —Iny-ribi tytybybina rõhõnymyhÿreu, tii heka rake ixitawo-di rake titxibo. Rubumy rarunymy rake. Bedeõ-ki rahakeki tahe, rõhõtinyke. Arõõsekre, tikibo rarawãhãõle. ²⁵ Ixyby kòdõõsekeu tahe, isÿ ibutumy, tytymy roike iruxeraõ. ²⁶ Idi ixityre ijõ rimyke debõ inatxi reurõ tytybybinaõ. Idi tahe tamy rasÿnyrenyke. Iratyre tyhy wahe ibina. Iu kia ixisohojimy tytybybina-di aõmysÿdÿÿmy raremyhÿu tahe, ihewo-ribi rimyra tahe iroona-ribi tahe aõnityhymy releke. Ibinatyhymy tamy rare.

²⁷ Iribi tahe hãwyyõ rryyre ibutu ijohonamy: —Hãwyky heka aratzurananyre, aratibienyhe heka iny bedekõby rare. ²⁸ Tahe Jesuisi rarybere: —Deuxu Rybe tyhydÿÿdumy iratyre wadee awire. Deuxu deysanamy tamy kanakemy idi watxireri.

²⁹ Idi tahe inysõwetyhymy dehemynyde Jesuisi-õ. Jesuisi kiamy rarybere: —Iny heka kia mahãdu ibinatyhymy rÿire aõwihikÿle heka riijemy rÿire. Itxerenaõmy robikre

ratxireri tahe itxerena Jonasi-ribi nadelemy tahe robikre. ³⁰ Jonasi heka Ninive hãwã mahãdu-ò itxerenaõ heka tii rare. Tule jiarỹ heka Deuxu Riõre Hãbutyhyhykỹ rare wijinabòdu mahãdu dee itxerenaõ jiarỹ rare. ³¹ Ibòò mahãdu bede konana-ribi iòlò hãwyy Salomaõ bede eryhykỹ-ò ijõhonamy irehe-ribi nade. Wijinabòdu mahãdu taheka naõhyymahãde wadee ijohonamy. Salomaõ ratyre heka jiarỹ watzireri. Ikonana txu tahe ibòò iòlòhãwyy rỹikre rarybekremy. Tii rarybekre: —Anoherekibo Jesuisi deramy teakamahãtenyte wahe. Timykibohe irybe bedekeryna-kò ijohokuna rỹikõmyhỹreki wahe. ³² Ninive hãwã mahãdu tule rỹikre rarybekremy iwe-sele. Jonasi rybe tỹnydỹỹna-ki rexirãhĩrenyre. Kaki heka Jonasi ratyre hãbuõ ratximyhỹre, jiarỹ wahe. Wadee ijo-honadu aõkõ heka toite.

³³ Moheka loosõnaõ rideõhyymyhỹre herinarawo-txi toosò iwasihiikỹmy roosõmyhỹkemy. Tiiemy heka biuòhyy rademyhỹre ibutumy bede ratỹnymyhỹkemy. ³⁴ Arue umy dori itỹnomy roimyhỹre. Arue awikeki heka ibutumy aumy awikre. Arue ibinakeki tasỹ aumy heka bedelorokile rỹimyhỹkre. ³⁵ Awo toosõmy ratximyhỹre wana, bexijemahãke. Aumy biemahãke bedeloro-ki rurunyheny. ³⁶ Bedelorohokỹ aumy-ki rỹiõmyhỹre wana, tai tahe boosokre ibutumy titxibo bede-txi mamahãkre wana.

³⁷ Jesuisi kiamy rarybereu tahe, fariseu mahãduõ tamy rarybere: —Manake wasỹ-ki rikiroxikremy. Tai tahe Jesuisi rare, ralore, ronyre roximy. ³⁸⁻³⁹ Jesuisi ronyreu, tebò risuhõõre. Tai tahe idi bede riõtiinyre. Jesuisi rarybere: —Kaiboho fariseu mahãdu, ibutumy heka txisuhõõmahãtenyte. Ebò tesuhõmahãte, aumy ibutumy tesuhõmahãtenyte. Webòròsityyludu wahe. Kaiboho heka isuhukỹlemy toimyhỹte ibutu aõikõkõ-di isumy roimyhỹre aworeny-ki. ⁴⁰ Iu heka òbitimy taraykynytenyõhyymahãtenyte. Deuxu heka iwebrà ludu riwinyre, inatyhy? Tule aworeny, araykyreny wana riwinyre. ⁴¹ Iny aõkõ mahãdu-ò maruxetõemyhỹbenyke. Tai tahe byranybenykre heka. Ibutumy awo-ki, ahana-ribi tule ryranykre.

⁴² Kobe làhàxe kaiboho fariseu mahãdu. Kaiboho Deuxu dee tewahinymahãtenyke uriõno. Debòwiò aõ tetatenywana heka, sohoji tewahinymahãtenyte. Tule aõmydỹỹnareny aoworuludurenyõ tewyteny wana, tule tewahinymahãtenyte. Kia awire, biwahinymahãbenyke. Urile tahe teerytenyõhyymahãtenyte Deuxu luuna, Deuxu òbitina. Biwahinymahãbenyke heka Deuxu dee aõmydỹỹnaõ. Tii tahe awire. Tule nohõti losarenyõmyke, luuna, òbitina. ⁴³ Kobe làhàxe kaiboho fariseu mahãdu. Dohodỹỹna heto

luureny ikoòhòkÿle heka torokomahãtenyete. Kaiboho arybedÿÿnareny-ki awimy tahamyhÿtenyete. ⁴⁴ Kaiboho kobe làhàxe. Wobrona wesemy toite. Iwese iny rubuhãloo tyremy iny rariamyhÿre wese ierykõnamy, kiawesele toite.

⁴⁵ Bede ywina bede erydÿÿduò heka tai ratximyhÿ. Tii tahe Jesuisi-ò rarybere: —Erydÿÿdu, kai heka aõbinahakÿlemy wamyreny tarybeteri, kia wese rybe-ki. ⁴⁶ Inatyhy rare. My tahe Jesuisi risÿnyre: —Inatyhy dori tule bironybenyke aõhòkÿmydÿÿnana. Iny dori adeeremy rarybemyhÿre iny rybe bityhynymyhÿbenykemy tahe ihãrele tetyhynyõhyymahãtenyete. Bede ywina ritidÿÿna tewinymahãtenyete, ihãrele tahe tiu heka tetyhynyõhyymahãtenyete. ⁴⁷ Kobe làhàxe kaiboho, alahireny, alabiereny wese toite. Iwese tiiboho Deuxu rybedu rirubunyre wese kaiboho toite. ⁴⁸ Kaiboho rubudÿÿdumy toite. Òbitile tewinymahãtenyetelemy ixidee tahõtinyamahãtenyete. ⁴⁹ Deuxu tahe rarybere umyrenymy wahe: —Tahe jiarÿ aditeònykre heka Deuxu rybedÿÿduò tule Deuxu deòdÿÿnaò heka aditeònykre. Imahãduò birubunybenykre ihona tahe biteònybenykre. ⁵⁰ Kaiboho heka bede òrarumy boibekre kia rubudÿÿ òraru erydumy wahe. ⁵¹ Abeli hãlubu txiwina tahe xiwena hure rubuna. Idi tule Zacaria hãlubu txiwina wahidÿÿna bire-ki heka Deuxu hetobire-ki. Kohe, ihure rubureny òraru-ki aõhòkÿhÿkÿmy biòwynybenykre. ⁵² Kobe làhàxe, kaiboho bede ywina erydÿÿdu mahãdu, bedeeryna ijò rayna dinoduboho wahe. Kaiboho tahe terònyõmy bede eryny heto-ò. Tule inywitxiraò tetòenytenyete iròte lau.

⁵³ Jesuisi ròhònyreu, teburemy tiiboho ritÿÿraxinymyhÿre aõna aõnamy. ⁵⁴ Tuu ròtÿÿraxidÿÿmyhÿre timykibo riru-taònyrenykemy.

12

¹ Sõwemy iny tahe ributunyre. Ube tahe rÿximy ratxireri. Tahe juhoo Jesuisi taerydÿÿdu mahãdu-ò rarybere: —Fariseu mahãdu, saduceu mahãdu urina biebenyke. Tiiboho dori ruidu mahãdu roire. ² Wasimy wiji adeeremy relyyre. Tiu ta ibutumy ijyynamy rÿikre ³ Aõbo wasimy wiji taholate heka ibutumy biurasòmy ratÿnykre. ⁴ Uritere iny lau brebuõmyke. Aumyle tii rirubunykre. Ijõ ibinamy adee aõkõ tii rotÿÿnykre. ⁵ Iny lau sohojile breburenyõmykre. Deuxu lau ta bu-berukre. Tii dori atyytyby bede bina-ò rahuke ixideewikeki. ⁶ Nawiiõ kaiboho bidymyhÿbenyke iòwy riòre iny heka ri-wymyhÿrekre. Ibutumy heka Deuxu nawii rieryre sohoji sohojimy. ⁷ Deuxu ara erymy heka aõma arati-ki tiwesebo aradeti rÿimyhÿre rierymyhÿre. Brebuõmyke, aõma Deuxu

heka anaerymyhÿre nawii sōmo ratyre heka rierymyhÿ. ⁸ Kai marybeke: —Jiarÿ Deuxu retyhynyre dori tahe umy arelyyke Deuxu ÿjukomy rarybeke biu-ki wahe, jiarÿ Deuxu Riòre Hābutyhyhykÿ wahe. ⁹ Iny sōwehekÿy-ki riwatxiōnykeki tule aritxiōnykre jiarÿ Deuxu ÿjuko-ò. ¹⁰ Inyō Deuxu Riòremy aōbina binamy rarybekeki, irybe-ribi nohōtilosa rÿikre. Deuxu Tyytybytyhymy tahe inyō ibinabinamy rarybekreki tahe, aōhōkÿmy rotÿÿnykre irybe òraru-ki. ¹¹ Aramykeu heka uritere nohōtiōmyke aōmobo marybekremy ywisidÿÿna-ki. Bede heka ariwahinykre rybedÿÿnanau. Rybeōmyke ikotyre. ¹² Kai ixiwanale aōkōre marybeke. Deuxu Tyytybytyhy arāwiōhenanymyhÿreny.

¹³ Hābuō inysōwey-ki tahe Jesuisi-ò rarybere: —Wanyrÿ, Waha rurura. Waseriòre tahe ibutumy waha aōna aōna riwyraxidee sohojile. Tamy marybeke wadee ritxuranykemy. ¹⁴ Jesuisi tamy rarybere: —Hābu, kia waaōmydÿÿna aōkō rare. Timybo ayreny-ki araywisidÿÿnyke? ¹⁵ Tahe Jesuisi ibutumy iny-ò rarybere: —Warybe-ò bodoholabedenyke. Ixityhyōmy! Arutyhy heka aaōna aōna-ki aōkō rare aōna aōna sōwerekāre. ¹⁶ Tahe Jesuisi ijyymy ròkewesenadÿÿre: —Hābutyhy riki ioworu nihikÿre. Tahe sōwemy rÿsÿna ributunyre. ¹⁷⁻¹⁸ Itheto tahe iyjare ibutumy ributunykemy. Tahe ixidee rarybere: —Aōhebo arotÿÿnykre? Waaōnaheto butumy aritxiwikre. Ijō iribi inihikÿmy ariwinykre. Tai ibutumy waaōwiwi. tamy aridekre. ¹⁹ Tai tahe ibutumy waōwiwi-di areysakre. Arexielehynykre, ariroxikre, ariōkre. Waruhyy areysakre. ²⁰ Deuxu tahe kia hābu-ò rarybekre: —Hābu itxÿtere. Kai wijirulemy burukre. Tai tahe mobo aōna rimykre.

²¹ Jesuisi taijyy rihure rexirybenymy. Kia heka aōhebo rotÿÿnyre iny ityhy mahādu. Tiiboho dori Deuxuòle ityhymy aōkō ihÿrenyre.

²² Kia heka Jesuisi taerydÿÿna mahādu-ò rarybereri. Uritere nohōtiōlemy arÿsÿna tule atyymy, idi matykynykemy. ²³ Aumy heka rÿsÿna ratyre aōnityhy ratximyhÿre. Aumy heka atyky ratyre aōnimy ratximyhÿre. ²⁴ Nawii-di betehibenyke. Tiiboho heka ioworuōrenyre. Tarÿsÿna riyrubunyōhymyhÿrenyre. Deuxu heka nawii riyrubunymyhÿre, irÿsÿna tamy riwahinymyhÿre. Kaiboho tahe nawii ratyretyhy toite Deuxu dee. ²⁵ Sōwetyhymy maraykywydynanykeki aōbo arumy arirarehemy mariake? Aōkōre! ²⁶ Kia aō iyjare tahe Deuxu-ò. Kia biwinybenyōkeki, aōherekibo ijō aōna aōna nihikÿ-di tahōtinymyhÿte? ²⁷ Betehemy inihe noijasa-di. Aōma tiiboho raaōmysÿdÿÿōhymyhÿrenyre. Ihāre tahe iruxerarenyre

ityy wiwihikỹrenyre wese. Tyy ixidee riwinyõtyhy Deuxu rityyny wihikỹ heka tyy wihikỹ tamy riwahinyreri. Salomaõ heka ityynihikỹ rare. Ihãre tahe ityy heka awityhymy aõkõ noiròsò wese. ²⁸ Deuxu heka noijasa rityynymyhỹre kia wijilemy idi ihỹre. Biurasòmý tahe ixãwimy reamyhỹre. Tii heka tyy adee kidiwahinykre. Tai tii atyyreny. Tai ta ixinohõtiyredỹỹrenyõmy. Aõherekibo ainatyhyna ibutere? ²⁹ Tahe raykyõmy nohõtiõmy titxiribibo arỹsỹna adee kanakredi. ³⁰ Tyhydỹỹdukõdu mahãdu heka tuure. Inytybyreny heka rierymyhỹre aõmybo tarumahãte. Ibutumy heka arerymyhỹre aõmybo teamyhỹte. ³¹ Tii Deuxu aõmy dỹỹnana sohojidile maraykynykeki heka tii ibutumy adee riwahinykre. ³² Brebuõmy ahãbenyke wariõreboho. Deuxu Iòlõna adee kanakemy, Deuxudeewina wahe. ³³ Aaõna aõna-di bohonybenyke. Iõwy tahe iaõkõdu mahãdu-ò biwahinyke. Anieruhyna wiwihikỹdile boibeke. Kaki ibutudỹỹlemy heka biu-ò bibutunyke. Tai heka judõera aõ rirõõtyhy tule rararyõtyhy. Tule tai wasidu ralõõtyhy. ³⁴ Tikibo aõwireny rỹikeki, tai heka araykyreny ratximyhỹre.

³⁵ Ijõ tahe Jesuisi rarybere: –Kaiboho bexiywinybenyke, ibutumy aõhebo rotỹỹnykremy bexiywinyke. Awereysanareny-di atyky beximyke. Aloosõna bitoonyke. ³⁶ Deõdu mahãdu wesemy boibenyke. Bexiywinybenyke awedu dehemyynyna-ò, tii worana bedehesi-ribi rehemynyremy wahe. Iu rehemynyreu, teõdu mahãdu heka ijõ riraynyke. ³⁷ Tiiboho riraõrenykeki, deysamy rỹikre. Iwedu dori reximykre ityky wereysana-di tahe rỹsỹna teõdu mahãdu-ò riwahinykre. ³⁸ Tii ruwetyakile rehemynykeki, deõdu mahãdu reysakre. Tiiboho dori rexiraõmy rỹimyhỹrenyre. ³⁹ Tai heka iny rexiywinymy rỹimyhỹkemy rybe roimyhỹre awedureny kanakreki. Aõma hãbuõ kanakeki heka tiu aõma hãbuõ itxeredumy ronykeki heka, tiu hãbuõ iribi rawasinõtyhy. ⁴⁰ Kaiboho tule bexiywinybenyke wadehemyynyna txu heka biijemy bonymyhỹbenyke.

⁴¹ Tahe Pedro rarybere: –Wanyrỹ, kai wadeerenyle ijyymy telyyte ada ibutumy iny-ò aõbo telyyte? ⁴²⁻⁴⁴ Tahe Jesuisi riwyõnyre: –Aõtxile inyõdee, tibo deõdu taaõmysỹdỹỹna riwinyymyhỹre, kia idinodu tai awimy rahamyhỹre tii dori rỹsỹna õbitimy riõriõmyhỹre. Idi tamy aõwiwi riwahinykre taaõna aõna-di itxeredumy tule risỹnykre. ⁴⁵ Tii iwitxiramy rexiraykynykeki tahe, ijõ teõdumy raõhõtemy urile idi risinymy kamy rexirybenymy: –Wawedu dori wiji aõkõ rarerikre. ⁴⁶ Tai ierykõna-di iwedu kedehemynykre. Tuu rierymy iaõmysỹdỹỹna-ribi ritamy aõhõkỹmy risỹnykre ity-

hydÿÿdukõdu mahãdu wese. ⁴⁷ Deòdu tawedudeewi rierymyhÿre. Tai heka tuu rotÿÿnyõkeki, tii tahe sõwemy aõhõkÿmy rotÿÿnykre, òhòtemy wahe, tamy riywinyõreki. ⁴⁸ Ijõ deòdu tahe tii iwedudeewimy rieryõkeki, tii tahe aõbinamy riwinykeki, tamy tahe urihimyò òhòte tai rÿikre. Inyõ sõwemy ityhykeki, sõwemy ijõ iny tamy rexitòenykre.

⁴⁹ Jesuisi ijõ rarybere: —Heòty-di bede ariworonykemy heka jiarÿ anade. Tii òte raworonykemy idi watzireri. ⁵⁰ Jiarÿ ratisebenaõwesemy aralokre. Arurukre dori. Ele elemy rÿikemy ixi-di watzireri. ⁵¹ Kaiboho tahõtinyte wadehemynyna-di. Ywina adiwydemy wadi tahõtinyte. Aõkõrehe, bede jei jeidÿÿmy anade iribi widee rahitxihitximy rÿikremy. ⁵² Iruyre inysÿ mahãdu heka widee rahitxihitximy rÿikre. Inataõ iny iuhe òludumy rÿikre. ⁵³ Hãbu mahãdu heka tyby òludumy rarekre. Hãwyy tule tadi òludumy rarekre. Iriokorese heka tariòrelahi òludumy rarekre.

⁵⁴ Ijõmy Jesuisi rarybere: —Iu biuwetyky biura-ribi ròhònyreu, Kaiboho kia rybemy tarybemahãtenyete biu kòdòakre. Inatyhymy biu ròamyhÿre. ⁵⁵ Tule tarybemahãte. Yhy ibòò-ribi rebonyreu, bede ratòteekre. Inatyhymy tuu ratòteemyhÿre. ⁵⁶ Itxenadÿÿdu mahãdu! Kaiboho kia terymahãtenyete bede, biu aõmydÿÿna tule iwitxira aõmydÿÿnana teerytenykõlemahãtenyete, bededÿÿnana konana eryna wahe. ⁵⁷ Ijõ Jesuisi rarybere: —Kaibohole teywinyõmyhÿtenyete, aõòbitinamy wahe. ⁵⁸ Aõòrarumy heka aòludu umy rarybekeki, idi ywisidÿÿna ube-ò aradykemy ratxireri, tii-wana widee marybeke idi widi bede biòbitinykemy. Aõkõkeki, tii aradykre ywisidÿÿdu-ò idi ròtenawo-ò soldado mahãdu araròtenykre. ⁵⁹ Tiu heka aòlòkõmy heka mabekre. Ibutumy iòwy biòwynyke xiery bòhònyke.

13

¹ Tahe inyõ Jesuisi-ò relyyre: —Pilato rybemynamy Kalileia mahãdu rururenyre Deuxu-ò raxiwerenyreriò. ² Kia ta Jesuisi narybede: —Kaiboho timybo irubureny-di texinohòtinytenyteri. Ijõ wiratyre raòrarunanyrenyreki aõbo? ³ Ture aõkõ, kaiboho bexiràhĩòbenykeki tule burubenykre irubureny wese. ⁴ Iasÿse ijõ. Iu Silòe hãwã mahãdu tyre heka heto rarie resereu 18 iny sõwe rirubunyunyrene. Arãÿÿraxikre Jerusalẽ hãwã mahãdu ratyre raòrarunanyrenyreki aõbo? Aõbo tahòtinytenyteri? ⁵ Kaiboho bexiràhĩòbenykeki tule burubenykre irubureny wese.

⁶ Tahe Jesuisi kaa ijyy-wana rikewesenanyre, Figoratyò wese heka. Tahe Jesuisi kaa ijyymy delyyde: —Hãbu oworu-ki

figoòð r̃yĩmyh̃ỹre. Tii iraty dilawijunyde tiubo. Tahe iraty-txi reakõre. ⁷ Tahe h̃ãbu taoworu-di itxeredu-ò narybede: —Inataõ wyramy relawijunyre tahe aõkõhyyra. Urile ta biòròkre. Iraty ihoõreki, awi aõkõ rare. ⁸ Tahe oworu-di itxeredu dirawyònyde: —Wawedu, txioini kawyramy idi warukikre, isu ariywinykre. ⁹ Aõkõhyykreki tahe urile raorokre ijõ wyrau.

¹⁰ Judeu mahãdu elehyna txuu Jesuisi rotohodỹỹmyh̃ỹ judeu mahãdu dohodỹỹna heto-ki. ¹¹ Tai ta h̃ãwyyõ ratximyh̃ỹ. Tii 18 beòra webinadumy ratximyh̃ỹ tyytybybina òraru-ki. Tii iumy rarabunumy rariamyh̃ỹre. Ixitaradỹỹ risiranymyh̃ỹre. ¹² Jesuisi tuu robireu, tamy narybede: —H̃ãwyy, kai heka teytemy tate. ¹³ Tahe Jesuisi tebõmy rimyre iuleta reytere. Tai tahe h̃ãwyy heka Deuxu riwowydynyre. ¹⁴ Dohodỹỹna heto wedu tahe ibinamy Jesuisi-ki rahare, judeu mahãdu elehynatxureki wahe. Takamy inyreny-ò narybede: —Debò sohoji reurò txumy aõmysỹdỹỹnamy r̃yĩmyh̃ỹre iu heka adeytemy ixi-di bòdòimyh̃ỹke, judeu mahãdu elehynatxu ta aõkõre. ¹⁵ Tahe Jesuisi dirawyònyde: —Kai, itxenadỹỹdu tate uriteremy iximy rybedu. Kaiboho judeu mahãdu elehynatxu dori abroreni, aawaru heto-ò toimahãte tuu teesenymahãtenyete, tedymahãtemy idi ibemomodỹỹmy bidy-benykremy.

¹⁶ Kaa heka Abraõ riore riòreõ heka Satanasi 18 beòramy rimyre. Aõherekibo ta iribi retaraki sabadotxu ibinamy taha-teri. ¹⁷ Tahe Jesuisi òludu mahãdu raixỹrurenire Jesuisi rybe òraru-ki. Tahe ixỹ mahãdu awityhymy tai rahamyh̃ỹ iòraru-ki. Ibutumy reysarenire.

¹⁸⁻¹⁹ Tii rarybera: —Deuxu Iòlõna wexe aõwesere. Aõ-ò wexe rikiwesenanyrenykre. Tiwexe ijyy kawesere? Deuxu Iòlõna heka alòbòrõna sõmo sõmo wesemy ratximyh̃ỹre. Raumynyreu heka òwòru rariewesele relemyh̃ỹre. Nawiile tuu r̃ỹt̃ynymyh̃ỹre kia òwòru-ò.

²⁰ Ixityre tamy rarybere: —Aõ ijyy wese heka Deuxu Iòlõna rare. Aõwexe rikiwesenanyrenykre. ²¹ Paõ ixiòlòdỹỹna wese rare, iuri rare. H̃ãwyy paõ riwinymyh̃ỹreu, inataõ urihix-ina-ki iuribemy riurinymyh̃ỹre. Tai tahe raubỹt̃ynymyh̃ỹre, rexiòlònymyh̃ỹre.

²² Jesuisi tahe Jerusalẽ h̃ãwã-ò rareu, h̃ãwã h̃ãwãmy rotohodỹỹmy. ²³ Iu inyõ ritỹỹraxinyre: —Wanyrỹ, Hedu mahãdu we sõwekre aõbo? ²⁴ Jesuisi tamyreny narybede: —Bexityhynybenyke ijõyja-di birònybenykemy. Sõwemy iny tahe ròtemy reakre tahe ralòõhyykre. ²⁵ H̃ãbuõ kie taheto ijòtòbòna ritòbònyre. Iu kaiboho uritere bydyrydenykre: —Wanyrỹ, aralòrenyke ini. Kiata tii anawyònydenykre: —Tiludubo toite,

araeryrenyõre. ²⁶ Kamy ta bidiwyònydenykre: —Inybohore riroximy roiremyhỹ. Wahãwãreny-ki tòbedeerydỹmyhỹ. ²⁷ Ixityre anawyònydenykre:

—Boibenyke aõbina bina widỹỹdu.

Tiludubo toite dori reerykõre. ²⁸ Deuxu iòlò-ki Abraõmy, Ijaimy, Ijaõmy, tule ibutumy Deuxumy rybedu mahãdumy bobibenykreu, kaiboho malòbenyõtyhy. Tai hii, ibru, jumy-tata rỹikre. ²⁹ Iny ibutu bede bede-ribi, Ibòò-ribi, Iraru-ribi, Biura-ribi, Beà-ribi Deuxu iòlò-ò hãwãmy. ³⁰ Kiaremy ta, koludu mahãdu heka ibutuhewomy kedeakre. Ikõmyta, hewoludu mahãdu, koludumy kedeakre.

³¹ Iu ta fariseu mahãdu Jesuisi-ò narybedenyde: —Mahenyke, Herodi dori arubudỹỹmy araijereri. ³² Jesuisi dirawyònyde: —Bòðsebenyke kamy ijòrò-ò marybebenykre: —Jiary tyytybybina iny-ribi retareri, tule ròteytedỹỹreri wiji biurasòmmy. Ijõ txumy ta waaõmysỹdỹỹna arihukre. ³³ Kiaremy ta kia rewinyreri arihukre. Deuxumy rybedu dori Jerusalẽ hãwã-ki sohojile rurukre, iwitxira hãwã-ki ta aõkõre. ³⁴ Jerusalẽ, Jerusalẽ hãwã, amahãdu heka rirubunynyrenyre Deuxu rybedu mahãdu wahe. Iwese hãnie tariõre ributunymyhỹre wese terawo-ò, kia wesele arayrubunykemy rexinohõtinyre tahe kaiboho terarenyreny. ³⁵ Aheto-ribi heka Deuxu rexitakre. Kaheka ararybekre adeereny: —Wamy heka bobiõtyhy ixityre. Tiutxumy kamy bexirybenykre bede-ò, myỹ:

—Deuxunimy nodu awityhy heka rare. Kiaule wamy bobikre.

14

¹ Sabadoõu Jesuisi heka fariseu mahãdu wedu mahãduõ heto-ò ralore roximy. Tahe iny idi retehemyhỹreny. ² Iu inyõ taruti, tadera-di taritari-di tamy dehemynyde. ³ Tahe Jesuisi narybede bede ywina erydỹỹdu-ò, fariseu mahãdu-ò: —Sabado txuu deytedỹỹwe awire aõbo, aõkõre aõbo. ⁴ Tiiboho rirawyònyõhyre. Tahe Jesuisi hãbu riteytenymy bede riy-winyre iribi tahe riòlòdỹỹnyre. ⁵ Ixyby narybede Jesuisi: —Txibo kaiboho ariõreõ ada abroreniõ hãloo-txi resekeki, bitabenyke Sabadotxu hãrele. Aõhe inatyhy. ⁶ Tiiboho rirawonyõhyre.

⁷ Tahe Jesuisi roxidu mahãdu-di retehemyhỹre. Tiiboho dori ryanana wihikỹ-txi rononymyhỹreny. Tai kamy tamyreny rarybere: ⁸ —Txibo inyõ bedesanaõ araarikeki. Uritere ryananawi-ò rỹõmykre. Txibo dori inyõ aratyre ityhy kanake lau. ⁹ Tukeki bedesa dinodu inyõ aratyre-ò aryanana-txi ronykemy adee kanarybekre. Tai tahe maixỹrumy ryanana bina-ò bonykre. ¹⁰ Kialemyta inyõ araarikeki, ryanana bina-txi

bonykre. Tahe bedesa dinodu adee kanarybekre: —Wy, katxi bodonyke ryanawihikỹ-ò. Tai tahe kai mabedesakre ibutuko-ò. ¹¹ Tahe ixityhydỹđu mahãdu uritere reakre. Kõmyta uriixi dinodu mahãdu rawowydykre.

¹² Tahe Jesuisi bedesa dinodu-ò rarybere: —Txibo roxina biwahinykeki, uritere asỹ mahãdu, aery mahãdu, ityhy mahãdu aarixiõmykre. Urikõ-ribi iwese teariteri wese araarihenny. ¹³ Tukõmyta roxi biwahinykeki, uriteremy rỹira mahãdu, iny tiere mahãdu, iny ruetà mahãdu biarikre. ¹⁴ Tai adeysatyhymy mabekre. Tiiboho dori tiu ixiwesemy araariõthyhy. Deuxu tahe aõwydỹđukre iu bede awikreu.

¹⁵ Ijõ roholare Jesuisi rybe tai tamy rarybere: —Deuxu Iòlõna-ki, òwòrubese rỹdu mahãdu reysamy rarekre. ¹⁶ Tahe Jesuisi rarybere: —Inyõ roxina nihikỹõ riwinykemy ratxireri. Sõwemy iny ritobinyre. ¹⁷ Rexihumy rỹireu, teòdu mahãdu bede riywinyre iny kididykremy. ¹⁸ Sohoji sohoji tahe tarybe tamy riwahinyre. Ijõ taoworu tỹmyra-ò reteheke. Ijõ kanaõthyhy heka. ¹⁹ Ijõ tahe broreni debòitue riõbranyre tai riurihikreki kanaõke. ²⁰ Ijõ tahe hãwyy herinamy rexihumy rỹire tai kanaõke. ²¹ Teòdu tahe ròðsera tawedu-ò tamy relyre. Tii reburere tahe rarybere: —Wylemy makre ibutury-di hãwã-ki. Ibutumy iny witxira witxira bididyke, iaõkõ mahãdu, itiere mahãdu, ruetà mahãdu wahe. ²² Iribi tahe teòdu ròðsera rarybere: —Ibutumy rewinyre wawedu, tahe heto rỹxiõmy rỹire. ²³ Tahe iwedu ixybymy bede riywinyre hãwã-ribi ibryrary-ò iny kididykemy: —Aruru-di bididyke, waheto dori rỹximy rỹirakremy idi watxireri. ²⁴ Juhuu wato-bidỹña mahãdu warỹsỹna riurihiõthyhy.

²⁵ Iu sõwemy iny Jesuisi heludumy roire. Tai Jesuisi tamyreny rarybere: ²⁶ —Kaiboho aõbo inatyhymy waluu mahãdumy toite. Tuu tarybeta. Tahe boluu, adiluu, ahãwyyлуу, ariðreluu, aseriðreluu, ixiluu ratyre waluuõkeki, wamahãdumy aõkõ boibeke. ²⁷ Inyõ riwaheludunykemy ratxireri, tii juhuu taitxeò riwykre. Kialemy tahe riwaheludunykemy inatyhymy. ²⁸ Inyõ heto rare riwinykemy ratxikeki, juhuu iòwy-di rõhõtinykre. Inieru rimonykeki tahe riwinyke, aõkõkeki tahe riwinyõthyhy. ²⁹ Tii tuu rõhõtinyõkeki, tii ibutelemy riwinykre tahe inieru ituereu, ibutumy iny idi risinykre: ³⁰ —Tii taheto rarei ritelenyre tahe rexihuõthyhy. ³¹ Iòlõ wou riwinykeki, juhuu taaõbinadu mahãdu-di rariamyhỹre. Idi rõhõtinyre. Ijõ iòlõ wawiò mil soldadomy ijõdikeki, tahe tii debòwiò mil ijõdikeki, tahe wou riwinyõthyhy. ³² Juhuu tahe teòdu riteònyre ijõ iòlõ-ò ireheribile tii-wana wou ixãwidỹỹmy rarybekemy. ³³ Akireny tule iweselere.

Ibutumy aaõna aõna biriõbenykeki, waheludu mahãduõmy boibeõtyhy.

³⁴ Saa heka aõni awi rare. Tatxuberere rexihukeki tahe turibi ixãwike. ³⁵ Tai tahe suurina-ki ahirana silõna binakõki awiõhõtidiirenykeki boholabenyke warybe-ò. Suò awiõre, tule ahirana bitòbònykemy awiõre. Urile idi behuke. Kaiboho õhõtidiirenykeki, boholabenyke!

15

¹ Idi nieru tarasadu mahãdu sõwemy tamy roholamy doide. Tule ijõ iny òrarudu mahãdu rehemynyre. ² Fariseu mahãdu, tule bede ywina erydu mahãdu kawesemy rarybere: —Kahãbu ibinare. Tii òrarudu mahãdu-wana riroximyhõre, iny iehehe-wana.

³ Idi Jesuisi rierynanyre ijyy-di rawesenanyre. ⁴ Kaibohoõ òsana 100 budoeni ijõdire. Sohoji heka iy-ribi iõre. Kai aõbo makre ijesemy? Kohe, iuhe, 99, birike bedero-ki tahe biòryhyyke. Aõhe inatyhy? ⁵ Mahakre wana tahe eysamy atxikre. Tahe bidyke iuhe-ò. ⁶ Taheto-ò rehemynyreu, tasõ mahãdu-ò tahe ritobinyre: —Wawana ini kõny bedeysabedenyke. Wabudoeni-ki rahara, iõreõ wahe. ⁷ Iwesetyhylemy taheka adee reerymahãre iny òrarudu mahãdumy. Iu sohoji iny rexirahõkeki, biu-ki deysana sõwemy rõyikre. Iny õbiti 99my tahe urihimyo biu-ki deysana rõyikre.

⁸ Ijõ Jesuisi relyyre: —Hãwyyõ òsõny womati ura nieru debõwiò dire. Sohoji iõre-wana, tii riijeke inatyhy? Loosõna ritoonyre, iube riwysynyre, sõwemy riijeke ihyymy tahe tai rahara. ⁹ Tii itxi reakreu, reysamy rõyira. Iu tasõ mahãdu ritobinyre: —Wawana inihe bedeysabedenykre. Wanieru-txi dokuri rahara. ¹⁰ Jesuisi tahe ritõnynyre: —Iwesetyhyle biu-ki rare. Deuxu õju mahãdu reysamy roirenyre, sohoji òrarudu rexirahõreu.

¹¹ Ixyby tahe Jesuisi narybede: —Hãbuõ iriõre inatxire. ¹² Tiutxumyta ihelõõna tyby-ò rarybere: —Waha, ibutumy aõna aõna burukreu wadee rawahikre, wijile bidiwahinykre. Tyby tahe iaõna aõna jura tamy riwahinyre. ¹³ Iriõre helõõna tahe ibutumy taaõna aõna-di rare irehe-ò, iwitxira bedehãwã-ò. Tai aõbina binale riwinymyhõre. Ibutumy tanieru tai rahure. ¹⁴ Taaõwiwi rahu-di ta, tai rama ibede mahãdu rahumyhõre. Tii uritere reamyhõ wahe. ¹⁵ Tahe aõmysõdõõnyamy rarunyre. Hãwãduõ tahe taixõniòwedõõdumy bede riywinyre taoworu-ò. ¹⁶ Tai rama risamy ta ixõni rõsõna rõsõmy rexinohõtynyre. Tahe aõkõre. ¹⁷ Kia tahe tõhõti deade. Kamy dexinohõtynyde: —Yla aõkõ waha aõmysõdõõnydu mahãdu irõsõnadireri iwana jiarõ kaki rama warubudõõmyreri. ¹⁸ Ixyby aròðekre. Kamy Waha-ò

arexirybenymy: —Waha, Deuxuko-ò ako-ò rexiitx̄ytenyre jiar̄y raòrarunyre wahe. ¹⁹ Ariòre wese aòkõmy wadi mabeke, waitx̄yte òraru-ki. Aaõmys̄d̄ȳdu mah̄adu wese ta ararekre mȳy tii r̄ohõtiny. ²⁰ Tii tahe tyby heto-ò rare. Irehemy nadeò, tyby tuu dobide. Idi rexiwobrunymy tamy raijaranyre iwehityhyd̄ȳmy. ²¹ Tahe tii narybede: —Waha, Deuxuko-ò, ako-ò rexiitx̄ytenyre jiar̄y, raòrarunyre wahe. Ariòre wese aòkõmy wadi mabeke, waitx̄yte òraru-ki. ²² Iule ta tyby teòdu mah̄adu-ò rarybere: —Wylemy tyywihik̄y tymyra-di bityynybenyke. Debòò tebò-ò roikre. Waõ-di rawanykre. ²³ Tas̄se broreni riòre dedi birubunybenyke. Idi rikirox-irenykemy rekeysarenkyre dori. ²⁴ Wariòre dori rubu-ribi wese rexixara. Ikõ-ribi itxi ijara r̄yira. Tahe rawobedesarenyre. ²⁵ Iwana ta iumydela tahetoreny-ò dehemynymy nade taaõmys̄d̄ȳna-ribi. Tahe wobedesana-ò roholamy. ²⁶ Tahe deòdu-ò narybede: —Aõhereriwe. ²⁷ Dirawyònyde: —Ahel̄ȳna kie ròòsereri aõhe rot̄ȳnyõhyylemy. Tai boo broreni rirubunya. ²⁸ Iumydela tai reburere ròte deramy reare. Idi tyby tamy nade riròtenykemy. ²⁹ Tahe iriòre dirawyònyde: —Aõhe òhòkõ adee raaõmys̄d̄ȳnymyh̄yre. Ibutumy arybe retyhynymy watximah̄are. Ih̄areta budoeni wadee tewahinyõhyymyh̄yte, waijoi mah̄adu-wana idi arexideysanykemy. ³⁰ Katahe ariòre urile aõnawiji rahura wedenah̄adu-wana. Ròòsemyta kai broreni riòrede tamy terubunya. ³¹ Tai tyby dirawyònyde: —Wariòre iny ratximyh̄yre kiaremyta ibutumy waaõwiwi heka ahõrõle rare. ³² Iny bedesarenymy heka kawese rewinyre, wadee awireki. Ahel̄ȳna dori ruruwese-ribi rexixara. Ikõ-ribi itxi ijara r̄yira. Tahe rawobedesarenyre.

16

¹ Jesuisi taeryd̄ȳna mah̄adu-ò relyyre ijyyõ: —H̄abuõ inieru s̄owere. Tamy deòduõ ibutumy inieru-di raaõmys̄d̄ȳre ijõ nieru ributunykemy. Ijõt̄xu tahe inyõ rarybere: —Eòdu riki heka anieru-di òbitimy aòkõ raaõmys̄d̄ȳmyh̄yre. Anieru s̄owemy rexihumyh̄yre. ² Tahe didyde ixidee taonta retehekemy. Tamy rarybere: —Inatyhymy aõbo umy iny rarybemyh̄yre? Wanierumy tyyriti aretehekemy watxireri. Òbitimy aòkõkeki, waribi arateònyke. Wanieru-di tiu maaõmys̄d̄ȳnyõkre. ³ Tahe teòdu iximy rexiraykynyre: —Wadinodu riwateònyke. Aõhebo arot̄ȳnyke? Warurukõre dori tahe aõmys̄d̄ȳsira ariwinyõtyhy. Tule ijõ iny-ribi iixitòded̄ȳna riwaix̄rure. ⁴ Reeryre tahe, aõhebo arot̄ȳnykremy. Aõwihik̄y wabiòwa dee ariwinykre. Riwateònykeki tahe wabiòwas̄y-ò arakre. ⁵ Ibutumy nieru huòtedu mah̄adu-wana

rarybere, tawedu-ribi huòtedu wahe. Tamyreny rarybere: –Tiwesebo tewyta wawedu-ribi? ⁶ Tahe diwyònyde: –Adÿÿ rehuòtera, 100 hynamy wahe. Tai tahe rarybere ijõ: –Iwekre tahe wylemy biritinyke, 50 wahe. ⁷ Ijõ-ò tahe rarybere: –Tiwesebo adeve? Diwyònyde: –Trigo rehuòtera, 1000 prato wahe. Tai tamy rarybere: –Kai 800my biritinyke. ⁸ Iribi tahe hãbu ityhy heka teòdumy rarybere: –Tii inatyhy nieru erydu ratxireri. Tahe Jesuisi rarybere: –Kabede wjinabòdu mahãdu heka aõmydÿÿnana erydutyhy rare, ityhydÿÿdu mahãdu ratyre wahe. ⁹ Tai tahe adee ararybekre. Kabede mahãdu biòwamy boibeke, anieru-di. Tahe anieru ituekeki, Deuxu taheto wiwihikÿ-ò aradykre, biu-ò heto wiwihikÿ wahe. ¹⁰ Aõmydÿÿnana aõ aõkõmy kai òbitimy masÿnykeki, tule aõ nihikÿmy kai iweselemy mabeke. Inyõ heka ibutemy wasikeki, tii tule aõ nihikÿmy rawasinykre. ¹¹ Kaiboho heka kabede nieru-di òbitimy aõkõ atxibenykeki, tule biu-ki araròsòna bitaõtyhy, aõ wiwihikÿ inatyhy wahe. ¹² Iny witxira nieru-di heka òbitimy boibe benyõkeki, timybo anieru tyhy-di òbitimy boibeke. ¹³ Inyõ iny inatxi deòdumy aõkõ rarekre. Inatxinaõ dori iluukre, ijõ ta iluukõkre. Deuxu dee maaõmysÿdÿÿõtyhy. Tiu nierurahi inatyhymy teamyhÿteki.

¹⁴ Fariseu mahãdu tamy roholareu, urile idi nierurahi risinyrenyrye, tiiboho ire nieru ributunymyhÿrenyrye bòdÿÿluurenyrye. ¹⁵ Tahe Jesuisi tamyreny rarybere: –Kaiboho heka òbitimy inyko-ò ixi-di atximahãtenyrye. Ihãre tahe Deuxu timybo toimahãte rierymyhÿre aõna aõnarenyrye bina. Aõmy hãbu rexinohõtinyinmyhÿre, aõtxi-ki Deuxu-ò awiõhyrye. ¹⁶ Moisesi bede ywina rybe tahe tule Deuxu Rybedu mahãdu awi rare, Joaõ Sebedÿÿdu rehemynyrye tahe ixãwire. Iu tahe Deuxu Iòlòna Rybe wihikÿ tamyra ròhònyrye. Kia tahe iny ritohodÿÿnyrye. Ibutumy iny kia-ò ralokremyrye idi ratxireri. ¹⁷ Biu, bede rexihuke tahe isiraõre. Deuxu rybe tahe rexihuõtyhy. Kia isiratyhy rare. Ityyriti rybe wedenaõ riõnonyõtyhy. ¹⁸ Hãbuõ tahãwyy-ribi ixãwikeki, idi iwitxira-wana roirokeki, tii òtadu rare. Hãwyy ixedu-wana tii roirokeki, òtadu rare.

¹⁹ Ityhy mahãduõ riki tyy òwyhykÿwiwi-di rexityynymyhÿre. Tii idi rexirabedesirananyrye. Awimyhÿre tuu ratximyhÿre. ²⁰ Tahe urimynodu tyymy binadumy iijò-ki ixyby ixyby ratximyhÿre. Lazaru inire. ²¹ Tii ityhy rÿsÿnauhe rirÿsÿkemy raòbirenyrye. Ijòròsa dori itybinatòmry di-rahumyhÿde. ²² Lazaru rurureu, ÿju mahãdu ridyrenyrye biu-ò ilabiereny rora-ò, Abraõ wahe. Tule ityhy rurure idi rituunyrenyrye. ²³ Tahe rubu-ki rubu mahãdu bedebina-ribi aõhõkÿmy dÿÿnana ityhy Abraõmy robire irehe-ò Lazaru tule

irora-ki. ²⁴ Tahe ityhy dyryde: —Abraõ, walabie, wadi in-
ihe bedexiwoboronyke. Lazaru ini wadee tebò-ki beruty-di
kanake wadòròtò elehynamy. Jiarỹ dori raòhýtỹhýtỹreri ka-
heòtywo-ki. ²⁵ Tukõleta, Abraõ narybede: —Dàà aõwihikỹ-di
tatemyhỹ-di bexinohõtinyke. Tukõlemyta Lazaru aõbina bina-
hakỹle rimyre. Tahe kaki aõwimy Lazaru ratxireri. Tukõmyta
kai ibymy atxiteri. ²⁶ Ihãre ta hãloohukỹ inyko-ki rỹire. Timyki
kaludu kia-ò iòhõreseõna. Tule kia ludu kaò iòhõreseõna.
²⁷ Hebose, Abraõ walabie, kamy ityhy narybede, Urile Lazaru
wasỹ-ò biteònykekõ aõbo. Waseriõreboho deõwarisidỹỹmy.
²⁸ Waseriõrereny dori iruyrerenyre urikõ-ribi kabedebina-ò
kòdòiheny. ²⁹ Tahe Abraõ diwyònyde: —Tiiboho dori Moisesi
tyyriti, Deuxu rybedu mahãdu tyyriti dire. Tii tahe tamy roho-
larenemy rityhynyrenyke. ³⁰ Ityhy narybede: —Aõkõre Abraõ
walabie. Kia inyõ tarubu-ribi rexixamy ròòsekeki xiery ta,
taòrarunareny-ribi rexirahĩrenyke. ³¹ Tahe Abraõ dirawyònyde
ixyby. —Moisesi tyyriti rybe-ò, Deuxumy rybedu mahãdu
rybe-ò roholaõkeki, tii mobo rexixake tule ityhydỹỹõna.

17

¹ Tahe Jesuisi taerydỹỹna mahãdu-ò rarybere: —Kiemy
inyõ wodohonadỹỹmy aradykre òraruna-ò besekemy. Kobe
lãhãxe tii kiawesemy rotỹỹnykreki. ² Tii dori ibinatyhy rare.
Wadee heka kabera-txi mana-di rataataamy sỹy-ò reakenawi
rare. Tukõmy uri-ribi watyhydỹỹdu tỹmyraõ riòrarudỹỹnyheny.
³ Bexiijebyeny ta. Aityhydỹỹdu seriõre rexiòrarunanykeki,
tamy marãhĩke. Tii rexirãhĩkeki, iaõna aõna bina-ribi bexi-
nohõtilosanyke. ⁴ Txu sohojiõmy adee rexibinanykeki, kai tule
ibinamy tai mahamy. Tii ixi-di rexiwotòenymy adee nakeki,
tule idi bexiwobrunymy bexinohõtilosanyke iaõna aõna-di.

⁵ Jesuisi erydỹỹna mahãdu dexitòenydenyde: —Wanyrỹreny,
wainatyhynareny ini bisõwedỹỹnyke. ⁶ Jesuisi dirawyònyde:
—Ainatyhynareny heka sunysisõmo wesekeki, kamy
bederarade-ò marybebenyke: —Bexitake inihe idi bera-txi
myike. Tahe tii aratyhynykre. ⁷ Titxibo kaibohoõ
eòdudirenykeki aoworu-di itxeredu ada budoeni-di itxeredu
wahe. Tii taaõmysỹdỹỹna-ribi kanalokreu, kawesemy aõbo
tamy manarybekre? Wy, wylemy rikiroxikre dori. ⁸ Timyki
kawese tamy arybeõna. Tukõmyta tamy marybeke: —
Warỹsỹna biywinyke idi wadee, idi manakre. Ariroxikre
dori. Wabyre arihu-di ta bexiòenykre. ⁹ Teòdu deòdumy
rearahu-di aõbo, txiòtòetuukemy tamy rarybere aõbo.
Timyki tukõna. Kiemy dori taaõmysỹdỹỹnale riwinyre. ¹⁰ Iu
aõmysỹdỹỹnareny bihudi, iwese heka atximahãbenyke kamy

bexirybenymyhÿbenyke: Inyboho deòdule roire, aõtyhy aõkõ mynodu, iny aõmysÿdÿÿnarenyle heka inyboho riwinyrenyre.

¹¹ Jesuisi Jerusalẽ hãwã-ò ramyhÿreu, Samaria bedede, Kalileia bedede wotya-di rare. ¹² Iu hãwã-òtxi raloreu, debo ituemy sõwereny tyymy binamy mahãdu iry-ò doide, tahe irehemy rexierenyre. ¹³ Iribi tamy drydenyde: — Jesuisi, Erydÿÿdu, wadireny ini bexiwobrunyke. ¹⁴ Tureny robireu, narybede Jesuisi-ò: —Xiwena wahidÿÿna mahãdu-ò ixi-di itxerenamy bòike. Kia-ò rariamy roirenyre, tahe reyterenyre. ¹⁵⁻¹⁶ Ijõreny Samaria ludu mahãduõ reytemy iximy robireu, Deuxu riwowydydÿÿnymy tamy dòsede, rawiunymy. Tatiowomy Jesuisiko-ò resere. Tahe rarybere: —Txiòtòetuuke. ¹⁷ Tahe Jesuisi ritÿÿraxinyre: —Debò itue wese, asõwerenyre? Tixibo ta debò inaubiòwaboho roire? ¹⁸ Aõherekiwe kaa iny wixira sohojile Deuxu wowydydÿÿmy dòsede, Samaria luduõ wahe? ¹⁹ Tahe Jesuisi tamy rarybere: —Mynyike, idi makre. Atyhydÿÿna òraru-ki dori teyteta. ²⁰ Idi fariseu mahãdu Jesuisi-ò rÿÿraxinyre: —Tiubo Deuxu Iòlòna kanakre? Tii diwyònyde: —Timyki Deuxu Iòlòna dehemynysÿnamy inyõ robiòtyhy. ²¹ Tule inyõ kiau rarybeòtyhy: —Betehebeny inihe ka-ò: —Tukõmy aõbo: —Kowaki heka rare? Deuxu Iòlòna dori aworeny-ki rare.

²² Tahe taerydÿÿna mahãdu-ò rarybere: —Tiutxumy heka Deuxu Riòre Hãbutyhyhykÿ txumy bobibenykemy tahe bobibenyòtyhy. ²³ Tahe ijõ adeereny kanarybekre: —Bedetehebeny inihe kaò ada kowa-ò. Tahe iitxerenyòmykre. ²⁴ Iwese tiribi tiò biu relaanyhÿre wese heka Deuxu Riòre Hãbutyhyhykÿ txu kÿnyikre. ²⁵ Delemy tahe tii aõhòkÿmy rotÿÿnykre. Wijinabòdu mahãdu teramy reakre. ²⁶ Noe bededÿÿnana wesemy heka rÿimyhÿkre. Iu beòra rariareu. Tahe Deuxu Riòre Hãbutyhyhykÿ kedehemynykre iu. ²⁷ Ibutumy heka worana bedehesi rÿire. Lisisò tahe rÿire. Hãwyy herina lisina rÿire iu. Iu tahe beòra rariare. Ibutumy ituere. ²⁸ Lòò bededÿÿnana tule iwesere. Tiiboho worana bedehesidile rÿire. Tiiboho rityhynyòtyhy. Urile hetomy riwinymyhÿre, oworumy riwinymyhÿre, aõna-di rohonymyhÿre. ²⁹ Iu tahe Lòò ihãwã-ribi ròhònyreu, Deuxu heòty ityre riteònyre. Biu-ribi heòty ityre resere enxofre-wana. ³⁰ Iwesele txu tii heka rarekre heka, Wadehemynyna Deuxu Riòre Hãbutyhyhykÿ wahe. ³¹ Kiau tahe inyõ ihetotyre heka rÿire. Malòkekõ heka ahetowo-ò aõnamynamy. Inyõ tule oworu-ki rÿire, taheto-ò aõkõ ròðseke. ³² Lòò hãwyy-di mohòtinyke. ³³ Inyõ taumy riyrubunykeki, tii ruruke. Ijõ tahe wadeewimy rurukeki, tii taumy rayrubukre. ³⁴ Adeer rarybere: —Bede rurureu heka inatxi hãbu ròròreri.

Ijõ heka rakre dynamy reakre. Ijõ tahe rarikre. ³⁵ Inatxi hãwyy heka rÿsÿna-di raaõmysÿdÿÿnymy heto-ki ratxikre. Ijõ heka dynamy reakre, ijõ heka rarikre. ³⁶ Inatxi hãbu heka oworu-ki raaõmysÿdÿÿkre. Ijõ heka rakre dynamy reakre, Ijõ tahe ririkre. ³⁷ Ierydÿÿna mahãdu rÿÿraxire. Titxibo rÿikre, Wanyrÿ? Tii rirawyõnyre: –Titxibo iumy rubu roire-wana, rara tai wii ributunyre.

18

¹ Jesuisi heka ròkewesenanyre ribedeerynyreu. Kia wese heka tii ijyymy relyyre. Rexitõenyhykemy tii ribedeerynyre tule ixitõedÿÿ-ò ixirarenyõmy. ² Hãwãõ-ki tahe hãbu matuariõ rare, tii tahe ibinare. Juizimy heka ratximyhÿre ywisidÿÿdu wahe. Tii iny rityhynyõtyhy, Deuxu lau ruberuõmyhÿre. ³ Tule heka hãwyy wyteseõ tai rasÿnymyhÿre. Kia tamy ramyhÿre sõwemy. Tamy rarybera: –Biwawikõhenakykre wahe. Wakòludu tahe riwahureri. Kywisidÿÿkÿdu kai atxiteri. Anoherekibo tiwawokutõenykõteri. ⁴⁻⁵ Aõõhòkõmy hãbu iaõna aõna õbitidÿÿ deramy reamyhÿre. Tahe Hãbu ixidee rarybehyyra. Inatyhymy jiarÿ inyõ retyhynyõtyhy. Tahe hãwyy wytese sõwemy wadee rarybereki, jiarÿ ariõbitinykre iaõna aõna ibutumy iòludu-wana. Aõkõkeki tiemy kidiwarulòlõenyke. ⁶ Tahe Jesuisi ritÿnynyre: –Juizi bina rybe-ò kaiboho boholabenyke. My wahe. ⁷ Deuxu heka taijoi mahãdu-ò roholake. Òbitimy iòludu-di riywisinykre. Taijoi mahãdu dori tamy rexitõenyre. Tii wymy riwiõhenanyke. ⁸ Tii inatyhymy taijoi mahãdu riwiõhenanykre. Jiarÿ, Deuxu Riõre Hãbutyhyhykÿ wymy adehemynykreu, watyhydÿÿdu-txi aõbo areakre.

⁹ Tule Jesuisi kia ijyy relyyre, iny ixityhymy ixi-di ratxityhymy kia ijõ inymy kiale radõnymyhÿre. Kia tahe rikewesenanyre. ¹⁰ –Iny inatxi hãbumy heka templo-ò ròirenyre rexitõenykemy. Ijõ fariseu rare, ijõ tahe nieru arisidu rare. ¹¹ Fariseu tahe rÿimy rexitõenykemy ixidee. My wahe: –Deuxu, jiarÿ aõhãbubina aõkõ rare. Tai tahe umy reålãmy wahãre. Jiarÿ aõwasidu aõkõ, aõðrarudu aõkõ, aõõtadu aõkõ. Iwese kowa nieru arisidu wese aõkõ jiarÿ rare. Txiõtõetuuke tai. ¹² Semana sohoji heka wabyreõ-di inatxityxumy rewymyhÿre. Tule waaõna aõna ibutumy ijura adee rewahinyre. Debòwiona-ribi sohoji rewahinymyhÿre wahe. ¹³ Nieru arisidu tahe irehemy rÿire. Biu-ò aõkõ retehere, tahe rexihetenyre rexitõenyrerimy Deuxu-ò. My wahe: –Deuxu, biwawotõenyke. Jiarÿ òrarudu rare. ¹⁴ Jesuisi ijyy ritÿnynyre: –Adee ararybekre. Mobo teysamy taheto-ò nade? Ixityhydÿÿdu aõbo ada ijõ aõbo. Kohe ijõ tuure, ixityhydÿÿdukõ wahe.

¹⁵ Tiiboho heka uladu tamy didydenyde. Iu Jesuisi tebò iratityre ritidimy ritxuhore awimy roirekemy. Tahe ierydỹna mahãdu tamy idyrenyõkremy raryberenyre. ¹⁶ Jesuisi rarybere: –Txiò, kididyke uladu wadee. Uladu wese dori Deuxu Iòlòna rare. ¹⁷ Inatyhymy ararybekre: –Moõ heka uladu wesemy Deuxu Iòlòna rityhynyõkeki kia heka Deuxu Iòlòna-ò ralòõtyhy.

¹⁸ Idi tahe iweduõ rarybere: –Erydỹỹdu wihikỹ, aõwexe ariwinykre idi biu-ò arahenykemy. ¹⁹ Jesuisi tamy rarybere: –Aõbo wa wihikỹmy wadee tarybeta. Hãbuõ tiu awiõre. Deuxu sohojile tahe awira. ²⁰ Bede ywina tyyriti kai teeryte:

–Rubudỹỹõmykemy, tule òta òtaõmykemy, wasiõmykemy, tule ruiõmykemy, iny wii itxenadỹỹõmykemy, adi biywinykemy, boo tule.

²¹ Hãbu tamy rarybere. –Kia bede ywina rybe retyhynyhyllere, uladudihyyle wahe. ²² Jesuisi rarybere: –Kai sohoji aõmydỹỹnale aki nasiranyde. Kai makre, ibutummy aõna aõna-di bohonykre, idi tahe kia nieru biwahinykre iny aõkõdu mahãdu-ò. Kia tahe aõmydỹỹnadikre biu-ki. Tahe manakre biwaheludunykre. ²³ Kia rybe-ki heka hãbu rabadewore. Rexitare ibedewomy iaõna aõna sõwetyhyreki. ²⁴ Jesuisi retehemy ibederyry-di tahe rarybera taerydỹỹna-ò: –Kia iny iaõna aõna sõwemy rỹireri, Deuxu Iòlòna-ò ralòke isirare. ²⁵ Kamelo tyyrorenawo-di ralòkemy isirakeki, kia-ribi isiratyhyre iny iaõna aõnadikeki ralòke Deuxu Iòlòna-ò. ²⁶ Ijohonadu tahe widee rarybere: –Mobo tai biu-ò hedukre. ²⁷ Jesuisi rarybera: –Inatyhymy kõaõboka hãbu-ò isiratyhyre. Deuxu-ò tahe ibutummy aõna aõna isiraõre. ²⁸ Pedro rarybere: –Boholake, jiarỹboho ibutummy rerirenyra araheludunykremy. ²⁹ Jesuisi rarybere tamy: –Inatyhymy adeereny ararybekre. Moõ waluukeki, rybewihikỹ luukeki, kia heka ririkre: heto, taseriõre, tyby tadi-wana, tariõre, tabede, ibutummy waõraru-ki, Deuxu Iòlòna õraru-ki, ririkre. ³⁰ Ka bedekile ritakre sõwetyhymy ibutummy aõna aõna. Ihãreta biu-ò rahenykre Deuxu-wana rasỹnykemy.

³¹ Jesuisi taerydỹỹna mahãdu ridyre inysõwe-ribi tamyreny rarybekemy: –Boholabenyke wajioi! Jerusalẽ-ò rokoirenykre. Tai iny riwarubunykre jiarỹ Hãbutyhy rarehãre, Deuxu Riõre rarehãre wahe. Iwese Deuxu Rybemy rybedu mahãdu rarybere wese. ³² Tiiboho riwawahinykre judeukõdu mahãdu-ò. Tiiboho riwabinabinadỹỹnykre, riwalahikre, watyre rarybexinykre. ³³ Riwahetenykre õhòte-di, idi riwarubunykre. Ihãre tahe inataõ txu-di tahe adexixakre rubu-ribi. ³⁴ Jesuisi erydỹỹna mahãdu urile bede

riòtiinyrenyrene. Aõmybo tii rarybere rierytyhyõrenyrene. Irybe tamyreny dori ierynatyhykõreri.

³⁵ Iu Ijeriò hãwã-ribi iòhòmý roirenyreu, inatxi iny ruetàmý heka ronymyhÿ Jesuisi ibire-di rareu. Tiibohe nierumý rexitòdenymyhÿrenyrene. ³⁶ Inysõwe-ò roholarenyreu tahe, tii rÿÿraxirenyrene: –Aõhereriwe. ³⁷ Tahe tamy rarybere: –Jesuisi wa rareri Nazare hãwã ludu wahe. ³⁸ Tahe ruetãò rryryre: –Jesuisi, Davi riokore! Biwatòenyke hewa! Wadi làhà inihe bexiruxetòenyke. ³⁹ Iny sõwemy tamy rarybere: –Iryõmyke! Ihãre ta tii rryrymyhÿre: –Davi riokore, wadi mawotòeke! ⁴⁰ Jesuisi rryryre tahe rarybere: –Tamy byryke wadee kanakemy. ⁴¹ Jesuisi tamy rarybere: –Aõmybo kai taruteri adee arutÿÿnykremý. Tahe hãbu ruetàhàkÿ tamy rarybere: –Wawedu, ixityre arobikremý. ⁴² Jesuisi tahe tamy rarybere: –Makre, atyhydÿÿna kai arateytenyra. Kialehe rare. ⁴³ Aõwesele ixityrele tii robire. Tahe Jesuisihemy rare rry-di. Taihe ibutumý iny heka Deuxu riwowydynymyhÿ.

19

¹ Ijeriò hãwã-ki Jesuisi rehemynyrene. Idi rariareri. ² Tahe hãbuõ tahe Jesuisi riere. Zaqueu inire. Inieru sõwere. Tii nieru tarasadu weduõ rare. Inieru sõwere. Tii heka iyjare tahe Jesuisimý robiõtyhy. Raòwònýre tahe òwòru-txi. ³ Tii Jesuisimý robikemy risÿnymyhÿ, tiu tuu robiõhyymyhÿreki. Iyjare-ki tahe rexisiranyrene. Kiemy dori iny rarie iko-ki rÿimyhÿ. ⁴ Tahe ijoiko-ò rexiraòre tai òwòruõ-ò raòwònýre Jesuisimý robikemy iribi idi kanakreò. ⁵ Iu Jesuisi tamy rehemynyreu, biu-txi retehemý Zaqueu-ò. Narybede: –Wylemy bedeseke Zaqueu. Wiji dori aheto-ki bede wadi rÿike. ⁶ Tahe rabedesamy wymý resere. Awimý Jesuisi rybe-ki rahare. ⁷ Tahe inyõ mahãdu iòraru-ki kamy rexirybenyrenyrene: –Aõhewe Jesuisi iheto-ò rara? Tii iny òbikòmý nodu hãrele wahe. ⁸ Zaqueu tahe Jesuisi rarybere: –Bodoholake ini, Wanyrÿ. Tahe waaõna aõna iwekre iaòkõdu mahãdu-ò ariwahinymý ararekre. Tule txibo inyõ-ribi rowasire inaubiòwa wawasi ratyre tamy ariwahinykre. ⁹ Tai Jesuisi narybede: –Wijityhyle kahãbu sÿmahãdu-ò henana rehemynyra. Kahãbu tule Abraõ riore riòrele rare. ¹⁰ Deuxu Riòre Hãbutyhyhykÿ dori iny òrarunamy resere mahãdu òrysymý itarasamy nade. Jiarÿ tiire.

¹¹ Jesuisi tamyreny rawesenanyrene timybo Deuxu Iòlòna raremý. Jerusalè hãwã-ò iòhòmý ratximyhÿre. Tai tahe Deuxu Iòlòna iòhòmý ratximyhÿremý roholare. ¹² Tahe Jesuisi rarybere iny ityhyõ heka: –Inyõ nihikÿ heka rakemy ratximyhÿre ijõ bede-ò ratÿinykemy. Tai iòlòmý ronykremý rare. Iribi tahe

ròosere. ¹³ Tii tahe taaõmydÿÿnana ririre teòdu mahãdu-ki. Teòdu mahãdu debòwiòmy heka womati tÿrÿrÿhÿkÿ nieruò sohoji sohoji tamyreny riwahinyre. Tamyreny rarybere: —Nieru bitakre, idi bibutunybenykremy adireny watxireri adoosekreu. ¹⁴ Tahe kia bedede ludu mahãdu iòlò deramy ratximyhÿre tai tahe tamy rybemy iny mahãduò riteònyre: —Kahãbu aòkò iny iòlòreny ronykre. ¹⁵ Ihãre tahe iòlòmy ronyre. Idi tahe tanieru wedu mahãdu-ò rarariòwyre. Tiwesebo teòdu mahãdu nieru ritare rierykemy. ¹⁶ Juhuludu tahe rehemynyre: —Wawedu, betehe inihe ijò debòwiò anieru ratyre rebutynyre. ¹⁷ Tahe iòlò sòwemy riwowydynyre: —Awityhymyhe taaõmysÿdÿÿta. Kai heka deòdu wihikÿ tate. Kai ibutedile sòwemy tewinyte tahe debòwiò hãwã adee riwahinykre. ¹⁸ Ijò tahe rehemynyre: —Wawedu, betehe iny iruyre anieru tyre rebutynyre. ¹⁹ Tahe iòlò tamy rarybere: —Kai sÿ iruyre hãwãmy dinodu mabekre. ²⁰ Ijò deòdu rehemynyre: —Wawedu, ahãxe anieru. Jiarÿ tyky-di reraserasenymy rerarenyre. ²¹ Jiarÿ alau raberure. Kai dori hãbu nieru tarasaery heka tate. Aõ taaõmysÿdÿÿteri-ribi aòkò heka nieru tetamahãte. ²² —Kai heka deòdu awi aòkò heka tate. Arybe xiery waribi arateònykre. Kai tiwaeryte jiarÿ nieru tarasaery heka watxireri. Aõ raaõmysÿdÿÿre-ribi aòkò nieru retamahãre. ²³ Aõherekibo. Kia nieru yrubuna heto-ki terikòte. Tai iximyna ratyre ini iribi ratare. ²⁴ Iòlò teòdu inatxi-ò rarybere: —Wanieru iribi bitabenyke. Ijò hãbu sòwemy ròtareò rawahikre. ²⁵ Ijò raryberenyre: —Tii heka debòwiò nieru ijòdire. ²⁶ Adee ararybekre: —Inyò òbitimy raaõmysÿdÿÿkeki, tii sòwetyhymy ritakre. Tule inyò òbitimy raaõmysÿdÿÿòkeki, tii ibutumy ròònodÿÿkre. ²⁷ Iwedu rarybekre: —Waòludu mahãdu tahe wadee bididybedenyke. Wadera mahãdu wahe. Wako-ki birubunybenyke.

²⁸ Tarybe rahudi tahe Jesuisi rare Jerusalē hãwã-ò.

²⁹ Jerusalē iòhòmy ritehemynyrenyre, tahe inatxi taerydÿÿna bedede riywinyra hãwã-ò roikemy. Inatxi hãwã iòhòmy roire, Betabaji, Betÿnia-wana. Kia-ò Oliveira hãwãlò roire. ³⁰ Jesuisi rarybere: —Kaiboho boikre kowa hãwã-ò. Kowa-ò birònykreu jumenta riòre mahabenykre. Moheka ityre rariaòlemy ratximyhÿre. Biesemy, wadee bididybedenyke. ³¹ Inyò adeereny rarybekeki: —Aõhekremybo idi atxitenyteri. Tahe tamy marybebenykre: —Wanyrÿ tuu rurureri. Ixityre kaò kidiòkesedÿÿnykre. ³² Tahe hãbu roire. Iwese Jesuisi rarybere wese ibutumy rÿire. Jumenta riòre ryro hetoijò-ki ritisanymy rÿimyhÿ. ³³ Tai riesereu, iwedu rarybere: —Aõherekibo teeseteri. ³⁴ Tai tiiboho Jesuisi rybe myna tamy raryberenyre: —Inynyrÿ tuu rurureri. ³⁵ Tahe

ridyrenyre jumenta riòre Jesuisi-ò. Tiiboho tatyreny ritidi-renyre jumenta riòre tyremy. Tiiboho risÿnyrenyre Jesuisi ityre-ò. ³⁶ Jesuisi rehemynyreu, ijòboho tahe tauwòhi ryromy ritidire ityre rariakemy. ³⁷ Jerusalē iòhòmy rehemynyreu, Oliveira hāwālò-ribi, ierydÿÿna mahādu rawyhyrarònyreri, tule ryreri.

³⁸ Tii heka wowydyna rare. Tii heka Wanyrÿ niwesekey naderi. Wowydyna rare Deuxu Iòlòna. Kai Iòlòna kanakre. Wyhyrarò biu-txi kodoholakre.

³⁹ Ijò fariseu mahādu rarybere Jesuisi-ò: —Marybeke aerydÿÿna mahādu-ò tiiboho rirykemy. ⁴⁰ Jesuisi tamy rirawyònyre: —Tiiboho rirykeki, manale wowydynamy riryke.

⁴¹ Jesuisi Jerusalē hāwā-ò iòhòmy rehemynyreu, rahinyre. ⁴² Tii rarybere: —Kaiboho ywinatyhy teeryòte. Inatyhymy teeryte wana wadee awire, tahe aòkòre. ⁴³ Ijò txu kanakre. Ahāwā ibutumy rirurawonykre aòbina mahādu, aòludu. ⁴⁴ Ibutumy hāwā ituekre. Iny iwo-ki tule rurukre. Mana ibutumy kedeseke. Rierykòre dori tiubo jiarÿ aheadÿÿrenymy nanade.

⁴⁵ Tahe Jesuisi dohodÿÿna hetowo-ò ralore. Tahe kia-ribi aòna aòna-di rohonomyhÿre mahādu, òbradu mahādu diteònyde. ⁴⁶ Rierynanyhÿre tahe tamy rarybere: —Raridÿÿòlemy aòbo rÿireri: —Waheto kòaòboka inatyhymy ixitòedÿÿna hetomy rÿirakre. Idi kaiboho tewinytenyte wasidu hetowesele.

⁴⁷ Txu ibutumy Jesuisi dohodÿÿna heto-ki ròbedeerydÿÿmyhÿ. Xiwe wedu mahādu, Deuxu aòmÿÿdÿÿdu wedu mahādu roholarenyre, ròhòtinyrenyre: —Timybo inyboho Jesuisi rubudÿÿmy rikiwisÿnyrenykre. ⁴⁸ Tiiboho tahe aòkòhykyre iny sòwemy dori bede riòtiinymyhÿ ibedeerynadÿÿna-ki.

20

¹ Ijò txu tahe Jesuisi ròbedeerydÿÿmy, Ijyy Tÿmyra Wi-hikÿ wahe. Ririranyhÿrenyre dohodÿÿna hetowo-ki, bede ywina erydÿÿna mahādu, Deuxu xiwena wahidÿÿdu mahādu wedu, tule matuari mahādu tamy doide. ² Tiiboho tamy rÿÿraxirenyre: —Mowe ateòdÿÿdure kia aòna aònamy tatÿÿnyhÿtemy. ³ Jesuisi dirawyònyde: —Adeereny tule araÿraxikre. Kaiboho bidiwawyònykeki, tahe jiarÿ akoreny ÿraxina ariwyòkre aòrurudibo aòna aòna rewinymyhÿre. ⁴ Tahe Jesuisi ritÿÿraxinyre: —Mobo Joaò ratisebedÿÿmy riteranyre? Deuxu aòbo ada iny aòbo? ⁵ Tiiboho widee rarybera: —Deuxu riteranyremy inyboho rakaryberenykeki, tai tii rarybekre:

—Aõherekibo tahe tii tetyhynytenyõte. ⁶ Inyõ riteranyremy rakaryberenykeki, iny aruberuwỹhỹrenykre. Ibutumy iny dori Joaõ rityhynyre tii Deuxu rybe-di rybedumy. Ijõ iji mahãdu urile inyreny kidihetenykre. ⁷ Tai tahe tiiboho raryberenyre: —Jiarỹboho reeryõrenyre. Tai tahe Jesuisi rarybere: ⁸ —Hebo, jiarỹ adeereny iximy ararybeõtyhy modeòdỹĩnamy jiarỹ tuu watzirerimy.

⁹ Iribi tahe Jesuisi tamyreny ijyy-di rierynanymyhỹre: —Hãbu uva oworuõ wese ròbròre. Tahe riòtitynyre. Tahe hãloo riare oworu ubetya-ki, ruỹdỹĩnymy. Tahe utò riwinyre. Idi tahe rityhere hãbu mahãdu-ò. Tahe rexitare tasỹ-ribi ijõ bede-ò. ¹⁰ Tahe bederaty siredemy bededỹĩnana rehemynyreu, iwedu teòdu riteònyre bederaty ritakemy. Tahe oworu-di itxeredu oworu wedu deòdu rimyrenyre, rihetenyrenyre idi riteònyrenyre ixihyylemy. ¹¹ Ixityre oworu wedu teòduõ riteònyre. Kia heka irati rihetenyre ta tamy rawobinarybenyre. ¹² Ijõ riteònyre. Kia heka rirubunynyrenyre. ¹³ Iwedu xixi dee rarybere: —Aõhebo arotỹĩnykre. Tahe oworu wedu iriòre sohojilere, wariòre kie kie sohojile ariteònykre. Tai tiiboho rityhynyrenykre. ¹⁴ Kia oworu-di itxeredu mahãdu widee raryberenyre: —Kia heka wedu aõna aõna tarasadu rare. Rurukre, idi tahe iaõna aõna inydeerenykre. ¹⁵ Tahe rimyrenyre idi rirubunynyrenyre tahe idi rehurennyre oworu-ribi. Jesuisi ritỹĩraxinyre: —Aõhebo tahe oworu wedu rotỹĩnykre. Tai Jesuisi ixityre narybede: ¹⁶ —Tii kanakre oworu-di itxeredu mahãdu hudumy, tai tahe oworu rityhekre iny witxiraõ-ò. Kia-ò tiiboho roholareu, tahe raryberenyre. Timyki tukõna. ¹⁷ Jesuisi idi reny retehemy tahe rarybere: —Ritina-di aõbo tariaõletenyte kia ryberiti: —Mana-di hetowidỹĩdu rehura. Kia mana heka hetohãtxi-ki heridu rare.

¹⁸ Inyõ kia manatyre resekeki, kia urile raoroorokre. Mana tahe inytyre resekeki, kia urile risyrisynykre.

¹⁹ Bede ywina erydỹĩna mahãdu, tule xiwena wahidỹĩna mahãdu wedu rimykeny riwisỹnyre kiaule. Brebumy ta turennykõre. ²⁰ Tiiboho hãbubinaõ riòwynyrene tamy imynamy irybe-ki. Tai tahe Dinodu-ò riwahinykremy aõsirakõmy timykibo irutaõmy rirybewitxiranyrenykeny. ²¹ Tiiboho rarybere Jesuisi-ò: —Erydỹĩdu, jiarỹboho araerymy adi watximahãrenyre kai inatyhy hãbu tate. Iny ibutumy adee wiwese wiweselere. Inatyhymy iny-ò Deuxurymy teerynanymahãte. Tahe tiiboho ritỹĩraxirenyre: ²² —Awire aõbo ada ibinare aõbo nieru rawahinyrenyrenyre bede dinodu-ò. Timybo tahe, imposto raòwymy aõbo ada aõkõre aõbo. ²³ Jesuisi rierymyhỹre tõhõtinanareny, tahe ritỹĩraxinyra: —Aõherekibo kaiboho ti-

waurihitenyteri. ²⁴ Wadee womati nieruõ bidiwy waitxerenamy. —Kawe moõ tyytarasana rare, katahe moõ tyyritina rare. Tiiboho dirawyõnyde: —Kiahe bede dinodu hõrõ rare. ²⁵ Jesuisi rarybere: —Hÿdebo, bede dinodu hõrõ tahe tamy biwahinybeny, tule tahe Deuxu aõna aõnahõrõ Deuxu-ò biwahinybeny. ²⁶ Tiiboho aõkõre. Irybe-ki rimynamy aõkõ. Urile ribedeõtiinyre.

²⁷ Saduseu mahãdu tamy nade. Kia heka iny rubu-ribi rexixamy aõkõre-riki rierynanyhÿre. Tiiboho ritÿÿraxinyre Jesuisi: ²⁸ —Erydÿÿdu, Moisesi raritinyre bede ywina-ò, kaimy: —Hãbuõ rurukeki, tahãwyy iriõre ijõdiõkeki, tahe kia hãwyy tahãbu seriõre-wana roike. Iriõredikre taseriõre rubuõwmy roikre.

²⁹ Seriõre debõinatxi reurõmy raremyhÿ. Juhuu ijõ roire hãwyy-wana. Tahe tii rurure iriõreõlemy. ³⁰ Tahe ihewoludu iseriõre wytese-wana roire. Tii rurure iriõreõlemy. ³¹ Ihewoludutyhy tule ibutumy roire wytese-wana, tahe ituerenyre iriõreõlemy. ³² Irõõbmy tahe hãwyy tule rurure. ³³ Ixixanau tahe mohãbubo tii-wana rarekre. Ibutumy dori wytese-wana roire. ³⁴ Jesuisi rirawyõnyre: —Kabede-ki hãwyyiny iny roimyhÿre. ³⁵ Ixixanabedeu heka moõ roiõtyhy, inyõ dori bede kia riõbynykreu. ³⁶ Ibutumy iny ÿju wese rarekre biu bede-txi. ³⁷ Moisesi tatyryiti itÿnyhÿkÿlemy rarybere: —Iny rubu-ribi kedexixakremy. Tai ta heõty õwõru sõmo riworonymhÿki ixbyylesÿ rarybera:

—Deuxu heka Abraõ, Ijai, Ijaõ kia Deuxu rare.

³⁸ Tai Deuxu inyru mahãdu Deuxu dori rare. Iny rubu mahãdu ta aõkõre. ³⁹ Inyõ rarybere: —Arawyõnakyhyna, Wanyrÿ Tate. Bede ywina tabohe teertyhyte! ⁴⁰ Tai tahe ixbyrÿÿraxiõhyrenyryre.

⁴¹ Jesuisi rarybere: —Timybo bede ywina erydÿÿdu mahãdu rarybemyhÿre Kristu Davi riõre raremy. ⁴² Davi rarybere aõmybo Deuxu Tyytybytyhy tamy narybedemy iwiuna-ki:

—Wanyrÿ rarybere Wanyrÿ-ò:

—Bodony warurunawe-ribi.

⁴³ Txiohe inihe, aõludu awarawo-txi aritidikre.

⁴⁴ Tahe Davile tanyrÿmy rininire. Timyki tahe Davi itybymykre.

⁴⁵ Tii taerydÿÿna mahãdu rierynanyhÿreu. ⁴⁶ Tii rarybera: —Bexiemyhÿbeny bede ywina erydÿÿdu mahãdu lau. Tiiboho heka tyyrehetyhywidihikÿle rexityynymyhÿrenyryre. Tiiboho heka ixi rybedÿÿluurenyryre hãwã riraki. Dohodÿÿna heto-ki rynanawi luurenyryre. Tule ta anarÿÿ rÿi-wana, tyhytyrekile rynana tamyreny awire. ⁴⁷ Tiiboho tule wytese aõ aõkõ mahãdu aõna aõna ritamyhÿrenyryre. Ixitõedÿÿna rehehekÿ

rexitòdenymyhÿrenyrene. Tiiboho heka aõnihikÿmy aõhõkÿmy dÿÿnanamy rotÿÿnyrenykre.

21

¹ Jesuisi retehemy rÿimyhÿ dohodÿÿna heto nieruhyna-txi. Tii retehere tibo iny tanieru-di rehumyhÿdi. Tai inieru sõwe mahãdu nieru sõwemy ritidimyhÿ. ² Tule tahe nade wytese aõ aõkõ mahãduõ. Tii inatxi nieru sõmo-di rehure. ³ Tai Jesuisi rarybere: —Kowa heka wytese nieru-di rehure ibutumy iny wixira ratyre. ⁴ Ijõ mahãdu tanieru uhedile rehumyhÿ. Tahe wytese idi rehure ibutumy tanieru-di rexihumy taumy-ribi idi rehure. ⁵ Dohodÿÿna hetomy ierydÿÿna tamy rarybere: —Erydÿÿdu, beteheke mana wihikÿ ruxera ruxera-di eryna heto riruxeranyreridi. ⁶ Jesuisi rirawyõnyre: —Kaiboho betehebennykre hetonihikÿ-õ. Kia heka mana ijõ wityre-ki rÿiõtyhy, ibutumy heka kedejuxunykre. ⁷ Tiiboho ritÿÿraxinyre. Tiubohe ibutumy kidiixixãwididÿÿnykre. Tiiboho ibutumy bede konanadÿÿnamy reakre. Timybohe arieryrenykre, aõma bede ibutumy rexihukre. ⁸ Jesuisi tamyreny rarybere: —Kaiboho anaitxenanydenyheny lau bexiebenyke. Sõwemy dori rÿikre wanimy rarybemy rarekre: —Jiarÿ dori Kristu rare. Tahe iny sõwemy itxenadÿÿmy reakre. ⁹ Kaiboho wounarybe-õ, aõbina rybe-õ, boholakreu, breburenyõmykre. Kia heka kanakremy ratximyhÿre. Urile bededÿÿnana ikonanatyhy aõkõ rare.

¹⁰ Tii tamyreny rarybere: —Uritere iny lahinareny, ijõ lahinareny widee kanaaõbinanykre. Tule iõlõna mahãdu, ijõ iõlõna mahãdu-wana widee kanaaõbinanykre. ¹¹ Bede bedesu ijõ hãwã-ki kanamytatakre. Tahe aõkõre rama kedeakre. Kia heka juhu aõhõkÿmydÿÿnana rarekre. Aõbrebuna brebuna kÿnykre. Idi biu-ki aõwitzira kÿnykre. ¹² Tiiboho arawahinyrenykre aõludu wedu-õ, iõlõ-õ. Kaiboho heka aõhõkÿmy iu botÿÿnybenykre, watyhydÿÿ õraru-ki. Tiiboho arahatenyrenykre dohodÿÿna hetowo-ki. Kiabohoko-txi wadee kaiboho kedelyykre inatyhymy aõna aõna rÿiremy. ¹³ Rybewihikÿmy ibutumy bede bede hãwã hãwã-õ belyybenykre. ¹⁴ Tiubo aradyrenykeu, urile nohõtiõmy aõmybo kaiboho marybebenykre. ¹⁵ Kiautyhyle aõmybo marybebenykre bierykre. Kia tahe marybekre. Kai aõkõ dori marybekre, Deuxu Tyytybytyhy tahe rybedukre. ¹⁶ Asÿreny dori rõtenawo-õ ararõtenyrenykre. Seriõre seriõrele wii kidirubunykre. Tyby heka tariõre kidirubunykre. Uladule tadi, tyby kidirubunykre. ¹⁷ Ibutumy heka iny iy kedeakre wani õraru-ki adeereny. ¹⁸ Ibedeu araderenytiõ reseõtyhy. ¹⁹ Bexityhymy ta tai ixiery dori

biu-ò mahenybenykre. ²⁰ Ijõ tahe Jesuisi rarybere: — Woudu mahãdu Jerusalẽ rirurawonykreu heka bierybenykre aõhuluhudunamy bede rÿirerimy. ²¹ Judeia hãwã hãwã-ki ratxiukeki, mahenybenykre bederatòòhòkÿ-ò. Inyõ Judeia hãwãkikeki, iribi òlò rÿikre. Idi inyõ bederokeki ixyby Jerusalẽ-ò ròteõmykre. ²² Kia txuu heka òwynatxумы rare. Ibutумы rybe tyyriti myna heka bede rÿikre. ²³ Kobexe heny hãwyy bòtõmy rÿira, tule hãwyy tariõre ritõnomy rÿira. Aõhòkÿmydÿÿnana kanakre tiu heka tuuõre. Debure nihikÿ heka kanake kia iny tyre-ki. Tiu heka kiamy bede roiõtyhy aõhòkÿmydÿÿnanamy. ²⁴ Sõwemy iny rurukre mayrehe-di. Iny sõwemy radykre ijõ bede-ò aõhòkÿmy tai rotÿÿnykremy. Ityhydÿÿdukõdu mahãdu rasÿnykre Jerusalẽ hãwã-ki iu.

²⁵ Ixityre tahe Jesuisi rarybere: —Idi webòhõna rÿira txuu, aõhòkÿmydÿÿnana itue-di, txuu heka rurunykre. Ahãdu tule rurunykre, tule taina. Beòbò lau iwodÿÿ lau ibutумы iny ruberukre inihikÿ òraru-ki. ²⁶ Iu bede bede iny mahãdu aõhebo rotÿÿnymy, tatòhõtibre-di tiiboho reserenyire sutyre-ki tai. ²⁷ Iny retehekre

Deuxu Riõre, Hãbutyhyhykÿ dehemynyna-di. Biurawetyky-ribi kodobehekre tatyhy-di.

²⁸ Tahe kia aõmydÿÿnana rÿikre, ywinamy bõibenykeu, iõhòlereri.

²⁹⁻³⁰ Tai tahe Jesuisi figueiraò-wana tahe bede ròkewesenanyre: —Figueiraò-di ini bexinohõtinybenyke. Tii heka tairu-txi, tanoiròsò ritÿmyranymyhÿreu, tai tahe bierybenykre wyra iõhòlereri. ³¹ Tule kia aõna aõnamy bobibenykreu, tii iõhòlereri. Ijõ-ki iõhòwesele rÿire. ³² Inatyhymy adee ararybekre, kia wijinabòdu itueõtyhy aõna aõna rÿikre hãrele. ³³ Biu, bede-wana ituekre, tahe warybe itueõtyhy.

³⁴ Tahe Jesuisi tarybe rihумы rarybere: —Kaiboho bexiebenyke, betehebennykre ixinohõtidiÿÿrenythykõmy. Roxina worana bedehesi-di timybo kaiboho atximyhÿtenytedi. Mona juberere biõbenykemy mohõtinyõke. Kaiboho dori teeryõtenyete tiubedemybo adòòsekre. ³⁵ Kiatxu kanakre tahe iwese nawii mynyna wese aõwesele rimumykre ibutумы bede iny mahãdu rimumykre. ³⁶ Biebenyke tahe, Deuxu-ò bexitõenybenyke. Kia tahe aõhebo rotÿÿnykre-ribi mahenyke. Bityhynyke Deuxu Riõre, Hãbutyhyhykÿ, jiarÿ wahe.

³⁷ Txuõ txuõlemy tii Dohodÿÿna heto-ki ribedeerynyre ihãre tahe rummy Oliveira hãwãlò-ò rara. ³⁸ Rudile tahe sõwemy iny dohodÿÿna heto-ò rehemynymyhÿre Jesuisi rybe-ò ijohomy.

22

¹ Iòhòmy ratxireri Pascoa worana bedehesi kodohònykremy. Kia anarỹỹ wehityhynamy heka iny ratya-di reare. Tule orotxu anarỹỹ kia ròhònyre. ² Deuxu aòmysỹdỹỹdu wedu mahādu, tule bede erydỹỹdu mahādu Jesuisi rimykyemy ratxireri idi rirubunykyemy. ³ Satanasi heka Judasi Isariòwo-ki ralore, tii Jesuisi erydỹỹnaò ihỹre. ⁴ Juda Isariò heka Deuxu aòmysỹdỹỹdu-ò rara Jesuisi riwahinykyemy. ⁵ Tiiboho tamy roholarenyreu, reysare. Tahe tamy nieru riwahinykyemy riurenanyre. ⁶ Tahe Juda riijemyhỹre aõu aõu bedewihikỹ tamyreny riwahinykyemy. Wasimy riwahinykyemy tii roholare.

⁷ Juhu orotxu anarỹỹtxure budoeni xiweloo rirubuny rahudi tahe Jesuisi erydỹỹna mahādu tamy rarybere: —Titxibo anarỹỹ rỹsỹnamy biroxykyemy atxiteri. ⁸ Tahe Jesuisi heka Pedro, Joaõ-wana riteònyre: —Kaiboho boike iny rỹsỹnareny ywidỹỹmy. ⁹ Tiiboho rỹỹraxire. Titxibo ariwinyrenykyre? ¹⁰ Jesuisi tamy rarybere: —Kaiboho boikre hāwāhākỹ-ò. Tahe hābu-wana wii biòbinykyre butxi-di retyreriò. Tahe tii biheludunybeny. Titxibo heto-txi ralokreò, kaiboho tule bironybeny my bitỹỹraxinybenykyre heto wedu: ¹¹ —Wawedureny rarybera: —Titxiwexe anarỹỹ rỹsỹna arirỹsỹkyre waerydỹỹna mahādu-wana. ¹² Tii heka adee kiditeòsinykyre hetowoò-txi biu-ki. Ibutumy rexihumy rỹire inydeereny. Tai rỹsỹna inydeereny biywinybenykyre. ¹³ Tahe ierydỹỹna rexitare. Roire hāwāhākỹ-ò. Tahe rotỹỹnyrenyreu Jesuisi rybe myna. Tahe ibutumy rexihurenyreu anarỹỹ-ò.

¹⁴ Kia txu rimyreu tahe Jesuisi nade taerydỹỹna waòinatxi reurò-wana byremy ronyrenykyemy. ¹⁵ Tii tamyreny rarybere: —Jiarỹ awanareny ariroxikyemy watxiwāhāre. Karibi dori warubuna-ò arakre. ¹⁶ Inatyhymy ararybekre: —Jiarỹ konanamy ayreny-ki ariroxikyre. Ixyby ta Deuxu Iòlònakile tahe rikiroxirenykyre. ¹⁷ Tahe vĩ mona hyna rimyre, rexitònyre, tahe tamyreny riwahinyre. Ibutumy ibute bute iribi tuu riòrenyreu. ¹⁸ Inatyhymy ararybekre: —Tiu ixyby tuu ariòòtyhy Deuxu Iòlòna-ki kotyre. ¹⁹ Tiiboho riroxireriu, Jesuisi orotxu rimyreu, raorore, rexitònyre, tahe tamyreny riwahinyre. Rarybere: —Ahāxe, kia heka waumy wese rare. Iu biroxykeu, warubuna-di mohòtinybenykyemy. ²⁰ Biòbenyke! Kaa dori wahālubu wesemy ratxireri. Tahe tamy riwahinyre riòrenykyemy. Tai sōwemy iny ròhònyke biu-ò hena-ò ibutumy òraruna ixāwididỹỹmy. Tuu ròhònyra. Kia heka wadeewimy iny Deuxu-wana ratxiinyhỹre, wahālubu òraru-ki. ²¹ Boholabeny inihe watyhedỹỹdu inykyrenykyre ronyre. ²² Iwese tyriti-ki roire wese heka arurukremy, Deuxu Riòre, Hābutyhyhykỹ,

jiarỹ wahe. Kobe lähàxe watyhedỹ̃du. ²³ Tiiboho tahe widee rarybere: —Mobo tahe rare? Mobo Jesuisi riwahinykre.

²⁴ Iribi tahe widee raryberenyre, mobo wiratyreremy? ²⁵ Tahe Jesuisi tamyreny rarybere: —Kabede iòlò mahāduy-ki iruru dire. Bede dinodu tahe iny rininire: Iny biòwa. ²⁶ Tahe ayreny-ki kawese aòkò ihỹre. Inihikỹtyhy inyò ratxikeki, tii inyuhe deòdumy ratxikre. ²⁷ Tibo inytyhy rare? Roxidu mahādu ada deòdu mahādu? Roxidu mahādu, aòhe inatyhy? Jiarỹ tahe ayreny-ki deòdu wesemy jiarỹ rare. ²⁸ Kaiboho heka wawanahyy atxitenyte aòhòkỹmy ratỹ̃nymyhỹreu. ²⁹ Tai tahe adee ruruna ariwahinykre. Iwese Waha wadee riwahinyre wese, adee ariwahinykre. ³⁰ Waiòlòna-ki kaiboho wawana biroxibenykre, biòbenykre. Tule rynana wiwihikỹtyre-ki rỹdu mahādumy bonybenyke. Israeli iny mahādu heka kaiboho biòbitinybenykre, ibutumy judeu mahādu wahe.

³¹ Jesuisi ijò rarybere: —Simaò, Simaò, wadee bohولاتyhyke. Satanasi araurihirenykemy wadee rexitòenyre. Tahe adeeremy kanake araurihidỹ̃my. ³² Dori rexitòenymyhỹre, Simaò, kai bityhynyhykemy. Wadee bòdòdòsekeu, abiòwa mahādu biwiòhenanyke. ³³ Tahe Pedro diwỳnyde: —Awanahyy arakre, wanyrỹ, arurukre hāre, ròtenawo-ò arakre hāre. ³⁴ Jesuisi tamy rarybere: —Pedro, kai biwatxiònyke, hānie hābu ryrkòule biwatxiònyke inataòmy.

³⁵ Jesuisi tamyreny rỹ̃raxire: —Juhu arateònyrenyreu anieruhynakòmy, asaurenkòmy, awarenyòmy, adeeremy aòbo aò rasiranyre? Tiiboho dirawyòmy: —Aòkò, aò rasiranyòhyre. ³⁶ Tahe Jesuisi narybere: —Wiji tahe txibo inyò inieruhynadikeki, saudikeki, biwykre. Txibo inyò imayrehedikòkeki tayhyitxena-di rohonykre iòwy-di tahe tii riòbranykremy. ³⁷ Kamy dori Deuxu rybe tyyriti-ki roire:

—Òbitikòmy nodu mahādu-wana tii rỹire.

Ibutumy timybo tyyriti wamy rarybere heka rỹikre. ³⁸ Tamy ierydỹ̃na mahādu rarybere: —Wanyrỹ, kaa inatxi mayrehe rỹire. Tahe Jesuisi rỹire rarybere: —Awire kia.

³⁹ Tahe Oliveira hāwālò-ò roirenyre, taerydỹ̃na mahādu-wana. ⁴⁰ Tiiboho kowa-ò rehemynyreu, Jesuisi rarybere: Bexitòenyke! Tai tahe òraruna-txi beseòke. ⁴¹ Tahe iko-txi urihimyo rareu, taowotimy resemy. Rexitòenyre: ⁴² —Waha, adee arexitòenykre. Adee awikeki, aòhòkỹmy dỹ̃nana waribi biixāwidỹ̃nyke. Tahe adeewikomykre, wadeewi ta aòkòre. ⁴³ Ÿjuò tamy nade biu-ribi tamy ruru riwahinyre. ⁴⁴ Sòwemy tahe rexitòenyre, iòsana-ribi resere bee wahe. Hālubu wese heka ihỹre resereri bedè-ò. ⁴⁵ Tii rehemynyre tai rahare ròròrenymy roireriò. Tiiboho ele risarenyre sòwemy

rabedeworenyreki. ⁴⁶ Tamyreny rarybere: —Aõherekibo tarõtenyteri? Biijebenykre, bexitõdenykre.

⁴⁷ Tii rarybereriu, aõwesele Judasi nade. Tii-wana doide hãbu mahãdu. ⁴⁸ Jesuisi rarybere Judasi-ò: —Judasi, Deuxu Riòre bityhenykre aõbo, jiarỹ hãbutyhyhykỹ wahe? Waòbuò-di aõbo biwatyhenykre? ⁴⁹ Jesuisi erydỹña mahãdu tuu robireu, tamy rarybere: —Iny mayrehe-di araaõbinanyrenykre, Wanyrỹ. ⁵⁰ Kia ijojio mayrehe ritare tahe Deuxu aõmysỹdỹdu wedu deòdu nohõti riorore. ⁵¹ Tahe Jesuisi rarybere: —Ixãwike. Tahe hãbu nohõti riteytenyre. ⁵² Tahe Jesuisi dirawyònyde tamyreny, Xiwe wahidỹdu mahãdu-ò, dohodỹña heto itxedu wedu-ò, matuari mahãdu-ò: —Kaiboho mayrehe-di, òhòte-di tiwaòrytenyteri jiarỹ wasiduòrysya wese. ⁵³ Jiarỹ tahe dohodỹña heto-ki watximyhỹ txuõ txuõlemy adeereny anaerynanymahãdenyde. Kowa-ki heka tiwamyõlemyhỹtenyte. Kia heka bededỹñana rexihure. Bede luru ruru roirerimy. Tahe aõbo iritina-ki rỹireri, kia heka kỹnyikremy.

⁵⁴ Xiwena wahidỹdu mahãdu dinodutyhy-ò wedu-ò tii-boho Jesuisi ridyrenyre. Pedro riheludunyre ireheriòremy. ⁵⁵ Rehemynyreu tai Pedro ixitòteenymy heòtywera-ò ronyre heto itxeredu mahãdu-wana. ⁵⁶ Pedro ratximyhỹ-ò tahe deòduõ rehemynyre, ijadòma wahe. Pedro-di ijadòma retehemy ta rarybere: —Tii tule Jesuisi Nazareludu-wana ratximyhỹre. ⁵⁷ Tahe tii rexitxiõnyre: —Jiarỹ reeryõre aõmyboho kai tarybeteri. ⁵⁸ Ixybyle kowa ijojio Pedro-ò rarybera: —Inatyhymy kai ijõ mahãduõ tate. Tii inatyhytyhyrybemy rarybera: —Jiarỹ reerykõre hãbumy tarybetenyteri. ⁵⁹ Ijõ òrau tahe ijõ rarybere: —Inatyhy rare kai Jesuisi-wana ahãte, Kalileia mahãduõreki. ⁶⁰ Tahe Pedro rarybere: —Hãbu, reeryõre aõmybo tarybeteri! Tahe hãnie hãbu robura. ⁶¹ Jesuisi heka Pedro-ò retehere. Tahe Jesuisi rybe-txi Pedro tõhõti reare. Iwese Jesuisi rarybere: —Hãnie inataõmy robukre myna, kai waheludumy bedexitxiõnykre. ⁶² Pedro tahe iribi rexitareu, ixidee iky reamy rahinyre.

⁶³ Tahe hãbu mahãdu Jesuisi rihetenymy, rilahirenymyhỹre. ⁶⁴⁻⁶⁵ Tiiboho riruehetynymy rihetenymy idi ritỹraxyinymyhỹre: —Mowe arahãtenyra. Idi tahe sõwemy idi risinymyhỹreny.

⁶⁶ Rudile tahe judeu wedu mahãdu ributunyre xiwena wahidỹña mahãdu-wana. Jesuisi ridyrenykemy raryberenyre dohodỹña mahãdu-ò. ⁶⁷ Tamy ritỹraxyinyre: —Kai aõbo Kristu tate, Deuxu Riòretyhy. Jesuisi rarybera: —Jiarỹ heka kohemy ararybekeki, kaiboho biwatyhynyòtyhy.

68 Adeereny arỹraxikeki, kaiboho biwawyònybenyòtyhy.

69 Kaiboho bierybenykre

Deuxu Riòre heka jiarỹ rare. Idi Waha rurunaweribi-ò aronykremy.

70 Ibutumy tahe tamy rarybere: —Kai aõbo Deuxu Riòre tate? Tii rirawyònyre: —Iwese kaiboho tarybetenyteri wese jiarỹ inatyhy rare. ⁷¹ Tahe tiiboho raryberenyre: —Inyõ irybe-ò ijohoke heka aõkõre, inybohòle dori tuu roholarenyre.

23

¹ Kia iny ka ibutumy Jesuisi ridyrenyre Pilato-ò, bede dinodu-ò wahe. ² Idi tahe aõbina binahakỹmy tuu raryberenyre: —Kahãbu heka bede rijeijeinyreri iòlòmý ijoy radònykemy. Iribi iòlò-ò òwydỹ rỹiòmyhỹkemy rarybere. Ihãreta Deuxu Deòdỹnamy raremy idi iòlòmý rexininimyhỹre. ³ Tahe Pilato rỹraxire Jesuisi-ò: —Inatyhywe kai Deuxu mahãdu iòlòtyhy tate? Tai tahe Jesuisi riwyònyre: —Kai tuu tarybeteri, Wanyrỹ. ⁴ Tai tahe Pilato rarybere xiwe wahidỹỹdu mahãdu dinodu-ò, tule inysõwe mahãdu-ò: —Timyki kahãbu aõhòkỹmy wasỹdỹỹõna, aõõ bina dori riwinyòlere. ⁵ Tai ixyby idi risỹnyrenyre: —Kahãbu heka Kalileia bede-ribi bede rijeijeinymy rareri, idi Judeia bede-di tule katahe kakile tuu rotỹnyre. ⁶ Taita Pilato rỹraxire: —Tii aõbohe Kalileia mahãduõ ratxireri? ⁷ —Tii Kalileia mahãdu rare. Kia Pilato rieryreu, Herodi-ò riteònykemy rexinohõtinyre. Tii kia dinodureki. Ihãreta Herodi Jerusalẽ hãwã-ki iu ratximyhỹ.

⁸ Herodi Jesuisi robireu heka reysare. Jesuisimy robikemy riwisỹnymyhỹre sòwemy. Idi tahe tuu robireke, reòsare. Tai tahe reysare. Ini-ò roholahyymyhỹre. Tule aõwihikỹ wixira riwinykemy idi riwisỹnymyhỹre. ⁹ Idi tahe Herodi sòwemy rỹraximyhỹre. Jesuisi tahe rirawyònyòhyre. ¹⁰ Aõbo xiwena wahidỹỹdu mahãdu wedu, tule bede ywina erỹdỹỹdu mahãdu sòwemy aõna aõna binamy tuu raryberenyre. ¹¹ Herodi tasoldado-wana tuu raòhòtemy idi risinymyhỹreny. Tyywihikỹ-diri rirahananyrenyre. Iribi riòkesedỹnyre Pilato-ò. ¹² Juhuu heka Herodi Pilato òludumy widi raremyhỹ. Kia txule tahe widee rowoixirenyre.

¹³ Idi tahe Pilato tahe ibutumy xiwena wahidỹỹdu wedu, tule matuari mahãdu tule ijõ iny mahãdu ributunynenyre. ¹⁴ Tamyreny rarybere: —Kaiboho heka wadee tedytenyteri bede jei jeiwidỹỹdumy tuu tarybetenyte tebutenyteri heka. Jiarỹ akoreny-ò retỹraxyrenyre idi aõhe tai ibinamy rahaõhyre. ¹⁵ Tule iòlò Herodi tai ibinamy rahaõhyre. Tai diòkesedỹnyde. Tai iurenana ta aõhereki timyki irubuõna. ¹⁶ Urile raòhòtedỹkemy bede reywinyre idi ta ixinamy

rakre. ¹⁷ Kiemy dori worana bedehesiu, ròtena-ribi inyõ heka ròhònymyhỹke. ¹⁸⁻¹⁹ Sõwemy iny heka rirajuare: — Aõkõre uritere ta Baraba biteònyke. Kia hãbu urile ruruke. (Baraba inyrubudỹdure. Bede jei jeidỹỹ-ki heka ròtena-ò ralore.) ²⁰ Tai Pilato Jesusi òlòdỹỹmy riwisỹnymyhỹ tai ixyby rarybere: —Aõkõre Jesusile ariteònykre. ²¹ Sõwemy iny ixyby ryryre: —Aõkõre, itxeò-ki bitamadỹỹnyke! ²² Tahe Pilato tainatãõnami narybede: —Aõherewe, aõwe tii ibinami riwinyre. Aõheka tai ibinaõhyreri rubu-ò rawahikemy. Òhòteòle ta arawahinykre idi ariteònykre. ²³ Ihãre ta iny sõwe mahãdu ire rirajuamyhỹreny itxeò nihikỹ-ò rurukemy. Ix-ieryta iryreny-ò roholare idi tukremy. ²⁴ Iu Pilato heka Jesusi riwahinyre rubu-ò tumyna rexitòenymyhỹrenymy. ²⁵ Ijõ hãbuõ ta ròtenawo-ribi riòlòdỹỹnyre, iixitòedỹỹreny myna wahe. Tii hãbu aleerydu rare, tahe bede jei jeidỹỹdu tule. Iwana ta Jesusi rawahire irybemynarenymy aõhebo rotỹỹnykremy.

²⁶ Tahe Jesusi ridyreny. Ryki tahe hãbuõ iutedereny-ò nade, Simaõ inire, Sireni hãwã ludu wahe. Nohõtiõlemy ta ityre itxeò nihikỹ ritidirenyre, iherenymy idi kanakremy.

²⁷ Sõwemy ihemy nodu sõwe. Iy-ki hãwyy mahãdu Jesusi-di robumyhỹreny. ²⁸ Tii tahe tamyreny rexiòkesemy narybede: —Jerusalẽ hãwã ludu hãwyy mahãdu! Ixirahi bobubenyke ariõre rahi tule warahi ta aõkõre. ²⁹ Tiutxumybo bexirybenybenykre: —Hãwyyky bedekòby heka raritxòrenykrõre mahãdu rare, tohokuã ritònykrõre mahãdu tiku kuladu-di tarukikõre mahãdu. ³⁰ Tiutxumybo

bexirybenybenykre hãwãlò-ò: —Watyreneny bedeseke tule hãwãlò riõre-ò bexirybenybenykre: —Biwawòbenykre.

³¹ Wiji kawesemyhỹre hee itukure hãre. Timykrebo tahe hee irubukreu.

³² Ihãre tasỹse iny inatxi hãbu òbitimy nodu aõkõ ridyrenyre Jesusi-wana rururenkremy.

³³ Tahe hãwãlò riõre-ò ratitybmy ninadu-ò ritehemynyreny. Tahe tii-wana inatxi wasidu itxeò nihikỹ-ò rilamadỹỹnyreny. Ijõ ruruweribi-ò ijõ hyweweribi-ò. ³⁴ — Waha, idireny bexiruxetòenyke rieryõhyrereny dori aõmybo rotodỹỹnyreri.

Tai tahe ityy wimy ritxuatxuakremy dado-di rehumyhỹreny tibo iwydydukremy.

³⁵ Iny retehemy rỹimyhỹ taile wahe. Judeu wedu mahãdu tule Jesusimy rarybere: —Tii iny sõwemy rihedỹỹnyre, kia aõherekibo tii rexitaõreri rubu-ribi, tii Deuxu deòdỹỹna rarehãre. ³⁶ Tule soldado mahãdu rarybere aõbina binahakỹlemy. Diwyde tii aõna ta iny kremy rirahõreny tami idi reare rijeny: ³⁷ —Kai inatyhymy judeu mahãdu iòlòmy

atxiteri wana heka kaa bexitakre iribi. ³⁸ Itxeò ratya-ki tahe aõma timy roire tyyritidỹna.

—Kaa Heka judeu Mahãdu Iòlò Rare.

³⁹ Ijõ heka rarybereri Jesusibire-ki roireriõle tamy rarybereri: —Deuxu deòdỹna tateki, bexitake tule biwatabenyke.

⁴⁰ —Wy, Deuxu lau taberuõlemahãte aõbo tule dori iny aõhõkỹmy rokotỹnykrelemy iny roireri. ⁴¹ Lòwudu tamy rarybereri:

—Iny heka rurureri, aõbina binahakỹ iny riwinyre òraru-ki. Iny rurureri. Kaa hãbu rỹire tiu aõbina riwinyõhykyre.

⁴² Jesuisi-ò rarybere: —Jesuisi, watxi õhõti beakre Iòlõmy bonykreu. ⁴³ Jesuisi tamy rarybere: —Wijile heka biu-ò heka rakakre.

⁴⁴⁻⁴⁵ Txutyemy bedede roronyre idi txioro txu rehehekỹ-ò bedede tuu rỹire. Inataõ òramy bedede rybinyre, rỹire. Heto-ki rahanaheridu urile raykare templo-ki wahe. ⁴⁶ Tahe Jesuisi rirajuare: —Waha, watyytyby adee rawahinyreri. Iu irybe rexihureu rurure. ⁴⁷ Soldado mahãdu wedu tuu robire kia aõhebo rotỹnara tuu rarybere: —Kia inatyhymy hãbu õbitityhy rare. ⁴⁸ Ibutumy iny kia robire Jesuisi rubu-ò rahinyemy ròosere rexihetenrenymy tabreti-ò. ⁴⁹ Ibutumy tii mahãdumy ratximyhỹre iribi ireheriõremy rexiijemyhỹ.

⁵⁰⁻⁵¹ Tii judeu bedede mahãduõ rare. Jyjemy inire. Tahe Kristu rubuna-ki awimy rahaõhỹre taijoi mahãdu-ribi. Tii dori Deuxu Iòlõna riraõmyhỹre. Ihãwã Arimatea inire. ⁵² Tai ta rare ixitòedỹmy Pilato-ò, Jesuisi umy kidiwahinykremy. ⁵³⁻⁵⁴ Tai tahe ritare itxeò-ribi tyy ura nihikỹ-di tyy-di ritỹtetỹtenyrene. Manawabedewo-ò ritidire. Tai tiu iny rahãloonaõmyhỹre. Aõma judeu mahãdu elehyna txu wahe ixiywidỹnatxumy txu rỹireu heka aõma worana bedehesi txu. ⁵⁵ Hãwyy mahãdu Kalileia-ribi Jesuisi-wana. Tiiboho doide Jyje-wana Jesuisi hãloo-ò itxeremy. ⁵⁶ Tahe timybo roimyhỹ riòtudunyenyre. Dòosedenyde iribi aderõna lỹnyre ywidỹmy iumy tỹnyrenamy.

Kia rexielehynyenyre sabado txu bedede ywidỹna myna-di.

24

¹ Juhu txu semana bededỹnanau txuu deadeu hãwyy roire wabede-ò. Tiiboho riwyre lỹnyrena. ²⁻³ Rehemynyenyre, mana nihikỹ tahe ijò-ribi ratamy rỹire. Tahe ralõrenyre, Jesuisiumy ihoõhyre. ⁴ Wabede-ò rirõnyrenyre, robirenyre inatxi hãbu. Ityy urahakỹmy rononymhỹre tai. ⁵ Tahe tiiboho bedede riòtiinyrenyre idi tabrebu-di suò reserenyre. Yjyõ tamyrenyre rarybere: ⁶ —Iny irumy kaiboho teijeteri kaki wabede-ki aõbo? Tii kaki ratxireri. Tii rexixara rubu-ribi adeerenyre rarybere wese Kalileia bedede-ki: ⁷ —Inyõ riwawahinykre inybina-ò Deuxu Riõre Hãbutyhyhykỹ. Itxeõtyre-ki arỹkre tai

arurukre. Inataõ txu-di tahe rubu-ribi arexixakre. ⁸ Tahe hãwyy irybe-di rõhõtinyrenyrene. ⁹ Wabede-ribi rajjaranyrenyrene Jesuisi erydÿÿna mahãdu-ò ijyymy. ¹⁰ Kia tiibohore: —Marie Madalena, Joana, Marie Txiause. Ijõ hãwyy tule tii-wana roirenyrene. ¹¹ Iu tamy relyyreu, rityhynyõlerenyrene. ¹² Pedro tahe rÿimy reare idi rajjaranyrene wabede-ò. Urile tykylemy robire tahe dòõsede, rexiõtiniyrene.

¹³ Itxuleu ta iny inatxi hãbu Jesuisi tyhydÿÿdu mahãdu tahe roirenyrene Emau hãwã-ò. Jerusalẽ hãwã-ribi txibo 10 km wese irehere. ¹⁴ Ibutumy aõhebo rotÿÿnyramy wiko relyymy ròimyhÿre. ¹⁵ Iuleta Jesuisi tamyreny dehemynde idi tiiboho-wana roire. ¹⁶ Tiiboho tuu robirehãre timyk-ibo rierykõhykyrenyrene. ¹⁷ Tahe Jesuisi rõtÿÿraxire: —Aõmywe widee tarybetenyteri. ¹⁸ Iijõreny Klopamy nidu narybede: —Kai sohojilewe Jerusalẽ-ki aõhebo bede rÿira teerykõte. ¹⁹ Tii dotÿÿraxide: —Aõherabo ta. Tiiboho tuu relyyre: —Jesuisi Nazare ludu kie. Tii Deuxumy rybedu nihikÿ heka rare, Deuxu-ò dori ibutu iny-ò heka rybe-ki aõni heka aõmywidÿÿ-ki heka ihÿÿna rare. ²⁰ Waxiwenareny wahidÿÿdu wedu tahe wadinodureny itxeò nihikÿ-ò rurukremy riwahinyrenyrene. ²¹ Tule judeu mahãdu tarasadukresÿna raholarenyrene. Ihãreta tukõlemyta inataõ txumy rubu-ki bede idi rÿira. ²² Bederarasò-di waijoireny hãwyyõ ihãloo-ò roire. ²³ Tai itxi rekoaõhyyre. Dòõsedenydeki tahe ÿjummy riki robirenyremy delyydenyde. Tii Jesuisi rubu-ribi rexixamy tamyreny rarybere riki. ²⁴ Waijoirenyõ tule ihãloo-ò roirenyrene. Inatyhy rikihe rare. Urileta riki Jesuisimy robiõrenyrene. ²⁵ Tahe Jesuisi tyhy Klopaboho-ò narybede: —Aõherewexe Deuxu Rybedu mahãdu rybe awo-ki teximytentyteri tetyhynykõtenyteriki wahe. ²⁶ Kialemy dori Kristu dori aõna aõnamy rotÿÿnykremy tai Deuxu riwowydnykremy. ²⁷ Tahe Jesuisi rexidelenyrene aõbo rybe ritina roiremy. Moisesi ryberiti juumy ritÿÿnynyrene. Timybo Deuxu rybe ritidÿÿdu raremy. Tiemy heka iximyyhyyle rarybere. ²⁸ Ibutumy tamy relyyhyyre ramyhÿrehy tahe ritehemyny Emau hãwã-ò, tai inatxi hãbu rarikreò wahe. Tahe Jesuisi rarybere: —Aõkõ arexinoranykre. ²⁹ Tai ta tamy ihãrele rarybemyhÿre: —Txioinihe bodonyke kakile. Aõma bede ratxinyra ratxioronytyhyra. Taile tiiboho-wana rare ihetoreny-ò. ³⁰ Rorukurenyrene riroxirenykremy. Tahe Jesuisi orotxu rimyre rexitõenyrene Deuxu-ò. Tahe orotxu riororiorore imynareny. ³¹ Iu tahe aõwesele rierymy reare Jesuisi. Tai iruereny raraymy rieryrenyrene. Tahe aõwesele iõmy iribi reny reare. ³² Tai widee raryberenyrene kiamy. Iu tii Ryberitimy inydeereny rydi relyyreu, urile wawo ratooteemy.

Kai tahe. Ijõ diwyònyde: —Kohe jiarỹ tulere. ³³ Iribi tahe ritamanyrenyde. Diòòsedenyde ixyby Jerusalẽ hãwã-ò. Tiu waòsohoji reurò erydỹña itxi rekoarenyreu. Tai tiiboho narybedenyde: ³⁴ Inynyrỹrenyhe rexixara. Pedro heka tuu robira: ³⁵ —Jiarỹboho tulerenyra wawanale ròirenyra rydi. Tule wadeereny orotxu riyreyrenyra. Taile reeryrenyre.

³⁶ Iu kiamy relyymyhỹrele, Jesuisi dehemynymy deade ityareny-txi. Riryberenyre ibutumy: —Ywina heka akirenyke! ³⁷ Ibutumy ruberurenyre ilau. Urile raresỹny tamy raholarenyre. ³⁸ Jesuisi rarybere: —Aõhebo taberutenyteri. Breburenỹomyke hewa biwatyhynybenyke. ³⁹ Jiarỹle ratxireri. Wadebò-di bedetehebedenyke, wawa-ò tule. Jiarỹ karare wadee inihe bideribedeny. Jiarỹ uni aõkõ watxireri. Uni dori idedire aõkõ wawese aõkõre bedetehebedeny inihe. ⁴⁰ Tai tahe tebò wotõ mona, tawa wotõmona, riteòsinyre tamyreny. ⁴¹ Ihãrele tahe rityhynyrenyõre, ibedesamy bedede riòtiinymyhỹreny. Jesuisi tahe rexitòenyre tamyreny aõ rirỹsỹkemy. ⁴² Tamy riwahinyrenyre utura wòsi deyreõ. ⁴³ Rirasỹre ikorenyõle.

⁴⁴ Idi tamyreny rarybere: —Aõma wawanale ratximahãre, õhõtireny itxi reara. Aõma wawana atximahãtenyte juhUU. Ibutumy heka adeereny retỹnynymy rarybere aõmybo wamy rybe roimyhỹremy. Ibutumy heka Moisesi rybedu ritidỹñaki iritina-ki roimyhỹre. Wiuna tule wamy riritinyre. ⁴⁵ Tai tahe ritỹnynyre òbitimy irakyreny riraynyre. ⁴⁶ Ihetxiu rybe wãhã aõma Deuxu Deodỹña rurukre heka aõhõkỹmy rotỹñnykremy. Ruru-ribi inataõ txu-di rexixakremy bedede roire. ⁴⁷ Kaa rybe wihikỹ ritidỹña heka kaa Jerusalẽ bedede-ki robỹtỹkre ihãreta ibutumy iny iny kõkõmy bedede bedemy robỹtỹkre. Kiamy heka ibutumy inydee marybebenykre. Iny riwatyhynymy rỹirakre heka ibutumy iòraru-ribi ariixãwididỹñnyke. ⁴⁸ Tule terytenyteri ibutumy aõhebo rotỹñnykremy. ⁴⁹ Tahe adee ariwahinykre iwese Deuxu rarybere wesemy heka adee ariwahinykre. Kaki hewa matxibenykre hãwã-ki. Tahe kanakre heka adee ruruõ biu-ribi. Iribi tahe bõhònykre karibi.

⁵⁰ Iribi tahe Jesuisi ridyrenyre Betỹniary-ò. Tai tahe rilãhãnanyrenyre tuu tamy rexitònyrenyre ibutumy tamyreny. Tamy rexitòenyre heka ilãhãnamy tamy rexitòenyre biutxile ire rexidymy ramyhỹre ryanamymy ramyhỹre. ⁵¹ Iu rilãhãnanyrenyde, biu-ò rare. ⁵² Tamy rexitòenyra aõma lãhãnamy, wowydynamy rexitòenymyhỹre Deuxu-ò. Tai riwowydynamyhỹreny. Teysa-di diòkesedenyde Jerusalẽ-ò ixyby. ⁵³ Tai tahe Deuxu dohodỹña heto-ki ixyby ixyby rowowydynanyrenyre.

Joaõ

Deuxu Rybe Wihikỹ Tỹmyra, Joaõ Tyyritidỹdu

¹⁻² Ibutu aõna aõnakõu, Jesuisi rarehyymy raremyhỹ. Tii rybehyyemy raninira. Tii Deuxu-wana ihỹre. Ihãre tahe tii Deuxule rare. ³ Tii ibutuhukỹlemy riwinyre. Tiiõhyykeki tahe, aõ releõtyhy.

⁴ Umytuedeõna wahidỹdu tii ihỹre kia-di iny mahãdu rayky ritoosõnymyhỹre ritỹnynymyhỹre wahe. Kia loosõna heka bedede luru ludu loosõna rare. ⁵ Bede luru tỹnyna loosõna rare. Loosõna ròtamyhỹre, bedede luru tahe ròanodỹmyhỹre.

⁶ Deuxu teõduõ diteõnyde, Joaõ inire. ⁷ Tii loosõnamy rarybekremy nade. Kia rybe-di roholamyhỹreki, ibutumy iny rityhynyrenykremy. ⁸ Joaõ loosõna aõkõ rare. Urile tuu rarybekemy nade.

⁹ Jesuisile loosõnatyhy rare. Tii bedede-õ nadeu, ibutumy iny rayky ritoosõnyre. ¹⁰ Tii bedeki raremyhỹ, bedede widỹdu rare, ihãre tahe iny rieryõhyyre mobo tii ihỹre. ¹¹ Tasỹ mahãdu-õ dehemynyde, judeu mahãdu-õ wahe. Ihãre tahe ridyõhyyre, rityhynyõhyyre urile teramy reare. ¹² Iu inyõ Jesuisi rityhynymy ridyreu. Deuxu riõreõlemy risỹdỹnyre inimy rityhynyreki. Kia-õ tahe ruru tamy riwahinyre. ¹³ Kia ityhydỹdu tahe Deuxudeewilemy tule iriõreõmy roirekemy. Hãlubu-ribi aõkõ ratybienyre, urariribike aõkõ, hãbudeewike aõkõ. Deuxudeewilemy iny ihỹmyhỹrenyre.

¹⁴ Rybe tahe umyõ rimyre, demy rexiijenyre, inyyreny-ki rasỹnymyhỹre. Tii tỹxihikỹlemy Deuxu loosõna-di ratximyhỹre, ruxetõena-di inatyhyna-di nade. Inyboho tuu robirenyre. Deuxu Riõre delamy ratximyhỹre, sohojihyyre. ¹⁵ Joaõ Jesuisimy rarybere kia wese: –Kiamy heka adeereny rarybere. Tii wahewomy kanakre heka waratyre awityhyre. Tii dori wako-ki rarehyymyhỹ waribi juhuutyhy wahe. ¹⁶ Inyboho dori sõwemy ruxetõena iribi ritarenyre. Luuna sõwetyhymy tawo-ribi Jesuisi inydeereny diwahinyde. ¹⁷ Deuxu bedeywina tahe Moisesi òraru-ki nade inydeereny. Ruxetõenamy tahe inatyhyna Jesuisi Kristu òraru-ki nade. ¹⁸ Inyõ heka tiu Deuxumy robiõtyhy. Deuxuriõre delale heka itỹnydỹdu rare. Tuunatyhy-di taãxiõtiki rimyre. Tiile iny-õ Deuxu ditỹnynyde.

¹⁹ Judeu mahãdu Jerusalẽ-ribi xiwena wahidỹdu mahãduõ diteõnyde Joaõ dỹraxydỹmy. Levita mahãduõ tule diteõnyde.

Tahe roirenyre rityỹraxinykemy mobo tii raremy. ²⁰ Tahe Joaõ-ò rỹỹraxirenyre aõhereriwe mobo atxiteri. Joaõ dirawyõnyde inatyhymy rexitxiõnyreri: —Jiarỹ Kristu Deuxu deòdỹỹna aõkõ jiarỹ rare. ²¹ Tai tahe ixityre tamy rarybere: —Mobo tahe atxiteri, Elia aõbo. Aõkõre, Joaõ rarybere. Tahe Deuxu dee rybedu atxiteri inyboho riraðrenyleriõ wahe? Joaõ rarybere aõkõremy. ²² Tamy tahe ixityre raryberenyre: —Wakoreny bedelyyke mobo atxiterimy. Tai iny deòdỹỹdu mahãdu-ò arelyyrenykre. Aõmybo iximy manarybeke? ²³ Tahe Joaõ rarybere: —Jiarỹ Isaia Deuxumy rybedu wesele adeereny ararybekre. Jiarỹ rybeterenaduõ jiarỹ rare. Jiarỹ bederahy-ki iny-ò rarywãhã.

Inynyrỹ-ò ryõ biòbitinyke.

²⁴ Fariseu mahãdu-ribi kia mahãdu roirenyre. ²⁵ Tai tamy rarybere: —Kai Kristu aõbo tate? —Aõkõre. Elia aõbo? —Aõkõre. Deuxu dee rybedu aõbo? —Aõkõre. —Aõhereki tahaka iny teratysebenyteri? ²⁶ Joaõ dirawyõnyde: —Jiarỹ bedi iny reratysebenyteri. Inyõ tahe ayrenykile ratxireri. Tii tahe teeryõmahãtenyete. ²⁷ Tii wahewo-ribi kanakre. Jiarỹ raixỹrumy watxireri iwataana ese-ki, tii waratyrereki. ²⁸ Kia ibutumy aõhebo rotỹỹnyre Betỹnia hãwã bedeki. Jordaõ bero kowa weribi ijã-ki ihỹre. Tai iule Joaõ iny riratysybenymyhỹre.

²⁹ Txubiòwau tahe Jesuisi Joaõ-ò kedehemynykemy nade. Tahe rarybere: —Beteheke, kowa Deuxu budoeni naderi. Tii òraru-ribi iny ritakremynade. ³⁰ Tuu jiarỹ rarybereu, inyõ wahewomy kanakre. Tii waratyre awityhy rare. Tii dori wako-ki rarehyymyhỹ waribi juhuure. Kia rarybereu tule jiarỹ tuurarybemahã. ³¹ Reeryõre heka tii, ihãre tahe anade tii aritỹnykemy judeu mahãdu-ò. Tai tahe anade iny bedi reratysebenymahãremy. ³² Tahe Joaõ tamyreny relyyre: —Jiarỹ Deuxu Tyytybytyhymy rabire tamy dobehede-ò. Bòtòe wesemy ityre-ò desede. ³³ Deuxu riwateònyre bedi iny aritatysebenykykemy. Tahe riwateònyreu tahe wadee rarybere: —Aõmy kai bobikre? Deuxu Tyytybytyhy ronony resekele inyõtyre-ò. Tii sohojile tahe Deuxu Tyytybytyhy-di iny riratysybenykykre. ³⁴ Jiarỹ tuu rabire, tai tahe reeryre, tule taheka relyywãhãre, tii inatyhymy Deuxu Riõre raremy.

³⁵ Itxubiòwau tahe Joaõ taerydỹỹna inatxiõ-wana raremyhỹ. ³⁶ Tahe Jesuisi nadeò tuu robire. Tahe tamahãdu-ò rarybere: —Kowa tahe Deuxu Budoeni naderi. ³⁷ Kia rybe-ò tii-boho roholareu, tahe ròirenyre Jesuisi riheludunyrenykykemy. ³⁸ Jesuisi tahe tuu robire ihemy roirerimy. Tahe tamyreny rarybere: —Aõbo teijetenyteri. Tahe dirawyõnyde: —Rabi (kia rybe tahe irybereny-ki, erydỹỹdu rare), titxibo kai

tasÿnymahâte. ³⁹ Jesuisi rirawyònyre: —Bòdòibedenyke betehebennykemy. Tahe tii-wana roirenyre, tamy reteherenyre. Tahe txioromy tii-wana ihÿmyhÿ. ⁴⁰ Joaõ rybe-ò ijohonaduõ, Jesuisi helududÿÿduõ, Andre rare. Tii Simaõ Pedro seriòre rare. ⁴¹ Andre tahe taseriòre Simaõ aõwesele rioryre. Tahe tamy rarybere: —Mesia-ki inyboho rahamy ratximyhÿrenyre. (Ka rybe, Mesia, heka. Kristumy rare, Deuxu deòdÿÿna rare.) ⁴² Tahe Andre Jesuisi-ò Simaõ didyde. Jesuisi Simaõ-ò retehere urihimyo idi tamy rarybere: —Kai Simaõ tate, Joaõ riòrere. Iribi tahe ani Sefamy rarekre (Kani heka Pedro rare.)

⁴³ Itxubiòwau Jesuisi Kalileia-ò rakremy ixi-di røhõtinyre. Tahe Filipi riijere. Tamy rarybere: —Wahemy manakekò aõbo. ⁴⁴ (Filipi tahe Besaida hãwã luduõ rare Pedro, Andre-wana ihãwãluduõle rare.) ⁴⁵ Filipi tahe Natanaeli witxi reare. Tamy rarybere: —Moisesi bedede ywina tyyriti-ki inyòm y rarybere: —Tule Deuxu dee rybedu tyyriti-ki rarybere. Taile rahare. Jesuisi ihÿre. Nazare hãwã luduõ rare. Jyje riòre rare. ⁴⁶ Tahe Natanaeli ritÿÿraxinyre: —Aõwihikÿ aõkàbo Nazare hãwã-ribi kadòhònykre. Filipi rirawyònyre: —Manake betehékemy. ⁴⁷ Jesuisi Natanaelimy robire naderimy tahe tuu rarybere: —Kowa judeu mahãduõ inatyhy rare. Tii hãbu òbiti rare. ⁴⁸ Tahe Natanaeli rarybere: —Timykibo tiwaeryteri. Jesuisi rirawyònyre: —Figueira òra-ki tanyteò, umy rabire. Filipi aòrysomy raõreule, umy rabire. ⁴⁹ Natanaeli rimasajuamy rirawyònyre: —Kai Deuxu Riòre tate Inyerydÿÿdu tate. Kai judeu mahãdu Iòlò tate. ⁵⁰ Jiarÿ adee rarybera: —Figueiraòra-ki umy rabireki. Kiakile aõbo, tiwatyhinyteri. Iratyre aõna aõna wiwihikÿ adee ariteòsinykre. ⁵¹ Inatyhytyhymy adee araybekre: —Biuwetyy riranykre. Jiarÿ biuloosòna hãbu jiarÿ rare. Ýjuboho Deuxu-ribi wadee doideò kai bobikre. Idi waribi roireò bobikre.

2

¹ Inataõ txu-di tÿmyra herina txumy reare. Kana hãwã-ki Kalileia bedeki. Jesuisise tai ratximyhÿre. ² Jesuisi tule rito-binyre tamy rakremy taerydÿÿna mahãdu-wana. ³ Lisinaube tya-ki vÿi mona ituere. Tai Jesuisise Jesuisi-ò rarybere: —Vÿi mona ituere, imona kòre. ⁴ Jesuisi rarybere: —Nadi, aõhebo arotÿÿnykre. Aõka wawidÿÿkõna wabededÿÿnanamy aõkõka bedede rÿireri. ⁵ Tahe Jesuisise deòdu mahãdu-ò rarybere: —Anowidÿÿkÿmy adekereny tiki rarybekeki, ibutumy biwinybennyke. ⁶ Debòsohoji reurò mana butxi nihikÿ tai rÿimyhÿ judeu mahãdu ibe-di brebu òraru-ki aõna aõna risuhòm y hÿre worana bedehesinau. Mana butxi sohoji sohoji 80 urihixina ratyre rimyre. ⁷ Jesuisi tamyreny rarybere: —Ibutumy

bedi bitỹxinybenyke. Tahe ibutumy ijà ratyre ritỹxinyrenyre. ⁸ Katahe iribi bitake. Worana bedehesi wedu-ò biwybenyke imona. Tahe riwyrenyre. ⁹ Kia bee heka Jesuisi riwitxiranyre vỹ monamy. Tahe iwedu riurihire, rieryõre tiribibo nade. Deòdu tahe rieryre juhoo bee rare. Tahe iwedu rarybere weryrybò heridu-ò: ¹⁰ –Katahe awityhyre. Kai ijõ-ribi iwitxi-ratyhymy tewinyteri. Ijõ iny heka awityhy iko-ò ritxiwimyhỹ. Ihewomy tahe awiriõre ritxiwimyhỹre. Kai tahe awityhy ikonana-ò teyrubunyta. ¹¹ Katahe aõna aõna wiwihikỹ iny itxerenamy juhu ludu rare. Kana hãwã-ki Kalileia bedeki ihỹre. Tii tarurutere riteòsinymyhỹre taerydỹỹna mahãdu-ò. Tai ierydỹỹna mahãdu rityhynyre.

¹² Iribi tahe Kafanaõ hãwã-ò Jesuisi dobehede tadi, taseriõre, taerydỹỹna mahãdu tii-wana roirenyre. Ijõtxumy tahe tai bede tỹnyra rỹira.

¹³ Pascoa worana bedehesi iòhòmy rỹireu, Jerusalẽ rotuore kia tahe judeu mahãdu worana bedehesina rare. ¹⁴ Tai Jesuisi Deuxu dohodỹỹna hetowo-ò ralore. Tahe iwo-ki itxi reare sõwemy aõna aõna-di rohonyreriò, broreni-di ijohodu-txi, budoeni-di ijohodu-txi, bòtòe-di ijohodu-txi, tule nieru witxira witxira wibydỹỹdu mahãdu-txi reare tai rononymhỹki. ¹⁵ Jesuisi reroti awaru hãtena wesemy riwinyre. Idi tahe dohodỹỹna hetowo-ribi ibutumy riòlòdỹỹre, budoeni, broreni-wana, tahe nieru wibydỹỹdu mahãdu oworubesedỹỹ-di Jesuisi rehure, tai nieru rejuxunyre. ¹⁶ Tahe rare bòtòe-di ijohodu-ò. Tamy rarybere: – Biòlòdỹỹnyke wa. Waha heto dori aõ-di ijohona aõkõ rare. ¹⁷ Tahe Jesuisi erydỹỹna mahãdu tõhõtiti-txi reare aõbo Deuxu Tyriti-ki roiretxi:

–Waha heto yrubudỹỹna-ki dori riwasamyhỹre. Ariyrubunykemy dori watxireri, tai riwasareri.

¹⁸ Judeu mahãdu Jesuisi-ò rỹỹraxire: –Aõherekibo kai teòlòdỹỹnyteri. Mobo he arateranyreri tuu biwinykemy. ¹⁹ Tahe Jesuisi rirawyõnyre: –Deuxusỹ-di behuke tahe inataõ txu-di aditamadỹỹnykre. ²⁰ Tahe judeu mahãdu rarybere: –Ka heto 46 beõra-di relere, timykibo kai inatãõ txu-di biwinykemy. ²¹ Jesuisi tahe Deuxusỹmy taumylemy rarybere. ²² Iribi tahe iu rubu-ribi iixixana-txi tõhõtireny reare, kia tuu rarybere-txi. Tai heka iritina rityhynyre, tule Jesuisi rybe rityhynyre.

²³ Jerusalẽ-ki Jesuisi Pascoa worana bedehesidỹỹna riwyre. Aõna aõna wiwihikỹ inyy-ki ritxienyre riwinyre. Tai sõwemy iny inityhy rityhynyre. ²⁴ Jesuisi tahe urihimyòle iny rityhynyre. ²⁵ Tii dori ibutumy iny rayky rierymyhỹre. Inyõ

timy iny raremy tiu tamy aõna relyyõtyhy tii ibutумы aõerydu rareki.

3

¹ Nikodema fariseu mahãduõ rare. Tii judeu mahãdu we-duõ rare. ² Tii rudimy Jesuisi roramy rara. Tahe tamy rarybere: –Wanyrỹ, reeryrenyre kai Deuxu-ribi erydỹỹdu tate. Inyõ Deuxu-diõkeki tii aõ wiwihikỹ riwinyõtyhy. Iwese aõ wiwihikỹ kai tewinyte wese. ³ Tahe Jesuisi rirawyõnyre: –Inatyhytyhymy adee ararybekre: –Inyõ ixityre reakõkeki, tiu Deuxu Òlõnasỹmy robiõtyhy.

⁴ Nikodema rỹỹraxire: –Timykibo matuari ixityre reakemy. Timyrabo, ixyby tadiwo-ò iny ralõkeki aõbo ixyby iny raumynyke. ⁵ Tahe Jesuisi rirawyõnyre. Inatyhytyhymy rarybere. Inyõ bera-ribi ratybienyõkeki Deuxu Tyytybytyhy-ribi ratybienyõkeki, tiu ralõõtyhy Deuxu Òlõna-ò. ⁶ Deribi tybie heka dee rare. Deuxu Tyytybytyhy-ribi tybie tasỹ tyytyby rare. ⁷ Idi wanaõtaõmy aõmybo rarybereridi ixityre ijiranamy. ⁸ Tiò tiò yhy ribonymyhỹre: –Iwodỹỹ taholate, tahe tiribibo namyhỹde teeryõmahãte tiõhe ramyhỹre teeryõte, kia wesele iny Deuxu Tyytybytyhy-ribi tybie iny rỹire. ⁹ Tahe Nikodema rỹỹraxire: –Timyrebohe kia ratzike. ¹⁰ Jesuisi dirawyõnyde: –Kai judeu bede erysydỹỹdu tate ihãrele teeryõte aõbo. ¹¹ Inatyhytyhymy adee rarybere aõmybo reeryre, aõmybo rabire. Ihãrele tahe kia tetyhynyõte. ¹² Bede aõmydỹỹnanamy rarybere tahe tetyhynyõte. Timybo bityhynyke biu aõmydỹỹnanamy ararybekeki. ¹³ Iny sohojile biu-ò raõwõnyre, Deuxu Riõre Hãbutyhyhykỹ rare. Tiile iribi juhu dobehede. (Tiile isỹre. Taile isỹ roire.) ¹⁴ Iwese Moisesi bederahy-ki womati hemylala ritamadỹỹnyre wese, Kiawesele jiarỹ, Deuxu Riõre Hãbutyhyhykỹ, wadi kidiwatamadỹỹnykre. ¹⁵ Tahe inyõ wadi rityhynykeki, umytuedeõna tuu ritamy rỹihyy rakre.

¹⁶ Deuxu Riõre sohojihyyle rare. Deuxu bede ludu mahãdu ibutумы iluutyhyre. Tai tahe tariõre diteõnyde iny rityhynykre. Inyõ tii rityhynyre-wana, umytueõnahakỹ ritakre. Tii ruruõtyhy rubu bina bede-ò. ¹⁷ Deuxu taRiõre bede-ò diteõnyde bede iny mahãdu tarasadумы rarekemy. Aõ iny ywisidỹỹna-ò rirutykemy aõkõ. ¹⁸ Inyõ rityhynymyhỹreki, tii ywisidỹỹdu idi rehuõtyhy. Iny rityhynyõmyhỹreki tiile aõhõkỹmy dỹỹnana-txi riteõnykre Deuxu idi ratximyhỹre, tii dori Jesuisi rityhynyõhyymyhỹre, Deuxu Riõre dela wahe. ¹⁹ Ibinatyhymy iny aõmydỹỹnana bede bedemy rỹira, tai bede luru-ki rira tamy awira. Tuu loosõna nadeu, tamy ibinare. Tai tahe Deuxu riteõnykemy idi ratximyhỹre. ²⁰ Inyõ aõbinahakỹ

rotÿÿnymyhÿre, loosona dera heka tuu rÿira; loosona-ò rehemynyõtyhy, rehemynyre-wana, iny taaõbina bina rierymyhÿre. ²¹ Iny tahe awiwihikÿle rotÿÿnymyhÿre-wana tii tahe loosona-ò rehemynykremy rÿira, taaõmydÿÿnana dori Deuxudeewimy ririmyhÿre, ibutu iny rierykremy ririre.

²² Iribi tahe Jesuisi taerydÿÿna mahãdu-wana Judeia bede-ò ròirenyre. Tai heka bededÿÿnanaõ riwyre. Tiiboho iny ityhy-dÿÿdu mahãduõ tai riratysebenyrenyrene. ²³ Joaõ iribi iòhòmy ratxireri. Iny riratysebenymyhÿre. Tii Eno hãwã-ki Salí hãwã-ribi iòhòmy roire. Tai riratysebenyrene sòwemy bee tai roimyhÿreki. Sòwemy iny tamy ratysebenymy rare. ²⁴ (Joaõ iu rotenamy ralòõlemy ratximyhÿ.) ²⁵ Judeu mahãduõ, Joaõ erydÿÿna mahãdu-wana rybetere txiõdÿÿna ròhònryra, bede ywina òbiti aõmydÿÿnanamy wahe. ²⁶ Tahe Joaõ erydÿÿna Joaõ-ò doidenyde rarybekremy: —Waerydÿÿdureny. Kai hãbumy telyymy tatemahã, kia Jordaõ kanawe-ribi ijà-ki umy-wana raremyhÿ, tii ròratysebenyrenyri. Sòwemy iny tamy wirotyre. ²⁷ Tahe Joaõ tamy rarybere: —Kia wadee awire aõ aõkõ iny ritamyhÿre, biu-ribi kanakekile tahe iny aõ ritake. ²⁸ Jiarÿ heka Jesuisi nonanamy ijyymy diwateònyde wahewo-ribi kanakremy. Jiarÿ tii aõkõ rare. Tii tahe Kristu tyhy rare. Jiarÿ kiamy juhUU rarybewãhãre: —Kia tahe teerytenyte. ²⁹ Inatyhymy tahe hãbumy heridu wesemy Jesuisi rare. Ibutumy iny tuu robikemy tamy wirotyre. Ibiòwa weselemy jiarÿ rare. Tahe irybe-ò raholareu, reysamy rarewãhã. ³⁰ Tai wadee awire iny tii rieryreki, waribi tahe nohòti rosakemy idi watxiwãhãre.

³¹ Tii biujuxahakÿ-ribi nadeki ibutu ratyremy ratximyhÿre. Bede-ribi jiarÿ anadeki, tahe bede ludu jiarÿ rare, bede aõmydÿÿnanamy rarybewãhãre. ³² Tii rarybere aõmybo roholare, robire, tahe ijõ iny rityhynyõhyre irybe. ³³ Inyõ tahe rityhynykeki, tii tule ijõ-ò rarybere, Deuxu inatyhy rare wahe. ³⁴ Deuxu deòdÿÿna heka irybelemy rarybere Deuxu dori Tatytybytyhy ibutumy tamy diwahinyde. ³⁵ Tyby taRiòre luure, tai tahe ibutu aõmydÿÿnana ywisidÿÿmy tamy diwahinymy diteònyde. ³⁶ Iny Jesuisi rityhynymyhÿreki, umytuedeònahakÿ-dí iny rÿira. Inyõ tamy ratxiòkeki, tiu umytuedeõna robiòtyhy, Deuxu ykarana dori tii-wana ratximyhÿre.

4

¹⁻⁴ Inyõ fariseu mahãdu-ò rarybere: —Jesuisi Joaõ-ribi iny sòwemy diratysebenymyhÿde. Sòwemy iny ritamyhÿre

ierydÿÿmy. Tahe Jesuisi aõkõ ròratysebedÿÿmyhÿre, ierydÿÿnale tahe riratysebenymyhyre. Iu Jesuisi kiamy rieryre tahe, Judeia-ribi rexitare. Roirenyre Kalileia bede-ò ritehemynykemy. Roirenyreu tahe Samaria bededihyyle riòhòrenyre. ⁵ Samaria bede hãwã-ò tahe ritehemynyre. Sika inire. Ijaò riòresu-ribi iòhòmy ròira, tariòre Jyje-ò riwahinyre wahe. Ijaò behãloo tai rÿimyhÿ. ⁶ Txutyeyu tahe Jesuisi elerihynomy rononymhÿ tatilemy nadeki berysyna werora-ki. ⁷ Tahe Samaria mahãdu hãwyyõ dobehede beixemy. Jesuisi tamy rarybere: —Beõ inihe wadee bidiòke. ⁸ Jesuisi erydÿÿna mahãdu tahe juhuy roirenyre hãwã-ò rÿsÿna itxemy. Tai Jesuisi riraòmy rononymhÿ. ⁹ Tahe hãwyy rarybere: —Kai judeu mahãdu tate, jikarÿ samaria mahãdu rare. Anoherekibo wadeke texitòenyteri bemomomy. (Judeu mahãdu Samaria mahãdu-wana wiymy reaòhyymyhÿre. Widi òludu wesemy rare.) ¹⁰ Tahe Jesuisi rirawyònyre: —Kai heka teeryòhytyteri mobo jiarÿ rare wahe. Tule, Deuxu wahisidÿÿna teeryòte. Tiwaeryteriwana kai bedexitòenyke, tahe bee irumy ihÿre adee ariwahinyke. ¹¹ Hãwyy rarybere: —Wahÿ, timybo bee irumy ihÿre wadeke kanakre. Kai ahynakõre, hãloko heka behekyre bee irehere. Timybo bee iru kumy-wana ratxireri. ¹² Kai anobohe inytyby Ijaò ratyrere. Tiki heka behãloko wedu juhuku rare; idi riwahinyre inydekereny. Iribile iritxiòre riòmyhÿre tiki-wana, ibroreni riòmyhÿre. ¹³ Jesuisi tahe tarybetyhy-di rarybere: —Inyõ kahãloobemy riòkeki, ixityre bemomomy ruruke. ¹⁴ Jiarÿ bee ariwahinyke. Inyõ tahe kiabemy riòke-wana, tiu bemy tamy umytuedeònahakÿ riwahinyhyymyhÿre. ¹⁵ Tahe hãwyy rarybere: —Wahÿ bee tuedekõdu ikuny tuu kariòke. Tai kakò kanakõtyhy berysomy. ¹⁶ Tahe Jesuisi rarybere: —Maa hÿny, ahãbu biòryke, tahe manake. ¹⁷ Hãwyy dirawyònyde: —Anokõre, wahãbukõre. Jesuisi rarybere: —Inatyhymy tarybeteri ahãbuòremy. ¹⁸ Kai heka iruyre ahãbu tate. Wijina tahe ahãbu aõkõ rare atÿhibiòwale wahe. Kia tahe inatyhymy tarybeteri. ¹⁹ Wahÿ, wiji tahe arakeryra, kai Deuxu rybeduõ tate. ²⁰ Wahareny Deuxumy reàlãmhyre kahãwãlò-ki. Amahãdu anokõ, tamy tahe Jerusalê Deuxu deàlàna rare. ²¹ Tahe Jesuisi rarybere: —Lerÿ, warybe bityhynyke. Kanakre itxu kahãwãlò-ki aõkõ, Jerusalê-ki aõkõ Waha Deuxu deàlàna rarekre. ²² Kaiboho aõmybo tealàte teeryòtenyte. Jiarÿboho tahe aõmybo reàlàre, reeryrenyre, tarasana dori judeu mahãdu-ribi nade. ²³ Kia bededÿÿnanamy reara. Inyõ Waha Deuxu àlãnamy ratximyhÿreki Deuxu Tyytybytyhy-di, inatyhyna-di reàlãmhyre. Tuu deàlàna mahãdu Deuxu riijemyhÿre. ²⁴ Deuxu Tyytyby rare: —Tai tahe tudealànadu tatytyby-ki inatyhyna-ki tuu

reâlâmyhÿre. ²⁵ Kia tahe jikarÿ rekeryre, Mesia kanakre, Deuxu dekòdÿkÿnamy wahe, Kristu inire. Tiki kanakreku wahe, ibutumy inydekereny anona anonamy relykykre. ²⁶ Jesuisi rarybere: —Jiarÿ tahe tiire, umy-wana wiji rarybereri wahe.

²⁷ Tahe Jesuisi erydÿÿna mahâdu rehemynyre. Hâwyy-wana rarybereriki tahe ribedeòtiidÿÿnyrenyire. Tahe inyò tamy rÿÿraxiòhyyre. Aõmybo tamy rÿÿraxire, ada aõherekibo tamy rarybereriki. ²⁸ Iu tahe hâwyy tabutxi ririre, hâwã-ò rara. Tahe tahãwã mahâdu-ò rarybere: ²⁹ —Bodoibedenyke wahemy. Betehebennykemy hãbu-kò. Tiki wakoku relykyre ibutumy anohebo ratÿkÿnymahãremy. Tiki kòsana Kristu ratxireri. Deuxu dekòdÿkÿna rare. ³⁰ Hãwã-ribi roirenyre Jesuisi-ò. ³¹ Iu hâwyy hãwã-ki rareamyhÿreu, tahe ierydÿÿna Jesuisi-ò rarybere: —Iny erydÿÿdureny rÿsÿnaõ birÿsÿke. ³² Tahe Jesuisi rarybere: —Warÿsÿnadire wahe. Kaiboho heka kia rÿsÿna teeryòtenyete. ³³ Tahe widee raryberenyre: —Inyò kãaõboka tamy rÿsÿnaõ riwyreri. ³⁴ Jesuisi rarybere: —Wadeòdÿÿdu deewimy ariwinykemy idi watxireri. Kia tahe warÿsÿnare, iaõmysÿdÿÿna arihukemy wahe. ³⁵ Maixõmo butuna inaubiõwa ahâdu-di bidiòrarunybenykremy kaiboho tahòtinytenyteri. Tahe aõkõre adeereny ararybekre. Betehebennyke bedero-ò. Maixõmo redenamy rÿire. ³⁶ Kia maixõmo butudÿÿdu iòwy ritake, tahe umytuedeõnahakÿ-ò iny ributunyre. Tahe wiwanale riwodeysanymyhÿre ibròdÿÿdu ibutudÿÿdu-wana. ³⁷ Iwese inyò rarybere wese, inatyhy rare. Ijõ tahe ibòròdÿÿdu rare. Iwitxira tahe ibutudÿÿna rare. ³⁸ Jiarÿ kaiboho arateònymahãre. Aõbo tebòrònyòtenyete tahe bibutunyke. Juhuu inyò raaõmysÿdÿÿre: —Kaiboho tahe iraty temytenyete.

³⁹ Tahe hâwyy òraru-ki sòwemy Samaria hãwã mahâdu rityhynyre. Hâwyy rarybere juhoo: —Tiki wakoku relykyre ibutumy anohebo ratÿkÿnymahãre walananonanamy relykyre. Kia rybe òraru-ki tahe rityhynyrenyire. ⁴⁰ Samaria hãwã mahâdu tahe Jesuisi-ò rexitòenyre tii-wana roirekemy. Tahe Jesuisi tii-wana inatxi txumy riwyrere. ⁴¹ Sòwemy tahe rityhynyre Jesuisi Rybe òraru-ki. ⁴² Tahe hâwyy-ò rarybere. Wiji tahe arybe òraru-ki aõkõ retyhynyreri. Tamy tyhy-ò jiarÿle raholare, tahe reeryre tii bede iny tarasadu tyhymy raremy.

⁴³ Inatxitxu-di tahe Samaria-ribi rare Kalileia bede-ò. ⁴⁴ Jesuisile dori rarybere: —Deuxu rybeduõ uladumy ijirana bede-ki iny rityhynyõhyymyhÿ. Tiu tamy wowydynaõ riwahinyòtyhy. ⁴⁵ Kalileia mahâdu juhoo Jerusalê-ò tule roirenyre, worana bedehesi rÿimyhÿraõ. Ibutumy aõbo Jesuisi riwinyra heka tiiboho reteherenyre. Tai Jesuisi tasubede-ò

rehemynyre tiiboho awimy ridyrenyre.

⁴⁶ Tahe ixityre Jesuisi rehemynyre Kana hãwã-ò. Juhuu tai bee riwitxiranyre vñi monamy wahe. Bede dinodu aõmysÿdÿÿdu Kafanaõ-ki rasÿnyre. ⁴⁷ Jesuisi Kana hãwã-ki ratxirerimy hãbu roholareu, tamy rara. Tariõre dori ibinamy roire taheto-ki. Jesuisi-ò hãbu rarybere: —Manakekõ aõbo waheto-ò wariõre biteytekemy. ⁴⁸ Jesuisi rirawyõnyre: —Kaiboho bede aõmydÿÿnana wiwihikÿ tetehtenyteule tetyhynytenyte. ⁴⁹ Hãbu heka Jesuisi-ò rarybere: —Wanyrÿ, wylemy manake wariõre rurukreko-txi. ⁵⁰ Jesuisi rarybere: —Bòõseke, ariõre dori awimy relera. ⁵¹ Tahe tii Jesuisi rybe rityhynyra tai ròõsere taheto-ò rakemy. Ijõ txu tahe ryro-ki teõdu-wana witxi reare. Tii rarybere: —Ariõre reytera ahetakile. ⁵² Hãbu ritÿÿraxinyre tiubo reytera. Tahe relyyre. Kaule, txutyeyu reytera. ⁵³ Jesuisi rarybereu, kiaule iriõre reytera. Hãbu rieryre. Tai tahe idi ibutumy hãbu sÿmahãdu Jesuisi rityhynyre. ⁵⁴ Kia tahe Jesuisi inatxina aõna aõna wiwihikÿ iny itxeranamy riwinyre Kalileia bede-ki.

5

¹ Iribi tahe judeu mahãdu worana bedehesimy rÿimyhÿ. Tai tahe Jesuisi rare Jerusalẽ-ò. ² Hãwã-ki tahe hãloo ibedÿÿ roimyhÿ budoeni ryijò iòhò-ki rÿimyhÿ. Beteta inire, hebraika rybe ini rare, judeu rybe wahe. Iruyre iwòtena ube iwerora-ki rÿire. ³ Sõwemy webinadu ube-ò wii rotyre, iny ruetà ijõre, iny tiere ijõre, inytibina ijõre. ⁴ Tiiboho ÿjuõ riraõmyhÿre. ÿju beò rerireu tahe raukÿre. Mobo juhu itxi resekeki tahe, tii reytemyhÿre. ⁵ Hãbuõ 38 beòramy ibinamy roimy raremyhÿ. ⁶ Jesuisi tamy retehereu, rieryre tiwesebeòrabo ibinamy roimy rare myhÿ. Tahe tamy rarybere: —Kai aõbohe beytekekõ. ⁷ Hãbu dirawyõnyde: —Aõkõre Wanyrÿ, wawihedÿÿduõre. Bee rexiukÿnyrau, ijõ wako-ò ralõmyhÿre. ⁸ Jesuisi tamy rarybere: —Myikewa, abyre bimyke, mariake. ⁹ Aõwesele hãbu rÿimy reare, awimy. Tabyre rimyre tahe rariare. Kia txu tahe sabado txu rare. Kia txu tahe judeu aõmysÿdÿÿna txu aõkõ rare. ¹⁰ Tai tahe judeu mahãduõ tamy rarybere: —Abyre-di riraõmy, sabado txu dori òbiti aõkõ rareki. ¹¹ Tahe dirawyõnyde: —Wadeyedÿÿdu wadee rarybere wabyre arimykemy. ¹² Tahe tamy rÿÿraxire: —Mobo adee rarybere abyre bimykemy idi mariakemy. ¹³ Tahe hãbu deytedu rieryõre mobo rare. Jesuisi dori dexitade iribi. Sõwemy iny tai rÿimyhÿ. ¹⁴ Deuxu dohodÿÿna heto-ki Jesuisi idi hãbu-ki rahara. Tamy rarybere: —Kai teyteta, inatyhy. Tai tahe aõraruna biixãwidinyke, aõbinatyhy aõhe adee rotÿÿnyheny. ¹⁵ Hãbu tahe rare. Judeu mahãdu-ò rarybere,

mobo teytedỹ̃du raremy, Jesuisi wahe. ¹⁶ Tai tahe judeu mahãdu Jesuisi ibinamy rexidelenomy rarybere, sabado txuu kia riwinyreki. ¹⁷ Jesuisi tahe rarybere tamyreny: –Waha, Deuxu aõu raaõmysỹ̃dỹ̃re, jiarỹ tulere. ¹⁸ Tai tahe sõwemy irubudỹ̃my rurumyhỹ̃re. Sabado txu bede ywina-ribi tii riywinyõre. Tule Jesuisi Deuxu wesemy rexioire, Wahamy dori rarybemyhỹ̃reki.

¹⁹ Tai tahe Jesuisi tamyreny rarybere: –Jiarỹ ixi-di aõkõ aõmydỹ̃nanamy ratỹ̃nymahãre aõbo Waha riwinymyhỹ̃re, jiarỹ tule rewinywãhãre iweselemy. ²⁰ Waha Deuxu dori waluure. Aõbo riwinyre wadee riteõsinyre, tai tahe aõruxerahakỹ̃tyhymybo bobibenykre, idi bede biõtiinybenykre. ²¹ Waha Deuxu dori rubu-ribi iny riixixanymyhỹ̃re. Tai tule jiarỹ iny areixixanyke ixideewikeki. ²²⁻²³ Ibutumy iny hitxidỹ̃na Waha wadee tuu rarybera, tii dori iny rihitxidỹ̃nyõtyhy. Jiarỹle tahe iny ywisidỹ̃dumy arõhõnykre, tai iwese Deuxu iny riwowydynymyhỹ̃re wesele iny riwawowydynymyhỹ̃kre. Adeereny Deuxu diwateõnyde. Tai inyõ riwawowydynyõkeki, tii Deuxu riwowydynyõreri. ²⁴ Inatyhytyhymy adeereny ararybekre. Inyõ warybe roholakeki, wateõdỹ̃du rityhynykeki, tii wijityhyle umytuedeõna ritake, ywisidỹ̃duko-õ rõhõnyõtyhy, rubu ryribi rõhõnyre umy irumy ihỹ̃re ryõ iny ralõmyhỹ̃re. ²⁵ Inatyhytyhymy adee arelyykre: –Bedeỹ̃nana-ki kòhõra, bede dỹ̃nanamy reara. Tahe rubu mahãdu Deuxu Riõre rybe-õ roholakre. Roholamy rỹ̃ikeu tahe irumy rỹ̃ike. ²⁶ Tyby dori iumyõnanaõhyyre wese tule iRiõre rare. Umytuedeõna wedu rare. ²⁷ IRiõre heka hitxidỹ̃na wedumy relere. Tii dori Deuxu Riõre Hãbutyhyhykỹ̃ tii rare, jiarỹ wahe. ²⁸ Bedeõtiidỹ̃õmy tahe bededỹ̃nanamy he reare. Rubu mahãdu wabedey-ki warybe-õ roholakre, tai iribi rõhõnykre. ²⁹ Ibutumy aõwibo riwinyre mahãdu kedexixakre umytuedeõnahakỹ̃-di. Kia ibinamy riwinymyhỹ̃re mahãdu ywisidỹ̃du-õ rexixakre.

³⁰ Jiarỹ ixi-di aõkõ aõmydỹ̃nanamy ratỹ̃nywãhãre. Iwese Waha-õ raholare wese iny ywisidỹ̃my arõhõnykre. Waywisidỹ̃na heka õbiti rare. Wadee wimy aõkõ dori tuu watxiwãhãre. Waha wadeõdudeewimy tuu watxiwãhãre. ³¹ Iximy ararybekeki, inyõ riwatyhynyõtyhy. ³² Iwitzira heka tuu rarybereri wamy wahe. Reeryre inatyhy raremy. ³³ Kaiboho inywitzira teteõnytenyete. Joaõ ratysebedỹ̃du-õ rỹ̃yraxikemy ibutumy kia wamy rarybere inatyhy rare jiarỹ inatyhy rare. ³⁴ Iny wamy rarybemyhỹ̃re, tahe jiarỹle kia reiyeõhyymahãre inyle rieryõre wamy rybe, wahe. Tahe kiamy adee relyywãhãre kaiboho ritamy

rỹikemy. ³⁵ Joaõ tahe loosõna wesemy raremyhỹ. Tii urihimyò bededỹõnana ritoosõnomy raremyhỹwesemy tahe kaiboho atximahãtenyte. Idi urihimy-ò teysatenyte iloosõna-di, idi iribi kaiboho terarenyre. ³⁶ Jiarỹ Waha òraru-ki aõmydỹõnana wiwihikỹ, rewinyamahãre. Kaheka inatyhymy urihixina rare. Joaõ wamy rarybere ratyre heka kaa roire, Deuxu Waha inatyhymy wadeòdu raremy riteòsinyre. ³⁷ Waha wadeòdu wamy tule relyyre. Kaiboho irybe-ò taholaõtenyte tule tii tabiõtenyta. ³⁸ Kaiboho tamy taholaõhymahãtenyte, tiwatyhynyõteki, jiarỹ dori iteòdỹõna rare. ³⁹ Tyyriti-ò tetehetenyte iwo-ki dori umytuedeõna-ki mahakemy tahõtinytenyte. Ritidỹõnakile wamy relyymyhỹre. ⁴⁰ Ihãrele tahe wadee taõmahãte adeereny umytuedeõna ariwahinykemy. ⁴¹⁻⁴² Aõmybo wamy iny rarybemahãkeki, aõ aõkõ rare wadee, jiarỹ dori reeryre Deuxu luuna-di aõkõ atxitenyteri. ⁴³ Jiarỹ Wahani-di anade, tahe kaiboho tiwatyhynyõmy wadi ahãte. Inyõ ixideewilemy kanakeki, kaiboho bityhynybenykre. ⁴⁴ Tai heka tetyhynyõmahãtenyte. Widee dori kaiboho tewowydynymahãtenyte, tahe Deuxu-ribi wowydyna ritakemy terarenyre, sohojihyyre heka Deuxu. ⁴⁵ Kiamy tahe Waha-ò arelyyõkre, Moisesi tahe relyykre. Moisesi bede ywina dori, araròsõnyreny rare. ⁴⁶ Inatyhymy Moisesi tetyhynymahãte-wana tule jiarỹ biwatyhynymahãke, wamy dori Moisesi ròratidỹõre. ⁴⁷ Irybe bityhynyõkeki, timybo warybe bityhynyke.

6

¹ Iribi tahe Jesuisi Kalileia aho-ki ixyby reurore, Teberidade ahoniõre. ² Tahe sõwemy iny riheludunyre tuu robireki, aõna aõna wiwihikỹ, deyledỹõna wiwihikỹ robireki. ³ Tahe hãwãlòratyy-ò Jesuisi raòwõnyre taerydỹõna mahãdu-wana – rorukurenyre tai. ⁴ Judeu mahãdu worana bedehesi rexidelenykemy iòhõre. ⁵⁻⁶ Tahe Jesuisi retehere inysõwehekỹ-ò, tamy rehemynyreerìò. Tai Filipi-ò riurihimy rarybere: – Tikibo orotxu tamyreny rikiõbranyke riyrenykemy. Jesuisi rierymyhỹre aõbo riwinykremy ratxireri ihãrele tahe Filipi-ò kia rarybere. ⁷ Filipi tahe dirawyònyde: –Inyõ sohoji sohoji orotxu yre sohoji riykeki, 200 prata womati nieru rakahurenyke ihãre rimyõtyhy. ⁸ Andre Jesuisi erydỹõna-ò rare, Simaõ Pedro seriõre rare. Tii tahe Jesuisi-ò rarybere: ⁹ –Weryryboõ kaki ihỹmyhỹ. Iruyre cevada orotxu idi ratximyhỹ, utura inatxi. Kia tahe aõ aõkõ rare inysõwe-ò. ¹⁰ Tahe Jesuisi taerydỹõna-ò rarybere: –Tamy marybebenyke ranyrenykemy asityrekile. Tahe rorukurenyre ibutummy. Hãbu 5000 ronyre ijõ inyõ tahe

sõwetyhymy rorukure. ¹¹ Jesuisi orotxu rimyre. Deuxumy reâlære, idi tahe tamyreny riwahinyre. Tule utura-wana wiwesele risõnymy. Tuu rotỹnyre. Ibutumy heka ixideewina rirõsõnyre. ¹² Rihydyrenyreu, Jesuisi rarybere taerydõyna mahãdu-ò: —Bibutunybenyke rauhenyra uritere ixinamy itxiwixirenyõkemy idi watzireri. Uritere idi dehurenõmy. ¹³ Tahe ributunyrenyre iuhe waðinatxi reurõmy weriri ritỹxinyre orotxu yrere-di. ¹⁴ Jesuisi aõwiihikỹ widõynamy robirenyreu kiamy tahe raryberenyre. Tii inatyhymy Deuxu Rybedutyhy rare. Juhuu dori tuu rarybere kabede-ò kanakemy. Inyboho tii riraõmyhõre.

¹⁵ Rõhõtynyrenyre: —Jesuisi inyiòlõrenymy rikimynyrenykre. Tamy ròkõirenykre. Iu Jesuisi kia rieryreu, ixisohojilemy rexitare ixiby, hãwãlò-ò.

¹⁶⁻¹⁷ Ibedesou aho ijã-ò ierydõyna mahãdu riberenyri raokemy. Bede rurunyre tahe Jesuisi rehemynyõhyre. Tai hãwõõ rimyrenyre idi reurõkemy ijõwe-ribi ijã-ò, Kafanaõ hãwã-ò. ¹⁸ Tahe yhy deborehekỹ tiribi tiribi rebonymyhõ. Òbò tahe resemyhõ. ¹⁹ Sohoji urihixina iòhõmy ròireny tahe Jesusimy robirenyre. Tii betyredile tamyreny nariamy nade. Tiiboho ruberunihikỹrenyre. ²⁰ Jesuisi tamyreny rarybere: —Jiarõle wa rare, breburenõmyke. ²¹ Tai tahe hãworo-ò Jesuisi ronykemy tiiboho disõnydenyde. Aõ wesele tahe rehemynyrenyre tiòbo ròirenyraò.

²² Itxubiòwamy sõwemy iny wii ributunyre aho kanawe-ribi ijã-ki. Hãwõ sohojile tahe tai roire aho-ki. Jesuisi erydõyna mahãdu roirenyremy rieryrenyre. Tahe Jesuisi aõkõ idi rare. ²³ Tahe hãwõõ dehemynydenyde. Teberiaide hãwã-ribi Jesuisi tai ratximyhõ iòhò-ò. Tai juhu Jesuisi rexitõenymy rõimyhõ tahe orotxu tamy riwahinyre. ²⁴ Jesuisi iõre tai, ierydõyna mahãdu iõre. Kia tahe iny sõwemy robirau, hãwõ-ò rimyrenyre. Iòrysmy roirenyre, Kafanaõ-ò. ²⁵ Kanawe-ribi ijã-ò rehemynyreu, tii-wana witxi reare. Tahe tamy rõyõraxire. Waerydõyõdureny, tiubo kaò tadehemynyte. ²⁶ Aõwiihikỹ rewinyremy aõkõ tiwaijetenyteri, rõsõyna adeereny rewahinyrakile, tehydymy terõsõytenytakile. ²⁷ Rõsõyna tyhy ituemyhõre kiaòle aõkõ maaõmysõdõyõbenyke, tahe iwitxira rõsõyna-ò maaõmysõdõyõbenyke, kia ituedeõna-di aõkõ rare. Deuxu Riõre Habutyhyhykỹ dori adee riwahinykre. Kia rõsõyna umytuedeõnahakỹ wesemy rare. Taile tahe Deuxu Waha riwateõnyreri. ²⁸ Tahe Jesuisi-ò rõyõraxire: —Timybo iny Deuxudeewimy arotõnyrenyrenykre. ²⁹ Jesuisi dirawyõnyde: —Kialemy, biwatyhybenyke: —Deuxu dori wateòdõyõdumy rare. ³⁰ Tahe raryberenyre tamy: —Aõwiihikỹbo inyko-ò biitxeredõyõnyke. Aõhebo botõnykre, iny aratyhynykre.

³¹ Inytybyreny orotxu riyrenyre bederahy-ki. Kia wese Tyyriti-ki roire:

—Moisesi tamy orotxu riwahinyre biu-ribi.

³² Jesuisi rirawyõnyre: —Inatyhy tyhymy Moisesi aõkõ tamy riwahinyre. Waha dori biu-ribi orotxu tyhy adee riwahinyre. ³³ Deuxu orotxu tahe irutyhymy inydee riwahinymyhÿre, biu-ribi diwahinymyhÿde. ³⁴ Tahe raryberenyre: —Wanyrÿ, tiu kia orotxu bidiwahinymahãkre.

³⁵ Jesuisi iximy rarybere: —Jiarÿ orotxu irutyhymy rare. Inyõ wadee kanakeki, tiu rama risaõtyhy. Inyõ riwatyhynkeki, tiu bee risaõtyhy. ³⁶ Adeereny heka rarybere: —Wamy tabitenyte, ihãrele tiwatyhynyõtenyte. ³⁷ Ibutumy iny Waha wadee riwahinymyhÿre wadee kanakre. Tiu ixi-ribi ariteõnyõtyhy. ³⁸ Adobehede dori aõ ixideewimy aõma arotÿÿnykemy aõkõ. Wadeõdÿÿdudeewimy arotÿÿnykemy watxiwãhare. ³⁹ Tiu ariõnonyõtyhy wadee diwahinydeõ kiaboho ibutumy ikonana txuu rubu-ribi ariixixanykre. Kia tahe wadeõdÿÿdu deewimy rare. ⁴⁰ Inatyhymy Waha deewimy kia rare. Iny iRiõremy robireu, rityhynkeu, umy tuedeõna ritake. Ikonana txuu tahe rubu-ribi ariixixanykre.

⁴¹ Jesuisi rarybere: —Jiarÿ biu ludu orotxu rare. Tai tahe judeu mahãdu aõbina binahakÿlemy rarybemyhÿre. ⁴² Kia wese rarybemyhÿre: —Kaa Jesusile rare. Jyje riõre rare. Tyby he ijoi eryna rare ise tule. Aõherekibo tii rarybereri biu-rubu nademy. ⁴³ Tahe Jesuisi dirawyõnyde: —Tuu wamy ryberenyõmyke ayludurenymy. ⁴⁴ Wadeõdÿÿdu iny wadee rayky-ò rarybemyhÿre namyhÿde. Kia wesele iny wadee kedehemynykre, ikonana txuu tiiboho rubu-ribi ariixixanykre. ⁴⁵ Deuxu rybedu Tyyriti-ki kia rybe rÿire:

—Deuxu ibutumy iny ribedeerydÿÿnykre.

Tai tahe Waha-ribi iny rierymy roholamyhÿre, tii tahe wadee rehemynykre. ⁴⁶ Inyõ Wahamy robiõhyymyhÿre jiarÿle tahe tuu rabimahãre, iribi anadeki. ⁴⁷ Inatyhytyhymy adee rarybemaãhare. Inyõ riwatyhynkeki, umy tuedeõnahakÿ tiiwanale ratxireri. ⁴⁸ Jiarÿ orotxu wesemy jiarÿ rare. Umytuedeõna wahidÿÿdu jiarÿ rare. ⁴⁹ Boreny dori biu-ribi orotxu riyre bederahy-ki. Irabihy ibutumy tiiboho ituerenyre. ⁵⁰⁻⁵¹ Jiarÿ tahe biu ludu orotxu wese rare, inyõ tahe kia orotxu riykeki, tiu ruruõtyhy. Waumy ariwahinykre rubu-ò ibutumy iny òraruna òwydÿÿmy. Tamyreny umytuedeõna riwahinykre rubu-ò ibutumy iny òraruna òwydÿÿmy. Tamyreny umytuedeõna riwahinykre.

⁵² Judeu mahãdu tahe txiõdÿÿna rybemy widee raryberenyre: —Timybo tadelemy inyboho riõwenyrenykeny wahe. ⁵³ Jesuisi rirawyõnyre: —Inatyhytyhymy adee

ararybekre. Kaiboho Deuxu Riõre Hãbutyhyhykÿde birõõbenykeki, umytuedeõna bitabenyõtyhy. Ihãlubu biõbenykeki, umytuedeõna-di aõkõ atxitenyteri. ⁵⁴ Inyõ waderõdu wahãlubumy momodu tii umytuedeõna-di ratxireri. Tii tahe ikonana txuu rubu-ribi adiixixanykre. ⁵⁵ Wade heka juhu irõnatyhy rare, wahãlubu tu monatyhy rare. ⁵⁶ Inyõ wade rirokeki, wahãlubu riõkeki, wawana tiuhyy ratxireri. Jiarÿ tule tii-wana watxihyyreri. ⁵⁷ Waha irumy ratxireri. Tii wadeõdÿÿdu rare iõraru-ki warumy watxireri. Tule waderõdu irumy ratxike waõraru-ki. ⁵⁸ Jiarÿ biu ludu orotxu inatyhy jiarÿ rare. Iwese bederahy orotxu heka boreny riyrewesemy aõkõ jiarÿ rare. Ihãrele tahe ituerenyre. Inyõ riwaykeki, rexisahyymy rarekre. ⁵⁹ Kia ibutumy Jesuisi rarybere Kafanaõ judeu dohodÿÿna-ki, rierynanyhyÿreu.

⁶⁰ Iribi tahe Jesuisi-õ ijohona mahãdu rarybere:

—Kia isira tyhyre iny rieryke. Inyõ heka kia rityhynyõtyhy.

⁶¹ Jesuisile heka rexierymyhyÿre tiiboho tuu rarybemyhyÿreki, tahe tamy rÿÿraxire:

—Kaa aõbohe arabinadÿÿnyrenyke.

⁶² Tahe jiarÿ Deuxu Riõre Hãbutyhyhykÿ, ixyby biu-õ arõõsekeki, timybo marybebenyke, kaiboho wamy bobibenykeki. ⁶³ Deuxu Tyytybytyhyle umytuedeõna riwahinymyhyÿre. Umydetyhy umytuedeõna-di aõkõ rare. Urile adee rarybemahãre Deuxu Tyytybytyhymy rybena rare, adeereny umytuedeõna rare. ⁶⁴ Tahe inyõ ayreny ludu riwatyhynyõreri. Jesuisi tahe juhoo-ribi rierymyhyÿre mobo rityhynyõmyhyÿre, tule mobo tatxiõdÿÿdumy rarekremy. ⁶⁵ Jesuisi raryberehyymy tii-wana: —Jiarÿ juhoo rarybewãhãre. Inyõ Waha wadee riteõnyõkeki tiu wadee kanaõtyhy. Tai heka tuu adee jiarÿ rarybere.

⁶⁶ Kia rybe õraru-ki sõwemy taerydÿÿna mahãdu ririrenyre. Tahe roirenyre. ⁶⁷ Tahe Jesuisi rÿÿraxire taerydÿÿna waõinatxi reurõ mahãdu-õ. Ka bexe boibenyõkre aõbo biwaribenyõkre aõbohe. ⁶⁸ Tahe Simaõ Pedro rirawyõnyre. Wanyrÿ moobo arõirenykre. Kaile heka umytuedeõna rybe-di atxiteri. ⁶⁹ Jiarÿboho ka aratyhynymahãrenyre. Araeryrenyre ka, kai Deuxu-ribi hãbu õbitityhymy atximahãte. ⁷⁰ Jiarÿ aratarenyre waõinatxi reurõ inymy erydÿÿna mahãdumy. Ihãre tahe inyõ ratximyhyÿre diaboõ heka tii rare. ⁷¹ Jesuisi tahe Judasi Isariõmy rarybereri. Iwõ inatxinamy wahe. Simaõ-Isariõ riõre tii rare. Judasi dori Jesuisi riwahinykremy ratxireri iõludu mahãdu-õ.

7

¹ Judeu mahãdu Jesuisi rubudÿÿmy rurumyhyÿre. Tai tahe

Judeia bede ludu hãwã-ò ralòõmyhỹre. Kalileia bede hãwãdile rariamyhỹre. ² Tahe judeu mahãdu worana bedehesi iòhòmy rỹimyhỹ. Kiani tahe heto riòre worana bedehesi rare. ³ Tahe Jesuisi seriòreboho tamy rarybere: —Make wa karibi Judeia mahãdu bede-ò aerydỹỹna mahãdu dori aõwiihikỹ kai tewinyteò tuu robikemy. ⁴ Aõwiihikỹmy tewinyteri, tai tahe ixinamy iny tuu ibutumy robikre. Ibutumy iny ixierysomy tahòtinyteri-wana urile iny lau iwòteòmy aõna aõna wiihikỹ. ⁵ Jesuisi seriòre mahãdu tule rityhynyõre. ⁶ Jesuisi tahe dirawyònyde: —Wiji araõkre wabededỹỹnanamy dori tuu reaõmy ratxireri. Kaiboho tahe adohotalemy bòike. ⁷ Bede ludu mahãdu iny dori aluurenyre, tahe waderamy rekoarenyre. Iòrarunamy dori jiarỹ tamy rarybemahãre, ibinatyhyremy. ⁸ Kaiboho boibenyke worana bedehesi-ò. Jiarỹ tahe wiji araõkre, wabededỹỹnanamy reaõmy doimyhỹde. ⁹ Kia tahe Jesuisi tamyreny rarybere. Tahe Kalileia-ribi Jesuisi ròhònyòmy rỹimyhỹre.

¹⁰ Tahe iseriòre roirenyre worana bedehesi-ò. Idi tahe tule tii rare iherenymy itỹnymy aõkõ wahe, wasimy inyò tuu robiheny. ¹¹ Judeu mahãdu tahe Jesuisi riijemyhỹre worana bedehesi òrake-ò. Rarybemyhỹre: —Titxibo tahe tii ratximyhỹre. ¹² Jesusimy rybe ixitxiòdỹỹna ròhònyre inysòwehekỹy-ki. Inyò heka awimy tuu rarybemyhỹre. Ijõ tahe ibinamy tuu rarybemyhỹre, tii iny itxenadỹỹdu raremy. ¹³ Inyò tuu rarybeòhyymyhỹre ibutumy ijohonamy judeu mahãdu lau ruberureki.

¹⁴ Worana bedehesi tya-ki Jesuisi Deuxu dohodỹỹna heto-ò ralore ribedeerynykemy. ¹⁵ Ribedeerynyreu tahe judeu mahãduò ijõ-ò rarybere: —Timykibo he kia ritidỹỹna rierymy tuu rarybemyhỹre. Rierykõ ihãrele iny rierynanyimyhỹre. ¹⁶ Tahe Jesuisi dirawyònyde: Waerydỹỹna-di aõkõ rebedeeryre, Deuxu wateòdỹỹdu rybe-di wahe. ¹⁷ Inyò Deuxudeewimy ratxikeki, tii rierykre aõerydỹỹnabo òbitimy ratxireri. Tii rieryke Deuxu-ribi aõbo rarybereri ada ixi-ribi rarybereri. ¹⁸ Iny ixi-ribi rarybekeki, tiile rexiloosònanyke. Tahe iny iteòdỹỹdumy rarybekeki, tii tahe inatyhy rare. Tii inatyhymy òbiti rare. ¹⁹ Moisesi adee bede ywina riwahinyre: —Tahe kaibohoò tetyhynyòhyymahãtenyete. Tai tahe aõherekibo biwarubunykemy atxitenyteri. ²⁰ Tamy inyò dirawyònyde. Kaita itxỹteteri. Inyò ka ararubunykemy aõkõ ratxireri. ²¹ Jiarỹ inyò reteytenyre sabado txuu tahe kaiboho wadi bede teòtiinytenyete. ²² Boholake, Moisesi bede ywina arateònyke ariòre ritòtyky aròkemy resynanykemy. (Boboho tahe kia tuu ritelenyre Moisesi aõkõ.) Tahe notyky resyna txu rỹikeki, tuu tewinyte sabado txu hãrele. ²³ Kia sabado

txu biwinybenykeki Moisesi bede ywina riywinykemy, tahe aõherekibo wadee taykarananyteri hãbu sabado txu reteytenyreki. ²⁴ Aõ òbitimy aõkõ rare, òbitimy tahõtinyterikile. Òbitinale-di maraykynybenyke.

²⁵ Ijõ Jerusalẽ hãwã ludu mahãduõ rarybere: ²⁶ — Kia rarybemy rÿirerile, tii irubudÿÿmy rexinohõtinyreri. Beteheke. Butumy ijohonanamy kia rarybemyhÿre. Ihãrele taheka inyõ tamy rarybeõhyymyhÿre. Wedu mahãdu rõhõtinymyhÿre: —Ina aõkãbo Kristumy inatyhymy tii rare. ²⁷ Inyboho tahe rierymyhÿre titxiribibo tiò namyhÿde. Kristu Deuxu deòdÿÿna tahe kanakeu, inyõ tahe rieryõtyhy titxiribibo kanake. ²⁸ Jesuisi tahe Deuxu dohodÿÿna heto-ki ribideerynymyhÿreu rarybere: —Kaiboho tiwaerytenyte, titxiribibo anade tule teerytenyte. Tahe wateòdÿÿdu teeryõtenyte. Teròwumy heka jiarÿ anade. Tule tii inatyhytyhymy rare. ²⁹ Iribi jiarÿ anade Tii riwateònyre, tai jiarÿ tii reeryre. ³⁰ Inyõ riijemyhÿ riròtenykemy. Tahe rimoõhyre ruberureki, ibededÿÿnanamy aõkõ bede rÿireki. ³¹ Iny sõwehekÿ-ribi sõwemy iny rityhynyre. Tahe inyõ rarybere: —Kristu Deuxu deòdÿÿna iratyre aõna aõna wiwihikÿ riwinykemy tahõtinyteri. Aõkõre, tii dori inatyhymy Kristu rare. ³² Fariseu mahãdu kia-ò roholareu, tahe wii ributunyre xiwe wahidÿÿdu wedu mahãdu-wana. Tahe tiiboho soldadu mahãduõ riteònyrenyre Jesuisi rinykemy. ³³ Jesuisi tahe tamyreny rarybere: —Urihimyò umyreny-wana watzikre, idi ta aròðekre wateòdÿÿdu-ò ixyby. ³⁴ Kiaboho biwaijebenykre, waki mahabenyõtyhy. Titxibo watzireri kia-ò heka bitehemynyõtyhy. ³⁵ Judeu mahãdu tahe widee rarybere: —Titxiwexe tii rakremy ihÿre, tuu rokobirenyõtyhy tai rakaharenyõtyhy, myÿ rarybemyhÿre wahe: judeukõdu mahãdu bede-ò aõbo rakremy ixi-di ratxireri. Tai ribedeerynykemy, judeu mahãdu-wana rasÿnykremy. ³⁶ Timybohe rarybere: —Waki mahabenyõtyhy, titxibo watzireri-ò behemyhyõtyhy, myÿ rarybereri.

³⁷ Ihewotxu worana bedehesi aõnihikÿtyhy rare. Jesuisi iu rexiukÿnyre rarybekemy: —Inyõ bemomy risakeki, wadee kanake, riõke. ³⁸ Inyõ riwatyhynykeki, Tyyritina-ki kia wese rybe rÿire:

—Iwo-ribi benihikÿ iru ròhònyke.

³⁹ Iu Jesuisi kia rarybereu, Deuxu Tyytybytyhy aõmy dÿÿnanamy rarybere. Iny dori rityhynykeki, iwo-ò Deuxu Tyytybytyhy ralòke. Urile tahe Deuxu Tyytybytyhy riwahinyõmy rÿire. Jesuisi dori ròðeõre biu-ò. ⁴⁰ Tahe roholare mahãdu tahe rarybere: —Ka heka hãbu Deuxu Rybedutyhy rare. ⁴¹ Ijõ tahe rarybere: —Tii Kristu rare.

Ijõ tahe rarybere: —Kristu aõkõ Kalileia bede-ribi dori tii rareri. ⁴² Tyyritina rybe-ki roire: —Kristu, Davi sÿ-mahãdu ribi kanakremy. Belẽ hãwã-ribi; titxibo Davi rasÿnyre-ribi. ⁴³ Tai tahe wiwese wese aõkõ rõhõtynyrenyre Jesuisi-di. ⁴⁴ Inyõ rirõtentykemy ixi-di ratximyhÿ, ihãrele tahe inyõ rimyõhyyre.

⁴⁵ Tahe soldado mahãdu ròðsemy rare rimyõhyylyemy fariseu mahãdu-ò xiwewahidÿÿdu mahãdu wedu-ò. Tahe soldado-ò rÿÿraxirenyre: —Aõherekibo tedyõteri. ⁴⁶ Tahe dirawyònyde: —Timybo inyõ kowa hãbu wesemy rarybeõhyyre rybe iwitxira wihikÿmy tii rarybere. ⁴⁷ Tahe fariseu mahãdu rarybere: —Kaiboho aõbo tule araitxenanyrenyra. ⁴⁸ Inyboho mahãdu reny-ribi moõ rityhynyõhyymyhÿre, fariseu mahãdu wahe, wedu mahãdu wahe. ⁴⁹ Inyõ rityhynyre, tahe tiiboho Moisesi bede ywina rieryõre tai Deuxu aõhõkÿmydÿÿnana-txi idi rehukre. Aõhõkÿmydÿÿnana-ò ritamadÿÿnykre. ⁵⁰ Nikodema iyreny-ki ratximyhÿ. Fariseu mahãduõ tii rare, juhoo Jesuisi raraò rare wahe. Tii heka rarybere imahãdu-ò. ⁵¹ Juhoo roholamyhÿre aõhebo rotÿÿnyraò wahe idi tahe ibinakeki rirõtentykremy riijemyhÿre. Kia tahe iny bede ywinareny rare. ⁵²⁻⁵³ Tahe rirawyònyrenyre: —Kai wa tule Kalileia mahãduõ atxiteri. Tyyriti-ò beteheke timybo rarybereriò: —Kalileia-ribi rybeduõ ròhònyõtyhy wahe.

8

¹ [Tahe ibutumy he tasÿ-ò reareare. Iu tahe Jesuisi rare Oliveira hãwãlò-ò. ² Biura-di tahe dòðsede Deuxu dohodÿÿna heto-ò ixyby. Sõwemy iny tamy rare; Jesuisi ronyre; ribedeerynyre. ³ Hãwyyõ ratximyhÿ hãbu witxiraõ-wana wasimy ratximyhÿ. Tahe inywitxiraõ itxireny reare. Tai tahe Deuxu rybe erydÿÿdu mahãdu fariseu mahãdu-wana hãwyy didyde Jesuisi-ò. Tahe hãwyy-ò rarybere rÿikemy iny sõwehekÿy-ki. ⁴ Tahe raryberenyre Jesuisi-ò: —Bede erydu: —Kahãwyy tÿwe rare inyõ itxi reara. ⁵ Iny bede ywina Moisesi riwawahinyré tahe rarybere mana-di rorumyhÿkemy. Tahe aõmybo kai mynarybeke. ⁶ Tiiboho kiamy rarybere Jesuisi riurihire timybo rarybekemy. Tai tahe ibinamy tamy rarybekemy idi ratxireri. Jesuisi tahe suò resera ròritidÿÿkremy tebò-di suki riritinyra. ⁷ Tahe ritÿÿraxinyhy ihÿmyhÿ. Tahe Jesuisi rÿire; rarybere: —Inyõ òrarukõmy ratxirerile, tii mana-di juhoo tamy rehukre. ⁸ Ixityrele sÿ Jesuisi ròritidÿÿre suò. ⁹ Kia rybe-ò roholarenyreu, tahe rexitarenyre sohoji sohojilemy, tarayky dori ribinadÿÿnyrenyra. Matuari mahãdu tahe juhoo rexitare. Ikonanatyhy dori rare, tahe Jesuisi hãwyywanale tai rÿire. ¹⁰ Jesuisi rethehe: —Hãwyy sohojilemy robire rÿÿraxire tamy: —Hãwyy, titxibo mana-di arubudÿÿmy rybedu mahãdu

rirahura. Inyõ aõhe arasỹnyõhyyra. ¹¹ Tahe dirawyõnyde: — Anokõre, Wahĩ. Tahe Jesuisi rarybere: —Jiarỹ tulere! Mahe, òraruna-txi tahe ixymby ixeymy.]

¹² Ixityre Jesuisi rarybere tamy: —Jiarỹ wabede loosõna rare. Inyõ wahemy kanakeki, bedede luru-ki rariaõtyhy. Tii heka loosõna-di tarayky-ki rarekre. ¹³ Tahe fariseu mahãdu tamy rarybere: —Aõkõre, kai wa iximy tarybeteri tai tahe arybe inatyhymy aõkõ rare. ¹⁴ Jesuisi dirawyõnyde: — Inatyhymy iximy rarybereri jiarỹ, tahe warybe inatyhy rare, jiarỹ dori reeryre titxiribibo anade, tule tiobo arakre reeryre. Kaiboho tahe kia teeryõtenyte. ¹⁵ Kaiboho waywisidỹỹmy tadiõlõnyte, ihãre tahe õbitimy tiwaywinytenyõte tiwaery-tenykõteki. Tahe jiarỹ inyõ reywinyõneri. ¹⁶ Jiarỹ inyõ ariy-winykeki, waywisidỹỹna tahe õbiti rare. Jiarỹ dori ixivanale aõkõ rare. Waha, wadeõdỹỹdu wawana raremyhỹ. ¹⁷ Abede ywina-ki kia rybe riritinymy rỹimyhỹre: —Inatxi hãbumy wi-wesehyylemy rarybekeki kia tahe inatyhy rare. ¹⁸ Jiarỹ ix-imy rarybemahãre tule Waha wadeõdỹỹdu wamy adeeremy rarybemyhỹre. ¹⁹ Tahe tiiboho Jesuisi-õ rỹỹraxirenyre: — Titxibo boo ratximyhỹre. Jesuisi rarybere: —Kaiboho ti-waerykõmahãtenyte, Waha tule teeryõmahãtenyte. Kai bi-waerybenyõkeki, tule Waha bierybenyõtyhy. ²⁰ Kia Jesuisi rarybere Deuxu dohodỹỹna hetowo-ki, iubeweri yrubudỹỹna ube-ki. Tahe inyõ rimyõhyyre, ibededỹỹnanamy aõkõ bedede rỹireki.

²¹ Iribi tahe ixityre tamy rarybere: —Jiarỹ he arakre karibi. Kaiboho biwaijebenkyre tahe aõrarurenydile burubenykre. Boiõtyhy titxibo arakre-õ. ²² Tai tahe judeu mahãdu widee raryberenyre: —Inatyhymy aõbo tii rexirubunykre. Tii raryberaki: —Titxibo arakremy boiõtyhy, myki tuu idi rõhõtinyrenyre. ²³ Tahe Jesuisi rarybere: —Kaiboho kaludu toite; jiarỹ aõkõre, biu ludu rare. Kaiboho bedede ludu toite, jiarỹ tahe kabede ludu aõkõ jiarỹ rare. ²⁴ Tai heka adeeremy rarybereri aõrarureny-di burubenykremy. Inatyhymy jiarỹ tii rare: —Iwese rarybere wesemy. Tahe kia warybe bity-hynyõbenykeki, aõrarureny-di burubenykre. ²⁵ Tahe tiiboho rỹỹraxirenyre Jesuisi-õ: —Mobo he tate. Jesuisi dirawyõnyde: —Timybo adeeremy rarybewãhãre, juhoo wahe. ²⁶ Jiarỹ sõwemy rỹire aõna aõnany umyreny ararybeke umyreny ariy-winyke ta ararybekre Waha tuu wadee rarybelemy. Tii diwa-teõnyte tii inatyhymy rare. Irybelemy bedede iny-õ ararybekre. ²⁷ Rieryõhyyre tamyreny rarybere, tybomy. ²⁸ Kaiboho heka biwatamadỹỹnybenykreu, bierybenybenykre mobo jiarỹ rare. Tule ixi-ribi aõkõ aõna aõna rewinywãhãre bierybenykre; tule iwese Waha riwaerynanymyhỹre wese, rarybemahãre. Kia

tule bierybenykre. ²⁹ Wateòdÿÿdu wawana raremyhÿ. Iximy riwariõtÿhy, jiarÿ tamy wimy rewinyhyymahãreki. ³⁰ Kiamy tarybe rahudi tahe, sôwemy iny rityhynyre.

³¹ Judeu ityhydÿÿdu mahãdu-ò Jesuisi rarybere: —Kaiboho warybe tyhy-di mohõtinybenyhyykeki, inatyhymy watyhydÿÿdu waheludumy boibekre. ³² Inatyhyna tahe bierybenykre. Kia dori aratarenyke, deòdumy aõkõ boibekre. ³³ Dirawyònydenyde aõkõre inyboho Abraõ riòkõre roire, tiu heka modeòdumy roirekõmahãre. Timybo tarybeta: —Deòdu-ribi riwatakemy. ³⁴ Tahe Jesuisi tamy rarybere inyõ òraru-di hyy rexiòrarunyekeki, tii òraruna deòdu wese hyyle rare. ³⁵ Deòdu heka heto wedu ijoihyymy aõkõ rarekre. Iwedu ixinamy rakre. Riòre tahe ijoihyymy rare. ³⁶ Tahe Deuxu Riòre heka ixinamy arateònykeki, tiu òraruna deòdu wesemy ixyby bonybenyõtÿhy. ³⁷ Abraõ riòkõre inatyhymy toite. Kia tahe reeryre. Ihãrele tahe biwarubunybenykemy atxitenyteri warybe dori araykywo-di aõkõ ratxireri. ³⁸ Waha-wana ranymahãu, aõmybo rabire, wiji tuu rarybereri. Kaiboho tule boo-ribi tabitenyete tuu tewinytenyteri. ³⁹ Rirawyònyrenyde: —Wahareny heka Abraõ rare. Jesuisi rarybere: —Abraõ riòremy inatyhymy toite-wana, Abraõ aõmydÿÿnana iwesemy biwinybenyke. ⁴⁰ Katahe warubudÿÿmy wadi atxitenyteri. Inatyhyna Deuxu-ribi raholaremy, adeereny rarybemahãre, tai tahe warubudÿÿmy atxitenyteri. Abraõ tahe tiu tahe tuu rotÿÿnyõtÿhy. ⁴¹ Kaiboho heka borenytyhy wesele tatÿÿnymahãtenyete. Dirawyònyde: —Aõkõre, jiarÿboho waxiriòre aõkõ roire. Deuxuhyyle iny tybyreny rare. ⁴² Tahe Jesuisi rerawyònyre: —Deuxu boo inatyhymy rare-wana inihe kaiboho waluurennyre. Jiarÿ dori Deuxu-ribi anade. Ixidee wimy aõkõ anade tii diwateònyde. ⁴³ Aõherekibo teerytenyõte warybe. Isiratyhyre aõbo ijohona. Aõkõre, ityhydÿÿ isirare adeereny. ⁴⁴ Kaiboho Diabo riòre toite tamywimy biwinykemy atxitenyteri. Tii juhoo rubudÿÿdu hyy rare. Tii heka raruireri inatyhywesehekÿle wahe. Tii ruidu rare. Ruiwedu tii rare. ⁴⁵ Kaiboho heka tiwatyhynyõhyymahãtenyete inatyhyna dori jiarÿ rarybemahãre. ⁴⁶ Inyõ inihe wamy rarybeõtÿhy jiarÿ òrarudu raremy. Adeereny inatyhynamy rarybereri. Aõherekibo tiwatyhynyõteri. ⁴⁷ Iny Deuxu-ribi ratxireri, Deuxu rybe roholamyhÿre. Kaiboho Deuxuhõrõ aõkõ toite. Teòdu aõkõ toite. Taita warybe-ò taholaõteri.

⁴⁸ Jesuisi-ò tiiboho dirawyònydenyde: —Inatyhymy rarybewãhãrennyre. Kai Samaria mahãdu tate. Kaludu mahãdu aõkõ tate. Kai tyytybybina dire. ⁴⁹ Jesuisi rirawyònyre: —Aõkõre, tyytybybina-di aõkõ watxireri. Waha tahe rewowydÿÿnywãhãre. Kaibohole tiwabinadÿÿnymahãtenyete.

50 Wowydyna ixi-di aõkõ reijereri. Waha tahe kia aõmydỹỹnanamy riywinykre, tii rierymyhyre. 51 Inatyhytyhymy adee ararybekre: —Inyõ warybemy reõbykeki, tiu rubumy tii robiõtyhy. 52 Tai judeu mahãdu rarybere: —Katahe inatyhymyhe inydeereny aerysydỹỹna rỹira tytybybina-di tate wahe. Abraõ tahe rurure; Deuxu rybedu tule. Tahe timybo kai tarybeta: —Inyõ warybemy reõbykeki tiu rubu urihixinamy roiõtyhy tamy. 53 Kai aõbo inytybyreny Abraõ ratyre awikemy aõbo ixi-di tahõtinyamahãte. Abraõ rurure Deuxu rybemy rybenadu amahãdu tule rurure. Mobo raremy he tahõtinyamahãte. 54 Tahe Jesuisi rirawyõnyre: —Jiarỹ ixi-di wowydyna ariijekeki, tahe wawowydyna aõ aõkõmy rareke. Waha tahe riwawowydynymyhyke aDeuxumy raremy tu tarybeteri. 55 Tahe aõkõ teeryõtenynte. Jiarỹ tate reerymahãre. Jiarỹ reeryõmahãremy ararybekeki, tai ruidumy rareki, iwese kaiboho toite wesele wahe. Tahe reerywãhãre, tule irybemy reõbymahãre. 56 Boreny Abraõ, wamy dobide, wabededỹỹnana kanakremy tuu dobide, wabededỹỹnana kanakremy tuu dobide tai tahe reysatyhymy rare. 57 Tahe judeu wedu mahãdu rarybere: —Kai 50 beõramy aõkõ atxiteri timyrekibo tarybeta Abraõ tabitemy. 58 Jesuisi dirawyõnyde: —Abraõ reaõule,

Jiarỹ rarehyymahã.

59 Tahe manadile rimymy reserenyde idile rirabunykeny. Jesuisi tahe rexiwõmy iribi rõhõnymy rare, dohodỹỹna heto-ribi.

9

¹ Jesuisi rariamy rareu, tii robimy rare hãbu ruetãmy. Tii iruetãhãkỹmy ratohouãmy herinanyre. ² Ierydỹỹna mahãdu rỹỹraxire tamy. Erydỹỹdu, aõherekibo hãbu ratohouãnyra iruetymy, ise tyby iõrarudireki aõbo ada taõrarumy aõbo. ³ Tahe Jesuisi rirawyõnyre: —Tahe aõkõre tyby ise-ke aõkõ tiike aõkõ. Deuxu ruru wiji riteõsinykremy tahe tii kiawesemy rohonyre. ⁴ Wateõdỹỹdu aõmydỹỹnanamy arotỹỹnyrenykeny watxiwãhãrenyde. Inyboho rikiwinyrenyke ibededỹỹnanamy rỹikreu, iwese txumy rỹikre wese tahe rummy heka kanakre tai raaõmysỹdỹỹõmyhyre. ⁵ Kabede-ki watxiwãhãreõle tahe jiarỹ bede ludu mahãdu loosõnatyhymy jiarỹ rare. ⁶ Tarybe rahudi tahe rarybexinyre suõ idi tahe subororomy ritxienyde. Idi ta hãbu rueyre-õ subororo ritidire. ⁷ Tahe hãbu ruetã-õ rarybere: —Make wa bexisuhõke Silõe ahobe-di. Silõemy ninadu heka iny rybe-ki deõdỹỹna wesemy rare. Hãbu tahe rare, risuhore, dõõsede robimy. ⁸ Tahe ierydu mahãdu, tuu robire idi itxeredu mahãdu raryberenyre widee: —Kabe hãbu

ixitòedÿÿdu rare, nierumy kowa-ki rexitòenymy rononymhÿrele rare. ⁹ Ijõ rarybere tule rare. Ijõ rarybere: —Aõkõre, iwe-sele tahe iwitxirari. ¹⁰ Rÿÿraxirenyre tamy: —Timykibo arue reytera. ¹¹ Rirawyònyre: —Hãbuõ Jesuisi inire. Tii tahe suboro borole riwinyra warue-ò ritidire. Tahe wadee rarybera: —Make Silòe ahobe-ò aõ bisuhòke. Tahe rare, resuhore, tai rabimy watxireri. ¹² Rÿÿraxirenyre titxibo tahe tii rara. Rirawyònyra: —Reeryõre.

¹³⁻¹⁴ Kia ruedeytena Jesuisi riwinyre sabado txuu, judeu aõmysÿdÿÿna txu aõkõ. Tahe tiiboho hãbu ridyrenyrene fariseu mahãdu-ò. ¹⁵ Ixityre hãbu-ò rÿÿraxirenyre: —Timykibo riteytenyra. Tahe rirawyònyre: —Subororole waruetyre-ò ritidira, idi resuhòra, iule tahe retehera. ¹⁶ Tai tahe fariseu mahãdu-ò narybede: —Ka hãbu Deuxu-ribi aõkõ nade. Kakÿny sabadotxu bede ywina riwinyõhyre. Tahe ijõ imahãduõ rarybere: —Hãbu òraruduõ tiu deytenuwihikÿõ kia wesemy riwinyõtyhy. Tai tahe wiribi hitximy raraykynyrenyrene. ¹⁷ Tahe ixityre hãbu-ò rÿÿraxire: —Tii arue arue riteytenyra: —Tai tahe timybo tuu marybekre. Hãbu rarybere: —Tii Deuxu rybemy rybeduõ rare. ¹⁸ Tahe judeu mahãduõ rarybere: —Ise-wana tybywana widee ararybekekile, arityhynykre. Tai riteònyre tybybohòdrysmy. ¹⁹ Rehemynyreu, tahe tamy rarybere: —Kaa aõbo ariòre rare. Inatyhymy aõbo iruetàmny reare. Timykibo tahe wiji robira. ²⁰ Tahe tybyboho rirawyònyre. Inatyhymy wariòreny rare. Iruetàlemny ka reare. ²¹ Reerykõrenyrene timykibo retehera. Irueriraynyre dori, reeryõhyre. Tamy marybebenyke. Ibeòra dire ka, iximy relyyleke. ²²⁻²³ Tybyboho ruberumyhyrenyrene judeu mahãdu lau. Judeu mahãdu dori, rarybemyhyre: —Inyõ Jesuisimny rarybekeki, tii Kristu Deuxu deòdÿÿna raremy rarybekeki, tahe dohodÿÿnawo-ribi riteònykemy idi rÿira. Tai tahe hãbutybyboho kia wesemy raryberenyre. Tii ibeòra dire: —Tamy marybebenyke.

²⁴ Juhuu iruetàmny raremyhÿò ixityre ròtedÿÿmy rarybere. Òbiti rybe-di marybeke. Inydeereny tahe ka dori òrarudu rare. Tai tahe Deuxu biwowydynyke. Tahe tii rarybere: ²⁵ —Tii òrarudu rare, reerykõre. Sohoji aõmydÿÿnana reeryre. Juhuu waruetàle heka reeryre, wiji tahe retehereri. ²⁶ Tahe ixityre tamy rÿÿraxire: —Aõbo tii riwinyre. Timybo arue roire. ²⁷ Hãbu rarybere: —Adeereny tuu rarybere tahe taholaõhyytenyta. Aõherekibo ixityre ijohonamy tarybetenyteri. Ierydÿÿnamny boibekemy aõbo atxitenyteri. ²⁸ Tuu raryberenyrene aõbina binalemy. Kai heka iijoiò atxiteri. Jiarÿboho Moisesi erydÿÿna jiarÿboho roire. ²⁹ Deuxu Moisesi-ò rarybemyhyre. Kiamy reeryrenyrene. Ka hãbumy tahe aõmy raho-

laõmahãreny, tiludubo rare. ³⁰ Kia wa riwateytenyra be-deõtidiỹna urenana tii rare. Ihãrele tahe kaiboho teeryõmy tuu tarybetenyteri. Wadee kia ajuedena rare. ³¹ Deuxu wa òrarudu ixitòedỹna-ò roholaõtyhy. Kia reeryrenyre. Tahe inyõ Deuxu rityhynykeki tamywimy rỹirakeki, kia-ò Deuxu roholakre. ³² Bede rexidelenyre, inyõ roholatyhy iruetãmy raumynyre heka reyttere. Inyõ tiu riwinyõre, wiji tahe diwinyde. ³³ Kia hãbu Deuxu-ribi nokõduõ aõkõkeki tiu aõ riwinyõtyhy. ³⁴ Tahe fariseu mahãdu aõbinahakỹlemy tuu rarybere: —Kai uladumy teateu, òrarudutyhymy tate. Kai aõmybo biwabedeerynybenykremy aõbo wadireny tahõtinyteri. Tahe riteònyre dohodỹna heto-ribi. Ihymy riteònyre.

³⁵ Kia-ò Jesuisi roholareu hãbu riijere tahe rỹrãxire tuu: —Kai Deuxu Riõre Hãbutyhyhykỹ aõbo tetyhynyte. ³⁶ Hãbu rarybere: —Mobo tii rare, Wanyrỹ, arityhynkemy watzireri. ³⁷ Wamy wa tabita, jiarỹleheka watzireri. Adee rarybererile watzireri. ³⁸ Tahe rarybere: —Wanyrỹ aratyhynyra he. Tahe hãbu Jesuisi riwowydnyre. ³⁹ Jesuisi rarybehyra: —Jiarỹ anade kabede-ò iny ruetà aritobixidỹnykemy; tule robimyhỹre mahãdu ariruetadỹnykre. Iny õwydỹnyamy anade. ⁴⁰ Fariseu iõhõmy iribi rỹimyhỹ roholare irybe-ò. Tahe tamy rỹrãxire. Inatyhykõ aõbo ka jiarỹboho tule waruetãrenyre. ⁴¹ Jesuisi rarybere: —Aruetãmy ahãtenyteki, aõraruna-di aõkõ toite. Tahe tarybetenye reerywãhã, rabiwãhãre. Tai aõraruhyy-di toite.

10

¹ Inatyhytyhymy adeereny ararybekre: —Inyõ budoeni yrubudỹna ijõtòbõna-di, ralõõkeki, tii tahe wasidu ixiwatxidỹdumy rare, raðwònomy heka ralõmyhỹre. ² Ijõtòbõna-di ròtedu, tii budoeni-di itxeredutyhy rare. ³ Iu ijõtòbõna-ò rehemynymyhỹre, ijõtòbõna ludu tamy riraynymyhỹre. Tule budoeni irybe rierymyhỹre. Sohoji sohoji-ò ininimy tamy ryrymyhỹre, tahe idi ròhònomy ridymyhỹre. ⁴ Ihõrõ ahana-ò ridyre, tii iko-ò rỹimy idi ramyhỹre. Riheludunomy idi raremyhỹ rierymyhỹreki irybe. ⁵ Budoeni ieryõdu riheludunyõtyhy, irybe rieryõreki. Iny ieryõdu-ribi rahenykre. ⁶ Jesuisi tamy kia bede eryna iyyymy relyyre. Tiiboho tahe rieryõhyrenyre timybo ibede erydỹnyamy rororerimy.

⁷ Tahe Jesuisi ritỹnynyre tamyreny: —Jiarỹ budoeni ijõtòbõna wesemy rãimahãre. ⁸ Ibutumy iny wakõule rehemynyre wasidu ixiwatxidỹdumy rỹiramyhỹ. Wabudoeni ityhydỹdu wesemy rỹirerimy ihỹre. Tiiboho wasidurybe-ò roholaõhyymyhỹrenyre. ⁹ Jiarỹ ijõtòbõna wesemy rãiwãhãre. Inyõ wamy ralõkeki, tii heka tarasanaõmy rarekre. Iwese

wabudoeni ralòmhyhÿre idi ròhònymyhyhÿre asi wiwihikÿmy riroximyhyhÿre wesemy, tule ityhydyÿdu mahãdu rÿirakre, bedeòbyna wiwihikÿ ritakremy. ¹⁰ Wasidu heka rubudyÿmy nade, bedehudumy wasimy, jiarÿ tahe anade inyõ umytuedeòna ariwahinykremy, irutyhytyhy wihikÿmy wiji rÿirakremy. ¹¹ Jiarÿ budoeni-di itxeredu wihikÿ rare. Ihyy ta waumy ariwahinykre teròwyrenemy. ¹² Inyõ budoeni-di itxeredumy deòdumy risÿnykeki, tii riwisinanyòtyhy, tii dori budoeni wedu aòkò rare, deòdule rareki. Tahe iròdu brebunaò tamy kanakeki tahe rahenyke iribi, tai ijõ rimyke, ihona tahe raòrunyke. ¹³ Deòdu heka rahenyke tii iwedu aòkò rareki, tii aõmy aòkò idi ròhòtinymyhyhÿre, iòwydimy aòkò. ¹⁴⁻¹⁵ Jiarÿ heka itxeredu wihikÿ rare wabudoeni riwaerymyhyhÿre. Jiarÿ tule tii mahãdu reerywãhãre. Waha riwaeryre, tule tii reeryre. Iwesetyhyle wabudoeni-wana wii reerynyre. Iòraru-ki tahe waumy ariwahinykemy idi wãhãre. ¹⁶ Jiarÿ wabudoeniò-di watxiwãhãre. Aõ kabede-ki aòkò. Ibutumy aributunykemy idi watxireri. Tai tahe sohoji ijoihyylemy heka roikre. Ibutu-di itxeredumy ararekre. ¹⁷ Tai heka Waha waluure, waumy ariwahinykreki wahe. Ihãrele tahe ixbyby idi arexiumpydyÿnykre. ¹⁸ Inyõ heka ixideewiòkeki riwarubunyòtyhy. Arexiwahinykre tamyreny riwarubunyrenykremy. Ixideewikreu, arexiwahinykre, tule waumy arimymy arexiixixanykre. Waha dori wadee rarybere tii ariwinykremy.

¹⁹ Kia rybe òraru-ki judeu mahãdu rybe rexijeijeinyre. ²⁰ Sòwemy iny ritxiònymy rarybere: –Tii tyytybybina-di ratximyhyhÿre ada raitxÿtemy aõbo ihÿre. Aõherekibo tamy taholamahãtenyete. ²¹ Ijõ tahe rarybere: –Aõ tyytybybina-di aòkò rarybemyhyhÿre. Tyytybybina aõbo hãbu rueta riruedÿnyòtyhy.

²² Jerusalẽ hãwã-ki heka beòrahyy rare. Worana bedehesi hetxina Tÿmyradÿÿna rÿire. ²³ Salomaò Ube-ki, Deuxu dohodÿÿna heto ubeò-ki. ²⁴ Jesuisi rariamy ihÿmyhyhÿ. Tahe judeu mahãdu rirurawonyre itÿÿraxidyÿmy. Tiwese bededyÿnanymybo nohòtidihyy bede ariwyrenykre. Kai inatyhymy Kristumy tate-wana, tahe manarybeke itÿnymy. ²⁵ Jesuisi dirawyònyde: –Rarybere wahe, tahe kaiboho tiwatyhynytenyòhyyte. Inatyhymy ierysmy mohòtinybenykeki, waaòmydyÿÿnana wiwihikÿ rewinyamahãre-di betehibenyke. Wahani-di kia rewinyamahãre. ²⁶ Kaiboho tahe tiwatyhynyòlemahãtenyete, wabudoeni wesemy aòkò toite. ²⁷ Wabudoeni warybe rierymyhyhÿre, riwaheludunymyhyhÿre; jiarÿ heka ibutumy wabudoeni reerymahãre. ²⁸ Tamy umytuedeòna

rewahinywãhãre tiu heka ruruõtyhy. Inyõ waribi ridyõtyhy. ²⁹ Waha wadee riwahinyre. Tii heka ibuturatyre rare. Inyõ iribi ritaõtyhy. ³⁰ Jiarỹ Waha-wana sohojihyyle watxiwãhãre.

³¹ Ixityre tahe judeu mahãdu mana-di rirubunykre idi rỹire. ³² Tahe Jesuisi tamyreny rarybere: —Jiarỹ sõwemy bedeòbyna inydee rewinywãhãre Waha ruru-di. Aõðrarukibo biwarubunybenykre. ³³ Tahe judeu mahãdu rirawyònyre: —Kai aõmydỹnana wiwihikỹle tewinyte. Kia òraru-ki aõkõ ijoi adi rỹireri mana-di arubudỹmy Deuxumy binatyhymy tarybeteriki. Kai dori hãbu tate, ihãrele Deuxumy texiniteri. ³⁴⁻³⁵ Jesuisi rarybere: —Abede ywina-ki ryberiti rỹire. Deuxu Rybe òbitihyymy raritinymy rỹire. Kiamy: —Jiarỹ rarybere: —Kaiboho Deuxu toite. Deuxu Rybe heka inyõ-ò diteònyde. Kia mahãdu tahe Deuxulemy rininire. ³⁶ Deuxumy tiiboho rininirenyre-wana, aõherekibo wadee takyarananyteri jiarỹ tule Deuxu Riðrelemy rexininireki. Waha dori, riwatamy diwateònyde. Timykibo kaiboho tarybetenyteri Deuxumy ibinamy jiarỹ rarybererimy ³⁷⁻³⁸ Waha-ribi bedeòbyna ariwinyõkeki, biwatyhynybenyõtyhy. Tahe ariwinykeki, aõbo rewinyre-wana bityhynybenyke, biwatyhynybenyõke hãrele. Tai tahe bityhynybenymy boibeke jiarỹ Waha-wana wãhãre tule Waha wawana ratximyhỹre. ³⁹ Kabedeu ixityre riijere Jesuisi rimykemy tii rexitamy rexihedỹnyre.

⁴⁰ Jesuisi ixityre Jordaõ bero kowa weribi-ò reurore. Joaõ juhuu ròsebedỹmyhỹò rare. Taile tahe tii raremyhỹ. ⁴¹ Tahe sõwemy iny tamy roirenyre. Tamy rarybere: —Inatyhymy Joaõ bedeòby iny itxerenamy riwinyõre. Tahe ibutumy tii Jesuisimy rarybemyhỹre, inatyhy rare. ⁴² Sõwemy heka taile Jesuisimy rityhynymyhỹre.

11

¹⁻² Lazaru ibinamy roimyhỹ Betỹnia hãwã-ki. Marie, Marta-wana iseriðrereny rare. Juhuu Marie Jesuisi-wana raremyhỹu, tii Jesuisiwa tyre-ò tarinalỹnyrehekỹò ritxiwire, idi tahe tarade-di rirubudỹnyre. ³ Lazaru ibinamy roimyhỹki tahe tiiboho riteònyre Jesuisi-ò rarybekremy: —Wahĩ, abiòwa tyhy binanihikỹmy roireri. ⁴ Jesuisi kiamy roholareu rarybere: —Kabinana hãwã Deuxu wowodynamy tamy nade. Tule riwawowydynkemy jiarỹ dori Deuxu Riðre rare. Kabinana tahe rubuhyymy aõkõ tamy rỹike. ⁵ Jesuisi heka ibutumy iluurennyre, Marta, Marie, Lazaru-wana. ⁶ Iu Jesuisi rieryreu Lazaru webinaduna, tahe taile ratximyhỹre, rerihãrele inatxixumy. ⁷ Iribi tahe rarybere taerydỹna

mahãdu-ò: —Ròkòirenyke ixyby Judeia bede-ò. ⁸ Tahe ierydỹna mahãdu tamy rarybere: —Erydỹdu aõherekibo ixybynomy tamy tarybeteri judeu mahãdu adi heka riwisỹnomy rỹimyhỹ mana-di arubudỹmy. ⁹ Jesuisi dirawyònyde: —Txu heka waòinatxi òra bededỹnanamy rare. Aõhe inatyhy. Inyõ txumy rariakeki, tiu aõ òraru-ki reseõtyhy loosònamy dori ibutumy robimyhỹre. ¹⁰ Bede lurumy rariakeki tahe, aõ òraru-ki reseke, loosòna dori ihoõreki wahe. ¹¹ Tahe ijõmy Jesuisi tamyreny rarybere: —Iny biòwareny ròrõmy roireri. Tamy arakre ariixixanykremy. ¹² Tahe imahãdu rarybere: —Wanyrỹ tii ròrõmy roireri-wana bohe, reytekre. ¹³ Jesuisi heka rarybemyhỹ Lazaru rubumy roirerimy. Ti-iboho tahe ròhòninyrenyure urile ròrõmy roirerimy. ¹⁴ Tahe Jesuisi ritỹnnytyhyra tamyreny: —Lazaru rurure. ¹⁵ Jiarỹ wa aòrarureny-ki wadeysamy watxireri tai watxiòraki. Ka tahe biwatyhynybenykre. Ròkòirenykre tamy. ¹⁶ Tome ierydỹna mahãduõ rare. Didimomy iniõre. Tamahãduõ rarybere: —Ròkòirenyke, tule tii-wana rukururenykremy.

¹⁷ Jesuisi rehemynyreu, Lazaru inaubiòwatxumy hãloo iwòdỹwo-ki roimyhỹ. ¹⁸ Betỹnia Jerusalẽ hãwã-ribi sohoji urihixinamy roire. ¹⁹ Judeu mahãduy-ribi sòwemy doidenyde Marta Marieboho wotòenamy, iseriòreny rurureki. ²⁰ Marta Jesuisi kanakre rieryreu, tahe ròhònnyre tii-wana witxi reakemy. Marie tahe tahetokile rononymhỹ. ²¹ Tahe Jesuisi-ò Marta rarybere: —Wahĩ, kakile atxiberi-wana waseritxòre rurukòhykyra ikuny. ²² Ihãrele tahe rekeryre ibutumy Deuxu-kò bexitònykeki, tiki adeke kidiwahinykre. ²³ Jesuisi tahe tamy rarybere: —Aseriòre wa rubu-ribi kedexixakre. ²⁴ Tahe Marta rarybere: —Rekeryre jikarỹ ikokunanatxu-ku rubu-ribi rexixakre, ibutumy ixixanatxu-ku. ²⁵ Jesuisi rarybere: —Jiarỹ waixixanadỹdu rare, umytuedeõna wahidỹdu rare. Inyõ riwatyhynykeki, tii rubu-ki roire hãrele, kedexixakre. ²⁶ Ibutumy irumy roirekeki, tiu rururenyõtyhy, tii dori riwatyhynyreki. Kai aõbohe kia tetyhynyteri. ²⁷ Tii dirawyònyde: —Kohe, Wahĩ, aratyhynywãhãre. Kai Kristu tate, Deuxu ritxòretyhy. Deuxu tuu rarybereki, bede-kò kanatekònyde wahe. ²⁸ Tahe Marta ròsere Marie taseriòre-ò rarybere: —Inyhĩ rehemynyreki, kai makremy rarybereri. ²⁹ Kiamy roholareu, tahe, wylemy rỹimy reare tamy rare.

³⁰ Jesuisi dori hãwã-ò ralòõlemy raremyhỹ Marta tamy raryberekile raremyhỹ. ³¹ Tii rỹimy ròhònnyreu, judeu mahãdu tuu robire. Tahe riheludunyre, wabede-ò robukremy raresỹny tamy roholare. ³² Marie rehemynyre Jesuisi-ò. Tahe tii tuu robireu, resere iko-ò, tahe rarybere: —Wahĩ, kaki atx-

iberi-wana ikuny waseritxòre rurukõhykyra. ³³ Jesuisi Marta ibru-di tule judeu mahãduhi-di retehereu tule tii rabadewoni-hikỹre. ³⁴ Iule Jesuisi rỹrãxire: –Titxiwexe tii tetiditenyte. Tiiboho rirawyònyre: –Wanyrỹ, manake itxeremy. ³⁵ Jesuisi tahe rahinyre. ³⁶ Tai tahe judeu mahãduõ rarybere: –Betehebentyke sówemy heka tii Lazaru luure. ³⁷ Ijõ tahe rarybere: –Tii iny ruetà riteytenyre. Aõherekibo Lazaru irumy ratxireriule riteytenyõra.

³⁸ Jesuisi ixby tawo-ki bederiòtiinyre. Tahe rariamy rare wabede-ò Lazaru suiwodỹwo-ò roire. Mana-di tahe ritxiotòbònyre. ³⁹ Tahe Jesuisi rarybere: –Mana bitake Marta tahe iseriòre rarybere: –Wahĩ, rarònyreri wahe inakubikòwa txumy dokuri txuu idi rỹira. ⁴⁰ Tahe Jesuisi rarybere: –Rarybere taheka, bityhynykeki, Deuxu rurumy bobike. ⁴¹ Tahe mana iribi ritarenyre. Jesuisi retehere biu-ò rexitònyre: –Umy reàlãmý wahe watxireri kai wadee taholatakí. ⁴² Wadee taholahyy atxiteri mahãte: –Kia reeryre, kata inysõwehekỹ òraru-ki kiamy rarybera adee, tai tiiboho rityhynyrenkemy wahe, kai tiwateònyteki. ⁴³ Kia rexihureu tahe ryryre: –Lazaru, bodohonyke wa ahana-ò. ⁴⁴ Kia rurumy roimyhỹ-ribi tahe dòhònyde. Iwa heka tebò-wana wídee ritỹtenylemy roimyhỹ. Irati tahe tyybese-di ritỹtenymy ihỹmyhỹ. Jesuisi rarybere: –Biesebenyke wa ixinamy rake.

⁴⁵ Tahe judeu mahãduy-ribi, Marie Martaboho roraludu mahãdu, aõbo Jesuisi riwinyremy robireu tahe, rityhynyre. ⁴⁶ Ijõ tahe fariseu mahãdu-ò roirenyre tamy relyykemy aõbo Jesuisi riwinyremy.

⁴⁷ Iribi tahe xiwe wahidỹỹdu wedu, fariseu wedu mahãdu-wana heka ywisidỹỹna mahãdu ributunyre. Dohodỹỹna mahãdu wedu heka imahãduni rare. Tahe inyõ rarybere: –Ka hãbu heka aõwíwíhíkỹ sówemy diwinymyhỹde. Aõhebo he rokotỹỹnyrenykre. ⁴⁸ Tiihyyle riwinymy rarekeki, heka ibutumy rityhynykre. Idi tahe Roma hãwã mahãdu soldadu kanakre iny riòlòdỹỹnyke inysỹ rahurenykre. ⁴⁹⁻⁵⁰ Kaifa imahãduõ rare. Kabeòrau tahe tii ibutu xiwena wahidỹỹdu wedu rare. Tahe tii rarybere: –Kaiboho aõ teeryõhytyente. Hãbuõ tahe rurukre ibutu inydee. Tai tahe ibutu iny itueòtyhy. ⁵¹ Kia heka irayky-ribi aõkõ ròhònyre. Deuxu irayky-ò ritidire, tii dori xiwena wedu tyhy rare kabeòrau. ⁵² Kiamy rarybereu, tahe Jesuisi rubunamy rarybereri. Jesuisi dori ibutumy judeu mahãdu dee rurukre. Tamy sohojile aõkõ rurukre. Tahe sohoji mahãduòle rabutukre Deuxu riòre bede bedemy rỹira mahãdu wahe. ⁵³ Itxuule tahe Jesuisi rubudỹỹmy ròhòtynyrenyre.

⁵⁴ Tai tahe ihãwãy-ki rariaõre, Judeia mahãduy-ki. Tahe iribi rexitare bederahy-ò iòhòmý. Hãwãõ-ò heka rare, Efraï heka inire. Taile taery mahãdu-wana ihÿmyhÿ. ⁵⁵ Judeu mahãdu worana bedehesi iòhòmý rÿimyhÿ Pascoa heka inire. Ritelenykõule heka sõwemy roirenyre Jerusalẽ hãwã-ò, tai rexiwinyrenykemy iwese bede ywina rarybere wese Pascoakomy wahe. ⁵⁶ Sõwemy iny Jesusimy robikemy rÿimyhÿ. Tahe Deuxu dohodÿÿna hetowo-ki widee rarybemyhÿre tahe rarybere: —Kanakre aõbo Jesuisi worana bedehesi-ò. ⁵⁷ Xiwena wedu fariseu-wana juhúu inyõ rarybemaãre: —Inyõ Jesusimy robikeki, tuu wadeereny kanarybekre, tii ramykremy wahe.

12

¹ Jesuisi rare Betÿnia hãwã-ò Pascoa worana bedehesi rÿikrekoki. Debòsohoji txumy rauhenymy rÿimyhÿ tamy. Tai heka Lazaru rasÿnymyhÿre rubu-ribi rexixare-ribi wahe. ² Martaboho tahe rÿsÿna wiutadàna riwinyrenyre Jesuisideewina. Lazaru Jesuisi-wana riroxikremy rononymhÿ. Tahe Marta tamyreny rÿsÿna riwymyhÿ. ³ Marie tahe sõwemy aderõna lÿnyre-di ratximyhÿ, iòwyhykÿre heka. Tahe tii Jesuisiwytyre ritxiwire idi tahe taradedile risuhore. Heto tahe tÿnyrehekÿlemy roire. ⁴ Judasi Isariò tule Jesuisi erydÿÿnaõ rare tii tai ratximyhÿ. Tii Jesuisi rityhenykremy tii raremyhÿ ihewo-ribi. Tii tahe rarybere: ⁵ —Kaa aderõna heka iòwyhykÿ rare. Aõherekibo idi tahonyõte nieru idi bitakemy iny aõkõ mahãdu-ò nieru biwahinykemy. ⁶ (Judasi heka iny aõkõ mahãdu luu aõkõ rare. Erydÿÿna mahãdu nieru rubudÿÿdu tii rare. Kia nieruõ tahe ixideele ritosinyhÿre. Tai tahe aderõna òwy ixidee ributunykemy idi ratximyhÿ). ⁷ Tahe Jesuisi rarybere: —Ixinamy wawatyre ritxiwike, wahãloo-ò waherina heka riryrymy tuu ritxiwireri. ⁸ Kaiboho heka aõu biwiòhenanymy ahãbenyke iny aõkõ mahãdu awanareny dori rarehyymy rarekre. Jiarÿ tahe kaki aratzihyyke aõkõ rare.

⁹ Judeu mahãdu Jesuisi rehemynyrieriò roholare. Tahe sõwemy iny tamyreny nade itxeremy. Tule Lazaru-ò itxeremy nade rubu-ribi rexixareki. ¹⁰ Tai tahe xiwewahidÿÿdu mahãdu wedu tule Lazaru rubudÿÿmy rarybere. ¹¹ Lazaru òraru-ki dori sõwemy judeu wedu Jesuisi rityhynyre.

¹² Itxubiòwau tahe Jesuisi nade Jerusalẽ-ò kia-ò tahe roholare ibutumy worana bedehesi ludu mahãdu. ¹³ Tai tahe roirenyre tii-wana witxi reakemy horeru riwyre ityre-di kanakre. Riryrenyre Jesuisi-ò: —Waiòlõreny, kai arawowydynyneri, kai bedeòbydÿÿdu tateki! Kai Deuxuni-di tateri. Kai

judeu iòlòtyhy Tate. ¹⁴ Jesuisi nade jumenta riòre tyre-ki, tuu dori ihetxina tyyriti-ki roire wesemy. ¹⁵ Kiamy wahe roire:

—Judeu riòre mahãdu uritere brebuõmy atximahãbeny aiòlòreny dori kanakre jumenta riòre tyre-ki.

¹⁶ Iery mahãdu kia rieryõhyre juhUU. ¹⁷ Iribi tahe tõhõti itxi reare ritidỹna hetxina-ki roiremy, Jesuisi biu-txi ròosemy rareu wahe tõhõtireny itxi reare. Tule sõwemy iaõmydỹnana rybe hetxina-ki riritinomy rỹimyhỹre. Kia-dĩ tahe idi tõhõtireny reare. ¹⁸ Inyõ itxeredu heka Lazaru ixixanamy relyyre. Tai tule iny sõwemy doidenyde. Kia Jesuisi riwinyreò heka roholarenre. ¹⁹ Tai tahe fariseu mahãdu widee raryberenyre: —Ibutumy ihemy roirenyre. Timyõre, aõhe heka rikisỹnyrenyõtyhy.

²⁰ Inyõ worana bedehesi-ki grego rybedu mahãduõ ratximyhỹ. Tii tai Deuxu reàlakemy ratximyhỹ. Tii Besaida hãwã ludu-ò Kalileia bede luduõ ratximyhỹ. ²¹ Tahe grego rybe mahãdu tamy rarybere: —Wanyrỹ, jiarỹboho, Jesusimy arobikemy watzirenryeri. ²² Filipi tahe Andre-ko relyyre. Ta wiwana roirenyre Jesuisi-ò. ²³ Jesuisi rarybere: —Aõkõra, Wabededỹnana iõhõra Deuxu Riòre Hãbutyhyhykỹ rubuna-ò, wahe. ²⁴ Inatyhomy adeereny ararybekre: —Jiarỹ alòbòròna rijuxunymyhỹre wesemy aresekre suò, arurukremy. Aruruõkeki ixiwanahyyle ararekre. Arurukre-wana sõwemy araratynkre. ²⁵ Inyõ ixiluukeki heka, ruruke. Kabede-ki tahe ixiluõkeki, tii rexiywinomy umytuedeõna-ò ratxike. ²⁶ Inyõ wadeòdumy ratximyhỹkeki, tii riwaheludunyke. Tai titxibo aratkikeò tii wawana ratximyhỹke. Inyõ wadeòdumy rareke-wana, tii Waha riwowydynkre.

²⁷ Katahe wabedewonihikỹmy watzireri. Timybo ararybekre, Waha, kia rubu aõmydỹnana-ribi biwatake. My òsana arexitòenykre. Aõkõre, kiaòle heka kabede-ò anade. ²⁸ Waha, anityhy-ò iny riwowydynkemy watzireri. Iule tahe rybeò-ò roholarenre: —Kia rotỹnyre ihãre ta ixityre tuu rotỹnykre. ²⁹ Tahe iny sõwehekỹ kia rybe-ò roholare. Tahe rarybere: —Biumytxyle rare. Tahe ijõ rarybere. Aõkõre ýju rare. ³⁰ Tahe Jesuisi rarybere: —Waòraru-ki aõkõ kia rybe rỹireri, aòrarurenre-ki, tamy bohólabenykemy. ³¹ Wiji tahe ywisidỹna kỹnykre, bedemy iny rỹira mahãdu-ò. Kia mahãdu iòlò, Satanasi, kanahitxidỹkre. ³² Iu jiarỹ itxeò-ki riwaukokreu, ibutumy iny heka ixidee adiwiutàdànykre riwatyhynkremy. ³³ Iu tii kia rarybereu, tarubuna ritỹnyre timybo rurukre. ³⁴ Iny sõwehekỹ dirawyònyde: —Jiarỹboho raholarenre bede ywina-ò. Tii rarybere: —Tiiemy Kristu rarehyymy rarekre. Timybo kai tarybeteri: —Biwaukokremy. Mobo tahe Deuxu Riòre Hãbutyhyhykỹmy tuu tarybeteri. ³⁵ Tahe

Jesuisi dirawyònyde: —Urihimyòle loosòna awana rariamy ratxireri. Idi atxiteriule idi mariake, bede luru atxi kanakelau. Inyò bede luruki rariakeki, tiobo rake rieryòhyyre. ³⁶ Waloosòna atxiteriule, biwatyhynyke waloosònamy, taile waloosòna mahãduõmy boibeke. Kiarybe rahu-di tahe Jesuisi iribi rexitamy rexiwore. ³⁷ Tii sòwemy bededòtidỹỹna ikoreny-txi riwinyre. Ihãrele tahe sòwemy rityhynyõre. ³⁸ Kia tahe Isaia tyyriti-ki roire, tahe iwesele tuu rarybere wese wiji rỹira rotỹỹnyre:

—Wanyrỹ, Iny rybe tỹnydỹỹnareny tiiboho rityhynyõhyyre, Deuxu taruru tamy riteòsinyrehãrele rityhynyõre.

³⁹ Tai rityhynyõhyyre. Isaia, Deuxu rybedu ijõmy ròritidỹỹre:

⁴⁰ —Deuxu riruetànyre, irayky riteredỹỹnyre. Tai rieryòhyymy robiòhyymyhỹre. Tiu heka Deuxu rityhynyõhyyre. Tiu riteytenyõhyyre.

⁴¹ Isaia Jesuisi loosònamy robire. Tai tahe tuu ròritidỹỹre.

⁴² Ihãrele tahe dohodỹỹna mahãdu wedule sòwemy rityhynyre. Urile fariseu mahãdu òrarukile, ijõ-ò tuu rarybeõre, dohodỹỹna mahãduy-ribi riòlòdỹỹnyheny. ⁴³ Tiiboho dori Deuxu wowydyna luurenyõre inywowydynale luurenyre.

⁴⁴ —Iny riwatyhynymyhỹkeki, wadedòdỹỹdule rityhynymyhỹre. ⁴⁵ Inyò wamy robikeki, iule wadedòdỹỹdumy robike. ⁴⁶ Jiarỹ loosòna wesemy anade bede-ò. Tai tahe iny riwatyhynykeki, bede luru ribi ròhònyke. Tai heka anade. ⁴⁷ Inyò warybe-ò roholake hãrele riywinyòkeki, tahe jiarỹ tii wiji ariywidỹỹnyòke. Jiarỹ dori tarasaduhyylemy anade. ⁴⁸ Inyò riwatyhynyòkeki, warybe-ò roholaòkeki, ikonana txuu tahe ywisidỹỹna-ò ralòke, warybe-ò rityhynyõmyhyreki aòhòkỹmy dỹỹnana-ò heka kia ralokre. ⁴⁹ Jiarỹ ixi rayky-ribi aòkõ rarybemahãre. Wahale rybe wadee riwahinymyhỹre. Kia wesele relyymahãre. ⁵⁰ Deuxu rybe bede ywina-di diwatedònyde umytedeõna wahidỹỹna kia rare. Kiale heka reerye.

13

¹⁻³ Pascoa worana bedehesi txumy txuu rỹire. Tahe Jesuisi rexierye ixyby tyby-ò ròòsekremy ihỹre, ibededỹỹnana iòhòmy roireki. Tule rexierye tyby ibutumy tamy riwahinyremy. Tii tyby-ribi nade tule ixybyle tamy rakemy. Txioro roxinau Jesuisi taerydỹỹna mahãdu-wana riroximyhỹreny. Judasi Isariò (Simaõ riòre) taile ratximyhỹ. Juhuu diabo tamy rarybere iruule Jesuisi rityhenykemy. ⁴ Jesuisi sòwemy taerydỹỹna mahãdu luure. Tai tahe rỹire, tatytyre ludu ritare òsuròna rimyre, idi rexiwetyataare. ⁵ Hynaro-ò bee ritxiwire taerydỹỹna mahãduwaa risuhokremy tahe òsuròna-di tawetya-ki

ihỹmyhỹ-di iwa rirubudỹnyre. ⁶ Tahe Jesuisi rehemynyre Simaõ Pedro-ò, Pedro rarybere: —Aõkõre kai wawareny suròdòðmyke. ⁷ Jesuisi rirawyònyre: —Kai heka teeryõte aõherekibo resuhòreri. Ihewo-ribi tahe bierykre. ⁸ Pedro rarybere: —Aõkõre, wawasuròdòðỹõmy. Jesuisi rirawyònyre: —Arisuhòðkeki wawanahyy aõkõ mabeke. ⁹ Pedro rarybere: —Wawasohojile aõkõ bisuhokre, wadebò warati-wana tule wahe. ¹⁰ Tahe ritỹnyre Jesuisi; inyõ rõhõre-wana iwale rasuhòke. Iuhe ibutumy tyralemy rỹimyhỹre. Kaiboho yralemy toite. Sohoji tahe aõkõre. ¹¹ Jesuisi tatyhedỹõdu rayky rierymyhỹre. Tai tahe rarybera, ibutumy aõkõ tyraremy.

¹² Jesuisi iwasuròdò rexihureu, tatytyre ludu retyynyra roxina-ò ròðsere. Tamyreny rỹõraxire: —Kaiboho teerytenyte. Aõhebo jiarỹ kia ratỹnyra. ¹³ Adeereny aritỹnykre. Kaiboho tiwaninitenye anyrỹmy, aõhe inatyhy? Aerydỹõdumy, inatyhy heka jiarỹ rare tahe òbitimy tarybetenyte. ¹⁴ Jiarỹ aerydỹõdureny anyrỹreny heka awareny resuhore. Tai tahe kaiboho wiwa bisuhòbenykre. ¹⁵ Iwese jiarỹ rexideòsinyre wese kaiboho biwinybenyke. ¹⁶ Inatyhymy adeereny ararybekre. Deòdu dori tawedu ratyre aõkõ rare. Rybe-ò ijohonadu dori rybedutyhy ratyre aõkõ rare. ¹⁷ Kia warybe teerytenyte. Tahe biwinybenykeki bedeòbynatyhy adeereny kanakre. ¹⁸ Ibutumy umyreny aõkõ rarybereri jiarỹ araeryreny, aratarenyeki, wahe. Rybe tyriti-ki roire kiamy: —Kia wawana riroximyhỹrele heka riwatyhenykre. Ele elemy tuu rotỹnykre.

¹⁹ Wiji rarybereri heka wylemy kia tuu rotỹnykre. Tuu rotỹnykreule, kaiboho bierybenykre òbitimy raryberé wahe; jiarỹ biwatyhynybenykemy wahe. ²⁰ Inatyhytyhymy ararybekre: —Inyõ adee aditeònykre. Inyõ tii rityhynymy kidiðykeki, tii riwadymyhỹre. Inyõ kidiwadykeki wadeòdỹõdu ridymyhỹre, Deuxu rityhynymyhỹre wahe.

²¹ Tahe Jesuisi rabadewonihikỹmy ronymyhỹ. Tahe rarybera: —Iny sohojiò ayreny-ribi riwatyhenykre. ²² Tahe wii riijerijereny. Mokobo rarekremy rõhõtynyreny. ²³ Jiarỹ, Joaõ Jesuisi weribi ranywỹhỹ, tii dori sòwemy waluure. ²⁴ Tahe Pedro wadee narybewasidi: —Tamy inihe myõraxike mobo raremy. ²⁵ Tahe jiarỹ retorunyre: —Wanyrỹ, mowexe ratxireri. ²⁶ Jesuisi rarybere wadee: —Kia orotxu ituudỹõ tamy ariwahinykrele tiikre. Tahe Jesuisi orotxu yre rituunyre idi tahe Judasi Isariò-ò riwahinyre. Tii Simaõ riòre rare. ²⁷ Tahe Judasi riyre. Iribi tahe Satanasi aõwesele tamy ralore. Jesuisi heka Judasi-ò rarybere: —Aõhebo botỹnykre wylemy makre biwinykremy. ²⁸ Tahe riroximy rỹimyhỹ mahãdu rieryõre aõmybo Jesuisi rarybemyhỹ. ²⁹ Judasi Isariò dori

nieru hyna yrubudÿÿdu heka rare. Tai tahe rōhōtinyrenyre Jesuisi worana bedehesi aōna aōna riwykemy riteōnyre, ada iny aokōdu mahādu-ò nieruō riwahinykemy. ³⁰ Judasi orotxu yre riymy rahudi tahe rōhōnymy rare bedeluru-txi.

³¹ Judasi rōhōnymy rahudi tahe Jesuisi rarybere: —Wiji tahe Deuxu Riōre Hābutyhyhykÿ loosōnamy iny robimyhÿre taraykywo-ki. Tii heka jiarÿ rare. Deuxu-ò waōraru-ki wowydyna riwahinykre. ³² Deuxu loosōnamy tahe waki iny robikeki, Deuxu riwatoosōnyreri aōwesele ibutumy iny tuu robike. ³³ Waluudu mahādu wariōre wesemy atximahātenyete, umywanareny urihimyōle ararekre, idi tahe arakre. Tahe biwaijebenyhārele waki mahabenyōtyhy. Iwese judeu mahādu-ò rarybere wesele adeereny ararybekre: —Titxibo arakre-ò kaiboho boibenyōke. ³⁴ Bede ywina tÿmyra wese adeereny ariwahinykre kiamy wahe: —Wiluurenykemy wahe: —Iwese jiarÿ aluurenyre wese tule kaiboho wiluurenyke. ³⁵ Wiluurenykeki ibutumy iny rieryrenykre kai waerydÿÿna mahādumy tate.

³⁶ Tahe Simaō Pedro ritÿÿraxinyre: —Wanyrÿ, titxibo kai makre. Jesuisi dirawyōnyde: —Titxibo arakre-ò wiji kaiboho boibenyōke, iribi tahe wahemy bodoikre. ³⁷ Tahe Pedro rarybere: —Wanyrÿ aōherekibo araōkre wiji ahemy waumy kie aōraru-ki ariwahinykemy watxireri. ³⁸ Inatyhymy aōbo aumy biwahinykre waōraru-ki. Inatyhytyhymy ararybekre: —Hānie hābu robukōule kai biwatxiōnykre inataōmy.

14

¹ Kaiboho bedeoitiidÿÿrenyōmyke bedewona-ki. Kaiboho Deuxu tetyhynytenyete, tai tahe biwatyhynykre. ² Wahasÿ-ki sōwemy sÿÿ rÿimyhÿre kialemyre heka tai. Kaweseōkeki adee inatyhymy rarybemahāre. Jiarÿ tahe arakre sÿÿ adeereny ariwinykemy. ³ Ariwinymy arahudi tahe ixbyle aōrysmy adōōsekre. Tahe aradyrenykre titxibo-txi aratxireriō kaiboho tule matxibenykre. ⁴ Kaiboho dori teerytenyete titxibo wasÿry roire. ⁵ Tahe Tome rarybere tamy: —Wanyrÿ, titxibo makreō reerykōrenyre. Tai tahe timykibo asÿry reeryrenykeny. ⁶ Jesuisi dirawyōnyde: —Jiarÿ wa ryy rare. Deuxu inatyhyna jiarÿ rare. Umytuedeōna wahidÿÿdu jiarÿ rare. Inyō waōrarakile Waha dee rakre. ⁷ Kaiboho tiwaerytenyete-wana tule Waha teerytenyete. Wiji tyhyule Deuxu teerytenyete, tuu tabitenyete. ⁸ Idi Filipi rarybere: —Wanyrÿ, boo inydee biteōsinyke, tai tahe awike. ⁹ Tahe Jesuisi rarybere: —Filipi, sōwemy bededÿÿnana umy-wana rewyre. Ihārele tahe tiwaeryōte. Inyō wadee kanakeki, Wahamy robike. Aōherekibo wadee tarybeta boo wadee

biteòsinykemy. ¹⁰ Jiarỹ Waha-ki watxiwãhãre tule Waha waki ihỹre. Kia aõbohe tetyhynyõte rarybewãhãre, kia iximy aõkõ rarybewãhãre. Waha waki ratximyhy tii taõmydỹĩnanamy rotỹĩnyre waumy-ribi. ¹¹ Waha-ki watxiwãhãre, tule tii waki ihỹre, kia bityhynybenyke. Aõwiihikỹ rewinywãhãre òraru-ki biwatyhynybenyke. ¹² Inatyhytyhymy adee ararybekre: — Inyõ riwatyhynykeki, wawesele aõwiihikỹ riwinykre. Tahe watyreaõ riwinykre. Jiarỹ dori Waha-ò arakre. ¹³ Tai wanimy aõmy bexitòenybenykeki, tii tahe ariwinykre. Iny Waha-ò wowydyna riwahinykemy idi watxireri, iRiòre wahe jiarỹ rare. ¹⁴ Tai aõma wani-ò bexitòenybenykeki, tii tahe riwinykreadeereny. ¹⁵ Inyõ waluukeki tii wabede ywina riywinytyhyke. ¹⁶ Waha-ò arexitòenykre ijõ wiòhedỹĩdu adeereny kiditeònykremy waderòwymy. Tii aõu aõu adeereny hyyle rarekre. ¹⁷ Tii Deuxu Tyytybytyhy rare. Tii inatyhynamy rieryreny, iny bedede mahãdu wahe. Deuxu Tyytybytyhy ixidee ridykemy. Tuu dori robiõtyhy rieryõtyhy. Kaiboho tahe teerytenyte. Tii dori umywanareny ratximyhỹre, aworeny-ki ratxikremy. ¹⁸ Jiarỹ heka ixisohojimy ararisidỹĩnyõtyhy. Jiarỹle adee adoosekre. ¹⁹ Wijile arurumy arakre bedede-ribi. Bedede mahãdu tiu wamy robiõtyhy. Kaiboho tahe wamy bobilebenykre, jiarỹ dori ixityre rubu-ribi adexixamy ararekre. Tai tahe tule kaiboho rubu-ribi bexixamy boibekre. ²⁰ Kia txuu kaiboho bierybenykre jiarỹ heka Waha-ki watxiwãhãremy. Kaiboho tasỹ waki ahãtenyte. Jiarỹ tule akireny watxiwãhãre. ²¹ Inyõ wabede ywinareny dikeki tahe, riywinykeki, waluudu rare. Waha tule iluukre. Jiarỹ tule iluutyhyre. Tamy tule arexideòsinykre. ²² Judasi tamy rarybere: (aõ Isariò aõkõ kỹny, iwitxiraõ.) —Wanyrỹ, aõhekremybo wadeereny bedexideòsinykre tahe bedede bedeludu mahãdu-ò aõkõ wahe. ²³ Jesuisi rarybere: —Inyõ waluukeki, wabede ywina riywinytyhyke. Waha, heka iluutyhykre. Jiarỹboho tamy adoidenykre tamysỹmy. ²⁴ Iny waluuõkeki, warybe tiu rityhynyõtyhy. Aõ warybe-di aõkõ heka rarybereri. Waha wadee riwahinyredi heka rarybereri.

²⁵ Tai arakrekoki tuu rarybereri adeereny. ²⁶ Tahe Deuxu Tyytybytyhy, awiòhedỹĩdu, tii araerynanykre ibutumy aõna aõnamy. Timybo jiarỹ adeereny raryberemy akananohõtiijaranydenykre. ²⁷ Ywina adeereny adiwahinykre waywina wahe. Iwese bedede bedeludu mahãdu riwahinymyhỹre wese aõkõ ariwahinykre. Uritere nohõtiryẽmy brebuõmy. ²⁸ Rarybere dori arakremy tule adoosekre. Waha waratyre rare. Tamy he arakre. Kaiboho waluukeki, beysabenykre tamy arakreu. ²⁹ Kaa bedede reakoki tuu rarybereri. Tuu reakreu tahe, kaiboho

biwatyhynybenykre. ³⁰ Sõwemy heka adeereny ararybeõkre, bede dinodu dori tehemynysỹ iòhòmy ihỹre, Satanasi wahe. Tii heka wadee iruruõhyyre, riwateònyõtýhy. ³¹ Jiarỹ Waha luure. Rewinywãhãre aõbo Waha ariwinykemy riwateranymyhỹre. Botamanyke: —Ròkòirenyke.

15

¹ Hãjutò òwòna wese wihikỹ jiarỹ rare. Waha tahe bede rade wysydỹydu wese rare. Bede òbebure iratyòkeki iò riòròke. Iratydikeyi iòsòmo iribi risihere. Tai tahe sõwetyhymy nihikỹmy raratynyke. ² Kaiboho bede rade-ò wesemy toite. Warybe-di aòsòmoreny aribireny resihemahãre. Katahe òbitimy toite bederatymy raratynykemy. ³⁻⁴ Kaiboho biwamymy wadi myikre. Iwese bede radeõ raòròõmyhỹkeki irulemy rỹikre raratynyke. Aòkòkeki ruruke. Kaiboho iwesele toite. Waki beàrenyòbenymyhỹkeki, tiu Deuxudeewimy atxibenyõtýhy. ⁵ Jiarỹ hãjutò òwòna wese rare. Kaiboho ibede radeò wese toite. Waki beerenybenykeki, jiarỹ aki ararike, tai bederaty wese sõwemy maratynyke. Wahoòkeki tiu aõ biwinybenyõtýhy. ⁶ Inyõ waki rariòkeki, iwese iny bede rade rubu-di rahuleke, tii iwesele inyõ rahukre. Juhuu rimyre, idi heòty-ò rehure, tai roomyhỹre. ⁷ Kaiboho waribi boibenyòkeki, warybe òhòti-ribi rosaòtyhykeki, aòtaxina wadee bexitòenybenykre, tai ibutumy adee ariwahinykre. ⁸ Iwese bede rade sõwemy raratynymyhỹre wese, kaiboho, aõna aõna wiwihikỹ biwinybenyke Deuxu dee. Kiakeki tahe Deuxu deàlàna sõwemy ritakre. ⁹ Iwese Waha waluure wese jiarỹ aluurenre waluuna-ribi boibenyòke. ¹⁰ Wabede ywina inyõ riywinykeki, tii waluuna-ribi raòtyhy. Iwese Waha bede ywina reywinymyhỹre wese tahe Waha luuna-ribi jiarỹ tiu rahònyòhyyre. ¹¹ Wadeysana awo-ki ratxikemy jiarỹ adi watxireri. Eysana sõwemy mabekemy adi watxiwãhã. Tai tahe warybe adee rarybere. ¹² Wabede ywina heka kaa rare: —Wiluukemy. Iwese jiarỹ aluure wese wiluurenkemy. ¹³ Inyõ taery dee rurukeki taluunadireki, tii luunatyhy ijòdire. ¹⁴ Kaiboho wadeewi biwinybenykewana tai inatyhymy wabiòwa toite. ¹⁵ Tahe aõ wadeòdumy aòkòhe araninirenykre. Kaiboho wabiòwa toite jiarỹ dori Waha-ribi raholare adee tuu relyywãhãre. ¹⁶ Kaiboho tahe tiwatatenyòhyyte, jiarỹ tahe aratarenre kaiboho boibenykemy. Sõwemy aõna aõna wiwihikỹ botỹỹnybenyke. Tule kia aõna aõnamy tule roihykemy. Tai tahe aõmy Waha-ribi wani-di bexitòenybenykeki, adee riwahinyhy rareke. ¹⁷ Wiluubenre: —Kia tahe wabede ywina adeereny adiwahinyde. ¹⁸ Bede ludu iny mahãdu eramy reakeki

myỹ uritere nohõtiõmy juhUU dori waderamy waluuõre. ¹⁹ Kai bede ludu iny tate-wana iny aluuke, tahe aõkõre. Tai tahe iny eramy reamyhỹre. Bede ludu mahãdu ribi jiarỹ aratara. Bede ludu mahãdu aõkõ tate urenana. ²⁰ Adee heka rarybere aõmybo. Uritere iribi nohõti lusaõmy kia wahe: –Deõdu tawedu ratyre aõkõ rare. Tai wadee aõbina binamy iny rotỹỹnymyhỹre. Adeereny tule aõmy rotỹỹnykremy wahe. Tiiboho warybe riywinyrenykeki, arybe tule tiiboho riywinyrenykre. ²¹ Kia tahe adee ratỹỹnymyhỹre wanimy rybe òraru-ki, tiiboho dori wadeòdỹỹna rieryõreki. ²² Tuu ararybeõre wana inihe tiiboho òrarudiõhyrenyre. Katahe rarybere tai tahe tiiboho rarybeõtyhy rieryõremy. ²³ Inyõ waluuõkeki, tule Waha luuõtyhy. ²⁴ Jiarỹ heka ibutuko-ò wowydyna iitxerenarenymy rewinyõrewana, tiiboho iòrarudiõhyre inihe. Tahe rewinyamahãre, tuu robimyhỹrenyre, ihãrele tahe waluuõre tule Waha luuõre. ²⁵ Kiamy heka rotỹỹnyre bede ywina ritidỹỹna-ki roireki. Tai heka tuu rotỹỹnymyhỹre. Kiamy wahe ritidỹỹna-ki roire: –Tii heka bede òraru aõkõ rare, ihãrele tahe iluuõrenyre. ²⁶ Deuxu Tyytybytyhy adee ariteònykre. Tii, wiòhedỹỹdu rarekre inatyhynamy rierynanykre. Tahe, tii kedehe-mynykreu wamy rarybekre. ²⁷ Tule kaiboho wamy mary-bebenykre, wawana hyy ahãtenyteki.

16

¹ Kiamy adee rarybemahãre òraruna-txi ixekemy. ² Tiiboho heka anatakre tohodỹỹna hetowo-ribi. Kobe, bede dỹỹnana iòhõmy kadeakreu inyõ anarubunykeki, kia Deuxudeewimy tuu konohõtinykre. Tii Deuxu wiòhedỹỹdu raremy xixi-di kõnohõtinykre. ³ Tiiboho Waha rieryõhyymyhỹrenyre tule riwaeryõmyhỹre. Tai tahe kiamy adeereny rotỹỹnymyhỹrenyre. ⁴ Iu adeereny aõmydỹỹnana kedehemynykreu, õhõtireny itxi reake timybo adeereny relyretxi. Tiu heka tuu rarybeõhyre, umywanarenhyhy dori wãhãre. ⁵ Katahe arakre wadeòdỹỹdu-ò. Kaiboho bỹỹraxibenykekõ aõbo tiobo arakre-ò. ⁶ Kaiboho heka tabedewomy toite kamy rarybereriki. ⁷ Ihãrele tahe inatyhymy adeereny ararybekre: –Adeereny awikre arakreki wahe. Jiarỹ araõkeki awiòhedỹỹdu, Deuxu Tyytybytyhy kanaõkre. Arakeki tahe tii aditeònykre adeereny. ⁸ Iu kanakreu, tii inydee kiditeòsinykre irayky binadiremy, iòbitina-di aõkõremy, iòrarunadiremy. Deuxu dori òrarudu riywisidỹỹnykre. ⁹ Taòraruna ixidee kiditeòsinykre tiiboho riwatyhynyõrenyriki. ¹⁰ Tahe ixidee kiditeòsinykre. Jiarỹ iratyre waõbitina direki. Waha-ò dori arakre,

wamy bobibenyõtyhykemy. ¹¹ Deuxu ixiywisidỹỹna ixidee kiditeòsinykre kabede dinodu dee rarybere tii rexihukremy. ¹² Jiarỹ heka sõwemy adee ararybekemy watzireri, ibutumy tahe isiramy ixidee boholabenyke. ¹³ Txiohe rare. Deuxu Tyytybytyhy kanakreu, inatyhymy adeeremy rarybekre inatyhyna-di ibutumy. Tarybe-di tahe rarybeõkre. Deuxu-ribi aõmybo roholaremy tahe rarybekre. Tule timybo aõna aõna rarekremy kanarybekre. ¹⁴ Tii waaõmydỹỹnana adeeremy ritỹnynykre. Tai kidiwatoosònanykre. ¹⁵ Ibutumy Wahahõrõ heka wahõrõ rare. Tai heka tuu adeeremy rarybereri waaõmydỹỹnana adeeremy kiditynynykre. ¹⁶ Urihimyò riõre heka waõkre, idi tahe ixityre wamy bobibenykre. ¹⁷ Tahe ijõ ierydỹỹna mahãduõ widee rarybere: –Timybo tii rarybere: –Urihimyò iõkremy tii rarybereri, tule ixiryre wamy bobibenykre. Tule Waha-ò arakre. Timybo heka rieryrenyõhyre aõmybo rarybera. ¹⁸⁻¹⁹ Tiiboho Jesuisi-ò rỹỹraxirenykremy ratxirenyreri. Tahe Jesuisi rierymyhỹre tuu rỹỹraxikre. Tahe Jesuisi tamyreny rỹỹraxire: –Kaimy ixidee tỹỹraxitenyteri. Wananamy waòkesenalemy. ²⁰ Inatyhymy adeeremy ararybekre: –Iny bede mahãdu urile reysakre, kaiboho tahe araeryrenyra urile mahinybenykre, birajuabenykre, mabedewobenykre. Idi tahe kaiboho beysabenykre. ²¹ Iwese hãwyy ijera iõhõreki, rabadewomyhỹre, taaõhõkỹmydỹỹnana-di rõhõtinyinmyhỹre. Idi tahe reamyhỹre. Iu tahe tõhõti rosamyhỹre tohouã tỹmyradile reysamyhỹre. ²² Iwesele kaiboho mabedewobenykre, ixityre wamy bobebenykreu tahe, kaiboho beysabenykre. Inyõ heka deysana aribireny ritaõtyhy. ²³ Kiatxu tahe uritere watỹỹraxidỹỹõmykre inatyhymy adeeremy rarybereri. Waha-ribi aõmy bexitòenybenykeki. Tii adeeremy kidiwahinykre wani òraru-ki. ²⁴ Tiu heka aõmy texitòenytenyõmahãte wani-di. Bexitòenybenyke, tai bitabenykre. Tai tahe kaiboho beysabenykre.

²⁵ Ibutumy rybewòtemy adeeremy rarybewãhãre wahe. Idi tahe tuu adeeremy ararybeõkre. Idi tahe itỹnytyhymy Waha ar-itỹnynykre adeeremy. ²⁶ Kiatxu tahe bexitòenybenykre wani-di jiarỹ ararybeõkre umyreny Waha-ò. ²⁷ Waha dori aluurenre, kaiboho waluurenreki, Deuxu-ribi anade tetyhynytenyteki. ²⁸ Waha-ribi anade, bede-ò adehemynyde ihãrele bede-ribi arakremy Waha-ò. ²⁹ Jesuisi ierydỹỹna mahãdu rarybere: –Wiji tahe itỹnytyhymy tarybeteri. Rybewòte-di aõkõ tarybeteri. ³⁰ Kai ibutumy teeryte. Inyõ dỹỹraxiõmy adee. Kai inatyhymy Deuxu-di tanate. Kia jiarỹboho retyhynyreny. ³¹ Tahe Jesuisi tamy rỹỹraxire. Inatyhymy wijityhyle tetyhynytenyta. ³² Wabededỹỹnanamy heka reara. Kaibohoõ sohoji sohojimy

tasỹ tasỹ-ò rakre. Biwaribenykre ixi sohojilemy arỹikre. Tahe ixi-wana aõkõ watzikre, Wahawanale arỹikre. ³³ Kaheka aõna aõnamy adeeremy rarybere ywina-di araykyreny-ki boibekre. Bede-ki kaiboho aõhõkỹmy botỹỹnybenykre. Ihãrele beysabenyke, Jiarỹ heka Deuxu òludu mahãdu-di ròtara.

17

¹ Jesuisi rarybemy rahudi tahe retehere biu-ò rarybere: –Waha, wabededỹỹnanamyhe reara. Ariõre watxiwãhãre. Wowydyna wadee biwahinyke tai tahe adee wowydyna adee ariwahinykre. ² Kai, Waha, ibutumy wadee ruruna tewahinyta iny deòdỹỹnamy. Tai umytuedeõna ariwahinykre biu-ò hedu mahãdu-ò. ³ Kia heka umytuedeõna rare: –Deuxu inatyhy tate sohojihyy tate. Tii araeryrenykeki tahe eòdỹỹna Jesuisi Kristu rieryrenykeki. Kia umytuedeõna rare tamyreny. ⁴ Aõ aõmysỹdỹỹnabo wadee tewahinyte, ibutumy adee rewinyre. Tai heka arawowydynyra kabede-ki. ⁵ Iu bede rexidelenyreu umywanahyy rarewãhã. Sõwemy loosõna nihikỹ-di rawãhãre. Tahe wiji, Waha, kia loosõnale ixityre bidiwahinykre umywanahyy ararekre. ⁶ Kai iny mahãduõ wadee tewahinyte bede mahãdu-ribi. Tamyreny umy rarybema-hãre. Juhu tiiboho ahõrõ roire. Idi wadee tewahinyte. Tiiboho arybe riywinymyhỹre. ⁷ Ibutumy waaõmydỹỹna aribi retamahãre. Kia heka wiji tiiboho rieryrenyra ibutumy aribi nade. ⁸ Aõrybebo wadee tewahinytamy tamy rarybemahãre. Tiiboho rityhynyrenyre, rieryrenyre aribi jiarỹ anade, kai wateòdỹỹdu tate. ⁹ Iòraru-ki adee rexitòenyre. Tiiboho amahãdu roire. Wadee tewahinyte, bede mahãdu-ò raru-ki aõkõ adee rexitòenyre. ¹⁰ Ibutumy wahõrõ, ahõrõ rare. Tule ahõrõ, wahõrõ rare. Tai heka iny mahãdu riwatoosõnanymyhỹre. ¹¹ Jiarỹ adee arakre tai kaki arareõkre. Tiiboho heka kaki rarirenykre. Tiiboho biyrubunykre, Waha, ani òbiti-di biyrubunyke, wadee tewahinyteki. Tai tahe iraykyreny wiwesehyymy roirekre. ¹² Tiiboho-wana rarewãhãu ani òraru-ki reyrubunymahãre, wadee tewahinyteki. Timy heka reõnonyõhyyre ijõ, sohojile tahe reõnonyre. Juhuu dori Ritidỹỹna roire ijõ sohojiõ ariõnonykremy. Ihyy tahe reõnonyre, Judasi Isariò õnodỹỹduhyymy rarekre. ¹³ Ka tahe arakre arora-ò. Tii heka inyõ rarybemahãre ibutumy wadeysana iworeny-ò ralòmhyhỹkemy. ¹⁴ Jiarỹ arybe tamyreny rewahinymahãre. Bede mahãdu iny dori terarenyre, tiiboho bede mahãdu iny aõkõ roireki. Iwese jiarỹ bede ludu hãbu aõkõ rare wese. ¹⁵ Bede-ribi tarasamy aõkõ heka adee rexitòenyre. Urile ibina bina widỹỹ-ribi biyrubunykemy. ¹⁶ Tiiboho

tahe wiji ijõ bede wixira ludu roire, iwese jiarỹ rare wese, wahe. ¹⁷ Arybe-di tiiboho biòbitinyke, tai ahõrõ mahādumy rarekre. Arybe dori òbitityhy rare. ¹⁸ Iwese bede iny-ò tadiwateònyte wesemy, Jiarỹ tiiboho reteònyre bede ludu mahādu-ò rarybekremy. ¹⁹ Tamyreny xiwena wesemy adee arexiwahinykre. Òbitihyomy ararekre, tai tiiboho òbitihyomy roirekremy inatyhyna-di. ²⁰ Aõ tamy sohojile aõkõ heka rexitòenyneri. Ibutumy kia rityhynomy rỹirake-ò dori rexitòenyneri. ²¹ Tai tahe ibutumy wiwese wesemy rõhõtynyrenykre. Iwese, Waha, kai waki atxiteri wesemy tule aki watzireri wesemy tiiboho iny-ki roirekre. Tai bede iny mahādu rityhynykre ateòdỹỹna watzireri urenana. ²² Kai loosõna wadee tadiwahinyte, tahe tamyreny rewahinyre. Tiiboho sohojihy weselemy roirekremy, iwese iny sohojihy rare wesemy. ²³ Jiarỹ taireny wāhāre, kai waki ahāte. Tai tahe inyboho butuhyomy rokoirekre. Wii riòbitinomyhỹrenykre. Tai bede mahādu rierykre tadiwateònyteki. Tule wamahādu luu tate urenana Waha, iwese waluure wese. ²⁴ Waha, titxibo ararekre, tiiboho wawanahyomy roirekre, wamahādumy wadee tewahinyteki. Tai tiiboho waloosõnomy robikre. Kai dori bede ihokõule waluure, tahe loosõna wadee tewahinyte. ²⁵ Waha òbiti, bede mahādu araeryõre Jesuisi tahe araeryre. Wamahādu tule rieryre tadiwateònyte. ²⁶ Jiarỹ tiiboho reerynanyre ani-di. Ihāre ta arierynanykre. Tai aluuna iwese waki ratzireri wesemy taireny rarekre, tule jiarỹ taireny ararekre.

18

¹ Jesuisi rexitòenomy rahudi tahe roirenyre taerydỹỹna mahādu-wana Cedrõ beàwe-ribi kowa ijā-ò heka reuròrenyre, tahe bederaty oworuro-ò rirònyrenyre. ² Judasi heka Jesuisi tyhedỹỹdu heka ibede rieryre, Jesuisi dori taerydỹỹna mahādu-di tamy raHyomyhỹre. ³ Tahe Judasi, soldado mahāduõ tadinodu-wana ributunyre. Fariseu mahādu-ribi xiwena wedu wahidỹỹdu-ribi Judasi soldado yrubudỹỹdu mahādu rihitxinyre tule xiwena deòdu mahāduõ rihitxinyre tii-wana rakremy roirenyre. Tahe tamy ritehemynyrenyre tòbõra heòty-wana. ⁴ Jesuisi rexieryre ibutumy aõmybo tamy kodotỹỹnykre. Tahe iny mahādu-ò rexidorunyre. Tahe rỹraxyre tamy: —Mowe teijetenyteri. ⁵ Tahe dirawyònyde: —Jesuisi Nazare hāwā ludu reijereri. Tahe Jesuisi rarybere: —Jiarỹ wa tiile rare. Tahe Judasi ityhedỹỹdu tii mahādu wanale nade. ⁶ Jesuisi tamyreny rarybereu, tahe rexilòhòrarienyre iribi, tahe suòle reserenyre. ⁷ Ixityre Jesuisi tamy rỹraxyre: —Mowe teijeteri. ⁸ —Jesuisi Nazare hāwā ludu, tiiboho dirawyònyde. —Rarybera tahe jiarỹ

raremy wahe. Tiwajeteri-wana tahe biwadyke urile ixinamy waijoi rirahuke. ⁹ Kawesemy wahe irybe hitxina wadee tewahinyteõ heka tiu reõnonyõhywãhãre. Jesuisi, kiamy rarybere tamyreny irybe hitxina wesemy ibutumy tuu rotỹnykremy. ¹⁰ Tahe Pedro tamaydese ritamy reare tahe xiwena wedu deõdu riwotõmonyre. Malõõ heka inire. Pedro Malõõ nohõti riorore ruruwe-ribi ludu wahe. ¹¹ Jesuisi rarybere Pedro-õ: —Amaydese birutyke. Jiarỹ Waha deewimy aõhebo arotỹnykrekõ aõbo wadi tahõtinyteri. Aõhõkỹmy arotỹnyõkemy aõbo wadi tahõtinyteri.

¹² Tahe soldadu, tadinodu-wana, judeu yrubudỹỹdu-wana Jesuisi rimyre ritaataamy ridyre. ¹³ Kia beõra Kaifa xiwena wedu tyhy rare. Anasi iriõre labie rare. Tai tahe juhUU Ana-õ ridyre. ¹⁴ Kaifa tahe juhUU judeu mahãdu-õ rarybere: —Wiji beõramy hãbuõ iny mahãdu õraru-ki rurukremy rahõtinyteri.

¹⁵ Simaõ Pedro inyõ-wana rare Jesuisi hewomy. Kia Pedro-wana rare, kia xiwena wedutyhy eryna rare. Tai tahe ralore õtity ijõrore-di. ¹⁶ Pedro tahe ahanakile rỹire. Kia Pedro-wana rare. Rohonyre hetowo-ribi hetoiõ-di itxeredu-õ rarybere, tahe Pedro ridyre hetowo-õ. ¹⁷ Kia ijadõma, heto ijõ-di itxeredu rarybere Pedro-õ: —Kai Jesuisi erydỹkỹna mahãdunokõ anobo tate. Tahe Pedro dirawyõnyde: —Aõkõre. ¹⁸ Tahe soldado yrubudỹỹdu tai rahetõmy rỹimyhỹ, heto ludu deõdu mahãdu-wana txutàtà riki. Pedro iyreny kile rỹimyhỹ rahetõmy.

¹⁹ Tahe xiwena wedu tahe Jesuisi-õ rỹỹraxire. Aõhebohe aerydỹỹna mahãdu-wana tadotỹỹnymahãte. Timybohe tebedeerynymahãte. ²⁰ Tahe Jesuisi ritỹnynyre: —Ibutumy inyko relymahãre iwasimy aõkõ heka relymahãre. Judeu dohodỹỹna hetokile relymahãre Deuxu dohodỹỹna heto-wana. Titxibo judeu mahãdu ributunymyhỹremy relywãhãre. ²¹ Tai aõherekibo wadeele tỹỹraxiteri. Myỹraxike wadee ijohonadu-õ. Tiiboho ka rieryrenyre aõmybo rarybere. ²² Jesuisi kia rarybereu, soldadu itxereduõ rihetenyre. Tahe rarybere: —Tu heka rybeõmyke xiwena wedutyhy-õ. ²³ Jesuisi dirawyõnyde: —Jiarỹ ibinamy aõmybo rarybera-wana, manarybeke tuu. Aõkõkeki, awimy rarybera-wana aõherekibo tiwahetenyte. ²⁴ Anasi tahe Jesuisi ridykemy riteõnyre tataanadihylle Kaifa-õ, xiwena wedutyhy wahe.

²⁵ Kowa tahe Simaõ Pedro ratximyhỹre rahetõmy rỹimyhỹ. Inyõ rỹỹraxire: —Kai aõbo ierydỹỹna mahãduõ tate. Tahe rexixiõnyre. Jiarỹ ijõ aõkõ rare. ²⁶ Xiwena wedu deõduõ Pedro-õ rỹỹraxire: —Tii heka Pedro ritõhõtiorore ijiõõ rare. Tahe tamy rarybere: —Umy taheka rabire tii-wana bederaty oworuro-ki

atximahã-ò. ²⁷ Pedro ixityre rexitxiõnyre. Aõwesele tahe hãnie hãbu robure.

²⁸ Idi tahe Kaifa heto-ribi Jesuisi ridyrenyire ywisidÿÿna-ò bede dinodu heto-ò rudiulere. Tiiboho rirõnyõhyyre brebuna-di rexisunyrenyheny. Rirõnyrenykeki, tahe Pascoa worana bedehesi rÿsÿnaõ rirÿsÿõtyhy. Tiiboho dori rõhõtynyre rirõnykeki, brebuna raremy. ²⁹ Tahe Pilato rõhõnyre tamy rarybekremy: —Tahe Jesuisimy tamy rÿÿraxire kia hãbumy terajuatenyteri aõhebohe rotÿÿnyra. ³⁰ Tahe dirawyõnyde: —Aõbibina binamy rotÿÿnykõhyra wana inihe aridyrenyõhyreri. ³¹ Tahe Pilato rirawyõnyre: —Bidyke abede ywina rybe-di biywinyke. Tahe judeu mahãdu rarybere: —Wabede ywina rybe warubudÿÿmy rybe aõkõ rare. Inyõ heka arirubunyrenyõtyhy. ³² Kia rybe tahe Jesuisi rybe wesemy rare. Tii dori iximy rarybere timybo rurukremy. Tai timybo irybe hitxina wesemy raryberemy ibutumy rarekre.

³³ Ixityre Pilato ralore ywisidÿÿna-ò Jesuisi-ò rÿÿraxire: —Kai aõbo judeu mahãdu Iòlò tate. ³⁴ Jesuisi ritÿÿraxinyre: —ÿraxina aõbo ahõrõ rare ada ijõ aõbo wamy kia rarybere. ³⁵ Tahe Pilato rarybere: —Jiarÿ wa judeu mahãdu aõkõ wãhãre. Aõbinatyhymy aõbo he tewinyte. Judeu mahãdu wadee tiwadyte. ³⁶ Jesuisi dirawyõnyde: —Waiòlõna hãwã bede ludu aõkõ rare. Waiòlõna kaki ratxikeki wamahãdu wadee raaõbinanyke. Tai tahe judeu mahãdu-ò riwawahinykemy aõkõ watxiwãhãre. Tahe aõkõre kabede ludu aõkõ Waiòlõna rare. ³⁷ Pilato tahe rarybere: —Kai aõbo inatyhy iòlòmny tate. Tahe Jesuisi dirawyõnyde: —Kai ka wamy tarybeta. Kia-ò uludumy anade. Kia-ò anade, inatyhynamy arelyykemy. Inyõ inatyhynamy luukeki warybe-ò roholamyhÿre. ³⁸ Tahe Pilato rÿÿraxire: —Aõbo inatyhyna rare. Ta rybe rahudi tahe judeu mahãdu-ò rarybekemy rare. Tiu kÿny kahãbu-ki aõ ibinamy tai rahaõhyra. ³⁹ Inyõ ariteònykemy watxireri kaiboho wadi tõhõtynyhytenyteri ka woranabedehesi-ki. Tahe judeu Iòlò aõbohe ka ribi ariteònykre ywihyyle. ⁴⁰ Tahe ixityre ibutumy ryryrenyire: —Kia hãbu aõkõre, Baraba biteònyke (Baraba heka hãbu debore wasidu rare.)

19

¹ Idi tahe Pilato Jesuisimy rerotiyhyta-di raòhòtekremy soldado mahãdu riteranyre. ² Soldado mahãdu edehékÿ rataanadile ira-ò ritidire, iumy tahe tylÿrehekÿ-di rityynyre iòlòtyweseekemy. ³ Tamy rehemynymyhyre: —Aõherebo iòlòtyhy wesena, tahe rihetenyrenyire. ⁴ Pilato tahe ixityre rõhõnymy iny-ò rarybekemy: —Ixityresÿ adeereny redyreri. Bierybenyke. Aõ heka tai ibinaõhyymy idi retehewãhãre.

⁵ Tahe Jesuisi ròhònyre ede rataana-di tylÿrehekÿ-di. Tahe Pilato tamy rarybere: —Kakÿnyhe tiire. ⁶ Tahe xiwena wedu mahãdu, yrubudÿÿdu mahãdu tuu robireu, rryryrenyre birubunybenyke, itxeò dee bitamadÿÿnyke. Pilato rarybere: —Kaibohole itxeò-di bitamadÿÿnybenyke. Jiarÿ tahe tai ibinamy aõki rahaõhymahãre. ⁷ Tahe judeu mahãdu rarybere: —Jiarÿboho kÿny wabede ywina renydire. Rurukemy heka tuu bede ywina roireri, tii dori Deuxu Riòremy rexininimyhÿre. ⁸ Pilato kia-ò roholareu tahe, ruberutyhyre. ⁹ Ixityre ralore ywysidÿÿna heto-ò: —Rarybere Jesuisi-ò, tiribi wexe tanate. Jesuisi rirawyònyõhyyre. ¹⁰ Tahe Pilato rarybere: —Bidiwarawyònyõkre aõbo. Jiarÿ warurudire anarubunyke aõbo ada arateònyke aõbo. ¹¹ Jesuisi rirawyònyre: —Aruru-di aõkõ tate. Deuxu kidiwahinykekile tahe biwateònyke ada biwarubunyke. Tai tahe adee wawahidÿÿdu aratyre iòraru dire. ¹² Tai tahe Pilato iteòdÿÿmy rurure. Tahe judeu mahãdu tamy rryryre: —Kai biteònyekiki tahe, Iòlò Cesar biòwa aõkõ tate. ¹³ Kiarybe-ò Pilato roholareu tahe, Jesuisi diòlòdÿÿnyde ahana-ò. Pilato tahe ywisidÿÿna ryna-ò rexisÿnyre. Kia ubeni heka Rirana Ijàti inire. Tahe judeu rybe-ki heka Kabata inire. ¹⁴ Pascoa worana bedehesitxu sexta feira rÿire. Txutyre iòhòmy tahe bede rÿire. Tahe Pilato rarybere judeu mahãdu-ò: —Betehebenyke aiòlòreny-ò. ¹⁵ Tahe tiiboho rryryrenyre. Bidybenyke! Itxeònihikÿ-ò birubunybenyke. Pilato tahe tamy rarybere: —Aiòlò aõbo, birubunybeny. Tahe xiwena wedu rirawyònyre: —Iny iòlòreny sohojile wa rare: —Cesar heka inire. ¹⁶ Tahe Pilato Jesuisi tamyreny riwahinyre rirubunyrenykemy.

¹⁷ Tiiboho heka Jesuisi ridyrenyre. Iitxeò tamy riwahinyre idi retyykremy. Tahe Kalvariu-ò idi ridymy rare. Kalvariu heka Kòkòta inire judeu rybe-ki. ¹⁸ Tai itxeò nihikÿ dee ritamadÿÿnyre ijõ hãbu inatxiõ-wana Jesuisi itxeònihikÿ itya-ki rÿire. Hãbu wiò wiòmy idi rÿire. ¹⁹ Pilato riritinyre ritidÿÿna-ò Jesuisi tyre-ò ritidire. Kawesemy ritidÿÿna roire: —JESUISI, NAZARE HÃWÃ LUDU, JUDEU MAHÃDU IÒLÒ. ²⁰ Hãwã-ribi ireheriòremy roire. Tai tahe sòwemy judeu mahãdu tuu robire iritidÿÿnamy. Inataõ rybemy witxira riti heka inataõmy roire. Judeu rybe ijõre, latim rybe ijõre, grego rybe ijõre. ²¹ Judeu xiwena wedu mahãdu Pilato-ò rarybere: —Judeu mahãdu Iòlò rarybere: —Iritidÿÿõmyke wa. Kawesemy biritinyke: —Tii rarybere judeu mahãdu Iòlò raremy. ²² Tahe Pilato dirawyònyde: —Iwese reritinyre wesemy rarehyykre.

²³ Soldado Jesuisi itxeònihikÿ-ò ritamadÿÿnymy rahudi tahe, ityy ritxuatxuakremy diwyde. Inaubiòwa heka riywinyra. Wirarea riwykremy soldado mahãdu idi rÿireri. Iyhyitxena

tahe iretydyna-di aõkõ rare. ²⁴ Tahe ijõ widee rarybere: —Iyreyredỹrenyõmyke wa urile ta idi rikihurenykre mobo ritakremy. Kia ryberiti-ki tuhyy roire:

—Watyy ritxuatxuaire ijõ yre wimy riywinyrenyire. Tule wayhytxena tyre-ki rehurenyire mobo ritakremy. Tahe iwese Tyyriti rarybere wese, soldadu mahãdu ibutumy aõhebo risỹnyire.

²⁵ Inaubiõwa hãwyy retehemy rỹimyhỹ Jesuisi itxeõnihikỹ iõhõmy. Jesuisise taseriõre-wana, Marie Madalena ijõre, Klopa hãwyy ijõre. ²⁶ Jesuisi tadimy robireu, Joaõ, taerydỹỹna luunadu bire-ki, tahe rarybere: —Nadi beteheke wa kowa ariõre rare. ²⁷ Tahe Joaõ-ò rarybere: —Kaa adi rare. Ierydỹỹna Joaõ tahe ridyre taheto-ò tai rasỹnykemy.

²⁸ Jesuisi tahe rieryre ibutumy rexihuramy tahe rarybere: —Ariõkemy watzirerí. Kaimy heka rarybere aõbo Ritidỹỹna-ki roire riwinykemy. ²⁹ Tai tahe vỹi mona silỹnyhỹkỹ-ki raharenyire. Tahe Jesuisi-ò iwereheni wese-ò rituunymy idi riteõnyre iry-ò teõdimy. ³⁰ Jesuisi tuu riõre idi tahe rarybere: —Ibutumy Waha aõmysỹdỹỹna rexihumy roire. Tahe rõtiorõmy resere iule ta rurure.

³¹ Kia sabadotxu heka worana bedehesitxu nihikỹõ rare, brebuna rare. Tai tahe hãbu rubu itxeõ-ki ririkõkemy tuu rarybemyhỹre. Tai Pilato-ò judeu mahãdu rexitõenyre hãbuti riõrõmy riteõnykemy, itxeõ-ribi ritakemy. ³² Tahe soldado mahãdu hãbuti wiõle riorore. ³³ Jesuisi tahe rurumy roireki iti riõrõõre. ³⁴ Soldadoõ tahe Jesuisi-ki rojyre iweki tahe hãlubule rohonyre bewana. ³⁵ Kia tuu rabire tahe õbitimy tuu jiarỹ rarybere, Joaõ wahe. Waritidỹỹna inatyhy raremy, reeryre. Kaiboho bityhynybenykemy, adireny watzirerí. ³⁶ Kaheka ibutumy iritina hetxina tuu rarybere heka ibutumy tuu rotỹỹre. Kia wesemy roire: —Iti riõrõõkre, sohoji aõkõ. ³⁷ Ijõ iritinaõ kawesemy roire:

—Riorenkyre tõnori-di idi reteherenykre tamy.

³⁸ Jyje heka Arimatea hãwã luduõ rare. Idi tahe tii Pilato-ò rexitõenyre Jesuisi umymy rituunykremy. Tii heka Jesuisi heluduõ rare. Judeu mahãdu lau ruberumyhỹ tai Pilato-ò rare wasimy. ³⁹ Pilato tahe awiremy rarybere. Tahe Jesuisi umy riwyre. Nikodema tule rare Jyje-wana. Tii juhule rummy Jesuisi-wana widee raryberele rare. Tii õwõrutyby õwõruõbru-wana aderõna wesemy diwyde sõwemy, 45 urihixinamy riutxienanyire. ⁴⁰ Tahe Jesuisi umy tyky jurarehe-wana ritỹtenyire aderõna wanahyyle. Kawesemy dori judeu mahãdu iny rituunymyhỹre. ⁴¹ Itxeõalamana-ribi bederaty oworu iõhõmy roire. Ityi-ki tahe wabede tamyra roire. Mana hãloo rỹire tai heka moo rawabedenyõhyire. ⁴² Tai tahe

rawabedenyre iòhòreki, tule judeu worana bedehesina txumy roireki.

20

¹ Semana juhu ludu txu Marie Madalena rehemynyre wabede-ò, rudile wahe. Mana ijòtòbòna iraylemy rÿiremy idi retehere. ² Tahe raijaranyre Simaõ Pedro-ò, ijõ Jesuisi luu-naduõ wahe, Joaõ-ò, jiarÿle wahe. Tahe wadeereny rarybere: —Wahĩ tahe hãlòkowoku-ribi ritakarenyra. Titxibo ritidira, rekerykõre. ³ Pedro tahe ròhònyre, Joaõ-wana wabede-ò roire. ⁴ Wiwana raijaranyre tahe jiarÿ Pedro ratyre raijaranyre tamy. Jiarÿle heka juhu tamy rehemynyre. ⁵ Tahe rawebesere iwo-ò itxeremy. Irahanalemy rabire. Ta ralòõhyyre tamy. ⁶ Idi Pedro rehemynyre ralore tamy. Tule irahanamy robire. ⁷ Jesuisi rati rasirahana rihitxinyroire xiwana. ⁸ Tahe jiarÿ juhu rehemynyre tahe Pedro hewomy ralore. Tuu robire, retyhynyre. ⁹ Tiiboho dori ritina rieryrenyre ihãre tahe rierytyhykõlerenyre. Jesuisi rubu-ribi rexiixixanykemy ritina roire. Tii tahe rierytyhykõlerenyre. Tahe wiji rieryrenyra. ¹⁰ Tahe ixbyba raòkeserenyre inyhetoreny-ò.

¹¹⁻¹² Marie tahe robumy wabede-ribi iòhòmy rÿire. Rawebesere tahe wabedewo-ò itxeremy. Inatxi ÿjumy robire iwo-ki itykyuramy roimyhÿ. Ijõ heka rÿmy rononymhÿ Jesuisi ratiherina tyre-ki. Ijõ tahe iwaherina-ki rononymhÿ. Jesuisi umy tahe iõre. ¹³ Tahe ÿju Marie-ò rÿÿraxire: —Hãwyy, aõherekibo tabureri. Rirawyõnyre: —Wahĩ kumy dokuri riwumy ramyhÿre. Rekerykõre titxibo ritidira. ¹⁴ Iu rarybereu tahe tahewoòle roosere. Jesuisimy robire rÿimyhÿò. Tii heka rieryõhyyimyhÿ tii Jesuisi raremy. ¹⁵ Tahe Jesuisi rÿÿraxire: —Hãwyy aõmybo tabuteri, mobo teijeteri. Bederaty oworu ywidÿÿdu raremy heka tii ròhòtynyre: —Tahe dirawyõnyde: —Wahĩ, kai anobo karibi tetakata-wana wakoku tuu belykyke. Tahe jikarÿ karikorykremy. ¹⁶ Tahe Jesuisi tamy ryryre: —Marie! Marie rokesemy reare riijemy: —Wahĩ, erydÿkÿdu! (Tii hebraika rybe tuu rarybere: —Raboni, wahe.) ¹⁷ Jesuisi rarybere tamy: —Waroorehedÿÿõmyke wa. Waha-ò dori raòlemy wãhãre tahe arakre. Kai tyhydÿÿdu seriòre-ò makre tamy rybemy. Jesuisi rarybere kawesemy: —Arakre inytybyreny-ò, iny Deuxureny-ò. ¹⁸ Idi tahe rarybere erydÿÿna mahãdu-ò Wanyrÿmy rabira. Marie Madalena relyyre timybo raryberamy.

¹⁹ Semana juhu ludu txuu, txioromy heka Jesuisi erydÿÿna mahãdu wii ributunymy rÿimyhÿ hetowoò-ki. Ibutumy ijò ritòbòtòbònyra judeu mahãdu lau brebumy. Jesuisi tahe nade iyreny-ò rexitÿnynyre. Rarybere: —Ywina

araykywo-ki atxikemy idi watxireri. ²⁰ Kia rarybereu tahe tebò rurena riteòsinyre, tawerurena tule riteòsinyre tamy. Iule tahe reysarenyre Jesusimy robireki wahe. ²¹ Ixyby tamy Jesuisi rarybere: —Ywina araykywo-ki rarekemy idi watxireri. Iwese Waha diwateònyde wese tule arateònykre. ²² Iu tahe ribunymy rarybere: —Deuxu Tyytybytyhy teta-teri. ²³ Inyòrarunaò biixãwididỹnykeki tule kia òraruna ari-ixãwidinyke. Tule aòkòkeki, ijò òraruna biixãwididỹnyòkeki, kia tule ariixãwididỹnyòke.

²⁴ Tome (Inatxina iniòre) tii waòinatxi reurò mahãduò rare, tahe tairenyòre heka Jesuisi nadeu. ²⁵ Jesuisi erydỹnaò rarybere: —Wanyrỹmy rabirenyra. Tahe Tome tamyreny rarybere: —Retyhynyòre kỹnyhe.

²⁶ Semana sohoji bededỹnanamy idi rỹire, ixyby wii ributunyre Jesuisi erydỹna mahãdu. Iu tahe Tome tii mahãdu-wana ratximyhỹ. Ijò ritòbòtòbònymy rỹimyhỹ. Tahe Jesuisi nade iyreny-ò. Tamyreny rarybere: —Ywina-di araykywo-ki atxikemy idi watxireri. ²⁷ Tahe Jesuisi Tome-ò rarybere: —Betehe inihe wadebòrurena-ò ebò inihe tamy biditidike. Tule wawerurena-ò ebò biditidikre. Itxiòdỹòmyke wa, bityhynyke. ²⁸ Tome tai dirawyònyde: —Wanyrỹ, waDeuxu. ²⁹ Tahe Jesuisi rarybere: —Tome, kai aòbo biwatyhynykre wamy tabiterikile. Sòwemy deysana inyò kanakemy wãhãre tiiboho dori wamy robiòre hãrele riwatyhynyrenyre.

³⁰ Jesuisi heka sòwemy aòwiihikỹbo riwinyre. Ierydỹna mahãdu heka kia aòmybo robire. Kia aòmydỹnana heka ihoòre kaki iritina-ki. ³¹ Kaa ritidỹna reritinyre Jesuisi Kristumy rare. Deuxu deòdỹna rare. Kia bityhynybenykemy wahe, Deuxu Riòre wahe tetyhynyteri-wana tahe umyuedeòna bitakre, ini òraru-ki wahe.

21

¹ Iribi tahe Jesuisi rexitỹnynyre Tiberiade ahohokỹ ijà-ki. Kia wesemyre heka. ² Ibutumy heka juhu rỹimyhỹ: —Simaò Pedro, Tome Didimo iniòre, Natanaeli. Tii Kana hãwã ludu rare, Kalileia bedeki. Zebedeu riòreboho ijòre, inatxi Jesuisi ierydỹnaò ijòre. Rarekie. ³ Tahe Simaò Pedro rarybere tamyreny: —Rià teredỹmy arakre. Imahãdu rarybere: —Jiarỹboho aroirenykre ahemy. Tahe roirenyre hãwò-di. Aòhomy aòkò ruu idireny nade. ⁴ Tahe bedeki ratỹnyrau heki Jesuisi ãnyrakile ratximyhỹ. Ierydỹna mahãdu tahe rieryòhyymyhỹre. ⁵ Jesuisi ryryre tamyreny rỹraxyre: —Ijoi moò rokoreny. Utura aòbo temytenyta? Rirawyònyre: —Aòkòre wa. ⁶ Kaiboho biterebenyke rurunawe-ribi taita

bimybenykre. Tahe riterenyre sôwemy rautxienyre irià heka ritusinyôhyymhÿrenyre utura sôwereki. ⁷ Kia ierydÿÿnaô Jesuisi luunaduô rare jiarÿ, Joaô wahe. Jiarÿ tahe Pedro-ò rarybere: –Inynyrÿle wa rare. Pedro Jesuisi raramy roholareu, tatyky tawetyamy ritaamy tamy resere, tade hekÿlemy rareki. Tahe resere bera-txi tamy rakremy. ⁸ Ijoi mahâdu rià-di narurunymy nade utura sôwereki. Tahe 100 urihixinamy ÿnyra-ribi ratximyhÿreny. ⁹ ÿnyra-ò rejuxunyreu tahe, ro-birenyre heòtymy obiurawo-ki. Orotxu tule tai rÿire. ¹⁰ Jesuisi tamy rarybere: –Uturaô bidiwybedenyke wiji temytenytaô. Simaô Pedro hâwororable rià-di rarurunyre. Sôwemy heka tai utura nihikÿ rÿimyhÿ, 153 wahe. Ihâre tahe rià raòròðhyyre. ¹¹ Tahe Jesuisi rarybere: –Manake hewa biroxibenyke. ¹² Ibutumy ierydÿÿna mahâdu rieryre tii inynyrÿreny raremy. Tai tahe inyô rÿÿraxiôhyyre: –Mobo tii raremy. ¹³ Tahe Jesuisi orotxu rimyre. Tamy riwahinyre. Ixiyrubule utura tamy riwahinyre. ¹⁴ Kia tahe ihewotyhyimy Jesuisi rexideòsinyre taerydÿÿna mahâdu-ò, rubu-ribi dexixade hewomy wahe.

¹⁵ Riroximy rahudi tahe Jesuisi Pedro-ò rÿÿraxire: –Simaô, Joaô riôre, kahâbu mahâdu waluure. Kai tahe iratyre aôbo waluure. Tii rirawyònyre: –Kai tiwaeryte, aluure. Tahe Jesuisi rarybere: –Wabudoeni riôre bidiòwenyke. ¹⁶ Ixityre rÿÿraxire: –Simaô, Joaô riôre, kai aôbo waluure. Tahe Pedro rirawyònyre: –Kohe, Wanyrÿ aluure jiarÿ, tiwaeryta. Tahe Jesuisi rarybere: –Bidyke wabudoeni biòwenykemy. ¹⁷ Ihewotyhyimy tahe Jesuisi rÿÿraxire: –Simaô, Joaô riôre, kai aôbo waluure. Iu tahe Pedro rabadewomy ronyre, ixityremy rÿÿraxireki. Tahe dirawyònyde: –Wanyrÿ, ibutumy teeryte aôna aôna. Aluure heka, tiwaeryta. Tahe Jesuisi rarybere: Wabudoeni biòwenyke. ¹⁸ Inatyhyimy adee ararybekre. Iu ijoi morôkômy tatemahâu, ixiwanale texityynmahâte ix-idee wimy titxibo tamahâte. Iu tahe mamatuarinykre in-ywitxira aratyynykre, Ebò biteòsinykre iny arataataanykre tahe inyô aradykre titxibo noderamy beakreò. ¹⁹ Kiamy heka Jesuisi rarybere ritÿnynykremy timybo Pedro rubu-ò rÿikremy. Tai Deuxu riwowydynykre. Idi tahe Jesuisi rarybere: –Biwaheludunyke wa. ²⁰ Tahe Pedro retehere Joaô Jesuisi hemy rareriô, Joaô Jesuisi luumy raremyhÿ. Joaô ihetxiu Jesuisi-ò iòhòmy rÿÿraxire jiarÿ wahe: –Mobo iwahisidÿÿdukremy, ihewo ludu roxina rÿireu. ²¹ Tahe Pedro Joaômy robireu, rÿÿraxire Jesuisi-ò Joaômy. Aôbo he tamy rotÿÿnykre. ²² Tahe Jesuisi rirawyònyre: –Tii rurukôlemy adòòsekemy idi watzikeki, timybo tahòtinyinete. Adee tahe bi-waheludunyekile awike. ²³ Ierydÿÿna mahâdu rarybemy raremyhÿ: –Kiamy wahe Joaô rurukôlemy Jesuisi rarybere.

Tahe kiamy aõkõ Jesuisi rarybere. Jesuisi juhUU rarybere: – Tii rURUKõõle adoosekre-wana, timybo tahõtinytenyteri.

²⁴ Jiarỹ tahe kia aõmydỹỹnanamy relyymahãre, Joaõ wahe, reritinyamahãre. Inatyhymy kia tuu rare, jiarỹ tuu relyymahãre.

²⁵ Sõwemy aõmydỹỹnanamy tahe Jesuisi riwinyre. Inyõ ibutumy riritinykeki, iritina heka bedede ritỹxinykre tyyrity sõwekre-wana.

Aõhebo Rotÿÿnyre

Aõhebo Rotÿÿnyre Jesuisi Erydÿÿna Mahãdu

1 Juhuu adee ratyritinyreu, Teòfilo, relyyre ibutumy Jesuisi aõbo riwinyré, aõmybo bede rierynanyrémy. ² Deuxu Tyytybytyhy bede erydÿÿnamy taerydÿÿna woludu mahãdu rierynanyre. Tahe taerydÿÿna mahãdu-ò bede ywina riwahinyre. Iribi tahe Jesuisi ròòsere biu-ò. Kia ibutumy juhUU adee relyyre. ³ Iribi itxeònihikÿ-ki rurureu, taerydÿÿna woludu mahãdu-ò rexitÿnynyre hãbu irudilemy. Tamyreny rexideòsinyre sõwetxu-di rulemy ratximyhÿmy. Inatyhy wa warybetyhy rare, tamyreny rarybere. Rexitÿnynyreu, tamyreny rierynanyre Deuxu Iòlònamy. Txuõ txuõlemy iny inatxiwaitue txumy rierynanyhÿre. ⁴ Tiiboho-wana riroximy raremyhÿu, Jesuisi tamyreny rarybere: –Uritere Jerusalë-ribi ixitarasarenyõmy. Urile Deuxu Tyytybytyhy awo-ò kanakre xiery, Jerusalë-ribi boibenyke. Deuxu rarybere Tatytybytyhy kiditeònykremy. Tule juhUU Jesuisi kia rarybere. ⁵ Deuxu Tyytybytyhy aworeny-ò kanalokre. Kia ratisebenaõ wesele rare, Deuxu Tyytybytyhy ratisebena. Iwese Joaõ juhUU bero-ki iny risebenyrene wese, kia rare. Kia-txu tahe, iòhòmy roire.

⁶ Tahe, juhUU ibutumy wirotynyrenyreu, Jesuisi dee rÿÿraxirenyre: –Wanyrÿ, kai aõbo wiji iny Iòlòreny bediwahinyleke inywedureny wesemy ixyby ronykemy. ⁷ Tahe Jesuisi dirawyònyde: –Waha-ki ywisidÿÿnatxu doimyhÿde. Tiile rierymyhÿre. Kai aõkõhykre. ⁸ Tahe Deuxu Tyytybytyhy aworeny-ò kanalokre, rurunatyhy arayky-ò bitabenyke. Kia tahe warubu-ribi waixixanamy belyykre ibutumy Jerusalë hãwã mahãdu-ò, Judeia hãwã bede mahãdu-ò, Samaria hãwã bede mahãdu-ò, iribi tahe ibutumy bedekonana bede iny-ò. ⁹ Tarybe rahudi tahe Jesuisi ixihyy rexidimy raòwònyre biu-txi. Iõre biuwetyky-txi. Tiiboho rarirenyre bede-ribi idi reteherenyre. ¹⁰ Idi retehemyhÿ iòtududÿÿtyhymy. Inatxi hãbumy ityy uramy aõwesele rÿimy reamyhÿre hãbu mahãduko-txi. ¹¹ Tahe tiiboho raryberenyre: –Hãbu, Kalileia bede mahãdu, itxereõmahãbenyke. Jesuisi ka ramyramyhÿre biu-ò, Deuxu sÿ-ò. Iwese rarawesele ka ixyby kòdòòsekre.

¹² Jesuisi erydÿÿna mahãdu ratximyhÿrenyrene Oliveira òwòruraty hãwãlò-ki. Tahe dòòsedenyde Jerusalë hãwã-ò. Jerusalë rehe iribi doide sohoji urihixina rehemy rimyõlemy. ¹³ Tahe wii rotynyreny rorukure ixitòedÿÿmy hetoratyawo-ki.

Kahekani-di rirana rarekre tai rÿimyhÿrenyre: Pedro, Joaõ, Txiau, Andre, Filipi, Tome, Bartolomeu, Mateu, ijõ Txiau (tii Afeu riõre rare), Simaõ Zelõte, Judasi (ijõ Txiau iwitxira, kia riõre rare). ¹⁴ Ijõ iny tule tai rononymhÿ, Jesusise, hãwyy ijõ rononymhÿ, Jesuisi seriõre mahãdu tule rorukumyhÿrenyre. Ibutumy rexitõenymyhÿrenyre wiwese wiweselemy rõhõtinyhÿrenyre.

¹⁵⁻¹⁶ Ijõ txubiõwamy 120 inymy wii ributunyre icybyle. Tahe Pedro rÿire kiamy tamyreny rarybere: —Waityhydÿÿdu seriõre mahãdu, iwese Judasi aõhebo rotÿÿnyre wesemy Davi tyritinamy roimyhÿre. Kiamy wahe: —Jesuisi taõluduboho-ò ròhònnyreu, Judasi tiiboho riwiõhenanyre. Iwese ka tyritina-ki roire wesele, inatyhymy ibutumy rotÿÿnyre. ¹⁷ Judasi inybohoõmy raremyhÿ. Tii nieruõ ritare Jesuisi õludu-ribi tamyreny ridyrekì. Tahe kia nieru-di subutebedeõ riwyyre. ¹⁸ Tahe idi Judasi rexibõtõtaara. Idi tahe tasubute bedero-txi taratytihiÿle-ribi resere. Tahe iumy ruare iwona rejuxunyre. ¹⁹ Iribi ijyy heka ibutumy Jerusalẽ mahãdu-ò tuu ijyy rÿire. Tahe kia subutebede rininirenyre hãlubu bederomy. ²⁰ Iòlò Davi kia wese riritinyre tawiunatyriti-ki: —Ixinamy iheto rÿike, inyõ taisÿõmy.

Ijõ:

—Inywitxiraõ teròwmy tai rarekre iaõmysÿdÿÿna rinykremy. ²¹⁻²² Inyõ tahe teròwmy iaõmysÿdÿÿna rinykremy. Tule rikimyyrenyke Jesuisi ixixanamy ijyyduõ inywanahyy rybe ritÿnynykemy. Inyõ Jesuisi sebedÿÿna-di itxereduõ rikimyyrenyke, inyõ tuu robire Jesuisi nonanamy tule rikimyyrenyke. ²³ Tahe inatxi hãbumy ritarenyre: Jyje (Basaba inire) Justu iniõrysna rare, ijõ hãbu tahe Matxia rare. ²⁴ Iribi tahe rexitõenyre: —Kiamy heka Deuxu dee raryberenyre:

Kai Wanynrÿreny, ibutumy inyrayky teeryte, Deuxu.

Biteòsinyke tibo rikitarenykemy.

²⁵ Tii ritÿxinykre ixihyymy ratximyhÿre mahãdu. Judasi deròwmy rarekemy, Judasi dori iny-ribi ròhònnyre taõrarunaõwydÿÿnamy rare aõhõkÿmy rotÿÿnykemy. Tahe rare tiobo rareò. ²⁶ Wyhy raheto lisina wesemy idi rehure. Kiamy heka riwinyre tibo ròtakemy. Matxia tahe iribi ròtare. Tii tahe ralore waòsohoji reurò erydÿÿnaky-txi.

2

¹ Pentecostemy ninadu lisina kia txumy txuu rÿireu, ibutumy iny rorukurenyre tarynanakile. ² Aõwesele biu-ribi wodÿÿõ nade yhynihikÿwesele ibutumy heto-ò ralore tai rorukumyhÿrenyrewo-ò. ³ Heõty helÿÿresi wesemy nade. Iny sohoji sohoji tyre resere. ⁴ Ibutumy iny tykumy heka Deuxu

Tyytybytyhy ralòmÿ rÿire. Ta raryberenyre iwitxira rybemy. Deuxu Tyytybytyhy tamÿ rybe riwahinyre wese tahe raryberenyre.

⁵ Deuxu dee òbitimÿ hãbu mahãdu noduõ rasÿnymÿ raremyhÿ Jerusalẽ hãwã-ki. Judeu mahãduõ ihÿre. Ibutumÿ bede bede hãwã hãwã-ribi nade. ⁶ Kia-ò roholareu, wii ributunÿre ijohonamÿ. Tahe rexieryõhykyre aõmybo rõhõtunÿre tahe widi bede riòtiinÿre iny sohoji sohoji tarybe tarybeòlemÿ roholareki. ⁷ Urile bede riòtiinÿtyhyrenÿre. Tahe raryberenyre deysana-di:

—Betehebenny inÿ, kowa rybedu Kalileia bede ludu mahãdu ratxireri.

⁸ Timykibo inÿ ryberenymÿ rarybereri. Inÿ sohoji sohoji tarybeòle raholareri. ⁹⁻¹⁰ Kaheka inyboho bede bede ludu roire: Partia mahãdu, Media mahãdu, Elaõ mahãdu, tule ka bede ludu mahãdu: Mesopotamia, Judeia, Kapadosia, Ponto, Asia, Frigia, Panfilia, Egito, Libia Sireni-wana iõhõre, Roma hãwã luduõ tule kaki ihÿre. ¹¹ Timybo inÿrybereny witxira witxira-ò inÿ roholarenÿreri. Deuxu rybemy rarybereri ibutumÿ inÿryberenymÿ. Ibutumÿ inyboho: Judeu, Judeuerydÿÿna ityhydÿÿdu, tule Kreta mahãdu, Arabia mahãdu, Deuxu aõmydÿÿnana wihikÿ-ò raholarenÿreri. ¹² Tahe bede riòtiinÿrenÿre. Rieryõrenÿre aõbo rare. Tahe widee rÿÿraxirenÿre inÿ sohoji sohoji-ò aõbo raremy. ¹³ Ijõ tahe tawobinarybe rarybere:

—Tiibohe rururenÿreri, itxÿtemonamÿ riõreri.

¹⁴ Tahe Pedro rÿire waõsohoji erydÿÿna-di, tahe tii rexidenÿrenÿre rarybekemÿ:

—Boholake inihe, ibutumÿ kaibohe, Judeia mahãdu, Jerusalẽ sÿludu-wana —kia bierybenÿkemÿ.

¹⁵ Inÿõ rarybereri itxÿtemonamÿ riõrerimÿ. Tahe inatyhymÿ aõkõ rare. Txuu rati rariarerile heka rudiletÿhyre. ¹⁶ Joel juhuu Deuxu rybeduõ rare. Tii narybede wijitxumÿ. Tahe iwese tii rarybere wesele, wiji ratximÿhÿre. Tii rarybere:

¹⁷ —Kiamÿ Deuxu rarybere:

—Ikonanatu watytybytyhyhykÿ aditeònykre ibutumÿ inÿydee. Ariõrenÿ, hãwÿy hãbu-wana, warybe rierynanykre. Weryrybò tahe matuari-wana rarasinÿtyhykre.

¹⁸ Ibutumÿ wadeòdu-ò, lerÿ, hãbu, ibutuwo-ò Deuxu Tyytybytyhy kanalokre. Tuu raryberenykre, ritÿnÿnyrenÿkre.

¹⁹ Aõ tÿmyra ariteòsinÿkre biu-ki, bede-ki. Hãlubu, heòty, worona-wana rõhònykre.

20 Txuu heka ilybyhykÿlemy relekre. Ahãdu isòhòkÿlemy relekre. Iribi tahe Inynyrÿtxu-ò rehemynykre. Kia txu awimy roikre. Inynyrÿ kòdòhònykre.

21 Kia bedeu, inyõ Inynyrÿnimy rexitòenykeki, tii jiarÿ aritakre iòraru-ribi. Kia Deuxu rybe rare.

22 Judeu mahãdu, Israeli mahãdu, boholabenyke warybe-ò: Deuxu sòwemy aõna aõna wixira wixira-di, bedeòby-di riwahinyre. Inatyhymy Jesuisi Nazare hãwã ludu mahãduõ riteòsinyre. Inatyhymy rare. Kaiboho heka teerytenyete.

23 Kaiboho Jesuisi temyteu, Deuxu juhoo rimykremy rierymyhÿre. Rexierymy ròhòtynyre kawesemy bede roimy rarekre. Kaiboho Jesuisi terubunyenye. Kaiboho itxeò nihikÿ-ki tetamadÿÿnytenyete hãbubina debòreny-di. 24 Tahe Deuxu ritare rubu-ribi riixixadÿÿnyre. Wabede Deuxu ribòhònyre. Iribi Jesuisi riòlòdÿÿnyre. Rubu heto tii rimyòtyhy.

25 Davi juhoo rarybere iwese Jesuisi rarybekremy:

—Wanyrÿ wawana ratxireri, brebu-di watxiòkre. Tii riwawiòhenanymyhyre. Tai wawo deysana-di ritÿxinymyhyre.

26 Wadòròtò wowydyna tamy rewahinymyhyre. Reeryre ibutumy rubuhetowo-ki awityhymy wãhãré, iribi dori aròhònykre.

27 Kai watyytyby teriòte rubuheto-ki. Jiarÿ ariòre òbitityhy rare, tai waumyde rasunyòtyhy.

28 Kai tiwaeryte ibutumy umytÿmyra aõmydÿÿnana awana aratzikreu, deysana-di tÿximy biwasÿnykre.

[Kia ibutumy Jesuisi rarybekremy Davi rarybere.] 29 Pedro ijõ rarybemyhyre: —Tahe kiamy heka mohòtynybenyke, Waseriòreboho. Davi heka aõ iximy aõkõ rarybereri. Tii tahe hãloowo-ò roire. Itityby heka kakile iny-wana ihÿre.

30 Tahe Davi Inynyrÿ deròwymy rybeduõ raremyhÿ. Deuxu inatyhyna rybe-di Davi-ò narybede. Kia tahe: Iriòre riòreõ bede dinodumy kodonykremy taiòlò ryna-ki. Kia iòlò Davi rieryre. 31 Davi tahe Kristu ixixanamy juhoo narybede. Kristu umy dori rubu-ki rariòhÿyre. Iumyde rarònyðre.

32 Jesuisi Kristu, Deuxu riixixanyre. Ibutumy inyboho tuu robirenyre. 33 Jesuisi ronymyhyre Deuxu rurunawe-ribi. Iwese rarybere wese Deuxu Tatytybytyhy tamy diteònyde. Tii adee diwyde. Kiamy tahe wiji tabitenyteri, taholatenyteri.

34 Davi raòwònyðre biu-ò. Tahe kiamy rarybere:

Deuxu rarybere Inynyrÿ-ò:

—Bodonyke katxi warurunawe-ribi.

35 Aòludu awarawo-ki arisÿnykre. Aòludu-di arehukre.

Kiamy tahe Deuxu Jesuisi-ò rarybere. ³⁶ Boholake judeu mahãdu. Kaa inatyhy hyy rare. Itxeònihikÿ-ki Jesuisi terubun-tyentye. Deuxu tahe Jesuisi ritidire ibutu-ò wedumy, ibutu-ò Kristumy, aõma, Deuxu deòdÿÿna.

³⁷ Tahe Pedro rybe-ki urile røhõtinyrenyre. Tai tahe Pedro-ò ijø erydÿÿna-ò rÿÿraxirenyre:

—Waseriøreboho, aõhebo rokotÿÿnyrenykre.

³⁸ Tahe Pedro dirawyònyde: —Bøøsebenyke aòrarureny-ribi ixyby Deuxu-ò. Idi tahe Jesuisini-di maratysebekemy aòraru ritakemy. Tai bimykre Deuxu Tyytybytyhy wahidÿÿna wese-my awo-ki rarekremy. ³⁹ Kristu juhuu rarybere:

—Ibutumy heka Deuxu Tyytybytyhy bimybennykre, ariøre rimykre, iny hãwã wixira ludu rimyke. Ibutumy Deuxu dee wimy tahe rimykre.

⁴⁰ Pedro relyummy raremyhÿ. Tamyreny rarybere tarasamy roikemy:

—Iny bina binahakÿ-ribi bexitabenykre.

⁴¹ Kia rityhynyré heka tahe ratisebedumy roiremyhÿ. Ralore kiatxuu 3000 iny iøhømy Jesuisi tyhydÿÿdu mahãdu-ò. ⁴² Tahe Jesuisi erydÿÿna mahãdu rierynanymyhyre, wii ributunymy roiremyhÿ, paø rioroororenyre wideereny: rexitøenymy roiremyhÿ.

⁴³ Iny sohoji sohoji bede riòtiinymy rabrebumy hitxinymyhyre. Jesuisi erydÿÿna mahãdu bedeòby søwemy riwinymyhyre. Aõna aõna wiwihikÿmy riwinymyhyre.

⁴⁴ Ibutumy rityhynymyhyre mahãdu, søwemy wii riwiutyre. Ibutumy aõna aõna wimy riywinyre. ⁴⁵ Taaømydÿÿna,

tasu-wana idi rohonyre. Wimy tahe ritxuatxua. Ibutumy ityhydÿÿdu iaøkø mahãdu dee riwahiriwahinyre. Inyø aõna aõna rauhenykeki, tamy riwahinyre. ⁴⁶ Deuxu dohodÿÿna heto-ki txuø txuølemy wii ributunyre. Tahe tota hetomy paø riyreriyrenyre. Riroxirenyre ibutumy teysarenymy wii wese røhõtinyrenyre. ⁴⁷ Tuu reàlarenyre Deuxumy. Ibutumy iny hãwãhãkÿ mahãdu awimy tai raharenyre. Deuxu rimyre txuø txuø lemy ralore mahãdu kia ritakemy.

3

¹ Pedro, Joaø-wana rare Deuxu dohodÿÿna heto-ò rexitøenykemy, inataø øra bedeu. ² Deuxu dohodÿÿna heto ijø inyø rininire, ijø ruxerahakÿ. Txuø txuølemy hãbu tibina ridyhyhyymy iny tamy reamyhyre. Tamy iny ralømyhÿkeò tamy nierumy rexitøenykemy. Tii tuu hyy uladumy reareu ihyy itibinare. ³ Pedroboho rirønyrenyre, hãbu tibina tuurenre robire. Nierumy tahe tamyreny rexitøenyre. ⁴ Pedro juhu tamy retehere idi rarybere:

—Bedeteheke wadireny.

⁵Tai hãbu retehemy ronyre, nieruõ iribi riwykemy rõhõtinyre.

⁶Pedro rarybere:

—Aõ ijõkõre, womati tÿrÿrÿhÿkÿ ijõkõ, pratakõ. Tahe aõbo idi watzixerile ta adee ariwahinykre. Jesuisi Nazare hãwãludunimy adee ararybekremy idi mariakremy. Kia deytena adee ariwahinykre.

⁷Pedro, hãbu debò rimymy ritamadÿÿnyre. Aõwesele iruru iti-ò ralore. ⁸Hãbu rexiwatzinymy tahe, ririradÿÿnyre. Ihyy ralore dohodÿÿna heto-ò. Deuxu dee deysamy rexiwatzinymy ralore. ⁹Ibutumy iny idi retehere rariarerimy, Deuxumy reàlãrerimy. ¹⁰Inyõ rarybere: —Tii ijõ ruxerahakÿ-ki nierumy rexitõenymyhÿremy, inyboho tii reeryreny. Tai tahe idi bede riõtiniyreri timykibo aõna aõnamy rotÿÿnyramy.

¹¹Hãbu ta Pedro, Joaõboho werora-ki xiery. Idi tahe ibutumy ributunyre Salomaõ heto ijõ ahanawo-ò. ¹²Pedro kia robireu tahe, tamy rarybere: —Judeu mahãdu, wadireny itxereõmy, bededÿÿnyre. Jiarÿboho inyruru-di aõkõ ka hãbu reteytenyreny, Deuxu rurudile wahe. ¹³Abraõ, Ijai, Ijaõ kiaboho Deuxu heka hãbu riteyteny. Tybyreny Deuxu kia heka riwinyra. Deuxu, Kristunimy riwowodynyre, rubu-ribi riixixanyraki. Kaiboho tahe Jesuisi Kristu tedyteny Pilato-ò. Pilato tii riteðnykemy ratxireriu, kaiboho tamy rarybere: —Aõkõre, tii deðdÿÿnyre. Ijõ biteðnyke. Tai tahe rubudÿÿduõ riteðnyre. ¹⁴Jesuisi òraru widÿÿdu aõkõ rarehyymy raremyhÿ, ityhydÿÿdu ihÿre, òbiti widÿÿdu ihÿre. Kaiboho tii tetxiðnyteny, tewahinyteny. ¹⁵Umytuedeõna wahidÿÿdu tii rare. Kaiboho tahe terubunyenye. Deuxu tahe tii riixixanyre rubu-ribi. Inyboho ierydu, iitxeredu ratximyhÿreny. ¹⁶Rityhynyrekile hãbu tibina reytemyhÿre. Kia hãbu teeryteny. Jesuisini tyhyna kia riwinyre. Hãbu ibuturu-ò reytera, tai òbitimy raramy ratximyhÿre. ¹⁷Jiarÿ reeryre kaiboho teeryõte aõbo tewinytemy. Tule adinodu rierykõlemy kia riwinyre. ¹⁸Tahe Deuxu tarybe riwahinyre ihetxiu rybedu mahãdu-ò kia wahe tii rarybere Jesuisi rurukremy. Idi tahe irybe uludumy Jesuisi rurure. Iwese Deuxu rarybere wesemy heka irybe uludumy rõhõnyre. ¹⁹Kaiboho ixi-txi õhõti reakemy Deuxu-ò biððsekemy. Tai tahe aòraru aribi tii ritakre. Inynyrÿ adeereny kiditeðnyke aõwihikÿmy Deuxu-ribi, biu-ribi. ²⁰Jesuisi Kristu wijityhyle kanaõkre. Aõna aõna juhu rÿimy rareke rexihudi, tahe kanakre. ²¹Tii biukile rarekre wiji. Ijõ bede tÿmyra wihikÿkre iõhõmy rahudi tahe kanakre. Kia bededÿÿnanau tahe rarybere ihetxiu rybedu mahãdu. ²²Tahe Moisesi ijõmy rary-

bere: –Deuxu rybeduõ kedelekre asÿ, aijoi-ribi tii rarekre. Iwese Deuxu riwatare wese rybeduõmy ararekremy, iwesele tii Inynyrÿ kiditakre. Tamy bohobanykre irybe aõmybo kanarybekremy. ²³ Kia, Deuxu rybedu rybe-ò inyõ roholakõkre-wana, Deuxu tii kanahukre. Kia Moisesi rybe rare, Pedro rarybere. ²⁴ Deuxu rybedu sõwemy kia bededÿÿnanamy rarybere. Samueli juhoo rarybere. Idi sõwemy ijõ kiamy rarybere. Ihyemy ta wiji kabededÿÿnana roimyhÿre. ²⁵ Kaiboho Deuxu ihetxiu rybedu roire atximahãtenyteri Deuxu juhoo rarybere Abraõ-ò. Ariõre-ribi iny sõwemy ruaruakre. Kia ibutumy ariõre hãwã hãwã-ki rasÿnykre. Kia iny-ribi inyõ rõhõnykre ibutumy iny wiõhedÿÿdumy rarekre. ²⁶ Deuxu tariõre Jesuisi adeeremy riteõnyre aõraru-ribi arahitxinykemy, arawìõhenanykemy. Kia tahe Pedro tamyreny rarybere.

4

¹ Pedroboho tamyreny rarybereu, tamyreny rehemynyre Deuxu heto dohodÿÿna mahãduõ, ijõ tahe kia heto itxeredu dinoduõ, ijõ, saduseu mahãduõ. Inataõ ijoi tamy rehemynyre. ² Pedro, Joaõ-wana iny-ò relymy raremyhÿ: –Inyõ Jesuisimy rityhynykeki, tii tule rubu-ribi riixixanykre. Jesuisi dori riixixanyre. Tahe Jesuisi ixixanamy tiiboho relymyhÿreki, kia hãbu mahãdu riykaranyreny. ³ Taita rimyre, Pedro, Joaõ-wana. Rõtëna-ò ridyre. Wijile tahe tamy ixidee roholaõreny, txiorotyhyreki. Biurasou tahe roholakremy riòlòdÿÿnykre. ⁴ Iny sõwemy Deuxu rybe-ò kia txuu roholare. 5000 hãbumy, ijõ iny tule. Tiiboho Pedroboho-ò roholare. Tahe sõwemy rityhynyreny.

⁵ Itxu biõwamy tahe Jerusalẽ-ò rehemynyre dinodu mahãdu, matuari mahãdu, judeu bede ywina erydÿÿna mahãdu. Kia ijoi mahãdu ibutumy rehemynyre. ⁶ Anasi tule rehemynyre. Deuxu-ò xiwena wahidÿÿdu mahãdu wedu tii ratximyhÿre. Tule Kaifa ijõ, Joaõ ijõ, Alexÿdre ijõre. Anasi sÿ mahãdu tule ijõre. ⁷ Tahe dinodu mahãduõ Pedroboho ritamadÿÿnyre ibutu kia mahãdu koò. Tahe ritÿÿraxinyre: –Aõrurudibo iny teteytedÿÿnymahãte. Monidibo kia tewinyteny. ⁸ Ta Pedro tykemy heka Deuxu Tytybytyhy ralore. Idi tamyreny rarybere: –Iny dinodu mahãdu, matuari mahãdu, adeeremy ararybekre. ⁹ Hãbu tibina aõmydÿÿnanamy tiwatÿÿraxinyte-wana, adeeremy kiamy arirawyõnykre. ¹⁰ Jesuisi Kristu Nazare hãwã luduni-di kia rybe ruru-di rewinyreny. Kia tahe bierybenyke. Kaiboho dorikÿhe Jesuisi itxèò nihikÿ-ò teukotenyte. Deuxu tahe riixixanyre rubu-ribi. Tai tahe ka hãbu reytemy rÿimyhÿre. ¹¹ Jesuisi manaõ wesemy ratxireri. Kia-di rehure heto widÿÿduõ.

Wiji tahe heto idile rÿimyhÿre. Kaiboho Jesuisi-di tehute heto widÿÿdu mana-di rehure wese. Wiji tahe Jesuisi Deuxu heto dinodu rarekre. ¹² Tamy inyõ rityhynyõkeki, òraru-ribi ritaõtyhy. Ijõni aõkõ iny rityhynyke, Jesuisi nile iny rityhynymy rÿikrele, òraru-ribi ritamy rÿirakre.

¹³ Pedro, Joaõ-wana brebuõ-di kia rybe ritÿnynyre. Tai iny bede riõtiinyrenyre, tiiboho dori tyyriti erydu aõkõ roire. Urile Jesuisi-wana roiremyhÿ, kiale iny rieryrenyre. ¹⁴ Hãbumy inyboho robirenyra juhoo itibinamy. Tai tahe inyõ aõbinamy tamyreny rybedu aõkõ rare, hãbu tibina riteytenyrenyraki. ¹⁵ Tahe ibutumy iny dohodÿÿna heto wo-ribi riteõnyre. Tahe wimy rarybere: ¹⁶ –Aõhebo rokotÿÿnyrenyke kia hãbu-di. Inatyhymy tiiboho aõwiihikÿ riwinyrenyre. Kia rikixiõnyrenyõtyhy. Ibutumy Jerusalê hãwã mahãdu kia rieryre. ¹⁷ Tai kiamy rokotÿÿnyke. Tamy rakarybekre tiu Jesuisimy ixyby rybeõmykremy. Tai Jesuisimy rybe-di rikixãwãdidÿÿnykemy. Inyõ-ò kiamy rarybeõtyhy. Kiawese raryberenyre rybe ywidÿÿdu mahãdu. ¹⁸ Idi tahe rarariõnyre Pedro Joaõ-wana tamyreny rarybere: –Jesuisi nime rybeõmy, bibedeerynyõtyhy irybemy. ¹⁹ Tahe Pedro, Joaõ-wana tamyreny dirawyõnyde: –Aõbo awityhyre. Inyboho arybe arityhynyke aõbo ada Deuxu rybe aõbo arityhynyke. ²⁰ Aõbo jiarÿboho rabirenyré, raholarenyré, kialemy araryberenyke. Inyõ riwarybebinanyõtyhy. ²¹ Idi ta ixityre tamyreny raryberenyre, rybedÿÿõkemy. Tahe riteõnyrenyre. Tamy aõwidÿÿõmy rÿimyhÿ hãwã mahãdu dee ruberurenreki. Hãwã mahãdu dori Deuxu reàlãmehÿre hãbu riteytenyraki. ²² Kia hãbu dori 40 beõra ratyremy tabeõra-di ratximyhÿre riteytenyrau.

²³ Pedroboho rexitamy roirenyreu, ityhydÿÿdu seriõre òrysmy roirenyre. Tahe tiiboho tamyreny relyrenyre iwese dohodÿÿna heto wedu matuari mahãdu-wana tamy rarybere wesemy. ²⁴ Tahe wiwese wesele rõhõtinereri wese, Deuxu-ò rexitõnyrenyre: –Kai, Waha, inyIòlõreny atximahãte. ²⁵ Kai, ibutuwidÿÿdu tarybete: Davi, inytybyreny-di tarybete Atytybytyhy tamy ritÿnynyre, iwese tii rarybekemy. Davi eõdumy raremyhÿ. Irybe tyyriti-ki roimyhÿre kiamy: –Judeukõdu mahãdu raykarananyreri. Kia awimy aõkõ ihÿre.

Waijoi aõ õbitinadibo aõkõ rõhõtinereri.

²⁶ Dinodu mahãdu wiributumy Deuxuõludumy rÿikremy. Tule Kristu, kia Deuxu deòdÿÿna òludumy rÿikremy.

²⁷ Arybe-ki, Waha, kia ritidÿÿna roire. Tule Waha, inatyhy rare. Ka hãwã-ki, Herodi, Poncio Pilato, Judeu mahãdu, Judeukõdu mahãdu, kia ibutumy ributumy ariõre Jesuisi òludu rÿirakremy. ²⁸ Tiiboho riwinyre iwese kai tarybete

wese, Waha, kia aõmydÿÿnanamy rÿirakremy. ²⁹ Kai, Waha, teeryte iwese tiiboho raryberemy, aõma, rybeõmykemy. Tahe eõdu biwiõhenanykre arybe-di ihãrele rarybekemy brebuõ-di. ³⁰ Biwiõhenanykre, Waha, eõdu mahãdu, webinadu mahãdu riteytenykemy. Tule aõna aõna wiwihikÿ riwinykremy, Jesuisi, Ariõreni õraru-ki kia riwinykremy. ³¹ Tahe ixitõedÿÿna rexihureu, heto ramytatamy. Deuxu Tyytybytyhy ibutumy iny tykumy ralore. Tai tahe Deuxu rybe rarybemyhÿre. Brebumy aõkõ tiiboho relyymyhÿrenyre.

³² Ityhydÿÿdu mahãdu iaõna aõna-di wii riwiõhenanyre. Inyõ rarybeõhyra: —Kaa wahõrõ sohojile rare. Ibutu aõna aõna ibutu hõrõmy rÿimy raremyhÿ. ³³ Deuxu Jesuisi erydÿÿna mahãdu riwiõhenanytyhyre irybemy relyyrenyre, kia Jesuisi rubu-ribi ixixana rybemy. Deuxu teysana tamy riwahinyre tule iny sõwemy iluurenyre. ³⁴⁻³⁵ Tai tahe ityhydÿÿdu mahãdu aõna aõnamy rasiranyõhyra. Ityhydÿÿduõ ityhymy rÿirakeki, taheto, tasubede rohonyre tahe nieru Jesuisi erydÿÿna mahãdu-õ diwyde. Idi tahe tii ritxuatxuamy riwahinyre ibutu-õ timybo iny sohoji sohoji tuu rurumy rÿiramy.

³⁶⁻³⁷ Jyje tule kiawesele riwinyre. Tasubedeõ-di rohonyre, idi iõwy nieru diwyde Jesuisi erydÿÿna mahãdu-õ. Jesuisi erydÿÿna mahãdu Jyje rininire, Banabemy. Kiani inyrybe-õ riwiurõnanyre, rybe-di wiõhedÿÿdu kiani rare. Tii Levi mahãduõ rare, Xibri bedebutesÿdu tii raremyhÿ.

5

¹ Idi tahe tule ijõ hãbu, Anania ninadu, tahãwyy Safira-wana tasubederenyõ-di rohonyrenyre. ² Iõwy tahe txuralemymy diwyde Jesuisi erydÿÿna mahãdu-õ tasubede õwyrany ibutumy risÿnyrenyteri. ³ Tahe Pedro tamy rarybere: —Aõherekibo Satanasi-õ taholamy araykywo-ki atxiteri Deuxu Tyytybytyhy-õ taruiteri. Aõherekibo iõwyjura-di atxiteri. ⁴ Juhuu asubede tahonyõteu, ahõrõ rare. Aõhe, inatyhy? Inyõ adee rarybeõre idi bohonykemy. Idi tahonyteu, tahe, nieru ahõrõ rare, aõhe inatyhy. Aõherekibo aõbinahãkÿmy tahõtinyteri. Hãbu-õ aõkõ heka taruiteri Deuxu dee. ⁵ Kia-õ Anania roholareu, rurulemy resere. Tai ibutumy iny ruberutyhyre. ⁶ Weryrybõ tahe iumy rihetynyre. Tahe ritamadÿÿnymy riwyre rihãloonykremy.

⁷ Inataõ õra bededÿÿnanamy reare tahe Safira, Anania hãwyy rehemynyre. Aõ heka rieryõhyre tahãbu rubuna rieryõhyre. ⁸ Pedro tamy rÿÿraxire: —Tiwesemybo asu teõwynyta —ahãbu rarybere wesele aõbo. Tahe tii dirawyõnyde: —Kohe, iwe-sele rakõwõnyre. ⁹ Ixityre Pedro rarybere: —Aõherekibo

ahãbu-wana kai taruiteri. Tii teurihite aõbo riwinykeò. Beteheke, weryrybò ahãbu loodÿÿ-ribi rehemynyreri. Tule tii aradykre rubumy. ¹⁰ Tule tii aõwesele rurulemy resere. Weryrybò mahãdu ralore. Tai riwyre ritoonykre tahãbu biremy roikremy. ¹¹ Tai tahe ibutumy ityhydÿÿdu mahãdu ruberure. Ibutumy kia-ò roholareu, tule ruberumyhyre.

¹² Jesuisi erydÿÿna mahãdu sõwemy wowydyna aõmydÿÿnana riwinyrenyre. Tule deytenuwihikÿtyhy sõwemy riwinyrenyre. Ityhydÿÿdu mahãdu wii ributunymyhyre Deuxu dohodÿÿna heto ube-ò. Salomaõ ubetyhy inire. ¹³ Kaa hãwã mahãdu dori sõwemy ruberumyhyre Jesuisi erydÿÿna mahãdu-ò wiutadã lau. Tamy rabutuõhyre ijohonamy. Ihãrele tahe ijõ rityhynymyhyre, ityhydÿÿdu mahãdumy ralokemy. Aõbinatyhymy heka inyõ ityhydÿÿdu mahãdu dee raryberenyõhyre. ¹⁴ Ityhydÿÿdu mahãdu rasõwerenymyhyre. Hãbu, hãwyy tule ralomyhyre Inynyrÿtyhy-ò. ¹⁵ Webinadu mahãdu iny ridymyhyre ryò, hãwã hãwã-ribi. Tai Pedro nonana-ki riraõmy roimyyhy byretyre-ki, herina tyre-ki. Pedro ubòrò webinadu-txi reakemy tai riteytenykemy rexinohõtinyre. ¹⁶ Ibutumy Jerusalẽ-ribi iòhõmy rÿira mahãdu nade webinadu-di, tule iny tyytybybina-di didyde. Tai tahe ibutumy reytere.

¹⁷ Xiwenawidÿÿdu wedu mahãdu, Jesuisi erydÿÿna mahãdu-ò rexinaanymyhyre. Tule kiawedu eryna mahãdu riwiõhenanyre. Saduseu imahãdu ni rare. ¹⁸⁻²⁰ Tai tahe xiwe wedu mahãdu, Jesuisi erydÿÿna mahãdu rimyrenyre idi rehurenyre hãwã ròtenawo-ki. Rummy tahe Inynyrÿ ÿjuõ riraynyre ijò, tahe ridyre ahana-ò. Tamyreny rarybere: —Boibenyke Deuxu àlàna heto-ò. Bexideòsinybenyke iny sõwehekÿ-ò. Tamyreny bitÿnynybenyke timybo Jesuisi umytÿmyra inydee riwahnymyhyre. ²¹ Iwese ÿju rarybere wese, txuu ratÿnyreu, dohodÿÿna heto-ò ralomyhyre. Tai rierynarenymyhyre. Tahe xiwena mahãdu wedu dehemynyde, tii-wana ratximyhy-wana. Israeli nohõti juradÿÿdu mahãdu ribitudÿÿnyre. Ibutumy judeu mahãdu, matuari mahãdu bedeerytyhy mahãduõ rare. Tahe soldado itxeredu-ò riteõnyre ròtena-ò iòrysyrenymy. ²²⁻²³ Tahe roirenyre. Ròtena-ki tai rahaõre. Ròsere tamy relyyre: —Ròtena-ò rehemynyra. Txiòtòbòhòkÿlemy rÿire. Tahe reraynyreu, aõho aõkõ rare. ²⁴ Dohodÿÿna wedu xiwena wedu-wana kia roholareu, tiiboho rexieryrenyõhyre aõbo riwinyrenykemy, aõhebo rotÿÿnyrenykremy. ²⁵ Iwesemy ròhõtinerikõnalemy, inyõ dehemynyde. Tai rarybere: —Ròtena-ki tetidite mahãduõ, dohodÿÿna heto-ki ratxireri. Iny kowa ritohonyreri. ²⁶ Tai tahe soldado dinodu,

soldado itxeredu-wana riòryre ta didydenyde ywilemy. Tamy heka aõhe risÿnyõhyyre mana huna-di tamyreny kedehukemy heka soldado rõhõtinyre. ²⁷⁻²⁸ Tahe dehemynyde ritamadÿÿnyre inysõwe weduko-txi. Tahe wedutyhy rybe riteleny: —Jiarÿboho heka juhu adeereny rarybere uritere Jesuisi nimy bede erydÿÿrenyõmykremy. Ihãrele tahe tuu tebedeerynytenyta ibutumy Jerusalẽ hãwã iny-ò. Ibutu-ò aeryna-di tariate. Wamy tarybetenyteri jiarÿboho Jesuisi rerubunyrenyramy. ²⁹ Tahe Pedro tajoi-wana rarybere: —Iwese Deuxu wadeereny rarybere wese, arityhynyrenykre. Hãbuõ iwitxiramy wadeereny rarybekeki, tiu arityhynyõtyhy. ³⁰ Kaiboho inatyhymy Jesuisi terubunytenynte. Òwòru nihikÿ itxe-ò tetamadÿÿnytenynte. Inytyby Deuxu tahe rubu-ribi riixixadÿÿnyre. ³¹ Deuxu tarurunawe-ribi debò-di biu-ò ritamadÿÿnyre ibutu iòlòmy rarekemy, ibutu tarasadumy rarekemy. Tai ibutu Israeli ijoi mahãdu-ò òraru bedewona ixãwina riwahinykemy. ³² Inyboho heka kia aõmydÿÿnamy robimyhÿreny, tai heka reerymahãreny inatyhy raremy. Inyõ Deuxu rityhykeki, tii Tatytybytyhy tamy kidiwahinyke. Tii tule kia aõmydÿÿnamy rarybemyhÿre.

³³ Xiwena wahidÿÿdu mahãdu wedu tamy roholarenyre, rakyarananyrenyre, irubudÿÿmy idi ratximyhÿ. ³⁴ Tahe fariseu mahãduõ lamamy rÿire. Ònosõna erydÿÿduõ tii ihÿre. Ibutumy iny tii riijemyhÿre rityhynymyhÿreki. Kamalie heka inire. Tahe tii rarybere: —Jesuisi erydÿÿna mahãdu-di biòlònyke urihimyo ahana-ò. ³⁵ Idi tahe tajoi-ò rarybere: —Hãbu, Israeli mahãdu, bexiijebenyke kia hãbu-ò, aõhebo botÿÿnybenykre. ³⁶ Kaiboho dori õhõtireny beabenyke Teudani-txi. Juhuu dori dinoduõmy tii raremyhÿ. Tii ixiòlòdÿÿnihikÿmy iximy rarybere. Sõwemy heka iny tii-wana raremyhÿ tahe 400 hãbumy ihemy rare. Inyõ tahe rirubunyre rityhynymyhÿre mahãdu tahe iribi raubÿtÿre. Tahe aõ heka rimyõhyyre, ibutumy iõre. ³⁷ Iwitxirau ijõ-txi õhõtireny rearenyke. Judasi inire. Tii Kalileia mahãduõ rare. Iu bede dinodu iny-di rariareu tahe, tii rexiòlòdÿÿnyre. Sõwemy iny riheludunyre. Tii tule rurure. Taityhydÿÿdu mahãdu tule raubÿtÿre. ³⁸ Tule wahe kahãbu mahãdu rare ixinamy biteònyke. Hãbu kia aõmydÿÿnana dinodukeki, aõmy aõkõ relekre. ³⁹ Deuxu tahe idinodukeki, tiu heka idi behuõtyhy. Deuxu òludu wesemy heka kai tesumahãte. Tai tahe Kamalie rybe-ò ibutumy rityhynyrenyre. ⁴⁰ Didyde he Jesuisi erydÿÿna. Rihetenyre. Idi tamyreny rarybere: —Rybeõmyke Jesuisi nimy. Tahe ixinamy riteònyre. ⁴¹ Tiibohe iribi rexitarenyre, reysatyhymy ratximyhÿ, Jesuisini òraru-ki dorikÿhe tiibohe aõhõkÿmy rotÿÿnyrenyraki. ⁴² Txuõ txuõlemy

Rybewihikÿ ritÿnynymyhÿrenyre dohodÿÿna hetomy dori, heto hetomy tiiboho rarybehymy rÿimyhÿre: —Jesuisi inatyhymy Kristu rare, Deuxu deòdÿÿnamy nade.

6

¹ Tahe ityhydÿÿdu rasòwetyhynymy rÿiramyhÿ. Iu ityhydÿÿdu wytese mahãdu-ò rÿsÿna riwahinymyhÿreu, grego rybedu rexinaanymyhÿre rÿsÿna wahidÿÿdu mahãdu dee. Judeu mahãdu wytese sòwemy rÿsÿna ritamyhÿrenyre waratyrereny. Kia wesemy heka judeukòdu mahãdu rarybere. ² Jesuisi erydÿÿna waò inatxi reurò mahãdu, ibutumy ityhydÿÿdu didydenyde kia aòmydÿÿnana-ò roholakemy. Tahe raryberenyre: —Deuxu rybe erydÿÿ rikiixãwidinyrenykeki, wytese rÿsÿna ariwahinyrenykemy, kia heka òbiti aòkò rare. ³ Tai tahe kaiboho hãbu mahãduò bitabenyke ayreny-ribi debò inatxi reurò hãbumy bitabenyke. Hãbu tyhydÿÿnale, Deuxu Tyytybytyhy-di tÿximy rÿiralemy, iny bedeeryhykÿle, kiaweselemy hãbu bitake. Tiiboho dori aõna aõna ywisidÿÿdumy roirekre, kiawesemy iaòmysÿdÿÿnarenykre. ⁴ Tai jiarÿboho arexitòenywãhãrenykemy watxiwãhãrenyre. Deuxu rybemy arierynanamahãrenyke. Kiawese Jesuisi erydÿÿna mahãdu rarybere. ⁵ Ibutumy heka tuu raryberé, tamyreny awire. Tai tahe hãbu mahãdu ritarenyre. Estevaò ijõre, tii Deuxu Tyytybytyhy-di tÿximy rÿira, tatyhyna-ki tÿximy rÿira. Filipi ijõre, Prokoro ijõre, Nikanu ijõre, Timaò ijõre, Parmena ijõre, Niolau ijõre, Niolau tahe Atxiòkia mahãdu juhUU rare. Judeu bede erydÿÿna tyhydÿÿdu juhUU tii rare. ⁶ Ityhydÿÿdu mahãdu tiiboho didydenyde Jesuisi erydÿÿna mahãdu-ò. Deuxu-ò rexitòenyrenyre tahe Jesuisi erydÿÿna ityre tebò ritidirenyre.

⁷ Deuxu rybe heka ibutu ijohonanamy rÿire. Ityhydÿÿdu mahãdu-ò sòwetyhymy tamy ralòmyhÿre Jerusalë hãwã-ki. Xi-wena widÿÿdu tule sòwemy Jesuisi rityhynyre.

⁸ Estevaò heka Deuxu luuna sòwemy ratximyhÿre. Sòwemy Deuxu ruru-di ratximyhÿre. Deuxu urihixina nihikÿmy inyko-ò riwinymy raremyhÿ. Aòdeytenawiwihikÿ wesemy tule riwinyre. ⁹ Kowa hãwã-ki tahe judeu dohodÿÿna heto iwitxira rÿimyhÿre. Libertu mahãdumy rexininire tajoi. Imahãduò Sireneu ludu rare, ijõ Alexÿdria hãwã luduò rare. Tiiboho doidenyde Estevaò-wana rybe ritxiònykemy. Silisia bede luduò-ribi, Afia bede luduò-ribi tii-wana doidenyde. ¹⁰ Estevaò rarybere bedeerynihikÿ-di. Kia mahãdu tahe irybe weseõre. Estevaò dori, Deuxu Tyytybytyhy-di ihÿre. ¹¹ Tai tahe hãbuò-ò raryberenyre: —Kaiboho heka Estevaò dee maruibenykre. Jiarÿboho dori araòwynyrenykre. Kawesemy maruibenykre, my: —Jiarÿboho Estevaò rybe-ò

raholamy rãiwãhãrenyre. Tii Deuxumy aõbinahakÿlemy rarybemyhÿre, Moisesimy tule. ¹² Kia-ki heka Estevaõ dee iny raykarananyre, judeu matuari mahãdu tule tamy raykarananyre. Ibutumy Estevaõ òrmysy roirenyre tahe rimyrenyre, ridyrenyre rybe ywisidÿÿna-ò. ¹³⁻¹⁴ Tahe ruidu mahãdu didydenyde. Tahe tiiboho raryberenyre, my: –Ka hãbu heka Deuxu dohodÿÿna hetomy ibinamy narybede. Tii rarybere Jesuisi Nazare ludu iny dohodÿÿna heto kidibòhònykre. Jesuisi iny aõmydÿÿnana kidiwixiranykre, ibutumy Moisesi inydeereny rierynanyre. ¹⁵ Ibutumy iny ywisidÿÿna mahãdu Estevaõ-ò retehere. Iòsana, ÿju òsÿnÿwesehekÿlemy tamy ròhòtinyrenyre.

7

¹ Tahe xiwe wedu Estevaõ-ò rÿÿraxire: –Kia aõbohe inatyhy rare. ² Estevaõ tahe dirawyònyde. Wanyrÿboho, Wahaboho, Ijyymy adeeremy arelyykre. Warybe-ò boholabenyke. Mesopotamia bedeki Deuxu biu-ribi rexitÿnynyre Abraõ-ò, inytybyreny-ò, Harã hãwã-ki rasÿnyòreu. ³ Tamy Deuxu rarybere: –Abede-ribi boibenykre. Alahi riòkòre mahãduy-ribi makre. Manakre ijò bede-ò adee dori asÿbede ariurihikre. ⁴ Iribi tahe Abraõ Kadeu mahãdu bede-ribi roirenyre Harã hãwã-ò tai rasÿnykemy. Iribi tahe tyby rurureu, Deuxu kaò didyde ka bede-ò titxibo kaiboho wiji tasÿnymahãtemy. ⁵ Abraõ-ò sÿò riwahinyòre timy urihimyòòhyy. Tahe idi tamy riwahinykemy, iriòre-ò riwahinykemy Deuxu tamy rarybere. Abraõ iriòreòre, ihãrele Deuxu tusÿmy tamy rarybere. ⁶ Tule Deuxu tamy rarybere: –Ariòkòre ijò bedeki rasÿnykre 400 beòramy. Kowa ariòkòre heka deòdu wesemy raaõmysÿdÿÿkre. Iwedu mahãdu heka ibinamy idi rarekre. ⁷ Jiarÿ tahe iny ariòwynykre, Deuxu rarybere, ibinamy widi rÿira mahãdu. Iribi ka bede-ò kòdòhònykre wamy kaki reàlàmyhÿkemy. ⁸ Idi urihixinaõ Abraõ-ò Deuxu riwahinyre, tòhòti itxi reakemy. Uladu notyyresyna aõmydÿÿnana tamy riwahinyre. Idi tahe Ijai reareu, Abraõ Ijai notyy riorore debò inataõ reurò txu-di. Iribi tahe Ijai tariòre Ijaò ritòtykyorore. Iribi tahe Ijaò tariòre notyky riorore. Tiiboho waò inatximy riòrenaduò roire. Inatyhymy tiiboho inytybyreny rare. ⁹ Idi waòsohoji inytybyreny mahãdu Jyje dee rexiwobinanymyhyre. Idi rohonyre Egito-ò ranyhÿre mahãdu-ò. Tahe Deuxu tii-wana raremyhÿ. ¹⁰ Iaõhòkÿmy dÿÿnana-ribi Deuxu ritamyhÿre. Egito iòlò, Faraòmy ninadu rare. Deuxu heka Jyje luumy Faraò risÿnyre. Faraò rue-ò heka Jyje bedeerydÿÿna sòwemy ratximyhyre. Faraò ibutu dinodumy Jyje risÿnyre. Tule

Iòlòheto-di itxeredu tyhymy Jyje ronyre. ¹¹ Ramamy rubu nihikÿ dehemynyde ibutusu-ò, Egito-ki, Kanaã bedeki. Sõwemy iny aõhõkÿmy rotÿÿnyre. Inytybyreny rÿsÿnaõ-ki rahaõhyyre. ¹² Egito maixõmo rÿimyhÿreò, Ijaò roholare. Tahe inytybyreny riteònyre iòrysmy. ¹³ Idi tahe ixityre iòrysmy riteònyreu, Jyje tamyreny rexideòsinyre. Tai tahe Faraò Jyje sÿmahãdu rieryre. ¹⁴ Tahe tyby-ò Jyje tarybe riwahinyre tamy sÿmy kanakemy ibutu imahãdureny-wana. Tiibohe 75 inymy rimyre ibutumy. ¹⁵ Tai tahe Egito bedeki Ijaòboho roirenyre. Iribi tahe Ijaò rurure. Idi tahe ibutumy inytybyreny rurure. ¹⁶ Tahe iumyreny diwyde ritoonyre wabede-ò, Sikeni hãwã-ò. Abraõ kia wabede juhoo riwyre nieru-di, Emo riòre-ribi. ¹⁷ Deususÿ-õ wahidÿÿna juhoo rarybere Abraõ-ò. Ibededÿÿnana iòhõre Deuxu tamy riwahinykemy. Inyboho Egito-ki rasõwemyhÿreny. ¹⁸ Ikonanau tahe iòlò iwitxiramy ròhònyre Egito bedeki iòlòmy. Tii Jyje rieryõre. ¹⁹ Tii iny ijoi riitxenanyhÿre. Tii heka ibinatyhyre inytybyreny-ò. Uladu-di heto-ribi rehukemy riteònyre. Tai iny riòrereny ituereny. ²⁰⁻²¹ Iu tahe Moisesi reare. Tii uladu ruxeratyhyre. Tii tahetotyhykile raumynyre inataõ ahãdumy idi rÿire. Heto-ribi dòhònydeu, Faraò riòre rimyre itibiedÿÿmy tariòre wesemy. ²² Ibutumy Egito bedeedÿÿnana tamy rierynanyre. Tii heka rexiòlònyre rybedunihikÿmy aõmydÿÿna widÿÿdu nihikÿmy. ²³ Moisesi iny inatxiwa itue beòra-di rÿireu, tamahãdu, Israeli mahãdu roramy nade. ²⁴⁻²⁵ Egito mahãduõ Israeli mahãduõ rihetenyreu, Moisesi tuu robire. Tahe Moisesi tii rirubunyre, Israeli mahãduõ riwiòhenanykemy, Egito mahãduõ rexiòwynymy. Deuxu Moisesi debò-di iny ritakre. Kiamy tahe Moisesi mahãdu rierykremy Moisesi ròhòtinyre. Tahe aõkõre rieryõhyyre. ²⁶ Ijõ txu biòwamy tahe Israeli hãbu inatximy wiwana ròrenymyhÿ. Moisesi ronyre iyreny-txi riixãwididÿÿnykemy. Rarybere: —Kaibohe seriòre toite, aõherekibo wii tetenytenyteri. ²⁷ Kia òhòtedu Moisesi ritorunyre rarybere: —Mobo he wawedurenymy arasÿnyra, awaywisidÿÿdu renymy. ²⁸ Kai biwarubunykekõ aõbo, iwese kau Egito mahãduõ terubunyte wesemy. ²⁹ Kiarybe-ò roholareu, Moisesi rahenyre Midiã bedeki rasÿnykemy. Idi tahe inatxi Moisesi riòremy kowa reare. ³⁰ Iny inatxiwaituemy beòra-di bededÿÿnana riwyre. Tahe Sinai hãwãlò bederahy-ki raremyhÿu, ÿjuõ tamy rexitÿnyre bedeki rade tòbòhòkÿy-ki tamy roomyhÿre. ³¹ Moisesi kiamy dobideu, bedeki riòtiinyre. Tamy itxeremy rehemynyre. Tahe Deuxu rybe-ò roholare. ³² Jiarÿ boreny Deuxu watxireri, Abraõ Deuxu, Ijai Deuxu, Ijaò Deuxu. Tahe Moisesi ruberutyhyre, timy heka tamy reteheõhyyre.

33 Tahe Deuxu tamy rarybere: —Awa bitake, suu awarawo ludu dori, brebuna rare. Jiarÿ heka Deuxu watxireriki, biwatyhynke. 34 Wiji tahe waijoimy rabireri Egito-ki. Tiiboho aõhõkÿmy rotÿÿnyrenyrene. Ibru-ò raholareri, iohitxi-ò raholareri. Jiarÿ heka aditadenykre iribi. Manake, Egito-ò arateònykre. Kia heka Deuxu rarybere Moisesi-ò. 35 Ka Moisesi heka Israeli mahãdu juhoo teramy reare. Tamy rarybere juhoo mobo wawedurenymy arasÿnyra, waywisidÿÿdurenymy. Tiile heka Deuxu riteònyre idinodumy rarekemy, tarasadumy rarekemy. Bederade tòbòhòkÿ ÿju, heòtywoludu, iwiòhedÿÿdure. 36 Tahe Moisesi Egito-ribi iny ritamyhÿre. Egito bede-ki bedeeryna aõna aõna wiwihikÿ-wana. Iwese ahohokÿbesò-ki tule bederahy-ki iny inatxiwaitue beòramy aõmydÿÿnana wiwihikÿ riwinyre. 37 Kaa Moisesi heka rarybere Israeli mahãdu-ò: —Ayreny-ribi, amahãdu-ribi rybedu nihikÿmy Deuxu kiditamadÿÿnykre iwese riwatamadÿÿnyre wese. 38 Kaa Moisesi taijoi-di wii ributunyreu, bederahy-ki ihÿmyhÿ inytybyreny-wana heka ratximyhÿ. ÿju-wana tii ratximyhÿ Sinai hãwãlò-ki iu tamy rarybere. Deuxu rybe tyhy iru-di ratximyhÿ. Tahe rybe bede ywina heka Moisesi-ò Deuxu riwahinyre inydeereny kidiwahinykemy. 39 Tahe inytybyreny ityhydÿÿ deramy rare. Reòbyòrenyrene. Ixybyle Egito-ò ròðsekemy røhòtynyre. 40 Tahe iny Araò-ò rarybere: —Ritxoo deuxuò inydeereny biwinyke inkorenymy rakemy. Moisesi, Egito-ribi iny ritarennyre, tahe titxibo ihÿre reeryrenyòre. 41 Kiatxu tahe broreni riòreò riwinyre. Tahe xiwemy ritoonyrenyrene iko-ò, ritxooko-ò. Rexideysanyrenyrene aõbo tebò-di riwinyrenyrenki. 42 Tai tahe Deuxu rexitare iribi, taina rityhynykemy. Iwese rybeduò iu tyyriti-ki riritinyre wese:

—Israeli mahãdu, kaiboho xiwena tetoonytenynte, iròdu xiwena tetoonytenyta. Wadee aõkõ tahe kia tetoonytenyta 40 beòramy bederahy-ki.

43 Kaiboho tewytenyta ritxooheò riòre. Mòlòki inire, aritxoo deuxuni. Tule Renifa taina ijõ aritxoonire. Kia tewytenynte, tetyhynytenynte wahe. Tai tahe arateònyrennykre Babilonia weribihikÿ-ò wahe.

44 Inytybyreny heka Deuxu rybe bede ywina tyky heto riwinymyhÿre bederahy-ki. Iwese Moisesi-ò Deuxu riteònyre wesemy kia riwinymyhÿrenyrene. 45 Iribi tahe inytybyreny tatyby-ribi tyky heto ritare, tii-wana riwymyhÿre kabede-ò, Josue tadinodu-wana. Iu Deuxu iko-ribi riteònyre, ibutumy tai sÿ mahãdu tii-wana riwymyhÿre, ihyy tahe Davi reare. 46 Deuxu heka sòwemy Davi luure. Davi heka rexitònyrene Ijaò Deuxu dee heto riwinykemy. 47 Tahe tii aõkõ riwinyre,

Salomaõ iwidÿÿdure. ⁴⁸⁻⁴⁹ Deuxu biukisÿdu tahe hãbu widÿÿna heto-ki rasÿnyõmyhÿre. Iwese Deuxu rybeduõ rarybere wese: —Biu tahe warynana rare, bede tahe wawa elehyna rare. Timybo inyõ wadee heto riwinyke, Inynyrÿ rarybere. Iwo-ki tahe waelehyna arihynyõkre.

⁵⁰ Deuxu rarybere:

—Ibutumy aõna aõna jiarÿ rewinyre.

⁵¹ Tahe Estevaõ rakonananyre he tamyreny rybena heka rõhõnyre: —Kaiboho araykyterereny. Deuxu Tyytybytyhy rybe-ò taholaõhyymahãteny. Iwese iny tybyreny riwinyreny wesemy. ⁵² Ibutumy Deuxu rybedu mahãdu-ò ibinamy iny tybyreny riwinymyhÿreny. Tiu ihetxiu Deuxu òbiti hãbu kanakeò, tiiboho raryberenyreu, rirubunyre irybedu. Kaiboho tahe Deuxu òbiti hãbu-di ijõ-ò tewahinyteny, terubunyteny. ⁵³ Deuxu bede ywina ÿju mahãduõ adeereny diwahinydenyde, kia bede ywina kaiboho tetateny, tahe tetyhynyõhyymahãteny. ⁵⁴ Tahe kiamy Estevaõ rarybereu, tiiboho heka rebure nihikÿre. Urile txyde-ki ruruamyhÿre tamy. ⁵⁵ Estevaõ tahe Deuxu Tyytybytyhy-di iwoki ratximyhÿre. Tahe biu-ò retehere: Deuxu loosõnamy robire. Jesusimy robire lamamy rÿire Deuxu rurunawe-ribi. ⁵⁶ Tahe Estevaõ rarybere: —Jiarÿ wa rabireri biu juxahakÿmy. Jesusimy rabireri Deuxu deòdÿÿna. Lamamy heka rare Deuxu rurunawe-ribi. ⁵⁷ Tahe ryrymyhÿre, tõhõti ritòbònymyhÿreny, raijeranyre tamy. ⁵⁸ Ridyre hãwã-ribi, mana-di tahe tamy rehumyhÿre, rirubunyreny. Erydÿÿna ijyydu tahe taderamy ririrenyre Saluko-txi tamy riyrubunykemy. ⁵⁹ Iu mana-di rehureu, Estevaõ rexitõenyre: —Wanyrÿ, Jesuisi, watyytyby kai bimyleke awana ararekemy. ⁶⁰ Tahe tatiowotimy resere, ryryre: —Wanyrÿ, kia òraruna iòwydÿÿomyke. Idi tahe rurure.

8

¹ Salu tahe kia òbitimy raremyhÿ rõhõtinyre, Estevaõ rurureu. ² Iribi tahe ityhydÿÿdu mahãdu aõhõkÿmy rotÿÿnymyhÿre. Judeia wedu mahãdu dori, iòludumy rÿimyhÿre. Tai tahe ityhydÿÿdu sohoji sohoji Jerusalẽ hãwã-ribi rõhõnyre. Urile Jesuisi erydÿÿna mahãdu sohojile rÿire. Judeia bede hãwã mynamyna robÿtÿre, Samaria bede-ò tule. Tahe hãbu ityhydÿÿduõ Estevaõ umy riwyreny rihãloonykemy. Tahe rahinymyhÿreny, rirajuamyhÿreny. ³ Salu tahe ityhydÿÿdu mahãdu hudumy. Wii risÿnymyhÿre. Ihetorenywo-ò ralõmyhÿre tahe ridymyhÿre hãwyy, hãbu, rõtenawo-ò rirõtenykemy.

⁴Iu tahe ityhydÿÿdu mahãdu ijõ bede-ò roire mahãdu Deuxu rybemy relyymyhÿre ibutu hãwã-ki. ⁵Filipi ijõ raremyhÿ. Tii Samaria hãwã-ò rehemynyre. Tahe Kristumy tamyreny relyre. ⁶Iny sõwemy rityhynyrenyre aõmybo Filipi rarybemyhÿremy. Tahe deytedyÿna wiwihikÿmy iny robimyhÿrenyre, tyytybybina deòdÿÿnamy tule robirenyre. ⁷Tahe riteònyreu, tyytybybina iny-ribi ròhònyre, rirajuamyhÿre. Tule iny webinadu raraserasemy roimyhÿre, tule inytiere-wana. Tahe ibutumy riteytenymyhÿre. ⁸Tai tahe ka hãwã-ki deysana nihikÿ rÿire.

⁹Samaria hãwã-ki tahe hãbuõ raremyhÿ. Simaõ inire. Tii wodohonana widÿÿdu ihÿre. Iny riitxenanymyhÿre. Tahe riòtiinyrenyre. Tii iximy rarybemyhÿre moõ wiwihikÿmy raremyhÿmy. ¹⁰Ibutumy iny tii rityhynyrenyre, hãbu wedu mahãdu tule, hãbu aõtxile mahãdu tule. Tiiboho raryberenyre: —Simaõ Deuxu ruruna rare. Ruruna nihikÿ inire. ¹¹Tiu bedeu aõkõ iny riitxenanymy raremyhÿ, riòtiinyrenyre. Tai tahe rityhynymyhÿrenyre. ¹²Iu tahe Filipi Jesuisi Kristunimy, Deuxu òlònamy tamy relyymyhÿre. Tai tahe rityhynymyhÿre, raratysebemyhÿrenyre. ¹³Iribi tahe Simaõ itxenadyÿdu tule Jesuisimy reòbyre, raratysebenyre. Tahe Filipi-wana ihyy ròirenyre bede òtiidyÿna-di retehemyhÿre aõbo Filipi riwinyremy.

¹⁴Samaria hãwã mahãdu tahe Deuxu rityhynyre. Kia-ò Jesuisi erydyÿÿna mahãdu roholare Jerusalẽ-ki. Tai tahe Pedro Joaõ-wana riteònyrenyre kowa-ò. ¹⁵Rehemynyrenyreu, Deuxu-ò rexitòenyrenyre Deuxu Tyytybytyhy tamy kanakemy. ¹⁶Inyõ dori Deuxu Tyytybytyhy-di rÿiõmyhÿ. Urile Jesuisi Inynyrÿni-di raratisebedÿÿmy rÿiramyhÿ. ¹⁷Tahe Pedro Juaõ-wana tebòreny ityrereny ritidire. Tahe Deuxu Tyytybytyhy tamy nade. ¹⁸Kiamy Simaõ robire, aõma, debòtidina-di Deuxu Tyytybytyhy nade. ¹⁹Tai tahe tamy rexitòenyre: —Ka heka wanieru rare. Bidiwahinyke kia ruruna. Tahe inyõ tyre wadebò aritidikeki, tamy Deuxu Tyytybytyhy kanakemy. ²⁰Tahe Pedro tamy dirawyònyde: —Aõkõre, anieru rakemy watxireri awanale rububede-ò. Deuxu ruruna dori anieru-di biwykemy mohòtinyke. ²¹Kia heka aõmysÿdÿÿnakõre wayreny-ki. Arayky, awo, òbitimy aõkõ ratximyhÿre Deuxu dee. ²²Mabedewomy atximahãke aòraruna-ki, aõbo tahòtinyte. Bexitòenyke Inynyrÿ-ò tii òsana aòraruna-ribi araxãwididyÿnykre. ²³Kai dori texiwaritinymahãte. Aòraruna adi nararotinymyhÿde. ²⁴Tahe Simaõ tamy rarybere: —Wadee bexitòenybenyke Inynyrÿ-ò, kia aõkõ waki kÿnyikemy, aõmybo tarybetenyteki aõbo.

²⁵ Iribi tahe, Pedro Juaõ-wana Inynyrÿ rybemy rarybemyhÿrenyre, relyymyhÿrenyre tai. Sõwemy Samaria bedede hãwã hãwã-ki Rybewihikÿ relyymyhÿre, Jerusalẽ-ò ròòserenyre.

²⁶ Filipi Samaria hãwã-ki raremyhÿ. Tahe Inynyrÿ ÿjuõ tamy rarybere: —Bexiywinyke, make ibòò-ò. Kasa hãwã ryhykÿ bimyyke. Jerusalẽ-ribi ryy rare, bederahy-ki rare. Tahe Filipi rare. ²⁷⁻²⁸ Tahe inyõ-wana wibymy reare. Tii Etiopia bedede luduõ rare. Etiopia bedede iòlò hãwyyõ rare. Kanasi inire. Inieru-di itxeredu kahãbu rare. Tii enuku rare. Tii ròòsereri Jerusalẽ-ribi. Kowa Deuxu reàlàmy rare, tahe tasÿ-ò ròòsere iawarutewedile. Isaia Deuxu rybedu tyyriti-di rariamy tii ronymyhÿre. ²⁹ Deuxu Tyytybytyhy Filipi-ò rarybere: —Make, awarutewe-ò, mariake ibire-di. ³⁰ Tahe Filipi tamy raijaranyra. Roholare tyyriti-di rariareriò. Tahe Filipi rÿÿraxire: —Kai aõbo teeryte aõbo rare, aõdibo tariateri. ³¹ Tahe dirawyònyde: —Aõkõre, inyõ dori wadee ritÿnynyõre. Timybo arierykremy. Manaòwonyke wabire-ò bodonyke. Tahe Filipi raòwònyre. ³² Tii kia-di rariareri tyyriti-ki:

—Iwese iny budoeni rubudÿÿdu-ò riwyre wese, tii iwesele ridyrenyre. Budoeni-ribi iny isira riororeu, rirajuaõlere. Iwesetyhyle Tii rarybeõlere.

³³ Iehehenamy tamy raryberenyre wese hãbu ehehe wesena, òbitimy aõkõ idi riywinyrenyre. Inyõ rarybeõtyhy iriòkòremy, iumy dori bede-ribi ituera.

³⁴ Tahe tii Filipi-ò rarybere: —Wadee manarybeke momybo rybedÿÿdu rarybereri, iximy aõbo ada ijõmy aõbo. ³⁵ Tahe Filipi kia Tyyritidile rexidelenymy relyyre. Jesusimy Rybewihikÿ Tÿmyramy tamy relyyre. ³⁶ Rydi rariamyhÿre idi rehemynyrenyre beõ-ò. Tahe tii Filipi-ò rarybere: —Kowa bera rare. Biwaratisebenykekõ aõbo, adee awikeki. ³⁷⁻³⁸ Tahe Filipi dirawyònyde: —Awire wadee. Inatyhymy arayky-ki tetyhynyte-wana, aratisebenykre. Tahe rarybere: —Retyhynyre, inatyhymy Jesuisi Kristu Deuxu Riòre raremy. Tahe tewe irira riixãwidinykemy riteònyre. Tahe itewe-ribi ròhònyra, bera-ò riberenyre. Tahe riratisebenyre. ³⁹ Bera-ribi rotuoreu, Filipi aõwesele iõmy reare. Inynyrÿ Deuxu Tyytybytyhy ridyre. Hãbu ixiby Filipimy robiõhyre. Tahe tary-di rariamy rare. Teysanatyhy-di tÿximy rare. ⁴⁰ Idi tahe Filipi rexieryre, Asoto hãwã-ki rehemynymy raremyhÿ. Iribi tahe Rybewihikÿ-di relyyre ibutumy hãwã hãwã-ki. Ikonana tahe Sesaria hãwã-ò rehemynyre.

9

¹ Salu rarybemy raremyhÿ, Inynyrÿ Jesuisi ityhydÿÿdu mahãdu rubudÿÿmy. Tii rarybemy raremyhÿ Deuxu do-

hodÿÿna heto wedu-ò. ² Tamy rexitòenyre: —Arybe tyyriti ari-wykremy watzireri Damasu hãwã dohodÿÿna heto wedu-ò. Tai tahe kowa-ki ityhydÿÿdu-txi areakeki, aõtxile hãbu hãwyy aõbo, aridykemy Jerusalẽ hãwã-ò, ariròtenykemy. ³ Tahe iòhòmy Salu rare Damasu hãwã iròte iòhò-di, idi tahe loosònahakÿ Salu tyre resere. ⁴ Tahe bede-txi resere, tahe rybeò roholare: —Salu, Salu, aõherekibo aõna aõnamy ibinamy wadee tatÿÿnymahãte. ⁵ Tahe tamy rarybere: —Mowexe, Wanyrÿ atxiteri. Tahe rirawyònyre. —Jiarÿ Jesuisi watzireri, aõna aõnabina binamy wadee tadotÿÿnymahãte wahe. ⁶ Myike, mariamy tahe hãwãhãkÿ-ò malokre. Taita inyõ adee rarybekre aõhebo botÿÿnykremy. ⁷ Tahe Salu ijoi riòryre rybeòhyy rÿimyhÿ. Rybe-ò roholare, tahe tuu robiòhyyre. ⁸ Salu suribi rÿireu, iruetà wesele heka ratximyhÿ. Tahe hãbu tii-wana ihÿmyhÿ heka iaxiò-ki idi rimymy idi rare Damasu hãwã-ò. ⁹ Tahe hãwãhãkÿ-ki txu inataõ txu idi rÿire aõmy robiòhyyre, riroxiòhyyre, bemy riòòhyyre.

¹⁰ Damasu hãwã-ki ityhydÿÿdu wihikÿ rasÿnyre. Anania inire. Wanyrÿ Jesuisi tamy rarybere rasi weselemy: —Anania. Tahe rirawyònyre: —Aõbo rare, Wanyrÿ, kakile watzireri. ¹¹ Tahe Jesuisi riteònymy rarybere: —Myike, make òbitiry-ò, Judasisÿ heto-ò. Tai bitÿÿraxinyke titxibo Salu ratxirerimy. Tarso hãwãludu tule rininire. Tii wiji wadee rexitòenyre. ¹² Tii umy robireri tarasi-ki. Kai tehemynteri wese, irue-ò ebò bitidikemy, biteytenykemy. ¹³ Anania Jesuisi-ò rirawyònyra: —Wanyrÿ, sòwemy kia hãbumy rybe-ò raholara. Aõbina binamy ityhydÿÿdu-ò risÿnymy raremyhÿ Jerusalẽ-ki. ¹⁴ Deuxu dohodÿÿna heto wedu tyyriti diwyde kaki ityhydÿÿdu rutysÿny rirutekemy. ¹⁵ Tahe Inynyrÿ tamy rarybere: —Aõwaxina tamy makre, Jiarÿ dori, kia retara wadee aõmysÿdÿÿdu nihikÿmy rarekemy, judeukòdu mahãduko, iòlòrenyko, tule Israeli mahãduko wanimy rarybekre, aõma, warybetÿmyra wihikÿmy. ¹⁶ Tamy aritÿÿnykre tiwesebo aõhòkÿmy rotÿÿnykre wanimy rybeòraru-ki. Kia ibutumy Jesuisi rarybere Anania-ò. ¹⁷ Idi ta Anania rare tamy Judasi heto-ki. Ralòmy rahudi, tahe, tebò ityre ritidira. Tahe rarybera: —Salu, waseriòre, Inynyrÿ adee riwateònyra. Tiile, Jesusile heka ryro-ki adee rexitÿnyre. Tiile heka riwateònyra arue ritxuakemy, tule Deuxu Tyytybytyhy atykmy ralòkemy. ¹⁸ Tahe aõwesele irue-ribi rejujura aõ yjy wesele. Tahe ixityre robira. Idi rÿimy rahudi tahe, Anania riratysebenyre. ¹⁹ Idi riroximy rahudi tahe, inatyhymy raruruterenyre. Tahe Damasu hãwã-ki tiwese txubo idi rÿire kia erydÿÿna mahãduy-ki. ²⁰ Idi dohodÿÿna heto-ki rybe ritÿnyre. Rarybere: —Jesuisi heka Deuxu Riòrele rare.

Kiawesele rybe-di ritynynymyhÿre. ²¹ Tahe uri ijohonadu mahãdu urile bede riõtiinymy rÿimyhÿ. Tahe inyõ rarybere: —Kia aõ heka ityhydÿÿdu rubudÿÿdule ratxireri, Jerusalẽ-ki. Kiale heka kaò nade ityhydÿÿdu ritaataamy ridykemy dohodÿÿna heto wedu-ò. ²² Salu tahe ire riixiòlòdÿÿnymyhÿhyyre. Judeu Damasu hãwã ludu rieryõhyyimyhÿ aõmybo rarybemy. Tii rarybere: —Jesuisi Kristule rare, Deuxu deòdÿÿna rare.

²³ Tiwesetxubo txu idi rÿidi tahe judeu mahãdu rarybere irubudÿÿmy. ²⁴ Tahe Salu rierymy rÿimyhÿ tahe inonana-ò rexiywiny my rÿimyhÿ. Rummy tahe, txummy hãwã ijò-ki rirubunykeny rethemy rÿimyhÿ. ²⁵ Tahe ijõ erydÿÿna mahãdu weriri nihikÿ riwinyre. Rummy tahe Salu riòlòdÿÿnyre òtity nihikÿ kanaweribi-ò, hãwã ahanaube-ò.

²⁶ Salu Jerusalẽ-ò rehemynyreu, ityhydÿÿduky-ò ralòkemy ratxireri, tahe urile ilau ruberumy rÿimyhÿ. Erydÿÿna mahãdu rõhõtynyre: —Tii ityhydÿÿdu inatyhy aõkõ ratximyhÿremy. ²⁷ Banabe tahe rityhynymy ridyre Jesuisi erydÿÿna mahãdu-ò. Tahe relyyre iwese Jesuisi Salu-ò ryki rexitÿnynyremy tamy raryberemy. Tule relyyre iwese Jesuisinimy Salu rybe ritÿnydÿÿnymyhÿremy, Damasu hãwã-ki. ²⁸ Tahe taihy Salu ratximyhÿre. Tiò tiòle reamy ratximyhÿre rybe ritÿnydÿÿnyrerimy ihÿre, ruberumy aõkõ. ²⁹ Salu rarybera grego rybe heka erydÿÿna mahãdu-ò. Widee rarybehyyimyhÿrenyre. Idi tahe kia mahãdu Salu rubudÿÿmy roromyhÿre. ³⁰ Ityhydÿÿdu seriòre kia rieryreu, tahe Salu ridyrenyre Sesaria hãwã-ò. Iribi tahe Tarso hãwã-ò riteònyre.

³¹ Idi tahe ywina reare ityhydÿÿdu mahãduy-ki. Ibutumy hãwã bedemy, Judeia, Kalileia, Samaria, ityhydÿÿdu mahãdu iruruteremy relere. Ibutumy Inynyryÿ dee òbitina-ki rariamyhÿre, rityhynymyhÿre. Deuxu Tyytybytyhy teysatyhymy tamy riwahinyre. Sõwemy tahe ralore iheki ityhydÿÿmy.

³² Ibutumy hãwã hãwãmy Pedro rariamyhÿre. Tule robehere Lida hãwã-ò ijõ ityhydÿÿdu mahãdusÿ-ò. ³³ Tai Eniamy ninadu-txi Pedro reare heka rare. Iummy heka imyremyrehkÿ heka rare. Debò inataõ reurò beòramy heka herina-ki bede idi rÿire ³⁴ Pedro rarybere tamy: —Enia, Jesuisi Kristu arateytenykre. Myike, aherina biyrubunyke. Aõwesele hãbu rÿira. ³⁵ Ibutumy Lida hãwã mahãdu Saronu hãwã mahãdu tuu robire, tai Inynyryÿ rityhynyrenyre.

³⁶ Jòpe hãwã-ki hãwyy ityhydÿÿdu rasÿnyre. Tabita inire. Kiani riwiurònyre, watxi wese heka rare. Kia heka aõwiihikÿ widÿÿdu heka rare. Aõna aõna sõwemy iny-ò riwahinymyhÿre. ³⁷ Ijõt_{TXU} heka webinadumy resere, ihyy ta, rurure. Risuhõmy rahudi tahe, ritidire hetowo ratyaluduwo-ò. ³⁸ Laida hãwã iòhõmy rÿire, Jòpe hãwã-ribi, Ityhydÿÿdu roholare Pedro

Lida hãwã-ki ratximyhÿreò, tahe hãbu inatxi diteònyde Pedro òrysomy. Uritere eleòkõmy kanakemy tii-wana. ³⁹ Pedro tahe tii-wana rare. Rehemynyrenyreu, tahe ridyre hetoratya ludu wo-ò. Ibutumy wytese mahãdu robumy rÿimyhÿre, rubuweroramy. Tahety, tatyboho ritxeredÿÿnomy tamy riwinyreò. ⁴⁰ Tahe Pedro rarybere ibutumy rexitakemy. Tahe rexitòenyre taowotimy resemu. Tahe rexiòkesere rubu-ò rarybekemy: –Tabita, myike. Tahe irue raraynyre tahe Pedromy robire, tahe ronyre. ⁴¹ Pedro tebò tamy riwainyre tahe rÿire. Tahe wytese-ò, ityhydÿÿdu-ò rryryre. Tamy riteòsinyre hãwyy irulemy roirerimy ihÿremy. ⁴² Jòpe hãwã mahãdu ibutumy kia rieryre. Sõwemy iny tahe Inynyrÿ rybe rityhynyre., ⁴³ Txu sõwemy Pedro Jòpe hãwã-ki ihÿmyhÿ Simaõmy ninadu heto-ki. Simaõ heka iròduty wysydÿÿdu rare.

10

¹ Italia soldado mahãdu dinodumy raremyhÿ. Oreniliu inire. Sesaria-ki rasÿnyre. Tii òbitimy nodu rare, isÿ mahãdu-wana. ² Tii uriwahidÿÿna diwahinyde tule sõwemy rexitòenyre Deuxu-ò. ³ Aõtxu inataõ òra bedeu iòhòmy, rasina wesemy Deuxu ÿjumy tii robira, tamy rehemynyre. Tahe tamy rryryre:

⁴ –Oreniliu, rimasajuare-ribi riwawyònyre: –Aõherekibo, Wanyrÿ. Tahe ÿju rarybere Oreniliu-ò: –Aexitòedÿÿnamy Deuxu rierymyhÿre. Tule ijõ-ò awahisina Deuxu rierymyhÿre.

⁵ Biteònyke eòdubohoõ Jòpe hãwã-ò Simaõ Pedro òrysomy. ⁶ Tii Simaõ iròdutyky iyxidÿÿdusÿ-ki ihÿre, bera ijã iòhò-ki. ⁷ ÿju rybedu rexitareu, teòdu inatxi-ò rryryre. Tule tasoldado mahãduy-ribi inyòwihikÿ rihitxinyre. ⁸ Kia ibutu-ò relyymy rahudi tahe riteònyre Jòpe hãwã-ò.

⁹ Ijõtxu txutyetxuu, tiiboho hãwã-ò iòhòmy ròire. Kiaule Pedro raòwònymy rÿimyhÿ hetotyre-ò rexitòenykemy. ¹⁰ Rama risamy ratximyhÿ tahe riroxikemy ixi-di ihÿmyhÿ. Rÿsÿna riraòmy rÿimyhÿ. Idi rasi wesemy rõhõtinyry rÿire. ¹¹ Tahe robire: biuwetyy ruamyhÿre wese tuu robire. Rià wesemy aõna tamy dobehede. ¹² Rià wo-ki ibutumy iròdu, nawii, hemylala, aõbo dòkõnakõnale. ¹³ Rybeò-ò roholare: –Myike, Pedro, birubunye, biroxike. ¹⁴ Pedro rirawyònyra: –Aõkõre, Wanyrÿ. Kia dòkõna reròkõhywãhãre, isuisure dori. Ixityre tamy rarybere: ¹⁵ –Aõbo Deuxu risuhore wese isuisumy rybeòmyke. ¹⁶ Ixityre narybede. Iu tahe aõwesele ridyre biu-ò.

¹⁷ Tahe Pedro kia aõbo raredi heka rõhõtinyreu, Oreniliu-ribi hãbu mahãdu rehemynyre. Simaõ heto riijemyhÿ tahe ijòhòkÿkile rahare. ¹⁸ Tahe rryrynyre: –Simaõ Pedro

aõbo kakile ratxireri. ¹⁹ Pedro, tatxuu rasina-di rõhõtinyreu. Deuxu Tyytybytyhy tamy narybede: ²⁰ —Myike tahe, bobehke. Inataõ hãbu dori araijereri. Tii-wana makre adee dori aditeõnyde. ²¹ Tai Pedro robehere. Tamy rarybere: —Jiarÿ aòrysdu rare. Aõherekibo tòitenyte. ²² Tahe rirawyõnyre: —Oreniliu hãbu òbiti rare. Tii Deuxu dee ijohonaduõ rare. Ibutumy judeu bede mahãdu awiremy tuu rarybemyhÿre. ÿjuõ tamy rarybere aòrysmy kiditeònykremy, adee roholakremy. ²³ Tahe Pedro tamyreny rarybere: —Kakile inyboho rõkõrõrenykre.

Ihewoludu txu, rÿidi tahe Pedro tiiboho-wana ròirenyra. Ijõ ityhydÿÿdu seriõre tule roirenyra. ²⁴ Ijõ hewo ludu txu Sesaria-ò rehemynyreny. Oreniliu tii riraòmyhÿre. Taijoi mahãdu tabiòwawoludu mahãdu-wana ributunymy rÿimyhÿre. ²⁵ Pedro rehemynymy raloreu, Oreniliu ròhònyra heto-ribi tahe tatiowotimy iko-txi resere riwowydynykemy. ²⁶ Tahe Pedro ritamadÿÿnyre. Rarybere: —Mynyike wahe. Jiarÿ hãbule watxireri. ²⁷ Tahe rarybemy ralòmyhÿ, sòwemy wii ributunyreriò itxi reare. ²⁸ Ta Pedro tamyreny rarybere: —Judeu mahãdu iny witxira mahãdu-wana wibutudÿÿõmy, iòhòmy wiribi riraõmy. Kia teerytenyte. Deuxu dori riwaerynadÿÿnyre kia wese arõhõtinykre. Iny wiwese wiwesele raremy arõhõtinykemy. ²⁹ Tahe tai waòrysmy teteònyteu, aõtaximy anademy wanohõti rÿire. Tai tahe adeereny arÿÿraxikre. Aõherekibo waòrysmy aõtaxina teteònyte. ³⁰ Ta Oreniliu rirawyõnyre: —Inaubiõwa txumy txu rÿire tahe hãbu tyky tÿrÿrÿhÿkÿ-di wako-txi rexitÿnyra. Iule wesemy tahe waheto-ki rexitòenywãhare. ³¹ Tahe wadee rarybera: —Oreniliu aexitòedÿÿna-ò Deuxu roholara, ijõ-ò awahisina rieryra. ³² Biteònyke Jòpe hãwã-ò Simaõ Pedro òrysmy. Simaõ, iròdutyky iyxidÿÿdusÿ-ki ihÿre bera ijà iòhò-ki. ³³ Aõwesele tahe, aòrysmy reteònyre. Awimy tahe tateriki rahara. Inyboho kakile ributunymy ihÿreny, aroholakemy ibutumy Deuxu-ribi aõmybo manarybekemy. ³⁴ Tahe Pedro rarybere: —Deuxu dee iny ibutumy wiwese wiwesele rare. Kia reeryre. ³⁵ Ibutumy bede bede hãwã ludu Deuxu rityhynykeki, aõbo tamy òbiti riwinykeki, tii Deuxu ixidee rimyke. ³⁶ Kia rybe tahe Deuxu riwahinyre judeu mahãdu-ò. Rybewihikÿywina kia diwyde inydeereny bedeerynamy. Kia Jesuisi Kristumy rarybere ibutunyrÿna kia rare. ³⁷ Joaõ ijõ ratysebenamy rarybere, idi tahe kia rybe hàletedÿÿmy rexidelenyre Kalileia-ki. Tahe ibutu judeu mahãdu bedemy rarybere. Kia kaiboho teerytenyte. ³⁸ Iwese Deuxu Tyytybytyhy, taruru-wana Jesuisi Nazare ludu tyre-ki ditxiwide wesemy relymyhÿre. Iwese Jesuisi reamy raremyhÿ we-

semy aõwihikÿ riwinymyhÿremy, tule iny Diabo rururawo-ki ratxirerimy ihÿre Jesuisi iribi riteònyre, ta reteytenymyhÿre. Deuxu dori Jesuisi-wana ihÿre. Ibutumy kia teerytenyete. ³⁹ Tahe ibutumy judeu mahãdu hãwã-ki riwinymyhÿre, idi itxeredumy inyboho roiremyhÿre. Ihãre tahe tii Jesuisi rirubunynyreny, òwòru itxeò nihikÿ-ki ritòhãletenymy rita-madÿÿnyreny. ⁴⁰ Inataõ txu-di tahe Deuxu rubu-ribi riixixanyre, tahe tii riteòsinyre inyõ-ò. ⁴¹ Tatarasanaõòle Deuxu Jesuisi ritÿnydÿÿnyre. Kia heka inyboho roire tii-wana riroxirenyreki, riõrenyreki, iixixana hewomy. ⁴² Deuxu rarybere: —Jesuisi hitxidÿÿdu iny wiribi ywisijuradÿÿdu rareke, iru mahãdu dee, rubu mahãdu dee. Kiamy heka Deuxu iny-ò ritÿnytedÿÿmy, ta inyboho rokoirekemy diwahinyde. ⁴³ Ibutumy iny Jesuisinimy tamy rityhynykeki, iòraru-ribi iny riixãwididÿÿnyke. Kia ibutumy ihetxiu rybedu mahãdu rÿimy rarybemy raremyhÿre. Kia heka Pedro tamyreny rarybere.

⁴⁴ Pedro rarybemy raremyhÿu, Deuxu Tyytybytyhy ibutu rybe-ò ijohonadu tyre-ki resemey ralore. ⁴⁵ Pedro-wana rare mahãdu, judeu mahãdu òbiti, tahe riòtiinyre judeukõdu mahãdu-ki Deuxu Tyytybytyhy ralòmny rareki. ⁴⁶ Raholare dori rybe wixira-di raryberenyreò, tiiboho Deuxumy heka reàlãmymhÿre. Tahe Pedro tamyreny rarybere: ⁴⁷ —Inyõ rarybeõkre, iratysebedÿÿõmykemy, tiiboho dori Deuxu Tyytybytyhy-di ratxirenyre inyweserenyle. ⁴⁸ Tahe Jesuisi Kristu nimy iratysebenykemy riteònyre. Tahe rexitòenyreny Pedro idi iyreny-ki ijõ txumy ramyhÿre.

11

¹ Judeukõdu mahãdu Deuxu rybe roholamy rityhynymyhÿre. Kia-ò tahe Jesuisi erydÿÿna mahãdu roholare kiamy ityhydÿÿdu seriòre mahãdu tule roholare. Judeia bedede ludu ratximyhÿ mahãdu ibutumy kia rare. ² Pedro ixityre Jerusalẽ-ò rehemynyreu, tahe judeu ityhydÿÿdu mahãdu tuu tamy narybede. ³ Kia heka, Pedro, judeukõdu mahãdu-wana wiwo-ki atxiteri, tii-wana teroxiteri. Tai tahe ibinamy raharennyre. ⁴ Iribi tahe Pedro ikoreny relyyre ibutumy taaõna aõnamy. Kia wesemy Pedro rarybere: ⁵ —Jòpe hãwã-ki watxiwãhã. Tahe rabire rasinawesemy rià nihikÿ biu-ribi robehere-ò. Iwese inyõ iòhòti inaubiòwa-ki rimymyhÿre wesemy wadee robehemy roimyhÿre. ⁶ Tahe aõbo heka iwo-ki ratximyhÿdi, retehenihikÿmy rãiwãhã iròdu deborehekÿ wesemy ratximyhÿ iwo-ki. Abòròrò wesemy tai ratximyhÿ, iròdu wese, nawii wese tai ratximyhÿ, inyboho rirÿsÿõmyhÿre wesemy. ⁷ Iribi raholare rybeõ-ò: —Myike, Pedro, birubunyke hewa aõtxile birubunyke tibo biròkemy.

Aõkõrewa Wanyrÿ, tiu heka rerõðwãhãre. Judeu mahãdu bedewina heka tiu iny kia rirõðtyhy. ⁸⁻⁹ Tahe ixityre rybeòtamy rarybere: —Marybeòke kia ibinamy. Aõbo Deuxu awimy rarybere, kia wiji tahe ibinamy aõkõ rare. Deuxu dee awikeki, kia awi rare. ¹⁰ Inataõ heka tuu rotÿÿnyre. Iribi tahe kia rià, ibutu-wana iõre biuribihyy heka iõre. ¹¹ Iribi tahe hãbu inataõ dehemynymy deade tai watxiwãhã-ò. Tii diwaòryde riwadykremy Sesaria hãwã-ò. ¹² Tahe Deuxu Tyytybytyhy wadee rarybere tii-wana arakremy. Nohõtiõmy heka aõbo judeukõdu mahãdu raremy. Tii-wana makre ele elemy. Tahe kia debò sohoji reurò seriõremy wahemy rare. Tahe rethemynyrenyrene waòrysymy riteònyrenyrene heto-ò tahe ralòrenyrene Oreniliu heto-ò. ¹³ Iribi tahe Oreniliu rarybere iwese ÿju ihetowo-ki tamy rexitÿnyrenyrene rarybereri: —Oreniliu, inyõ biteònyke Simaõ Pedro òrÿsymy Jõpe hãwã-ki. ¹⁴ Tii rybe tÿmyraõmy adeeremy kanarybekre. Tai tahe ibutumy asÿ ijoi-wana aòraru-ribi kanatakre. Kia Oreniliu inydee rarybere. ¹⁵ Iribi tahe jiarÿ Rybewihikÿmy rexidelenymy rarybere tamy. Pedro rarybere. Urile tahe roholare, tahe aõwesele Deuxu Tyytybytyhy ityrereny resere iwo-ò ralòkemy iwese watyrereny resere wesele juhoo. ¹⁶ Tahe Jesuisi rybe wanohõti itxi reare tiubo raryberemy: —Joaõ heka inatyhymy bedi iny ratisebenyrene, kaiboho tahe Deuxu Tyytybytyhy-di akanasebedÿÿdenykre. ¹⁷ Judeukõdu mahãdu Inynyrÿ Jesuisi Kristu rityhynymyhÿre. Tai Deuxu tamy diwahinyde iwese wadeeremy juhu riwahinyrene wesetyhyle. Deuxu Tyytybytyhy uriõno wesele tamyreny diwahinyde. Mobo jiarÿ raremy wahe tuu Deuxu dee aõmy ararybekemy. ¹⁸ Iribi Pedro rybe-ò roholareu tahe timyhe tamy irybekõna. Tule Deuxu riwowydnyrenyrene: —Inatyhy wa rare Deuxu heka judeukõdu mahãdu-ò heka umytuedeõna riwahinyrene. Inyõ rityhynykeki, ixirahikeki, tarasana rimyrenykre.

¹⁹ Iu tahe Estevaõ rurureu, ityhydÿÿdu aõhõkÿmy rotÿÿnyreu tahe, ityhydÿÿdu mahãdu Jerusalẽ-ribi ròhõnyrene. Tii heka relyymyhÿre Rybewihikÿmy judeu mahãduòle kÿny wahe, iwitxira witxira-ò aõkõre. Tahe ibutu bedewina ritelenymy ròirenyrene. Senisia-ki relyyre. Xibri bedebute-ki tule relyyre, Atxiòkia hãwã-ki tule relyyre. ²⁰ Ijõ ityhydÿÿdu mahãdu Jesuisi Rybewihikÿ tÿmyra rarybere. Tiiboho Xibri bedebute-ribi ròhõnyrene, Sireni-ribi ijõ rybedu ròhõnyrene Atxiòkia-ò. Tiiboho relyyre judeukõdu mahãdu-ò tule. ²¹ Deuxu riwiòhenanyrene sòwemy iny rityhynyrene, Jesuisi ryò ralòrenyrene. ²² Jerusalẽ ityhydÿÿdu mahãdu kiamy roholare. Tai tahe Banabe riteònyrenyrene

Atxiòkia-ò. ²³ Banabe rehemynyreu tahe, tuu robire aõbo Deuxu kowa riwinyrerimy. Tai tahe reysare. Tahe ityhydÿÿdu tÿmyra-ò dohodÿÿmy, riwiòhenanykremy: — Iòhòtyhmy Deuxu-ribi atximahãbenyke, aworibityhy Deuxu bityhynybenyke. ²⁴ Banabe heka hãbu wihikÿ rare. Tÿxihikÿlemy Deuxu Tyytybytyhy-di ratximyhÿre. Ibutumy ratximyhÿre tyhydÿÿna-di. Sõwemy iny rexiròtenyrene Inynyrÿ mahãdu-ò. ²⁵ Idi tahe Banabe rare Tarso hãwã-ò Salu ijesemy. ²⁶ Tai rahareu tahe, didymyhe doõsemy nade Atxiòkia-ò. Sohoji beòramy idi bede rierenyrene. Sõwemy iny ribedeernymyhÿrenyrene. Atxiòkia hãwã-ki ityhydÿÿdu mahãdumy raninira Kristu wese mahãdumy. Kiani tamyreny riwahinyrene.

²⁷ Aõutxu tahe dehemynyde Deuxu rybedu mahãduò Jerusalẽ-ribi Atxiòkia-ò. ²⁸ Ijõ Abusi inire. Iribi tahe tii rarybere Deuxu Tyytybytyhy rybemy. Ramamy rubu nihikÿ kanakremy raxireri, ibutu suò. Laujiu iòlòmý raremyhÿu, kiamy rotÿÿmyhÿre. ²⁹ Tai tahe ityhydÿÿdu mahãdu he nieru riwahinykremy rÿire Judeia bede sÿdu ityhydÿÿdu riwiòhenanykremy. Tahe nieru riwahinyrene tiwesebo idi ratximyhÿre wesemy tamy riwahinyrene. ³⁰ Tahe nieru riteònyrene, moma-wana Banabe Salu-wana Jerusalẽ dohodÿÿna heto matuari mahãdu-ò riwyrene.

12

¹ Kia bededÿÿnanamy heka Herodi judeu iòlòmý raremyhÿ. Iribi tahe rexidelenymy riwinyrene heka ityhydÿÿdu mahãdu kia òludumy risÿnykre myhÿ. Tii riteònyrene aõna aõnamy risÿnykemy ityhydÿÿdu mahãdu-ò. ² Tii mayrehe-di rubudÿÿmy riteònyrene Joaõ seriòre wahe, Txiau wahe. ³ Tai tahe judeu wedu mahãdu heka tamy wihikÿlemy tuu rotÿÿnyrene. Herodi rierymy raremyhÿ idi Pedro rimyrene. Tahe worana bedehesi rÿire. Paõ taurina ihoõ inire. Kia ibutumy rotÿÿnyrene kia bedehesi rÿireu. ⁴ Tahe Pedro riròtenyrene, ròtenawomy wirutyrene. Aõmamy soldado mahãdu inaubiòwamy iitxeredumy rÿimyhÿre. Pascoa kia worana bedehesi konana txu rexihumy rÿireu tahe, judeu mahãdu-ò riwahinykre. Kia Herodi rexinohòtidÿÿnyrene. ⁵ Ròtenawo-ki tahe Pedro ratximyhÿre. Ityhydÿÿdu mahãdu tahe Deuxu-ò rexitòdenyhyymyhÿre Pedro tòenamy. ⁶ Txubiòwamy tahe itxu riwinyrenyrene iny sõwehekÿ-ò Pedro riwahinykemy. Kiamy Herodi ròhòtynyrene. Ruu tahe Pedro ròròmý roimyhÿ. Inatxi soldado heka idile ratximyhÿre. Pedro womati reroti inatxi-di ratisamy roimyhÿre. Ijõ soldado rotena ijò-ki ratximyhÿre. ⁷ Inynyrÿ ÿju heka Pedro weribi rihetenyrene.

riixixanykemy. Loosòna itÿnyhÿkÿlemy ròtena ritoosònyre. Tamy rarybere: —Wylemy wa rexiukÿnyke. Tahe aõwesele Pedro axiò-ribi womati rerotihikÿ rejuxunyre. ⁸ Tahe ÿju tamy rarybere: —Awamy birutyke, bexityynyke. Kiamy riwinyra. Ijõ arahana birutyke tahe biwaheludunyke. ⁹ Iribi ròhònyra he tai ròròrer-ribi wahe. Kia ibutumy heka rasi weselemy Pedro ròhòtinyre rieryõre inatyhy aõbo ada rasi aõbo. ¹⁰ Juhu heka ikoludu soldado mahādumy reare idi ihewoludumy reare iribi rehemynomy rÿire ahana ijòtyhy-ò. Womatilere heka iijòtòbònare. Ixiwanale heka rarayre ijòtòbòna. Iribi tahe roirenyre hāwāry-di ririranyrenyire. Idi tahe ÿjuhe iõre iribi. ¹¹ Tahe Pedro ròhòtinyre, rieryre heka aõhebo rotÿÿnyraò. Wanyrÿ ÿju riteònyre riwatara Herodi-ribi judeu mahādu-ribi. Katahe wadee aõhe rotÿÿnyrenyòtyhy. ¹² Ròhòtinomy rÿire juhū urihimyo idi tahe rare Marie heto-ò. Joaõ Markuse heka tii rare. Tai ityhydÿÿdu mahādu rÿimyhÿ tahe rexitònyrerìò Pedro tamy rehemynyre. ¹³ Tahe ijò he rihetenyire. Ijòtàbòna-ò nade mobo raremy rierykemy ijadòma deòdu. Rode inire. ¹⁴ Tahe Pedro rybe rieryra. Reysamy raijaranyre iwo-ò. Pedro tahe ralòòlemy rÿire. Tahe relyyre Pedro heto ijò-ki rÿimyhÿmy. ¹⁵ Tiiboho raryberenyre: —Kai tabinamy atxiteri. Ixityre rarybere: —Aõkõre tii taile naderi. Tahe raryberenyre: —Pedro aõkõ rare, taÿjulemy tahe rare. ¹⁶ Tahe Pedro riheterihetenymy rÿimyhÿre. Idi riraynyrenyire. Pedromy robirenyrau, bede riòtiinyrenyire. ¹⁷ Pedro tahe tamyreny tebò reara roholarenykemy. Tahe tamyreny relyyre timybo Inynyrÿ ròtena-ribi rexiòlòdÿÿnyramy. Tule tamy riteònyre: —Kiamy belyyke Txiau-ò tule inyseriòre-ò. Tahe rexitare, rare ijòsÿ-ò.

¹⁸ Txuu ratÿnyreu, soldado mahādu ierysomy wii risÿnyre timybo Pedro aõhebo rotÿÿnyramy. Tahe jei jei aõnire. ¹⁹ Herodi ijesemy riteònyre tai moõ tai rahaõhyllera. Tai soldado itxeredu sohoji sohoji dÿÿraximy riteònyra. Idi irubudÿÿmy riteònyra. Iribi tahe Herodi Judeia bede-ribi ròhònyra. Sesaria hāwā-ò bededÿÿnanaõ riwya.

²⁰ Tiro hāwā mahādu Sidoma beà hāwā mahādu-wana Herodi derarenyre. Tahe tiiboho ributunyrenyire tamy ròirenykemy rybe-di. Iòlò heto-di itxeredu Blastu inire. Tahe iny mahādu Blastu ròtarenyre iwe-ribi mahādureny. Tahe ròirenyre Herodi-ò tamy rexitònyrenyire, tamy ykaraõmykemy. Tarÿsÿna dori diwyde iòlò bede-ribi, Herodi bede-ribi. ²¹ Herodi tahe itxu riywinyre. Kia txuu tahe ròhònyre tamy. Rexitynyre taiòlòtyrehe-di tahe tarynana tyre-ò ronyre, tamy Rybewihikÿmy rarybere. Tai tahe iny rirajuare: —Katahe hābu aõkõ rarybereri, Deuxu wahe. ²²⁻²³ Aõwesele

Deuxu ÿju heka Herodi rirubunyre, tii Deuxutyhymy reàlàõreki. Woudò rubudÿÿnamy rurure.

²⁴ Deuxu rybe tahe ibutumy roholare. Sõwemy iny tahe rityhynyre.

²⁵ Banabe Salu-wana nieru riwahinymy rahudi tahe, diòòsede Jerusalẽ-ribi Atxiòkia-ò. Joaõ Marku tii-wana ridyre.

13

¹ Atxiòkia dohodÿÿna heto mahãdu-ki rybe tÿnydÿÿdu mahãduõ, bede erydÿÿdu mahãduõ rÿimyhÿre. Kaheka inireny rare: Banabe, Simaõ, iniraròsõna Nike rare. Lusu ijõre, tii Sireni hãwã ludu rare. Manaï ijõre, tii Herodisÿ-ki ratibienyre, Salu ijõre. ² Ibutumy tahe Inynyrÿmy reàlàre, riroxiõhyy heka bede riemyhÿ. Tahe Deuxu Tyytybytyhy tamyreny rarybere: —Jiarÿ waaõmysÿdÿÿna dire Banabe-ò, Salu-ò. Kaiboho heka biteõnybenykre kia riwinykremy. ³ Tahe roxiõhyy bede riemy, rexitõenyrenyre. Tebõreny iratytyre ritidirenymy, idi riteõnyrenyre tabede tÿina-ò.

⁴ Deuxu Tyytybytyhy tahe tiiboho riteõnyrenyre. Selusia hãwã-ò tamy riberenyrenyre. Tahe hãwõõ rimyrenyre Xibri bedebute-ò. ⁵ Tahe rehemynyrenyre Salamina hãwã-ò. Tai judeu dohodÿÿna heto-ki Deuxu rybemy raryberenyre. Tule Juaõ Marku rare tii-wana wiõhedÿÿdu wese heka rare. ⁶ Tahe ibutumy bedebutemy rekoarenyre. Ritehemynyrenyre hãwãõ-ò Pafumy ninadu-ò. Tai tahe judeu mahãdu witxi deade, Bajesuisi heka inire. ⁷ Tii Deuxu rybeduõmy raremyhÿmy iximy rarybere tahe aõkõre, raruire, riitxenanyre. Tii bedebute hãwã dinodu-wana rare. Kadinoduni tahe Sergio-Paulo inire. Tii hãbu bedeery nihikÿ rare. Tii Deuxu rybe-ò roholakemy ratxireri. Tahe didyde Salu, Banabe-wana tamy roholakemy. ⁸ Bajesuisi, Elimasi ijõ ini rare. Tahe tii bedebute dinodu-ò rarybere uritere Salu rybe-ò, Banabe rybe-ò ijohonakõmykemy. Wanyrÿ tyhydÿÿkõmykemy dori tuu risÿnyre. ⁹ Salu tahe, Paulo ijõ ini rare. Deuxu Tyytybytyhy heka itykymy ralõmy rÿimyhÿre. Tahe Paulo retehere Elimasi-ò tamy rarybere: ¹⁰ —Kai Satanasi riõre tate. Kai heka ibutu itxenadÿÿ-di tÿxihikÿlemy ahãte. Kai heka awihikÿ òludu tate. Tiubo heka bexihukre Inynyrÿ-ribi iny riixãwididÿÿnyre. ¹¹ Deuxu heka wiji araõwynykre, aõhõkÿmy arasÿnykre, aruetãmy bonykre. Txu bobioõkre bede biwyke. Iule tahe aõwesele bede torohokÿlemy reare. Robiõhyy reare. Urile riemy ratximyhÿre, iny riwiõhenanykemy, ryy tamy ritÿnynykemy. ¹² Tahe kia bedebute dinodu tuu robire aõhebo rotÿÿnyramy, tai bede riõtiinymy rononymhÿ tahe tii Inynyrÿ rityhynyre.

13 Iribi tahe Paulo ròhònrya tajoi-wana Pafu hãwã-ribi. Rakremy riberenyra hãwã nihikÿ-ki Panfilia bedè-ò, Peke hãwã-ò. Juaõ Marku iribireny rexitara, dòòsede Jerusalẽ-ò.

14 Tahe Paulo Banabe-wana roirenyre. Peke-ribi riòlònrye tahe rekoarenrye Atxiòkia-ò. Kaa iwitxira Atxiòkia hãwã rare, Pisidia bedè-ki ratxireri. Tahe rirònryenyre judeu mahãdu dohodÿÿna heto-ò. Sabado txu rÿire. Ronymyhÿre ijohonamy.

15 Kia hãbu mahãdu heka Moisesi bedè ywina tyyriti-di, Deuxu rybemy rybedu mahãdu tyyriti-di rariamyhÿre. Tahe dohodÿÿna heto wedu Pauloboho-ò raryberenykemy rarybere: –Waseriòre, arybemy idi atxiteri-wana marybeke aõwaxiny bitÿnyke.

16 Tahe Paulo rÿire lamamy. Iwese rybedÿÿmy ròtèòsidÿÿmyhÿre wese rÿire. Tahe rexidelenrye: –Hãbu, Israeli mahãdu, tule ibutummy Deuxu rityhynymy rÿira mahãdu, bodoholabedenyke kaa ijyy-ò.

17 Israeli mahãdu Egito-ki rasÿnyreu, taDeuxu iribi ritare, moma, in-tybyreny Deuxu, Israeli mahãdu tybyreny wahe. Deuxu rasòwedÿÿnyre. Iribi tahe Deuxu Egito-ribi ritarenrye tebò ruruteretyhy-di.

18 Tiiboho bederahy-ki 40 beòramy bedè riereu, Deuxu taaõbina bina riòludunrye.

19 Kanaã bedè-ki debò inatxi reuròmÿ ixÿju ixÿju mahãdumy rahure. Idi tamyreny riwahinyre bedè, isÿhyymy rarekemy. Idi tahe rybe ywisidÿÿdu mahãdu tamy riwahinyre. 450 beòra rahureu, tahe Samuèli Deuxu rybeduòmÿ raremyhÿ.

20 Idi tahe rybe ywisidÿÿdu mahãdu tamy riwahinyre. Tahe 450 beòra rahureu, Samuèli Deuxu rybeduòmÿ raremyhÿ.

21 Iribi iny Deuxu-ò rexitòenyre iòlòmÿ tamy kadiwahinykemy. Tahe Deuxu Salu tamy riwahinyre, iòlòmÿ. Salu tahe Kixi riòre rare. Benjami mahãdu rare. Tahe 40 beòramy iòlòmÿ ronyre.

22 Salu iribi ritareu, tahe Davi, Deuxu ritamadÿÿnyre iòlòmÿ. Deuxu Davimy rarybere: –Davi Ijese riòre rare. Jiarÿ iluure. Tii ibutu wadee wimy riwinykre.

23 Tahe Davi riòkòre-ribi Jesuisi ròhònrye, Israeli tarasadumy rarekemy. Iwese juhoo Deuxu rarybere wese.

24 Jesuisi naòdeu, Juaõ ritÿnynrye Israeli mahãdu-ò iòrarureny ririkemy idi raratisebenykemy.

25 Juaõ rybe tÿnydÿÿna kònanau, tamyreny rarebere: –Jiarÿ wa iwese tahòtinytenyteri wese aõkò jiarÿ rare. Kaiboho tiwaraòõhyymahãtenyte. Betehebényke, tii, wahewomy kanakre. Jiarÿ aõ aõkò rare, iwatisana arieseòtyhy iwa ritakemy, tii dori waratyre wihikÿreki.

26 Waseriòreboho, Abraõ riòre riòremy ibutummy inyboho roire, tule Deuxu reàlàmy rÿira mahãdu kaki ratximyhÿ. Deuxu inydeereny biu-ò hedu rybe diwahinyde.

27 Jerusalẽ mahãdu, iwedureny-wana raeryòhyre tii tarasadu rare. Ibutummy sabado txu rybedu tyyriti-di rariamyhÿre tohodÿÿna heto-ki, tahe aõbo rare rieryòhyre. Jesuisi

rubudÿÿmy raryberenyreu, iwese rybeduõ rarybere wese, tiiboho rotÿÿnymyhÿre. ²⁸ Tiiboho aõbina bina-ki tai ra-haõhyyra, ihãrele irubudÿÿmy rexitõenyre Pilato-ò. ²⁹ Iwese ibutumy Jesusimy riritinomy roireri wese, ibutumy tuu rõhõnyre. Tahe itxeõ nihikÿ tyre-ribi ritarenyre. Tahe mana hãloo rawo-ò ritidirenyre. ³⁰ Tahe Deuxu rubu-ribi riixixadÿÿnyre. ³¹ Tii-wana iny mahãduõ roirenyre juhoo Kalileia-ribi Jerusalẽ-ò. Rexixamy rahudi tahe, tii mahãdule tuu robihyummy txuu widireny rÿire. Kia mahãdule inysõwey-ki relyymyhÿre. ³²⁻³³ Deuxu juhoo rarybere inytybyreny-ò aõhebo rotÿÿnykremy. Inydeereny tahe tii riwinyre Jesuisi riixixanyreki. Kia Rybewihikÿmy adeereny relyymahãreny. Iwese inatxi wiuna ritidÿÿna-ki roire wese:

—Kai waRiõre tate. Wiji tahe bomy watxiwãhãre.

³⁴ Kiamy heka Deuxu rarybere Jesusimy: —Rubu-ribi ariixix-anykemy, tiu rasunymyhÿre bede-ò rõõseõtyhy. Iwese Davi-ò jiarÿ rarybere wesemy ibutumy adee bede ariywinykre.

³⁵ Deuxu ijõ wiuna Ritidÿÿna-ki tule rarybere. Iwese Jesusile rarybere wese, kiamy roire:

—Eõdutyhy umy rasÿnyõtyhy kai dori waumysudÿÿ-ò tei-jemahãte.

³⁶ Iu Davi Deuxu dee tajoi riwiõhenanymy rahudi tahe, rurure. Tybyreny-ò tii rara. Iumy tahe rasunyre. ³⁷ Jesuisi umy tahe rasunyõre Deuxu dori rubu-ribi riixixadÿÿnyreki.

³⁸⁻³⁹ Jesuisi bityhynybenykeki, aõraru riixãwidinyke. Kiamy Moisesi bede ywina ihoõhyyre adeereny. Kia bierybenyke waseriõreboho, tiile, Jesuisi, adeereny relyywãhãreny.

⁴⁰ Bexijebenyke, kiamy adeereny rotÿÿnyke lau iwese rybedu ritina-ki roire wese:

⁴¹ —Kaiboho inatyhy derare. Betehebenyke, burubenyke, bede biõtiinybenyke, aõbo jiarÿ rewinyrerio. Inyõ adeereny ritÿÿnyke ihãrele. Tiu heka bityhynybenyõtyhy.

⁴² Tahe Paulo irybe rexihura. Iribi rõhõnyre Banabe-wana. Rexitõenyrenyre ijõ sabado biõwau tarybetybydile ixbyble relyykemy. ⁴³ Iny ritobinymy rahudi, judeu mahãduõ, judeu bede erydÿÿna ityhydÿÿdu mahãduõ tule Banabe Paulo-wana riheludunyre. Tahe tamyreny raryberenyre: —Deuxu ruxetõena-ki idi mariahyymyhÿkemy.

⁴⁴ Ijõ sabado rehemynyreu, ibutu iny hãwã-ribi doimyhÿdenyde Deuxu rybe-ò ijohonamy. ⁴⁵ Judeu mahãdu tahe inysõwemy robireu, tiiboho rexiwaritinymyhÿreny. Tiiboho raryberenyre aõbinahãkÿlemy Deuxuru-ò. Paulo riki inatyhymy aõkõ tii rarybemyhÿre. ⁴⁶ Paulo Banabe-wana ihãrele brebuõlemy raryberenyre: —Juhoo adeereny Deuxu

rybe dobehede. Tahe kaiboho tetyhynyõtenyete, tai judeukõdu mahãdu-ò aroirenykre. Kaiboho Deuxu rybe terarenyreki, ixi sohojile tahe tetaõte adeereny aõ aõkõreki. ⁴⁷ Kia Inynyrÿ bede ywina wadeereny riwahinyre: —Kai loosõna wesemy atxikre judeukõdu mahãdu-ò. Kai tarasanary ritÿnynykre ibutu inyko-ò. ⁴⁸ Judeukõdu mahãdu kia-ò roholareu, tahe reysarenyre. Deuxu rybe riwowydynyrenyete tai. Tahe rityhynyre, timybo Deuxu juhoo ritare wesele tamyreny umytuedeõna riwahinyremy. ⁴⁹ Inynyrÿ rybemy kia bedeki ibutumy relyre. ⁵⁰ Tahe judeu mahãdu rarybere hãwyywihikÿ ityhy-ò, tule hãwã wedu-ò. Tai tahe Paulo Banabe-ò òludu sõwemy resere. Tahe isubede-ribi riteõnyrenyete. ⁵¹ Paulo Banabe-wana tawa-ribi bryby riõhõwiryrenyete tamyreny tiiboho ibinareki. Tahe Ionio hãwã-ò roirenyre. ⁵² Atxiõkia ityhydÿÿdu mahãdu tahe reysamy rÿimyhÿre. Deuxu Tytybytyhy-di tÿximy ihÿre.

14

¹ Ionio hãwã-ò Paulo Banabe-wana rare. Judeu mahãdu dohodÿÿna heto-ò. Tahe rybe ritÿnyrenyete, tarurumy he relyrenyete. Sõwemy judeu mahãdu, judeukõdu mahãdu-wana rityhynyrenyete ijyy. ² Tahe ijõ judeu mahãduõ rityhynyõre. Ijyy deramy reamyhÿre, tule ijõ-ò tule rarybere ityhynyõkemy. Tahe Paulomy, Banabemy aõ òta òtalemy rarybemyhÿrenyete. ³ Ihãrele tahe Paulo Banabe-wana bede nihikÿ riwyrenyete tai. Tamy rybe ritÿnyhy roiremyhÿ ibrebuõlemy. Inynyrÿ taruxetõena rybetyhydÿÿnamy riwiõhenanyete tiiboho bedeoõbyna widÿÿdu renyreki. ⁴ Hãwã mahãdu ritxuare. Ijõ heka judeu wedu mahãdu rityhynymyhÿre, ijõ tahe Paulo Banabeboho rityhynymyhÿre. ⁵ Judeukõdu mahãdu, judeu mahãdu, tawedureny-wana widee rarybere Paulo Banabe-wana riõkõrõrenykemy tamy mana-di rehurenkemy. ⁶ Tahe tiiboho rexieryrenyete tahe rihenyrenyete. Tahe ròrenyete Listra hãwã-ò, Debi hãwã-ò, kia Laonia hãwã hãwã-ò rare. Tule rariarenyete kowa bedewo-ki. ⁷ Tahe kowa tiemy ritÿnyhy roiremyhÿ Rybe tÿmyra wihikÿ-di.

⁸ Listra hãwã-ki heka hãbuõ-txi rekoarenyete, itierere heka. Taihy heka ronymyhÿre. Tuuhy heka ratohouãmy ijarananyete. ⁹ Tii tahe Paulo rybe-ò roholare. Paulo tamy retere. Kia tahe Paulo rieryete hãbu teytetyhynadire Paulo riteytenykemy. ¹⁰ Tai tahe tamy rarybere tarybe riterenymy: —Mynyike, õbitimy. Ta hãbu rexiwatxinyete, rariare. ¹¹ Ijohona mahãdumy robireu, aõbo Paulo riwinyremy tahe rirajuare tarybe-di, Laonia rybe-di: —Ka hãbu mahãdu heka deuxu wesemy idi rexinohõtidÿÿnymyhÿre.

Inydeereny deuxu wesemy dobehede. Iumyreny tahe hãbu wesemy rare. ¹² Banabe heka, Jupitemy tadeuxurenyniõmy rininire. Paulo tahe ijõniny, Meuriumy rininirenyre irybe sõwetyhyreki, tii rybedureki. ¹³ Jupite xiwena wydydu horeru bederade-di dehemynyde. Tohodÿÿna heto hãwã ahana ube-ki rÿire. Broreni xiwe wesena tamyreny hãwã mahãdu riworonykemy, riwahinykemy. ¹⁴ Kiamy roholareu, Paulo Banabe-wana tatykyreny riykaranyre idi rihurenire. Tahe ralõmy reare inysõwey-txi rarybekemy. ¹⁵ Tamy ryryre: — Aõhebo tatÿÿnytenyteri. Jiarÿboho hãbulemy watxirenire. Kialemy adeereny rarybewãhãre, Deuxu rybetÿmyra wihikÿ. Adeuxurenire-di nohõtirenire. Bedewidÿÿdu ta mohõtinybenyke. Tii dori benihikÿ riwinyre, ibutumy biu-ki riwinyre, tahe Deuxutyhy-di mohõtinybenyke. ¹⁶ Ihetxiu Deuxu ibutumy bede bedemy sÿdu ririre ixidee wimy aõna aõnamy rotÿÿnykemy. ¹⁷ Urile tahe tamy rexideõsinyre tamy biu riwahinyre taoworumy raratynkemy. Tai tahe kaiboho arÿsÿna dire, Deuxu debò-ribi, awo-ki eysanadire. ¹⁸ Ihãrele iny tamy xiwe wesena tamy riwahinykemy ratxireri. Paulo tamyreny rarybere: — Aõkõ, inydeereny bidiwahinyõke.

¹⁹ Iribi tahe judeu mahãdu-ò Atxiòkia-ribi, Ionio-ribi tamyreny raryberenyre Paulo rubudÿÿmy. Hãwã òtityube-ò Paulo ridyrenire. Mana-di tamy rehumyhy. Tahe rubu wesemy ririrenyre. ²⁰ Idi tahe ityhydÿÿduõ tamy wirotyre. Paulo tahe suribi rÿire tahe tii-wana nalòde hãwã-ò. Ijõtxu biõwamy tahe Banabe-wana Paulo rexitare ijõ hãwã-ò, Debi hãwã-ò. ²¹ Ka hãwã-ki tahe Paulo rybe tÿmyra wihikÿ ritÿÿnyre. Sõwemy tai rityhynire, Pauloboho ròserenyre Listra hãwã-ò, Ionio hãwã-ò, Atxiòkia-ò. ²² Ibutumy hãwã-ki Pauloboho ityhydÿÿdu mahãdu riwiõhenanyrenire, tiiboho rityhynyhyomy ratximyhykemy. Tamyreny rarybere: — Kaiboho aõhõkÿmy botÿÿnybenyke, ihãrele malòkemy titxibo Deuxu Iòlò ratximyhyre-ò. ²³ Ibutu ityhydÿÿdu mahãduy ribi ritamy rÿimiyhy rarekemy, idinodumy. Matuari mahãdu-ribi tii ritare. Iu ritareu tahe, rexitõenyre Deuxu-ò tule byreõhyy txuõ riwinyrenire. Inynyrÿ-ò rexitõenyre: — Kia ibutumy aratyhynire, tai tahe biywinymy ahãke. ²⁴⁻²⁵ Pisidia bede-ki rekoamyhyrenire Panfilia bede-ò. Kowa-ò Rybewihikÿ tÿmyramy relymy rahudi Peke-ki, Atalia hãwã-ò dobehede. ²⁶ Tai hãwò nihikÿ welòdi-di rimirenyre. Tahe Atxiòkia-ò rorore. Kowa-ribi juhuule rybe tÿmyra wihikÿ ijyy-di dòhõnyde. Kowa juhuu rexitõenyre tamyreny Deuxu ruxetõena-wana rarekemy. ²⁷ Atxiòkia-ò rehemynire, Paulo, ibutumy ityhydÿÿdu mahãdu ditotynyde. Tai heka tamyreny rarybere iwese Deuxu riwiõhenanyre wese ibutumy

iaõmydÿÿnana-di. Iwese judeukõdu mahãdu rityhynykemy. Deuxu tamy ityhyna ijõtòbòna riraynyre wese. ²⁸ Idi bededÿÿnana riwynihikÿre ityhydÿÿdu mahãdu-wana.

15

¹ Hãbuõ Judeia mahãduõ ditehemynydenyde ta teòsamy ribedeerynyreny. Kawese ribedeerynyre: —Moisesi Tyyriti bedede ywina, notykyresynamy, rityhynyòkeki, iny rataòtyhy. ² Iribi tahe Paulo Banabe-wana tamyreny rarybehyy rare. Tai tahe inyõ tamy rarybere Jerusalẽ matuari mahãdu-ò roirenykemy aõmydÿÿnana rexiòbitinyreny. Iny wixira-ò Jesuisi erydÿÿna mahãdu-ò rarybekemy heka tamy, Pauloboho iteòdÿÿmy rarybere. Tahe ijõ hãbu mahãduõ tule tiiboho-wana riteònyreny. ³ Dÿÿraximy heka tamy ròirenyre, aõ aõmydÿÿnabo ratxirerímý wahe. Sõwemy dohodÿÿna mahãdu ihemy roirenyre urihímýò, tai tahe ririrenyre. Tahe Senisia bedede bedemy, Samaria bedede bedemy riòhòrereny. Relyyrene judeukõdu mahãdu tule ityhydÿÿdu mahãdu-ki rÿirerimy. Tai ibutumy ityhydÿÿdu mahãdu reysare. ⁴ Tahe ritehemynyreny Jerusalẽ-ò. Wihe ritotynyreny ityhydÿÿdu dinodu-wana, tule matuari mahãdu-wana, Jesuisi erydÿÿdu mahãdu-wana. Tiiboho relyyreny aõmybo Deuxu rotÿÿnyre iyreny-ki, timybo riwiòhenanyré. ⁵ Tahe hãbu mahãduõ tai raremyhÿ heka. Juhuu heka fariseu mahãdumy ihÿre, idi tahe ityhydÿÿdumy ralore. Imahãdu-ribi ijõ rÿire ribedeerynykemy. Tahe rarybere: —Inydeereny kia wese rare. Judeukõdu tyhydÿÿdu ibutumy notyyresyna-di ròhònyke. Tule ibutumy Moisesi bedede ywina ibutumy rityhynykemy. Kawesemy tamy ribedeerynyre òbitimy aõkõ watzireri.

⁶ Idi tahe Jesuisi erydÿÿna, matuari mahãdu-wana wii ributumy rybe òbitidÿÿmy. ⁷ Rybe sõwemy rahude tahe, Pedro rÿire tamyreny rarybekemy: —Waseriòreboho, Deuxu juhu riwatara Rybewihikÿ rybedumy judeukõdu mahãdu-ò tuu aritÿnynykemy, tiiboho tule rityhynyreny. Tai rarewãhã. Kaiboho kia ibutumy teeryteny. ⁸ Iwese inydeereny riwahinyre wese, Deuxu Tyytybytyhy tamyreny tule riwahinyre. Judeukõdu mahãduõ tule ixidee rimykeny. Kia wese tuu riteòsinyre inydeereny. ⁹ Deuxu wiribi lahiximy aõkõ iny riwinyreny. Wiwesehyyle ihÿre. Tiiboho inywesele ihÿreny. Tiiboho rityhynyreny, heka irayky rityranyreny ritarenyke. ¹⁰ Kia wese Deuxu teurihitenyteri. Kia bedede ywina itxyynautxiehekÿ wesere ityhydÿÿdu mahãdu tyre-ki tetiditenyteri. Inytybyreny tiu retyyòre tule

inyboho idi retyyõre. ¹¹ Inynyrÿ, ruxetõenale-di iny ritamyhÿre. Tule judeukõdu mahãdu kia weselere ritamyhÿre.

¹² Tahe aõmy rarybeõhyrenyre. Ibutumy he Paulo Banabeboho rarybereò, roholarenyre. Tiiboho heka relyyrenyre tule bededõby wihikÿ aõna aõna-wana Deuxu riwinyremy tadebò-di wahe. ¹³⁻¹⁴ Iribi tahe rexihurenyreu tasÿ, Txiau rÿire rarybekremy: –Waseriõreboho, bodoholabedenykre inihe warybe-ò: –Pedro kÿny adeereny rarybere, timybo Deuxu judeukõdu mahãdu roramy rare iny mahãduõ ixidee ritakremy tanityhy-ò. ¹⁵ Kiawesemy he tule ihetxiu Deuxu rybemy rybedu mahãdu riritinyre, kamy wahe: ¹⁶ –Wanyrÿ heka rarybera: –Adõõsekre, ixyby ariywinymy aritamadyÿnykre aõdohodÿÿna heto Davi juhoo riwinyre. Idi tahe resere. Ixyby ariwinykre. ¹⁷ Tai tahe judeukõdu mahãdu-ribi iuhe riwaõrykre wamy rityhynkemy. Wanyrÿ, Deuxu, kiamy heka tiiboho rarybekre, ibutumy jiarÿ retarenyreki. ¹⁸ Kawesemy Wanyrÿ tuhyy rarybemy raremyhÿ, tule wiji ihÿre. ¹⁹ Tai heka kiawidÿÿõmy rakatximyhÿrenykre. Tamyreny rybeõmy rakatximyhÿrenyke. Judeukõdu mahãdu Deuxumy rityhynyrenyreu, iny bedewy wina reny tyhydÿÿmy tamyreny rybeõmy. ²⁰ Kialemy heka tamyreny rakaryberenykre: Suritxoo xiwe-ribi iròdude ròrenyõmy. Tule òta òta òraruna widÿÿõmy, iròdu hãlubu-di ròrenyõmy, ihãlubu rejuxunyõmyhÿre-wana. ²¹ Kiamy heka rakatximyhÿrenyke. Moisesi bedewy wina-di dori ibutu hãwã-ki judeu dohodÿÿna heto-ki rariamy raremyhÿ. Sabadotxu ihyymy aõkõ kia ritÿnynymy raremyhÿ.

²² Tahe kiamy heka rahõtinyrenyre, Jesuisi erydÿÿna mahãdu, ibutumy dohodÿÿna mahãdu-wana, hãbuõ ayreny-ribi rikitakre. Tai Atxiòkia-ò riteõnyrenykemy Paulo Banabe-wana. Tahe Judasi ritarenyre tule iniòrysna Basaba rare. Ijõ tasÿ Sila inire. Ka hãbuboho ityhydÿÿdu mahãdu awimy tai raharenyre. ²³ Katyyriti tiiboho-wana rakre. Kawesemy tyyriti rare: –Jiarÿboho, erydÿÿna, matuari, seriõre mahãdu adeereny rybe wehityhyna rewahinyreri. Ibutumy judeukõdu mahãdu ityhydÿÿdu-ò ka tyyriti rakre Atxiòkia hãwã-ò, Siria bedewy, Silisia bedewy. ²⁴ Inyõ rare wayreny-ribi adeereny notykyresymy rybemy. Tai tahe araykyreny riwerydÿÿnyre. Jiarÿboho reteõnyrenyõhyre. Kia reerymy watxirenyreri. ²⁵ Tahe wiwesele rahõtinyrenyre riki, hãbubohoõ Paulo Banabe inyluudu-wana reteõnyrenyri. ²⁶ Kia hãbu Paulo Banabe-wana hãwã binahakÿ-ò roimyhÿrenyre Jesuisi Kristu Inynyrÿni-di. Ixi-txi rõhõtinyõlere, brebumy. ²⁷ Judasi-wana tule adee raryberenykre kia aõmydÿÿnanamy, katyyriti

rewahinyrenyrene wese. ²⁸ Kawese inyboho rhtinymyhyre, Deuxu Tyytybytyhy dori inyrayky rewihenanyrene. Kia bede ywinalemy adeereny rarybereri biywinybenykemy. ²⁹ Uritere, suritxoo xiwe-ribi irdude rrenymy irdu, ihlubu-di rrenymy, ihlubu rejuxunymyhyre-wana. Tule ta tana raruna widymy. Ka bede ywina biywinybenykeki, awimy boibeke. Deuxu deysana tahe adeereny kanakemy watxiwhare.

³⁰ Tahe hbu iny inaubiwamy Atxikia hw- rirenyrene. Tahe Atxikia tyhydydu mahdu ributunyrene. Iu tahe tamyreny tyyriti riwahinyrene. ³¹ Tahe idi rariarenyre, ritnynymy tamyreny. Ribedeerynyrenyre. Tai tahe reysarenyre. ³² Judasi Silaboho tule Deuxu dee rybeduwihiky roire. Swemy dohodyna-ki serire mahdu-wana rohonymyyre. Tai tahe rirurudynymyyre. ³³ Atxumy raroorehenyre, tahe serire mahdu tamyreny rarybere: —Bibenyke he atedydu mahdu-. Bikeseke wowina-di Jerusal hw-. ³⁴ Tahe Sila rhtinyrene rarikremy Atxikia-ki. ³⁵ Tahe Paulo Banabe-wana naride Atxikiakile. Inynyr rybemy rierynanyrenyneri, ritnynyrenyneri, ij serirewana.

³⁶ Atxumy tahe Paulo rarybere Banabe-: —Rksekre knyhe, ibutumy hw hw-di tai juhoo Inynyr rybemy ritnynymahre wahe, rikiwehityhynanykremy tmybo ityhydydu mahdu nyimyhde-. ³⁷ Tahe Banabe Joa-Marku ridykemy tamy reare. ³⁸ Paulo heka Joa-Marku ridykemy ratxireri, Panfilia hw-ki dori iribireny rhnyreki, riwihenanyreki. ³⁹ Marku ridykemy wiwese wesemy ak rhtinyrenyre teratyhylemy ratximyh. Tai tahe wiribi rexihitxinyrenyre, Banabe Paulo-ribi. Banabe Marku ridyra Xibri bedebute-, hw-di rira. ⁴⁰ Paulo tahe Sila ridyra. Serire mahdu tahe Pauloboho riixitedynyrene, Inynyr ruxetena tamyreny kanakemy. ⁴¹ Tahe Siria bede werawo-di, Silisia bede werawo-di, ririranyrene dohodyna mahdu riwihenanykemy, rirurudynymykemy.

16

¹ Pauloboho tahe Debi hw- rehemynyrene. Ihyy tahe Listra hw- rare. Tai tahe Tximtxi-wana witxi rekoare. Tximtxise judea tyhydydu rare. Tyby tahe grego mahdu rare. ² Listra, Ionio ityhydydu serire Tximtxi luure. Tximtximy widee rarybere: —Tii iny hbu tyhy rare. ³ Tahe Paulo Tximtxi-wana rakemy rexiywinyry raremyh. Tahe rexitarenkyre kotyre, Paulo, Tximtxi notykyresymy ritenyrene, kowa judeu mahdu raru-ki wahe. Tyby dorihe ibutumy iny rieryrene tii grego mahdu raremy.

Notykyresykõmy rake tahe judeu mahãdu dee kia ibinare. ⁴ Iribi tahe ròirenyre hãwã hãwã-di, ityhydÿÿdu seriðre mahãdu ribedeerydÿÿnykemy, timybo Jerusalẽ mahãdu røhõtinyhÿremy. ⁵ Tai tahe ibutumy dohodÿÿna heto mahãdu tii rirurudÿÿnymyhÿre ityhydÿÿna-di. Tule ijò rityhynymyhÿre txuõ txuõlemy ralokemy ityhydÿÿduõmy rarekemy.

⁶ Pauloboho Asia bede-ò ròirenyõre rybe ritÿnnykemy, Deuxu Tyytybytyhy ritirÿreki. Tahe Frigia-Alatxia bedemy rekoamyhÿrenyre. ⁷ Misia bede-ò rehemynyreu, Bitinia bede-ò ròirenykemy riwisÿnyrenyre. Tahe Jesuisi Tyytyby tamy riteònyõhyre, ritirÿmyhÿre. ⁸ Tahe Misia bedemy rekoare, tahe Troaji hãwã-ò robehere. ⁹ Tahe Paulo hãbuõ wesemy robire rasina weselemy. Hãbu, Macedonia bede ludu lamamy rÿimyhÿò, tuu robire. Tahe hãbu ryrymyhÿ tamy: —Manake Macedonia-ò, biwawiòhenanykemy. Kia Paulo rasi-ki tuu robire wese. ¹⁰ Tahe tarasi rahureu, tamyhe wylemy aroikemy watxiwãhãrenyre. Jiarÿ, Luka, Paulo-wana. Deuxu dori inydeereny rarybereri Macedonia-ò ròkòirenykemy, Rybewehikÿ rikiubÿtÿnyrenykemy. Kialemy røkøhõtinyrenykre.

¹¹ Tahe Troaji hãwã-ribi ròhònyre hãwò yhywydynalaworo-ki. Samotrasia hãwã-ò imynahyy riòhòrere. Ijò txu tahe Niapoli hãwã-ò riòhòreri. ¹² Iribi tahe Filiposi hãwã-ò roirenyre. Juhuludu hãwã rare Macedonia bede-ki. Roma hãwã mahãduõ tule tai rasÿnymyhÿre. Tai txuõ rewyrenyre. ¹³ Sabadotxu tahe hãwã-ribi reòlònyrenyre bero ijà-ò. Rahõtinyrenyre tai ixitòedÿÿna-ò rÿimyhÿremy. Tai tahe hãwyyõ rexibutunymy rÿimyhÿ. Tahe rorokorenyre tamyreny raryberenykemy. ¹⁴ Hãwyyõ Lidia inire, inyrybe-ò tahe roholatyhymyhÿre. Tii Txiatira hãwã luduõ rare. Tii tylÿre ijohodure, tule Deuxu tyhydÿÿdure. Inynyrÿ irayky riywinyre Paulo rybe rityhynykemy. ¹⁵ Tahe ibutumy isÿmahãdu-wana riratysebenyre. Tai tahe tamy Lidia rarybere: —Inaanokàbo ityhydÿÿkÿdumy watxiwãhãre-wana, wãhetoku-kò manakre. Tai tahe iheto-ò ròirenyre irybe-ki.

¹⁶ Aõutxumy tahe riberenyre ixitòedÿÿna-ò. Itxi rekoarenyre ijadòmaõ-txi, deòdu rare. Iwo-ki tyytybybina ralòmy rÿire. Tai ijadòma relyyre inyko aõhebo iny-ò rotÿÿnykemy. Tai sòwemy nieru ritare tawedu-ò. ¹⁷ Tahe waherenymy dyrymy nade: —Deuxu ibuturatyre rare. Iteòdÿÿkÿna mahãdu kia mahãdu rare. Tikiboho rarybemyhÿre timybo iny taòraru-ribi ratakemy. ¹⁸ Tuheka rarybehyy raremyhÿ. Aõutxumy tahe Paulo tai rexirare, tamy ròõsemy reare. Rarybere tyytybybina tai ratxireríò: —Jesuisi Kristu nimy iribi arateònykre. Bexitakre. Tahe aõwesele iribi ròhònyre reare.

19 Iwedu tahe rierye nieru idi ritaõkre ta rimyrenyre Paulo Sila-wana. Retÿhimy rare ywisidÿÿdu-ò, hãwã elehyna ube-ò. 20 Tahe ijadõma wedu rarybere ywisidÿÿdu mahãdu-ò: —Kaa judeu mahãdu iny hãwãreny dibinadÿÿnymyhÿde. 21 Tiiboho iny ribedeerynymyhÿre aõ iny bede ywinareny-di aõkõ. Inyboho Roma hãwã mahãdu rare. Tai kia-ki aõhe arotÿÿnyõtyhy. 22 Tai tahe sõwemy iny Paulo Sila radõnyre. Ywisidÿÿdu mahãdu tahe ityy ibòrò-ribi ritxuahakÿre idi tahe rityhenymy tuu raòhòtere. 23 Tuu raòhòtere, tuu raòhòtere, idi tahe ròtenawo-ò idi rehurennyre. Ròtena-di itxeredu-ò rarybere: —Kaa rahenykre-wana, kaile budurukre. 24 Tai rirutere iraru-txi rarutxi-ò iwa ritidire òwòru iwodÿÿwomy raratyheny. 25 Ruetya tahe Paulo Sila-wana rexitòenymy roimyhÿ Deuxu dee. Ijõ ròtenawoludu mahãdu roholamy rÿimyhÿ tai. 26 Aõwese bede ramytatare. Ròtena ijòtòbòna rirayre hãbu mynyna iribi rejuxunyre. 27 Tai tahe itxeredu ijò iraymy idi retehereu, rexirubunykemy tamaydese ritare. Ròtena woludu mahãdu rahenyramy tii rexinohõtinyra. 28 Paulo tahe tamy ryryre: —Ixirubudÿÿõmyke, kakile watxirenyreri, ibutuhukÿlemy. 29 Itxeredu ryryre loosòna kidiwykemy tahe ralore ramytatamy brebuny. Paulobohoko-ò resere tatiòhomy. 30 Tahe itxeredu diòlòdÿÿnyde irarutxira-ribi, tamyreny rarybere: —Wanyrÿboho timybohe aratamy arÿike. Aõhebohe arotÿÿnyke. 31 Tahe rirawyònyre: —Inynyryÿ Jesuisi bityhynykrekile, tarasanamy mykrekre, asÿ mahãdu-wana. 32 Tahe tamy Deuxu Rybe-di ritÿnydÿÿre ibutummy isÿ mahãdu-ò. 33 Iruule tahe riwisinanyrenyra ibrò wotõmona risuhòra. Idi tahe itxeredu raratysebenyre tasÿ mahãdu-wana ibutummy. 34 Iribi tahe itxeredu ridyrennyre taheto-ò riroxikemy tahe ibutummy reysanihikÿrennyre, Deuxu rityhynnyrennyraki.

35 Txu deadeu tahe ywisidÿÿna dinodu ijõ ywisidÿÿna mahãdu riteònyre, ròtena-ribi Pauloboho riteònykremy. 36 Itxeredu tahe Pauloboho-ò rarybere: —Ywisidÿÿna mahãdu arateònykremy riwateònyreri. Bòibenye, wowina-di, biòlònybenyke. 37 Paulo tahe rirawyònyre: —Aõkõre, araõtyhy. Jiarÿboho Roma hãwãhãkÿ mahãdu kaa watxirenyreri. Tii riwayhytanyrennyra idi ròtenawo-ki riwasÿnyrennyra. Ywisidÿÿdu mahãdu wii rotykõhyre riwaròtenyrennyra. Wasimy ka tiu ariòlònyõtyhy. Tiiboho kodoikreule tahe ariòlònykre. Tii he riwaòlòdÿÿnykre. 38 Tahe ywisidÿÿna mahãdu tawedu-ò rarybere. Tahe tiiboho ruberurennyre Pauloboho Roma hãwã mahãdu roireki wahe. 39 Tai tahe dòidenyde tamyreny, aõwaxina riòlònykremy. Tahe làhãmy

tamy rexitøenyre. Tutyhy-ki aõkõ làhà ararutara. Tai riteønyrenyreu, hãwã-ribi rexitarenykemy tamy rexitøenyra. 40 Rexitarenyreu, Pauloboho tahe Lidia heto-ò ròðsere. Ibutumy ityhydÿÿdu tahe wii ritotynyre, wii riwiðhenanykemy. Idi tahe riòlønnyre kia hãwã-ribi.

17

1-2 Tiiboho rekoarenyre Afipoli hãwãmy, Apòlonia hãwãmy tahe rehemynyre Tesalonia hãwã-ò. Judeu dohodÿÿna hetoõ tai rÿimyhÿreò. Paulo, iwese aõu riwinymyhÿre wesele rare tamy. Ralore rybe-di rarybekemy. Inataõ sabadomy tai riraynyre tyyriti ritidÿÿna tamy ritÿnynykemy. 3 Rybe hitxina rurukremy tuu relyyre. Tahe Paulo tamyreny ritÿnynyre iwese Kristu durudemy idi dexiixixanyde rubu-ribi. Kia iny rityhynyra Jesuisi inatyhymy Deuxu deòdÿÿna raré. 4 Tahe ijohonadu mahãduò rityhynyre. Tule ijõ judeukõdu mahãdu rityhynyre. Tule ijõ hãwyy wihikÿ mahãduò rityhynyre sòwemy. 5 Tahe judeu mahãdu dinodu tuu ròhãrumyhÿre. Tiiboho tahe hãbu binahakÿ mahãduò wii rotyre aõbina ritelenykremy. Tahe ròirenyre Ijasõ heto-ò Pauloboho rimyrenykremy, ywisidÿÿna-ò idi retÿhikremy. 6 Tai tahe rahaõhyyre tai. Tahe Ijasõ ritarenyre ijõ ityhydÿÿduò-wana. Tahe ridyrenyrene ywisidÿÿna-ò. Tahe raryberenyre ywisedÿÿdu mahãdu-ò: —Paulo, Silamy urile bede diòtanymyhÿdenyde, aõna aõna binahakÿlemy rotÿÿnymyhÿre. 7 Ijasõ tahe ritirÿmyhÿre taheto-ki. Tiiboho iny òludu roire. Iny iòlòreny rityhynyòtyhy. Jesuisi ka iòlòrenyrene. 8-9 Ibutumy iny idi ròhõtynyre, tule ywisidÿÿna mahãdu rexitøenyre nieru ririkemy. Tai xiery tahe ròhònyke. Tai tahe ririrenyre nieruò.

10 Kiaru tahe ityhydÿÿduò Pauloboho riwiðhenanymy iribi riòlònykemy Bereia hãwã-ò. Tahe rehemyhÿreu, dohodÿÿna-ò ròirenyre. 11 Kia hãwã-ki judeu mahãdu iny awi rare, Tesalonia hãwã mahãdu wese aõkõre. Teysamy tamy roholarenyra. Idi heka rariara Tyyriti-di, òbitimy Paulo rybe aõbo roirerimy rierykemy. 12 Tahe sòwemy judeu iny rityhynyre. Judeukõdu mahãduy-ribi sòwemy rityhynyrenyrene, hãwyy wihikÿ, hãbu-wana tule rityhynyrenyrene. 13 Bereia hãwã-ki Paulo Deuxu rybe ritÿnynymy raremy. Judeia mahãdu dinodu Tesalonia hãwã-ki roholareu, tahe doidenyde. Iny sòwe-ò raryberenyre: —Pauloboho bibinadÿÿnyke. 14 Tahe ityhydÿÿdu seriòre mahãdu aõwesele Paulo riteønyrenyrene ahohokÿry-di. Sila, Tximòtxi taile rarire. 15 Hãbuò rare Paulo-wana Atena hãwã-ò. Iribi tahe dòðsede hãbuò. Paulo tamy tarybe riwahynyra Tximòtxi Sila-ò, wylemy kanakremy.

16 Paulo Atena hãwã-ki riraðreu, tahe robire suritxoole rityhynymyhÿreð. Tai tahe tii rabedewore. 17 Idi tahe Paulo ralore dohodÿÿna mahãdu heto-ò judeu dee rarybekemy, tule judeukõdu ityhydÿÿdu dee rarybekemy. Tahe rarybemyhÿre txuõ txuõlemy. Tule hãwã ube-ki rarybemyhÿre hãwã-di reamyhÿre mahãdu-ò. 18 Aõutxumy tahe Epikuriu mahãdu Paulo-txi nade. Estòiku mahãdu ijõre. Tiiboho, aõbo rybe rare kia eryðu roire. Tiiboho he Paulo raujõmorenyre: — Aõmy aõkõ, kiarybedu rarybereri. Ijõ tahe rarybere: — Tii Deuxu tÿmyramy rarybereri. Paulo dori juhoo Jesuisi ixixanamy relyymy raremyhÿ. Tai kiamy raryberenyre. 19 Paulo tahe ridyrenyryre. Tai iny roholamy rÿimyhÿreð ridyrenyryre: — Rybe tÿmyramy telyymahãtemy inihe bedelyyke wakoreny. Tamy kia rarybere. 20 Aõkõre inihe aõna aõnamy tarybemy atxiteri, aõwixira wixiramy. Tai aroholarenykemy watzirenyre. 21 Atena hãwã mahãdu, tule iwixira bede luduõ tai rasÿnymyhÿre, aõ tÿmyraðòle roholarenykemy ratxirenyre. 22 Tahe Paulo rÿire rybenatya-ki. Rexiðrarunymy rarybere: — Atena hãwã mahãdu, kaiboho Deuxu rybe hyky tahõtinyahãtenyete. 23 Jiarÿ hãwãmy rariamy watzireriu, sòwemy xiwena-di retehera. Ijõ-di kiamy retehera iritina-di: Kaa Deuxu heka inyõ rieryðhyymyhÿre. Ka Deuxumy kÿny heka akoreny arelyykre, teerymahãtenyete-di aõkõ tuu tealãmahãtenyete. 24 Ka Deuxu ibutumy bede riwinyre. Ibutumy tuu rÿira tii riwinyre. Tii heka biuwetty wedu rare, su wedu rare. Aõ hãbu widÿÿna heto-ki aõkõ tii rasÿnymyhÿre. 25 Tiu heka tii aõmy reaðtyhy hãbu aõ tamy riwahinyðtyhy. Tule tahe inydee ibutumy aõna aõna riwahinyymyhÿre, ele wesena, umy, ibutumy inydee riwahinyre. 26 Hãbu sohojið-ribi ibutumy iny ròhònyre iriðre riðremy bede wixira wixiramy rasÿnymy rÿirakemy. Urile wiribi rihitxihitxinyre. Tiu tamy riteðsinyre, tikibo rasÿnymy rÿirakemy. 27 Ibutumy Deuxu rajemyhÿkemy, raerykemy. Tii dori irehemy aõkõ ihÿre iny-ribi. Iny sohoji sohojið-ribi iòhòmy ratximyhÿre. 28 Deuxu òraru-ki inyboho ibutumy irumy ratximyhÿrenyryre, ririranymyhÿre, ihoðeki tahe aõ rikiwinyrenyðtyhy. Atyyriti widÿÿduð kiamy rarybere: — Inyboho heka Deuxu riðre. 29 Inyboho Deuxu riðre rareki, urile nohõtìomy womati tÿrÿrÿÿ ritxoo wesemy, womatiura wesemy, manaritxoo wesemy Deuxu-di nohõtìomahãbeny. Hãbu rayky-ribi, hãbu debò Deuxu relerey nohõtìomahãbeny. 30 Ihetxiu tii Deuxu rieryðhyrenyryre. Tai tahe iðrarunareny aõnihikÿmy aõkõ Deuxu dee ihÿre. Wiji bededÿÿnana tahe, ibutumy taðraru-txi ixi-txi nohõtìi jiaranamy, tai tahe rabedewomyhÿkemy. Kia tahe ibutu iny-ò

rarybereri, iny taòraru ririkemy. ³¹ Deuxu Jesuisi riixixanyre rubu-ribi. Tai tahe ibutumy tii rityhynyrenykemy ihÿre. Aõtxumy tahe ibutumy iny ywisidÿÿdumy kanakremy ijÿre. Òbitina-di Jesuisi iny ritxuarenykre kia wiribi hitxi hitxina txuu.

³² Paulo Jesuisi ixixanamy rarybereu, inyõ tuu rirajuare. Ijõ tahe rarybere Paulo-ò: –Ijõ txuu arybe ini arohohatyhykemy watzireri. ³³ Idi tahe Paulo rare iribireny. ³⁴ Ijõ iny tahe Jesuisi rityhynyre, Paulo-ò tahe rixibutumy. Ijõ Dionisiu inire, Areòpolo heto ube-ki tii iny mahãduõ roholamyhÿre. Ijõ, hãwyyõ rityhynyre, Damari inire, tule ijõ mahãduõ rityhynyre.

18

¹ Paulo tahe Atena hãwã-ribi ròhònyre Oritxi hãwã-ò. ² Kia-ki tahe judeu mahãduõ-wana witxi reare. Ini heka Akila inire. Tii Ponto hãwã-ki raumynyre. Urihimyòle Italia bede-ribi dehemynyde. Prisila ihãwyyinire. Iòlò Laujiu Roma hãwã-ribi ibutumy judeu mahãdu diteònyde. Tai heka nade kaweribi-ò. ³ Paulo iaõmysÿdÿÿna rierymy hÿre, tyheto widÿÿ. Tai tahe tiiboho-wana rajoinymy hÿre wiwana raaõmysÿdÿÿrenykemy. ⁴ Sabado txuõ txuõlemy tamy reamy hÿre judeu mahãdu dohodÿÿna heto-ò. Tahe ritohonymy hÿre, judeu mahãdu judeukõdu mahãdu tule. Tamy rarybere tii Rybewihikÿ òbitimy rierykemy.

⁵ Sila tahe Macedonia bedewe-ribi rehemynyre, Tximõtxi-wana. Paulo tai rybe ritÿnynymy hÿhy raremy hÿ. Aõu Paulo rarybere: –Inatyhymy Jesuisi Deuxu deòdÿÿna rare, Kristu rare. ⁶ Katahe judeu mahãdu tamy raykarananymy raremy hÿ. Aõbinahakÿlemy Jesuisimy rarybere. Tahe Paulo taty riohowire iixãwidinykemy riteòsinykemy. Tahe tamyreny rarybere: –Jiarÿ aõkõ bede òrarure. Kai aòraruna-di burukre-wana, ahãlubureny waki aõkõ rare, adeereny dori Deuxu rybemy rarybere. Tahe judeukõdu mahãdu-ò sohojile tuu arelyykre. ⁷ Iribi tahe inyõ heto-ò Paulo rare. Txisiu Justu inire. Tii judeukõdu mahãduõ rare, tahe Deuxu rityhynymy hÿre. Judeu dohodÿÿna heto bire-ki iheto rÿire. ⁸ Krispu judeu dohodÿÿna heto weduni rare. Tii tasÿreny ibutumy Inynyrÿ rityhynymy hÿre. Tule sòwemy Oritxi hãwã mahãdu rityhynymy hÿre. Paulo riratysebedÿÿrenyre. ⁹ Paulo tahe rummy ròrõmy roire. Tai tahe rasana wesemy robire. Inynyrÿ tamy narybede: –Brebuõmy, Paulo. Marybeke aõmybo rybemy adee rewahinyré. Rybe tÿnydÿÿ lau brebuõmy. ¹⁰ Jiarÿ adi watxiwãhãre urenana. Inyõ adee aõhe rotÿÿnyòtyhy. Sòwemy iny rÿire kaki watyhydÿÿdu. Kia Jesuisi tamy rarybere. ¹¹ Tai he

Paulo bede riijere sohoji beðra weeremy tai bede riere. Ribedeerynymyhÿre Deuxu rybemy.

¹² Roma dinodu tÿmyraõ ronyre Grecia bede-ki. Ini heka Kalio inire. Dinodumy ronyrau tahe, judeu mahãdu wii dotyde. Wii ritobinyre Paulo dee aõbinabinahãkÿ riwinykremy. Tahe tiiboho Paulo rimyrenyre idi kanakremy ywisidÿÿdu dinodu-ò. ¹³ Kiamy raryberenyre: —Paulo, Deuxu dealãnamy iny dibedeerynymyhÿde. Tai bede ywina rityhynyõhyymyhÿre. ¹⁴ Tahe Paulo ixideele rarybekemy ratxireri, tahe Kalio judeu mahãdu-ò rarybere: —Kia rubudÿÿdu ada aõ ibinatyhymy ratxikeki, tai idi arohonykre, ariywisidÿÿnanyke. ¹⁵ Tahe aõkõre, urile abede ywina rybedile rarybemyhÿre, tai ywisidÿÿnamy idi araõkre. Kaibohole biywisidÿÿnanybenyke. ¹⁶ Tahe Kalio ibutumy diteõnyde ywisidÿÿna hetoube-ribi. ¹⁷ Tai tahe judeu mahãdu dohodÿÿna heto wedu rimyrenyre. Sòteni inire. Tule raòhòterenyre ywisidÿÿna heto ube-ki. Kalio tahe kia òhòtena-ò aõhe rotÿÿnyõhyylere.

¹⁸ Oritxi hãwã-ki Paulo rare myhÿre sõwemy he tai txu riwyre. Idi tahe seriõre mahãdu-ò rarybere: —Arakre. Tahe hãwõ-di he rare, reuròkemy Siria bede-ò. Tahe Prisila Akila-wana tii-wana ròirenyre. Paulo Deuxu-ò rarybere aõmybo rotÿÿnykremy. Idi tahe rexihumy kia rÿire. Tai tahe tarade risyre nohòti ijerana wesemy. Sekrea hãwã-ki tarade risyre. ¹⁹ Tahe ritehemynyre Efesu bede-ò. Prisila Akila-wana ririre. Iribi tahe rare tyyriti ritÿnynyremy judeu mahãdu dohodÿÿna heto-ò. ²⁰ Tii mahãdu tahe Paulo rexitòenyre tai aõutxumy tai ratxunykemy. Tahe rarikòkemy ratxireri. ²¹ Karibi ròhònyreu, tamy rarybere: —Deuxudeewikeki, ixyby adòòsekre. Efesu-ribi ròhònyreu, yhydynamawõ rimyre.

²² Ritehemynyre Cesaria bede-ò. Iribi resereu, Jerusalẽ hãwã-ò rare. Tahe rarybere riwehityhynanyre dohodÿÿna mahãdu. Iribi tahe Atxiòkia hãwã-ò rare. ²³ Tai bededÿÿnana riijere idi tahe rara. Rariamy rare hãwã hãwã-di, Alatxia bede-di, Frigia bede-di. Ibutu hãwã-ki ityhydÿÿdu rotohodÿÿnymyhÿre, riwiòhenanymyhÿre.

²⁴ Iu tahe inyõ judeu mahãduõ dehemynyde Alexÿdria hãwã-ribi. Apòlo inire. Tii ribedeeryny wihikÿmyhÿre tyyriti, tarybe-di rotohononymyhÿre, Deuxu rybe rieryreki. ²⁵ Inyõ Apòlo rierynanyre timybo Inynyry Jesuisi aõmydÿÿnana raremy. Tai Jesuisimy ribedeerynymy raremyhÿ, deysanatyhy-di rarybemyhÿre. Tii tahe Joaõ ratysebenale rieryre. ²⁶ Apòlo rexidelenymy relyyre judeu mahãdu dohodÿÿna heto-ki. Prisila Akila-wana tai roholamy rononymyhÿre. Idi tahe tiiboho Apòlo ridyrenyre ibutumy

Jesuisi aõmydÿÿnanamy tamy ritÿnykemy. ²⁷ Iribi tahe Apòlo ratÿinykemy rexiwonyre Grecia bedey-ki. Ityhydÿÿdu seriòre tamy rybe riwahinyre, Grecia ludu seriòre mahãdu-ò, aõma, riryludunykemy, rehemynykeu. Tahe rehemynyreu, sõwemy riwiòhenanyre kia tyhydÿÿdu seriòre, Deuxu ruxetòena ityhydÿÿdu mahãdu. ²⁸ Tii dori judeu mahãdu raykyrybe itxÿte riwitziradÿÿnyre iny sõwe hekÿy-ki. Rybetyyriti ritina-di riurihimy rarybere iwese Kristu Jesuisi raremyhÿ wese, Deuxu deòdÿÿna wahe.

19

¹ Apòlo, Oritxi hãwã-ki rareu, Paulo rabetetÿinyre kabedey-ki idi rehemynyre Efesu hãwã-ò. Kowa ityhydÿÿdu mahãduò-ki he rahare. ² Tamy Paulo ritÿÿraxinyre: — Tetyhynyteu, Deuxu Tyytybytyhy ixidee aõbo temytenyte. Tahe rirawyònyre: —Aõkõre he, aõmybo tarybeteri. Deuxu Tyytybytyhy reeryõrenyre. ³ Paulo rÿÿraxire: —Taratysebetenyteu, mobohe tetyhynytenyte. Tahe rirawyònyrenyre ixityre: —Retyhynyrenyre ibutumy Joaõ Sebedÿÿdu riwabedeerynyremy. ⁴ Paulo tahe tamyreny ritÿnynyre: —Joaõ sebedÿÿna urihimyò iwitxi rare. Tii kiawese rybe ritÿnynyre: iny taòraru-txi tõhõti reakemy. Tahe Jesuisi Juaõ hewo-ribi kanakreu, tii tahe inatyhymy kanatyhydÿÿkre. Paulo kia tamyreny rarybere. ⁵ Kia-ò roholareu tahe, raratysebenyre Inynyrÿ Jesuisi nimy. ⁶ Paulo iratytyre tebò ritidire, tai Deuxu Tyytybytyhy tamyreny ralore. Tahe Deuxu rybemy raryberenyre, tule iwitxira rybemy raryberenyre. ⁷ Waòinatxi reurò hãbumy rÿiramy.

⁸ Inataõ ahãdumy Paulo reamy raremyhÿ judeu dohodÿÿna heto-ò. Tiiemy rarybehyymyhyre, riòbitinymyhyre, Deuxu Iòlònamy ritÿnynymyhyre. ⁹ Paulo-ò ijohonaduò rityhynyõhyymyhyre, teramy reamyhyre. Deuxu aõmydÿÿnanamy ibinamy rarybemyhyrenyre iny sõwey-ki. Tai tahe Paulo rexihitxinyre judeu dohodÿÿna heto-ribi. Txirano kia tyyriti rybena heto-ò txuõ txuòlemy ralòmhyhyre taerydÿÿna-wana. Tahe rabedeerynymyhyre. ¹⁰ Tahe bederie inatxi beòramy. Tai tahe ibutumy iny Asia bedeludu mahãdu Inynyrÿ rybe-ò roholamyhyre, judeu mahãdu, tule judeukõdu mahãdu. ¹¹ Deuxu aõna aõna wiwihikÿ riwinyre Paulo debò rihuòtere. ¹² Paulo tykyyre riwyrenyre webinadutyre ritidirenykemy. Tyky õsuròna wesemy ijõmy riwyre. Tai tahe webinadu riteytenymyhyre. Tule tyytybybinahakÿ iny-ki raremyhÿu, aõwesele iribireny rõhõnomy reare tykyyre õraru-ki. ¹³ Ijõ judeu mahãduò ratÿinyre hãwã hãwã-di inyò ribi tyytybybina ritakemy.

Tiiboho tyytybybina riteònykemy idi ratxireri. Tai tahe Inynyrÿ Jesuisini-di riteònyre. Kia wesemy rarybere: – Paulo, Jesuisi rybe ritÿnynymyhÿre, tai Jesuisini òraru-ki iribi bòhònykre. ¹⁴ Debòinatxi seriòre kia riwinyre. Sewa tybynire, judeu xiwena widÿÿdu kia wedu tii rare. ¹⁵ Tahe Jesuisi ni-di tyytybybina-ò rarybereu, tyytybybinaò dirawyònyde: –Jesuisi reeryre, Paulo reeryre, tahe mobo atxiteri. ¹⁶ Tahe hãbu tyytybybina-di ratxirerí, ityrehekÿle dexiwatxinyde, rihetenyre, ibutumy riwotòmonyre ityky ritare tai hetowo-ribi hãbu mahãdu tadehekÿlemy rahenyre. ¹⁷ Ibutumy Efesu hãwã mahãdu kia rieryrenyre, judeu mahãdu, judeukòdu mahãdu. Tahe ibutumy ruberure, Jesuisi ni nityhydÿÿhÿkÿmy ini raremyhÿki. ¹⁸ Sòwemy ityhydÿÿdu taòrarureny riixitòedÿÿnymyhÿre, dohodÿÿna mahãduy-ki. ¹⁹ Ijò ityhydÿÿdu juhoo tyytybybina rierymyhÿrenyre, tiiboho tahe tatyryiti diwyde itxenadÿÿmy rybetyryiti, òwòruwidÿÿ kia tyyriti. Tahe iny retehemyhÿreruki kia tyyriti sòwemy ritoonyre. Idi ibutu tyyriti juhoo òwy wese inyò riritinyre. Iòwy tahe 50 mil womati ura nieru juhoo iòwyre. Ihãrele tahe idi rahure. ²⁰ Ibutumy kia bede mahãdu Deuxu rybe-di ròhòtinihikÿrenyre.

²¹ Idi tahe Paulo tarayky-ki ròhòtinyre: –Judeukòdu mahãdu bede-ò arakremy ixi-di watxiwãhãre. Juhoo Jerusalè-ò arakre Macedonia bede-di Akaia bede-di arariamy arakre. Adòòsekreu, tahe Roma hãwã-ò arakre. ²² Tai tahe tawihedÿÿdu Tximòtxi, Erasto-wana Macedonia bede-ò riteònyre. Tai Paulo Asia bede-ki naride. Bededÿÿnanaò riwyre.

²³ Kia bededÿÿnanau aòbina nihikÿ rÿikemy riwisÿnyre Deuxury òbitina òraru-ki. ²⁴ Dimitiu heka womati tÿrÿrÿ ura ritxoo widÿÿdu rare. Hãwyy ritxoo ihãwãreny deuxu rare. Diana inire. Nieru sòwemy ritamy raremy idi riwinyymyhÿreki. ²⁵ Dimitiu ributunyre ibutumy womati ritxoo widÿÿdu, tamahãdu-wana. Tamyreny rarybere: –Wanyrÿboho adeereny ararybekre. Inyboho nieru ritamyhÿrenyre kaa aòmÿsÿdÿÿ-ki. Kia tahe teerytenyte. ²⁶ Paulo rarybemyhÿre kaa inywidÿÿnareny deuxu aòkò rare. Tai tahe sòwemy iny tamy nariade irybe-di. Efesu hãwã sohojile-ki aòkò, ibutumy Asia bede-ki irybe rityhynymyhÿre. ²⁷ Iny aòmÿsÿdÿÿna òsana riixãwididÿÿnykre, ideuxu dohodÿÿna heto-wana, iny deuxu reny riixãwididÿÿnykre. Diana inyluure. Kaki sohojile aòkò inyluure, ibutumy Asia bede-ki, tule bede bede ludu iluu inihikÿmy awireki. Paulo heka kia ibutumy rahukre. ²⁸ Kia roholareu tahe, raykarananyrenyre. Ryyrenyre: –Diana awi rare inydeereny. Tii Efesu hãwã deuxu rare. ²⁹ Rirajuamy

rÿimyhÿ hãwã-ki. Hãwã mahãdu, Kaio Aristarku-wana rimyrenyre tahe ridyrenyre butunaube-ò. Tiiboho Paulo tÿimahãdu rare, Macedonia hãwã mahãdu rare. ³⁰ Tahe Paulo ralòkemy rexiwonyre tatÿi mahãduhe-ki, iny sòwey-ki tahe taerydÿÿna ijoi ritirÿre. ³¹ Tule ijò bededinoduò, Paulo wiòhedÿÿmy ratxireri. Tai tarybereny Paulo-ò riwahinyre ibutunaube-ò raòkemy, brebunamy roireriki. ³² Tiilemy ijò rarybemyhÿre. Ijò iwitxiramy rirajuamyhÿre. Urile wimy rauriurire. Aõherekibo ibutumy rÿirerí, iny rieryòhyyre. ³³ Alexÿdre iny sòwey-ribi rimyrenyre tahe, idi retÿhire, ritamadÿÿnyre iny rudera-ò. Alexÿdre debò riteòsinyre tamahãdumy rarybekemy. ³⁴ Iny sòwemy idi retehereu, judeu mahãduò raremy rieryreu tahe rirajuatyhyre. Tahe inatxi òramy rirajuahyy rÿimyhÿ: —Diana awi rare. Tii heka Efesu deuxu rare. Kiamy rryrenyre. ³⁵ Idi tahe hãwã weduò riixãwididÿÿnyre. Tahe rarybere: —Hãbu, Efesu hãwã mahãdu. Ka hãwã Diana hãwã rare. Kaki tohodÿÿna heto reyrubuwãharenyre. Kaki biu-ribi mana ritxoo desede. Ibutumy kia reeryrenyre. ³⁶ Kia inatyhy rare. Tai tahe rikiyrymy rokorokorenykre. Aõwesele aõwidÿÿòmy. ³⁷ Kaa hãbu tedytenyteri. Aõhe rotÿÿnyòreri. Aõ-di rawasinyòhyreri dohodÿÿna heto-ribi. Aõbinahakÿ iny hãwyy deuxumy raryberenyòhyreri. ³⁸ Dimitiu tamahãdu-wana aõbo tai reny ibinamy ihÿrenykeki, ywisidÿÿdu-ò idi rakre. Tiiboho heka wii ributunumy rÿireri. ³⁹ Ijò rybe tahe atxibenykeki, ijohonadu mahãdu adibutunykre arybe-ò aroholarenykemy. Iwese inyboho rotÿÿnymyhÿre wese arieryrenykre. ⁴⁰ Roma hãwã dinodu òsana aõmybo inymyreny kanarybekre. Wiji inyboho aõhebo rotÿÿnyrenyrimy. Aõ kÿnyhe iò-ki ka wiji jei jei rÿireri wahe. Roma hãwã dinodu tarybe kidiwahinykre-wana wahe, timyhe warybeòna. ⁴¹ Tahe riixãwididÿÿnyre. Ròòsere ibutumy.

20

¹ Kia jei jei rybe rexihureu, Paulo tahe taerydÿÿna mahãdu-ò tarybe riteònyre tiiboho kanakemy. Tahe rakrekou tyremy tamyreny Deuxu rybe-di rotohonnyrenyre Deuxudeewimy rierykemy. Idi tahe ritobinyrenyre. Rare heka Macedonia bedè-ò. ² Ibutumy titxibo rexitomonumyhy ritohodÿÿnymyhÿre ityhydÿÿdu mahãdu-ò. ³ Tahe Akaia bedè-ki heka bedè riijere inataò ahãdu. Tahe rexiywinumyhÿre ratximyhÿ Siria bedè-ò rakremy hãwò-di ridymyhÿredi heka rakremy rexiywinyre. Idi tahe judeu mahãduò irubudÿÿmy rarybemy nyimyhÿ. Inyò Paulo rierydÿÿmy, tai ta Macedonia bedè-di ròòsere Siria bedè-ò

rakemy. ⁴ Hãbuõ ramyhÿre tii-wana Jerusalẽ-ò, ta kamahãdu Asia bedeòle he roirenyre. Sopatu ijõnire, tii heka Bereia hãwã mahãdu rare, Biru heka Sopatu tybyni rare. Aristarku ijõre, adelahelÿÿna ijõni rare, tiiboho Tesalonia hãwã mahãdu rare. Ijõ Kaio inire, tii Debi hãwã mahãdu rare, Tximòtxi ijõ rare. Tule ijõ Asia bede ludu rare, Txitxiò ijõ, Trofimo ijõre. Rarekie. ⁵ Kiaboho juhutyhy rexiraòmy roirenyre. Paulo riraòmy Troaji hãwã-ki. Tule riwaraokre —Luka jiarÿ ka tyyriti widÿÿdure. ⁶ Worana bedehesi ituereu tahe, jiarÿ Paulo-wana roirenyre heka hãwò-di Filiposi hãwã-ribi. Iruyre txu rÿidi tahe rehemynyre. Troaji hãwã-ò. Taita sohoji semanamy rewyrenyre.

⁷ Tahe nobiutxu ityhydÿÿdu mahãdu iny wi ributunyre, Inynyrÿ mona, rÿsÿna-wana tuu rihitxinymy rirÿsÿkemy. ⁸ Tahe Paulo iu rybe ritÿnynyre itxu biòwamy rexiywiny my rÿimyhÿ tahe rakremy. Urile tahe rarybereri hyky tahe ruetya he wihe ritotynymyhÿrenyre. Hetoranoa-ki biu-ki rÿimyhÿre. Kanoòtyhy-ki rabuturenyre. Tiu Paulo rarybemy rarybemy rexihukòhyyre, biurasòmy rakreki. Tahe sòwemy heka lamparina rÿimyhÿre. ⁹ Ronymyhÿ, moma inire, Otxiu. Aõma-ki ronymyhÿ, heto janela tyre-ki biu-ki. Ta tòhòti rosare, ròròmy resere. Iribi reare, biuribihikÿle resere suò. Rurure. ¹⁰ Tahe Paulo robehemy rare tamy. Tatiowotimy resere weryrybò rimykre my iwetya-ki. Paulo rarybere: — Bedeòtiidÿÿòmyke irulemy roire. Deuxu ixyby iumy tamy riwahinyre. ¹¹⁻¹² Weryrybòmy irumy robirenyre tahe, ibutumy reysarenyre. Tai tahe Inynyrÿ bemona, rÿsÿna-wana tuu rirÿsÿrenyre biu-ki wahe. Paulo ixityre rarybere. Txu iòlò iòlòmy rareri-wana tahe rarybere. Tahe Paulo rare. Tatilemy rare Aso hãwã-ò. Tii tamy tarybe ririrehe: —Kowa ayhywydyna lawò arimykre.

¹³ Tahe jiarÿ, Luka, wamahãdu-wana roirenyre yhywydynalawò-di Aso hãwã-ò Paulo-wana rekoarenykemy. ¹⁴ Rehemynyrenyre tahe, Paulo ralòmy yhywydyna laworo-ki. ¹⁵ Imytxubiòwa tahe Kio hãwãko-txi rehemynyre. ijõ txu tahe Samosi hãwã-ki rehemynyre. Ijõ tahe rehemynyre Mitilene-ò. ¹⁶ Paulo ixitamadÿÿ deramy reare Efesu hãwã-ò. Raeleemy ratximyhÿ Jerusalẽ-ò rehemynykemy, aõma, Pentecoste kia judeu worana bedehesi-ò raeleelere.

¹⁷ Tahe Miletu hãwã-ki rehemynyre, dohodÿÿna matuari mahãdu tamy he rarariòwyre tamy rarybekremy hãwò-ò kedehemynykemy. Tahe Efesu-ribi ditehemynydeu, kia tamy rarybere: ¹⁸⁻¹⁹ —Tahe tiemy Asia bedeki Inynyrÿ-ò raaòmÿsÿdÿÿhyy watxiwãhãre. Aõmy aõkõ

ixidee rahõtinywãhãre. Rahinymahãre, Inynyrÿ dee rybe retÿnynmahãre. Warube resehyy watxiwãhãre. Tai ta brebuna nihikÿ waumy-di rarewãhã. Judeu mahãdu heka sõwemy wamy rarybemy riwarubunykemy. Kia ibutumy aõmydÿÿnana teerytenyte. ²⁰ Tiu raberuõhyywãhãre Inynyrÿ nimy rybemy. Ibutumy rarybewãhãre iny sõwey-ki tule heto hetowomy relyymahãre. ²¹ Judeu mahãdu-ò retÿnynyre tule judeukõdu mahãdu-ò taòraru ririkemy Deuxu dee taòraru-txi tõhõti reakemy rabadewokemy. Tule Jesuisi Kristu rityhynykemy. ²²⁻²³ Katahe wiji arakre karibi Jerusalë hãwã-ò. Deuxu Tyytybytyhy heka wadee dyrymyhÿde. Aõhebo arotÿÿnykre, reerykõre. Kiale reerywãhãre, aõma, Deuxu Tyytybytyhy wadee rarybemyhÿre ibutu hãwã-ki, aõma, aõhõkÿmy arotÿÿnykre kowa. Rotenawo-ki aroikre. Myle reeryre. ²⁴ Tiiemy tamy raaõmysÿdÿÿmahãre. Kiale wadee Inynyrÿ Jesuisi rewahinyre urenana. Kia ariwinyõkeki, aõ aõkõ heka jiarÿ waumy-ki. Tii arelyywãhãke inyko-ò rybe tÿmyra wihikÿ, timybo Deuxu inyluurenyre. ²⁵ Araerynanywÿhÿrenyre Deuxu Iòlõnamy, wamy tahe bobibenyõtyhy ixityre. Kia reerywãhãre. Jiarÿ tule umyreny arobiõtyhy. ²⁶ Tahe adeereny aõmybo ararybekre. Ryranymy heka watxiwãhãre ibutu hãlubu-ribi. Kaiboho aòraru-di burubenykeki, jiarÿ aõkõ tuure. Inyõ wamy rarybeõtyhy aõma Rybewihikÿ-di jiarÿ itÿnynyõmahãremy. ²⁷ Tiiemy rarybehyy rarewãhã ibutumy Deuxu bede ywinamy. ²⁸ Tai tahe ixi-di awimy boibekre. Iwese budoeni itxeredu tamy rÿsÿna riwahinyre wese, kaiboho ityhydÿÿdu mahãdu-ò Deuxu rybe tamyreny biwahinybenykre. Deuxu dohodÿÿna mahãdu tii rare. Jesuisi tahãlubu-di tii riwyre. Tai tahe ityhydÿÿdu mahãdu wiõhedÿÿdumy kaiboho toite. ²⁹ Karibi arohonykreu, aitxeredu mahãdu kanakre. K reeryre. Adeereny õbitimy aõkõ rierynanykre. Tiiboho ahola wesemy ratximyhÿrenyre. Iwese budoeni-ò imynymy ròsemy ramyhÿre wese heka kedehemynykre. ³⁰ Inyõ heka aityhydÿÿdu seriõre yribi iwitxira aõna aõnamy kidierynanymyhÿkre. Taijoi kididymyhÿkre tarybe-ò ijohonamy. ³¹ Tahe biijemy boibekre. Inataõ beòramy awana rarewãhã. Kiamy rarybereri, iribi nohõtilosarenyõmy. Txu-wana, ruwana adireny ròrenywãhãre. Rahinymy heka aòrarureny-ki watxiwãhãre. ³² Tahe ararirenykre Deuxu-wana ixi-di he awimy renykre. Tii heka adireny rarekre. Tii tahe nohõtilosarenyõmy, boibekre Deuxu rybe-di. Tii heka riwiõhenanykre atyhyna raumynykremy. Deuxu riywinyre wahe adee reny aõna aõna wiwihikÿ riwahinykre õbiti mahãdu-wana kia bitabenykre. ³³ Tiu heka jiarÿ ijõ

hãbu-ribi nieru tarasamy rahõtinyõhyymahãre tyy wiwihikÿ tarasamy raruõhyymahãre. ³⁴ Tiiemy wadèbò-ribi hyy hyy raaõmysÿdÿÿmy rarewãhã waaõmydÿÿnana òwydÿÿmy. Tule rewìohenanywãhãre tii-wana watxiwãhãre mahãdu. Kaiboho teerytenyte kia. ³⁵ Ibutumy rewìohenanywãhãre iaõkõ mahãdu kia heka tuu tabitenyte kia rewinyimahãremy. Teerytenyte timybo Jesuisi rarybere: —Biwahinybenyke, kia dori iny-ribi ritamyhÿre ratyre awi rare.

³⁶ Tahe rybe-ribi rexihureu, tatiowotimy rotamanyrenyrene wiwana rexitòenyrenykremy. ³⁷ Tahe rahinyrenyrene, rimyrenyrene tamy wòrenyrene, aõna rakreki, kia-ki rexythyenyrenyrene tamyreny. ³⁸ Tiiemy rabadeworenyrene tiu tuu robirenyõkremy. Tahe hãworo-ò tiiboho-wana roirenyrene.

21

¹ Iribi ròhònyreu tahe, òbitihyy rare Kòsi hãwã-ò. Ijõ txu tahe Rodesi hãwã-ò ritehemynyrene. Iribi tahe Patara hãwã-ò ritehemynyrenyrene. ² Tai tahe rahare hãwòò-ki, Senisia hãwã-ò rakremy rexywinyrenyrene. Roirenyrene kia yhywydynalawò-di tahe rorukurenymy ròirenyrene tamy. ³ Xibri bedebute weribi-ò reurore, inhyhywenawe-ribi Siria bede weribi-ò. Tahe ritehemynyrene Tiro hãwã-ki. Tai tahe hãwò-ribi aõna aõna-di rekoarenyrene. ⁴ Tamy roirenyreu tahe, rÿÿraxirenyrene kahãwã ityhydÿÿdu mahãdumy. Tai raharenyrene. Sohoji semanamy bede tiiboho-wana wadireny rÿire. Kiaerydÿÿna mahãdu heka Paulo dee raryberenyrene: —Aõma noõmykre Jerusalẽ-ò. Deuxu Tyytybytyhy tuu tamyreny rarybemyhÿre. ⁵ Tahe semana ituereu, diòòsedenyde ixyby hãworo-ò. Ibutumy diberenydenyde ityhydÿÿdu mahãdu tiiboho-wana ÿnyra-ò, hãwy, uladu, ibutumy. Tahe rexitòenyrenyrene. ⁶ Ritobinyrenyrene tahe, riòòserenyrene heto-ò ixyby.

⁷ Idi tahe Tiro hãwã-ribi rare. Tahe Tolimaida hãwã-ki ityhydÿÿdu mahãdu rerybewãhãrenyrene txu sohojilemy bede reijerenyrene tai. ⁸ Ijõ txu biòwamy tahe roirenyrene Cesaria hãwã-ò. Tahe Filipisÿ-ki rasÿnyreny Rybewihikÿ-di tÿnydÿÿdusÿ-ki wahe. Tii juhuu aõma ityhydÿÿdu mahãdu wiòhedÿÿduõ juhutyhy rare. ⁹ Tii heka inaubiòwa iriòre rare. Tahe heridu aõkõ ijadòma mahãdu rare. Ijadòma mahãdu heka Rybewihikÿmy rybeduõle rare. ¹⁰ Tahe aõutxu taile watxiwãhãrenyrene. Tahe hãbuõ dehemynyde Judeia bede-ribi, moma inire Abusi. Tii tule Deuxu rybe-di rarybemyhÿre. ¹¹ Idi tahe nade inyorarenymy. Tahe rimyre tii Paulo wereysana. Tawahe idile rimyre rexitaare tebò-wana. Idi tahe rarybere: —Deuxu Tyytybytyhy wa kiamy rarybere: —Kia wereysana wedu heka iwese rataataamy rãire wesele heka tule rataataamy rÿikre

Jerusalê-ki judeu mahâdu heka kia riwinykre ta riwahinykre judeukõdu mahâdu-ò. ¹² Tamy raholarenyreu tahe, raryberenyre Paulo dee raõkremy Jerusalê-ò. Jiarÿboho raryberenyre tamy tule ijõ tule tamy raryberenyre. ¹³ Tahe Paulo rarybere: –Hirenyõmyke, tiwabedewodÿÿnytenyteri. Rexiywinymy watzireri Jerusalê ròtena-ò aralòkemy. Tamy sohojile aõkõ kÿny, tule Deuxu dee wikeki tahe arurukre Inynyrÿni òraru-ki. ¹⁴ Timy heka Paulo nohõti rareadÿÿrenyõke tiemy tanonanamy rara. Tahe rarybemy rahudi kiamy tarybe-ò resere Deuxudeewilemy rotÿÿnymy ratxike.

¹⁵⁻¹⁶ Iribi tahe iny aõna aõna rexiywinymy Jerusalê-ò roirenykemy. Ijõ ityhydÿÿduõ Cesaria-ribi iny-wana roirenyre. Tahe retehemynyrenyre, Menasõ heto-ki rasÿnyrenykemy ityhydÿÿdu riwadyrenyre. Menasõ heka juhutyhy ityhydÿÿdumy ralòmý raremyhÿ. Juhuu tii Xibri bedebute-ki rasÿnymy raremyhÿ.

¹⁷⁻¹⁸ Jerusalê ityhydÿÿdu mahâdu ibutumy awimy riwamyrenyre. Jiarÿ, Luka wahe, Paulo-wana, ijõ ityhydÿÿdu-wana. Ijõ txu biòwamy tahe Paulo riwadyrenyre Txiaumy robikremy. Tule ijõ Jerusalê dohodÿÿna matuari mahâduõ tai ronyre. ¹⁹ Wirirybenymy rahudi tahe, Paulo tamy relyyre aõhebo Deuxu tamy rotÿÿnyremy. Timybo judeukõdu mahâdu Deuxu rityhynyremy. ²⁰ Kiamy roholareu, Deuxumy reàlarenyre ibrò-kí. Tai tahe inyõ rarybere: –Paulo, sówemy judeu mahâdu rityhynyre. Kai teeryte, inyseriõre, ibutumy judeu mahâdu bede ywina riywinymy ratximyhÿhy. ²¹ Inyõ umy rarybere, raroimyhÿre kaki Jerusalê-ki. Judeu ityhydÿÿdu mahâdu-ò rarybere: –Paulo he Moisesi bede ywina-ribi nohõtirosakemy tii riteònyre. Paulo rierynanyreri judeu ityhydÿÿdu mahâdu-ò kia judeukõduy-ki rasÿnyre mahâdu-ò. Kia inyõ riki rarybere, Paulo uladunotyky resyna riteòdÿÿõreki riki. ²² Tii kÿnyhe roholarenykre kaò themynyterimy. ²³ Tai kiamy rikiwinyrenykre. Inaubiòwa hãbu katxi rare tarade riwysynykremy. Deuxu-ò tarybetyhy riwahinyrenyre, tai tahe tarade riwysynykremy. ²⁴ Kai tule makre iwesele arade riwysynykre Deuxu dohodÿÿna heto-ò. Tahe iradereny synaòwumy biòwynykre. Tai tahe ibutumy aluukre judeu mahâdu bede ywina tetyhynymahãteki wahe. ²⁵ Aõ inyboho ka judeukõdu mahâdu. Ka bede ywinaõ rityhynykemy aõkõ tuu iny ratxirenyre. Kaa adeereny tuu rarybewãhãrele rityhynyrenykemy. –Ka aõma rÿsÿna ritxoo rÿsÿnamy iwahidÿÿnalemy irÿsÿõmy, tule iròdude ihãlubu iijeradyÿõreri, uritere irÿsÿõmy, tule òta òta òraru widÿÿõmy. ²⁶ Tai tahe Paulo rarybere: –Hÿde, tii ariwinykre. Tahe Paulo rare

Deuxu dohodÿÿna heto-ò kia hãbuõ-wana. Tahe ibutumy iny rierye xiwenaõ riwinykre wahe, tamy dori raryberenyre.

27 Tahe debòinatxi reurò txu-di riwinykremy. Idi ka debòinatxi reurò txu rexihudi tahe iòhòmy. Tahe Asia bedede ludu judeu mahãduõ tuu robira. Tiibohe iny-ò rarybere Paulo rimykremy. 28 Sòwemy iny tamy wi rotyre Paulo òludumy. Tiibohe kiamy rirajuarenyre: —Haeli mahãdu, wylemy bodoike. Biwawiòhenanybenyke. Ka hãbu ratxireri iny bedede ywinareny òludumy ritÿÿnynymy rÿimyhÿre. Iny dee narybemyhÿde judeu mahãdu bedede ywina rityhynyòkemy, tule iny Deuxu dohodÿÿna hetomy, judeukòdu kawo-ò didyde tai tuu ribinadÿÿnyreri. 29 Juhuu tahe ijòmy robire hãbuõmy hãwãhãkÿ-ki Paulo-wana ratxirerimy. Trofimo inire. Tii heka Efesu hãwã mahãduõ ityhydÿÿduõ rare, judeukòdu mahãdu aòkò tii ihÿre. Tahe judeu mahãdu ròhòtynyre Paulo dohodÿÿnahetowo-ò Trofimo ridyramy. Tahe Paulo ridyòlere. 30 Tahe sòwemy iny rakyarananyre tamy, aõma kia hãwã hãkÿludu mahãdu. Sòwemy iny rarybemy rÿimyhÿ, rajei-jeimy rÿimyhÿ. Paulo tahe retÿÿhirenyre dohodÿÿna hetowo-ribi, ijòtòbòna riratòbònyre. 31 Tahe rirubunykeny rite-lyre heka. Tahe soldado dinodu tyhy roholare aõma ibutumy Jerusalè hãwã-ki jei jei-di rÿireri. 32 Tai tahe soldado tawedu diteònyde kia tai jei jei mahãdu rÿireriò. Tahe soldado robirenyrau, riixãwidinyreny, Paulo òhòtedÿÿ-ribi. 33 Kia soldado wedu tyhy Paulo mynymy riteònyre. Tahe ritaataarenyre womati reroti-di. Tahe rexitòenyre kia inydee mobo he ratxireri. Aõhebo he tii rotÿÿnyrerimy. 34 Ijò heka iwitxiramy rarybemyhÿre, ijò tiilemy rarybere. Tai tahe soldado dinodu bedede rieryòhyra timyrebomy, ibutumy iny rirajuareki. Tahe ridykemy riteònyre. Tahe soldado heto-ò Paulo-di roiremyre. 35 Ryòwòna-di rotuòrau tahe, hãwã mahãdu aòkòre he reburera. Soldado mahãdu Paulo taaxiò tyre ritidimy idi rara iny rimyheny. 36 Iny he rirajuamy rarybemyhÿre: —Bidybenyke, birubunybenyke wahe. Myhe soldado mahãdu hewomy rirahumyhÿre.

37 Tahe rirònykremy roirau tahe, Paulo soldado dinodu-ò rarybera: —Adee inihe wanyrÿ, ararybekemy watxireri. Tahe soldado dinodu ritÿÿraxinyre: —Kai aõbo kreku mahãdu rybe teeryte. 38 Kai jiarÿ araeryre. Kai Egito mahãdu dinoduõ tate, ibutudÿÿdu wedu tate. Kai 4000 iny aõbina widÿÿdu tedyte bederahy-ò. 39 Aòkòre, Paulo dirawyònyde, tii aòkò watxire. Jiarÿ Roma hãwã mahãdu tyhyre jiarÿ rare. Wahãwã, Tarso hãwã rare, hãwã riòre aòkò Silisia bedede-ki. Judeu mahãdu tule jiarÿ rare. Kaki iny mahãdu-ò ararybekemy watxiwãhare. 40 Tahe soldado Paulo -ò rarybere: —Tahe

marybeke. Tahe lamamy rÿire inydee rarybekemy. Paulo tebò riteòsinyre riijohonadÿÿnykemy. Tai ibutumy iny riyrymy rÿirenyre. Judeu mahãdu rybe-di tamyreny rarybere.

22

¹ Kawese Paulo tamyreny rarybere: —Waseriòre, walu-uboho, wabededÿÿnanamy adee arelyykre. Wamy boholatyhyke.

² Judeu mahãdu rybe-ò roholareu tahe, riyrytyhymy rorukurenyre. Tii heka rarybere: —Jiarÿ judeu mahãdu jiarÿ rare. Raumynyre Tarso hãwã-ki. Kia Silisia bedeki rare.

³ Kaki Jerusalẽ-ki ratyyritinymy rarewãhã, Kamalie ninadu tyyritina-ki. Ibutu Judeu mahãdu bedeki ywina bedeki reeryre Kamalie-wana. Ibutumy Moisesi bedeki ywina-di riwaerynanymyhÿre. Tii tahe reywinywãhãre, retyhynytyhywÿhÿre. Ibutumy Deuxu bedeki ywina ariwinykemy ixi-di rahòtinywãhãre iwese wiji iwidÿÿmy tarutenyteri wesele wahe. ⁴ Jiarÿ ka ityhydÿÿdu mahãdu aõhòkÿmy rotÿÿnymyhÿremy reteòwãhãre ihyyle ijõ rubudÿÿmy reteònywãhãre. Hãbu hãwyy-wana reròtenywãhãre ròtenawo-ò.

⁵ Waaõmydÿÿnanamy bierybenykre-wana, tamy marybeke dohodÿÿna wedu-ò, matuari mahãdu-ò. Dohodÿÿna wedu tyyriti rewyre Damasu hãwã dohodÿÿna heto-ò. Tai tahe tyyriti-di risÿnyre ibutumy ityhydÿÿdu mahãdu aõhòkÿmy rotÿÿnykemy, tule womati reroti-di rataataakemy Jerusalẽ-ò kididykemy. ⁶⁻⁷ Iòhòmy txutyemy iijira-ò, Damasu hãwãry-ki watxiwãhã. Tahe loosòna itÿnyhÿkÿmy wadee dehemynyde. Bedetxile resere. Tahe rybeõ raholare: —Salu, Salu, aõherekiwexe aõbina binahakÿle wadee tadiwinymahãte.

⁸ Tahe jiarÿ rarybere. Mowexe wadee rarybereri, Wanyrÿ. Tii rarybere: —Jiarÿ Nazare ludu watxireri, Jesuisi. Kai aõbina binale wadee tadiwinymahãte. ⁹ Hãbu wawana rÿimyhÿ, aõ rieryõhyre aõmybo wadee rarybemyhÿre tahe loosònamy he robirenyre. ¹⁰ Tai tahe rarybere jiarÿ: —Aõwexe ariwinykre, Wanyrÿ. Rarybere: —Myike wahe, make Damasu hãwã-ò. Tai tahe inyõ adee kanarybeke aõbo biwinykremy.

¹¹ Tai tahe rabiõmy räiwãhã kia loosòna ritÿrÿrÿhÿkÿreki. Tai wabiõwa ryy wadee ritÿnynyre wadebò-ki riwamymy Damasu-ò arehemynykemy. ¹² Tai tahe hãbuõ wadee rehemynyre, Ananiamy ninadu. Tii heka Deuxu tyhydÿÿduõ rare, bedeki ywina rityhynymyhÿre, ibutumy Judeia mahãdu, Damasu hãwã-ki heka tuure. ¹³ Tii tahe wadee rarybere: —Waseriòre, Salu, aruebimyke ixityre bobikemy. Aõwesele tahe rabimy reare. Ananiamy rabire. ¹⁴ Tahe ixityre wadee narybede: —Inytyby Deuxu juhUU aratare, aõbo tamywymy

bierykemy. Tule Jesusimy bobikemy, Deuxu òbiti hãbu. Tule boholakemy aõbo tii adee kanarybekeò. ¹⁵ Tai tahe biwykre irybewihikÿ tÿmyra ibutu bedede iny-ò. Belyyke timybo taholatemy, tabitemy. ¹⁶ Tai tahe rooreheòmykre. Wijile makre maratysebekre. Aòraru-ribi yrahakÿlemy mabekre, Wanyrÿnimy tetyhynyte xiery. ¹⁷⁻¹⁸ Idi tahe Jerusalê-ò rehemynyreu wahe, aòutxumy ixitòenymy rarewÿhÿ Deuxu dohodÿÿna heto-ki. Tai raholarerasina wese-ki aõma Deuxu wadee rarybererimy: –Wylemy bòhònykre Jerusalê-ribi. Warybemy tamy marybekreu, rityhynyrenyòtyhy. ¹⁹ Tahe Inynyry-ò rarybere: –Ibutumy hãwã-ki aityhydÿÿdu mahãdu rehãtenyre, rewotomonyre, reròtedÿÿnyre. Ibutumy kaki kia rierymy roimyhÿre. ²⁰ Arybe tÿnydÿÿdu rirubunyreu, moma Estevaò, jiarÿ taile watxiwãhãre. Rewiòhenanywÿhÿ irubudÿÿdu mahãdu tyy reyrubunyre aõma mana-di rihurenyre wahe. ²¹ Tahe Deuxu wadee rarybere: –Bòhònyke wa Jerusalê-ribi. Irehetyhymy arateòkre judeukòdu mahãdu-ò. Kia Paulo tamyreny rarybere.

²² Tahe kia iny roholamy rÿimyhÿre kia Paulo iximy relyyreò. Tahe raykaranany raryre: –Bidyke karibi ahana-ò, birubunyke. Irumy rareòkre idi watxiwãhãrenyre. ²³ Tatyky riohowire, brybysi-di biu-txi rehure, ryrymyhÿrenyre. ²⁴ Soldado dinodu tahe riteònyre iwo-ò ridyrenykemy awaru òhòtenahãkÿ-di tuu raòhòtekemy. Soldado dinodu rierykemy ratxireri aõherekibo iny tamy rakyarananyraki wahe. Tii rarybekre òsana tuu raòhòtekeki. Kia soldado dinodu ròhòtinyre. ²⁵ Tahe Paulo ritaataarenyre. Imy rahudi tahe Paulo rarybere soldado dinodu-ò: –Jiarÿ Roma hãwã mahãduò rare. Wamy maòhòtebenyòtyhy, aywisidÿÿna mahãdu wadee roholaòre tebutunyòteki. Kia riwadÿÿkòkemy roimy rare. Abede ywinareny adee rarybere kia widÿÿòmy. ²⁶ Tai tahe kia soldado dinodu tadinodu-ò rare. Tahe tamy rarybere: –Kowa hãbu, Roma hãwã mahãduò rare. Tai tahe aõbina bina tamy iwidÿÿòmy. ²⁷ Kia roholareu, tii rara Paulo-ò tamy rÿÿraxikemy: –Inatyhybe Roma hãwã mahãduò aõbo atxiteri. Paulo tahe narybede: –Kohe, jiarÿ, kia mahãduò watxireri. ²⁸ Tai tahe soldado dinodu narybede: –Jiarÿ tule watxireri. Nieru sòwe-di reòwynyre tuu aronykremy. Tahe Paulo rirawyònyre: –Jiarÿ tiu kia watxireri. Waha dori Roma mahãduò raremyhÿ. ²⁹ Tai he soldado mahãdu iribi ròhònyre aõwesele tii Roma mahãdu ratxire riki. Soldado dinodu tule ruberure tii dori rataataamy riteònyreki.

³⁰ Txu biòwamy ritare ròtena-ribi ròhònykemy. Judeu xiwewahidÿÿna dinodu inyò ributunyre ywisidÿÿdu

mahãdu-wana. Tahe Paulo ridyre tamy. Tii dori rierykremy ratxireri aõherekibo judeu mahãdu Paulo deramy rÿireri.

23

¹ Paulo tamyreny retehere, dinodu mahãdu-ò wahe. Tahe rarybere: —Waseriòreboho, Deuxudile watzimy ramahãre. Tiiemy aõbina binamy aõkõ watzireri, tamy iluuna-di tyhy watxiwãhãre. ² Anania hãbu-ò rarybere, iòhòmy Paulo-ribi rÿireriò: —Iry-ò bihetenybenyke. ³ Paulo tahe tamy narybede: —Kai wa aõ aõkõ tate. Hetotira ura wese tate, awo arayky isuisure. Waywisidÿÿdu wesemy talòmy atxiteri, tahe wahetedÿÿmy tarybeta. Kia bede ywina rarybera wesemy aõkõ tewisÿnyteri. ⁴ Tahe iòhòmy Paulo-ribi rÿireri, tamy rarybere: —Kia wesemy rybeõmy Deuxu xiwe wahidÿÿdu wedu-ò. ⁵ Tahe Paulo rarybere: —Aõkõre, reeryõhyre aõxiwe wedubo ratxirerí. Tyyriti kiamy rarybemyhÿre: Tiu riki wedumy aõmy rybebinamy aõkõke. ⁶ Idi tahe Paulo rexierymy resere. Tahe ixidee rõhõtinyre. Ka iny sõweyre fariseu mahãdu heka rare. Iyrejura tasÿ saduseu mahãdu rare. Tai tahe Paulo ryryre: —Waseriòre mahãdu, jiarÿ fariseu mahãduõ rare. Waha, wylabieboho ibutumy fariseu roire. Rubu-ribi ixixana retyhynywãhãre. Tai tyhy tahe kia-ò, ywisidÿÿdu-ò wiji diwadyde. ⁷ Imy rahudi tahe fariseu mahãdu saduseu mahãdu-wana wiribi rihitxinyre. ⁸ Saduseu dori rubu-ribi ixixana rityhynyõhyymyhÿrenyre, tule ÿju, tyytyby-wana rityhynyõre. Fariseu mahãdu tahe, kia ibutumy rityhynymyhÿre. ⁹ Tai tahe sõwemy rajei jeimy rÿimyhÿ. Tahe fariseuõ rarybere Paulo òbitimy ratximyhÿ. Aõ teòsamy tai tuu arobirenyke kÿnyhe aõkõre. ÿjuõ òsana tamy rarybera ada tyytyby aõbo. ¹⁰ Tai ta tarurutyhymy ryryrenyre. Tai tahe soldado dinodu ruberure aõma Paulo riykaykaketxi roholare. Tai rarybere tamy: —Iribi bitake, idi boibenyke ixiby soldado heto-ò.

¹¹ Rummy tahe Paulo weribi Inynyrÿ tamy narybede: —Brebueõmy aõ-di nohõtíõmyke ixi-dí. Iwese kaki Jerusalé hãwã-ki wamy tarybete wesele heka Roma hãwã-ki wamy marybekre.

¹²⁻¹³ Tahe biurasòtxu he judeu mahãduõ wi dotyde Paulo rubudÿÿmy. Iny inatxiwa ituemy hãbu kia wese raryberenyre: Rikiroxirenyõtyhy bemy rikiõrenyõtyhy. Paulo rurukeki xiery ta rikiroxirenykre. ¹⁴ Tahe xiwe wedu mahãdu-ò tiiboho roirenyre. Judeu matuari mahãdu-ò tule kia ibutumy relyyrenyre iwese Paulo rubudÿÿmy ratxireri wese. ¹⁵ Tule tamyreny rarybere: —Kaiboho ixityre marybebenyke soldado dinodu-ò manakremy Paulo-di ywisidÿÿdu-ò. Tamy dÿÿraximy idi ratxireri tiiboho rõhõtinykre. Tai tahe ry

kana-ò rearaki tahe ijoi rikirubunykre. Kia judeu mahãdu xiwe wedu-ò rarybere. ¹⁶ Tahe Paulo seriòre woludu, ilana rubudÿÿmy rarybereò roholare. Tahe ralore soldado heto-ò tahe tuu Pauloko relyykemy. Tahe relyyre. ¹⁷ Kia roholamy rahudi ta Paulo rariòwyre soldado dinodu tamy kanalokremy. Kiamy rarybere: —Ka weryry bidykre adinodutyhy-ò, aõma, ijyy-di ratxirerimy tamy relyykremy. ¹⁸ Tahe ridyre soldado dinodu tyhy-ò tahe rarybere: —Paulo kÿny ka weryry-di riwateònyreri aõmybo ako relyykremy. ¹⁹ Tahe dinodu weryry axiò iyre ribi rimyre, tahe iny-ribi rirehenyre rarybekemy: —Aõbo wexe wako belyykre, weryry. Tahe relyyre: ²⁰ —Wylana Paulo ridykremy judeu mahãdu adee rexitòenykremy ratxirenyre. Tiiboho adee raryberenykre: —Rikitÿÿraxinykre ijõ aõmydÿÿnana. ²¹ Uritere tamy boholaõkre, weryry rarybere, idyõmykre tamy. Hãwã mahãdu sòwere rexiwõmy rÿikre, iny inatxi wa itue hãbumy, wylana rubudÿÿmy. Tii ruruõkeki, riroxiõtyhy, bemy riõõtyhy. Kiawese ka hãbu mahãdu rarybemy ramyhÿre. Ahana õsana inyõ rÿireri wylana ridykremy adee kedexitòenykremy. Wylana òludu tahe ry-ijàti-ki rexiwõmy rÿireri. ²² Tai soldado dinodutyhy weryry-ò rarybere: —Uritere inyõ ierysyõmykre wadee tuu telyyteri. ²³ Tahe inatxi soldado dinodu rarariòwyre, tahe tamy rarybere soldado dinodu tyhy: —Aõma, 200 soldado widotykre inataõ òra txu dòhòny-ribi, ijõ 70 soldado awarutyre-ki, ijõ 200 soldado tònori-di. ²⁴ Kia ibutu-wana Paulo bidybenykre awarutyre-ki Cesaria hãwã-ò. Biyrubunymy boibenyke Feli, kia bededinodu-ò. ²⁵ Tahe tyyriti riwinyre kia wese:

²⁶ —Jiarÿ Laujiu Lucio, warybe reritinyreri. Warybe wehityhyna rewahinyreri Feli-ò, Wanyrÿtyhy, bede dinodu-ò rewahinyre. ²⁷ Hãbuõ adee reteònyreri. Tii judeu mahãdu rimyre tahe rirubudÿÿmy riwisÿnyre. Tahe soldado reteònyre ritakremy rubu-ribi, tii Roma hãwã mahãdumy rareki. ²⁸ Redyra heka ywisidÿÿna mahãdu-ò. Aõherekibo rimyrenyremy arierykemy. ²⁹ Tabede ywina òrarukile teramy tamy reare, kia reerymy rawãhãre. Iny bede ywina òraru-ki aõ aõkõ tii riwinyre. Tai rurukemy aõkõ idi rewisÿnyre. ³⁰ Judeu mahãdu rarybemy ramyhÿre irubudÿÿmy. Kiamy raholareu tahe, adee reteònykemy resere. Tule irubudÿÿmy røhõtinyra mahãdu adee rarybekemy reteònyre. Tiiboho aõbo raremy rarybekre. My kie warybe rewahinyre.

³¹ Idi tahe soldado mahãdu Paulo ridyre, iwese idinodu riteònyre wese. Rudile ridyre Atxipatxi hãwã-ò. ³² Tahe bi-urasòtxummy tahe tatilemy rare mahãdu ròðsere soldado heto-ò. Ijõ soldado awarutyre ludu Paulo iridyre Sesaria-ò. ³³ Tahe rehemynyre Cesaria hãwã-ki. Rare he bede dinodu-ò. Paulo

tamy riwahinyre tyyriti-wana. ³⁴ Kia tyyriti-di tii rariareu tahe, tamy ritÿÿraxinyre: —Tiribibo tate Paulo. Tahe Paulo dirawyònyde: —Jiarÿ, Silisia hãwã mahãdu rare. ³⁵ Tahe bedede dinodu narybede: —Kaa hãbu mahãdu wii kodotykreu, kedehemynykreu, aroholakre inihe arybe-ò. Tahe iyrubudÿÿ idi risÿnyre Herodi ywisidÿÿna heto-ò, Pretòriu ninadu-ò.

24

¹ Iruyre txu reare rexihudi tahe, Anania, xiwena wedu tyhy, judeu mahãdu matuari-wana rehemynyre, ywisidÿÿna mahãduõ-wana rehemynyre, moma, Tertuliu inire. Paulomy aõbinabinahãkÿ rybemy rareri bedede dinodu-ò. ² Tahe Paulo didyde. Tertuliu rarybere Paulomy. Awiõmy rybe tahe ròhònyre. Juhuu Feli-ò rarybere: —Kai Wanyrÿ tyhy, awihyymy heka atximahãte wadeereny. Tiiemy bedede ywina inydee tewahinymahãte. Ibutumy iny bedede hãwã hãwã-ki iny tewiòhenanymahãte. ³ Tai tahe omy reàlãtyhymy he watxiwãhãre. Urihimyòle adee Paulo aõmydÿÿnanamy ararybekre. ⁴ Txioi inihe làhã, boholabeny. ⁵ Tiiemy jei jeihyy ratximyhÿre Paulo òraru-ki. Tiiemy judeu mahãdu, my heka rarybehyy ratximyhÿre. Tii Nazare hãwã dohodÿÿna mahãduõ rare, kia weduõ rare. Tii Jesuisi rityhynyre. ⁶⁻⁷ Aõkõre, iny Deuxu dohodÿÿna heto ribinadÿÿnyre, brebuna rÿirerimy ihÿre Paulo òraru-ki. Remyreny tahe, ywisidÿÿmy watxiwãhãre iny bedede ywinareny rarybere wesemy. Tahe aõkõre, Lisiu soldado dinodu tyhy ritare iny-ribi wotõmona-di. ⁸ Tahe inydee rarybere: —Boibenykre Feli-ò. Tii adee roholakre. Kia tahe Lisiu rarybere. Tahe jiarÿ tule rarybere. Boibenyke Paulo dÿÿraximy kia inatyhy aõbo ada aõkõre aõbo. Tertuliu kia ibutumy rarybere. ⁹ Ijõ judeu mahãduõ rarybere: —Kia inatyhy ibutumy inatyhyle ratxireri, aõmybo Tertuliu raryberemy.

¹⁰⁻¹¹ Tahe bedede dinodu Paulo-ò riteòsinyre rÿikemy, rarybekemy. Paulo tahe tamy rarybere: —Wanyrÿ bedede dinodu tyhy, sòwe beòra aõmydÿÿnana-di ywisidÿÿna-di atximahãte. Jiarÿ kia reeryre. Tai reysawãhãre adee ararybekremy. Waò inatxi reuròtxumy heka Jerusalẽ-ò adehemynyde. Iny-ò bitÿÿraxinykeki, wylemy ka bieryke inatyhy raremy. Jiarÿ Deuxu dohodÿÿna heto-ò rehemynyre Deuxu reàlãkemy. ¹² Tiu heka jei jei rewinyõhyywãhãre dohodÿÿnaõ-ki aõkõ, hãwã-ki aõkõ. ¹³ Aõmybo wamy rarybemy rÿireri heka, aõ inatyhy aõkõ. ¹⁴ Sohoji aõmydÿÿnanamy tahe akoreny arelyykre, inatyhy rare. Retyhynywãhãre heka aõbo Jesuisi rierynanymyhÿremy. Tiiboho watyhydÿÿna rininirenyre dohodÿÿna mahãdu iwitxira. Kia hãbu rityhynymyhÿre

wesele jiarÿ tule Deuxu inytyby retyhynymyhÿre. Ibutumy bede ywina tyyriti-ki riritinymy rÿimyhÿremy retyhynywãhãre. ¹⁵ Iny, òrarudu mahãdu, ityhydÿÿdu mahãdu kedeixixakremy rubu-ribi. Kia retyhynywãhãre. ¹⁶ Tiu ibutumy òbiti widÿÿmy raruwãhãre. Deuxu-txi tule ibutu hãbu rue-ki. ¹⁷ Jerusalẽ-ribi rarewãhãu, tiwese beòra rewyre tahe ixyby dòsede Jerusalẽ-ò aõkõ mahãdu wahidÿÿna wesemy ariwahinykremy xiwena wese Deuxu-ò. ¹⁸ Deuxu dohodÿÿna heto-ki watxiwãhã, òbitimy rãire, ibutu bede ywina reywinymy rawãhãre. Tahe waxiwena-di waòludu wamy robire. Iny sòwemy weroramy watxiwãhã. Rybe jei jei rarybeòhyyre. Tahe Asia bede judeu mahãdu tai rÿimyhÿ. Tiibohole rybe jei jei riwinymyhÿrenyre. ¹⁹ Wamy aõmydÿÿnana rarybekremy ijòdikeki, rokoholakre. Kaki aõkõ ratximyhÿrenyre. ²⁰ Aõbo waki teòsamy rahare ywisidÿÿna mahãdu-ko rãireu, tamy rokoholakre. ²¹ Sohoji aõmydÿÿnanalemy rarybere teòsamy. Kiamy rarybere: –Retyhynyre rubu ixyby kedexixakre. Tai ywisidÿÿna mahãduko-ki watxiwãhã.

²² Feli bede dinodu rierymy ratxireri aõmybo ityhydÿÿdu mahãdu rityhynyre. Tai rarybere judeu mahãdu-ò: –Lisiu, aõma, soldado dinodu tyhy rehemynyreu, bede rikierydÿÿnanykre. ²³ Tahe Paulo ròtena heto wese-ò ratximyhÿreki, riòsedeÿÿnyre. Ta rarybere he soldado dinoduò-ò: –Ywimy idi ratximyhÿkemy. Tule rarybere: –Iò ixinamy terina mahãdu iroramy kanakre. Ixinamy uriònomy tamy kidiwahinykre awityhy roimyhÿkemy.

²⁴ Iribi nade Feli tahãwy-y-wana Drusila. Ihãwy heka judeu mahãduò rare. Riteònyre Paulo-ò tamy kanakremy, tamy kanarybekremy. Paulo rarybere tamy: –Jesuisi Kristu kia tyhydÿÿnamy. Tii òbiti-di iny ròhòtinkyemy tule ywisidÿÿna txumy Deuxu kanakremy ritÿnyre. ²⁵ Tahe Feli ruberure. Makre, tamy rarybere, aõwaxiny tiubo wabededÿÿnana-di my kÿnyikreu, ixyby adee ararãriòwykre. ²⁶ Tule Feli ijõ nieru Paulo-ribi ritakemy ratxireri, tai rarariòwyre ijòtxu ijòtxu tii-wana rarybekremy. ²⁷ Inatxi beòramy bede idi rÿire. Iwitxira bede dinodu ralore Feli deròwy. Porsiu Festu inire. Feli tahe judeu mahãdu tuure tamyreny aõò riwinykemy ratxireri tahe Paulo ririre ròtenawo-ki.

25

¹ Cesaria hãwã-ki bede dinodu tÿmyraõ ronyre. Festu inire. Inataõ txu-di tahe iribi ròhònyre Jerusalẽ-ò rakemy. ² Tahe xiwe dinoduò, judeu mahãdu dinoduò tamy rarybere Paulo aõmydÿÿnanamy. ³ Tamy rexitòenyre Paulo-di

wylemy kanakremy. Kiamy heka rexinohõtidiÿnyre ry-rowetya-ki rirubunyrenkremy. ⁴ Aõkõre, Paulo ratxirekre Sesaria-ki, Festu rarybere, jiarÿ tahe aròðekre ele elemy kowa-ò. Kaiboho adinodu mahãdu wadi roikre kowa-ò. Rokoholarenkremy ywisidÿÿna-ò. ⁵ Tule kaiboho aõrybedikeki, Paulomy, kowa-ò rarybekremy.

⁶ Iribi tahe debòwiò txu òsÿny txu idi rÿidi tahe ixyby Festu dòðsede Cesaria-ò. Irootxu tahe Paulo ywisidÿÿna ròhònyre. Tahe Paulo ridykemy riteònyre ywisidÿÿna butuna-ò. ⁷ Tahe judeu ywisidÿÿna mahãdu heka sòwemy tuu aõbina binahakÿmy Paulomy rarybemyhÿre, Jerusalê-ribi rehemynyreu. Aõ inatyhymy aõkõ. ⁸ Paulo tahe rexitxiònyre: —Jiarÿ kÿny kia-di aõkõ watxiwãhãre. Tii rarybere: —Tiu heka judeu mahãdu bede ywina ratyre aõna aõnamy ratÿÿkõre. Tiu heka Deuxu dohodÿÿna hetomy rewinyòwãhãre, tiu Roma dinodu bede ywina ratyre aõhe ratÿÿnyòwãhãre. ⁹ Idi tahe Festu rÿÿraxire Paulo-ò: —Kawexe texiywinymy atxiteri Jerusalê-ò makremy. Kowa ywisidÿÿna ariwinykemy adee roholakremy. Kiamy Festu rarybere aõwiwihikÿmy riwinykemy ratxireri judeu mahãdu dee. ¹⁰ Tahe Paulo rirawyònyre: —Aõkõre, arakre he Iòlò tyhyòhòkÿle arehemynykre. Tii wadee roholakre. —Jiarÿ dori ixiywinyhyy tamy arakre. Kai teeryte jiarÿ aõkõ tudÿÿduramy. ¹¹ Aõma aõbo waki binamy relera-wana heka arurukre. Aõkõkeki tahe aõbo awihykyle rewinyre-wana heka timy inihe warubudÿÿõmy. Iòlò tyhyle wadee roholakemy he ixide rahõtinyreri. ¹² Festu tawihedÿÿdu-ò rarybere. Idi ta dirawyònyde: —Awire, iòlò tyhy-ò atxiteri urenana kÿnyhe aõwaxiny makre.

¹³ Iribi tahe aõutxumy tahe iòlò Agripa dehemynyde, Benise tariòrese-wana. Festu roramy rareri. ¹⁴ Tahe tii-wana rarybemyhÿre aõutxu, Festu-wana. Idi tahe Paulo aõmydÿÿnanamy iòlò-ò rarybere: —Ròtenawoluduõ roireri ròtenawo-ki. Tai he Feli ririre jiarÿ iaõmydÿÿnana arierykremy. ¹⁵ Aõma Jerusalê-ki watxiwãhãu, dohodÿÿna wedu mahãduõ wadee heka rarybere: —Tii arirubunykeny heka wadee rityhenymyhyre. Judeu mahãdu matuariõ tule kia rarybere. ¹⁶ Tahe tamy jiarÿ rarybere: —Aõkõre, aõma Roma mahãdu kia bede ywina dori tuu aõkõ roimyhÿre. Juhu heka rakre ywisidÿÿna-ò tahe relyykre heka iximy, taòludu mahãduko-ki. ¹⁷ Kaò juhu ditehemynydenydeu, tamy rarybere. Ijõ txu he reyrubunyre ywisidÿÿna-ò roholakremy tahe Paulo ridykemy aditeònyde. ¹⁸ Tahe aõmybo tamy rarybere heka, iwese rahõtinyre wese aõkõ tii riwinyre. ¹⁹ Aõbo ityhynareki heka tuheka rÿire. Inyõ heka tii rarybemyhÿre Jesuisi rurulemy. Tahe Paulo rarybemyhÿre irulemy

ihÿre. Tai kÿnyhe rimymy ramyhÿre. Riròtenymyhÿre. ²⁰ Tai tahe tiiemy rahòtinyre: Timy taheka aõhe arotÿÿnykre ka aõmydÿÿnana-di. Paulo-ò retÿÿraxire aõma Jerusalê-ò aõbo rakemy ywisidÿÿna-ò. ²¹ Tahe Paulo rarybere: —Iòlòòle rakremy aõbo. Tii wamy roholakeki, teòdu waòrysmy ari-raokre. Tai tahe ròtena-ò ixybyle rerutyre. ²² Tahe iòlò Agripa rarybere: —Jiarÿ aroholakre inihe kia hãbumy. Tahe Festu dirawyònyde: —Biurasòmy tamy bodoholakre.

²³ Idi tahe itxu biòwamy dehemynyde, iòlò, Benise-wana, ywisidÿÿna heto-ò. Ibutumy he iny ralore, soldado wedu mahãdu, iny ityhymy rÿira mahãdu, ibutumy raloralore. Tai tahe Festu Paulo didyde. Tahe rarybere: ²⁴ —Iòlò Agripa, ibutumy ka wadee ijohonadu-wana, ka hãbu heka ibutumy iny he irubudÿÿmy he idi rÿireri, judeu mahãdu kaki tule Jerusalê mahãdu. ²⁵ Jiarÿ rahòtynreri aõ heka riwinyòhyyre tai rurukre wahe. Tai iòlòtyhy-ò rakremy heka ratxireri. Ariteònykre nomy dori tii ratxireri. ²⁶ Aõbo tamy ariritinykre. Aõ heka waritidÿÿkõnare. Aõ dori riwinykõre. Tai redyreri adee iòlò Agripa. Tamy juhu boholakre. Iribi tahe wadee manarybekre aõbo ariritinykremy. ²⁷ Timy kÿny wateòdÿÿkõna uritere òhynaòhòkÿle Iòlòtyhy-ò ariteònyòtyhy.

26

¹ Tahe Agripa Paulo-ò rarybere: —Aõwaxiny belyykre ai-yyjy. Paulo he tebò riukore he rarybekremy.

² Wadeysamy he watxireri, Iòlò Agripa. Jiarÿ dori ix-imy arelyykre ako. ³ Tule kai dori ibutu judeu bede ywina teeryte. Ibutu lahi rybe teeryte. Bodoholakre inihe wadee, ywina-di. ⁴ Tiiemy uladule aratyritinyde aõma judeu òbitina-di. ⁵ Judeu mahãdu kia rieryre. Txu rexidelenyre juhu judeu mahãduy-ki, idi tahe Jerusalê-ki ratyritinyre. Jiarÿ fariseu mahãduò òbiti jiarÿ rare. ⁶ Kia rybe òraru-ki wiji ywisidÿÿna-ki rãire. Jiarÿ dori retyhynywãhãre aõbo Deuxu inytyby-ò rarybere. ⁷ Jiarÿ Deuxu rybe òlòna reraòwãhãre. Tule judeu ijoi riraòmyhÿre, waòinatxi reurò ijoi mahãdu. Tii-boho Deuxumy reàlãmy raremyhÿ, rummy, txummy. Iòlò Agripa, kia raròsòna òraru-ki judeu mahãdu wadee aõbina binamy rarybemyhÿre. ⁸ Rubu-ribi ixixana jiarÿ retyhynymyhÿre. Araÿraxikre iòlò. Kia aõbohe wadeòsana raremy kaiboho tahòtinytenytere. Deuxu heka ixyby iny kidiòkesedÿÿnykre taumy tuedeòna-ò. ⁹ Jiarÿ heka juhuyu awimyy heka aõbina binahakÿ widÿÿ dee rahòtinyre, Jesuisi Nazare hãwã ludu dee. ¹⁰ Sòwemy ityhydÿÿdu mahãdu reròtenyre ròtenawo-ò Jerusalê-ki. Dohodÿÿna heto wedu rewawiòhenanyre tyriti

riwahinyreki. Kia irubudÿÿmy wi risÿnyrenyreu, jiarÿ rarybere: —Awire heka birubunybenyke. ¹¹Jiarÿ heka ityhydÿÿdu mahãdu aõhõkÿmy rotÿÿnykemy wi resÿnyre bede bedeki. Aõbinabinahãkÿlemy ityhydÿÿdu rerybedÿÿnywãhãre. Jiarÿ aõnimy reburemy rawãhãre. Resÿbinanyre tahe tii rahenyre irehetyhytyhy-ò iwitxira hãwã-ò. ¹²Rare heka Damasuhãwã-ò ityhydÿÿdu òrysmy. Jiarÿ tyyritidi rare, dohodÿÿna wedu ritina-di. Tule ibede ywina-di rare. ¹³Tahe Damasuiòhòmy rareu, loosònaõ diwatoosònyde, txu loosòna ratyre ihÿre. ¹⁴Jiarÿboho rejuxunyrenyre tahe raholare rybeò-ò judeu mahãdu rybe-di rarybereri: —Salu, Salu, aõhereki wexe aõbina binahakÿ tadiwinymahãte wadee wimy aõkõ. Aõbina binahakÿle ixidee tadiwinymyhÿte. ¹⁵Jiarÿ rarybere: —Mowe, Wanyrÿ tate. Tahe dirawyònyde: —Jiarÿ wa, Jesu-isi rare. Wadi aõbina bina tewisÿnyte. ¹⁶Katahe myikre. Adee rehemynyneri, aratara ixidee, wadeòdumy mabekremy. Warybeduò mabekre. Ibutumy wamy belymy mabekre aõhebo adee wiji rotÿÿnyneri. Iribi tasÿ ixityre adee adehemynykre. Tule kia-di marybekre. ¹⁷Ibutumy asÿ-wana arayrubynykre. Tai ta judeu mahãdu-ò arateònykremy watxireri, judeu mahãdu-ò tule. ¹⁸Iwese iny ruetà-di rÿira wese tii ihÿre. Kai tamy bitÿnynykre Deuxu aõmydÿÿnana. Tai biruejuakre, rierykremy. Biòbitynykre tamyreny òrarudu roire aõma ixi-txi tõhõti reakremy loosòna-ki rariakremy, Satanasi bedelorohokÿ-ki aõkõ, kia ryki aõkõ rariakremy. Deuxu uri bede ywina rimymyhÿkre ixidee. Ibutu bede bedemy rÿira waijoimykre. Tyramy taòraru-ribi rÿira, ritamy rÿira, riwatyhynymy rÿira. ¹⁹⁻²⁰Tai, Iòlò Agripa, iwese warasina-ki riwateònyre wese, retyhynyhyre. Juhuu Damasuhãwã-ki jiarÿ ròhãletere, iribi Jerusalẽ-ò, tule Judeia bedeki, ibutu judeukõdu mahãdu-ò ròhãletere. Tamy rarybere taòraru ririkemy Deuxu dee kòdòòsekemy. Ixi-txi tõhõti reakremy inatyhymy aõna aõna wiwihikÿ riwinykemy Deuxu dee. ²¹Tai judeu mahãdu riwamyre Deuxu dohodÿÿna heto-ki, warubudÿÿmy rõhòtinyre. ²²Deuxu tahe wawiòhedÿÿdu ratximyhÿre. Tai he rãire wiji ibutu-ò ararybekemy watxiwãhãre, aõma aõbo Deuxu rybedu mahãdu iwese Moisesi rarybere wese tamyreny rarybewãhãre kia ibutumy kanakremy. Kia sohojilemy rarybewãhãre. ²³Juhutyhy rarybere: —Kristu, rurukremy iribi tahe kedexiakremy rybe loosòna kidiwykremy judeu mahãdu-ò, tule judeukõdu mahãdu-ò.

²⁴Tahe Paulo iximy rarybereu, Festu ryryre: —Paulo, kai wa itxÿtere. Aõnityhymy tatyryritinymahãte. Tai arayky tebinanyta. ²⁵Tahe Paulo rirawyònyre: —Aõkõre wa, wanyrÿ Festu, bededinodu tyhy. Jiarÿ itxÿte aõkõre. Inatyhyrybemy

rarybewãhãre. Warybe awi heka rare. ²⁶ Tule Iòlò Agripa rieryre ibutumy tuu tamy rarybere. Aõ wasina aõkõ rarybere. Iòlò Agripa. ²⁷ Aõbo Deuxu rybedu mahãdu riritinyre aõbo, kai tetyhynmahãte. Reeryre jiarÿ, kai tetyhynmahãte. ²⁸ Tahe Agripa riixãwididÿÿnyre rybe-ribi: —Kai, aõbo, Paulo, aõwesele ityhydÿÿdumy aronykemy wadi tahõtinyte, wadee tarybeteki. ²⁹ Paulo rirawyònyre: —Kohe, wadee awire, kai tulekemy. Ibutumy kaki wawesekemy adi rahõtinyre. Kai tule warybe sówemy aõbo ada aõkõre aõbo Deuxu bityhynybenykemy watiwãhãre tule waijohonana-wana. Aõna sohojidile taanamy aõkõ watxireri, wawomati reroti-di taanamy atxiteri.

³⁰ Idi tahe bede dinodu, iòlò, Benise, ibutumy he rÿire ròirenyre. ³¹ Widee reny wiwesele ròhõtinyrenyrene. Ka hãbu timyhe rubudÿÿona he ròtena-ki irutysyõna he, tii dori aõhe rotÿÿnyòtyhy aõna aõnamy. ³² Tahe Agripa Festu-ò rarybere: —Rikiteònyrenyke idi watxireri, tahe tii inihe iòlòtyhyle rarybekemy ixidi ratxireri. Tai kÿnyhe, txiioinihe, aõkõre.

27

¹ Tahe rexiywinymy rexihurennyre Italia bede-ò, Roma hãwã-ò aroirenykremy hãwò-di. Tahe ròtenayrubudÿÿduõ tii-wana rakre, irubudÿÿdu renymy. Julio inire. Tii iòlò yrubudÿÿdu mahãdu dinoduõ rare. Ridyrennyre Paulo ròtena woludu mahãdu-wana. Jiarÿ, Luka tule ihemy rare. ² Tahe rerònyre yhywydyna lawò-ò. Adrÿmitxiludu tahe kia lawò rare. Tule hãbuõ wawana rare. Aristarku inire. Tii Macedonia bede luduõ rare. Tesalonia ihãwã rare. Tahe hãwò rexihynyrennyre adòikemy Asia bede-ò. Tahe ròirenyre. Ijõttxu biòwa Sidoma beàbeà-ò rehemynnyre. ³ Paulo taery mahãdu roramy rakemy ratximyhÿre. Tahe Julio Paulo-di itxeredu ririra. Tai tahe Julio awi heka rare Paulo dee. Julio Paulo riywiywinymy idi ratxirerimy ihÿre. Julio Paulo riteònyre titxibo rakelemy. Paulo ery mahãdu aõna aõna tamy riwahinyre. ⁴⁻⁵ Tahe iribi ròhònyrennyre. Xibri bedebute roosibymy ralore yhy dori tiribi tiribi reamyhÿreki. Tahe iribi riòlònyre. Tahe Silisia bede-ribi riòlònyre, tule Panfilia bede-ribi ijõ bede-ò reronyre. Tahe Miha hãwã-ò ritehemynnyre Lisia bede-ki. ⁶ Tai soldado dinodu hãwò nihikÿ riijemyhÿu, ihe-ki roikemy, tahe ijõ-ki rahare Alexÿdria luduõ-ò. Hãwò tahe rexiywinymyhÿre rakremy Italia bede-ò. Tahe wadeereny rarybere: —Borukubenyke yhywydyna lawòro-ò. Tahe ixityre roirenyre. ⁷ Sówemy heka txuu wadireny rÿire. Urihimyòle rexihewãhãrennyre. Isirare heka Kinidu hãwã-ò dehemyntysÿ. Ihãrele tahe rethemynnyre Samona hãwã mynatyhyle raròrennyre. Iribi Kreta bedebute roosibymy ralore

yhydori tiribi tiribi reamyhÿreki. ⁸ Tahe ywimy suò iòlò iòlò adoiwãhãdenyde ihyy tahe rethemynyry Rywihikÿmy ninadu-ò. Kia heka Laseia hãwã-ribi iòhòre.

⁹ Sõwetyhymy txuu wadireny rÿire yhynihikÿ bina òraru-ki. Inarehe lisina txu-ribi ròhònyre. Tai tahe bededÿÿnana ibutumy roimyhÿre. Tai brebunamy bede roimyhÿre. ¹⁰ Paulo tahe tamyreny rarybere: —Wanyrÿboho, ka tÿina isiratyhykre inydeereny. Inynonanareny iòhãrure aõna aõna ibutumy inyribireny ituekre, hãwò rabohokre ada ijò aõbo rikururenkyre. ¹¹ Tahe soldado dinodu Paulo rybe rityhynyòhyre. Yhylawò wedu tòruludu-wana tii rityhynyre. ¹² Yhylawò wedu, tòruludu-wana iwitxiramy røhòtinymyhÿre, beòra tai riekòkemy beà dori ibinareki. Ijò tule tahe roirenykemy ixide ihÿreny rehemynykemy Fenisia beà-ò. Kia heka Kreta bedebute beàò rare. Biuweribitya-txi ròromyhÿre, tai awire kia beà, beòra bede riwykemy. ¹³ Ijò rarybere: —Rikoirenyke, yhy dori rebonyrerì, tamy rekehemyrenykyre. Tahe womatisana riukore. Roirenyre yhy-di. Tahe iòhòmy Kreta bedebute rotÿÿnyra. ¹⁴ Aõwesele heka yhy nihikÿ dehemynyde bedebrò-ribi. Kia yhy nihikÿ iraro bedebrò ludu inire. ¹⁵ Ka yhy nihikÿ taruru-di riwyre hãwò nihikÿ. Juhu yhynonana weribi-ò riwisÿnyre. Idi iwo rexiereny ixinamy riwyre yhyòkesena-ò. ¹⁶ Tahe rehemyhÿre Lauda bedebute-ò iroosibymy tahe ralore. Tai hãwò nihikÿwo-ki hãwòriòre riwyre. ¹⁷ Idi tahe røhòtinyre hãwò nihikÿ rabòhòke-txi roholarenyre, tai tahe ritaarenyre iwetya-txi. Tahe ruberurenyre, Libiamy ninadu beòlau, tahe welòhòkÿ ritare iribi rexitarenkyre. ¹⁸ Ijòtxu roirenyre yhynihikÿ tamy realemy iu, tai tahe aõna aõna-di rehure ibutemy rawetarikemy. ¹⁹ Tasÿ txuò idireny reare. Idi rehurenyre aõmybo rekoakòmyhÿrenyredi rawetarityhykemy. ²⁰ Txu sõwemy rewyrenyre txumy, tainamy ribi renyòhyre. Yhynihikÿ reamyhÿ. Tai sõwemy ruberumy rÿimyhÿ rubu lau. ²¹ Sõwemy heka bededÿÿnana riwyre roxiòhyy. Tahe Paulo iyreny-ki rÿire, tahe tamyreny rarybere: —Wanyrÿboho, warybe-ò taholaòhytentyte Kreta-ribi ròhònyrenyre. Aratohonyrenyre iribi inyboho kodoikòkemy. Boholabenybe-wana ta inihe aõna itueòhyre. ²² Ihãrele tahe deysana-di adeereny ararybekre. Inyò ruruòtyhy, hãwò nihikÿ sohojile rabohokre. ²³ Jiarÿ dori Deuxu deòdu rare. Kaurumy dori Deuxu ÿju wadee nade. ²⁴ Tahe rarybere: —Paulo, brebuòmy. Kai iòlòko-ò makre. Deuxu dori ruxetòena kidiwahinykre. Tiu heka aruburenyoña aijoi-wana. ²⁵ Tahe wanyrÿboho, brebuòmyreny. Jiarÿ dori Deuxu retyhynyre, iwese wadee rarybere wese, rarekre. ²⁶ Urile tahe inyboho kiditehemyny-

denykre bedebuteõ-ò. Kia tahe Paulo rarybere.

²⁷ Waòinaubiòwa rummy beronihikÿ tya-ki bede riijemy roiremyhÿ. Adria beronihikÿ-ki roirenyreu, tahe rutya-txi hãwò nihikÿ aõna hydÿÿdu su iòhòmy roholarenre. ²⁸ Tahe beõ urihixina-di riurihire, wawiò dera urihixinamy beõ riurihire. Idi iko-txi ixityre riurihire tai waiyre dera urihixinamy rimyre. ²⁹ Tahe rahõtinyrenre manale tai roimyhÿremy. Tai tahe manatisana-di inaubiòwa lòru ludu-ribi rehurenre. Iribi rexitòenyre wylemy txuu kanatÿnykemy. ³⁰ Hãwò aõna hydÿÿdu mahãdu hãwò riòre riwesere bera-ò. Idi risÿnyre ijõ manatisana ritidikremy hãwò jura-ribi. Urile tahe rahenykemy røhõtinyre. ³¹ Paulo tahe rierymyhÿ tahe soldado wedu-ò rarybere: —Soldado mahãdu tule roholare: ³² —Hãwò aõnahydÿÿdu mahãdu hãwò nihikÿkÿro-ki rariòrenykeki, kaiboho atuerenyke. Tai tahe soldado hãwò riòre reroti riàrore tahe resere bera-txi rahenyre. ³³ Txuu iòhòmy natÿnyde, tahe Paulo tamy rarybere: —Wiji waò inaubiòwa txummy kaiboho teraòtenyete tabyretenyõhy. ³⁴ Ijõ birÿsÿbenyke, arurureny rexiòlònykemy, kaibohoõ dori burubenyòtyhy. Aradeti sohojiõ tiu iòòtyhy. ³⁵ Rarybemy rahudi tahe, paõ sohoji Paulo rimyre. Ibutura-ò Deuxummy reàlàre. Idi tahe paõ riorore, riyre. ³⁶ Ijõ reny reysarenre, taita tule riyrenre. ³⁷ Tahe 276 iny hãworo-ki roirenyre. ³⁸ Tahe ibutumy iwo rihyrenre tahe maixõmo wesena-di rehurenre hãwò nihikÿ rawetarinykemy. ³⁹ Bede ratÿnyreu, inyõ rieryõhyre titxiribibo nade. Tuu robirenre iworywo-ki ÿnyra tai roimyhÿremy tahe inyõ rieryòlemyhÿre. Widee raryberenyre: —Rikirònyrenyke hãwò-di iwo-txi. ⁴⁰⁻⁴¹ Tahe manatisana riukòrenre tahe welò riderenyra hãwojura-ò iraròsòna riesere. Tahe riteleyenre ralòkemy. Urile esetere tiò tiòle hãwò ridymyhÿ beõ òhòkÿle idi rehure rorokòhòkÿle, rimyre taile òbò hãwòlòru ribohonyre. ⁴² Soldado mahãdu røhõtinyre ròtena mahãdu rahenyketxi. Tai rirubunykeny røhõtinyre bede-ò robunyke lau. ⁴³ Soldado wedu tahe Paulo ritòenyre rubu lau, tai tahe riteònyre rirubunyõhyre: —Tibo alobueryre, juhUU suò rakemy, soldado wedu kia rarybere. ⁴⁴ Tibo alobueryòke tahe òwòru àre hãwò-ribi rimymy idi rakre. Kiamy heka ibutumy retehemynyre su-ò, inyõ ruruõhyre.

28

¹ Tai tahe taisÿdu mahãdu-txi rekoare. Tii bedebutenimy inydee relyre. Malta heka inire. ² Biu riwasebenyrenre yhyjutyty riwasarenre. Tai tahe tiiboho heòty riworneyrenre wahetònarenymy. Tiiboho riwawisinanyrenre awimy wadireny roiremyhÿ. ³ Paulo

hee ributunyre heòtyworonamy. Idi rehureu, hemylala he wo-ribi heòty lau ròhònyre, tai ruruare Paulo debò-ki. ⁴ Tusÿdu mahãdu tuu robire tahe rarybere: —Ka hãbu rubudÿÿdu òsÿny rare. Tii heka ruruõre bera-ò, ka tahe kidiòwynykre inyõ òsÿny rirubunyreki wahe, rurukre heka. ⁵ Paulo tahe hemylala tebò-ribi riatyre heòtyru-txi. Ta aõhòkÿmy rotÿÿnyõhyyre. ⁶ Tahe imahãdu idi retehemy rÿimyhÿ tarubulemy resekeò, ada tebò ratarinybohokeò aõbo. Sõwemy riraòre, aõhebo rotÿÿnyke, tahe aõkòhyyre. Tai tahe iwitxiramy ròhòtinyrenyre: —Tii deuxuõle òsÿny ratxireri. Tiiboho raryberenyre kia.

⁷⁻⁸ Hetoõ tai iòhòmy rÿire, Publio iwedure. Tii heka ityhy rare iwedu rare kabedebute-ki, tii bedeòtiidÿÿna rare. Tai taheto-ò riwadyrenyre. Awihyyle wadireny raremyhÿ. Publio tyby tahe rubunamy rurumyhÿ. Busu-di ratximyhÿ. Tai tahe Paulo iroramy rare. Tebò ityre ritidire, rexitòenyre, tahe riteytenyre. ⁹ Tai tahe ibutumy bedebute ludu webinadu Paulo dee wii rotyre. Ibutumy reyterenyre. ¹⁰ Tai tahe uriiõno inydeereny riwahinyre aõna aõna. Sõwemy rÿsÿna hãworo-ò rahyre inydeereny. Kia hãwò beòra bede kia beà-ki riwyre.

¹¹ Txuòkuro hãwò ni rare. Kia ni ihiju rare. Ideuxu ritxoo inatxi rare. Hãwò Alexÿdria hãwã ludu rare. Tahe rahònyrenyre. Inataõ ahãdumy bede wadireny rÿidi. ¹² Sirausa hãwã-ò retehemynyre. Tai tahe inataõ txumy wadireny rÿire. ¹³ Iribi tahe Rejio hãwãmy rekoarenyre. Ijòtxu tahe Pozuli-ò reòlònyre. Inatxi txu-di retehemynyre yhy ibòò-ribi debonydeki. ¹⁴ Tai seriòreõ ratximyhÿ. Tiiboho rexitòenyrenyre tii-wana ratxikemy debòinatxi reurò txumy. Kiamy heka Roma hãwã-ò roirenyre. ¹⁵ Roma ityhydÿÿdu mahãdu roholare jiarÿboho retehemynyrenyre. Tai tahe doidenyde Apio hãwã ube-ò. Tule aõ-di ijohona Heto Inataõ hãwã-ò doidenyde. Paulo tiiboho robireu, Deuxu reàlàmyhÿ, reysamyhÿre.

¹⁶ Tahe Roma hãwã-ki Paulo ixideewimy rasÿnyre. Urile soldadoõ aõu aõu tii-wana ratximyhÿ.

¹⁷ Inataõ txumy bede idi rÿidi, Paulo ributunyre judeu mahãdu dinodu. Wii ributunyreu, tamyreny rarybere: —Wanyrÿboho, waseriòreboho, jiarÿ aõ rewinykòre waijoi Judeu mahãdu dee. Tule lahirybe õnosõna ratyre aõ rewinyõhyyre. Ihãre judeu dinodu riwamyre. Tahe diwahinyde Roma dinodu mahãdu-ò. ¹⁸ Tiiboho heka riwatÿÿraxinyre ibutumy. aõ heka waki ibinamy rahaõhyyre. Tai tahe riwateònyrenykemy ratxirenryeri. ¹⁹ Waijoi tahe Judeu ijoi heka waòludureri. Tai tahe Iòlò-ò jiarÿ rarybere arakemy. Aõ dori waijoi dee waòraruõre. ²⁰ Tai

heka arabutunyrenyre, warybe-ò boholabenykemy, wadi retehekemy womati reroti-di riwataataara. Judeu mahãdu raròsòna òraru-ki kawesemy watzireri. ²¹ Tahe judeu dinodu mahãdu rirawyònyre: –Aõkõre, inyõ rehemynyõre Judeia bede-ribi. Ijybinamy umy relyyõre. Inyseriõre mahãduõ kaò dehemynyõde. ²² Aroholarenykemy timybo tahõtinyamahãte-ò. Ityhydÿÿdu mahãdumy dori ibutumy aõbinahakÿlemy rarybereri. Kia judeu mahãdu dinodu raryberenyre.

²³ Tahe riywinyre itxu Paulo rybe-ò ijohonamy. Idi tahe Paulo heto-ò sõwemy iny doidenyde tamy roholakemy. Tii Deuxu ijy ritÿnyre rudiu rexidelenyre, txioromy rexihure Moisesi Tyyriti ritÿnyre tule ijõ rybedu Tyyriti-di ritÿnyre, iwese Jesuisi Iòlòtyhy kanatxikre wese kabede-ki. Kia Jesuisi aõmydÿÿnanamy ritÿnyre. ²⁴ Ijõ roholare aõmybo Paulo rarybereò, Jesuisi rityhynyrenyre. Ijõ tahe aõkõre, rityhynyõre. ²⁵ Ijõ teramy reare. Rÿire, ròhònykremy. Tahe Paulo tamyreny rarybere: –Deuxu Tyytybytyhy booreny dee rarybere Isaia tyyriti-ki. Awimy rare. Kawese roire:

²⁶⁻²⁷ –Makre tamy marybekre: –Boholabenyke, ta tiu aerysyrenyõna. Betehekre arue-di, ihãre tahe aerysyrenyõna. Iruereny, iraykyreny, tõhõtireny ritòbònymahãrenyre. Tai tiu tiiboho robirenyõtyhy, rieryrenyõtyhy, roholarenyõtyhy. Tai diwatyhynyõhyymhÿde. Tai heka iòraru-ribi ariteytenyõkre.

²⁸ Bierymy boibeke Deuxu tarasana judeukõdu mahãdu-ò rare. Tiiboho dori roholarenykre. ²⁹ Paulo tarybe rahudi tahe, judeu mahãdu ròhònyrenymy sõwemy widee rarybemyhÿrenyre.

³⁰ Roma hãwã-ki Paulo rasÿnyre inatxi beòramy tahetohuòtenawo-ki. Ibutumy heka dÿÿraximy iheto-ò rehemynyrenyre, Paulo ridyre tamy rarybekremy. ³¹ Deuxu Iòlònamy Paulo iruru-di relyyhyymhÿre. Inynyrÿ Jesuisi Kristu aõna aõnamy rierynanymhÿre. Tiu inyõ aõhòkÿmy risÿnyõmyhÿre Paulo rybe xãwikemy.

Roma Paulo Ryberiti Roma mahãdu-ò

¹ Paulo jiarỹ rare, tyyritiwidỹỹdure wahe. Jiarỹ heka Jesuisi Kristu deòdu rare. Tii riwatare rybe tỹnydỹỹdumy ararekremy. Deuxu Rybewihikỹ wahidỹỹdumy ararekremy. ² Juhuu dori Deuxu rarybere Rybewihikỹ riwahinykemy. Deuxu rybedu mahãdu kia rybe riritinyre, Ritidỹỹnatyhy-ki. ³ Kiamy heka Deuxu Riòre rybe tyhydỹỹnamy rarybere, Davi riòre riòkòreõ wahe. ⁴ Deuxu Jesuisi Kristu rubu-ribi riixixadỹỹnyreu, tariòremy tahe riteòsinyre rurunatyhy-di. Jesuisi tahe inatyhymy Inynyrỹ ihỹre. ⁵ Tii ruxetòena inydeereny riwahinyre. Irybe òraru-ki, jiarỹboho aròirenykemy watzireri. Ityhyna aritỹnynykemy judeukõdu mahãdu-ò, tai tiiboho rityhynyrenykyre. ⁶ Kaiboho tule judeukõdu mahãdu atxitenyteri. Tahe Deuxu ityhydỹỹna mahãdu atxitenyteri, Jesuisi Kristu ijoimy rỹirakemy adeereny rarybereki. ⁷ Ibutumy adeereny warybe rewahinyre, Kia Deuxu taijoimy remyremy mahãdu wahe. Ruxetòena, ywina-wana adeereny-ò kanakemy watzireri, Deuxu inytyby-ribi tule Jesuisi Kristu iny wedu-ribi. Tii dori adeereny irybe riwahinyreki.

⁸ Umyreny Deuxu-ò reàlamahãre, atyhynareny-ò iny ibutumy roholamyhỹreki. ⁹ Deuxu-ò rexitòenymahãreu, anirenymy rarybehymy watxiwãhãre. Kia heka Deuxu rieryre, waworibityhy tahe jiarỹ Deuxu deòdumy rare. Iriòre Rybewihikỹ-di wahe. ¹⁰ Jiarỹ rexitòenyhy watxiwãhãre arorarenymy arakemy Deuxudeewikeki. ¹¹ Umyreny arobikemy watzireri, tai adeereny arelyykemy aõmydỹỹwihikỹõ Deuxu Tyytybytyhy. Tule kaiboho wadee tuu belyybenykre. Tai tahe atyhynareny-ki ityhymy relekre. ¹² Jiarỹ arawiòhenanykemy watzireri, tule kai biwawiòhenanykemy watzireri. Tai rikexideysanytyhykemy inatyhyna-ò. ¹³ Sõwemy heka arahyykemy watxiwãhãre arorarenymy. Iribi nohõti losaõmy tahe wadi rarurunymyhỹre aõbo, riwateònyõhyymyhỹre heka. Jiarỹ Deuxu dee waaõmysỹdỹỹna awikemy watzireri ayreny-ki. Tai kaiboho ako-ò boikemy wadee awire, iwese ijõ judeukõdu mahãduko-ò ararybekremy watzireri wese. ¹⁴⁻¹⁵ Tuheka ibutu iny-ò ararybekremy watzireri, hãwã witzira witzira mahãdu-ò, tule. Iny mahãdu-ò aõkõre mahãdu-ò tule. Tuu ariwinykre ibutumy iny-ò, iny bedeerenyõ mahãdu-ò tule.

Adeereny tule Rybewihikỹmy arelyykemy watzireri Roma hãwã ludu mahãdu-ò.

¹⁶ Jiarỹ dori Kristu Rybewihikỹ-ki araixỹruõtyhy. Irybe dori Deuxu ruru rare. Ibutumy iny rityhynykeki ritakemy ratxikre. Judeu mahãdu-ò juhuu nade tai tahe iuhe-ò judeukõdu mahãdu-ò. ¹⁷ Deuxu òbitina ratỹnynomy namyhỹde Rybewihikỹwo-ribi. Tyhyna-di ritelenyre tule tyhyna-di ihỹmyhỹre. Inyõ tyhyna-di òbitimy rỹikeki, tii ruruõtyhy, idi awimyy rareki.

¹⁸ Deuxu yarana biu-ribi namyhỹde ibutu òraruna hudunamy. Iwidỹỹdu hudunamy. Bina widỹỹdu dori inatyhyna ribinanymyhỹre, raruinymyhỹre Deuxu rybe ribynymyhỹre? ¹⁹ Deuxu eryna ibutumy iny-ò riwahinyre. Deuxule tamy riwahinyre. Tai timybo Deuxu raremy tahe tiiboho rieryhyymyhỹre. Tai Deuxu aõhõkỹmy risỹnymyhỹrenyre. ²⁰ Juhuhukỹle heka Deuxu aõmydỹỹnanamy iny robimyhỹre idi tii tyhynamy tule rierymyhỹre itỹnyhỹkỹlemy, irurunahyy wahe. Aõu aõu kia ibutumy iny rierymyhỹre, Deuxu widỹỹnamy iny robireki wahe. Tai tiu iny ixitxiõdỹỹna. ²¹ Rieryrenyre tii Deuxumy raremy. Tahe rexiwowydynyõhyre timybo iny Deuxu dee rexiwowydynymyhỹkemy wahe. Tamy àlànatyhy riwahinyõhyymyhỹre. Idi rõhõtinyinmyhỹrenyre Deuxu irayky rõhõtinyinmyhỹre wesemy idi rõhõtinyinmyhỹre. Irayky tahe reõsamy ratximahãre. ²² Tiibohole bedeerytyhymy ixidi rõhõtinyrenyra. Tahe itxỹtele roire. ²³ Deuxu rubutere rityhynykenawi tahe tiiboho heka ritxoo deuxuõ ireije riwinymyhỹrenyre tatyhydỹỹnamy. Ibinamy heka mywese riwinymyhỹre, nawii wesemy, iròdu wesemy, iròdu bedemy riradu-wesemy. Rexiòkamy riramy riradu wesemy tahe rityhynymyhỹrenyre.

²⁴ Deuxu heka òraruna-ò riwahinyrenyre, itxỹtenareny òraru-ki. Iny òta òtadu mahãdu heka wiwanale aõõta ixỹruna riwinymyhỹrenyre. ²⁵ Deuxu inatyhyna dori tiiboho riwiurõnyra ruina-ò. Ritxoo dee rexitõdenyrenyre, aõbo Deuxu riwinyre, kia. Deuxule iny reàlàkõmyta ratximyhỹrenyre.

²⁶ Deuxutyhy tahe rityhynyõhyre, Deuxu ibutu widỹỹdu tiu riteàlànymy rakonananyõtyhy. Kia òraru-ki òtaõtana nade. Hãwyy, hãbu-wana aõkõ roimyhỹre wideele heka aõhebo rotỹỹnymyhỹre. Kia heka òbiti aõkõ rare. ²⁷ Tule hãbu, hãwyy-wana aõkõ rõimyhỹre, wiwanale aõhebo rotỹỹnymyhỹre. Òbiti aõkõ heka kia rare. Riwyrenykre kia òraru õwydỹỹna, aõhõkỹmy dỹỹnana wahe. Iny sohoji sohoji taaõbina ixỹruna òraru-ki ixidee rimykre.

28 Tõhõti heka Deuxu-txi reaõhyymyhÿre. Tai tahe timybo ixideewimy riwinyrenykemy roirenyre Deuxu-ribi. Tahe riwinyrenyre ibutumy aõbina binahakÿle. 29 Aõimy aõko ratximyhÿre aõbina bina-di roiremyhÿ: òtaõtana-di, aõbina binahakÿ-di, aõikõkõ-di, rarekemy ixidee ririmyhÿre, teramy heka rÿira. Ihãru-di rÿira iny rubudÿÿmy dori rõhõtinyinmyhÿre, rarybehymy ratxirerimy ihÿre, ruidu nihikÿ ihÿre, ujõmo-di rÿira. 30 Aõbinamy inymy rarybemyhÿre, Deuxu derare, ix-iluulerenyre, rexityhynymyhÿre, òraru tÿmyra riwinyrenyre, tyby tadi-wana rityhynyõhyyre. 31 Irybe sohoji aõkõ heka rare. Iluunaõre, ibinatyhyre, inydee iruxetòeõre. 32 Deuxu rarybere: inyõ kia riwinykeki heka ruruke. Tiiboho kia rieryrenyre. Ihãre tahe aõhebo rotÿÿnyre. Kia sohojile aõkõ. Reysarenymyhÿre iny wixira iherenyki aõhe rutÿÿnykreki.

2

1 Tutyhy-ki aõkõramy rybeõmy. Kai dori tutyhyle òraru tewinymahãõte. Inyõ rybemy ywisidÿÿna ijõmy rarybeke-wana ixilemy ywisidÿÿna-ò rexityhenyke. Tii dori kia ibutumy tule riwinymyhÿre ibinamy wahe. 2 Inyõ kia aõbina binahakÿ riwinymyhÿkeki, Deuxu ywisidÿÿna-ò inatyhynalemy tamy kòdòhònykre. 3 Kai tuleke –kiamy biwinykeki, Deuxu ywisidÿÿna-ribi mahenyõtyhy. Kai dori ywisidÿÿdumy texideòsinyte ihãre tahe iòraru wesele tewinymahãte. 4 Deuxu ruxetòena sòwemy adi rexiruxetòenanymyhÿre. Kia-di bexiràhÿkemy adi ratxireri, tiemy ywimy aõna aõna bina riemyhÿre ratximyhÿre, awi heka adee rare. Kai aõbohe iribi õhõti rosakre kia heka arabedeòtiidÿÿnymyhÿre. Arabedewodÿÿnymyhÿre iòraru-ki. Kai aõbohe kia teeryõte? 5 Kai arybedÿÿsaeryõre rybe ijohona teeryõte õhõtìõre. Tai tahe Deuxu yarana ixideele tebutunymahãte. IjõtXu Deuxu yarana txumykreu. Tai Deuxu ywisidÿÿdu òbiti rexitÿnynymy rÿikre. 6 Iny sohoji sohoji taaõna aõna myna aõmy rotÿÿnykre, aõhebo rotÿÿnymyhÿreki wahe. 7 Inyõ aõwidÿÿlemy ratximyhÿre. Tiiboho heka Deuxu wowydyna, Deuxu wohyna, Deuxu loosòna widÿÿmy rarutaamyhÿrenyre. Tule iny rarehykykrena-di rarutaamyhÿrenyre. Imyna Deuxu tamyreny riõkre. 8 Kia ixidile rõhõtinyinmyhÿre mahãdu tahe, Deuxu woxibrunale, yaranale ritakre. Tiiboho dori inatyhyna rityhynyõhyymyhÿrenyre, aõ òbitile aõkõ riwinymyhÿrenyre. 9 Aõhõkÿmydÿÿnana, bedewona kanakre ibutumy aõbina bina widÿÿdu mahãdu-ò, judeu mahãdu-ò juhuu idi judeukõdu mahãdu-ò. 10 Wowydyna, àlana, ywina tahe kanakre aõwiwihikÿ widÿÿdu mahãdu-ò judeu

mahãdu-ò juhu delemy idi judeukõdu mahãdu-ò. ¹¹ Deuxu-ò heka ibutumy iny wiwese rare. ¹²⁻¹⁶ Tii heka aõhõkỹmy risỹnykre ibutumy iny òrarudu mahãdu. Moisesi bedede ywina ihoõrehãrele tii rurukre. Judeukõdu mahãdu heka Moisesi bedede ywina rybe ijõkõre. Tahe bedede ywina iny rierykeki, idile Deuxu iòraruna riywinykre. Inyõ Deuxu bedede ywina rybe roholare tahe rityhynyõre, kia tahe Deuxu dee ibinatyhyre. Ibutumy kia iny rurukre, òtỹỹ iraykywokile aõbo ibinare, aõbo òbitire rierymyhỹreki. Deuxu bedede ywina wesemy heka iraykywo-ki ratximyhỹre. Iraykywydyna rexinohõtinymyhỹre ada dexiòbitidỹỹnmyhỹde, Rybe wimy rarybemyhỹre Jesuisi Kristu heka hãbu aõmydỹỹna ritỹnynykre imyna timy rarekremy. Deuxu dori iteradỹỹdure.

¹⁷ Kaiboho, judeu mahãdu, texinohõtinytenyta ibutumy awiremy aDeuxureny-wana. Tii adeereny bedede ywina rybe riwahinyreki, tii abiòwatyhy rareki. ¹⁸ Kai heka aõbo Deuxu-ò awire teeryte. Aõbo ibinare, teeryte. Uladuule ibede ywina rybe teeryte, tai òbitityhyle adeereny awire. ¹⁹ Kai Deuxu-ò nonana bitỹnynyke iny ruetã mahãdu-ò dori, kia teerytyhytenyteki. Ixi-di tahõtinytenyteki. Iwese, kaiboho loosõna wesemy toitemahã xixi-di tahõtinytenyte. ²⁰ Tule kia xixi-di tahõtinytahãte. Kai bedede erydỹỹdukõdu mahãdu erydỹỹdumy atxiterimy ixidi tahõtinytahãte. Uladu erydỹỹdumy atxiterimy ixixi-di tahõtinytahãte. Kai bedede ywina rybe tyyritiõ dire. Kia adee ibutumy inatyhyna rare bedeerydỹỹna. ²¹ Kai iny erydỹỹdumy atximahãte. Timyrekibo kai texierynanyõmahãte. Kai wasimy aõkõ tõerydỹỹnanymyhỹte. Timyrekibo tawasinymahãte. ²² Kai hãwyy òta aõkõ tetỹnynymahãte. Timyrekibo kai tuu tatỹỹnymahãte. Suritxoo dee àlana deramy iximy tarybemahãte. Aõherekibo erydỹỹ-ribi aõmydỹỹnana tewinymahãte. ²³ Kai bedede ywina rybe luumy iximy tarybemahãte. Kai Deuxu-di texixiwedenymyhỹte. Ihãre tahe bedede ywina rybe tetyhynyõte. Kiawese Deuxu texirudỹỹnmyhỹte. ²⁴ Iwese juhuru riritinyre wese wiji roimyhỹre: –Aòraru-ki tahe bedemy iny rỹira Deuxumy aõna aõnabinamy rarybemyhỹre. ²⁵ Kai bedede ywina rybe bityhynykeki, õtyky resynadike, awire judeu mahãdu dori rare. Tahe bedede ywina rybe bityhynyõkeki, õtykyresyna adee aõ aõkõre. ²⁶⁻²⁷ Iwesetyhylemy iny rare tõtyky resynaõ mahãdu. Tiiboho bedede ywina rybe rityhynykeki, tõtyky resyna-di mahãdu wesemy roirekre. Judeukõdu mahãdu heka bedede ywina rybe rityhynykeki, kia adee ixỹruna rare. Kaiboho dori Deuxu bedede ywina rybe tetyhynyõte õtyky resyna dire hãrele. Bedede ywina rybe dire hãrele. ²⁸⁻²⁹ Inyõ

judeu mahãdu wesemy ihÿre. Ihãre tahe judeu mahãdu inatyhy aõkõ rare. Tõtyky resyna-di judeu mahãdu inatyhy aõkõ rÿira. Judeu mahãdu inatyhy tawokihyyle kia idi rÿira. Iwesele notyky resynadÿÿna kia rÿira. Inywokihyyle rare. Aõ bede ywina rybekile aõkõ tuu rÿire inyrayky wydynadile kiawesemy inyõ rÿira. Hãbu-ribi wowydynamy ritaõtyhy. Deuxu ribile ritake.

3

¹ Tibohe judeu mahãdu deewinare. Notyy resynale tamywina. Kia aõbo ibuturatyre awire judeu mahãdumy rareki? ² Inatyhy rare, sõwemy, Deuxu dori tamy juhu Ritidÿÿna riwahinyre. ³ Inyõ rityhynyõre-wana kia ri-wiurõnyõhyymyhÿre Deuxu heka òbiti rare. ⁴ Inatyhy urenanamy Deuxu raremyhÿ. Iny mahãdu tahe roidumy rÿiramyhÿ. Iwese ritina-ki roire wese Deuxumy rarybereri: —Kai arybe òbitina-di atximahãte urenana wahe. Inyõ araurihikeki, kai inatyhyna-di biòlòdÿÿnykre. ⁵ Inyboho òbiti aõkõ roire. Kia tahe Deuxu òbitina riteòsinyre. Timykibo Deuxu inydee aõhõkÿmydÿÿnana riwahinykre. Mobo heka kia òbitimy aõkõ rarybekre. Jiarÿ hãbu rayky-di wese rarybereri. ⁶ Kia òbiti rare. Kiaweseõkeki timybo Deuxu bede aõhõkÿmy dÿÿnana riwahinykre. ⁷⁻⁸ Kai tarybete: —Jiarÿ raruiru. Urile kia Deuxu inatyhyna reteòsinyre. Aõherekibo Deuxu aõhõkÿmy riwasynyre. Kiarybe iwitxira rybewesemy rare: —Ibinamy rakatximyhÿkeki, awihikÿ kia-ribi ròhònykre. Aõkõre, kiamy rybedu mahãdu aõhõkÿmy dÿÿnana ritamyhÿkre. Kia riki wamy rarybere, ruimy wahe.

⁹ Aõhe aõbohe, inyboho aõbo inywitxira-ribi awityhyrenyre. Aõkõre. Jiarÿ reteòsinymahãre ibutumy judeu mahãdu, judeukõdu mahãdu ibutumy òrarudu roire. ¹⁰ Kiamy Tyyriti-ki roire: —Tiu heka inyõ òbitiõre. ¹¹ Inyõ heka Deuxu rieryõhyymyhÿre. Timy heka riòryõhyymyhÿre. ¹² Ibutumy iny rexiònononymhÿre Deuxu-ribi wahe. Aõmy aõkõ tiiboho rexiwinyrenyre. Iny riuheõhyymyhÿre aõbo awiré. Sohoji aõkõ aõhebo rotÿÿnyre aõbo awiré. ¹³ Ibòtòijò heka rubuwabede iraymy roimyhÿre ròwese rare. Tiiboho iny itxenadÿÿdu rare. Irybe heka hemylalatyhyju wese rare. ¹⁴ Aõbina binahakÿlemy heka inymy rarybemyhÿre. ¹⁵ Iti heka teyrewa rare hãlubu txiwimy iny rubudÿÿmy tule. ¹⁶ Titxibo ramyhÿre-wana heka aõbina binanale riwahinymyhÿre, aõhõkÿle ririmyhÿre. ¹⁷ Tiiboho dori ywimyno rieryõmyhÿrenyre. ¹⁸ Deuxu lau heka ruberuõtyhymyhÿrenyre, Deuxu rityhynyõtyhy.

¹⁹ Bede ywina rybe heka tatyhydÿÿna mahãdu-ò diòde. Kia tahe inyboho rieryrenyre. Tai heka iny rexitxiònyòtyhy Deuxu-ò. Tai heka ibutu dee aòhòkÿmy dÿÿnana-ò riywinymy rÿikre. ²⁰ Bede ywina rybe-ribi iny ibutumy rieryre ibinamy ratxireri. Inyò heka bede ywina rybe heka rityhynyòhyyre. Tai tahe inyò kia-di rexitaòtyhy iywina òraru-ki.

²¹ Wiji tahe Deuxu òbitina ratÿnynymy ihÿre bede ywina rybe-ribi lahiximy. Ihetxiu rybedu-di kia ritÿnynymy ihÿre bede ywina rybe ritina-di. ²² Deuxu riòbitidÿÿnyra. Ibutumy Jesuisi Kristu tyhydÿÿdu kanakre. Deuxu dee òdori ibutumy bede bede ludu wiweselere. ²³ Ibutumy raòrarunymyhÿre. Deuxu òbitina tamy rauhenymyhÿre. ²⁴ Deuxu taruxetòena-di ibutumy riòbitidÿÿnyre Jesuisi Kristu tarasadureki. Tii iny-ribi iòwydimy aò rexitòenyòhyyre. ²⁵ Deuxu Jesuisi-di rubuna iny òraru riixãwididÿÿnyre iòwy tii riòwynara, iny kamy rityhynkemy. Kawese-ki Deuxu òbitina ritÿnyryra. Juhuu Deuxu iny òraruna-ò reteheòmyhÿre aònityhymy iy-wisidÿÿna direki. ²⁶ Tahe wiji inyòraru-ò retehemyhÿre ri-ixãwididÿÿnykemy. Tai tahe tii òbitire tule Jesuisi Kristu tyhydÿÿdu òbitidÿÿdure. ²⁷ Mobo Deuxu-ò rarybekre jiarÿ awiremy? Aòkòre, inyò rarybeòtyhy. Bede ywina rybe tetyhynyòte. Deuxu iny òbiti widÿÿdure, ibede ywina ywidÿÿ aòkòre. Inatyhynadile awityhymy iny rare. ²⁸ Kiamy tahe raraykynyre iny ityhynadile riòbitidÿÿnyke bede ywina rybe ywidÿÿ aòbo? Aòkòre! ²⁹ Deuxu aòbo, judeu mahãdu Deuxu sohojile rare? Aòkòre, judeukòdu mahãdu-ò tule Deuxu ihÿre. ³⁰ Deuxu sohojile rare. Iny wiwanale riòbitidÿÿnykre judeu mahãdu judeukòdu mahãdu-wana. Ibutumy ityhyna òraru-ki riòbitidÿÿnyke.

³¹ Ityhyna aòbo bede ywina rybe riixãwididÿÿnyra? Aòkòre, bede ywina ihãre rÿire.

4

¹ Timybo ararybekre inytybyreny Abraòmy. ² Aòbo riwinyre aòkò idi rexiòbitidÿÿnyre. Tai tahe rexitihynyke in-yko-ò. Tahe Deuxuko-ò aòkò. ³ Kamy heka Ritidÿÿna-ki roire: —Abraò heka Deuxu rityhynyre taile tahe rexiòbitidÿÿnyre. Deuxu dee tii òbitityhy rare tii rityhynyrekile. ⁴ Iny aòmÿsÿdÿÿdu raòwymyhÿke iaòmÿsÿdÿÿna myna. Urimy aòkò òdori raòwymyhÿre taaòmÿsÿdÿÿnaòwyle òdori ritamyhÿre. ⁵ Inyò rityhynymyhÿkeki, tii òbitina ritamyhÿre Deuxu-ribi. Deuxu òdori òrarudu mahãdu òbitina widÿÿdu rare. Kia uriòno rare. ⁶ Davi heka juhuu riritinyre iwese teysatyhymy iny rarekremy wahe. Deuxu òdori òbiti mahãdu dee riraykydÿÿnyre òbitimy roirekemy. Tii ixidee aò riwinyòre.

Davi kiawese riritinyre: ⁷ —Teysatyhymy iny rÿirakemy Deuxu iòraru riixãwididÿÿnyreu tōhōti-ribi iòraru rosakeu. ⁸ Teysatyhymy iny rÿirakemy iòraru-txi Inynyryÿ nohōti ijeraōmy ihÿkre. ⁹ Deysana aōbo judeu mahādu sohojile riteysanymyhÿre ida judeukōdu mahādu tule. Tulere! Inyboho dori rarybere: —Abraō tyhynale tamy òbitina diwahinymyhÿde. ¹⁰ Tiubo tahe Abraō òbitina ritare notyky resynako-ki ada ihewo-ki aōbo, ikoure. ¹¹ Juhuu dori rityhynyre idi ta notyky resyna tamy nade kia tyhyna Deuxu-ò riteòsinyreki. Tai tule òbitina Deuxu tamy riwahinyre. Kia butu tyhydÿÿdu tyby wese rare, Judeukō mahādu wahe. ¹² Notyky resynako-ki òbitina ritare. Tōtyky resyna-di mahādu tyby wesemy riki Abraō ratximyhÿre. Tiile tōtyky resynakō-ki Deuxu rityhynytyhymyhÿre. ¹³ Deuxu Abraō-ò rarybere tii ibutu bede bede wedu wesemy ratximyhÿre iriòre iribi rimykeny. Tahe bede ywina rybe òraru-ki aōkō tuu ihÿre, ityhyna òbitina òrarukile wahe. ¹⁴ Bede ywina rybe-ribi tybie tahe itarasadumy ratxikre, tai tahe inatyhyna aō aōkō rare. Aōbo Deuxu rarybere aōmy aōkō rare. Tahe roirekre. ¹⁵ Bede ywina rybe dori Deuxu aōhōkÿmy dÿÿnana diòde iny ribedeerynykeny. Teysana aōkō wahe. Bede ywina rybekōki, timyki iny aō ityhynyōna. Bede ywina rybe ijōōre-wana òraruna ijōōre. ¹⁶ Tahe inatyhyna-di sohojile iny aōna aōna wiwihikÿ ritamyhÿke. Tai iruxetòena-ribi nade. Tahe aōmybo Deuxu rarybere ibutu riòreriòremy tuu rÿikre. Bede ywina rybe mahādu tule bede ywina rybekōdu mahādu-wana wiwana Deuxu rityhynyre. Abraō riòre wesemy ibutumy tai inyboho roire. ¹⁷ Iwese Ritina-ki roire wese: —Jiarÿ aratare ibutu inytyby wesemy mabekemy. Ibutumy iny rityhynyre-wana, iwese Abraō rityhynyre wese, iwese-ki Deuxu ritake. Deuxu tahe rubu mahādu riixixanymyhÿre rubu-ribi. Tii rarybekeu aō aōkō aōwesele tii aō heka rare. Tii rarybere tule riwinyre. Abraō heka Deuxu rybe rityhynyre. ¹⁸ Timy heka rariòrenykeny ixidee rōhōtinyōhymyhÿre. Deuxu dori tamy rarybere: —Kai heka ariòkòrereny sōwemy atximyhÿkre. Kai hāwā hāwā tybimy mabekre. ¹⁹ Abraō tatyhyna ritxiōnyōhyre. Timy heka 100 beòramy idi ratximyhÿre, ixāwire uladu-ribi ramatuarinyreki. Tule ihāwyy Sara iuladu herina-di kōremy rōhōtinyre. ²⁰ Timy heka ritxiōnyōhyre Deuxu Rybe. Rityhynymyhÿre Deuxu deālana riwowydynyre. ²¹ Tii heka rierymyhÿre Deuxu irurudire irybe wesemy aō rÿikemy. ²² Tai tahe Deuxu tamy òbitina tamy diwahinyde. ²³ Aō iòraruki aōkō kia ryberitina awimy raeryre, tamy sohojile aōkō dori rarybere. ²⁴ Iny òraru-ki tule kia tuu roire. Iny tule inatyhyna-di òbitina

ritakre. Inyboho dori rityhynymyhÿre, Inynyrÿ Jesuisi rubu-ribi ixixana widÿÿdu Deuxu raremy. ²⁵ Jesuisi iòludu-ò iwahidÿÿmy rara inyòrarureny-ki tai rurure. Tahe iny òbitina wahidÿÿna-ò diixixanyde rubu-ribi.

5

¹ Jesuisi tyhydÿÿ òraru-ki Deuxu inyboho rimyrenyre. Idi awimy rokoirekremy tii-wana, Jesuisi Kristu-wana wahe. ² Deuxu ruxetòenawo-ki inyboho rotamanymyhÿrenyre. Jesuisi Kristu tyhydÿÿna òraru-ki tamy rotamanymyhÿre. Deuxu loosòna worojuxanaò-di rokoirekre. Tai inyboho reysamy ihÿre. ³ Inyboho bedewona-di hyy ihÿrenyre. Ihârele tahe inyboho teysarenyre. Kia dori iny riwiòhenynymyhÿre raròsòna ijòdikemy ruru inydeereny riwahinykemy. ⁴ Inyboho riki-ijerenyhyykeki, Deuxudeewimy rikiwinyrenyke. Deuxudeewina rikiwinyrenykeki, raròsòna rikitarenkre. ⁵ Iny raròsòna tarasana aòkòkeki, uritere rakabedewoòtyhy, Deuxuluuna dori inywo-ki ratxireri. Deuxu Tyytybytyhymy inydeereny wahidÿÿna rare. Tii dori inyworeny-ki Deuxuluuna ritidire. ⁶ Iruruòmy inyboho roiremyhÿre awimy riwinykemy. Tai tahe Kristu inydeereny, inyboho ibinare hâre rurure, Deuxudeewireu. ⁷ Isirare inyò hâbu òbiti dee ruruke. Tahe hâbu wiwihikÿ dee òsana iny rurukre, kia heka irutaòre. ⁸ Deuxu tahe luunatyhy inydeereny diteònyde. Iny òrarudurenyre hâre, Kristu inykireny rurure. Juhuu heka inyboho òrarudu roire. Ihârele Deuxu taluuna nihikÿ inydeereny diteòsinyde. Tai heka Kristu inyòrarureny-ki rurure. ⁹ Irubuna òraru-ki heka Deuxuru-ò inyboho òbitimy ihÿrenyre. Irubuna tahe kia riwinyreki irumy inonana tahe iratyre rarekre inydeereny wahe. Deuxu ykarana-ribi Kristu dori iny ritamyhÿre. ¹⁰ Juhuu Deuxu òludu inyboho roire. Tahe wiji ibiòwamy inyboho roire, iriòre iny òrarureny-ki rurureki, wahe. Wiji tahe rybe òludu mahâdu-ribi wiutàðanamy rÿire. Ibutu kia heka Kristu òraru-ki sohojile ture. Tai iny teysamy roire Deuxu rityhynyreki. ¹¹ Inyboho heka iwitxira Deuxu-wana ratximyhÿrenyre. Tai tahe reysamy ratximyhÿre. Inyboho Deuxu biòwamy ratximyhÿrenyre. Jesuisi Kristu Inynyrÿ òraru-ki heka ture.

¹² Hâbu sohoji òraru-ki òraruna bede-ki ralore juhUU, Adaò òraru-ki wahe. Taile tahe rubu nade bede-ki. Idi ibutumy iny raòrarunyre. Adaò òraruna-txi resereu, rubu ibutumy iny-ò resere. ¹³⁻¹⁴ Juhuu Adaò rurure. Iribi tahe ibutumy iny rurure. Moisesi tule rurure. Tahe bede ywina òraru-ki aòkò tiiboho rurure. Bede ywina dori Adaò rubu hewo-ò Deuxu riwahinyre Moisesi-ò. Deuxu heka

iny òrarunamy aõkõ rõhõtinyre, tabede ywina dori kiau riwahinyõre. Adaõ heka Deuxu rybe rityhynyõre, tai tahe rurure iwese Deuxu rarybere wese. Tule iòraruna òraru-ki ibutumy iny raòrarunymyhÿrenyire. Adaõ heka Jesuisi-ò rakewesenanykre. ¹⁵ Tiiboho wiwanale aõ kabede-ò aõ diwymhÿdenyde. Adaõ heka rubu diwyde. Jesuisi heka runa diwyde. Adaõ heka sówemy iny-ò rubu riwahinyre. Jesuisi tahe sówetyhy-ò Deuxu ruxetòena riwahinyre, tarasana tamyreny riwahinyre. Òraruna sohoji-di heka Adaõ rubu riwahinyre ibutu iny-ò. Jesuisi tahe ibutumy iny-ò biu-ò hena riwahinykemy ratxireri iòraruna sówere hãrele. Umytuedeõna wahidÿÿdu tii ratxireri. Kia awityhyre. ¹⁶⁻¹⁷ Inatyhymy Adaõ widÿÿna ibinare. Jesuisi widÿÿna heka awityhymy rare inydeereny. Inyboho dori Jesuisi-wana irumy ratxirenyre aõu aõu kowa bedede wihikÿ-ki, Deuxu òraru-ki. ¹⁸ Aõhõkÿmy dÿÿnana heka Adaõ widÿÿna diwyde ibutumy iny-ò. Jesuisi tahe òbitina diwyde ibutumy inydeereny. ¹⁹ Adaõ heka Deuxu rybe rityhynyõre. Tai iny sówemy òraruna-txi resere. Jesuisi tahe Deuxu rybe rityhynyre. Tai iny sówemy heka òraruna-ribi ritare. ²⁰ Deuxu tabede ywina rybe riwahinyre. Tai tahe iny aõbina rierymyhÿre. Òraruna-di sówemy ihÿreki, tai Deuxu ruxetòena sówetyhymy ihÿre. ²¹ Juhuu òraruna ratximyhÿre iny umyreny-ki. Inydeereny rubule riwahinyrenyire. Wijile tahe Deuxu ruxetòena riwahinyre inyumyreny-ò, inyraykyreny-ò. Òbitina inydeereny riwahinyre Deuxuko-txi. Jesuisi Kristu Inynyrÿ òraru-ki heka, umytuedeõna inyboho ijõdire.

6

¹ Timykibo Deuxu inydireny rexiruxetòenykeu watxireri Deuxu ire inydireny raruxetòenykemy ire rexiòrarunanymyhÿre hãrele. Timyki tuuõna. ² Aõkõhyyre. Inyboho heka òraruna dee rubumy ihÿrenyire. Timykibo iny ihyymy òraruna-txi rekeseke? Aõkõhyyre. ³ Jesuisi Kristuni-ki inyboho raratisebenyreu, Tule Jesuisi rubu-my ratisebe-ò rururenyre. Kia teertyentye. ⁴ Tiu inyboho risebenyire Jesuisi òraru-ki, tii-wana inyboho rurure. Tai iru tÿmyra-di inyboho ihyre. Iwese Deuxu taruru-di Jesuisi riixixadÿÿnyre wese tule inyboho iru tymyra-di rokoireke. ⁵ Iwese tii rurure wese, inyboho tule rukurenykre òraruna dee. Iwese Kristu rexixadÿÿnyhe wese inyboho tule òraru-ribi ixãwira tii-wana rarehyykremy. ⁶ Iny umy tyby tule rurure Kristu itxeò-ki. Tai inyboho heka òraruna deòdumy aõkõ ihÿrenyire. ⁷ Inyõ rurukreu, tii òraruna-ribi ixãwimy ihÿre. ⁸ Inyboho Kristu-wana rurukeki, tii Kristu-wana irumy ratxikre. ⁹ Kristu rexixare tii ixbyby rurudoÿtyhy. Rubu ixbyby tamy

reaõtyhy. Kia tahe inyboho rieryrenyre. ¹⁰ Jesuisi rurureu, iny òraruna ixãwina rubulemy rurure. Wiji tahe irumy ihÿre Deuxudeehyy. ¹¹ Tule kai arumy atximahãte Deuxu dee iny aõbina bina-ò taruteki rubuwesemy arumy tahe Deuxu-ò. Inynyrÿreny Jesuisi Kristu tyhydÿÿki. Kiawesele mohõtinyke Deuxu dee, Jesuisi Kristu dee wahe.

¹² Kaiboho dori Jesuisi Kristu-wana atximahãtenynte. Òraruna-txi ixyby besekeõtyhy. Ixideewimy aõkõ riki-winyrenyke, aõ ibina wahe. ¹³ Aumyreny biwahinybenyke Deuxu-ò iwese iny iru tÿmyra-di ihÿrenyre. Tai tahe òbitile biwinybenyke, òraruna-txi beseõtyhy aõ iyja aõkõ. ¹⁴ Òraruna rybe-ò ijohorenyõmy. Tii dori awedu aõkõ rare. Deuxu ruxetòena-ò bexiweloromahãbenyke.

¹⁵ Aõbo tahe awityhyre. Ruxetòena òraru-ki aõbo rekexiòrarunymhÿke. Aõkõhyre. ¹⁶ Òraruna rybe-ò heka bityhynybenykeki, òraruna deòdumy atxibenyke, rubu iòwy rare wahe. Deuxu rybe-ò tahe bityhynybenykeki, òbitimy boibenyke. Bexideòdunybenyõtyhyke òraruna bityhynybenykemy. ¹⁷ Wowydyna Deuxu-ò kanakemy watzireri. Juhuu kaiboho òraruna deòdumy ahãtenynte. Tahe wiji inatyhyna erydÿÿna tetyhynytyhytenynte. ¹⁸ Wiji tahe kaiboho òbitina deòdumy atxitenynte. Tahe Deuxu deòdumy wiji toite, tii ixideewimy timybo adirenykre. ¹⁹ Iwese juhuu òrarunawidÿÿna-ò texiwahinymahãte wese, wiji bexiwahinybenyke Deuxu-ò, òbitiwidÿÿna-ò wahe. Òbitimy rarybemahãre, itÿnytyhy kaiboho dori òhõtitymy toite aiximynatyhyrenyõ òraru-ki. ²⁰ Òraruna deòdumy atxitenynte, Deuxu tetyhynyõtenynte. ²¹ Kia aõmydÿÿnana wiji ixãruna adeereny rare. Aõbo tahe awimy juhuu tewinytenynte. Kia heka rubule riwahinymhÿre. ²² Òraruna-ribi ixinamy atxitenynte. Kaiboho Deuxu-ò ibutumy texiwahinynte. Tai umytuedeõna tetatenynte. ²³ Òraruna òwy heka rubu rare. Inyõ òraruna riwinykeki, tii ruruke, kia òraruna òwy rare. Deuxu wahidÿÿna tahe umytuedeõna rare, Jesuisi Inynyrÿ rurureki wahe. Idi tiile-wana tukre.

7

¹ Waityhydÿÿdu seriòre, kaiboho bede ywinamy teerytenynte. Tai bieryke aõmybo ararybekre. Inyõ irulemy rariakekile, bede ywina tamy aõ rare. ² Arawesenanykre. Hãwyy heka ihãbu-wana ihyyemy ihÿre bede ywina myna. Hãbu rurukeki, tahe ixinamy ihÿre ijõ-wana roikremy. Hãbu ruruõkeki tahe, ixinamy aõkõ ihÿre, ijõ-wana roikremy. ³ Inyõ-wana roikeki, hãwyy wedenamy raninikre. Ihãbu

rurukeki, tii ixinamy rarekre. Ijõ-wana roike. ⁴ Kia wese rare, waseriðreboho, ayreny-ki. Kaiboho bede ywina dee tarutenyte. Kaiboho dori ityhydÿÿdu mahãdu atximahãtenyte. Kaiboho Deuxu hõrõ mahãdu atximahãtenyte. Rubu-ribi ixixadu mahãdu atximahãtenyte, Deuxudeewina biwiny-benykemy. ⁵ Juhuu ixideewile aõ tewinymyhÿtenyte, rubu aõmydÿÿnana wahe. ⁶ Wijile tahe bede ywina-ribi ixinamy inyboho roimyhÿrenyre. Iwese ihetxiu tyyriti bede ywina rityhynymy aõkõ ihÿreny, wiji Deuxu Tyytybytyhy aõmydÿÿnana inyboho rityhynrenyre.

⁷ Timybo? Bede ywina aõbo ibinamy rare. Aõkõre. Ihoõkeki tahe òraruna jiarÿ arieryõtyhy. Bede ywina rarybere wasiõmy. Kiale reeryre aõbo wasimy rare, inyõ aõ arimykemy watzireriu, kia òraruna wasiweselemy rare. ⁸ Timyki, jiarÿ òraruna waerysõna bede ywina tuu rarybekõkeki. Bede ywina dori aõbina binamy riwabedeerynyre. ⁹ Jiarÿ juhuu bede ywina reeryõre. Reeryre tahe aõmydÿÿnana binale wadee rarerenyre. ¹⁰ Deuxu heka bede ywina riwahinyre juhuu. Tamy ruru riwahinyre bede ywina wahe. ¹¹ Tahe bede ywina òraru-ki heka òraruna riwahinymy. Tai tahe õnosõna riwarubunyre. ¹² Kia bede ywina tahe awi rare, òbiti rare. Õnosõna awi rare. ¹³ Timybo rare. Òbitina aõbohe riwarubunyre. Aõkõre. Òraruna tiire. Tii tahe ibinatyhy rare. Bede ywina òraru-ki iny kia òraruna ibinatyhy reeryrenyre. ¹⁴ Bede ywina heka Deuxu Tyytybytyhy aõmydÿÿnana rare. Jiarÿ heka inyle rare, òraruna heka wawedu rare. ¹⁵ Aõbo warayky dee ibinarele, kiale rewinywãhãre. Aõbo awimy warayky dee rare, kia rewinyõhyyre. Aõherekibo? Reeryõre. ¹⁶ Rexierymyhÿre aõbo rewinymyhÿre. Reeryre kaa bede ywina awi rare. Tai heka rabedewomy watziwãhãre. Jiarÿ dori bede ywina bede ywina riti reerymy watziwãhãre. ¹⁷ Retxiõnymy watziwãhãre. Waruruõhy heka watziwãhãre. Aõwi ariwinykeð. Òraru heka iòhõmy waribi ratximyhÿre waruru ratyre ratximyhÿre waribi. Tai heka òraru rewinymahãre. ¹⁸ Waumy ehetyxina tahe ibinatyhy rare. Aõbo awi rare heka ariwinykemy rewisÿnywãhãre ta heka rewinyõhywãhãre. Aõwi rewinyõhyymahãre! ¹⁹ Jiarÿ rarurunymahãre heka aõbina ariwinykõkemy. Tahe ihãrele heka rewinymahãre. ²⁰ Reeryrehe aõhebo ratÿÿnymyhÿre. Jiarÿ ixiðrarudÿÿ waðraruna wadi raitxÿteitxÿtenymyhÿre. ²¹ Deuxudeewimy heka ariwinykemy watziwãhãre. Tahe araðrarunyhymahãre. ²² Waumytÿmyra rarurunythyymahãre Deuxudeewi widÿÿna ariwinyke. Awityhy rare wadee. ²³ Ijõ tahe waumywo-ki, waraykywo-ki, ratximyhÿre,

waumyehetxina waki ratximyhÿre. Wadi rarurunymyhÿre riwamymy ratximyhÿre. Aõbina widÿÿmy heka wadi rimymy ratximyhÿre. Reòludunyõhyymyhÿre waraykymy heka rahaÿnanymyhÿre. Aõwesele heka tuu rahaÿnanymyhÿre, riòludunyõmyhÿreki wahe. Raraykynmahãre warayky-ki, Deuxudeewimy watxikemy. Tule tahe reerymahãre òraruna deòduõ jiarÿ rare wahe. Waumytÿmyra tahe wadee rarybemyhÿre òbitimy aõmydÿÿnana ariwinykemy. Waumyehetxina tahe kialemy wadee rarybemyhÿre –òraru ariwinykelemy. ²⁴⁻²⁵ Tai heka urile warayky raleileinymyhÿ. Mobo riwatake waumyehetxina bina bina aõmydÿÿnana-ribi? Deuxudeewina-ki, Jesuisi Kristu Inynyrÿ heka iximynamy riwatakre. Tii riwateònymy wadi rarekre. Wowydyna tamy ariwahinykre.

8

¹ Tai heka Jesuisi Kristu tyhydÿÿdu mahãdu rubutyhy-ò heka raõtyhy. Deuxu heka tii ritarenyke tii-wana rarehyyke. ² Deuxu-ò Tyytybytyhy dori warurutymyra-di riwarurudÿÿnytyhyre. Rubu-ribi dori Jesuisi Kristu riwatare ixinamy ararekemy. ³ Inyboho heka Deuxu Bede Ywina rieryenyre, Moisesi tyyriritina wahe. Tii heka iny òraruna-ribi iny ixinamy ririradÿÿnymyhÿre. Jesuisi Kristule, aõbo, òraruna ruru rahumyhÿre. Aõma rakahurenyõtyhy heka iny rururenydi aõma òraruna ixitawo-di. Rikityhynyrenyõtyhy heka aõma ixitawo-di aõbo bede ywina Tahe Deuxu tariòre diteònyde iny umyrenywesemy wahe. Tiu heka iòrarunaõhyyre. Tai heka rexiwahinyre iny òrarureny-ki. ⁴ Tai rikityhynyrenyke aõma Deuxu bede ywina. Iny nohõtireny rosake aõbo umy ehethinareny inydeereny rarybemyhÿre. Ijohonarenyõmy ta, irybe-ò, Deuxu Tyytybytyhy rybeòle rokoholamyhÿreny. ⁵ Aõbo Deuxudeewimy biwinybenykeki, tai Deuxu Tyytybytyhy rybeòle heka iny roholamyhÿke. Ixideewimy widÿÿmy burubenykeki tahe, aõwaxina boholabenyke umyehetxina rybe-ò. ⁶ Deuxu Tyytybytyhy rybe-ò ijohona heka iny umytÿmyra-ò ridymyhÿre, umytuedeõna-ò, ywina-ò. Umy ehethina rybe-ò iny rohola wana, tahe rubu-ò iny ridymyhÿre. ⁷ Umy ehethina dori aõma rare, Deuxu òludu. Deuxudeewimy aõkõ heka riwinymy ihÿre tiu riwinyõtyhy. ⁸ Inyõ ibutumy òraruna ixideewimy riwinykeki, tiu heka Deuxudeewina riwinyõtyhy. ⁹⁻¹¹ Kaiboho tahe kiawesemy aõkõ heka toite. Deuxu Tyytybytyhy heka aworeny-ki rasÿnymyhÿre. Tai heka umytÿmyraõ heka kaiboho ijòdirenre. Deuxu Tyytybytyhy heka kaiboho ijòdirenre. Inyõ Deuxu Tyytybytyhy ihoõkeki, tiu tii

ityhydỹdu aõkõ rare. Aumytyhy heka rurukre aòrarunaõ direki wahe. Atytyby tahe iruhyymy ratxikre, Kristu dori aòraruna riixãwididỹnyreki wahe, Deuxu araòbitidỹnyre wahe.

¹² Tai waityhydỹdu seriòreboho. Umy ehetsyina rybe-ò uritere ijohonarenyõmy. ¹³ Irybe deradỹna-ò beòbybenykeki, kaiboho heka burubenyke. Aõkõkeki arurenymy mari-abenykre, Deuxu Tyytybytyhy-di wahe. ¹⁴ Ibutumy Deuxu Tyytybytyhy rybe-ò roholamyhỹre mahãdu, tiiboho tahe Deuxu riòre roire. ¹⁵ Deuxu rybemy bityhynybenyke. Deuxu Riòre wesemy tahe bityhynybenyke, òbitimy atxibenyke, deòdu wesemy aõkõ wahe, buberubenyòtyhy. Waha-my tahe marybemyhỹbenykre heka. Deuxu Tyytybytyhydile wahe. ¹⁶ Ijoiirenymy rakatxirenykre. Aõmybo Deuxu Tyytybytyhy-di inyeereny roimyhỹreki heka, tuu inatyhymy rakatximyhỹrenykre inyboho iriòre roiremy wahe. ¹⁷ Ibutumy aõbo Jesuisi Kristu inyeereny riwahinymyhỹke heka, tule inyhõrõ reny heka rare. Iwese tii wowydyna iribi rikitarenykeki, tii-wana heka aõhõkỹmy rokotỹnyrenykre.

¹⁸ Aõhõkỹmy rokotỹnyrenykre tahe aõnihikỹmy aõkõ rare, urihimyòle wahe. Inyeereny dori wowydynaõ kidiwahinykre, sòwetyhymy. ¹⁹ Ibutu bede bede aõna aõna riraòmy roimyhỹre, aõma-ò, Deuxu Riòre mahãdu ibutumy rubu-ribi ixixana kiditynynykreu, rexixamy ibutumy rỹirakre idi biu-ò rirahukre wahe. ²⁰ Kiatxu tahe ibutumy bede bede raaòbinanyke. Iwese Deuxu juhUU riwinyre-ribi resere iny òraruna òraru-ki. Deuxu dori tuu bede riywinyre txioinyhe tahe, raròsòna rỹire, riwixiranyke. ²¹ Rekeysarenykre heka Deuxu riòremy heka rakatxirenykre. Tii ibutumy bede bede-ribi iny ritarenykre ibutumy òraruna-ribi, rubu-ribi. Ibutumy òraruna aõbina bina deòdu heka rexihukre. Deuxu ibutumy aõna aõna ritỹmyranykre iwese tariòre itỹmyrare wese. ²² Kaa wiji tahe ibutu aõna aõna aõhõkỹmy rotỹnymy rỹira iròdu alòbòròna, ibutumy heka uladu ijira dese wese heka riijemy aõna aõna rỹira. Aõma, ixixanatxu dehemynykòlemy roimyhỹreki wahe. ²³ Tiibohole sohojile aõkõ, tule inyboho Deuxu Tyytybytyhyre hãre, kia delemy inyeereny rawahinyre hãre, aõhõkỹmy rotỹnymyhỹrenyre idi tiu Deuxu tariòremy risỹnyrenykemy riraòmyhỹre. Kia tahe inyboho riraòmyhỹrenyre. ²⁴ Inyboho dori tararòsòna-ki kawese awirenyre. Inyõ iraròsòna itỹnykeki, aõbo tahe riraòmyhỹke. ²⁵ Tai tahe Deuxu rikityhynyrenyke rikiraòrenymy aõma, inyeereny tuu raryberé, rikitarenykré. Rikiyrymy rikiraòmy rokorokomyhỹrenykre.

²⁶ Iwesele tahe Deuxu Tyytybytyhy heka iny

riwiòhenanyrenykre. Inyумы аõmydÿÿnanareny heka аõhebo rotÿÿnymyhÿre txuõ txuõlemy iny riwiòhenanymyhÿrenykre. Inyboho riwiòhenanyrenykre аõma inyboho rierykõreki ixitòedÿÿ. Deuxu Tyytybytyhy inydeereny dori rexitòenymyhÿre tii inyboho heka аõmy rybe inyboho rierykõmyhÿrenyре inydee risÿÿnynomy rarybemyhÿre туu. 27 Inytybyreny heka ibutумы inyraykyreny, inyworeny, rierymyhÿre. Tii heka rexitòenymyhÿre inydeereny iny òbitinareny-di, iny ywinareny-di iny riixitòedÿÿnymyhÿrenyре. 28 Ibutумы аõbo inydeereny rabededÿÿnananymyhÿré heka inydeereny awire. Deuxudeewina heka rikiwinyrenyke inydireny ratximyhÿre Deuxu dori inyluurenyre. Tii dori iny ridyre tariòre wesemy. Tii dori kiamy juhуu rõhõtinyre. 29 Juhudihikÿle Deuxu rõhõtinyre mobo тамy rakemy. Таhe тiu rierymyhÿre mobo аõma inyboho тамy kanakré. Tiu heka rierymyhÿre тimybo widi rarekré, tariòre wesemy idi rarekré. Iriòre heka sõwemy iseriòre relekre. Iriòre таhe juhuule ityhydÿÿdумы iuhe rÿire, iseriòre wesemy wahe. 30 Tii heka inyboho rihitxinyrenyре. Tii heka ryrymyhÿre тамy, kanakemy. Tii inyboho тамy ritehemynyreu, heka inyboho тамy ritehemynyrenyре. Iny òraruna-ribi inyboho riixãwididÿÿnomy Deuxu, Jesuisi, Deuxu Tyytybytyhy ywina heka inydeereny riwahinyre.

31 Ywimy rakatxirenykemy heka inydeereny rõhõtinyinymy ihÿre. Wowydyna heka inydeereny riwahinykre. Timybo rakaryberenykre. Awire heka ibutумы. Nihikÿre. Deuxu heka inyworeny-ki ratximyhÿre. Tii heka inydinodurenyre. Inyòludurenyòhyre ratxirenyke, sohojiõ. 32 Ibutумы inydeereny riwahinykre –inydeereny dori taRiòretyhy dori diwahinyde. Diwahinyde heka inydeereny rurukremy. Deuxu heka iny riixãwididÿÿnyrenyре. 33 Inyboho heka òbitimy ratximyhÿrenyре тамy rakatxirenykemy. Tii dori iny riwinyrenyре òbitimy. Inyõ rarybeõtyhy iny òbitimy аõkõ ihÿre. 34 Inyõ heka inymyreny rarybeõtyhy rukururenykremy. Jesuisi Kristu dori inydeereny rurure, iny òrarureny-ki. Tii ixityre rubu-ribi rexixare inydeereny. Katahe ronymyhÿre Jesuisi heka rexitòenymy ronymyhÿre inkireny. Deuxu-ò heka iny riixitòedÿÿnyremy inydireny ronymyhÿre. 35 Tiu heka rihitxinyõtyhy, аõma Jesuisi Kristu lureki wahe. Аõhõkÿmydÿÿnana dori rakatxireny. Tii heka iny rirubunyrenyke. Iny rama rirubunyrenyke inieruõmy. Bede brebuwo-ki rakatxirenyke. Inymyreny rarybemyhÿkre. iny rirubunyrenykre. Та Deuxu inywanarenyhyy ratximy ihÿre. Tiu heka Deuxu-ribi аõ iny rihitxinyrenyõtyhy. 36 Inyboho heka rubu riraòhyky ratximyhÿrenyре, rexiwinyhykyle. Kia

rikiwinyrenykre aõma Deuxu luuna-di xiery –iwese budoeni tarubuna riraòmy rỹimyhỹre wese. Deuxu rybe inykoreny tuu relyymyhỹre. ³⁷ Taiki heka imahãduy-ribi rokotarenykre. Kia òlòna inyhõrõreny rare. Kristu dori inydeereny rurure. Aõ heka iny rihitxinyrenyõtýhy Deuxuluuna-ribi. Rubu dori iny rihitxinyrenyõtýhy. Umy tiu iny-ribi rihitxinyõtýhy. Ýju dori tiu iny rihitxinyõtýhy. Aõbinahakỹ heòty, rubu bina heòty dori tiu Deuxu luuna-ribi rihitxinyõtýhy. ³⁸ Aõ heka iny rihitxinyõtýhy Deuxuluu-ribi. Biu wenonana dori, beheỹ ratyre, tiu Deuxu luuna-ribi iny rihitxinyõtýhy. Wiji aõna aõna itõmo rahudi aõna aõna, aõtxi aõna aõna tiu iluuna-ribi rihitxinyõtýhy. ³⁹ Kia ibutumy wadee inatyhy rare. Jesuisi heka Deuxu inydeereny ritỹmynymyhỹre ibutumy iluuna iny òrarureny-ki rurureu.

9

¹ Kaiboho waijoiireny, waityhydỹỹdu seriòre mahãdu. Kristu hõrõ jiarỹ rare, inytyhy rare. Deuxu Tyytybytyhy, Jesuisi Kristu-wanale rierymyhỹre kia inatyhy rare. ² Rabedewomy heka watzireri waijoi rityhynyõreki. Deuxu Tyytybytyhy kia rieryre. Txuõ txuõlemy, ruõ ruõlemy rabedewomy watzihãre. Txiole txiole aõmydỹỹnanamy adeereny ararybeke kaiboho tarasanaõ boibekemy. ³ Deuxu riwatzuhoke Kristu-ribi waijoi deròwomy, iwiòhedỹỹkeki. Jiarỹ heka ihyy arurukemy waijoi ityhydỹỹdukõdu mahãdu wahe ixi-di tamyreny rahõtínymy watzireri. Kia biu-ò hena ritarenykemy wahe. Tahe aõkõre heka. ⁴ Deuxu heka tamyreny sõwemy diwahinyde. Ihãrele tiiboho ijohona deramy rekoamahãrenyre. Aõma, rihitxinyrenyre heka taijoiireny. Ridyrenyre heka bederahy-ò loosòna-ki biuwetykywo-ki. Tahe tamyreny rarybere tii iluurenymy. Tamyreny heka sõwemy aõ kidiwahinykemy idireny ratximyhỹre. Tule tabede ywina rybe tamy diwahinyde. Tai tahe Deuxudeewina reeryrenyre. ⁵ Tamy heka Deuxu wowydynaõ riwahinyrenykemy Deuxu teòduõ kanake tii tamy rarybere. Tybyreny dori ilahiboho dori rityhynyrenyre, tii Deuxu sõwemy rityhynyrenyre. Kristu tahe tule judeu mahãduõ ratximyhỹre, waijoi wahe.

⁶ Deuxu rybe inatyhytyhy rare. Sõwemy iny judeu mahãdu wese roire. Ibutumy tahe judeu mahãdutyhy aõkõ roire. ⁷ Ibutumy judeu Abraõ riòre riòre rỹira mahãdu aõkõ heka Deuxu riòremy rarekre. Deuxu heka Abraõ-ò rarybere: – Ijai riòrele ariòkõre rarekremy ijõ aõkõ. Ibutumy Abraõ riòre, Ijai riòre aõma ityhydỹỹdu aõkõ roire. ⁸ Ijõ iriòrekõna

mahādu tahe ityhydŷŷdu heka roire. Kia Deuxu rybe rityhynymyhŷrele heka ityhydŷŷdu mahādumy rŷira –judeu mahādu tyhy wahe. ⁹ Juhuu tahe Abraō-ò Deuxu rarybere: – Ahāwyy Sara, iriòredikre ijō beōrau wahe. ¹⁰⁻¹¹ Iu tahe Ijai iriòre hāwyy-wana herinanyreu, Rebeka-wana roire tahe inatxi uladumy heka Rebeka tamy kidiwahinykremy riywinyra. Ijau juhutyhy iriòredelamy reakre riywinyra. Ijō tahe Ijaò ini rarekre. Kawese Deuxu rarybere uladu reakōule: –Jiarŷ heka Ijaòmy retamy rarybere Ijau aōkō. Jiarŷ aōna aōna sōwemy tamy adiwahinykre. Deuxu kiamy rarybere Ijau reakōule. Tiu aōwiihikŷ aōbina bina riwinyke aōkō. Myle roireri. Deuxu riteòsinyre ijō tarasanamy reake-ribi tahe ijōle tuu reare. Aō uladu tuu riwinyreriki aōkō Deuxudeewimy tuu riwinyre. ¹² Juhuutyhy Rebeka-ò rarybere: –Idela taseriòre deòdumy rarekre. ¹³ Iwese tyyriti-ki roire wese: –Ijaò iluure tahe Ijau aōkōre.

¹⁴ Aōmybo tahōtinyteri? Deuxu aōbo adee ibinare kia riwinyreki? Aōkōre heka. ¹⁵ Deuxu rarybere Moisesi-ò: – Jiarŷ heka awimy inyōdee ariwinykre, tahe tuu ariwinykre. Inyōdee ruxetōena ariwahinykeki, tamy ariwahinykre iixideewimy. ¹⁶ Deuxu ruxetōenale heka rare, iny aōmysŷdŷŷ sōwehekŷmyreki aōkō inydee tarasana riwahinykre. ¹⁷ Kaheka iny rieryre Faraò (Egito bede iòlò) ijyy dori inydee kia riteòsinyre iwese Deuxu rare wese wahe reteherenyké. Deuxu kiamy rarybere Faraò dee: –Adee kŷny ariwahinyre ruruō kai bonyke iòlòmŷ. Tai tahe ibutumy iny wani wiwihikŷ-ò roholakre. ¹⁸ Ibutumy Deuxu ixideewimy tuu riwinyry rŷirakre. Ruxetōena riwahinyke tamywi tahe riwahinyra.

¹⁹ Inyō tahe wadee timy rarybeōtyhy: –Aōherekibo kawesemy Deuxu inyō aōhe risŷnykre ada amobohe Deuxu aōwidŷŷna deramy reakre. ²⁰⁻²¹ Tiu moō rarybeōtyhy Deuxumy ibinamy. Iu inyō butxi riwinykreu, aōma sudeō rimykreu, riwinykre heka butxiwihikŷō tamywikeki. Ibinaō riwinykeki tasŷ iwesele riwinyke ibinamy tuutyhymy. Bedenamy riwinyke noijaka tamy ridemyhŷkemy. Ijō butxi tamy wikeki. ²² Iwesele heka Deuxu rare. Rebureke heka inyōdee raykarananyke. Ijō-ò tahe awike ta ruxetōena-di riwiòhenanyke iaōna aōna riijemy. ²³ Idi tahe rōkōhōtinyreny timybo Deuxu wina, Deuxu loosōna awiremy iruxetōena inydeereny riwahinyhyymyhŷre. ²⁴ Judeukōdu mahādu Deuxu ritare. Judeu mahādu yribi sohoji aōkō. Inyboho. ²⁵ Osea tyyriti-ki rybeō kiamy tai roire Deuxu rarybere wahe: –Ijō mahādumy sŷ aronykre wariòremy. Tahe waijoiy-ribi aōkō waijoio mahādu aōkō waijoimy arininikre

idi aritakre. Tuumy ararekre. Tiu heka luuna juhuu inyõ rewahinyõhyre. ²⁶ Deuxu rarybere tiu: –Kaiboho juhuu waijoi aõkõ toite, tuuõmyta kowa-ki wariòrerenny my boibekre. ²⁷ Isaia tule rarybemyhÿre aõma judeu mahãdumy wahe. Sõwemy, sõwemy imahãduõ hãre tahe, ibutumy tarasanamy reakre. ²⁸ Deuxu ele elemy rotÿÿnykre timybo rarybere myna. Ijõ-ò ruxetõena riwahinykre ijõ-ò adehuna riwahinykre riixãwidinyrenykremy. ²⁹ Ijõ Ritidÿÿna-ki Isaia rarybere: –Deuxu ibutu ðinodu heka ruxetõena riwahinyõkeki, ibutumy judeu mahãdu riixãwididÿÿnykre iwese Sodoma hãwã Komora hãwã-wana riixãwidinyre wesemy wahe.

³⁰⁻³¹ Timybo rakaryberenykre kia aõmydÿÿnanamy? Kialemy: –Judeukõdu mahãdu-ò Deuxu tarasana riwahinyre tiu Deuxu riijeõhyymhÿre hãrele. Judeu mahãdu heka rityhynykemy idi ratximyhÿre ibede ywidÿÿna-di tahe tiu heka ritaõhyymhÿrenycre tarasana. ³² Bede ywina rybe riyrubunyekhãre awikehãre tiu tarasana ritaõtyhy. Rityhynytyhykekile heka tuuke. Tai tahe ritaõre tarasana, rityhynytyhyõrenycre. Tai tahe iwere mana iny riatymyhÿre were rydÿÿnarenycre. ³³ Ijõti nihikÿ heka roimyhÿre. Tiu heka riõhõreõtyhy iweribi-ò. Deuxu rybe-ki kia wesemy roire: –Judeu mahãdury-ki mana nihikÿ wese retidimy doimyhÿde. Sõwemy heka iny rÿira tiu heka ityre-di rariaõtyhy biu-ò hena-ò dehemynydeki wahe. Kia iny rityhynymy Jesuisi Kristu rÿirale tahe ritakre tarasanaõ heka inatyhymy.

10

¹ Waityhydÿÿdu seriòre, rexitõenymy wãhãre heka Deuxu-ò ibutumy judeu mahãdu biu-ò henamy rÿikemy. Kiamy tuu rarumahãre. ² Reerymahãre tiiboho ibutumy rityhynymahãrenycremy Deuxu. Tiiboho ityhydÿÿnareny tahe õbitihyky aõkõre. ³ Tiiboho kiamy rõhõtinyamahãrenycre aõma judeu mahãdu heka bede ywina rybe rityhynyrenykekile rexiõbitinykemy heka rõhõtinyamahãrenycre Kristu-ò ta rexiwelòròkõlemy Kristu bede-ò rexihumyhÿre, tai Deuxu iny-di awimy rarekemy. ⁴ Bede ywina heka Deuxu aõmydÿÿna tarasana aõkõ heka rare. Kristu rityhynymahãrenyke. Kia weseleke heka tii rimyrenycre rexiõbitinyre. ⁵ Moisesi dori ròritidÿÿre tuu: –Inyõ tiu òraruna-txi reseõhy rarekeki, taile iny tarasanamy ratxike. ⁶ Kiamy heka ityhydÿÿna namyhÿde. Uritere inyõ Kristu biu-ribi kòdidykemy ixinohõtityÿõna Kristu kidiwykredi uritere nohõtirenyõmy, isiratyhyre wahe. Tuu aõkõ iny õbitidÿÿna-ki rahamyhÿre. ⁷ Uritere Kristu ixixana-di mohõtinyenyõmyke isiratyhyre dori

kia-ribi òbitidỹna kiditakremy. ⁸Tii heka inyboho ribedeery-nanymyhỹre. Iòhòlemy heka iny-ribi ihỹre warybereny wahe. ⁹Iny taykyrenykile rityhynymyhỹre inykile. Tai tahe rarybere inywitzira-ò aõma Kristu iny wedureny ihỹremy wahe. Inyworeny-ribi rikityhynymyhỹrenykeki. Aõma Kristu heka Deuxu riixixanyre rubu-ribi. ¹⁰Taiki tahe biu-ò hena rakatarenykre. Aworibityhy rikityhynymahãke. Kiamy heka iny òbitimy rekelerenyke Deuxu dee wahe. Rarybeke iny-ò rityhynymy ratximyhỹremy tai tahe tuu relemy ratxike. ¹¹Kiamy heka Ritina-ki roimyhỹre: –Inyõ rityhynytyhyhyhyke heka teysamy ratxike. Tiu heka anabedewoõtyhy tatyhyna-ki. ¹²Judeu mahãdu dori judeukõdu mahãdu-wana wiwesele rare. Ibutumy heka sohojihyyle iwedure, Inynyrỹ wahe. Ibutu heka inydee riwahinymyhỹre aõmybo iny rexitõenymyhỹre wahe. ¹³Iny rexitõeny-wana Inynyrỹni-di tarasanamy, tai iny-ò riwahinymyhỹre. ¹⁴Teerykõte heka timybo idi ratximyhỹre rexitõenymy. Timybo bieryke inyõ tuu relyyõhãre heka rityhynyke. Tamy heka roholaõtyhy inyõ tuu relyyõkeki tiu ityhydỹõna. ¹⁵Inyõ heka raõtyhy, inyõ biteõnyõkeki wahe. Kiamy tahe Tyyriti rarybereri: –Kia Rybewihikỹmy rybedu heka awi heka rare, dehemynyna heka awire, deysana rybe dori diwymyhỹde. Deuxu rybena ywina wihikỹ heka diwymyhỹde. Tai tahe iny reysamy heka aõma Deuxu Rybewihikỹ tamy riwymyhỹreki wahe.

¹⁶Ibutumy aõkõ tahe rityhynymyhỹre. Iwese Isaia Deuxu rybedu rarybere wese: –Inynyrỹ, Rybewihikỹmy tamyreny heka rarybemyhỹreny. Ihãrele tahe rityhynyõhyymyhỹreny. ¹⁷Ityhyna heka Rybewihikỹ-ò iny roholamyhỹreu, rityhydỹmyhỹre. Kristu ityhyna tamy kedehemynykre, rybe wihikỹ õraru-ki wahe. ¹⁸Dỹõraxinaõ ariwinykre. Taholatenyõte aõbo Deuxu rybe-ò? Kohe, ibutumy heka roholamyhỹre. Tyyritina-ki roire: –Deuxu rybe tỹmyra wihikỹ ibutumy riteõnymyhỹre hãwã hãwãmy. ¹⁹Ijõ arỹõraxikre: –Judeu mahãdu aõbo kia rieryõmyhỹre? Moisesi tyyriti-ki roire: –Deuxu biu-ò hena judeukõ mahãdu-ò ariwahinykre. Waijoi mahãdu ariwoxibronykemy. ²⁰Isaia tahe idi tuu rarybere: –Iny wiwana mahãduõ heka Deuxu riijemyhỹre. Tii rexitỹnynyre taõrysdu mahãdu-ò. Itxi reare. ²¹Isaia rarybere Judeu mahãdumy kia: –Ihãrele Deuxu iny ritobinyrerimy ihỹre iny, iny nohõtibinaki wahe.

11

¹ Kaiboho heka timybo tahõtinyinmahãtenyete Deuxumy? Tii aõbo taijoi-ribi nohõti rosaremy –judeu mahãdu-ribi? Aõkõre. Jiarỹle, Paulo, judeu mahãduõ rare. Jiarỹ heka

Abraõ riokoreõ rare. Benjami ijoiõ heka jiarỹ rare.
² Deuxu taijoi-ribe nohõti rosaõtyhy. Tii juhuhu ritare. Elia juhuhu Deuxu-ò taijoiiny rarybere. Ryberiti-ki kia roire:
³ Tiiboho heka rybedu mahãdu rirubunyre. Tule axiwena wahidỹyna ribõhõnyre. Jiarỹ sohojile aluure Deuxu. Tule rõrubudỹmy wadi ratxirenyreri. ⁴ Timybo Deuxu heka Elia-ò dirawyõnyde: —Aõkõre, kai ihewoludutyhy waluunadu aõkõ tate. Waluunadu 7000 inimy rỹire aribihitximy wahe. Tule Bali suritxoo tiu rityhynyrenyõhyymyhỹre. ⁵ Katahe wijile iwesele rare. Iny ibutemy Deuxu hõrõ mahãdu rỹire. Tii taruxetõenadile ritarenyre. ⁶ Deuxu ruxetõena heka aõ iõwy-di aõkõ riõwynymyhỹre Deuxu riwahinymyhỹre. Aõwiwihikỹ diwinymyhỹdenydeki aõkõ heka tuu heka ratximyhỹrenyre iõwydikeki tahe aõ ruxetõe aõkõ rare. ⁷ Deuxu heka judeu mahãduõ rihitxinyre tarasanamy reakré. Ijõ tahe iwety mahãdu wesemy ijõ rỹira. Deuxu tamy tarasana-ò rryreri tiiboho roholaõre. ⁸ Tyyritina-ki rarybemyhỹre rõrõmy ratximyhỹrenyremy. Deuxu heka riruberenyre ihãre ta tõhõtireny ratõbõnyrenyre. Taita rieryõhyrenyre heka Deuxu Tyytybytyhymy rarybemyhỹrenyeki wahe. Iwesele heka wijina roimyhỹre. ⁹ Ihetxiu Iòlò Davi iwesele rarybere: —Kia heka taworana bedehesina-ki, ramyrenykre, raborenykre, tabonahemy reserenykre idi aõhõkỹmy rotỹnykre. ¹⁰ Iruue idymy releke tiu robiõkemy. Tiumy rarabunykre iaõbinabina-ki.

¹¹ Adeereny arỹraxikre kiamy: judeu mahãdu resereu ixãwire aõbo? Aõkõre. Urile tarasana nade judeukõdu mahãdu-ò tai. Judeu mahãdu ibinamy tai rõhõtinkyemy.
¹² Judeu mahãdu òraruna òraru-ki heka sõwemy iny-ò aõwiwihikỹ nade, judeukõdu mahãdu-ò wahe. Tahe awityhymy rarekre ibutumy judeu mahãdu ralokremy.
¹³ Jiarỹ, Paulo wahe, rybe wahidỹydu heka jiarỹ rare. Judeukõdu mahãdu-ò tii heka jiarỹ rare. Uritere nohõti losarenyõmy kia waaõmysỹdỹyna rare. Kia awi heka wadee rare. ¹⁴ Deuxu heka adeereny aõ nihikỹ adeereny riwinyre, kaiboho judeukõdu mahãdu rare. Judeu mahãdu robikre. Tai heka tiiboho biu-ò hena mahãdu-wana ratxikemy riwisỹnykre. Kia wese õsana ijõ tarasanamy rimykyemy. ¹⁵ Judeu mahãdu wiji rityhynyõreri. Tai Deuxu ijõ mahãdu-ò biu-ò hena riwahinyre, judeukõdu mahãdu-ò wahe. Iny sõwemy tai ritamy rỹimyhỹre òraruna-ribi. Iwese inyõ rubu-ribi riixixanyre wese kia rare iu judeu mahãdu ralõkreu wahe. ¹⁶ Juhuhu paõ ere awimy Deuxu-ò biwahinykeki, ibutumy paõ ihõrõ rare. Òwõru rutysõmo Deuxu-ò biwahinykeki, ibutumy òwõru

ihõrõ rare. ¹⁷ Òwòru ere judeu mahãdu wese rare. Tiiboho òwòru-ribi raòròmý raremyhỹ. Kaiboho judeukõdu mahãdu teròwomy atximahãtenyte. Kia òwòruru wesemy òwòru-ò ralòmý atximahãtenyte, tai tahe arumý atximahãtenyte. ¹⁸ Ixityhymý nohõtirenyõmy. Kaiboho dori iratyre awimý aõkõ atximahãtenyte. Òwòru rutysõmo aramyre judeu mahãdu tyby wese wahe. Aõkõkeki, kai bedesekre òwòru desede wese. ¹⁹ Kaiboho òsana marybebenykre: Tiiboho òwòru-ribi ritamý raremyhỹ inyboho rikibynyrenykremý. ²⁰ Inatyhy rare. Urile õhõtí-ribi losarenyõmy tiiboho iribi ritamý raremyhỹ rityhynyõrenyeki. Tule kaiboho talòmý tatemyhỹ tetyhynymyhỹtenyeki. Tai ixiwededỹõrenyure urile bexityhynymý. ²¹ Judeu mahãdu heka òwòru rutyhy wese raremyhỹ. Ihãrele tahe Deuxu òwòru-ribi ritare. Timybo tahõtíntynterí –Deuxu aratarenyõtyhy. Tule aratarenyke timykeki. ²² Deuxu dori ywimý rare ijõ-ò. Tule tii isirare ijõ-ò: –òraruna-txi besebenykeki, tii aratarenyke. ²³ Judeu mahãdu ixyby rityhynyrenykeki, ixyby Deuxu ritidikre iherina-ò. Deuxu irurudirare ixyby ritidikremý –isiraõre Deuxu-ò. ²⁴ Kaiboho heka òwòru bederahy ludu wesemy atxitenyte. Iwese òwòru ludu-ò tii aratidirenyre wese. Judeu mahãdu dori òwòru ludu wesele rare.

²⁵ Waityhydỹõdu seriòre, inatyhynaõmy adeereny arelyykre. Deuxu rieryre tiwesemybo judeukõdu mahãdu rityhynykre. Ikonana kaiboho bityhynybenykreu, judeu mahãdu ixybyle kanalokre. ²⁶ Tai tahe ibutumý judeu mahãdu ritakremý. Tyyritina-ki heka kiaweselemý roire: –Siaõ-ribi tarasaduõ kanakre. Ibutumý heka judeu mahãdu òraruna-ribi kòdòòsekre. ²⁷ Kia bedeu heka aritakre òrarureny wahe iwese tuu rarybere wese juhuuhukỹle. ²⁸ Katahe rasõwemy roira aõma judeu mahãdu wahe. Tiiboho Rybewihikỹ òludu roire. Tamyreny heka awi aõkõ Rybewihikỹ. Kia heka adeereny awimý ròhònyre. Tetatenyta dori Deuxu-ribi aõma iwahidỹõna aõna aõnawidỹõnamý. Deuxu juhuu taluunamý walabiereny-ò rarybere. ²⁹ Deuxu heka tiu riwitziranyõhyymyhỹre. Releke wana heka riwinymyhỹre tahõrõ mahãdu dee. ³⁰ Judeu mahãdu heka Deuxu rityhynyõmy roimyhỹre wahe. Tai heka Deuxu ruxetòena adeereny diwahinyde. ³¹ Katahe judeu mahãdu heka wiji roire ityhydỹõmy aõkõ. Aõutxu tahe Deuxu ruxetòena ixybyle rimykremý rỹira. Deuxu heka iximymý iny riteònyrerimý ihỹre. ³² Deuxu ibutumý òraruro-ò rityhere idi taruxetòena ritỹnynykemý.

³³ Iny Deuxurený aõwi dinodu heka rare. Ibedeerytyhytyhy rare. Inyõ ibedeywidỹõna rieryõhyymyhỹre. ³⁴ Tiu rikieryrenyõtyhy irayky, tiu rikibedeeryrenyõtyhy. ³⁵ Inyõ tiu

Deuxu tadiwidỹỹdumy isỹnyõna. ³⁶ Ibutumy dori Deuxu-ribi hikỹle nade ixidee. Ibutumy iruru namyhỹde. Tai tahe ibutumy wowydyna tamy rikiwahinyrenykemy inyboho ratximyhỹreny.

12

¹ Tahe waityhydỹỹdu seriõreboho, aumyreny heka biwahinybenyke Deuxu-ò. Aramyrenykemy òbitihyylemy. Kia wowydynatyhy Deuxu-ò. Tii dori ibutumy aõma inydeereny riwinyre. Kia ibutele rarekre tamy. Tii dori sõwemy riwinyre inydeereny. ² Uritere riraõmy bede ludu mahãdu wesemy. Iwixiramy boibeke. Tai Deuxu dee awimy kia rarekre. Aumy tỹmyramy ibutumy biwinymahãke. Tai tahe Deuxu ribedeerynanykre aõbo awire.

³ Jiarỹ heka Deuxumy rybeduõmy rare adeereny. Tai adeereny ararybekre bexiijebenyke. Òbitimy marybemy aumy-ribi. Deuxu-ribi ityhyna adeereny diwahinydeki heka aõhe botỹỹnykemy mohõtinyinmahãbenyke. ⁴ Umy heka sõwemy txura txura roire, umy hitxi hitxinamy rỹire. Kristu ityhydỹỹdu mahãdu kia wese rare, Kristu woludu mahãdu wahe. ⁵ Tule Kristu mahãdu sõwemy aõmysỹdỹỹna wixira rỹire. Sõwemy iny wiribi hitxi rỹire. Iwese umy sohoji wese Kristu wo mahãdu rỹire. Ibutumy wiribi hitximy raaõmysỹdỹỹmy iwidỹỹmy rỹimyhỹke. Inyboho heka ibutumy iaõmysỹdỹỹna Deuxu-ò rikiwinymyhỹrenyke. ⁶ Deuxu heka aõwidỹỹna widỹỹna wixira iny sohoji sohoji-ò riwahinymyhỹre. Kai heka tỹnydỹỹna abrysikeki, awimy bexityhynyke awimy biwinykemy. ⁷ Awimy wiõhedỹỹmy atximahãte wana, bõwiõhenanyke awimy. Rybedỹỹdumy atxiteri-wana awimy òbitimy bibedeerydỹỹmy. ⁸ Deuxu rybemy rybedu atxiteri-wana marybeke inydee bexityhynymy. Deuxu sõwemy adee nieru riwahinyre-wana, bõwiõhenanyke inywixira. Inydinodumy atxiteri-wana, òbitimy maaõmysỹdỹỹ ibutu dee. Kia dohodỹỹdukeki botohodỹỹkre inyõ aõ biwahinykeki awowi-di bowahike.

⁹ Wiribi ihitxidỹỹõmy. Tuu luu-di tahe inywixira hitximy. Uritere rybeõmy urirybele. Uritere rybe òbitikõmy rỹireò noõmy. ¹⁰ Kaiboho ityhydỹỹdu seriõre atximahãtenyete. Tai wiluumy atxibenyke. Widee biwowydynybenyke, ixidee aõkõ. ¹¹ Aõmysỹdỹỹna-di boibenyke. Ibutumy Inynyrỹ-ò biwinybenyke eysareny-di. ¹² Beysamy atxibenyke ywina-di aõkõkỹmy dỹỹnana-ki. Bexitõenyhyymahãbenyke. ¹³ Aityhydỹỹdu seriõrey-ki inyõ aõ ihoõkeki, tamy biwahinyke ahõrõ-ribi. Inyõ ihetoõkeki, bidybenyke aheto-ò. ¹⁴ Inyõ ibinamy adeereny riwinykeki, tahe ibinamy aõkõ biõwynyke.

Bexitòenyke Deuxu-ò tamy. ¹⁵ Inyõ reysakeki, tii-wana beysake. Inyõ rahinykeki, robukeki, tii-wana mahinyke, bobuke. ¹⁶ Ywimy ibutumy iny-wana boibe benyke. Ixityhy aõkõ nohõtiõmy. Kai dori ibutumy aõkõ teeryte, tule aaõmysÿdÿÿ bina awimy bimybenyke. ¹⁷ Inyõ adeeremy ibinamy riwinykeki, ibina-di aõkõ biòwynybenyke aõma uritere ywihyylemy boike. ¹⁸ Wiwesehyyle ywimy rÿimyhÿre. ¹⁹ Inyõ umy aõma rarybekeki, uritere ixiòwydÿÿmy nohõtiõmy. Deuxu-wana birimy. Tii heka riòwynykre iaõhõkÿmydÿÿnana-di. Kia tahe roire Tyyritina-ki. ²⁰ Aõma aòludu ramamy ruru wana, tamy rÿsÿna biwahiny, bemy tii ruru wana, tamy bee biwahiny. Tai tahe tii raixÿrure aõbo adee riwinyre lau. ²¹ Aõbinahakÿ rÿira-wana, uritere iijiradÿÿõmy. Ibutumy aõwiwihikÿle aõ biwinymyhÿke. Tai tahe rexihuke aõbina bina.

13

¹ Bityhynyke bedede dinodu. Deuxu dori risÿnyre bedede dinodumy. Ibutumy dinodu heka Deuxule inydeeremy riwahinyre. ² Inyõ bededinodu rityhynyõkeki, tii heka Deuxu rityhynyõmyhÿre. Iny õbitimy ratxikeki, tiu bedede dinodu rimoÿtyhy ròtena-ki aõhõkÿmy dÿÿnana rotÿÿnyõtyhy. ³ Inyõ õbitimy ratxikeki heka tiu bedede dinodu lau ruberuõtyhy aõhe risÿnyõtyhy. Urile iny aõòtaòtalemy rotÿÿnyreu tahe, tiile ruberumyhÿre bedede dinodu lau. ⁴ Bityhynybenyke ibutumy bedede ywina aõbo dinodu mahãdu raryberé. Brebuõlemy botÿÿnybenyke. Deuxu diteònyde heka bedede dinodu iny riwiòhenanykemmy. Kai aõhõkÿmy botÿÿnymyhÿke aõòtaòtamy tatÿÿnymahãte-wana. Bedede dinodu dori tuu nade. ⁵ Ibutumy bedede dinodu bityhynyke. Tii heka biwinybenyke Deuxu dee kia awire. Tai heka aõhõkÿmy botÿÿnybenyõtyhy. ⁶ Tule iòwy biòwynymahãbenyke. Ibutumy heka biòwynymahãbenyke aõma tuu dinodu rarybemahãre wesemy. Tai dori riòwynymyhÿre iaõmysÿdÿÿdu. Tii heka anawiòhenanymyhÿde. ⁷ Biòwynymahãbenyke aõbo õbitire, ibutumy wahe. Aõma dinodu iòwydÿÿmy rariòwymahãre-wana biòwynyke ibutumy awedu mahãdu wahe. Bityhynyke ibutumy.

⁸ Inydee tanadevenymahãte-wana, biòwynyke õbitihyylemy. Inywitxira luumy atximahãke ibutumy iny wahe. Tii dori Deuxu bedeywina-ki bedede õtiidÿÿna xiery ratximyhÿre. ⁹ Ibutumy Deuxudeewire heka kaa rare. Aeryna luumy iwese ixiluure wese, tahe tamy ibinaõre. Kai rubudÿÿõmy aõbo, ada wasimy iribi texiwonyte ada ihãwyy-wana maòtakemy aõbo, texinohõtidÿÿnyte. Uritere aõbina-di ixinohõtidÿÿõmy aeryna-ò. Uritere aõbina widÿÿõmy. Aerynaluumy mabeke

iwese kai ixiluure wese wahe. ¹⁰ Luuna inyõ-di rarekeki ibina inyõdee riwinyõtyhy rare. Ibutumy Deuxudeewina heka riwinymyhÿre. Tii sohojile heka bede ywina-ki awityhyre.

¹¹ Tule heka òbitimy matximahãke. Bededÿÿnana dori iòhòmy resera. Bede ityre reakremy namyhÿde. Bexix-abenyke wa, Inynyrÿ heka iòhòmy ratximyhÿre inonana-ò. Iòhòtyhymy relera juhu rityhynyreny-re-ribi. ¹² Ruu heka ròhònymy rare. Txuu tule iòhòmy wahe. Uritere aõbinahakÿ bedeluruhukÿ aõmydÿÿnana widÿÿõmy. Diabo ijesu bitake aõwiwihikÿ widÿÿ wahe. ¹³ Òbitimy biwinymahãke iwese txu rojuxana iny ratximyhÿre wese. Tai ibutumy iny rarybemahãke kai iluumy atximahãtemy. Uritere abed-edÿÿnana huduõmy –itxÿteõmy, òtaõmy, adeburemy ijiraõmy, ihãruõmy. ¹⁴ Bexitòenymyhÿke Inynyrÿ Jesuisi Kristu-ò wahe anawiòhenanykemy. Tai tahe ibutumy òbitimy biwinymahãke. Uritere arayky aõmydÿÿnabinabina nohõtìõmy.

14

¹ Ijoiõ ityhydÿÿdu mahãduõ amahãdudÿÿmy rurukeki, ròtena ixinamy ralòke iityhyna ibuterehãre tii-wana aõna aõnamy widee rybetyhymy rybeõmyke. Aribi hitximy raraykynyke hãre, bidyke. Ihãrele biròtenybenyke. ² Ityhyna irurukõmy ratximyhÿre hãre biròtenybenyke. Tii òsana kiamy raraykynymyhÿre: Iny rexiòwynyke iròdude riròmyhÿrenyremy ijõ ròhòtinyke. Kai tahe òsana mohòtinyke kiamy. Tuu ibinaõre. Ityhynareny urihimyòle rare. Brebunale sÿny roholamyhÿre. ³ Inyõ tahe ibutumy riròmyhÿre. Awimy idi tahòtinymahãte-wana, wiribi hitximy aõkõ. Uritere iòhòresedÿÿrenyõmy. Deuxu dori ridymyhÿre iwesemy iweselemy. ⁴ Deuxu deòdumy tii rare. Eòdumy aõkõ. Deuxu-ò tii rirawyònyre aõhebo rotÿÿnymyhÿremy. Deuxu rarybeke aõbo òbitire, aõbo teòsare. Deuxu heka tii ritamadÿÿnymyhÿre. ⁵ Kiamy rakaraykywesenanyrenykre. Txuõ aõworana bedehesi heka judeu mahãdu riywinymy roimyhÿre. Kia txuule Deuxu-ò reàlànanymyhÿre rexinohòtidÿÿnymyhÿre. Tahe aõkõre. Ijõ ityhydÿÿdu mahãdu tahe aõkõre. Tii iwitxira rexinohòtinymyhÿre. Ibutu txuu tamy awire Deuxu àlàna riwahinymyhÿre. Ixideewimy iny sohoji sohoji raraykywydynanymyhÿre. Ixitawimy Deuxu riwowydnyre. Ibutumy iny òbitimy ixidee raraykynyke. ⁶ Kaiboho atxu biywinymyhÿbenykeki, kia tahe awire. Xiwenade riròkeki, tii tule Deuxudeewire riwinyre. Inyõ aõkõ riwinyre. Tii tule awimy riwinymyhÿre Deuxudeewina wahe. ⁷ Ixideewimy rikiywinynyrenyõtyhy inynyrÿ-ò dori inyboho roire. ⁸ Inynyrÿdeewimy rikiwinyrenyke. Ihõrõ rare,

aruruhãrele, aõkõhãrele. ⁹ Jesuisi Kristu rubu-ribi rexixare tai butu wedumy. ¹⁰ Inyboho heka ihõrõ mahãdu roire. Tai uritere inyseriðre rybeõmy ixiradỹỹõmy. Inyboho dori sohoji sohoji Deuxuru-ò rexideòsinyrenykre. Iu tii ibutumy iny riywisinykre. ¹¹ Kiamy heka Ritidỹỹna-ki roimyhỹre. Inynyrỹ heka rarybere: –Inatyhymy, Ibutumy warue-ò tatiowotimy resekre. Rarybekre heka wamy Jiarỹ Deuxu raremy. ¹² Iny sohoji sohoji iximy relyykre Deuxuko-ò.

¹³ Uritere inywitxira-ò ryberenyõmy tii ibinamy rare uritere aõwidỹỹõmy, iðraru-ki ixhyhdỹỹdu òraruna-txi resehemy. ¹⁴ Jiarỹ tahe kiamy rahõtinyre. Kia aõmydỹỹnana aõ aõkõ rare Deuxu-ò. Xiwena rỹsỹna rirỹsỹkeki aõ aõkõ rare. Uritere kia nohõtidu dee ibinare. Tiiboho riròðke. Xiwena rỹsỹnarỹsỹ òraru-ki aijoið bibedewonyhenylau irỹsỹõmykre. ¹⁵ Aityhydỹỹdu seriðreð òbitiõmy ratxikeki tahe iru-ki arawidỹỹõmy atximahã. Tamy dorihe òbitimy aõkõ heka idi rõhõtinyke. Tii heka tule riwinykelemy ixidi rõhõtinyke. Timy aõki teòsamy rahaðhymyhỹre aõma, xiwena rỹsỹna-ki. Kai aõki awimy aõma awityhy irỹsỹõmyke Deuxu Riðreð dibinadỹỹnyke lau wahe, Kristu dori iðraru-ki rurure. ¹⁶ Kaki awimy òbitimy mahakeki. Biwinykeki inywitxiraru-ki atxikeki, kia tai uritere rieryõmy aki rahake. ¹⁷ Riroximyhỹrenyre, riõmyhỹrenyre –kia Deuxu Iòlòna dee aõ aõkõ rare. Aõmale tahe røkõhõtintythyhymyhỹreny: wiòhedỹỹna, ywina eysana. Deuxu Tytybytyhy inydeereny wahidỹỹna wahe. ¹⁸ Kia wese iny rỹikeki heka Deuxu dee wina rare, inydee tule. ¹⁹ Wii rikiwiòhenanymyhỹrenyke ibutumy wiwesehyyle ywina-di. Tai iny tyhynareny rikikyhynanyrenykemy. ²⁰ Rỹsỹna òraru-ki aõhe wisỹdỹỹ renyõmy, butumy dori Deuxu riwinyre. Kia inyð iðraru-ki aõwitxiramy rõhõtinykeki tahe ibinare. ²¹ Aõ dee rỹsỹ vỹi momo heka ibinare, tai tii rexiðrarunyekeki aðraru-ki urile bexiijõnybenyke. ²² Kaa biwinykeki timybo Deuxu dee òbiti relemyhỹre, urile ibutu-ò tuu rybeõmy iny bedeòby, kia ira-ki aõ ibinakõre. ²³ Ijõ urihimyð tatyhynymy ratximyhỹre heka iximy riatyke. Adee tahe òbiti heka rare. Aõbo riwinyre heka òraruna rare. Tai iwidỹỹõmy.

15

¹⁻² Iny ixira-di heka røkõhõtinyrenyke ibutumy aõbo iny riwinymyhỹredi. Idi røkõhõtintymyhỹrenyke inywitxira aõlaubo ruberumyhỹré. Iny òbiti erykõ mahãdu-di. ³ Kristu dori kaki raremyhỹu ixideewimy aõkõ tuu riwinymy raremyhỹ. Wiwana ritidỹỹdu wesemy riki riritinymyhỹre: nade aõhøkỹmydỹỹnana-ò tai heka bede-ò nade. Riòludunyre heka aõbo iòludu aõbinabinahãkỹ rarybere heka riwaòludunymy

raremy. ⁴ Tuheka roimyhÿre ihetxi Tyyritina-ki inywiòhedÿÿna reny. Iny heka ribedeerydymyhÿreny ywina-di rakatxirenykemy rikiraòrenyke heka Deuxu aõmy bede dÿÿnana wahe. Rahykyu òraru rahykyu wahe rubu. ⁵ Tii heka wadee awire wii biwiòhenanyke. Deuxu anawiòhenanykemy adireny watzireri. Iwese Jesuisi Kristu riwinyre wese.

⁶⁻⁷ Iлуу ratxirenykemy irumy wiluummy matxibenykemy. Iny sohoji sohoji raraykynyke Jesuisi Kristu rayky wese-di. Ityby Deuxu rayky wese-di rÿike òbitimy. Tai tahe inyboho ywinale rekealàmehÿre Deuxu-ò, tii Jesuisi Kristu tybyreki wahe. ⁸ Deuxu ihetxi mahãdu òraru-ki Jesuisi Kristu heka judeu mahãdu deòdurenymy ioxisÿnyre. ⁹ Iwese rybetyyritityhy rarybere wese: –Idi judeukõdu mahãdu Deuxu riwowodynykemy. Tai adee ariwiunykre judeukõdu mahãduy-ki. Jesuisi Kristu heka nade inatyhy riteòsinykemy. Judeu mahãdu riwiòhenanykremy Jesuisi Kristu nade. ¹⁰ Kiamy heka roire wiuna Ritidÿÿ-ki kia rarybere. Àlàna adee ariwahinykre wiuna-ki judeukõdu mahãduy-ki ani-di arawiunykre. Ijõ-ki tulekre: –Tuheka wiuna-ki raritidÿÿ roimyhÿre judeukõdu mahãdu beysake wa judeu mahãdu-wana. ¹¹ Ijõ-ki kiamy roire: –Àlàna heka biwahinykemy Inyryrÿ-ò idi watzireri, kaiboho tule judeukõdu mahãdu. ¹² Deuxu dee rybeduõ, Isaia tuu rarybere: –Rexiriòkòremy heka irybe roimyhÿre. Ijese riòkòre wahe. Tii judeukõdu mahãdu iòlòmny ronykre. Tiile heka riraòmny roimyhÿkre. ¹³ Jiarÿ rexitòenyre, Paulo, kaiboho, Deuxu heka arateysanyrenykre sòwemy ywina-di, tyhydÿÿna-di. Kiamy heka adireny heka watzireri, waseriòreboho. Jiarÿ heka rexitòenyhy watzimyhÿré Deuxu arawiòhenanykemy adeeremy rexiterenymy watziwãhare. Deuxu Tyytybytyhy ruruna-di raròsòna-di adeeremy kidiwahinykemy watzireri.

¹⁴ Kaiboho òbitimy ahãtenyete waityhydÿÿdu seriòreboho. Sòwemy aõna aõna witzira teerytenyete. Inywitzira bibedeerynybenyke dori teerytenyete. ¹⁵ Ihãrele taheka atxireny wanohõti reare inatyhymy tai warybe rewahiny Deuxu riwatyhynymy kawese riwasÿnyreki. ¹⁶ Biwateònyke taheka judeukõdu mahãdu-ò. Jesuisi Kristu dori riwatare tadeòdumy idi judeukõ mahãdudikemy. Iu Deuxu rybe wihikÿmy rarybemyhÿreu, xiwena wahidÿÿdu wese rare. Kia tahe judeukõdu mahãdu Deuxu-ò awike. ¹⁷ Tai tahe Jesuisi Kristu-wana rexibedesanymyhÿre Deuxu-ki waaõmysÿdÿÿna òraru-ki. ¹⁸ Jesuisi Kristu Rybewihikÿ tÿmyra-di rareri. Rexitòenymy rare adeeremy. Tai kaiboho òbitimy teletenyete Deuxu Tyytybytyhy òraru-ki wahe. Wadeysamy heka

watxiwâhâre. Jesuisi Kristu adeeremy riwinyreki wahe. Jiarÿ reerykõre iwitxira mahâdu-di. Tahe aõma waaõmydÿÿnana reeryre. Tiu dori biwawiõhenanyke judeukõdu mahâdu aritakemy. Deuxu mahâdu judeukõdu rarekemy. Òbitimy ikoreny-ki raremyhÿ. ¹⁹ Rybe wihikÿmy rybe-di rarewâhâ tamyreny. Aõna aõna wiwihikÿ irureny-ò rewinywâhâre. Deuxu Tyytybytyhy-di Jerusalê hâwâ-ribi heka rybe-di rare. Iliri bede-ò wahe. Ibutumy bede bedemy rarybere. Jesuisi Rybewihikÿmy. Ibutumy waaõmysÿdÿÿna rewinyre, Deuxu wadee riwahinyre wahe. ²⁰ Ihâre tahe ararybekemy watzireri tiu iny roholakõmyhÿre mahâdu-ò. Ijõõ dohodÿÿna iny ritohodÿÿnymyhÿre. Tai ikomy ararybekemy ixidi watzireri. ²¹ Isaia dori kia Tyyriti roire: –Tiu iny tamy roholakõmyhÿre tamy ijohonaõmy rarybere. Tai rierymyhÿre. Tai tahe roholakre tahe rityhynykre.

²² Tai heka raraõlemy watxiwâhâre –adeeremy. ²³ Katahe kaki rexihumy waaõmysÿdÿÿ ratzireri. Katahe arorarenymy arake watzireri beòrakõle arakemy ixidi watzireri. ²⁴ Espanha bede-ò arakemy watzireri. Arakreu dori Roma-ò aroramy heka arakre. Iribi inyboho ibutumy rakatximyhÿreu tahe tako-ò biwaixidÿÿnybenykre. ²⁵ Ikoki taheka wahidÿÿõ ariwykre Jerusalê-ò. Jerusalê hâwâ mahâdu dori aõhõkÿmy rotÿÿnymy rÿiramyhÿ. ²⁶ Macedonia bede-ki Akaia bede-ki tamy nieruõ riwahinykremy ratzireri dohodÿÿna mahâduõ kia rama rahureri mahâdu wahe. ²⁷ Tiibocho riwiõhenanyre deysana-di. Kia òbiti rare. Iribi tahe Deuxu rybe aõmydÿÿnana, Judeu mahâdu-ribi nade. Tai tahe judeukõdu mahâdu, tule judeu mahâdu riwõhenanymyhÿke taaõwiwi-di. ²⁸ Kaa nieru-di arakreu, tahe aroramy arehemynykre. Iribi Espanha-ò arakre. ²⁹ Tuu awana watzikreu, tahe teysamy Inynyrÿ-di rakatzikre.

³⁰ Bexitõenyke wadee waõmysÿdÿÿna sõwemy watzireri ariwinykremy. Deuxu Tyytybytyhy heka sõwemy wadee nade adeeremy ariwahinykremy, luuna sõwemy adeeremy ariwahinykre. ³¹ Tule ityhydÿÿdukõdu mahâdu Judeia wadee aõbinahâkÿ wadi ratximyhÿre. Wadi bexitõenybenyke jiarÿ iribi arahenykre. Tule kaa nieru rewyreri waribi teysamy rimyrenykre. ³² Tai tahe awanareny tahe wadeysamy arehemynykre Deuxudeewikeki. ³³ Deuxudeewikeki wii riki Deuxu ywina adeeremy watzireri. Kie.

16

¹⁻² Fibi hâwyy ityhydÿÿdu seriõreõ adee rakre. Tii heka Sekrea hâwâ ludu dohodÿÿna mahâduõ rare. Tii heka dohodÿÿdu mahâdu riwiõhenanymyhÿre aõu aõu aityhydÿÿdu

seriòre wesemy. Tii kaiboho biwiòhenanykre, tii dori sòwemy riwawiòhenanyre.

³ Birybedỹnyke Prisila Akila-wana. Tii wawiòhenadỹdureny. ⁴ Tii wadee sòwemy riwinyre rubu lau ruberuòtyhy. Tai jiarỹ reàlàwãhãre tamy, tule tuu ibutuma Judeukõdu dohodỹna mahãdu. Iheto dohodỹna mahãduõ warybe wehityhyna biwahenyre. ⁵ Epenetu-ò biwehityhyny. Tii ibutumy ityhydỹdu-ribi juhuule rityhynyre Asia bedeki. Tii wabiòwa rare. ⁶ Marie adeeremy raaõmysỹdỹtyhyre. Biwehityhyna wanimy. ⁷ Adroniko, Junia wana biwehityhynanykre. Tiiboho judeu mahãduõ roire. Ròtenawo-ki wawana roiremyhỹ. Dohodỹna mahãdu rierytyhyre. Deuxu deòdỹna mahãdu heka wakomy rityhynyre. ⁸ Ijõ waityhydỹdu biòwa Ampliato inire. Tamy kanarybekre tule. ⁹ Urbano, Estaki-wana tule Kristu dee wawiòhedỹdu tule rybe wehityhyna tamy biwahinyke. ¹⁰ Apele heka ityhydỹdu tyhy rare. Biwehityhynanyke. Aristabulo-wana heto woludu mahãdu biwehityhynanykre warybe tamy. ¹¹ Tule biwehityhynanykre Herodiaõ –wajioiõ tii rare judeu mahãduõ wahe. Kristu dee dori kia iny òbiti rare. Narciso heto ludu ityhydỹduõ heka tule biwehityhynanykre warybe tamy. ¹² Tule Trifena, Trifosa, Peside-wana raaõmysỹdỹmy Inynyrỹreny-ò biwehityhynanykre wary tamy. ¹³ Rufu tule Deuxu dee aõmysỹdỹdu rare ise tule. Tii dori nadi wesemy riwawisinanyre. ¹⁴ Asincrito, Flegonte, Hermes, Paroba, Hermas, tule biwehityhynanykre ityhydỹdu mahãdu. ¹⁵ Filologo, Julia-wana, Nereu taseriòre-wana, Olimpa, ityhydỹdu mahãdu tii-wana ratxireri ibutu-ò warybe wehityhyna. ¹⁶ Ibutumy aseriòre debò bimyke biwehityhynanybenykre ibutumy. Ibutumy Kristu tydỹdu mahãdu-ò arawawehityhynanykre. Tule kaki dohodỹna irybe wehityhynanyre adeeremy riwahinyreri.

¹⁷ Rybeõ roire kaa rybe tyyriti ixidyndyako-ki. Ijõ aõhe dỹnana doimyhỹde kia hetowo hitxina-ki. Iwixiramy heka taerydỹna mahãdu –iwese inydeeremy erydỹnamyhỹre wesemy aõkõ kia lau tahe bexiebenyke. ¹⁸ Aõ Jesuisi dee aõkõ raaõmysỹdỹnyre. Ixidee tule heka raaõmysỹdỹmyhỹre aõ ixidee ritarenykemy ròhòtinymyhỹreny. Tiiboho heka rarybewihikỹmyhỹreny, aõma, ruikedỹmy timy bedeki erykõ tuu ratximyhỹreny. ¹⁹ Jiarỹ wadeysamy watxireri kaiboho òbitimy ibutumy toiteki. Araerywãhã jiarỹboho aõbo òbitire uritere aõbina widyyõmy. ²⁰ Deuxu ywisidỹna wahidyyna dori Satanasi riixãwididỹnyke. Jesuisi Kristu Inynyrỹ wiòhedỹna adeeremy riwahinykemy idi watxireri.

²¹ Tximòtxi dori wawiòhedỹỹdu rare. Lucio, Ijasõ, Sospatu, wajuდეუიჯოი-wana tule adeereny irybe wehityhyna riwahinyre. ²² Jiarỹ, heka Tercio, reritinyreri aõbo Paulo rarybere adeereny. Jiarỹ adeereny warybe wehityhyna riwahinyreri. ²³ Jiarỹ heka Kaio heto-ki watxireri, dohodỹỹna rabutunyreki watxireri. Kaio irybe wehityhyna adee riwahinyre. Tule Erasto hãwã nieru rubudỹỹdu rare. Tule Quarto inyseriòrereny rare. Ibutumy heka kaa irybe weityhyna adeereny riwahinyreny reri. ²⁴ Inynyrỹ Jesuisi Kristu ruxetòena ibutumy adeereny kanakemy idi watxireri. Kie.

²⁵ Deuxu irurutyhy-di rare. Tii heka adi riyrubunyky adi watxireri. Iwese rybeweityhyna rarybere wesemy, ruru adee riwahinykre. ²⁶ Kaheka Deuxu tarasana rare. Ibutumy iny mahãdu kaa tarasana rare. Katahe wiji ibutumy Deuxu rybemy rybena reamyhỹre. Iwese Deuxu rybedu mahãdu juhoo rarybere wesemy. Deuxu heka ibutu-ò tuu rarybere. Tai tahe ibutumy iny Deuxu Tyytybytyhy rierykre tule rityhinykre. ²⁷ Deuxu-ò àlàna biwahinykeki tii dori be-deeryna ratximyhỹre Jesuisi Kristu òraru-ki wowydyna tamy biwahinybenykre aõu aõu. Kie, Paulo.

1 Oritxi Mahãdu-ò 1 Oritxi Hãwã Dohodỹna Mahãdu-ò

1 Paulo jiarỹ Deuxudeewimy deòdumy wãhãre, Jesuisi Kristu deòdỹna-ki wahe. Jiarỹ waityhydỹdu seriòre Sòteni-wana adee warybereny adiwahinyde. 2 Oritxi hãwã dohodỹna mahãdu-ò heka watyryiti adiwahinyde, Jesuisi Kristu òbitidỹna mahãdu-ò, Deuxu hõrõ mahãdu-ò, hãwyy, hãbu-wana, ibutumy Jesuisi Kristu ityhydỹdu mahãdu-ò. Tii iny Iòlòrenymy heka ratximyhỹre. 3 Ruxetòena, ywina-wana adeeren kanakemyidi watzireri, Deuxu iny tyby-ribi, Jesuisi Kristu iny Iòlò-ribi.

4 Deuxumy reàlãmy watxiwãhãre, Jesuisi Kristu adeereny ruxetòena diwahinydeki. 5 Ibutumy dori iribi tòerymy ahãte arybena-di, erysydỹna-di. 6 Kristu dee rybena akireny roimyhỹre. 7 Iribi awahidỹna rauhenyõreri, kaiboho dori Kristu deòsidỹnamy teraòmahãte. 8 Jesuisi arawiòhenanyhyy rarekre bededỹnana konana-ò, tatzuu òbitimy ixiko-ò, rex-ìlamadỹnykemy. 9 Deuxu òbitihyyra. Tii aratobinyra Tariòre Jesuisi Kristu-wana rarekremy, iny Iòlòrenymy.

10 Jiarỹ adeereny rexitòenyneri Jesuisi Kristunimy iny Iòlòrenynimy wiwese wimy wimy bityhynymy marybebennykemy. Wade awiõre wiribi hitxi hitxidỹỹ. Wii bitotynnytyhymy boibekemy adireny watxiwãhãre, araykyreny-ki, aerysynareny-ki. 11 Kaiboho waseriòre mahãdu, wimy taujõmotenyteri. Lòe hetowoludu mahãdu kia wako relyyra. 12 Inyõ wadee rarybemyhỹre. Ijõ mahãdu heka Paulo rityhynymyhỹre ihõrõ mahãdu wahe, ijõ heka Apòlo rityhynymyhỹre ijõ tasỹ Pedro rityhynymyhỹre, ijõ tahe Kristu rityhynymyhỹre. 13 Aõherewe, Kristu be iny rihitxihitxinymyhỹre. Paulo be itxeò nihikỹ tyre-ki rurure adeereny. Pauloni-di be rasebere. 14 Inyõ he ròratisebenyõre. Krispu, Kaiowanale tahe resebenyre. Tai tahe wabedesamy watzireri. 15 Kiamy ta heka inyõ rarybeke lau reijõnymahãre: –Jiarỹ Pauloni-di rexisebenyre. 16 Tefana hetowoludu mahãdu adiratisebenyde. Inyõ reratisebenykeki wanohõti reaõhyyre. 17 Kristu dori aõsebedỹmy aõkõ diwateònyde Rybewihikỹmy rybemy. Bede erydỹna nihikỹmy rybemy aõkõ diwateònyde, Jesuisi itxeò-ki lamana ariwòkemy aõkõ, kia inydeereny rurureki wahe.

18 Kristu itxeò rubumy ijyy heka ityhydỹdukõdu dee itxỹtena rare. Biu-ò hedu mahãdu dee tahe, Deuxu ruru kia rare. 19 Kiamy tahe iritidỹna roire: ierysydu mahãdu

erysyna-di ariixāwidỹnyke. Bede erydu rayky-di adiijōnykre. ²⁰ Titxibo tahe bede erydu rare. Tyyritimy erydu heka titxibo rare. Titxibo tahe wiji dỹyraxidu rare. Kabede ludu bede erysyna heka Deuxu-ò itxỹtedỹỹna rare. ²¹ Bede bede ludu mahādu rōhōtinyre bedeerytyhymy. Tai tahe Deuxu iximy rierynanyōhyyre. Kia tahe Deuxudeewire. Iny rybewihikỹmy rybe heka iny wixira-ò itxỹtere. Kia-di tahe Deuxu iny ritareri iny rityhynyreki. ²² Judeu mahādu aōwiwi rỹikemy aōbo raremy ratxireri. Judeukōdu mahādu bede erysydỹỹna-di rarekemy riijemyhỹre. ²³ Kristu itxeò-ki lamanamy iny rarybemyhỹrenyre. Kia tahe judeu mahādu riojinyre, judeukōdu mahādu dee itxỹtena kia rare. ²⁴ Tahe Deuxu rariròwysyna judeu tule judeukō mahādu-ò heka Kristu erydỹỹna tule ruruna rare ihedỹỹnarenymy. ²⁵ Deuxu itxỹtedỹỹnamy rybe hābu bedeery ratyre rare. Deuxu iruruōkeki, tii hābu ruru ratyre iruru rare.

²⁶ Waseriòre mahādu arariròwysyna-di mohōtinybenybeke. Betehemy iny erysyna mahādu-ribi sōweōre, Deuxu rariròwysyna mahādu. Dinodu mahādu sōweōre, iny Iòlòtyhy mahādu-ribi sōweōre. ²⁷⁻²⁸ Deuxu heka aōna aōna itxỹtena ritare bedeeryhykỹ mahādu riixỹrudỹỹnykremy. Aōna aōna ruruō Deuxu ritare aōna aōna ruru-di riixỹrudỹỹnykremy aōna aōna derare, aō aōkō rare Deuxu ritare aō-di aō aōkō-ò riyjanykre. ²⁹ Tai dorihe inyō rexytyhynykōkemy Deuxuko-txi. ³⁰ Kaiboho dori Jesuisi Kristu hōrō toite. Tii heka inydee ibutumy rare: erysynamy òbitinamy, tamanamy, tarasanamy rare biu-ò hena wahe. Deuxu kia ibutumy diwahinyde inydeereny. ³¹ Kia dori ritina rybe-ki roire: —Inyō rexiwowydynykeki, Deuxu-ki rexiwowydynyke.

2

¹ Waseriòreboho aō hābu bede erynihikỹ wese aōkō adeereny anade. Deuxu rybetyhydỹỹnanamy ararybekremy. Rybenihikỹmy heka rarybeōre. ² Tii sohojile reeryre akireny rarewāhāu, Kristu itxeò-ki lamanale wahe. ³ Akireny rarewāhāu waruruōmy rarewāhā, ixỹru brebu tahe riwamytatadỹỹnyre. ⁴ Wabedeerydỹỹna erytyhy rybesirahakỹ-di aōkō rarybereri iny rityhynykemy. Urile tahe Deuxu Tyytyby ruru-di rarybewāhāre. ⁵ Hābu erytyhydỹỹna aōkō bityhynykemy adi wāhāre Deuxu ruruna tahe atyhynarenymy heka idi toite.

⁶ Ityhydỹỹdu umy-ò bede erydỹỹna-di rarybemahāre. Kabede aōmydỹỹnana bede ery aōkō rare. ⁷ Kia tahe Deuxu erydỹỹna tyhyre. Kia heka hābu mahādu lau riwōmyhỹre. Juhu inydeereny riywinyre. ⁸ Kia bede erydỹỹna

inyõ wiji Iòlòtyhy mahãdu rieryõre. Kia rierymyhỹkeki, Wanyrỹ wowydyna-ribi itxeò-ki ritamadỹỹnyõhyyre inihe. ⁹ Iwese Ritidỹỹna roireri wese rare: —Rue lobixiõhyymyhỹre, nohõti heka roholaõhyymyhỹre, inywo rieryõhyymyhỹre, aõbo Deuxu riwinyre taluuna mahãdu dee, tamy riwahinykremy. ¹⁰ Deuxu Tyytybytyhymy kia inyboho riteòwarixinyrenyrene. Itytyby ibutumy rieryre. Deuxu raykywo-ribi aõ ritỹnynymyhỹre. ¹¹ Inyle heka iny ixirayky rierykre, kawese tule Deuxu tyytybydile aõna aõna rierykre. ¹² Bede aõmydỹỹnana aõkõ inydeereny wahisidỹỹdu rare. Deuxu Tyytyby tahe inydeereny wahisidỹỹdure. ¹³ Kiadile Deuxu wahisidỹỹna iny reeryrenyrene. Kia iny reerydỹỹnanyamahãrenyrene hãbu bede erydỹỹna-di aõkõ, Deuxu Tyytyby rybe-di tahe reerydỹỹnanywãhãre. Kia iny retỹnynymahãre iny Deuxu Tyytybytyhy-di mahãdu-ò. ¹⁴ Iny Deuxu Tyytybytyhy-di rỹiõra mahãdu dee Deuxu Tyytybytyhy aõmydỹỹna dera. Tamy itxỹte rare. Rierykõre. Deuxu Tyytybytyhydile iny rierymyhỹre. ¹⁵ Iny heka Deuxu Tyytybytyhydikeki ibutumy rierymyhỹre. Inyõ tahe tuu aõmy tuu irybeõna. ¹⁶ Ryberiti-ki roire: —Mobo tahe rieryre Wanyrỹ rayky, mobo tamy aõ ritỹnynykre inyõ aõbo? Inyboho Kristu rayky ijõdire, iwesele raraykynymyhỹre.

3

¹ Waseriòreboho adeereny rarybeõhyyre hãbu Deuxu Tyytybytyhy-di rỹira wesemy. Hãbu òrarudu wesemy rỹirawesemy adeereny ararybeke. Uladu wesemy Kristutyhydỹỹ-ki rỹira wesemy adeereny rarybere. ² Huỹsy-di òedỹỹ araerynadỹỹnyrenyreu rỹsỹnatere wesemy aõkõ erydỹỹnasiramy aõkõ rybe. Kia rỹsỹna rỹsỹmy texiywinyõtenyete. Wiji tule texihumy aõkõ toitenyete. ³ Òrarudu wesemy dori ahãtenyete. Ihãrumy, ijãmy atximyhỹtenyete. Tai tahe òrarudu mahãdu wesemy ahãte ityhydỹỹdukõdu mahãdu wesemy ahãtenyete. ⁴ Inyõ rarybekeki: —Jiarỹ Paulo erydỹỹnay-ki rare. Ijõ rarybekeki: —Jiarỹ Apòlo erydỹỹnay-ki rare. Tiibohe ityhydỹỹdukõdu mahãdu wesemy ihỹrenyrene. ⁵ Aõbohe Apòlo, aõbohe Paulo. Deuxu deòdu heka inyboho roire. Inyribireny tetyhynymy teerymahãtenyete. Iwese Deuxu iny sohoji sohoji-ò aõmydỹỹna riwahinyrene wese, tai tetyhynytenyete. ⁶ Ta jiarỹle rybemy rarybere iny aõty ribòrònymyhỹre wese, Apòlo rybe ritỹnynyrene iny alòbòròna ribenymyhỹre wese rituunyre. Deuxule tahe idimyhỹre iwese alòbòròna riumydỹỹnymyhỹre wese. ⁷ Tai tahe tòbòròdỹỹdu aõ aõkõ rare; ituudỹỹdu tule aõ aõkõ rare. Deuxule aõwedu wedu heka rare. Tiile ityhydỹỹdu widỹỹdu

nihikỹ rarekre. ⁸ Tòbròdỹỹdu ituudỹỹdu-wana sohoji wese my ihỹrenyre. Sohoji sohoji tauri wahisidỹỹ ritakremy, iwese sohoji sohoji raaõmysỹdỹỹmyhỹre wese. Wiwana dori Deuxu dee iny raaõmysỹdỹỹmyhỹre. ⁹ Inyboho heka Deuxu wiòhedỹỹdu mahãdu roire. Kaiboho tahe Deuxu oworu wese toite. Iwese tahe Deuxu heto wese kaiboho toite.

¹⁰ Heto widỹỹdu deyrewewese retelenyre. Ibutumy Deuxu ruxetòenamy kia rewinyre. Juhumana retidire idi tahe itira ityre reòdònrya. Ywimy biwinybenykre. Awimy bitamadỹỹnykemy. ¹¹ Jesuisi Kristu juhumana wese heka rare, inyõ tiile tarasadu wahe ijõ manaõ teròwmy ritidiõtzyhy. ¹² Ibutumy juhumanatyre-ki relereri. Ijõ womati tỹrỹrỹhỹkỹ, ijõ prata-di ijõ manatỹny-di, ijõ òwòru-di, ijõ òteti-di, ijõ horeru-di. ¹³ Kia txuu Kristu txu wahe riteòsinykre aòdibo sohoji sohoji raaõmysỹdỹỹmyhỹre heòty dori riurihix-inanykre. Aõhebo iny rotỹỹnymyhỹreki. ¹⁴ Juhumanatyre-ki iny aõmydỹỹna rỹikeki, tii uri iwahisidỹỹnana ritakre. ¹⁵ Iny aõmydỹỹna rasòkeki tii ròònodỹỹkre. Ihãre tahe tarasana ritakre heòtyroobyhy wahe.

¹⁶ Kaiboho Deuxu heto wesemy toitemahã. Teeryõte aõbo. Deuxu Tyytybytyhy heka aworeny-ki rasỹnymyhỹre. ¹⁷ Inyõ Deuxu heto wesemy rahukeki, Deuxu tii rihukre, Deuxuheto dori rare. Kia tahe kaiboho toite Deuxu heto lytytyhy rare, ihõrõtzyhy wahe.

¹⁸ Ixi itxenadỹỹõmy, inyõ bedeerymy ixi-di rõhõtinykeki, raitxỹteke tai tahe bedeery inatyhy-ki rareke. ¹⁹ Kabede bede eryna tahe Deuxu dee itxỹtena rare. Kia Ritidỹỹna-ki tahe roire: —Bede erynadu tyhy tabedeerydỹỹna-ki Deuxu-ò ròònodỹỹre. ²⁰ Ijõ Ritidỹỹna-ki roire: —Wanyrỹ, bede erydu rayky rieryre. Kia raykywi aõ aõkõ rare, rybetyhy aõkõ. ²¹ Iny aõmydỹỹnana-di ixiwowydydỹỹõmy, ibutu dori ahõrõ rare. ²² Paulo, Apòlo, Pedro, bede, umy, rubu, aõmydỹỹna wijina, aõmydỹỹna bede kanakre, ibutumy ahõrõ rare. ²³ Kaiboho Kristu hõrõ toite. Kristu Deuxu hõrõ rare.

4

¹ Inyboho Deuxu deòdu roire, ibutumy idi mohõtinybenyke tii inykireny ihỹre. Inyboho dori Deuxu aõmydỹỹnana erykõdu tỹnydỹỹdu roire. ² Deuxu tỹnydỹỹdu òbitihyky rarekemy. ³ Wadi rõhõtinykeki awimy aõbo ibinamy aõbo kia tahe wadee aõ aõkõ rare. Aõbo dohodỹỹ tỹnydỹỹdu mahãdu wadi rohõtinyke kia wadee aõkõhykyre. Jiarỹ tahe ixi-di dehummy rahõtinyõhymahãre. ⁴ Jiarỹ reeryõre inyõ aõbinamy wadee rexiwonyke warayky wadee òbiti rare. Tahe ihãrele òbitimy iko-ki rare. Wanyrỹ tahe wadi timy rõhõtinyke. ⁵ Kia tahe wiji idi timy nohõtiumy. Jesuisi nonanako-ki. Tii tahe kanakreu,

ibutumy wasimy aõ rÿira ritÿnynykre, ibutumy iny raykumy rÿira ritÿnynykre. Kia txule ibutumy iny tabedeòby ritakre Deuxu-ribi.

⁶ Kia aõna aõna wawese riwawesenanyreri. Apòlo wese tule rewesenanyreri. Kaiboho dori bierybenykemy kia: ierysydÿÿrenyõmy aõbo iritidyÿnawo-ki ihoõre. Kia wese keki, ijõ tÿnydyÿdu ijõ ratyre ryiõtyhy. ⁷ Mobo iny wiribi iwitxiramy ihÿre. Aõbohe akire Deuxule aõwiwi adee riõre. Ibutumy iribi tetateki tahe aõherekibo axiwedere. ⁸ Kaiboho ibutumy aõ ijõdire. Tatyhytenyete, iòlò wesemy taditehemynyte iny arawiòhenanyrenyõre. Wadee awire kaiboho iòlòmý ahãtenyete. Tai jiarÿboho awana ariòlònykre. ⁹ Kiamyre òsana. Deuxu dee heka inyboho deòdÿÿna mahãdu rurukrerke mahãdu roire ibutuko-txi, ÿjuko-txi, hãbukò-txi. ¹⁰ Kristu òraru-ki itxÿtewesemy jiarÿboho roire. Kaiboho Kristu erydure riki. Jiarÿboho warurukõrenyre. Kaiboho orarudirenyre jiarÿboho inyõ waluurenyõre. Kaiboho tahe ibutu luuna toite. ¹¹ Ihãre tahe wiji ramamy, bemomomy, tykyõmy rekoamyhÿre. Tule sÿywisidyÿna rÿiõre. Tule jiarÿboho wahãwã òbiti ihokõre. ¹² Ihãre inyboho naaõmysÿdÿÿmyhÿde iny debò-di irukemy. Inyõ inydeereny aõbinamy rarybekeki, awilemy inyboho ri-rawyònymyhyre. Inyõ aõsirahakÿle inydee riwinykeki, aõmy rybeõmyke. ¹³ Rybebinamy inyboho dee reakeki, ihãrele Deuxumy tamy rarybemýhyre. Rÿnysityby wese inydireny tiiboho retehemýhyre, ijese ijese wesemy.

¹⁴ Kia ròritidyÿreri aixÿrudÿÿrenymy aõkõ, tahe wiòhedÿÿdumy retirÿreri binadyÿna lau, iwese inytybyò tariõre riernanyre wese. ¹⁵ Tahe sõwemy Kristu-ki bede erydyÿdu rÿire. Sõwemy aõkõ bobohomy rÿirenyre. Kristumy heka jiarÿ sohojile borenymy rare. Rybewihikÿ erysyna-di dori borenymy rãire. ¹⁶ Kia dori kaiboho wawesemy boibekemy adireny watxireri. ¹⁷ Tai Tximõtxi reteònyre adeereny. Tii wariõre luu wesemy ratxire. Tii òbiti rare Wanyrÿ-ò. Tai watxi òhõtirený reake iwese Jesuisi Kristumy wese rariamyhÿreki, tule iwese reernanyre wese ibutu dohodÿÿna hetowo-ki. ¹⁸ Inyõ ixiwowydumy ixidi ròhõtinyhÿ iwese arura-ò araõreki. ¹⁹ Wanyrÿdeewikeki arakre wylemy arorarený-ò. Tai arierykre ixiwowydumy nohõtidu irybe sohojile aõkõ arierykre, aõhebo rotÿÿnyre tule arierykre. ²⁰ Deuxu òlòna heka rybe sohojile aõkõ rare, rurutyhy heka rare. ²¹ Aõbo tahe awityhyre òhòte-di adehemyny aõbo, ada luuna-di ywina-di adehemyny aõbo?

5

¹ Dohodÿÿna mahãduy-ki òrarutyhy-di riki toite kia tahe

rare: hãbuõ heka tybyhãwyytyby-wana roire. Kia òraru tahe ityhydÿÿdukõdu mahãdu riòludunyòhyymyhÿre. ² Kia hyyle ixi-di aõ aõkõ tõhõtinyinmyhÿte. Aõherekibo bedede teòtiinyõtenyete tahinyõmy idi textiòenyòhyytenyete. Hãbu kia riwinyre, ityhydÿÿdu mahãduy-ribi biòlòdÿÿnyke. ³ Jiarÿ akyreny-ki watxiòereriãre, tahe warybetytyby awanareny ratxireri, iwese jiarÿ awana ratximyhÿre wesele. Tahe wadohodÿÿna ariwahinykre kahãbumy ibinamy riwinyremy. Tahe ityhydÿÿdu ributunykeu, ⁴ warybetytyby akireny rÿireu, Jesuisi Kristu ruru akireny rÿireu, kahãbu Satanasi-ò biwahinybenyke. ⁵ Tai kahãbu umy Satanasi-ò biwahinybenyke itytyby tahe rahenykre Wanyrÿ Jesuisi kia nonanatsu-u. ⁶ Arybe iximy wydy awi aõkõ rare. Taholaòtenyete aõbo kia rybe-ò; iuri ibutere paõ widÿÿna sòwemy rauridÿÿra uridÿÿna heka òraru wese heka rare. ⁷ Idi behubenyke iuri hitxina-di, tahe paõ iuriõmy rÿirekre wese boibekemy òbitimy, Kristu tule budòeni xiwedÿÿna wesemy inydeereny rurure, iny Pascoareny worana bedehesi dorihe rarÿÿnymy rare. ⁸ Tai tahe ixena roxina rikiwinyrenyke. Paõ iuri-di ryiõmy rakatximyhÿreny. Kia uri paõ òraruihetxina wese rare. Paõ tÿmyra, òbitire, inatyhyre, tii rikiyrenyke. Kia tahe rare òbiti widÿÿna wahe.

⁹ Adeereny watyyriti rewahinyre òrarudu mahãdu roo-ki risiõmy, òtadu mahãdu-wana boiòkemy. ¹⁰ Ibutumy òrarudu mahãdu-ò aõkõ adeereny rarybere. Iny ibina mahãdu, wasidu mahãdu, Deuxutyhy luukõdu mahãdu. Kia-wana noõrenymykeki, bedede-ribi ihyyle bexihitxinyke. ¹¹ Wiji watyyriti kia wese rewahinyre. Ityhydÿÿduy-txi ròtedu òrarudu rarehyykeki, kia roo-ki risiõmy tule iny ibina mahãdu, Deuxutyhy luukõdu, ujòmomy rybedu, wasidu, axaxa momodu, kia mahãdu-wana tahe byreòmy. ¹² Ityhydÿÿdukõdu mahãdu ywisidÿÿdu aõkõ jiarÿ rare. ¹³ Deuxu dohodÿÿdukõdu mahãdu hitxidÿÿdu rarekre. Deuxu Ryberiti-ki roire: — Òrarudu ay-ribi biòlòdÿÿnyke.

6

¹ Iny ityhydÿÿduõ widee raurenanykeki, aõbohe awire? Erysydu-ò rikidy aõbo ada ityhydÿÿdu mahãdu-ò rybeke aõbo? Uritere ityhydÿÿduòle marybekre. ² Ityhydÿÿdu mahãdu bedede mahãdu ierysydÿÿkre. Kia teerytenyõta aõbo. Ityhydÿÿdu mahãdu bedede mahãdu ierysydÿÿkeki, aõna aõna iyja tahe teeryòtenyete timy rasÿdÿÿnykemy. ³ Tahe inyboho ÿju aõmydÿÿnana rikieryrenykre. Kiakeki iratyre kabede aõmydÿÿnana rakieryrenyhyke. ⁴ Erysydÿÿnana ijòdikeki, aõherekibo erysydu ityhydÿÿdukõdu-ò radymyhÿre.

Ityhydÿÿdule aõtxi awire. ⁵ Kia heka adeereny ixÿruna rare. Hãbu erysydu ityhydÿÿdu mahãduy-ki ratxiõre aõbo ierysydÿÿ-ki. ⁶ Erysydu ijõdihãre ta ityhydÿÿdu seriõre wii ridyke aõbo ityhydÿÿdukõdu erysydu-ò, kia awiõre. ⁷ Ityhydÿÿdu wii ridykeki, kia tahe iaõ bede eryõmy rare. Inyõ adeereny aõmy rotÿÿnykeki, urile tahe aõhõkÿmy rotÿÿnykre. Kia heka Inynyrÿ-ò òbitire. ⁸ Kaiboho ityhydÿÿdu hãre aõhõkÿmy wii tesÿnymahãtenynte. ⁹ Òrarudu mahãduõ-ò, Deuxu Iòlõna uri riwahiõtyhy. Kia teeryõtenynte, iny ywimynoduõ, Deuxutyhy luukõdu, wiriõrese-ò òtadu, hãbu hãwyy wese rexiwahinymyhÿre ijõ hãbu-ò. ¹⁰ wasidu, ixidee imynomy nohõtidu, axaxamomodu, jei jeimy rybedu, inywitzira aõmydÿÿnana wydydu, kia-ò Deuxu Iòlõna uri rawahiõtyhy. ¹¹ Kaiboho heka juhu kia wese toite. Wiji tahe iny Iòlõ Jesuisi Kristu, anasuhode, anaixãwidinyde anatade Deuxu Tyytybytyhy-di.

¹² Ibutumy ariwinyke ixidee wikeki ibutumy aõmydÿÿnana tahe iwidyÿ awiõre. Ibutumy arotÿÿnyke ixidee wikeki, aõ aõkõ tahe waumy-di rarekemy raremyhÿ. ¹³ Rÿsÿnaheka weryri-ò ralõmyhÿ kia-ò heka ihÿmyhÿre. Kia heka Deuxu wiwanale rahukre ikonana-ò. Umy heka òraru-ò sohojile aõkõ rÿire. Deuxu umydikemy dorihe riwinyre. ¹⁴ Deuxu Inynyrÿ riixixanyre rubu-ribi. Tule iny kidiixixanykre taruru-di. ¹⁵ Iny umy heka Kristu rareasa rare. Kia aõbo teerytenyõte? Kabe Kristu rareasa aderana-wana rabutukre, aõkõrehe. ¹⁶ Inyõ hãbu aderana-wana roiikeki, sohoji umyhyyle wiwana roireke. Kia teerytenyõte aõbo? Kia Tyyriti Iritina-ki roimyhÿre, hãbu hãwyy-wana sohoji umyhyyle wiwana roireke. ¹⁷ Moo Wanyrÿ-wana ributumykeki, sohoji Deuxu Tyytybyle rareke. ¹⁸ Òraru-ribi teõrehemy atximyhÿbenyke Ijõ òraru inyõ riwinykeki umywo-ribi nodu aõkõ rare. Òta òta òraru tahe inyõ riwinykeki, kia ixiumy òludu òraru-di reake. ¹⁹ Aumy Deuxu Tyytybytyhysÿ rare. Kia aõbo teeryõte? Deuxu rexiwahinyre awo-ki rasÿnyhyymy rarekremy. ²⁰ Kaiboho aumy wedu aõkõ atxitenyteri. Jesuisi Kristu adee rurureki. Tii òwynihikÿ-di anadyde, Kia tahe aumyreny-ki Deuxu-ò bealãbenyke, òbitimy bexisÿnyke aumyreny-di.

7

¹ Atyyriti dÿÿraxi rerawyõnyreri. Kia rare: hãbu hãwyy-ò aderexiõhykeki, kia heka awire. ² Hãbu tahãwyydihyyle rareke, tule hãwyy tahãbudihyyle rareke òta òta òraru dori sõwereki. ³ Hãbu tahãwyy-ò umy wahisidÿÿna tamy riwahinyke. Hãwyy tahãbu-ò umy wahisidÿÿna riwahinyke.

⁴ Hãwyy taumyweddu aõkõ rare, ihãbu iwedure. Tule hãbu taumyweddu aõkõ rare. Ihãwyy iwedure. ⁵ Wiòmysadỹỹõmy. Urile rexitòenykemy aõtxu-ò wii riòmysanykre. Urile ixideewimy wiwana ratxike. Idi wiwana roikre Satanasi riixiranyheny bededỹỹnana riijereki. ⁶ Kia warybe bedede ywina aõkõ rare. Urile wadododỹỹna rare. Adee awikeki, tuu bityhynybenykemy. ⁷ Ibutumy hãbu wawese rỹirakeki, awire. Iny sohoji sohoji tahe, Deuxu bedede ywisidỹỹna tamy riwahinyra ijõ wiribi lahitxi ihỹre.

⁸ Ixihy mahãdu-ò wytese mahãdu-ò wadododỹỹna rewahinyre: wawese hyy rỹirakeki, awire. ⁹ Ixiwedudõkeki, tahe boikre, tii arasahyy mabekelau. ¹⁰⁻¹¹ Hãbu hãwyy my heridu-ò warybe rewahinyra, tahe warybe aõkõ rare, Wanyrỹ rybe. Kia rare: Hãwyy uritere tahãbu ririõhyyke. Hãwyyõ tahãbu-ribi rexihitxinykeki, ijõ-wana roiõke ada tahãbuwanale ixyby roike. Tule hãbu uritere tahãwyy risiõmy. ¹² Ijõ-ò warybe rewahinyra Wanyrỹ rybemy aõkõ: Ityhydỹỹdu seriõre ihãwyy ityhydỹỹdukõdukeki, uritere iatysyõmy hãwyy tii-wana rarekemy ratximyhyreki. ¹³ Hãwyy ityhydỹỹdu ihãbu ityhydỹỹdukõdukeki, tule uritere iatysyõmy tahãwyy-wana rarekemy ratximyhỹreki. ¹⁴ Hãwyy dori ta hãbu ityhydỹỹdukõdu riõbitinymyhỹre rityhydỹỹnymyhỹ tii-wana ratximyhỹreki. Hãwyy ityhydỹỹdukõdu iwesele ta hãbu risỹnyre. Aõkõkeki ariõre ityhydỹỹdukõdumy raremyhỹ. Ka tahe rityhynyre. ¹⁵ Ityhydỹỹdukõdu resekeki ixinamy rake. Kia wesekeki, ityhydỹỹdu ritaamy aõkõ ihỹre. Kaiboho ywina-di boibekemy Deuxu ratximyhỹre. ¹⁶ Hãwyy, teeryte ta hãbu rityhynykre aõbo, ada aõkõre aõbo? Aõkõ, teeryõte.

¹⁷ Iwese Deuxu iny sohoji sohoji rihitxihitxinyre wese, boibemahãke. Iwese atximahãtenyete wese Deuxu anatadenydeu kia wese boibeke. Kiamy heka reernanymahãre ibutumy dohododỹỹna-ki. ¹⁸ Inyõ notyky resyna-di bityhynykeki, kaweselemy mabeke. Inyõ õtyky resyna-di aõkõ bityhynykeki, juhuu tatemahã wese mabeke, notyky resydỹỹõmy. ¹⁹ Notykyresy aõ aõkõ rare, ityky resykõ tule aõ aõkõ rare. Deuxu bedede ywina ywidỹỹna, kia heka aõ wihikỹ rare. ²⁰⁻²¹ Iwese Deuxu ibutumy iny ditade wese, juhu widỹỹnalemy mabeke. Deòdumy aõbo tetyhynyte, tahe tuhyymy mabeke. Awedudeewimy bexihukeki tahe, idi make araokorore-ribi bohonykeki, tahe make. ²²⁻²³ Deòduõ-ò Deuxu ritakemy rarybekeki, tahe rityhynykeki, tii raòkòrò-ribi rohonyra Deuxu rue-ò òkresyõ mahãdu rityhynyrenykeki, tiiboho deòdu roire. Deuxu aradyra òwyhykỹ-di tai tahe hãbu deòdumy aõkõ boibeke. ²⁴ Ityhydỹỹdu seriõre, iwese atximahãte wese adee tarasanamy Deuxu rarybereu, kia wesele boibeke.

²⁵ Ijadòma-ò bede ywinamy Wanyrỹ Deuxu tarybe diwahinyõde. Ihãrele wadohodỹyna adee ariwahinykre kialemy. Deuxu dori tatòdenamy riwaòbitinyre. ²⁶ Aõhebo kowa rotỹnyre, awi aõkõ rare. Kia tahe aratohonykre: Iwese iny ratximyhỹre wesehyy, boibeke. Tii tahe wadee awire. ²⁷ Kai aõbo hãwyy my heridu tate. Tahe ixihitxidỹmy nohõtĩomy. Kai aõbo hãwyy my heridu aõkõ tate. Tahe hãwyy my herimy nohõtĩomy. ²⁸ Tahe hãwyy-wana boikeki. Tii òraruna aõkõ rare. Tule ijadòma roikeyi tule òraruna aõkõ rare. Ibutu iny heridu iaõmydỹki aõhõkỹmy rotỹnyrenyke. Ilau jiarỹ adeereny rarybere inyõ aõhõkỹmy rotỹnyheny. ²⁹ Bededỹnana he iòhòre. Tai tahe adee rarybere waseriòreboho, inyõ heridu ixihyno wese ratxikemy. ³⁰ Iny bedewomy ratxirerĩ, ixibedewodỹ-ribi tõhõtĩ rosake. Iny deysamy ratxirerĩ, deysa-ribi nohõtĩ rosake. Inyõ aõ riwymyhỹré, ihokõ wese rotỹnyke. ³¹ Kabede aõna aõna kai bierysynanykeki iwese ierysydỹõmy bisỹnyke. Kia aõna aõna ibutumy ituekre. Bededỹnanahe aõwesele rexihukre. ³² Ixiraõmy ahãbenyke, kiamy tahe adee watxiwãhãre. Inyõ heridu aõkõ Deuxu aõmydỹyna riywinymyhỹke, iwese Deuxudeewimy ratximyhỹkemy. ³³ Iny heridu heka bede aõmydỹyna riywinymyhỹre, iwese tahãwyydeewimy ratximyhỹkemy. ³⁴ Kiamy rihitxinyre. Hãwyy tule heridu aõkõ Deuxu aõmydỹyna riywinymyhỹre taumy Deuxu Tyytybytyhy òbitidỹmy. Hãwyy heridu tahe bede aõmydỹyna-di rõhõtĩnymyhỹre tahãbudeewimy riywinykemy. ³⁵ Kia aratohodỹnyra adeerenywikremy. Kaiboho arataaõtyhy. Urile anawiòhenanymahãde Deuxu iòhòmymhỹreki. Iòkõramy ibutumy arahenyrenyky watxiwãhãre.

³⁶ Ijadòma tibiedỹydu tatibiena-ò òbitimy aõkõ risỹnymy rexinohõtĩnymyhỹre. Ijadòma tahãbumy herina bede-ò rehemynyre. Tahe tatibiedỹyna-di inyõ-wana roikemy idi ihỹre, ixinamy roikeyi. Kia òraruna aõkõ rare. ³⁷ Weryrybò heriòkemy raruronykeki, tii tahe awire. Tii dori irurudire iheridỹnyke heny. Tii ixiumy wedu rare. ³⁸ Tahe riheridỹnykeki, tii awire. Tule riheridỹnyòkeki, iratyretyhy awire.

³⁹ Hãwyy hãbu-wana rỹihyyke hãbu irumy. Rurukeu tahe hãwyy aõtxile roikeyi. Urile Wanyrỹ Deuxudeewimy. ⁴⁰ Tahe wytesetyhymy ratxihyykeki, teysamy rỹikre. Tuheka jiarỹ rahõtĩnyrerĩ. Deuxu Tyytybytyhy wawo-ki ratxirerimy idi rahõtĩnyrerĩ.

8

¹ Katahe adeereny ararybekre: Suritxoo-ò rỹsỹna xiwedỹnyamy. Inyboho ibutumy bedeery roire. Bede ery

iny aõnityhymy rixinohõtinyre. Luuna tahe inywiòhedỹỹdure. ² Inyõ aõerysydumy rexinohtinykeki tii aõwihikỹ rieryõre. ³ Inyõ tahe Deuxu luukeki, Deuxu tii rierymyhỹre. ⁴ Kaa rỹsỹna suritxoo-ò xiwemy rawahimyhỹre. Kia tahe aritynynykre. Inyboho rieryrenyreny suritxoo aõ aõkõ rare. Sohojihyy heka Deuxu rare. ⁵ Iny deuxu aõ òta òtalemy rininimyhỹre biu-ki, bedeki. Iwese deuxu sõwemy ihỹre wese wedu sõwe rare. ⁶ Inydeereny Deuxu sohojile rare. Inytybyreny. Tii ibutu aõna aõna riwinyre. Tamy inyboho roire. Tule inydeereny Wanyrỹ sohojile rare, Jesuisi Kristu. Tii ibutu widỹỹdure. Tii ratximyhỹre xiery inyboho ratximyhỹrenyreny. Tamy inyboho roire.

⁷ Tahe ibutumy kia iny rieryõre. Iny sõwemy suritxoo iny reòwarimy rỹira. Tii riki ixuwenadumy riroxikeki, tai òraruna tuu relemyhỹre. ⁸ Rỹsỹna aõkõ riwatyhenyrenyra Deuxu-ò. Tai roxiheny rỹire. Rikirỹsỹrenyõkeki, rikiõnonyrenyõtyhy. Rikirỹsỹrenykeki, aõ rikitarenyõtyhy. ⁹⁻¹⁰ Bexiebenyke. Urile ityhydỹỹdu aokõdu ixihe-ki iatysyõmy, aurihixinahe-ki. Suritxoo hetowo-ki inyõ umy robikeki teroxiterimy, tii tule ijõ rỹsỹmy rexiwonyre, xiwe rỹsỹmy. ¹¹ Tai tahe aòraru-ki aseriõre atyhyna-ki òraruna-txi resekre. Tamy Kristu tarasamy rurure. ¹² Kiamy ityhydỹỹdu seriõre-ò taòrarunyteki, tule Kristu-ò texiòrarunyte. ¹³ Tai rỹsỹna òraru-ki ityhydỹỹ-ki waseriõre òraruna-txi resekeki, jiarỹ kia rỹsỹna ariroxiõtyhy, waseriõre òraru-ki.

9

¹ Jiarỹ adeereny rexihyymy watxiwãhãre. Jesuisi teòdỹỹnamy jiarỹ watxiwãhãre. Jesuisimy, Inynyrỹrenymy rabiõremy tahõtinyinmahãtenyete aõkõ, Jesuisimy rabire. Waòraru-ki kaiboho ityhydỹỹdumy toite. Deuxu dee waõmysỹdỹỹ òraru-ki ayreny-ki. ² Inywitxiraõ-ò òsana Deuxu deòdỹỹnakõmy watxiwãhãre. Adeereny tahe inatyhymy Deuxu teòdỹỹnamy wãhãre kaiboho dori wateòdỹỹna urihixinamy ahãtenyete Deuxu dee.

³ Kia tahe warawyòdỹỹna rare iny witxiraõ-ò: ⁴⁻⁵ Jiarỹ ariroxikeki, ariõkeki, tai aõkõhe awilere. Ityhydỹỹdu hãwyyõ-wana, wawana aridykekõ aõbo awileke. Kawese ibutumy Deuxu teòdỹỹna mahãdu rotỹỹmyhỹre, tule Jesuisi seriõre, tule Pedro. ⁶ Jiarỹ, Banabewanahyyle raaõmysỹdỹỹwãhãre iny aõreny tarasanamy. Kia rikirirenykeki, awikeki, aõbo. ⁷ Inyõ aõbina-ò rakeki, ta aõ aõbo riòwynyke? Aõkõre. Inyõ oworumy uva bederaty ribrõnyke-wana, bederatyõ aõbo ritõleke. Inatyhymy inyõ teòte asi-ò riyrubunymyhykeki, ihowỹsmy aõbo riõmyhỹke?

Kohe, riõmyhÿke. ⁸ Kabexe hãbu wese aõbo jiarÿ rarybereri? Tule tahe bede ywina tyriti aõbo riritinomy rÿimyhÿre. ⁹ Moisesi bede ywina ritidÿÿna-ki rÿimyhÿre: —Broreniry itaaõmyhÿ maixõmo tyre rariamy risymyhÿreu. Deuxu aõbo broreni riwotõenymyhÿre. Aõkõre. ¹⁰ Tahe waðrarureny-ki aõbo kia rarybere. Kohe. Inyõ ròbrõmyhÿreu, iyremy ritakemy ròhõtinyinmyhÿre. Tule inyõ riòrõmyhÿreu, ijõõ ixidee ritakemy ròhõtinyinmyhÿre. ¹¹ Deuxu Tyytybytyhy aõmydÿÿnanamy adeereny anaerynanykeki, idi aõna aõna aribireny aritaleke, aõbo? Kia aõnityhyre aõbo? ¹² Iny wixira aõ aribi ritake-wana, jiarÿboho iratyre iu arõtarenkyemy arotÿÿnyrenyke. Tahe tiu ròtaõhyre. Deuxu Rybewihikÿ tÿnydÿÿna ariokòròõtyhy. Tai ibutumy aõ wixira wixira riòludunywãhãre. ¹³ Dohodÿÿna heto deòdu irysyna ritamyhÿre dohodÿÿna heto-ribi. Xiwe dinodu aõ rÿsÿna ritamyhÿre xiwena-ribi. ¹⁴ Kia wese Deuxu rarybere; inyõ Rybewihikÿ ritÿnynykeki, ibutumy aõmy reamyhÿre ritamyhÿre, Rybewihikÿ aõmysÿdÿÿbro-ribi. ¹⁵ Tahe jiarÿ aõ aribi retaõhyre tule kia reritinyreri aõ aritakemy aõkõ aribireny. Warybe inyõ riõnonykemy aõkõ watxiwãhãre iko-ki tahe arurukre. ¹⁶ Jiarÿ Rybewihikÿ retÿnynmahãre, rexierymahãre dori aritÿnydÿÿke. Kia heka aõhõkÿ aõkõ waloosõnadikemy rare. Rybe aritÿnynyõkeki, heka aõbinatyhyõ wadee kanake inyhe. ¹⁷ Ixidee wimy Rybe aritÿnynymyhÿkeki, tai ki aritakre. Ixideewimy aõkõ aritÿnynyke-wana, ihãrele tahe itÿnydÿÿmy iwahisidÿÿna wadee roire. ¹⁸ Kiake-wana, timybo wawahidÿÿna ihÿre. Kia heka rare. Rybewihikÿ tÿnydÿÿ-ò arexiòwynyõtyhy. Aõbo inatyhymy wahõrõre, retaõhywãhãre.

¹⁹ Jiarÿ inydeòdumy aõkõ rarehywãhã. Tahe iximy rexideòdunyre sõwemy iny òraru-ribi aritakemy. ²⁰ Judeu mahãdu-ò judeu wesemy jiarÿ rexisÿnyre, judeu mahãduõ dori òraru-ribi aritakemy idi watxireri. Moisesi bede ywina yrubudÿÿdu mahãdu dee ixiwesemy rexisÿnyre iòraru-ribi dori aritakemy. Urile jiarÿ kia bede ywiny rubudÿÿna aõkõ rare. ²¹ Bede ywina aõkõ mahãdu dee ixiwesemy rexisÿnyre. Urile Deuxu bede ywina dire jiarÿ Kristu bede ywina yrubudÿÿdu jiarÿ watxiwãhãre. Kia iòraru-ribi aritakemy jiarÿ rexisÿnyre. ²² Irurukõdu mahãdu-ò waruru aõkõ wesemy rexisÿnyre, irurukõdu mahãduõ ritakemy. Ibutu iny deewesemy rexisÿnyny rarewãhã, aõtxile tiiboheõ aritakemy iòraruna-ribi. ²³ Ibutumy rewinyre, Rybewihikÿ dee iwiòhedÿÿdukemy ixi-di wãhãre.

²⁴ Ijarana ròhõnykeu ijaramy ijaranadu sohojile ròhõnyra. Tiile wahidÿÿna ritake. Kaiboho maijarenybenyke tii bitakemy. ²⁵ Ibutumy ijaradu ixidi rorenymyhÿre aõikõkõmy

rexierynanymyhÿre. Kia riwinymyhÿ wahidÿÿna ritakemy. Kia wahidÿÿna retybykre. Inydee wahidÿÿna tahe retybyötyhy. ²⁶ Jiarÿ kawesemy rajjaranyre aõ aritakemy. Axiò ijesumy resuwãhãre yhyle rehetenyreri wese aõkõ. ²⁷ Waumy-di ròrenyhyywãhãre. Wadeòdu wesemy waumy resÿnyre. Tai dori resÿnyre. Jiarÿ inyõ-ò Rybewiwihikÿ aritÿnynykeki, ywimy dehudu wesemy aõkõ arareke, adehuky-ribi riwata lau.

10

¹ Boholabenyke weseriòre ityhydÿÿdu mahãdu. Inytybyreny kia biuwetyky nonoe rawo-di roimyhÿ. Tule ahobesòhòkÿ rawo-di reuròrenyre. ² Moisesi, iwedu, ibutumy aho-di nonoe-di rexisebenyre. Tai iwedu inatyhymy rityhynyrenyre. ³ Deuxu Tytytyby rÿsÿna sohojile wiwese wesele ibutumy rirÿsÿre. ⁴⁻⁶ Deuxu Tytytybytyhy mona sohojile ihÿre. Bee manay-ribi nade. Mana tahe Kristuweselemy ihÿmyhÿre. Inynyrÿ kiamy roiremyhÿu. Deuxudeewimy aõkõ riwinymyhÿre. Tai rurure bedero-ki. Kia tahe inydeereny bedery urihixina erysydÿÿnamy ratxireri, inyboho-dori aõbina widÿÿna aõkõ rokohotinyrenykemy, iwese tiiboho riwinyre wese aõkõ. ⁷ Inyboho suritxoo tyhydÿÿdukõmy rokoireke iwese ijõ mahãdu tuu rerinanymyhÿre wese kòkremy. Ritina-ki roimyhÿre: –Tiiboho rononymhÿre riroxikemy, riòkemy. Tahe ritamanyrenyre risinykremy. ⁸ Tule òta òtamy rokotÿÿnyrenyòke iwese tii riwinyre wese –tai 23.000 iny rurure sohojixu-u. ⁹ Deuxu urihixirenyõmyke, iwese tii riwinyre wese. Tai rururenyre hemylala jurutana-ki. ¹⁰ Iburaõmyke iwese tii ribuarenyre wese. Tai rubudÿÿdu rirubunyre, Rubu Ýju wahe. ¹¹ Kia tahe bedery urihixidÿÿna erysyna inydeereny ratxireri. Riritinymyhÿre iny bederynarenymy. Bededÿÿnana konana-ò iòhòmy inyboho roire. ¹² Tahe inyõ òbitimy rÿimy ròhòtinykeki, tii rexijemy ratxike reseke lau. ¹³ Ixirana isirare inydee rehemynyötyhy rikiòludunyötyhy. Deuxu awi rare. Riattyötyhy iòlududÿÿna-txi. Tii inydeereny ixirana-ribi ixitarasana riwahinyre. Iny rurureny wesele ixirana rare. Tai rikiòludunyrenyke.

¹⁴ Waluuna mahãdu, kaiboho suritxoo luuna-ribi bexiebeny. ¹⁵ Adeereny rarybere, kaboho dori abederyrenyre kai bederywesetyhymy toiteki. Mohòtinybenyke aõmybo rarybereridi. ¹⁶ Deysanamonahyna aõbo ityhydÿÿdu mahãdu wowydyna rare Kristu hãlubu wesemy tuu riòreki? Iny paõ riyreyrenyreu, Kristu umy wesemy aõbo rare? Inydee aõbo

wowydyna rare? ¹⁷ Inyboho sōwe roire. Urile tahe paō sohojihyy rare. Sohoji butunahyymy rare, paō sohojiribile yre yre rarỹsỹreu, inyboho sohojilemy roire. ¹⁸ judeu ijoi-ò betehbenyke. Kia xiwe rirỹsỹrenyeki, xiweribile ritamyhỹre. Kia aōbo òbitire. ¹⁹ Timybo jiarỹ rarybereri? Rỹsỹna aōbo xiwenamy diwahinydeki, kia aōbo aō rare ada ritxoo aō aōbo rare. ²⁰ Kiamy aōbohe jiarỹ rarybereri? Aōkōre, tuu aōkō rarybereri. Urile, kia raxiwemyhỹre, diabo tyytyby-ò rare. Deuxu-ò aōkō raxiwemyhỹre. Kaiboho diabo tyytybyò-ò tamy bexiijemy. Tii-wana uritere noōmy. ²¹ Wanyrỹ monamy biōkeki, tai diabo monamy tule biōōke. Wanyrỹ roxi-ki biroxi-ikreki, tule tai diabo rỹsỹna rỹsỹōmykre. ²² Deuxu aōbo iny kidihārudenkyre. Inyboho aōbohe ityhyrenyire iratyre?

²³ Aōwaxiny tuu botỹỹnyke. aōmydỹỹnana awire. Ihāre tahe awiōre. Aōmydỹỹnana ixidee wimy botỹỹnyke. Urile aōmydỹỹnana riwiòhenanayōhyyre. ²⁴ Uritere aaōmydỹỹnana sohojidile nohōtiōmy; tule inywitxira aōmydỹỹna-txi òhōti beake tai aōwiihikỹmy tamy biwinykre. ²⁵ Biròmyhỹke ibutumy aō rỹimyhỹre meriadu-ki, nohōtiōmy aōbo raremyhỹmy. ²⁶ Ibutu bede aōmydỹỹna Wanyrỹ wahidỹỹna rare inydeereny. ²⁷ Ityhydỹỹdukōdu mahāduō aratobinymy, kai makeki, biroxi-ike ibutumy aōbo adee kidekre. Dỹỹraxiōmy araykywydyna òraru-ki. ²⁸ Tahe adee rarybekeki; kia ritxoo xiwe rare. Irỹsỹōmy, kia hābu raykywydyna òraru-ki tamy ibinare wahe. ²⁹ Araykywydyna òraru-ki aōkō jiarỹ rarybere, tahe iwitxira òrariki. Ijō hābu witxira rayky-di aōkō aritōhōtinymyhỹke. Kia òsana inyō rarybekre. ³⁰ Dealānadile jiarỹ ariroxiwāhākeki, timybo inyō ibinamy wamy rarybeke. Deuxu-ò dori rexideylydỹỹnyra. ³¹⁻³² Tai tahe, biroxi-benyke-wana, biōbenykeki, aōmy botỹỹnykeki, ibutumy Deuxu wowydyna-ò botỹỹnyke. Inyō atyhyna-di iatysyōmy, judeu mahāduō-ò, judeukōdu mahādu-ò, tule Deuxu tyhydỹỹduō-ò. ³³ Ibutu dee raru-runywāhāre tamywikemy. Waaōmydỹỹnana sohojile aōkō rahōtinywāhāre ibutu iny aōmydỹỹna dee rahōtinymahāre tarasadỹỹmy.

11

¹ Iwese jiarỹ Kristu wesemy watzimyhỹre wese kaiboho wawesele boibekre.

² Ararybekre: —Kaiboho awirenyremy kaiboho dori iwese bede eryna araerynanyre wese ibutumy teyrubunymahātenyete. ³ Tahe ijōmy araerynanykre. Kristu iratiwi ibutu hābu ratyre rare. Hābu tahe hāwyyrati ratyre rare. Tule Deuxu tahe Kristu ratiwi ratyre rare. ⁴ Hābu rexitōenyreu, ritỹnynykeu tarahety-di, Kristu rityhynyōre.

⁵ Hãwyyõ tahe rexitòenykeu, ritÿnynykeki tarahety-di aõkõ, tii tahãbu rityhynyõre. Tii dori tarade rasymyhÿre wese ratximyhÿre. ⁶ Hãwyyõ tarade rihetynyõkeki, tii tarade riorokre. Hãwyy tarasylau raixÿrukeki, tahe tara rihetynykre. ⁷⁻⁹ Hãbu tara rihetynyõmyhÿkre dohodÿÿna heto-ki. Bera-ò tytyby wesemy Deuxu dee hãbu rare. Deuxu dee hãbu rare. Hãwyy tahe hãbu dee-ki rare. Hãbu heka hãwyy-ribi aõkõ dori iwidÿÿ rare. Hãwyy tahe hãbu umy-ribi iwidÿÿ rare. Hãbu hãwyy dee aõkõ relere. Hãwyy tahe hãbu dee relere. ¹⁰ Tai tahe hãwyy tara riwòmyhÿke. Iu tahe hãbu rityhynymyhÿre ÿju òraru-ki. ¹¹ Deuxu ityhydÿÿduy-ki wiwesele wiweselemy ratximyhÿre. Hãbu hãwyy-di ratxikemy; hãwyy hãbu-di ratxikemy. ¹² Iwese hãwyy hãbu-ribi relereu wese, hãbu hãwyy-ribi reamy raumynymyhÿre. Deuxu ibutumy riwinyre. ¹³ Kaiboho mohotinybenyke: Hãwyy rexitòenyreu, tarade rihetynyke, aõbo ada aõkõre aõbo? ¹⁴ Hãbu iraderehemy rÿira, tarati rityhynyõmyhÿre tuu rÿira. Kiamy bede riwaerynanyrenyre. ¹⁵ Hãwyy tahe irade rehely rÿira ixiruxeradÿÿmy rÿira, hety wese tamy iò rarekremy wahe. ¹⁶ Inyõ iwitxiramy rexinohtinykeki, tamy ararybekre, kia wese: Inyreny-ki kia bede ywina rare ibutumy dohodÿÿna heto-ki.

¹⁷ Aõwesebo botÿÿnykremy adee ararybekre. Wadee awiõre iwese ahãtenyete wese kaiboho tebutunyenye, kia arawiõhenanyõhyre urile tahe arabinanytyhyrenyra. ¹⁸ Juhuu ararybekre timybo raholaremy: kaiboho texi-hitxinytenyete dohodÿÿnaheto-ki, kia tahe retyhynyriõremy watxireri. ¹⁹ Wiribi bexihitxinybenykeki, tai iny òbiti rÿira bierybenykeny. ²⁰ Bibutunymyhÿbenykeu, Inynyrÿ roxina aõkõ terÿsÿmahãtenyete. ²¹ Ijõ detiteremy taroxina riwymyhÿre inywitxirako-ki. Ijõ aõ rimyõmyhÿreki rama risamyhÿre. Ijõ tahe sõwetyhymy riõmy raitxÿtemyhÿre. ²² Kai aõbo ahetoõre, tai biroximyhÿkemy, biõmahãkemy? Kia wese-ki Deuxu dohodÿÿna heto aõbo tetyhynyõhyymahãte. Iaõkõ rÿira mahãdu tule teixÿrudÿÿnymyhÿtenyete. Aõmybo ararybekre. Arawowydydÿÿnyrenykeny aõbo? Aõkõre. Tai arawowydydÿÿnyrenyõtyhy. ²³ Kia Inynyrÿ-ribi retare, tule aerynamy adeeremy rewahinyre. Kia wahisidÿÿnadyna txuu, Jesuisi Inynyrÿ orotxu rimyre. ²⁴ Rexitòenyredi, riòròre, idi tahe rarybera:

—Kia heka waumy rare. Adeeremy wahidÿÿmy watxireri. Kia biwinymyhÿkreu, watxi õhõtireny reakemy.

²⁵ Tule riymyhÿre rahudi, tahe bemonahyna rimyra, idi tahe rarybera:

—Kia heka wadeewimy Deuxu, iny-wana ratximyhÿre.

Wahälubu òraru-ki kia riwinyre. Kia biõmahãbenykreu, aõu watxi õhõtirený reakemy.

²⁶ Tiubo paõ biymahãbenykreu, bemona hyna-ribi biõmahãbenykreu, warubu rybe tetÿnynytenyteri idi aðòòsekreu. ²⁷ Tai inyõ õhõtĩõmy riykeki-wana, riõkeki-wana, tii Jesuisi umymy hãlubumy òraru-ki ratxireri. ²⁸ Sohoji sohoji taaõmydÿÿnana-di rohõtinkyre, idi tahe riymyhÿre, riõmyhÿkre. ²⁹ Inyõ Jesuisi umy-di rõhõtinyõkeki, ixidee aðbinahakÿ kidiwinyke. ³⁰ Kia òraru-ki sõwemy binamy òhyyle toite, tule iny sõwemy rurumy rÿira. ³¹ Iny ixi-di rohõtinkykeki, aðbinahakÿ rexierykemy, tahe iny rexiòbitinyke. Deuxu tai aðhõkÿmy rotÿÿnyõtyhy. ³² Inynyrÿreny inyboho riòbitinymyhÿre. Kiamy heka bede mahãdu-wana aðkõkeki, aðhõkÿmy rotÿÿnyrenyke. ³³ Kiamy, waseriòreboho, roximy bibutunykreu, ijõ wii biraòbenyke. ³⁴ Inyõ rama risamy rÿikeki, taheto-ki riroxike tai rihuõmy rÿimyhÿkre Deuxu ywisidÿÿna-ki. Adee arehemynykreu, ijõ kia aðna aðnamy aròerynanyrenyke.

12

¹ Deuxu Tyytybytyhy bede eryna witxira witxiramy adeereny ararybekre, araerynanyrenykeny. ² Ityhydÿÿdukòdumy toitemahãu, aðõ aradyrenyre suritxoo rybeõhõkÿ-ò. ³ Tai arabedeerynryeri: Inyõ Deuxu Tyytybymy rarybemyhÿkeki, tii rarybeõtyhy: Jesuisi ibina rare. Tule inyõ uri rarybeõtyhy: Jesuisi Wanyrÿ rare. Tii Deuxu Tyytybytyhydile tuu rarybekre.

⁴ Deuxu Tyytyby bede eryna witxira witxira sõwemy rÿire. Deuxu sohojile tahe iwahidÿÿdu rare. ⁵ Aõmysÿdÿÿwi-ribi lahixi rare, tahe Inynyrÿ sohojile rare tamy rakaaõmysÿdÿÿnyke. ⁶ Aõmydÿÿna wiribi lahixi rare, tahe Deuxu sohojile ibutudÿÿdu rare. Tii iny-ò aðmysÿdÿÿna widÿÿna riwahinyre. ⁷ Sohoji sohoji tabedeeryna witxira witxira Deuxu Tyytybytyhy-ribi ritamyhÿre ibutu iny wiòhedÿÿmy. ⁸⁻⁹ Inyõ-ò bede eryhykÿ wahidÿÿmy ratxireri, Deuxu Tyytybytyhy iwahidÿÿdure. Ijõ-ò tahe rybe bederydÿÿ wahidÿÿmy ratxireri, iwahidÿÿdu tiile rare. Ijõ-ò tahe ityhydÿÿtyhy-ki rarekemy. Deuxu Tyytybytyhy iwahidÿÿdure. Ijõ-ò tahe, òhotibedumy rarekemy. Deuxu Tyytybytyhy risÿnyre rare. ¹⁰ Ijõ-ò tahe, bedeòby widÿÿdumy rarekemy, ijõ-ò rybe-di tÿnydÿÿdumy, ijõ Tyytyby erydumy, ijõ rybewitxiramy rarybekemy, ijõ rybe wiuròdÿÿdumy. ¹¹ Deuxu Tyytybytyhy sohojile tahe iwahidÿÿdu rare. Tii sohoji sohoji-ò riwahinymyhÿre ixideewimy.

¹² Iny umy sohojihyy rare. Urile iaõmydÿÿnana sõwere. Kia wese ityhydÿÿdu rÿira ityhydÿÿdu mahãduy-ki, Kristu-ki iny sohojihyyre. ¹³ Sohoji sohoji mahãdu-ribi rabutura, ijõ judeu mahãdu-ribi, ijõ judeukõdu mahãdu-ribi, ijõ deòdu mahãdu-ribi, ijõ deòdukõdu mahãdu-ribi. Wiji tahe Deuxu Tyytybytyhy-di sohoji hõrõmy iny rÿire. Idi tahe inyboho tÿximy rÿire. ¹⁴ Umy dori sohoji aõmydÿÿnana-di aõkõ rare, sõwere tahe. ¹⁵ Inywa rarybekeki kia rarybekre òsana: jiarÿ umy aõmydÿÿnana aõkõ watxireri, debò aõkõ dori rare. Kia rarybekeki, ihãre ta umy aõmydÿÿnanaõlemy ratxireri. ¹⁶ Nohõti rarybekeki: rue aõkõ jiarÿ rare, tai dori umy aõmydÿÿna aõkõ rare, Kia rarybekeki, ihãre ta umy aõmydÿÿnanale ratxireri. ¹⁷ Ibutumy umy ruelemy ratxikeki, timybo rokoholarenkyre. Ibutumy nohõtileyemy ratxikeki, timybo rue rareke timybo robirenykyre. ¹⁸ Deuxu ibutumy aõ ritidire, titxibo ixideewimy rõhõtinyre. ¹⁹ Ibutumy aõmydÿÿnana wiweselehekÿkeki, timybo raaõmysÿdÿÿnyke? ²⁰ Inatyhmy aõmydÿÿnana sõwere. Umy tahe sohojilere. ²¹ Rue debò dee rarybeõtyhy: Kai aõ aõkõ tate. Tule ratiheka waò rybeõmy: Kaikõkeki wadee awike. ²² Kia kÿnyhe. Aõ aõmydÿÿnana inydeereny iruruõmy aõmy aõkõ rÿire wese, tii aõwityhy rÿire. ²³ Tule aõbo inydee aõmy aõkõ rÿira tamyhe woreke rÿimyhÿre iruxeramy aõkõ rare, iny woreke rÿimyhÿre. ²⁴ Aõbo inyummy-ki iruxeramy rare, kia uridÿÿõmy. Deuxu tahe umy aõmydÿÿnana ibutumy ributunyre. Tii aõ ibuturatyre rityhynyre. ²⁵ Kiawese alõreõmy umy-ki ibutumy umy aõmydÿÿnana wiwana raaõmysÿdÿÿnymyhÿre wii riwiòhenanymyhÿre. ²⁶ Sohoji aõmydÿÿnana txubererekeki, iuhe rubererenyke. Ijõ teysakeki inyõ riwowydynykeki iuhe reysake. ²⁷ Boholabenyke, kaiboho Kristu umy mahãduõ toite. Ityhydÿÿdu sohoji sohoji heka umy aõmydÿÿnanaõ wese rare. ²⁸ Deuxu ityhydÿÿdu mahãduy-kile iny rihitxinyre. Juhuu Jesuisi teòdÿÿdu mahãdu, ihewo-ribi Deuxu rybe tÿnydÿÿdu mahãdu, idi ierydÿÿdu, aõwiihikÿ widÿÿdu, òhotibedu mahãdu, wiòhedÿÿdu, dinoduwesedÿÿnadu, rybewitxira erysydumy. ²⁹ Ibutumy deòdu aõbo roire? Ibutumy tÿnydÿÿdu aõbo roire? Ibutumy erydÿÿdure aõbo? Ibutumy aõwiihikÿ widÿÿdure aõbo? Aõkõre wii ihitxihitxire. ³⁰ Ibutumy ywisidÿÿ rieryre aõbo? Ibutumy rybe witxira rybedu aõbo? Ibutumy rybewitxira wiuròdÿÿdure aõbo? Aõkõre. ³¹ Tahe, eryna wiwiihikÿmy mynomy, atximyhÿbenyke. Tahe ariteòsynkyre tibo ryy.

13

¹ Ibutumy iny rybe witxira witxira arierykeki, ÿju rybe

adierykeki, kia tahe luuna-di aõkõkeki, jiarÿ aõwodÿÿna widÿÿna wesemy ararekre. ² Jiarÿ ibutumy Deuxu rybewahidÿÿ eryna ijõdikeki, ibutumy bedeery ijõdikeki, hãwãlò iherina-ribi aritake watyhydÿÿna kiadikeki, tahe luuna-di aõkõkeki, aõ aõkõ watxireri. ³ Ibutumy waaõmydÿÿna iny aõkõ mahãdu-ò ariwahinykeki. Waumy Kristu Rybewihikÿ dee òraru-ki wõsikemy ariwahinykeki, tahe luuna ijoõkeki, kia heka aõkõweseleke. ⁴ Inyõ luunadikeki, ywimy rarekre, awimy rarekre, ihãrukõmy rarekre, luunadikeki, ixityhydÿÿdukõmy rarekre. ⁵ Inyõ luunadikeki ihÿkÿhÿkÿmy aõkõ rarekre. Ixisohojidile aõkõ rõhõtinkyre. ⁶ Òbitiõna-di deysaõmy, inatyhyle kedeysakre. ⁷ Moõ iluunadireki ibutumy aõhebo rotÿÿnykre, ibutumy rityhynykre, ibutumy riraõkre, ibutumy riòludunykre. ⁸ Luuna tiu itueõtyhy, tahe rybe tÿnydÿÿna aõutxumy ituekre, rybewitxiramy rybe ituekre, bede eryna ersynamy tule ituekre. ⁹ Inyboho iyrelemy rieryrenyre. Tule iyrelemy ritÿnynyre. ¹⁰ Aõutxumy tahe kia iyre rexihukre, ibutumy kanaerykre, kia hãbu òbiti tyhy kedehemynykeu, Kristu wahe. ¹¹ Uladumy rarewãhãu uladu wesemy rarybere, uladu wesemy ixidi rarewãhã, uladu wesemy raykywydynanyra. Hãbumy relereu tahe, wauladumy nona rerire. ¹² Wiji tahe inyboho robirenyre, iwese itxerenatÿnykowese-ki, kiatsu tahe, wiòsanamy rokobirenykre. Katahe iny rieryrenyre txuraõ, kiatsu tahe, iwese tii inyboho dierydenyde wese rikieryrenyre. ¹³ Tahe inataõ aõmydÿÿna rÿire: ityhydÿÿna, iraròsõna, luuna. Ijõ ratyre tahe luuna rare.

14

¹ Luuna-di boibeke ibutu ijõ ratyre. Tyytybytyhy ersyyna biijebenyke. Iratyre biijebenyke Deuxu rybe tÿnydÿÿna erydÿÿna. ² Inyõheka rybe witxiramy rarybekeki, hãbu-ò aõkõ rarybereri. Deuxu-ò sohojile rarybere. Inyõ irybe rieryõre. Deuxu Tyytybytyhy rybe tii erydure. ³ Inyõ Deuxu rybemy rarybemyhÿreu, iny-ò rarybereri. Tai riwiòhenanymyhÿre, riòbitinymyhÿre, riteysanymyhÿre. ⁴ Inyõ rybe witxiramy rarybereu, tiilehyy rexiwiòhenanymyhÿre. Inyõ tahe rybe ritÿnynyke wana, dohodÿÿna mahãdu riwiòhenanyre. ⁵ Ibutumy rybe witxiramy rarybekeki, tii tahe wadee awire. Tahe ibutumy Deuxu Rybewihikÿmy rierynanykeki, kia iratyretyhy wadee awire. Deuxu rybe tÿnydÿÿna tahe, rybe witxiramy rybedu ratyre rare. Wiuròsòdÿÿdudile rybe witxiramy rarybeke dohodÿÿdu mahãdu wiòhedÿÿmy rarekemy. ⁶ Jiarÿ adeereny ararybekeki, rybewitxira-di. Tiwesebo arãwiòhenanyrenyke. Urile bede erytÿmyra-di,

erynatyhyhyky-di, inatyhyeryna-di araerynanykeki, kia-di tahe arãwiòhenanykre. ⁷ Ka tahe wiudÿÿna rare. Wyhyhykÿ jurònawesena ada rerotisòmo wiudÿÿna kidiwiunykeki, tahe awimy riwiunyòke, timykibo iny rieryke aòbo riwiunyreri. ⁸ Tule juròna òbitimy ritxurònyòkeki, timykibo aòbinadu mahãdu rierykre aòbina-ò nomy rexiywinykemy. ⁹ Kaiboho tule kiawesere. Inyò arybe rieryòkeki, tiwesebo rieryke aòmybo tarybetenyteri. Kiawese dori yhydeele tarybetenyteri wese. ¹⁰ Inatyhymy sòwemy rybe wixira rÿire bede-ki, ibutumy tahe aóna aónamy rybedu rarybere. ¹¹ Aòmybo rarybere arierykòkeki, rybedu dee jiarÿ iny wixira, rybewixiraò tamy rare, tule tii wadee rare. ¹² Kaiboho Deuxu Tyytybytyhy eryna teijetenyteri. Tai dohodÿÿna mahãdu wiòhedÿÿmy marurunybenyke. ¹³ Inyò rybe wixiramy rarybekeki, iòbitidÿÿnamy rexitòenyke. ¹⁴ Rybe wixiramy arexitòenykeki, watyytybyle rexitòenyteri waraykywydyna-ò ralòòtyhy. ¹⁵ Tai tahe aòhebo arotÿÿnykre? Watyytyby-di, warayky-di arexitòenykre. Idi watyytyby-di warayky-di arawiunykre. ¹⁶ Kai atyytybyle-di texitòenymyhÿteu, timykibo inyò rierykemy? Idi rarybeke aixitòedÿÿna rexihukeu. Tii dori arybe rieryòre. ¹⁷ Kai tahe inatyhymy awimy texitòenye, tai tahe iny aò rieryòhyre, idi riwiòhenanyòtyhy. ¹⁸ Deuxumy reálàwãhãre. Jiarÿ dori aratyreony rybe wixiramy rarybemahãre. ¹⁹ Tahe dohodÿÿna mahãdu-ò iruyre rybe eremy ierysynamy ararybeke ada sòwemy rybe eremy iwixira rybemy anarybekeki. Juhule wadee awityhyre ijò ratyre-ki iny kiawese inatyhymy reerynanyre.

²⁰ Waityhydÿÿdu seriòre uladu raykywesemy aòkò bexiraykynymyhÿbenyke. Inyery bedeeryhykÿ wese maraykynybenyke. Aòibina erylasyale uladu aòeryò wesemy boibeke. ²¹ Bede Ywina tyyriti-ki kia rÿire: — Kia inydee, hãbu rybe wixira-di anarybekre. Ihãre ta warybe dee tiiboho roholarenyòkre. —Kiamy tahe Wanyrÿ rarybere. ²² Inatyhymy tahe iwixira rybe rybemy ityhydÿÿdu mahãdu dee deòsina aòkò rare. Kia ityhydÿÿdukòdu mahãdu dee deòsina rare. Tule Deuxu rybe tÿnydÿÿna ityhydÿÿdu mahãdu-ò rare. ²³ Dohodÿÿna mahãdu wii ributunykeu, rybewixiramy rarybemyhÿreki. Ityhydÿÿdukòdu mahãdu ralòkeki, iny ierykòdu ralòkeki, timybo tii ròhòtinyke. taitxÿtetenyterilemy idi ròhòtinyke. ²⁴ Tahe ixityre ityhydÿÿdukòdu mahãdu ralòkeki, tahe Deuxu rybemy rarybereriò, ralòkeu, tii rexierykre òrarudumy rare, ibutumy aòwòmy roholare tarayky riixixanyke. ²⁵ Aòbo tawo-ki riwòmy rÿimyhÿredi rexierymy ixi-di ròhòtinykre. Tai resekre tatiowomy Deuxu deálànamy reálàkremy. Tule

rarybekre: —Inatyhymy Deuxu ayreny-ki ratxireri.

²⁶ Aõhebo dohodÿÿna-ki rokotÿÿnyrenykre waseriðreboho wii rikibutunyrenykreu. Kia heka rare: Inyõ wiuõmy kanawiunykre, ijõ tasÿ Deuxu rybe bede erydÿÿna kedeerynanykre, ijõ itÿnydÿÿnamy kanarybekre, ijõ rybewitxiramy rybena kanarybekre, ijõ iwiuròsòdÿÿnamy kanarybekre. Aõhebo botÿÿnybenyke ityhydÿÿdu wiòhedÿÿnamy rarekemy. ²⁷ Inyõ rybewitxiramy rybemy ratxire riki, inatxi inataõlemy rarybeke, wihewomy, tule iwiuròsòdÿÿdulemy rarybekre. ²⁸ Wiuròsòna ihoõkeki, rybeõlemy ronyke dohodÿÿna heto-ki. Ixiwanale Deuxu-di rõhõtinyre, rexitòenymy. ²⁹ Urile inatxi, inataõlemy rybe tÿnydÿÿdumy rarybekre wana, ijohonadu mahãdu tahe irybe-di rõhõtinytyhyke timybo. ³⁰ Ijõhonadu-ò itÿnydÿÿna rybemy ratxikeki, rybedu rexihudi rarybekre. ³¹ Ibutu dori Deuxu rybemy rarybekre, sohoji sohojimy. Tai ibutumy rierykre, reysakre. ³² Rybe tÿnydÿÿdu mahãdu rayky, tiile rexierymyhÿkre. ³³ Deuxu tahe wimy uriuridÿÿdu aõkõ rare; tii tahe õbitina widÿÿdu rare. Ibutu ijõ dohodÿÿna heto-ki kia wesemy rare.

³⁴ Hãwyy tahe dohodÿÿna-ki roholamy rÿimyhÿre rybeõhykymy tai aõwedumy aõkõ. Ywilemy rÿirake iwese judeu bedeywidÿÿna roimyhÿre wese. ³⁵ Tÿÿraxinadikeki taheto-ki tahãbu-ò rÿÿraxike. Hãwyy dohodÿÿna-ki rarybemyhÿre heka ixÿruna rare. ³⁶ Timywese tahõtinytenyete. Deuxu rybe aõbo aykyreny-ki rõhònyre ada kaiboho sohojile aõbo ijõdire.

³⁷ Inyõ rybe tÿnydÿÿdumy ixi-di rõhõtinykeki ada Deuxu Tyytybytyhy-ò wiòhedÿÿnamy rarekeki. Timybo rarybekre. Kia waryberiti heka Deuxu bede ywidÿÿna rierykre. ³⁸ Inyõ kia rityhynyõkeki, tii wile ratyhyõdÿÿõkre.

³⁹ Iribi tahe waseriðre tÿnydÿÿdumy boibekemy atxibenyke. Ixinamy rybewitxiramy iny rarybemyhÿke. ⁴⁰ Ibutumy aõhebo botÿÿnybenykre. Òbitilemy, ywilemy.

15

¹ Aõtxi õhõtireny araijaradÿÿnykre. Kia tahe rare. Rybewihikÿ iwese adeeremy retÿnynyre wese, tetyhynytenyete wese, tule tetyhynyhy ahãtenyete. ² Tai tahe tarasanawo-ki ahãtenyete rybe teeryhy ahãtenyete ki iwese retÿnydÿÿnyre wese. Aõkõkeki aròtenareny aõtyhy aõkõ adeeremy ihÿre. ³ Juhuutyhy adeeremy retÿnynyre iwese raholare wesemy. Kia rare: Kristu iny õrarureny dee rurure. Kiamy heka ritidÿÿna roire. ⁴ Tule mana wabede-ò rahãluure. Inataõ txu idi rÿidi tahe, rubu-ribi rexixare, ritidÿÿna rarybere wese. ⁵ Rexideòsinyre Pedro dee, idi tahe waðinatxi mahãdu dee.

⁶ Idi tahe 500 iny ratyre tuu robire. Kia iny ityhydÿÿdu seriòre mahādu ibutumy rexibutumymhÿre Jesusimy robire. Ijō rurure kia butudÿÿnay-ribi, tahe ijō irulemy ihÿmyhÿre. ⁷ Iribi tahe Txiau tuu robire, idi tahe ierydu mahādu ibutumy tuu robire. ⁸ Ihewo-ribi tahe jiarÿ tuu rabire. Iwese uladu ibededÿÿnanakōmy reare wese tuu rabire. ⁹⁻¹¹ Jiarÿ ierydu hewo ludu rare. Uritere erydumy wanidÿÿōmy watxiwāhāre, raixÿrure wahe. Jiarÿ dori juhūu ityhydÿÿdu mahādu aōhōkÿmydÿÿdu rare. Deuxu ruxetōenale dori aōmy watxiwāhāre. Iruxetōena aōnihikÿmy waki riwinyre. Jiarÿ dori ibuturatyre aōmysÿdÿÿna rewinyre. Tahe jiarÿ aōkō wāhāre. Deuxu ruxetōenamy wahāre jiarÿ aōbo ada tiiboho aōbo adeereny relyyreny, idi kaiboho tetyhynletenyte.

¹² Kristu rubumy roira-ribi rexixara, kiamy heka rarybe-mahāreny. Aōherekibo inyō rarybereri rurumy hÿre-ribi inyō rexixaōkremy. ¹³ Inyō tiu rubu-ribi rexixaōkeki, Kristu tahe rexixaōre tarubu-ribi. ¹⁴ Kristu rubu-ribi rexixaōre wana, jiarÿboho aōmy waryberenyōna idi aō atyhydÿÿnaōna. ¹⁵ Kristu inatyhymy rexixaōkeki, inyboho Deuxumy ruimy rybedu mahādumy roire. Kristu ixixana rybemy dori jiarÿboho rarybemyhÿreny. Kiata bohe Deuxu, Kristu riixixanyōlere. ¹⁶ Rubumy roimyhÿre mahādu rexixaōkeki, taita Kristu rexixaōre. ¹⁷ Kristu rexixaōkeki, ainatyhynareny aō aōkō rare. Aōrarudile ahāteny. ¹⁸ Tule, ityhydÿÿ-di rurure mahādu, biu-ò ròiōtyhy. ¹⁹ Kabede-ki sohojile inyboho Kristu riraōmyhÿreki, inyboho bedewotyhytyhymy roire.

²⁰ Inatyhymy taheka Kristu rubumy roire-ribi rexixare. Tii juhuuludu rubu bede-ribi dōòsede mahādumy roirekemy, tai iny tule rekexixarenkyre. ²¹ Iwese hābu sohojiō rubu diwyde wese, tule hābu sohojiō rubu-ribi ixixana diwyde. ²² Iwese Adaō-ki ibutumy iny rurukemy rÿimyhÿkemy tule Kristu-ki ibutumy ixixana kiditakre. ²³ Kristu bededÿÿnana kedehemyhÿkreu, rubu-ribi ixyby ixixana kōdōhōnykre. Kristu juhūu rexixare, ihewomy tahe taeryna mahādu kidiixixanykre. ²⁴ Tai tahe bede konanakre. Jesuisi ibutu wedu mahādu, bede dinodu mahādu, Iòlò mahādu kanahukre. Tahe ibutumy tyby Deuxu-ò òlòna kidiōkre. ²⁵ Jesuisi tahe ibutu ratyre Iòlōmy ratxikemy rarehyykre. Iòludu mahādu ibutumy iwarawo-ki rÿikre. ²⁶ Iòludu konana heka, rubu rare. Tii tule riixāwididÿÿnykre. ²⁷ Ryberiti kiawese roire: –Deuxu tahe ibutumy iwarawo-ki ritidireri. Iximy ritidiōtyhy tii dori tidisidu rare. ²⁸ Rexihudi tahe tule iRiòre ritidikre. Tai tahe Deuxu ibutu iòlōmy rarekre.

²⁹ Rubumy rÿira ixyby kedexixaōkeki aōherekibo iny derōwy teratisebenyteri, rubumy roira mahādu hārehekÿle wahe.

³⁰ Aõherekibo berebunatyhyhykỹ-txi inyboho iòhãrumy ratx-
imahãrenyre txuõ txuõlemy. ³¹ Ibututxu rubu reijemyhỹre.
Adeereny wawowydynatyhymy watxireri. Jesuisi Kristu In-
ynyryõ òraru-ki. Tai heka kia lau rarybemahãre. ³² Hãbu
mahãdu-ò Efesu hãwã-ki iròdu debure-ò aõbina wese re-
sumahãreki aõtyhybo aritakre? Inatyhymy aõbo? Rubu rex-
ixaõkeki, rikiroxiryrenyke, rikiõrenyke, biurasòmý dori ruku-
rurenkyre. Aõ aõkõ inytyhydỹna. Kia riki ityhydỹdukõdu
mahãdu tuu rexirybenyre, abiõwa mahãdukeki. ³³ Ixi itxe-
nadỹõmy: kia biõwa bina dori iny ixihemy riatymyhỹhỹre.
³⁴ Ywityhylemy boibeke, òbitilemy òrarurenymy, sõwemy iny
Deuxu rieryõre. Kia heka iny ixỹrudỹnareny rare, tai rary-
bewãhãre.

³⁵ Tahe inyõ kanarybemyhỹkre: –Timybo rubu
kedexixakre. Aõumywesemykre iumy? ³⁶ –Itxỹte,
juhuu alòboròna rabròõkeki tiu txuhuõna. ³⁷ Telòho iny
ribòrònyõtyhy, ityle iny ribòrònyke. Iwese maixõmoty
ribòrònyke ada oworuty wese. ³⁸ Ibututy-ò Deuxu iraty
umy riwahinymyhỹre ixideewireki. Deuxu ixideewimy
alòboròna ritxuhudỹnymyhỹre timybo? ³⁹ Dee ibutumy
wiwese wese aõkõ rare. Inyde, iròdude, nawiide, uturade
ibutumy tahe wiribi hitxi hitxire. ⁴⁰ Biумы rỹira mahãdu tule
lahitxire, aõwitxira witxira bedemy rỹira kia wowodynareny
wiribi hitxire. Tii-wana wimy rahitxirananyre. ⁴¹ Txuu
ahãdu, taina, iloosònareny wiribi hitxire. Taina ijõ taina-ribi
iruxeratyhyre. ⁴² Tai tahe kia wese rubu-ribi ixixana
rỹimyhỹre. Umy rubu su-ò rahãloodỹmyhỹre rarõnyhe txu.
Idi tahe irulemy kòdòhònykre, alòboròna ruhunymyhỹre wese
tahe umy tuedeõnaõ. Bede luruhukỹ-ki rahãloodỹmyhỹre,
tahe loosònatyhy-ki kòdòhònykre. ⁴³ Iruruõ-di umy heka
rahãloodỹnymyhỹre ibinare, tahe iruxeramy tarurutyhy-di
kòdòhònykre. ⁴⁴ Iny umy wesemy rahãloodỹmyhỹre, tahe
tytyby wese kia umy-di kòdòhònykre, biuludu mahãdu wahe.
⁴⁵ Kiamy heka ritidỹna-ki roire. Iny umy riuhemyhỹreki,
tule tytyby umy riuhemyhỹremy rỹire: Juhuu inyiru Deuxu
riwinyre Adaõ heka rare. ⁴⁶ Juhu tahe inyummyreny tayry-di
riwinyre idi tahe ritytybynyre. ⁴⁷ Juhuu ludu hãbu suribi ije
rare. Ihewo-ribi Hãbu biu-ribi ihỹre Kristu wahe. ⁴⁸ Juhuu
hãbuwesemy ibutumy iny bede ludu ihỹre juhuu inytyhy wese
wahe. Hãbu biuludu wesemy ibutumy biu ludu mahãdu
ihỹre. ⁴⁹ Tai tahe kabede hãbu wesemy inyboho rỹimyhỹrenyre
wesereki, tule biu ludu Hãbu wesemy rỹkỹrenyke.

⁵⁰ Waityhydỹdu Kia heka rarybemahãhyreri, iwese
inyboho ihỹmyhỹrenyre wesemy tiu Deuxu Òlòna-ò ralòõtyhy.
Iny umy heka ruruhyy umy rare, tai tahe Deuxu Òlòna

ritaõtyhy, kowa-ò dori iny umy ruruõtyhy. ⁵¹⁻⁵² Tahe aõbo teeryõte adee aritỹnynykre: Ibutumy iny ruruõkre. Ibutumy ityhydỹỹdu iny ruruõòle iumy riwixiratỹmyranykre, aõwesele reakre, iny tarue riberenymyhỹre wese reakre, ikonana juròna ritxurònykre. Juròna ritxurònykre idi ibutumy ityhydỹỹdu rubumy rỹira riummywixiratỹmyranykre umy tuedeõna-di. Inyboho ityhydỹỹdu mahãdu tulekre. ⁵³ Tahe rekexiwiurònyrenyke, iny bede umy dori rurumyhỹre. Rakaumyinykre umy wixira-di taita rukururenyõtyhy. ⁵⁴ Iny umy wixiradikre, tahe kia rybe rexihumy rỹikre: Ryberitina rarybere: –Rubu ijesu rikitarenykre: ⁵⁵ –Aõherekibo rubu, aijesuna wawana tetaõta? Aõherekibo tiwamytxitxidỹỹnyõte? ⁵⁶ Òraru rubumytxitxidỹỹdu rare. Bedeywidỹỹ òraru rurudỹỹna rare. ⁵⁷ Deuxu umy my rekealàmehỹre, tii dori ijesu inybohoreny ritakemy riwiòhenanymyhỹre. Jesuisi Kristu Inynyrỹ-di diwiòhenanymyhỹde. ⁵⁸ Tahe weseriòre luu mahãdu, bityhynyhybenyke, ywihyummy ahãbenyke, Wanyrỹ aõmysỹdỹỹna-ò hyy tiemy ahãbenyke. Aaõmysỹdỹỹna Wanyrỹ dee, idi inydee awimy rarootinymyhỹre.

16

¹ Nierumy ararybekre. Kia bibutunykemy kowa tyhydỹỹdu mahãdu-ò, Judeia mahãdu wahe. Iwese Alatxia mahãdu-ò ròerynanyre wese, kaiboho tule ijõ dee bitabenyke. ² Semana juhu ludu txuu, iny sohoji sohoji tiwesebo tòtatenyete jura birarenymahãbenyke rawahikremy. ³ Tai adehemynykreu kia nieru rexihumy rỹikre myiõtyhy tahe ijõ rarasamy. Tahe mobo kai tyyriti-di biditakre, tii-wana nieru iny ariteõnykre Jerusalẽ-ò. ⁴ Tahe jiarỹ arakewana iny dee wikeki, tuu wawana kodoikre. ⁵ Macedonia bede-ò arakre rahudi arehemynykremy adeeremy watxireri. Macedonia-di delemy arakre. ⁶ Araroorehenykre òsana biubede taile arahukre awanarenhyhyle. Tai ele elemy biwatỹidỹỹnykre titxibo arakemy. ⁷ Deuxudeewikeki urihimyò aõkõ akireny bede arieke bededỹỹnana arahukre akireny. ⁸ Efesu hãwã-ki Pentecoste woranabedehesi konana-ò ariijekre. Idi tahe arakre. ⁹ Ijõtòbònahakỹ wese irayhyky rỹimyhỹre waaõmysỹdỹỹ. Tai waaõmysỹdỹỹna irutaõre, ihãre ta wamy òludu sõwere. Namy sõwehyummy taheka òludu rỹire.

¹⁰ Tahe, Tximòtxi rakeki, iixỹru lau biijemy tii dori Deuxu aõmysỹdỹỹna diwinymyhỹde wawese. ¹¹ Inyõ Tximòtxi-di aõmy aõkõ ihỹkeki heka wadee awiõre. Wadee itỹina-ò biwiòhenanybenyke ywina-di. Reraðmahãre dori ityhydỹỹdu seriòreboho wana kanakemy. ¹² Inyseriòre Apòlo-ò sõwemy rarybewãhãre arorarenymy rakemy ijõ iny seriòreboho-wana.

Tahe tii heka Deuxudeewimy aõkõ idi rõhõtinyinmyhỹre. Idi tahe rakre ixideewimy tiu txumybo.

¹³ Aõu aõu bexiywinylemy borukubeke. Inatyhymy òbitimy myibenyke, hãbu rurutere wesemy bexirurudỹỹnyke. ¹⁴ Aõhebo botỹỹnybenykemy ywina-di luuna-di botỹỹnymy boibemahãke.

¹⁵ Tefana, tasỹ mahãdu-wana Akaia bede ludu-ki ityhydỹỹdumy juhUU rare. Kia teerytenyte. Tiiboho ityhydỹỹdu mahãdu wiòhedỹỹduhyymy ihỹrenyre. ¹⁶ Tamy boholabenyke, ibutumy tamy wityhymy biwinybenyke. Tule kia wese wiòhedỹỹdu biwiòhenanybenyke. ¹⁷ Tefana, Fortunatu, Akaio kaò ditehemynydenyde. Taita wadeysamy watzireri. Tiiboho riwawiòhenanyrenyre kaiboho kaki aõkõ atximahãtenyteki. ¹⁸ Tiiboho wawo-ribi riwateysadỹỹnyre, araykyreny òsỹny tule wahe. Kia mahãdu heka ratyhydỹỹmyhỹke.

¹⁹ Kaki Asia bede-ki ibutumy dohodỹỹna mahãdu tarybe wehityhyna adeereny riwahinyreri. Akila, Prisila-wana taluuna Wanyrỹnimy rybe adee riwahinyrenyreri taheto-ki dohodỹỹnareny mahãdu tule wahe. ²⁰ Ibutu seriòre mahãdu rybe wehityhyna adeereny riwahinyreri. Birybenybenykreu wii bimybenykre wiwetya-ki seriòrewesemy tamy luòsòna òbitityhyna-di buòbenykre.

²¹ Iroo tahe jiarỹ ariritinykre wadèbò-di wahe. Jiarỹ Paulo warybe wehityhyna rewahinyre. ²² Inyõ Inynyrỹ luuõkeki, aõbinahakỹbo tamy kanake, kiamy rexirybenyre: 'Maranata' kia heka Jesuisi wymy kanake rare. ²³ Deuxu luuna adeereny kanakemy idi watxiwãhãre. ²⁴ Ibutu-ò waluuna Jesuisi Kristumy. Kie.

2 Oritxi Mahãdu-ò **2 Oritxi Hãwã Dohodÿÿna Mahãdu-ò**

¹ Jiarÿ, Paulo, Deuxu deòduõ watzireri Deuxudeewireki. Tahe katyyriti rewahinyrenyrene Oritxi hãwã dohodÿÿna mahãdu-ò. Iny seriòrereny Tximòtxi wawana ihÿre. Tule rewahinyrenyrene ibutu ityhydÿÿdu mahãdu roholakemy Akaia bedeki. ² Ruxetòena, ywina-wana adeereny kanakemy idi watzireri Deuxu inytybyreny-ribi Jesuisi Kristu Inynyrÿ-ribi.

³⁻⁴ Deuxu heka Jesuisi Kristu tyby rare. Iny wiòhedÿÿdu ihÿre. Ruxetòena sòwemy inydeereny riwahinymyhÿre. Ibutumy aòmydÿÿna-di riwiòhenanymyhÿre. Tai tahe iny wixira rikiwiòhenanyrenykre Deuxu wiòhedÿÿna-di. ⁵ Iwese Kristu aòhòkÿmy dÿÿnana kaiboho teerytenyete wese, Kristu wiòhedÿÿna bitamy bierybenyke. ⁶ Jiarÿboho aòhòkÿmy arotÿÿnyrenykreu, awiòhenadÿÿrenykreu tuukre. Tai tahe tarasana iribi bitake. Deuxu-ribi wiòhedÿÿna arimyyrenykeki, kia biu-ò hena iribi bimyke arawiòhenanyrenykreu. Tai tahe kaiboho arururenydikre aòhòkÿmy botÿÿnybenykreu. ⁷ Tahe wararòsòna sòwemy ihÿre akireny. Tiubo aòhòkÿmy dÿÿnanamy botÿÿnybenykreu tule wiòhedÿÿna bitabenyke iwese aritarenkyre wese. ⁸ Waityhydÿÿdu seriòre, Asia bedeki jiarÿboho sòwemy aòhòkÿmy ratÿÿnyny roiremaha. Wadeereny heka isiratyhyre ibede-ki. Tai heka raberumy roiremaha arururenyke lau. ⁹ Rahòtinyrenyrene tai wakananareny sana. Kiamy heka wadeereny ditÿÿnynyde bedeerynamy: ixi-di inyò nohòtiòmy, Deuxudihyyle wahe. Tii dori rubu-ribi ixixadu rare. ¹⁰ Inatyhymy tii riwatarenyrene kia brebuna-ribi. Ibutu aõna aõna-ribi riwatarenyrene ixityre. ¹¹ Kaiboho dori wadeereny Deuxu-ò textiòenytenyteri. Tahe ibutumy ixitòena-ò Deuxu kodoholakre tai riwiòhenanykre. Tahe ibutumyiny Deuxu riteàlananykre.

¹² Ibutumy jiarÿboho heka kia Deuxudeewimy rewinyrenyrenyrene. Tai heka wadeysarenyrene jiarÿboho. Awanareny heka tule rarybemahãrenyrene: òbitinamy, Deuxu rurunamy. Iny raykywydyna-di aòkò wahe, Deuxu raykywydyna-di. ¹³⁻¹⁴ Idi mariakele, biritinykele, bierykele, kia reritinyrenyrene adeereny. Wiji urihimyoleterymy toite. Jesuisi txu tahe ibutumy bierybenyke. Jiarÿboho areysarenkyre bierybenykeki wahe. Tule kaiboho beysabenykre.

15-16 Juhuu rahõtinyre kiawesemy: arakemy ixi-di rahõtinyre. Juhuu heka Macedonia hãwã bede-ò arakemy ixi-di rahõtinyre. Iule tahe aroramy arakemy heka ixi-di watxiwãhã. Òkeseu tasỹ tule, aroramy adehemynykre. Tai wiòhena inatximy bitake. Jiarỹ ayrenymy areakreu, Judeia bede-ò arakemy kaiboho biwawiòhenanybenykemy. 17-18 Reòsamy watxirerimy aõbohe wadi tahõtinytenyteri? Ixiòrarukile aõbohe tuuremy adee araỹraxikre? Tuu aõbo iximy rarybere kohe, myỹ, iule. Aõkõre, myy rarybere, iule wahe. Inatyhymy aõbohe rarybereri. Aõkõre rarybeõre. Jesuisi Kristu heka warybe rieryre. Kohe, myy, iule. 19 Tai heka raryberenyre: –Inatyhy rare. Myỹ wahe, Deuxudeewinamy. Sila Tximõtxi-wana kia Deuxu rybe-di adeereny ritỹnynyre, Jesuisi Kristu iriòremy, jiarỹ tule adeereny kia retỹnynyre. 20 Inyboho ratximyhỹre Jesuisi Kristu-ò. Kristu heka Deuxu widỹỹdu ratxireri. Inyummyreny ratximyhỹre. Deuxu heka tuu iny rierynanyhỹreny, tii inatyhy. 21-22 Tii heka iny ritamyhỹreny; rihitximyhỹreny; tahõrõ mahãdumy riwinyre. Inydeereny riwahinyre Deuxu Tyytybytyhy inyworeny-ò risỹnyre. Tai heka inyboho rõhõtinyreny inydeereny ibutumy riwahinykremy.

23 Deuxu heka warayky rieryre. Tai heka rarybemahãre, inatyhy raõre Oritxi hãwã-ò. Tai heka adiride ixinamy. 24 Araryberenyõtyhy jiarỹboho aõbo bityhynybenykemy, marybebenykemy. Kaiboho dorihe inatyhyna tetyhynytenyte. Urile tahe arawiòhenanyrenykre deysana-di Deuxu Tyytybytyhy dee deysana-di.

2

1 Tai wawo rerahõrera. Arakemy aõkõ abedeòtiidỹỹrenymy ixityre. 2 Arabedeòtiidỹỹnyrenykeki tahe mobo riwateysanykre. Kaibohole toite. 3 Tai adeereny reritinyre. Anaõtyhy heka abedeòtiidỹỹrenymy. Kaiboho dori deysana-di biwasỹnybenyke. Iu wadeysamy watxireriu, kaiboho tule beysabenykre. Kia heka reerywiwire jiarỹ. 4 Adeereny reritinyre bedewona-di ranywãhãu; warube rytynmahã. Bedeòtiidỹỹna-di arasỹnyrenykeki aõkõ kỹny. Tahe timybo aluurenyremy kaiboho bierybenykemy adeereny reritinyre.

5 Bedewonamy relyykeki, tiu inyõ wii ribedewonyreu, riwadedewonyõtyhy. Aõtxi arabedewonyreny. Waryberiti isirare aõkõ ihỹre. 6 Aõhõkỹmy dỹỹnanamy yla aõkõ rotỹỹnyre. Tai ixinamy rarekre wiji. 7 Wiji tahe iwitxira aõmydỹỹnana biwinyke: biwiòhenanyke iixãwididỹỹnadikemy. Tai tahe bedewona-di sõwetyhymy riatyõtyhy bedewona-ribi wahe. 8 Tii luunatyhy-di bierynanybenyke.

⁹ Tai heka adeereny ònosõna rewahinyre. Tai juhuu waritidỹỹna adeereny rewahinyre. Jiarỹ heka kaiboho rexiywinymy aõbo atxitenyterí ityhydỹỹna-ò. Kiamy adireny watzireri. ¹⁰ Kai biixãwididỹỹnykeki heka, jiarỹ tule ariixãwididỹỹnyke. Kia adeereny rikiwinyrenyke Kristu òraru-ki. ¹¹ Tahe Satanasi tiu iny riatyrenyõtyhy. Inyboho rieryrenyre tii kia riwinykemy riwisỹnymyhỹré.

¹² Jiarỹ heka ròirenyre Troaji-ò Rybewihikỹ tỹnydỹỹmy Kristuni-di. Tamy retehemynyreu, isiraõlemy tai Rybewihikỹ dohodỹỹmy, Inynyrỹ riwawiòhenanyre wahe. ¹³ Tahe wabedewomy watxiwãhã inyseriòereny Txitu-ki rahaõrekí. Tai tahe kia iny mahãdu reteòwarinyre arakremy Macedonia hãwã-ò rare.

¹⁴ Tahe Deuxu deysana! Deuxu-wana watxiwãhãrenyre. Tahe kia ijesu tai ritake. Kristu heka ridykre ijesu tarasadu mahãdu. Rokoirenykre heka ihe-ki. ¹⁵ Iwese aderõna lỹnyrehékỹ ibutumy idi riàlànymyhỹre wese heka, kia wese inyboho roire. Ibutumy iny rierykemy heka ityhydỹỹdu mahãdu rỹirerimy ihỹre. Lỹnyrena wihikỹ Kristu ritoonyre wese Deuxu-ò inyboho roire. Iny lỹnyrena wese heka rare. Ityhydỹỹdu, ityhydỹỹdukõdu mahãdu-ò ramyhỹre. ¹⁶ Kia rityhynyõmyhỹre mahãdu tahe, tỹnyre rirubunyre. Rityhynymyhỹre mahãdu tahe tỹnyre iruweselemy rare. Kia aõmysỹdỹỹna biwinybenyke. Isirare heka iaõmysỹdỹỹ. ¹⁷ Inyboho heka sõwemy inywese aõkõ iny roire. Iwese iny riwymyhỹre aõðwryiòre idi ijohomy, kia wese karybe rare. Kia Deuxu deòdu mahãdu heka iòwydimy aõkõ rybe riwymyhỹre. Tahe inyboho heka inatyhymy rarybemyhỹrenyre. Deuxu dori inydeereny rarybere òbitinamy. Riwateònyrenyre òbitina-di araryberenykemy.

3

¹ Timyre heka tyyriti ritididỹỹnamy raruõhyymahãrenyre jiarỹboho awirenyremy. Tahe waribireny tule aribireny kia Ritidỹỹna arihurenyõtyhy. ² Kaiboho heka Kristu tyyriti wese aõma toite. Riritinymy heka roimyhỹre inywo-ki, inyrayky-ki. Idi riramy kaiboho burubenykeki, aõbo kaiboho tewinymahãte heka tamy betehebennyke. Tai tahe rierymy idi rariake ixideele. Idi rariake hãre tahe idi rexibedeerynyke. ³ Kaiboho heka Kristu tyyriti wese heka toite. Inydeereny iwahidỹỹmy heka tii rare. Kia tyyriti witziramy rare. Aõ ritidỹỹna manamy aõkõ riwinyreri. Deuxu Tyytybytyhy-di tahe riwinyreri. Aõ manatyre-ki aõkõ ròritidỹỹreri inyraykyreny-ki, inyworeny-ki ròritidỹỹmyhỹre. ⁴ Deuxu heka retyhynymahãre, Kristu òraru-ki wahe. Tai tahe tuu raryberenyymahãre kiawesemy. ⁵ Jiarỹboho heka

warururenyõhyyre kaa aõmysÿdÿÿna widÿÿna-ò. Iny ruruna heka Deuxu-ribi sohojile nade. Tii iny wiõhedÿÿdu, aõ iny rikiwinymyhÿrenyke-ò wahe. ⁶⁻⁸ Irybe tÿmyra dohodÿÿdumy heka inyboho roire. Ihetxiu bede ywina wesemy aõko heka ròritidÿÿre Deuxu Tyytybytyhy ihÿre. Ihetxiu bede ywina heka rubu diwyde. Deuxu Tyytybytyhy iruna riwahinyre. Ihetxiu heka manatyre-ki ròritidÿÿre. Deuxu loosõna tule ròhõnyre, riwahinyreu wahe. Moisesi òsÿny-ribi sõwemy loosõna ròhõnyre. Idi tahe riixãwididÿÿnyre. Tahe judeu mahãdu reteheõhyymyhÿre iòsÿny-ò, iòsÿny loosõnadireki. Deuxu Tyytybytyhy heka iratyre awimy rare, iny-ò dori Deuxu irutyhy riwahinyre. Tahe bede ywina nade loosõna wiwihikÿ-di bede ywina tÿmyra tahe iratyre awi rare. ⁹ Tii heka iny-di ixãwikemy ratxireri. ¹⁰ Tahe iratyre rybe tÿmyra rare. Iny òraruna-di ixãwikemy ratxireri. ¹¹ Kia urihimyo rÿire awi rare. Iratyre tahe umyuedeõna rare.

¹² Iny raròsõna sõwemy ratximyhÿrenyre. Tai tahe inyboho ruberuõhyymyhÿrenyre. ¹³ Moisesi wesemy aõkõ rakatximyhÿrenyke. Imahãdu raykytxymy dori rÿirenyre. ¹⁴⁻¹⁵ Imahãdutyxymy dori rÿirenyre. Moisesi bedeywina-di rariakeki, irayky ritòbõnyke. Kia rieryõrenyre iraykyreny ratxynymyhÿrenyremy. ¹⁶ Kristu rityhynyre xiery, irayky raraymyhÿre. Iwese Moisesi òsÿnytòbõna iòsÿny-ribi resere wese kia rare. ¹⁷ Kia Tyyriti-ki Inynyrÿreny heka Deuxu Tyytybytyhy rare. Tikibo Deuxu Tyytybytyhy rÿikeki kowa ibutumy iny ixinamy rÿike. ¹⁸ Tahe ibutumy inyboho heka Deuxu wowydyna iny òsÿnyÿreny-ki ijõdire. Iwese iny òsÿnyreny itxena-ki iny retehemyhÿ wese, Deuxu wowydyna ibutumy robimyhÿke iny òsÿnyreny-ki. Inynyrÿ he Deuxu Tyytybytyhy rare. Iribi tahe wowydyna nade. Kia wese inyboho heka Inynyrÿ wesemy relemyhÿrenyre. Inihikÿmy delemyhÿdenyde. Tii dori iny worenny-ki raaõòtaõtamyhÿre.

4

¹ Deuxu taruxetõena-di heka kia aõmysÿdÿÿna inydeereny diwahinyde. Tai heka ikonanakõdumy idi rakatximyhÿrenyke. ²⁻³ Ibutumy heka rikiwinymyhÿrenyke aõbo òbiti rare. Aõbina binahakÿ widÿÿ-ò heka rekexiijerenyke aõbo òbitirele heka rikiwinyrenyke; rikiwiurõnyrenyõtyhy heka Deuxu rarybereriki, tuu. Deuxuruõhyyle rikiwinyrenyke. Inatyhyna loosõna-ki heka rakatxirenyke. Ibutumy heka rikiwinyrenyke ibutu itxerena òbitimy wahe. Inyboho ritÿnynymyhÿre Rybe tymyra wihikÿ. Inyõ-ribi riwòmny roimyhÿkeki tahe kia rityhynyõmyhÿrele tuu ritidimy roiike. ⁴ Kiakeki tahe Satanasi iitxeredÿÿ-ò riijõnyreri loosõnamy

robike lau. Deuxu binadỹỹna rare. Ibinadỹỹdu wesemy ratxireri. Kaa loosòna-ò iny riitxeredỹỹnyhyymyhỹre aõma Rybewihikỹ tỹmyra-ò. Rarybemyhỹre dori Kristu heka Deuxu yrubule rare. ⁵ Iximy aõkõ rarybemahãrenyre. Inynyrỹ Jesuisi Kristulemy heka rarybemahãrenyre. Inyboho heka deòdumy inyboho ratximyhỹrenyre adeereny. Jesuisi òraru-ki kia rewinyimahãrenyre. ⁶ Juhuu Deuxu rarybere: —Bedeluru-ribi heka loosòna doosòmyhỹde. Tii heka loosòna-di inyraykyreny ritoosònanymyhỹre. Tai heka iny Deuxu erysydỹỹna inyboho rieryrenyre. Kristu òsỹny-ki sohojile tuu rokobirenyke.

⁷ Kia heka aõna aõna wiwi inydeereny heka rare. Ihyna òwy riòre wesemy inyumyreny ratxireri, butxi weselemy wahe. Tai heka Deuxu sohojile irurudire, inyboho aõko irurudire. ⁸ Ihãrele heka aõbo iny riwinyke rieryõhyymyhỹre timybo aõ iny riwinyke heka. ⁹ Aõhõkỹmy dỹỹnana heka inydeereny rehemynymyhỹre tai inyboho ikyhynamy riemyhỹrenyre. Inyboho heka bedewodihyy ratximyhỹrenyre, tahe tiemy iny raròsònarenydihyy inyboho ratximyhỹrenyre. ¹⁰ Inyboho heka itxi tõhõti reahyy inyboho ratximyhỹrenyre, Jesuisi rubuna-txi wahe. Kaki tahe iwese Jesuisi raremyhỹ wese heka rakatxirenyke. Tai iny witxira heka tuu robikre ki-amy, Jesuisi rirudỹỹnanamy. ¹¹ Jesuisi òraru-ki heka brebunahakỹ-ki inyboho roire. Kia wese-ki heka iny Jesuisi runamy robikre inykireny. ¹² Kia-ki heka iny rubukonanareny inykireny rare. Tahe iruna akireny tule ratximyhỹre. ¹³ Kiamy heka Ritidỹỹna roire: —Jiarỹ retyhynyre. Taita rarybere: —Kia weselemy roire. Retyhynyrenyreri tai heka jiarỹboho tule raryberenyreri. ¹⁴ Jesuisi ixixadỹỹdu heka rare. Kaa tule inyboho tule riixixanyrenykre. Rikirònykre heka Deuxuko-txi. Kaibohe tule boibenyke wawanareny. ¹⁵ Jiarỹ wawanareny kia adeereny relere. Tamy Deuxu ruxetòena sòwetyhymy ramyhỹre-wana heka riwahinymyhỹre iratyre sòwetyhymy tamy deàlàna riwahinymyhỹre. Kia heka Deuxu wowydyna-ò tuu ratximyhỹre. Bedewoõmy.

¹⁶ Iny bedewonaõhyre heka. Iny umyreny retybynyre. Txuõ txuõlemy heka ratỹmyranyke inywo-ki. Tiie heka aõbo rierynyre inatyhyy wahe. ¹⁷ Iny bededỹỹnanareny heka urihimyoìle roimyhỹre. Iny wowydynarenkyo-ki heka aõhõkỹmy dỹỹnana inyboho ritarenkye inydiyreny retehemyhỹre. Retyhenyrenyre wowydyna-ò awityhyremy inyboho idi retehemyhỹre iny idi retehõmyhỹredi. ¹⁸ Aõbo iny tuu robimyhỹre bede bedemy tuu iny robimyhỹre ibutumy idi reamy. Aõbo iny tuu robiõmyhỹre heka tiu itueõtyhy. Kia-di tahe inyboho rõhõtinyinmyhỹre.

5

1-2 Inyummy t̃myrahak̃y heka inydeereny kidiwahinykre Deuxu, iwitxira biu bede-ki wahe. Aõ hãbu wahisid̃ỹna-ki aõkõ Deuxu-di wahisid̃ỹna-ki heka tuukre kia umy t̃myra wahe. Tiu heka itueõtyhy. Rakabedeworenykre heka bede-ki iny telesõreny-ki ras̃nyreki inywo-ki wahe. ³ Inyboho heka biubede-ki inys̃reny inyummyt̃myra-ki rõkõhõtinymyh̃renyke. Kaa iny umyreny wahe. Rabedewomyh̃renyre. Umy t̃myraõ heka rikitarenykemy inyboho ratximyh̃reny. ⁴ Aõherekibo inyboho wiji rabedeworenyre? Inyboho heka Deuxu bedewihik̃y-ò arõirenykekõ aõbo? Inyreny rikitarenykemy aõkõ wiji. Kaki aõhõk̃my d̃ỹnana riwawobeded̃ỹnyra. Kia aõbo umy t̃myra tyre tahe rikirytyrenyke ijõ wahe. Ijõ rikitarenykre umytuedeõnaõ. Tiu itueõtyhy. Kia riwinyre inydeereny kia wahe. ⁵ Deuxu dori tuu rarybereri inydee riwahinykremy. Tatytybytyhy dori diwahinyde diteõsinyde. ⁶ Kia iwese juhoo rarybere wese heka tuu rot̃ỹnykre. Tai heka inyboho teysamy ratximyh̃renyre. Kabede-ki inyboho ratximyh̃re heka inyummyreny ratximyh̃re heka aõ Inynyr̃y-wana aõkõ ratximyh̃re. ⁷ Tiu heka rokobirenyõtyhy rikityhynyrenykekile ka idi rakatxirenykre. Inyboho rieryreny timybo rarekre wahe. ⁸ Jiar̃y wadee awire kabede-ribi arexitake Deuxu-wana aras̃nyke wahe. ⁹ Aõma tamydeewimy heka tuu iny riwinyke wahe iny-wana ras̃nyke. Kaki iny ratximyh̃re tahe aõbo awire heka tamy awire. ¹⁰ Inydireny retehemyh̃re. Aõbo inyboho riwinymyh̃renyre. Aõbina bina rikiwinyrenyke heka aõhõk̃my d̃ỹnana inydeereny riwahinykre. Aõwihik̃y riki rikiwinyrenykre wana tas̃y. Aõbo awityhy inydereny kidiwahinykre.

¹¹ Inynyr̃y heka inyboho rityhynymyh̃re. Tai inyboho iny witxira-ò tuu sõwemy relymyh̃renyre. Ibutummy heka Deuxu iny rierymyh̃renyre. Kaiboho heka tule tiwaerymahãtenyete. ¹² Kia heka reraõmy watximyh̃renyre biwaerybenyke. Ararybeõtyhy heka adeereny jiar̃y awiremy. Tahe wadee ka awire kaiboho waluurenkye. Hãbu iumyle awimy r̃yirerimy ih̃yremy idi rõhõtinymyh̃re. Tii heka õbiti aõkõ rare. Kia biwyõnybenykemy adireny watxireri. ¹³ Juhoo iny rieryremy itelesõ. Inymyreny rarybekeki itx̃ytemy inyboho roiremy. Rakaryberenyke heka aõbo inyboho dori Deuxu dee. Aõmys̃d̃ỹrenymyh̃reki inydireny rõhõtinymyh̃re. Inymyreny rarybekeki inyboho awilerenyremy. Iõrarureny-ki tuu rakatxirenyke. ¹⁴ Kristu luuna heka kiamy iny riraykyd̃ỹnymyh̃re. Tii heka rurure iny ibutudee. Tii rurureu, ibutummy inyderõwrenyemy rurure.

¹⁵ Rurure heka aõma iny ixidee sohojile irumy rareke lau. Kia tako-ò rakreu tamy heka irumy rakre. Tamy dori rurure tai rexixare rubu-ribi. ¹⁶ Rakaraykynyrenyke timybo hãbu awiré, ibinaré. Kaimy heka rakaraykynyrenyke. Aõ iwese iny wixira raraykynymyhÿre wese aõkõ raraykynyrenyke. Aõma inyboho aõbo Jesuisi Kristu-di raraykynymyhÿre heka. Ixityre aõbo tuukre. ¹⁷ Tii heka umy tÿmyra tuedeõna-di ratximyhÿre iwixira ratximyhÿre. Juhu iaõmydÿÿnana iribi ixãwira. Tahe wiji raraykywydynanyre iwixiramy. Ibutumy iaõna aõna ihetxiu heka rawixiranyre, awi-ò. ¹⁸ Deuxu heka ibutumy kia riwinyre tamy. Inyboho heka iòludu roire, juhoo wahe. Wiji tahe iliinamy ijoi ratximyhÿre. Iny wixira heka iliinamy rarekemy idi watxiwãhãre. ¹⁹ Wiji tahe timybo Kristu rarybekremy heka adeereny rarybereri. Aõma Deuxu kia liinamy rarekemy wahe. Ixinamy Deuxu. Ka Deuxu aõ anaumywxiranydenyke. Kia Kristu òraru-ki tuu ratximyhÿre.

²⁰ Jiarÿboho Deuxu deòdu roire. Tai Kristu deròwmy adeereny rarybereri: Iluuna ixidee ixiby bimybenyke. Wii biwowixinybenyke. ²¹ Deuxu heka iny òraruna ritidire Kristu tyre-ò. Kristu inyòrarunareny riwyre. Wiji tahe Deuxu òbitina inydeereny riwahinymyhÿre.

6

¹ Jiarÿboho tahe raaõmysÿdÿÿnyrenyke Deuxu dee. Deuxu ruxetòena dori tetatenyke, tai idi mohòtynybenyke, òhòtirenny-ribi losaõmykemy. ² Boholabenyke aõmybo Deuxu rarybereriò. Jiarÿ heka aluurennyre iurenana tahe ka arybe-ò raholareri. Arawiòhenarennyre iu wadee textòenyteu, wadee taryteu. Boholake wiji heka bitabenyke Deuxu ruxetòena. Wiji heka biu-ò hena txumy bede rÿire. ³ Inyò iny aõmysÿdÿÿnarenymy ibinamy rarybekeki, uritere ijò iny bedeworenyõmy, jiarÿboho òraru-ki. ⁴⁻⁵ Jiarÿboho dori Deuxu deòdutyhy roire. Tai rikiteòsinyrenyke ibutumy aõbo inyboho dori Deuxu deòdu roire. Tai riteòsinyke ibutumy aõbo iny riwinymyhÿke. Aõna aõna rikiteòsinyrenyke. Òhòte wakireny rÿimyhÿre. Ròtenawo-ò ralòmymhÿrennyre. Bedeweweky-ki aõhòkÿmy ratÿÿnymyhÿre. Sòwemy heka reòludunnyre aõnana bina binahakÿ reòludunnyre. Aõ òta òta reòludunnyre. Sòwemy heka raaõmysÿdÿÿnynihikÿrennyre. Sòwemy heka aõmysÿdÿÿnadikre; tÿikõ bede reijereny; byreõmy bede reijereny; ⁶ òbitimy heka rewinyrennyre. Aõma, ywiny-di ròwidÿÿrennyre bedeeryna-di. Ka roirewãhã iny iwixira rewiohenanyre. Ibutumy kia rewiohenanyre roirewãhã. Deuxu Tyytybytyhy heka wawanahy

roiremyhỹ. Luuna heka inydee reteòsinyrenyrene Inatyhyna rybe heka retỹnynymahãrenyrene. Sõwe heka ritỹnynymy, jiarỹboho Deuxu deòdu roire wahe. ⁷ Òbitina dori wadebònareneny wese rare Satanasi itxemy. Jiarỹboho heka remymahãrenyrene aritarenykemy. Tule iny rexiijemyhỹre òbitina-di. ⁸ Ijõ heka waluurenenyre inyõ tasỹ aõbina binahakỹle wadee riwinymyhỹre. Ijõ heka Rybewihikỹmy wadee raryberemyhỹre. Ijõ tasỹ rybe binamy wamyre, raujõmo. Inatyhyna rarybemyhỹre. Tai wamy ruidu riwaninimyhỹrenyrene. ⁹ Ibutumy heka iny riwayreneny. Tahe rieryõhyymy heka inatyhy rare. Watxiwãhãrenenyre rubu wese ihãre tahe warumy watxiwãhãrenenyre. Tiiboho heka rubu wesemy inydireny ratximyhỹrenyrene. Aõhõkỹmy ratỹnyrenenyre hãre raruõhyylemy watximyhỹrenenyre. ¹⁰ Aõna aõna heka bedewonihikỹmy ròhõnyrene. Tiemy wadeysahyy watxiwãhãrenenyre. Jiarỹboho heka urimynodule watxiwãhãrenenyre. Ibutumy inyboho rityhydỹnyrenenyre. Aõhomy aõkõ inyboho ratximyhyreneny tahe ibutumy inydire roimyhỹrenenyre.

¹¹⁻¹² Tahe kaiboho ityhydỹdu seriòre mahãdu Oritxi hãwã-ki. Jiarỹboho heka kaa òbiti-my aõna aõnamy rarybemyhỹre. Kaiboho heka ijohona derarenenyre aõmybo rarybemyhỹrenenyre. Jiarỹboho heka aluurenenyre. ¹³ Kai wariòre wesemy adee rarybereri. Umy iwese jiarỹ aluure wese, kai waluurenenyre.

¹⁴ Boholabenyke warybereny-ò ityhydỹdukõdu mahãdu-wana aõmysỹdỹrenyõke. Timybo òbitinaõ heka aõbinaõ-wana raaõmysỹdỹke. Timybo heka loosõna bedeluru-wana ratxike? Aõkõre! Tiu wiwana rauriõtyhy. ¹⁵ Satanasi heka Kristu-wana raaõmysỹdỹnanyõtyhy. Ityydỹdu mahãdu wiwesehyyle raraykynykemy rỹira. Ityhydỹdukõdu mahãdu-wana tahe wiraykyweseke aõkõre. ¹⁶ Deuxu aõmysỹdỹna heka iwitxi rare, suritxoo aõmydỹnana-ribi, wahe. Kaiboho heka Deuxu dohodỹna ijoimy toite Deuxu oworeny-ki ratximyhỹre. Deuxule heka kawesemy rarybere: —Jiarỹ heka wasỹ ariwinykre ayreneny-ki. Jiarỹ iDeuxumy aronykre tiiboho waijoimy. Rorokurenkykre. Tai tahe Inynyrỹ rarybere wiribi bihitxinyke. Inybina-ribi bexihitxinybenyke.

¹⁷ Bexiebennyke òbitikõre-ribi wahe. Uritere tamy adi rexihumy, ixieryta aramyrenkykre ixidee wariòre wese.

¹⁸ Warurutyhymy adee rarybere. Boomy heka adireny ararekre, jiarỹle wahe. Deuxu rurutere rare Jiarỹ.

7

1-2 Deuxu ibutumy tuu rarybere: –Kai ityhydÿÿdu waseriòre mahàdu. Tai tahe rikexiòbitinyke ibutu aõmydÿÿnana-ribi. Iny umyreny-ki rokobirenyke in-yumyrenny-ki. Òbitimy heka rakatxirenyke iko-ò, Deuxuko-ò. Aõma waluumy heka atximahãbenykemy rahõtinywãhãrenyre. Iny-ò aõ bina bina rewinyõhyywãhãrenyre. ³ Tuhe kaa rarybere tahe ixityre anarybekre. Aluurenyre jiarÿboho ibutuhyle ratximyhÿre iny rummy ratximyhÿre hãre tasÿ rukurenykre tulekre. ⁴ Wadee heka awire ibutumy kaiboho ratximyhÿrenyre. Kai aõwixira wixira wadeereny rÿira umy retyhynyreki. Isirare heka wadee kia ratximyhÿhãrele Wadeস্যত্ৰহুম্য heka watxiwãhãre, wiòhedÿÿtyhy òraru-ki, ijyy òraru-ki.

⁵ Jiarÿboho retehemynyre Macedonia bede. Taita tule elehynaõhyyre wadereny. Ibutumy heka aõna aõna, òta òta wixira wixira; bede bede ihyy my aõkõre rÿire tai. Aõma bedewonihikÿ heka watelesõreny-ò ralore. ⁶⁻⁷ Deuxu riwawiòhenanyrenyre; Txitu diteònyde wadeereny. Tii rybereny heka awiremy kaiboho. Tai tahe reysarenyre jiarÿboho. Kaiboho tabedewomy atxitenyteri waòraru-ki. Katahe wadeysa nihikÿmy watxireri. ⁸ Adeereny warybetyriti rewahinyreki tabedewomy atxitenyte. Tai tahe reysamy watxireri. Ihãrele heka tyyriti adeereny arawahinykre. Kaiboho heka tabedewotenyte iribi tahe aõmydÿÿna kaiboho tewixiranytenyte teòbitinytenyte ibutumy. ⁹ Tai tahe jiarÿ reysamy watxireri. Aõbinare dori rewinykõre arawiòhenyrenyre heka. ¹⁰⁻¹¹ Deuxu heka iny ribedeòtiidÿÿnymyhÿre iny ywimy riraykydÿÿnykemy. Kia kidiwymyhÿke inydee tarasana wahe. Tii heka awire. Ijõ bedeòtiidÿÿ tahe bede ludu bede òtiidÿÿ. Kia tahe rubu diwymyhÿde. Kaiboho heka tabedeòtiidÿÿnymyhÿtenyte. Deuxu heka kia riwinyre awiòhedÿÿnamy aõma kaiboho awirenyre. Aõ wixira wixira sõwemy akireny rÿireri, aõ òta òtareny. Kiadile tahe aõma òbitihyy my òhò ayreny-ribi kaiboho heka taykarananytenyte. Kaiboho heka waluudumy teletenyte. Kaiboho biwinybenykemy aõbo òbitimy ratximyhÿre iwidÿÿmy tarotenyte. Ibutumy heka òbitihyy my rarekemy idi tetehetenyte. ¹² Tai kia tyyriti adeereny rewahinyre. Aõ kia rewinyre heka aõ iny iòrarudikekile aõkõre rewinyre. Idi aretehekemy heka. Kaiboho waluurenytyhyre aõbo òraru-ki wahe. ¹³ Tai heka wadeysamy watxiwãhãre. Aõ inyboho sohojile aõkõre teysa ratximyhÿrenyre. Txitu tule teysamy ihÿmyhÿre, kaiboho tawiòhenanyteki ¹⁴ Tu heka rarybere adeereny kaiboho dori awimy tai tahatenyta

awityhy. Adeereny heka inatyhyhy rarybemahãreny, inatyhynamy. Tule mobo rarybere Txixu-ò. Ka tahe inatyhy rarybemy ratximyhÿre. ¹⁵ Tai heka Txitu kia luuna heka aõnityhymy akireny rare. Itxi heka tõhõti akireny aõma Deuxu tetyhynmahãte-txi. Kaiboho tedytenyteki. Ihãrele urihimyò ruberumy ratximyhÿ. ¹⁶ Reerymahãre jiarÿ kaiboho òbitimy boibekre. Tai wadeysamy watzireri.

8

¹ Deuxu ruxetòena-ki heka sõwemy riwinyre Macedonia dohodÿÿna mahãduy-ki wahe. Jiarÿ tuu arelyykemy idi watzireri waseriòreboho. ² Sõwemy heka iaõna aõnareny iaõtaòtarenyre tiiboho. Aõhõkÿmy rotÿÿnyreri tiiboho. Ihãrele ka deysamy heka relereny. Reysareny heka. Tiiboho heka iaõkõreny. Aõhohomy aõkõ heka roiremyhÿ. Kiahãrele heka sõwemy riwahinyre tamahãdu wiòhedÿÿmy. ³⁻⁵ Riwahinyre heka sõwemy ixideewimy. Sõwemy riwahinykelemy wadee rarybere. Tiiboho heka sõwemy wiòhedÿÿmy rurumy roiremyhÿ. Tai inyboho ribedeòtiinyre sõwereki. Kia judea bede, dohodÿÿna mahãdu, kia wiòhedÿÿmy. Juhu heka tiiboho rexiwahinyreny Inynyrÿreny-ò. Tule Deuxu deewina inydee riwahinyre. Iny wiòhedÿÿnarenymy rexiwahinyre. ⁶ Tai tahe jiarÿ rarybereri Txitu-ò: —Kai biwiòhenanykemy iaõmydÿÿnareny-ò. ⁷ Kaiboho heka sõwemy tetyhynyteri. Kaiboho heka Deuxumy awimy tarybemyhÿteny. Kaiboho heka teeryteny Deuxu aõmydÿÿnana. Kiaboho heka waluureny waluuurenymy boibeke wawiòhedÿÿdureny. Biwawiòhenanybenyke. Tai heka sõwemy bexiòlòdÿÿnybenyke adireny watzireri. ⁸ Aõ bede ywinaõ heka adeereny rewahinyòhyreri. Arierykemy heka idi watzireri timybo aluuna ratximyhÿremy. Tii riteòsiny heka timybo ijò dowiòhedÿÿmyhÿdemy. Tai tahe iwese tii rotÿÿnyre wese kaiboho tule botÿÿnykre. ⁹ Deuxu ruxetòena teeryteny, Jesuisi Kristu ruxetòena wahe. Tii heka ityhy rare. Tii rikòdÿÿnyre heka aõrarureny-ki. ¹⁰ Taihyky tetyhynyteny Deuxu aõmydÿÿnana-di. Kiamy heka raraykynyneri. Arawiòhenanykemy heka adireny rahõtinyre kanau bedeu. Tewiòhenanyteny inatyhymy. Tai tahe biconananybenyke kia kanau bedeu tewinyteny heka biconananybenyke. ¹¹ Aõma ireiõno, uriõno biwahinybenykeki, Deuxu heka rimyke. Kia-di rõhõtinyke. ¹² Kia uriõnomy idi teywiny atxiteri-di rõhõtinyke. Tamy wahidÿÿmy aõkõhyykeki tahe Deuxu aõma raraykynyòtyhy. ¹³⁻¹⁴ Jiarÿ heka isiramy adee ariwinyòtyhy aõ. Kaiboho heka sõwemy kaa wiji toite, Tai tawowi-di inyò ròõkeki, taaõnasõwe myna Deuxu-ò

riwahinykre. Iaõkõkeki tai ibinamy Deuxu rahaõtyhy. Tai biwiòhenanybenyke heka ihoõmy rỹira mahãdu. Jiarỹ heka aõ retòenyneri aõkõ rare, biwahinybenykemy. Kai ihoõmy atxikeki tahe, tule inywitxira anawiòhenanykre. Taita wiwanale wiwesehyyle ròhònykre. ¹⁵ Kiamy heka Tyyriti-ki Ritidỹỹna roire: –Hãbuõ heka sòwemy ributunyre. Tahe aõhe rauhenyõhyyre tamy kia ibutuna-ribi wahe. Ijõ tahe ibutelemy ributunyre hãbuõ wahe. Tiile heka aõ tamy rasiranyõhyyre.

¹⁶ Txitu awiòhedỹỹrenymy rurumyhỹre iwese awiòhedỹỹrenymy rurumyhãre wesele wahe. Deuxumy realãre tai, Deuxu dori tuu rotỹỹnyre. ¹⁷ Taita ixinamy arorarenymy rehemynykremy. ¹⁸ Riwiòhenanyrenyreri iwitxira seriòreõ. Ibutumy dohodỹỹna mahãdu-ribi tii rityhynymyhỹre aõma Rybewihikỹ-di ritỹnynymyhỹre awimy. ¹⁹ Dohodỹỹna mahãdu rihitxinyre wawana kanakemy. Ibutumy Inynyrỹ loosòna heka tuu ratximyhỹre. Tule riteòsinymyhỹre ibutumy iny rikiwiòhenanymyhỹrenykemy. Tai heka inyseriòreneny reteònyrenyreri ityhydỹỹdu mahãdu. ²⁰ Tai inyõ kia nierumy inyõ rarybeõtyhy. ²¹ Òbityhylemy rikiwinyrenyke ibuturu-ò. ²² Ijõ tii-wana rake. Reurihirenyre heka tii wiòhedỹỹmy rakeò, tai heka tii wiòhedỹỹmy ratxireri. ²³ Txitu heka waliina rare; wawana raaõmysỹdỹỹnymyhỹre heka rare. Jiarỹboho heka awiòhedỹỹrenymy rarumahãrenyre. Ijõ seriòrenenyõ nade dohodỹỹna-ò wiòhedỹỹmy. Tai kaiboho wowydyna tamy biwahinybenyke. ²⁴ Tai tahe dohodỹỹna mahãdu kaki rierykre. Tai rityhynyrenykre aõmybo umyreny rarybere. Tule wiluumy atxiteri.

9

¹ Reerywãhãre jiarỹ wiòhedỹỹmy tarumahãtenyete Judeia bedeki. Tahe kiamy aõ aõkõ ariritinykre. ² Reerywãhãre timybo akireny rare. Jiarỹboho heka awimy raryberenyre umyreny Macedonia hãwã mahãdu-ò. Myheka rarybere: –Akaia bedeki seriòre mahãdu wiòhedỹỹmy rexiywinymy ratximahãrenyre kau beòrau. Tai tiiboho rexideysananyrenyre. ³ Tai heka kaa seriòre mahãdu reteònyneri. Tai heka awikre biwiòhenanybenykre dori. Kiamy iwese rarybereri heka inatyhy rare. ⁴ Araixỹrukre heka jiarỹ aõma bexiywinybenyõlemy wiòhedỹỹna-ò atxibenykre-wana. Tule kaiboho maixỹrubenyke. ⁵ Tai heka inyseriòreneny reteònyre akorenymy. Tahe iu arehemynykreu, bexiywinybenyke. Biwahinybenyke wiòhedỹỹmy atxitenyteri ixideewimy. Aõ jiarỹ adeereny rexitòenyneri aõkõ wiòhedỹỹmy.

⁶ Kia hãbu ibutemy ròbòròmhyhÿre heka ibutelemy tamy aõna aõna ruhunykre. Kia hãbu sòwemy ribrònymyhyhÿre tahe tamy sÿ sòwemy aõna aõna ruhunymyhyhÿre tamy riwahinykre bederaty aõmydÿÿnana. ⁷ Tai heka iny sohoji sohoji ixideewimy tiwesebo riwahinymyhyhÿke. Riwahinyòke tahe aõ tuu rurukòreri urenana tuu ratxike. Deuxu dee riwahinymyhyhÿke mahãdu deysana-di riwahinymyhyhÿre kia iny mahãdu Deuxu tuure. ⁸ Deuxu heka riwahinymyhyhÿre sòwemy aõmybo tarumahãte kia inydeereny iratyre. Ibutumy aõmybo tarumahãte heka tule iny wixira biwiòhenanybenyke. ⁹ Kiamy Ritidÿÿna-ki roire: –Tii tawowi-di iaòkò mahãdu-ò. Ròwahimyhÿre. Kia tahe iinydee wobrona tiemy rosaõmy rarekre. Deuxu heka riwahinymyhyhÿre tibo alòbòròdu-ò. ¹⁰ Inydee riwahinymyhyhÿre paõ iny rirÿsÿke. Tahe tule sohoji sohoji òwòrutumy rurumyhyhÿre heka tamy riwahinymyhyhÿre. Kia ribòrònymyhyhÿre tahe Deuxule ritxuhudÿÿmyhyhÿre. Tahe sòwemy bitakre Deuxu-ribi. ¹¹ Kia rimymyhyhÿre mahãdu tahe Deuxumy reàlàmyhyhÿre. Kia tewinymahãte heka Deuxudeewimy tewiòhenanymahãte. Deuxu heka sòwemy rimymyhyhÿre ealànareny iòraru-ki. ¹² Kaiboho heka Deuxu mahãdu teriwiòhenanytenyete. Kia sohojile aòkò. Tule aòraru-ki tiiboho Deuxu-ò wowydyna sòwemy riwahinyrenyke. ¹³ Kaiboho Rybewihikÿ tÿmyra tetyhynytenyteri, Kia ibutumy rierymyhyhÿre kaiboho dori uriòno tewiòhenanytenyete, tai iny wowydyna Deuxu-ò riwahinykre. ¹⁴ Adee rexitòenykre aluumy heka relekre Deuxu adee ruxetòena riwahinyreki. ¹⁵ Deuxu-ò wowydyna iny-ribi kanakemy heka idi watzireri. Wahidÿÿna wihikÿ dori Deuxu inydeereny riwawahinyre.

10

¹ Jiarÿ Paulo heka aõmybo adeereny arexitòenykre. Aõherekibo tamy tarabemahãtenyete awanareny watxiwãhãu urihimyòle watyhyna watzirerimy wamy tarybemahãtenyete. Jiarÿ heka awana rybetere-di rarybeòmahãre awanareny watzireri wana. Tiu rareu, taheka ròritidÿÿre rybetere-di wahe. ² Ròhòtinywãhãre. Rexitòenyre. Awi heka rare. Ywina-di iny risÿnymyhyhÿre. Inyò wamyreny ibinamy rarybekeki tahe tule ararybeke heka. ³ Inatyhymy kabede-ki inyboho rasÿnymyhyhÿreny. Rakaaòbinanykeki, inyumyreny aòbinana wesemy rare. Tebònadirenyre. ⁴ Tebònadirenyre. Aõ kabedemy iny rÿira kia debòna wese aòkò kÿny. Deuxu debòna heka rÿira irurule heka rare. ⁵ Inyò aòbinamy Deuxumy rarybemyhyhÿkeki, tai tahe kia wadebònareny remymy resewãhãrenyre kia ixãwididÿÿnamy wahe. Ibutumy Deuxu òludumy ratximyhyhÿre heka remywãhãrenyre Deuxu

rierykemy Kristu rityhynkemy wahe. Kaiboho heka ibutumy tetyhynmahātenyete. ⁶ Kaiboho biatybenykeki, tahe, rexihuhyymy r̄ymyh̄re aōhōk̄my d̄ȳnana-ò. ⁷ Kaiboho heka tetehemahātenyete aōna aōna-ò ahana-ribi wesele wahe. Inyōraraykynykeki ratximyh̄reny ixinamy tuu raraykynyke. Jiar̄yboho heka tule Kristu mahādu hōrō iny ratxirenyreri. ⁸⁻⁹ Deuxu heka ruruō wadee diwahinyde arawiōhenanykemy tai raixruōmyh̄re. Tai heka abrebud̄ȳrenymy aōbo kariti rewinyre. Urile tahe aumyd̄ȳreny adireny rewis̄ȳnwāhāre aō bede arāatyremy aōkō. ¹⁰⁻¹¹ Ityyriti rybetere heka ribrebud̄ȳ tahe rehemynyreu heka tii aōkō rybetere-di rarybemyh̄re. Awityhymy aōkō rarybemyh̄re riritinyreu. Iwese rōritid̄ȳre wesemy aōkō rarybere. Iu adehemynykreu tahe, iwese rōritid̄ȳre wesele heka anarybekre. ¹² Iny tai ratximyh̄re heka sōwemy ixidi rōhōtinymyh̄re tii awiremy. Kia tahe watximyh̄reny kia raryberenyōtyhy. Tii dori raitx̄ytemy ratximyh̄. ¹³ Aōmy iximy rarybemyh̄re dori tii awimy iximy rarybemyh̄re heka urile tuu raraykynymyh̄. Timybo Deuxu inydee raryberele rikiraōmyh̄ke. Kiawesele inydeereny awire. ¹⁴ Iaōmys̄d̄ȳna heka timybo rikiwinyrenykele iny riijemyh̄reny. Juhu heka Rybe t̄myra wihik̄ heka adeereny adiwykemy idi watxiwāhāre. Rewyreny heka juhū Rybe t̄myra wihik̄ adeereny rewyre. Tai heka tuu raryberenyōhymahāreny timybo iny witxira aōmys̄d̄ȳna riwinymyh̄reny. ¹⁵ Kaiboho heka aityhyd̄ȳnareny raumynykre. Tii heka wadeereny awire. Jiar̄yboho heka aōmys̄d̄ȳna wihik̄ sōwemy ariwinyrenykele watxirenyreri ayreny-ki, Deuxudeewireki. ¹⁶ Idi tahe arōirenykre rybe-di arit̄ȳnynyrenykre iōbede-ò, Rybe t̄myra wihik̄-di wahe. Aōmy ararybeōtyhy aaōmys̄d̄ȳnareny iwitxira rewinyremy. Kiamy heka Ritid̄ȳna-ki roire: ¹⁷ — Urile tuu rybe r̄yike Inynyr̄ timybo riwinyrelemy. ¹⁸ Iny ixidi rōhōtinymyh̄re tii awireny. Tahe awi aōkō rare Deuxu-ò. Deuxu tahe awimy tai rahamyh̄re tii idile rōhōtinymyh̄reki.

11

¹ Jiar̄y òsana urihimyo raitx̄ytemahāremy kaiboho wawana tōiterimy ixi-di atxitenyteri. Ihārele taheka urihimyo reōludunymahāre. Jiar̄y heka okorenyre iwese Deuxu ratximyh̄re wesele. ² Ywimy atximahābeny adireny watxireri. Kaiboho iwese ijadōma hābumy roikre wese toite. Hābu heka Kristu rare. ³ Jiar̄yboho raberuwāhāreny kaiboho Kristu-wana atximahābenyke lau wahe. Iwese Eva hemylala riitxenanyre wese wahe.

4 Inyõ kanakeki rõhãletedỹmy Jesuisi witxiramy. Tahe kaiboho bityhynybenykekile jiarỹ heka raberumahãre. 5 Ijõ dori ritỹnynymyhỹre iwese inyboho ritỹnynymyhỹreny wese aõkõ iwitxiramy. 6 Kaiboho heka tahõtinyinmahãtenyete tỹnydỹdu wihikỹmy inykireny ratximyhỹre. Tahe awiremy idi tahõtinyinmahãtenyete. Tai iwesele inyboho roire awi heka roire. 7 Tahe iwese tii awityhymy rarybemyhỹre wesemy aõkõ inyboho rarybemyhỹreny. Tahe iny rierymyhỹreny inyraykyreny-ki. Sõwemy heka tuu adeereny rarybemahãreny. Iu jiarỹ rybe ritỹnynymy akireny rarewãhãu, kiau heka adeereny rexitõenyõhyre iõwydỹmy. Iyjamy heka ixidee reijenynyreny kaiboho bexiòlõnybenykemy. Teòsare òsana iwese rewinyre wese. 8 Ijõ dohodỹna mahãduõ heka riwaòwynyrene adeereny aritỹnynyrenykemy. Iwese iribi rawasinyre wesemy heka rahõtinyre. 9 Iu akireny rybe-di tỹnydỹmy rarewãhãu tiu rexitõenyõhyre adeereny biwawiòhenanykemy. Macedonia hãwã-ribe dori ityhydỹdu, mahãdu seriòreõ aõmybo raruwãhãre wadee diwyde. Tiu heka aõ aribireny aritaõtyhy. Tuu rarehy wese heka wiji rarekre. 10 Kristu inatyhynamy wadee rarybereri kia wese tule ararybekre ibutumy Akaia hãwã hãwã-ki. 11 Jiarỹ heka aluunihikỹreny. Taile heka tuu rarybewãhãre Deuxule rieryre. 12 Kia rybe tỹnydỹdu heka iwese rewinywãhãreny wesele rõwidỹmyhỹre. Kia heka rewinywãhãreny heka kia rarybereri heka aõ wiribi lahitxi aõkõmy rarybereri. 13 Kahãbu heka inatyhy Deuxu deòdỹna aõkõ ratximyhỹre. Ruile heka iaõmysdỹna-ki rõhõnymyhỹre. Rexitỹnykemy Kristu deòdỹna mahãdu-ò. 14 Tahe aõkõre heka Satanasi tule rexiwitxiranymyhỹre. Ýju wesemy tii rexideòsinymyhỹre. Kia hãbu teòdu rare. Tai heka irehemy iribi rexiijaranyre òbiti deòdu mahãdu ratxireriki wahe. 15 Urile tuu iny idi rõhõtinkyelemy heka tuu ratxirerimy ihỹre. Tahe aõkõre. Ikonanau tahe aõhõkỹmy dỹnana ritarenykre aõbo riwinynehỹre òraru-ki.

16 Ixityre tuu ararybekre. Inyõ raykykõmy jiarỹ itxỹte raremy. Ararybekre heka waaõmydỹnanarenymy. 17 Teramy ijirarenyõmyke aõmybo ararybekre. Deuxu dori tuu arybedỹ-ò riwaijõnomy, tai heka rarybere itxỹte wesele watximahãremy. 18 Kaiboho heka taholamahãtenyete itxỹte mahãdu-ò. Katahe bodoholabedenykre aõmybo ararybekre. 19 Inyõ kedehemynykeki kaa biwinybenykre. Tahe tewinyamahãtenyete aõna aõnamy aõkõ wahe. 20 Inyõ araitxenanyrenykeki uritere aõmydỹrenyõmy tamy. Jiarỹ heka ariwinyõtyhy tuu, wadee awiõre. 21 Ijõ rarybemyhỹre inyõ. Tule jiarỹ ararybekre. Itxỹte wesemy ratximyhỹremy.

²² Tii heka Hebreu mahādumy tii rexininire. Jiarỹ tule kia tuu rare. Ijaò mahādumy heka tiiboho rexininirenyre. Jiarỹ tule. Abraõ riokoremy rarybemyhỹre. Jiarỹ tuleri. ²³ Kristu deòdumy heka tii rexininimyhỹre. Rarybemahãre itxỹte wesemy. Jiarỹ heka iratyre deòduwimy watxiwãhãre. Jiarỹ raaõmysỹdỹỹ nihikỹre. Ròtenawo-ò riwarutyrenyire iratyre. Riwhatenyrenyire iratyre. Arurure inihe iratyre. ²⁴ Judeu mahãdu heka 39 hetenamy wamy raòhòtere iruyre sòwemy wahe. ²⁵ Roma mahãdu tasỹ inataõmy riwhatenyire. Sohoji ta mana-di watyre rihure. IjõtXu heka hãwoninihikỹ heka riorore. AõutXu heka bera-ki rãire ruu ibutumy txuu tule ibutumy rehure. ²⁶ Ibutumy reamy rarewãhã aõma wasidu bedede aõmydỹỹnanamy bera-ki tule arurure inihe. Judeu mahãdu warubudỹỹmy wadi riwisỹnyre. Tule judeukõdu mahãdu tulere. Hãwãhãkỹ-ki brebunatyhymy watxiwãhã, bedede rahy-ki tule, ahohokỹ-ki tule. Waliinaõ inatyhy aõkõ tai ihỹmyhỹ. Tai heka riwaitxenanyrenyire. ²⁷ Aõmysỹdỹỹ nihikỹ tai. Tỹikõhyky heka bedede reijemy rarewãhã. Rama riwasare; bemy rarowãhãre. Timy heka tỹinatykyõ ihoõhykyre sòwemy wahe. ²⁸ Tai tahe rahõtinyre ibutu dohodỹỹna mahãdu-di. ²⁹ Urihimyòle taruru-di ratxireri wana jiarỹ tule iheki waruruhohomy aõkõ relemahãre. ³⁰ Inyõ raòrarunymyhỹre wana jiarỹ rabadewowãhãre iòraru-ki. Jiarỹ rexideòsinywãhãre waaõkõre urityhywãhãre. ³¹ Deuxu Jesuisi Kristu tyby dori riwaerymyhỹre aõu aõu heka iny rakanihikỹnykre. ³² Iu Damasu hãwã-ki rarewãhãu, Iòlò Areta bedede dinodu heka riwamymy riwateònyre. riwamykemy hãwãhakỹry ijò-ò. ³³ Weriri nihikỹwomy riwawòmny riwatidire, Walina mahãdu. Tahe heto raroo-ribi riwaatyre hãwã ahana-ò. Tai tahe rahenyre iribi.

12

¹ Jiarỹ heka ararybekemy watxireri. Aõ aõkõ rarehãrele heka ararybekemy watxireri. Wiòhedỹỹna aõkõ heka rare. Wanyrỹ wadee riwhinyre aõna aõnamy heka rabire rasina wese jiarỹ sohojile wahe. Kiamy heka arelyykyre wiji. ²⁻³ Tahe 14 beòramy heka Deuxu ityhydỹỹduõ ridyre biu-ò tasỹ-ò wahe. Deuxule rierymyhỹre inatyhy aõbo rare ada aõkõre aõbo. ⁴ Kahãbu Deuxu-ribi heka rybeõkemy roholare. Tahe rarybeõtyhy. ⁵ Iximy tahe ararybeõkre kia wadeysarehãre. Waaõhõkỹmy dỹỹnanadile areysakre. ⁶ Urile ararybekre timybo releremy. Taile tahe iny tuu rarybekre. Tuheka rabire sòwemy aõwiihikỹmy. Jiarỹ awiremy iny wamy raraykynyheny. ⁷ Tahe Satanasi aõbinana witxirahakỹbo wadee riwhinyre. Ixidi arõhõtinyòkre. Jiarỹ aõwiihikỹ jiarỹ

raremy wahe. Araraykynyõkemy. ⁸ Inataõmy heka Inynyrỹ-ò rexitõdenyre kiamy waribi ritakemy. ⁹ Tii wadee rarybere: – Waruxetõenale heka adee awire. Aõbo kai taaõkõteu heka waruru adee rewahinyre. – Tai tahe jiarỹ reysare, waaõkõreu wahe. ¹⁰ Tahe awire, waõkõna, warurukõna, ibutumy wadee awire. Kristu òraru-ki heka tuure. Tiubo ibinamy wamy riwinykreu warurukõkreu, warurudikre.

¹¹ Rarybere heka hãbu itxỹte wesele heka rarybereri. Kai-boho iõrarureny-ki heka kia wesemy rarybereri. Inatyhymy heka jiarỹ kia rybe tỹnydỹỹdu mahãdu bina ratyrewatxiwãhãre. Ayreny-ki rarewãhãu heka teerytenyete. ¹² Aõna aõna wiwihikỹ, deytenu wihikỹ, bedeõtiidỹỹna ayreny-ki rewinyre kia Kristu deõdumy watximyhỹreki wahe. ¹³ Rybe tỹnydỹỹ òwyõ heka aribireny retaõhyre.

¹⁴ Ihewoludu txu tahe aroramy arakemy ixidi watxireri. Inataõmy reywinyra aroramy arakremy wahe. Aribi nieruõ aritaõtyhy. Urile arawiõhenanyrenykremy adireny watxireri. Uladu riki heka tyby riyrubunyõtyhy. Tyby tahe uladu riyrubunymyhỹre. ¹⁵ Ibutumy idi watxireri heka arahukre arawiõhenanyrenykremy. Adeereny wylemy arihukre. Jiarỹ heka aluurenyre. Kaiboho aõbo tule waluurenykre? ¹⁶ Waõraru-ki heka adee isiraõkre heka. Ihãrele tahe inybina wamy rarybemyhỹre: – Tii itxenadỹỹdu rare. ¹⁷ Wamahãdu tule aribireny ritaõtyhy ijõ. ¹⁸ Txitu reteõnyrajõ ityhydỹỹdu seriõreõ-wana. Tii aõbo aõ aribireny ritare? Aõkõre. Txitu wawesele heka tii rare.

¹⁹ Taõmysỹdỹỹna heka awiõhedỹỹnarenymy rare. Aõ wadi jiarỹ awiremy nohõtirenõmy tuheka rarybereri adeereny. Deuxu, Kristudeewinamy heka tuu adeereny rarybereri heka. Deuxu kotxi heka adeereny rarybereri awiõhedỹỹrenymy. ²⁰ Raberumahãre heka arehemynykreu, iwitxiramy atxibenybeke lau. Tule wadi iwitxiramy betehibenyke ixiweserenymy aõkõ. Ihãru, adebure. Aõkemy watxireri. Iny aõbina binamy wimy rarybemyhỹre. Iny ixidile rõhõtinererimy ihỹre mahãdu. Kia aroholakeki tahe wadee awiõre. Riyrubunymyhỹre. Riyrubunyõhyymyhỹre. ²¹ Raberuwãhãre heka arahinykre heka akotxireny iõhãru òraru-ki. Aõna aõna witxira witxira òta òtamy rõhõtinyrehỹre, raraykynymyhỹre. Sõwemy heka riwinyre ta ixi-txi tõhõti reaõhyymyhỹre kia riwinyretxi.

13

¹ Tahe ikonana txu roraludu heka jiarỹ rare. Inyõ aõbina binamy wimy rarybemyhỹreki waribi ihitxihitximy heka tuu rarybemyhỹre. Iny rimymyhỹre heka tuu robimyhỹre; tuu rarybemyhỹre. Wiweselemy heka tuu rarybekre.

² Iny iòrarudimy r̃yikre-wana, ibutumy heka aõhõk̃my rot̃ỹnykre arehemynykreu. ³ Aõmy Kristu rybemy heka rarybekre. Tai bierybenykre. Aõmy warurud̃ỹdure heka bierybenykre Kristu wahe. ⁴ Kristu heka itxeò-ki rurure irururenyõ wahe. Jiar̃ỹ warurunarenykõ òraru-ki. Tahe Deuxu ratximyh̃re, iruruna-di. Tii-wana heka inyboho heka ratximyh̃renyire iruruõmy. Tai awanarenyle watzireri, tahe tii-wana Deuxu ruruna-wana watzireri. ⁵ Ixi-di heka betehebennyke. Bexiurhibennyke tyhyna-di atxitenyterimy. Jesuisi Kristu awo-ki ratzireri. ⁶ Kia terytenytemy, inatyhy. Tahe jiar̃ỹboho inatyhymy aõna aõna riijerenyre. Kia aõbo teerytenyte. ⁷ Jiar̃ỹboho rexitòenyrenywãhãrenyire. Òraruna wid̃ỹrenyõmykemy. Kaiboho aõwiwi biwinybenyke. Kia òbitimy watzimyh̃renyireki aõkõ, kiemy òbitimy boibenykemy. ⁸ Aõbo heka inatyhyna wiòhed̃ỹnale rikiwinyrenyke. ⁹ Kaiboho arurudimy atxitenyteri-wana heka, jiar̃ỹboho warurudimy watziwãhãrenyire, kia wadeereny awi rare. Rexitòenymahãrenyire kaiboho òbitimy matxibenybekemy, ywimy ahãbenykemy. ¹⁰ Tai heka adeereny ratyryritinyreri kiamy. Aribireny irehemy watziwãhãre taheka arawiòhenanyrenyke. Arehemynykreu tahe timy heka aõhõk̃myd̃ỹnanamy arõhõt̃inyõtyhy, kia waaõmys̃d̃ỹna rare. Inynyr̃ dori iny wiòhed̃ỹnarenymy nade. Iny aõhõk̃my d̃ỹnanamy aõkõ.

¹¹ Arakre tahe waseriòreboho. Idi biwis̃nybenyke ibutumy òbitimy biwinybenykemy. Warybe-ò heka boholabenyke. Wiwese weselemy maraykywydynanybenyke wiribihiximy aõkõ. Ywina-di matximahãbenyke. Deuxuluuna heka tule akireny ratzikre. ¹² Wii birybenymyh̃benyke ityhyd̃ỹdu seriòre mahãduõ tai wiluumy atximahãbenyke. ¹³ Ibutumy Deuxu ijoi mahãdu heka adee rybe riwehityhynanyreri. ¹⁴ Jesuisi Kristu Inynyr̃ ruxetòena heka akirenykemy watzireri. Deuxu luuna aki r̃yikre. Deuxu Tyytybytyhy awana r̃yikre.

Alatxia Paulo Tyyriti, Alatxia Mahãdu-ò

1 Jiarỹ Paulo, rybeõmy nodu rare. Inyõ riwateònyõhyyre. Jesuisi Kristule, Deuxu inytyby, Kristu ixixadỹỹdu-wana riwateònyre. 2 Jiarỹ ityhydỹỹdu seriòre-wana. Kaa watyyritireny rewahinyreri Alatxia bedeludu mahãdu-ò, ibutumy dohodỹỹna mahãdu-ò, ityhydỹỹdu mahãdu-ò wahe. 3 Ruxetòena ywina-wana adeeremy kanakemy idi watzireri Jesuisi Kristu-ribi, Deuxu inytybyreny-ribi. 4 Jesuisi rexiwahinyre iny òrarureny-ribi iny ritarenykemy. Wiji bede aõmydỹỹnabina-ribi iny ritarenykemy. Kia dori Deuxu-ò inytybydeewimy rare. 5 Tamy àlana aõu aõu kanawahimyhỹke.

6-7 Jiarỹ bede reòtiinyra, rybe witziraõ eleelemy tetyhynymahãteki. Rybewihikỹ witzira ihoõre. Juhuu Kristu taruxetòena-di bedebina-ribi aratarenyryre. Inyõ adee rare. Idi Deuxu Rybewihikỹ riwitziranykemy. Tai tahe atyhydỹỹna ribinadỹỹnyra. Tai tahe kiamy adee rarybera. 8 Inyõ aõbo, jiarỹ aõbo, ada biuludu ýju aõbo, adee Rybewihikỹ witziraõ rarybekeki, Deuxu kyarana tamy kedesekeki idi watzireri. Rybewihikỹ-ò juhu waribi taholatenyryte. Kia sohojile inatyhyre. 9 Iwese rarybere wese ixityre ararybekre. Inyõ Rybewihikỹ riwitziranykeki, aõmybo juhuu taholateny-ribi, Deuxu kyananamy resekre. 10 Deuxudeewimy taheka watzireri hãbudeewimy aõkõ. Jiarỹ hãbudeewimy aratximyhỹkeki Kristu deòdu aõkõ jiarỹ rare.

11 Aõmybo rarybemyhỹre hãbu-ribi rare. Kia Rybewihikỹ tyhy rare. Kia bierybenyke. 12 Kia tihãbuõ-ribi adoholaõhymahãde. Hãburybe-ki aõkõ reeryre Jesuisi Kristule dori kia riwaerynanyre. 13 Kaiboho taholatenyryte, iwese jiarỹ judeu mahãduy-ki raremahãu Iu Deuxu ityhydỹỹdu mahãdu aõbinamy rewinydỹỹnananyhỹre. Idi ariixãwididỹỹnykemy rarewãhã. 14 Wamahãduy-ki sówemy iratyre raremahã judeu mahãdu bede ywina ywidỹỹ-ki. Idi retyhynyhyymahãre wahona mahãdu ratyry, byrena erỹdỹỹna-ki. 15 Iribi tahe Deuxu riwamyry taruxetòena-ki. Ratohouãnyõlemy rareò juhu riwahitxinyry. 16 Wadee Deuxu tariòre riteòsinykremy ratximyhỹ judeukõdu mahãdu-ò tuu ararybekemy wadi ratximyhỹ. Iu inyõ dee aõmy rarybeõhyyre Jerusalẽ hãwã-ò raõhyyre. 17 Ròtyhydỹỹõmy raremahãu. Deuxu deòdỹỹna mahãdule rỹiramyhỹ. Ihãrele tahe tamy rybemy raõra. Iribi tahe rahònyra Arabia-ò. Idi tahe ixityrele adòòsede Damasu-ò.

¹⁸ Inataõ beòramy heka kowa-ki reijere. Idi tahe rare Jerusalẽ-ò Pedro roramy. Tahe bedede reijere waiyre txumy tai. ¹⁹ Ijõmy heka rabiõhyyre deòdỹỹna mahãduõmy. Txi-aulemy heka rabire, Kristu seriòremy. ²⁰ Ka heka watyyriti inatyhy rare. Deuxuko-txi inatyhy rare. ²¹ Idi Siria bedeo-ò rare, tule Silisia bedeo-ò. ²² Judeia bedede-ki Kristu dohodỹỹdu mahãdu wamy lobixidu aõkõ rỹira. ²³ Uritỹỹna roholamyhỹre: –Kia juhu inyhudurenymy inydireny raremyhỹ, wiji tahe tyhyna-di dobedeerydỹỹnananyhỹde. Juhu tahe tii tyhyna rahukemy riwisỹnyre. ²⁴ Kia ibutu òraru-ki tahe Deuxu-ò dealãmehỹde wamy, Paulo wahe.

2

¹ Waòinaubiòwa reurò beòra-di rexihureu, ixyby Jerusalẽ-ò ròòsere. Banabe, Txitu-wana redyre. ² Rawãhãre heka rasi wese-ki aõmybo rabireki. Retỹnynyre iny-ò iwese inywitxira-ò rarybemyhỹremy. Dohodỹỹdu mahãdu ratyre retare tamy rihitxinyre rarybekemy. Tuu arierykemy watzireri ywimy watxiwãhãremy. ³ Txitu wawana ihỹre, tii judeukõdu mahãduõ hãrele tahe itõtyky resymy rarybeõhyyrenyre. Tiiboho waki ibinamy rahaõhyyrenyre. ⁴ Idile rõhõtinyinmyhỹre ityhydỹỹdukõdu mahãdu. Tiiboho nalòdenyde waixãwididỹỹnarenen-ò retehekremy, iny Kristu-ki ijõdiwãhãre-ò. Tiiboho ixiwesemy iny-di risỹnykemy ratxirenyreri. Tiiboho ityhydỹỹdu wesemy rexisỹnynmyhỹre. ⁵ Tamy jiarỹboho raholarenỹõhyyamahãre inatyhymy Rybewihikỹ aribireny ritaõhyykemy. ⁶⁻⁹ Dohodỹỹdu mahãdu ratyre mahãdu heka Joaõ, Txiau, Pedro-wana rare. Tiiboho ibutu erysyna ratyre rỹiraki, kia aõ aõkõ wadee rare. Tiiboho aõ tỹmyra riwabedeerynyõre. Deuxu-ò tahe ibutumy iny wiwesehyy rare. Deuxu riwateònyrenyre judeukõdu mahãdu-ò Rybewihikỹ wahisidỹỹmy. Kia Joaõboho wiwesehyylemy widi rõhõtinyinre riwawehitynanyra jiarỹ Banabe-wana. Tai tahe iwese Pedro judeukõdu mahãdu-ò rare. Tiiboho tahe ritỹỹnynmyhỹke judeu mahãduòle wahe. ¹⁰ Urile riwatyhenyra iny aõkõdu mahãdu ariwiòhenanymahãkemy. Kia juhoo ariwinykemy watxiwãhãre.

¹¹⁻¹² Atxiòkia-ò Pedro rehemyhỹreu jiarỹ tuu rarybere timybo ibinamy riwinymy ihỹremy rexiitxenanyhỹreki. Hãbuõ Txiau-ribi rehemynyõrau, tii judeukõdu mahãdu-wana riroxire. Irahudi tahe dehemynydenydeu, riroxiõhyylymy rexitare. Judeu mahãdu rybe lau ruberure. ¹³ Ijõ judeu iwesele rotỹỹnyre. Ihewoludu Banabe tulere. ¹⁴ Tuu rabireu, õbitimy aõkõ Rybewihikỹ inatyhy wesemy aõkõ

rotÿÿnyny raremyhÿ tahe rarybere ibuturu-ò, Pedro-ò. Kai judeu mabekeki, tahe judeokõdu mahãdu wesemy tanabededÿÿnanamy ahãte. Uritere judeukõ mahãdu judeu mahãdu wesemy isÿdÿÿõmy. ¹⁵ Jiarÿboho tahe judeu mahãdumy reamahãrenyre. Judeukõ mahãdumy aõkõ watxiwãhãrenyre. ¹⁶ Iny bede ywidÿÿna aõkõ iny ritamy roire. Kia Kristu iny rityhynymyhÿrele iny ritamy roire. Bede ywina ywityhydÿÿna iny ritaõtyhy. ¹⁷ Iny Kristu-ki tarasana ritamy ratxikeki, tahe òrarudu tyhymy ronykeki, Kristu aõbo òraruna widÿÿna rare? Aõkõre. ¹⁸ Jiarÿ bede ywiny ywidÿÿna-ò aròðsekeki, òrarudumy ararekre. Kia jiarÿ idi ariatymy rÿimyhÿre ixityre ariwinykeki òrarudumy arareke. ¹⁹ Jiarÿ bede ywina rarumy rãire wese, Kristu-ò warumy ararekremy. Kristu-wana jiarÿ raitxeòkirubudÿÿnanamahãre. ²⁰ Jiarÿ ixidee warumy aõkõ wahãre. Kristu tahe wawo-ki riwarudÿÿnanamy ihÿre. Warumy watxireriwana Deuxu iriòretyhydÿÿna òrarukile warumy wãhãre. Tii waluumy ratximyhÿre. Tahe wadee rexiwahinyra. ²¹ Deuxu ruxetòedÿÿna aribynykemy aõkõ watxireri. Bede ywina tyhydÿÿna òraru-ki ywityhydÿÿna tahe inyõ ritakemy ratxireri. Kia-di inatyhymy inyõ rexitakeki tahe, Kristu uriòle rurure.

3

¹ Alaxia mahãdu timybo tahõtinyteri kaiboho òhõtibede-di rierykõrenyre. Kia-di òsana tahõtinyre. Moòwòru ijeranamy ahãtenyte. Jesuisi Kristu itxeò-ki rururedi taholatenytyhyta. Òhõtiri-ribi aõbo kia rosare. ² Kiale arierykemy watxireri timybo tahõtinytenyteri: Deuxu Tyytybytyhy temytenyta bede ywina widÿÿnamy aõbo ada inatyhyna tyhydÿÿnamy aõbo. ³ Juhu urile tetyhynytenyte idi ixiumykile tadexityhynyny ahãtenyte, bede ywina ywisidÿÿna wahe. ⁴ Kaiboho òbitimy tahõtinyõtenyte. Kia aõbo aõhõkÿmy tatÿÿnytenyte uriòhyyòle? ⁵⁻⁶ Aõkõre, uriòkele aõkõre òsana tahõtinyteri. Deuxu Tattytybytyhy adeereny diwahinyde. Kia aõbo riwinyre bede ywina ywisidÿÿ kaiboho tamahãtenyteki? Aõkõre, tetyhynymahãteki kia riwinyre. Deuxu aõna aõna wiwihikÿ akoreny-ki riwinyre. Kia sohojile iny ritake. Abraõ Deuxu rityhynyre. Tai tahe tamy òbitimy rare Deuxu-ò, iòraru iribi riixãwididÿÿnyraki. ⁷ Tai ibutumy rityhynymyhÿre mahãdu Abraõ riòremy rÿira. ⁸ Tyyriti-ki roimyhÿre kia: —Deuxu heka judeu mahãdu sohojile aõkõ riòbitinykre. Ibutumy iny riòbitinykre ityhydÿÿ erysydÿÿna òraru-ki. Rybewihikÿ erysyna Abraõ-ò juhoo dehemynyde. Kia wese Tyyriti doide: —Aòraru-ki ibutumy iny-ò deysana kanakre. ⁹ Tahe ityhydÿÿdu mahãdu Abraõ

wesemy teysare. Abraõ dori ityhydỹdu rare. ¹⁰ Inyõ bedede ywina rityhynyõkeki, Deuxu txuhòbina kedeake. Jesuisi-ò tyhynale iny kiditakre. Kia Tyyritidỹna dori roire: —Inyõ ibutumy bedede ywina riywinyõkeki, tamy Deuxu txuhòbina kedealeke. ¹¹ Òbiti mahãdu rityhynomy ronykre. Kia riki Ritidỹna roire. Tahe bedede ywina heka inyboho aõkõ riòbitidỹnyre. ¹² Bedede ywina heka iwitxi rare ityhyna-ribi. Tahe inyõ bedede ywina rityhynomy ratxikeki, tii ibutumy rityhynomy rarehyyke. ¹³ Inyboho Deuxu bedede ywina rikiywinyrenyõkeki, Deuxu txuhòbina inydeereny kedeakre. Kristu tahe kia-ribi iny ritare. Tule inyòwòruna òraru-ki rexilamadỹnyre inydee iòwydỹna-ki. Beteheke Tyyritidỹna roire: —Inyõ òwòru itxeò-ki ritamadỹnykeki, tamy txuhòbina kedealekre. ¹⁴ Deuxu narybedede heka Tatytybytyhy iny-ò riwahinykemy. Wiji tahe inyõ rityhynykeki, Deuxu Tyytybytyhy ritakre. Tai Abraõ deysana inydeereny rehemynyre Jesuisi Kristu òraru-ki.

¹⁵ Waseriòreboho, jiarỹ hãbu wesemy ararybekre. Iny inatxi jurasadỹna ritina riwinykeki, inireny ritidikeki, inyõ riwitxiranyòtyhy. Tai ijõ wixira riritinyòtyhy. ¹⁶ Boholabenyke, Deuxu juhuhu Abraõ dee narybede: —Abraõ riòre hewoluduõ Kristumy. Abraõ riòre sòwe dee rarybeõre. Sohojideele rarybere. Tahe tariòre-ò Kristumy rarybere. ¹⁷ Tuheka rarybereri: —Deuxu juradỹna wese juhuhu rarybere, 430 beòra bedede rỹire idi tahe bedede ywina nade. Kia Deuxu juradỹna riixãwidinyòtyhy. ¹⁸ Tarasany bedede ywinawidỹna òraru-ki kidiwahinykeki, wahisidỹna aõkõ heka rare. Tai Deuxu heka Abraõ-ò jurasadỹna riwahinyre. Iòwydimy aõkõ juhuhu dori rarybere tii kidiwahinykemy. ¹⁹ Aõherekibo heka nade? Kia nade òraruna òraru-ki Kristu nadeule kỹny juhu ludu wese aõkõ roire. Kristu heka Deuxu deòdỹna rare. Iwese Deuxu rarybere wese riwahinyre. Tii Abraõ riòre riòre-ribihyy reare. Ýjumy bedede ywina nade. Iny itya ludu debò-ki rehemynyra. Moisesi iwahidỹdure. ²⁰ Boholake, Moisesi sohojile aõkõ itya ludu ratxireri bedede ywina riwahinyreu. Deuxu tahe sohojile rare irybe riwahinyreu. ²¹ Bedede ywina aõbo Deuxu jurasadỹna riixãwidinyke? Aõkõre. Bedede ywina umy ituedeõna riwahinykeki, òbitidỹna inatyhymy bedede ywina nade. Tahe aõkõre. ²² Deuxu Tyyriti rarybere: ibutumy iny òraruna-di ratxireri. Kristu iny rityhynykeki, Deuxu jurasadỹna tamy riwahinyke.

²³ Ityhydỹna rehemynymynykoki bedede ywina iny rityhynymyhỹre ròtenawo-ki inyboho roire wese. Kia-ò iny riraòhyymy rỹimyhỹre inatyhydỹna kedehemynykemy. ²⁴ Uladu bedeerydỹdu wese bedede ywina rare inydeereny.

Kristu rehemynykõu, inyboho bede ywina rityhynyrenyre. Tai Kristu-ò inyboho òbitimy ronykremy ityhydÿÿna òraru-ki. ²⁵ Ityhydÿÿna-ò iny rehemynyreu, uladu bede erydÿÿdu-ribi ixãwimyhÿre. ²⁶ Kristu-ki ibutumy Deuxu riòre atximahãtenyte ityhydÿÿna-ki. ²⁷ Ibutu dori Kristu-ò taratisebenyteu, Kristu wesemy tatÿÿnyte. ²⁸ Kristu tÿnydÿÿna-ki wiribi hitximy aõkõ boibe, judeukõdu mahãdu, iny-wana, deòdu deòdu aõkõ-wana, ijoi hãwyy-wana ibutumy wiwese wesele Kristu-ki rÿike. ²⁹ Kristu-ki mabekeki, Abraõ riòre riòrelemy mabekre. Jurasadÿÿna rareasadÿÿdumy atximahãtenyte.

4

¹ Ijyyõ arelyykre –rareasadÿÿduõ deòdu wesemy raremyhÿ tii uladumy rareu, ibutu wedu rare hãre wahe. ² Urile tyby rarybere raumynykõule, tii tatibiedÿÿdu rybe rityhynymyhÿre. ³ Kia wese iny rare. Uladu wesemy bede aõmydÿÿnana rityhynymyhÿre juhUU. ⁴⁻⁵ Iribi tahe bededÿÿnana he rehemynyra. Deuxu tahe Tariòre diteònyde ijadõma ririòredÿÿnykremy. Bede ywina tyhynakremy reare. Tii nade bede ywina tyhydÿÿdu mahãdu tarasamy kia tyhyna-ribi ritakemy tariòre wesemy ritibienykemy. ⁶ Deuxu Riòre wesemy iny ihÿreki iny-ki ratximyhÿreki, Tatytybytyhy inywo-ò risÿnyre. Tai inywo-ribi rarybemyhÿre: –Waha, Waha. ⁷ Wiji tahe deòdu wese aõkõ atxiteri, Deuxu riòretyhy wese atxiteri. Tule Deuxu rareasadÿÿduõle tate.

⁸ JuhUU Deuxu teeryõtenyte. Kaiboho deuxu witxira wese tetyhynytenyte –deuxu inatyhy aõkõ tetyhynytenyte. ⁹ Ka tahe Deuxu teerymy ahãtenyte tetyhynmahãte. Deuxu anaerynymyhÿdenyde. Ixyby bede aõmydÿÿnana-ò òòsedÿÿõmy, arawiòhenyõreki. Deòdumy aõkõ ixyby rÿimy boibeke. ¹⁰ Txu yrubudÿÿõmy, ahãdu yrubudÿÿõmy, beòra yrubudÿÿõmy. ¹¹ Inatyhymy ada aõkõre aõbo waaõmysÿdÿÿna adeereny reõnonyra?

¹² Wawesehyymy boibeke. Jiarÿ dori tatemahã wese raremahã, waseriòreboho. Kaiboho wadee aõbina tewinyõmahãtenyte. ¹³ Kia teeryte. Jiarÿ juhUU adeereny Deuxu rybemy rarybereu, jiarÿ iu wabinawãhãu. ¹⁴ Wabinana heka isirare adeereny, ihãre tahe waderaõre tahe wadi arukirenyra, iwese ÿju Deuxu-ribi jiarÿ anade wese kaiboho tiwamytenyte, iwese taheka Jesuisi Kristule jiarÿ rare wese wadi tewisÿnytenyte. ¹⁵ Titxibo rare eysanareny juhUU adi toite wahe. Kaiboho aruereny wii tesÿnymy toitemyhÿ kaiboho wakyrenyreki. ¹⁶ Jiarÿ aõbohe aõludumy relera, inatyhy rybe adeereny rarybereki? Aõkõhyre. ¹⁷ Hãbuõ arãitxenanyhÿrenyre. Aluu wese

heka ratxirerimy ihÿre. Aòlònamy dori rarunyreri. Tiiboho wabiòwana-ribi atarasamy adi ihÿrenyre. ¹⁸ Aòwihikÿ erysmy marurunyke. Tii tahe awire, awanale watxireriki aòkò. ¹⁹ Wariòre wese, adeereny aòhòkÿmy ratÿÿnyre, hãwyy reamyhÿre mytxitxi wese jiarÿ rare adeereny Kristu awo-ki rexilamadÿÿnyhykemy. ²⁰ Awanareny ararekemy watxireri. Tai tahe warybe wixira-di kia anarybekemy watxireri. Aòhebo adeereny heka arasÿnyre arawiòhenanykemy watxiwãhãre. Timybo reerykòre dori.

²¹ Inyò bede ywina tyhydÿÿdumy ratxikeki, wadee narybeke kiamy: aòmybo bede ywina raryberamy teeryteri? ²² Kia Tyyritidÿÿna-ki roire Abraò riòre inatxire. Juhuu ludu teòdu-ribi, Haari-ribi, reare tabireludu-ribi. Ijò, Sara-ribi, ihãwyytyhy-ribi reara, deòdu-ribi aòkò. ²³ Deòdu riòre ibutu dee wese nade. Abraò hãwyy riòre aòkòre Deuxu rybewahisidÿÿna xiery reare. ²⁴ Kia ijyy-di rawesenanyreri. Inatxi hãwyy inatxi jurasadÿÿna wese heka rare. ²⁵ Ijò Haari inire, deòduni. Iriòre deòdumy rarekemy reare. Sinai Hãwãlò wese tii rare. Kowa tyre-ki bede ywina inydee riwahinyre. Jerusalẽ wesemy roimyhÿre kia mahãdu deòdumy dori rÿira, tariòre-wana. ²⁶ Jerusalẽ tyhydÿÿna mahãdu, biu ludu tahe deòdu wese aòkò rare, ixinamy inyboho roire. Abraò hãwyytyhy riòre wese inyboho roire. ²⁷ Tyyritidÿÿnaò dori roire: —Hãwyy ariòreò beysakre. Bira-juakre ariòrekòhãrele beysamy ariòredikire heka. Hãwyy risina riòre sòwetyhyre, hãwyy ihãbu-di ratyre. ²⁸ Waseriòreboho, kaiboho rybe ywisidÿÿna riòre wesemy ahãtenyete, Ijai wesemy. ²⁹ Iwese ibutu ludu wesemy reareò aòbina riwidÿÿnanymyhÿre. Deuxu Tyytybytyhymy reareò. Wiji, tahe kia weselemyhÿre. ³⁰ Tyyritidÿÿ rarybera: —Biteònyke deòdu tariòre-wana. Rareasadÿÿdu ibutumy rimykre. Hãwyy deòdu aò aòkò rimykre tariòre-wana. ³¹ Waseriòreboho, deòdu riòre wese aòkò inyboho roire. Hãwyytyhy riòre tahe iny roire.

5

¹ Kristu inyboho ritare ixinamy inyweduoòduòlemy roirekemy. Kawese rokoirekemy. Deòdu wese ixiby rukunyrenyòkre.

² Jiarÿ, Paulo, adeereny rarybereri: inyò notykyresyna-ò ròsekeki, Kristu riwiòhenanyòhyymyhÿre. ³ Ixityre ararybeke. Inyò rinotykyresynanykeki, bede ywina ibutumy tii riyrubunyhyke. ⁴ Inyò bede ywina rexiòbitinymy ratxikeki, Kristu-ribi rexihitxidÿÿnanymyhÿre, ruxetòena tyhyna-ribi rexitare. ⁵ Deuxu riwaòbitinyrenyre Tatytybytyhy òraru-ki kia retyhynyrenyre. Kia reraòrenyre. ⁶ Jesuisi Kristu-ò

notyky resyna aõ aõkõ rare. Notyky resynakõ tule aõ aõkõ rare. Inatyhynamy luunamy aõ rare. ⁷ Juhuu awimy tuu tatyynmahãte, inatyhyna-ki ijera wihikÿmy teamyhÿte, moõ inatyhyna-ribi anaixãwididÿÿnyde. ⁸ Deuxu aõkõ atarasadu juhUU ixãwididÿÿnyde. ⁹ Inyõ paõ riwinykeu, ibutenode ritxiwikewi ibutumy ratarinyke. Inyõ ibinamy urihimyo arabedeerynykeki sõwemy ribinadÿÿnyke. ¹⁰ Jiarÿ Wanyrÿ retyhynyre, kaiboho wawesemy mohõtynybenykemy adireny watxireri. ¹¹ Waseriõreboho jiarÿ waõludu dire. Kia tahe riteòsinyre notyky resynamy rarybeõre ijõ wamy raryberekãre. Kia ararybekeki sõwemy wahemy kanakre. Itxeò tÿnydÿÿna rybe rityhynykremy. ¹² Kowa mahãdu òte rexi-hukemy idi watxireri. Adeeremy aõbina diwinymyhÿdenyde.

¹³ Kaiboho Deuxu arateònyrenyryre, urile òraruõmy boibeke kaiboho bedewina-ribi ixinamy boibeke. Wii biwiòhenanymyhÿbenyke, wiluurenykemy. ¹⁴ Bedewina ibutumy rexibutunyryre rybe-ki kia tahe rare: —Inyluuke ixiluure wese. ¹⁵ Wiwana bõrenybenykeki, kaiboho widi buruakeki, bexihãrubeny ibutumy wii mahubenyheny.

¹⁶ Tai jiarÿ rarybere, Deuxu Tyytybytyhy deewimy boibekemy deòbiredÿÿna iwidÿÿõmy boibeke. ¹⁷ Deòbiredÿÿna dori Deuxu Tyytybytyhy òluduna-ki ramyhÿre. Wimyo òludurenyryre. Tai aõbo adeeremy awire iwidÿÿ adeeremy isirare. ¹⁸ Tahe, Deuxu Tyytybytyhy arateòsinyrenykeki, bedewina ywidÿÿna aõkõ bityhynyke. ¹⁹ Deòbiredÿÿna aõna aõnamy dÿÿnana-ki kia roire: aderanadino, aõbinade, raykyõmy, òta òta, ²⁰ suritxoomy àladÿÿna, òwòruna wii, òlududÿÿna, aõbinaluu, ihãru, kyara, wobiredÿÿna, wiribihitxina, ²¹ ibutu aõmydÿÿna ixixiburedÿÿ, axaxaluu, rÿsÿnaluu byrehekÿ, tule ijõ aõna aõna sõwemy kawesere. Inyõ kia aõna aõnawidÿÿ rierykeki, Deuxu òlona rareasadÿÿdu aõkõ roikre. Tuu rarybere juhuule. ²² Ka heka Deuxu Tyytybytyhy aõmydÿÿnanamy rybena roire: iwahidÿÿna kia rÿire, tii dori inywomy rÿira. Wiluuna, deysana, ywina, ruxetõena, wina, òbitidÿÿnana, ²³ ibutu-ò awina, ixidee inytyhyna, ixiyrydÿÿna, tai bedewina ihoõhyryre kia-ò. ²⁴ Kristu hõrõ mahãdu kia itxeò-ki ritidirenyryre: deòbiredÿÿna, aõmydÿÿnana bina-ribi, deòsana aõmydÿÿnana-ribi

²⁵ Inyboho Deuxu Tyytybytyhy-di rokoirekeki Deuxu Tyytybytyhyry-ki rakariarenykre ²⁶ Ixi deàlànaranaròsò luukemy aõkõ rakatximyhÿrenyke. Tai tahe ixixiburedÿÿna-di aõkõ, rakatxirenyke. Wiòbiredÿÿna-di rakatxirenyõke.

6

1 Waseriõreboho. Inyõ òraruna-txi resekeki, kaiboho

ywina-di biòbitinybenyke. Bexihãrumahãbenyke kia òraruna-txi ixèomy boibekòkemy. Kaiboho dori, Deuxu mahãdu toite wahe. ² Wiitxykywydywesemy wii biwiòhenanybenyke ibutu aõmydỹnana-ki. Iwesekeki, Kristu bedè ywina tetyhynmahãtenyete. ³ Inyõ ixidee aõlemy røhõtinykeki, tahe tii aõhyy aõkò rare, tii rexiitxenanymyhỹre. ⁴ Ixinamy iny sohoji sohoji taaõmydỹna-ò retehemyhỹke, aõhebo rotỹnnymyhỹremy wahe. Idi tahe ixi aõmydỹnale-di kedexityhynmyhỹkre, tabireludu aõmydỹna-di aõkò. ⁵ Iny sohoji sohoji dori taitxyky riwymyhỹke.

⁶ Inyõ Deuxurybe erydỹna ijòdikewana tabedeerydỹna mahãdu-ò ibutumy erysya wiwihikỹle-di rirareamahãke. Tule bedeery mahãdu heka tohodỹna mahãdu-ò aõna aõna wihikỹ riwahinymyhỹre. ⁷ Ixiitxenadỹõmy. Inyõ heka Deuxu itxenadỹõmy alòbòròna-ò iny ribòrònykeki, tiile tahe raumynyhyymyhỹre. ⁸ Inyõ òraruna ribòrònykeki, rubule taumy-ki ritake. Inyõ Deuxu Tyytybytyhy deewimy tuu rotỹnykeki umytuedeõna ritake. ⁹ Aõwihikỹ widỹhyymy boibeke. Kia-ki elemy ruburenyõmy. Aõwihikỹ widỹhy boibekeki, adeeremy aõwihikỹ wahidỹna wese kanake. ¹⁰ Ibutumy inydeeremy aõwihikỹ widỹ-ki inyboho abededỹnanawikeki ibutumy iny rikiwiòhenanyrenmy, rỹkỹrenyke, ityhydỹdu mahãduõ bexiywinyhy ahãbenykemy iwiòhedỹ-ò.

¹¹ Tuhe, jiarỹle ariritinykre, Paulo wahe. Betehebeny in-ihe ritidỹna nihikỹ reritinyra wadebò-di. ¹² Inyõ ayreny-ki wohyna ixidee rinykemy ratxireri, kia adeeremy òtyky resynamy adi ratxirerihyymyhỹre. Kristu itxeòmy tiiboho ritỹnnyrenykeu aõhòkỹmy rotỹnyõmykemy røhõtinymyhỹre. ¹³ Notyky resyna mahãdu bedè ywina rityhynyõre. Tiile rexityhynmyhỹre. Kaiboho irybe-ò boholakemy atxiteri. ¹⁴ Jiarỹ arexiwowydynanyõhyymahãkre, Wanyrỹ Jesusi Kristu itxeò-di areysakre, biu-ò hena òraru-ki wahe. Bedè aõmydỹnana waki rỹimyhỹre, itxeò-ki retamadỹnyra waribi ixãwira. ¹⁵ Notyky resynadỹkò tule aõ aõkò rare. Notyky resynadỹkò tule aõ aõkò rare. Urile biu-ò hena-di boibekele tahe aõ rare. ¹⁶ Kia bedè ywina bityhynybenmy boibekeki, Deuxu-ribi ywina, ruxetòena, adeeremy kanakemy idi watzireri. Tule Deuxu mahãdu ibutu-ò, judeu mahãdu wese dori ratxireri.

¹⁷ Karibi tako-ò tahe inyõ waixiradỹõmy ararekre. Beydỹna dori waumy-ki roimyhỹre, Jesusi rybe rybemy rybedu òraru-ki.

¹⁸ Waseriòreboho, Jesusi Kristu ruxetòena akireny rỹikemy watzireri. Kie.

Efesu Paulo Tyyriti, Efesu Hãwã-ò

¹ Paulo, Jesuisi Kristu deòdỹna jiarỹ rare. Deuxudeewimy tahe kia rare. Efesu hãwã ityhydỹdu mahãdu —ò kalemy warybe rewahinyreri. Kaiboho ywimynodu mahãdumy toimahãte. ² Ruxetòena adeeremy kidiatykemy Deuxu-ribi idi watzireri tule Jesuisi Kristu Inynyrỹ-ribi.

³ Deuxu, Inynyrỹ tybyreny, inyboho tuu reàlàmyhỹreny. Tii dori inydeeremy wihikỹ inywo ywinamy diwahinyde Jesuisi òraru-ki biukihikỹle wahe. ⁴ Deuxu inyyreny-ribi rihitxinymy ritare. Inyboho heka tuu roire. Ihetxiu heka inyho aòkõu tii rihitxinymy ritakremy rỹimyhỹre, inyboho wahe. Kristu-ki iny rihitxinymy rỹire. Iny òbitimy rỹirakemy rihitxinyre, ywimy nodumy wahe. Kiamy heka rokoirekre Kristuko-txi luuna-di. ⁵ Ihetxiu tamywimy Deuxu rihitxinymy ritare, inyboho wahe. Iriòreny wesemy rokoirekemy. ⁶ Kiamy heka Deuxu riwinyre àlàna, wohyna-wana tamy rikiwahinyrenyemey tii dori inyluurekỹ wahe. Kristu hãlubu òrarukile biu-ò henareny iny nade. Iny òrarureny riòwinyre taruxetòena wihikỹ òraru-ki. ⁷⁻¹⁰ Ruxetòena sòwemy inydeeremy diwahinyde tii dori ibutumy aõna aõna erydu rare. Deuxu dee wina rybe wòte wese rare. Tahe inydeeremy kiditynynykemy idi ratzireri. Tamywimy tahe inydeeremy riteòsinyre. Iwese tii ròhõtinyre wese. Bededỹnana rexihukreu. Kristu-ki ibutumy aõna aõna biu-ki bede-ki rỹikremy ihỹre. Kiamy tahe Deuxu ròhõtinyre. ¹¹⁻¹² Kristu òraru-ki Deuxu juhoo iny mahãduy-ribi inyboho rihitxinynyreny. Tii diwahinyde inydeeremy uriònojura jurana. Tii dori ixideewilemy ibutumy aõhebo rotỹnynymyhỹre Deuxu kia hitxidỹna mahãdu ixidile wowydyna mahãduò rỹirakemy rỹimyhỹre. Inyboho juhoo rityhynynyreny Kristu-ò. ¹³ Kaiboho kiaò toimahãte. Juhoo rybe inatyhy-ò taholatenyete, tetyhynymyhỹtenyete tarasa Rybewihikỹ-ò wahe. Tai tahe Deuxu Tyytybytyhy-di ratidỹna wesemy iny dee ritidimyhỹre. Deuxu Tyytybytyhy dori tii kidiwahinykemy rarybere, ihetxiu wahe. ¹⁴ Uriòno jura jurana Deuxu Tyytybytyhy rare inydeeremy. Deuxu tahòrò mahãdu ritakreu, tuu reàlàrenykre tuu, inyboho dori kia mahãduò roire.

¹⁵ Tahe jiarỹ, Paulo, tule umy raholamahãre Jesuisi Kristu atyhydỹna-ò, tule aluuna ityhydỹdu-ò. Tai tahe Deuxu-ò àlàna-di araixitòedỹnyrenymahãre. Wanohòti aribireny

rosaõhyymyhÿre. ¹⁶⁻¹⁷ Deuxu tahe Jesuisi Kristu biu loosõna tyby rare. Tii araykyreny-ò bedeeryna kidiwahinykemy watzireri, awolyrana kidiwahinykemy watzireri. ¹⁸ Tai tahe araykyrawoni ritÿnynykemy watzireri. Tai kaiboho bierybenykre Deuxu iryana. Tule ityhyna biu loosõna-di bierybenykemy watzireri. ¹⁹ Deuxu taruruna sõwemy diwahinymyhÿde ityhydÿÿdu mahãdu-ò. Iruruna tahe aõni rare inydeereny uriõno jura jurana. Kia tule bierybenykemy watzireri. ²⁰⁻²¹ Kia irurumy inyboho tuu robirenyre, Kristu rubu-ribi rexiixixanyreu, taruruna weribi ronykemy disÿnydeu, biukihikÿle wahe. Kristu tahe ibutu ruruna witzira witzira ratyre rare, ibutu wedu ratyre, ibutu dinodu ratyre, ibutu deòdÿÿdu ratyre. Ibutuni ratyre tii rare. Wijinani ratyre, tule kanakremy ihÿreni ratyre rare. ²² Deuxu tahe ibutu aõna aõna witzira witzira Kristuwarawo-ò ritidire tai tii ibutuwedukremy. Tii ibuturati wesemy rare. Kia tii ihÿre dohodÿÿdu mahãdu-ò, iwedu wahe. ²³ Dohodÿÿdu mahãdu tahe Kristumy wese rare. Kristu dori ibutu aõna aõna ritÿxinymyhÿre.

2

¹ Juhuu kaiboho rubumy tãimahãte òraruna òraru-ki. ² Juhuu kaiboho bedeaõmydÿÿnana bede-ki toitemahã juhUU Satanasi deòdÿÿna tetyhynymy toitemahã. Tii bedeyhy ruruna dinodu rare. Ityhydÿÿdukõdu mahãdu wiji dori rityhynymy rÿira, itxiòdÿÿdu mahãdu wahe. ³ Ityhydÿÿdukõdu mahãduy-ki juhUU tule inyboho roiremahã –ibutumy ixideerenywimy inyboho riwinyreny; inyraykyreny wydyna-deewimy tule inyboho riwinyreny. Ehehewidÿÿdu inyboho roiremyhÿ, tuu ratybienymy rarehyy dori tuu rare. Iwese ijõ roiremyhÿ wese. ⁴ Deuxu tahe sõwetyhymy ruxetõena diwahinymyhÿde, inyluurenyreki. ⁵⁻⁶ Deuxu inyboho rurudÿÿnyre Kristu-wana rubu-ribi riixixanyreny. Kristusÿ-ki biu-ki tii inyboho risÿnyre tai rokonyrenykemy. Iruxetõena òrarukile abiu-ò henareny dire. ⁷ Iruxetõena kiditeòsinykre bededÿÿnana robe-hemy roireki wahe. Iwese sõwehyymy iruxetõena diwahinyde wesemy. ⁸ Tarasana Deuxu ruxetõenaribile nade aityhydÿÿnareny òraru-ki tuu rare. Iny-ribi aõkõ nade. Deuxu wahidÿÿna rare. ⁹ Iny-ribi rarybekre inyõ ixityhydÿÿmy tahe aõkõre Deuxu ruxetõenakile tuu rare. ¹⁰ Tii tahe ibutumy iny riwinyreny. Òbiti aõmydÿÿnana widÿÿdukemy iny riwinyre Jesuisi Kristu òraru-ki. Deuxule juhUU rõhõtinyre òbiti widÿÿdumy aõbo rokoirekemy.

¹¹ Tahe kaiboho uritere nohõti losaõmy kaiboho judeukõdu mahãdu toite juhUU mahã. Kiamy judeu mahãdu

arāninimyhÿrenyre, notykyresykõdu mahādu wahe. Tii dori notyky resydu mahādu roire, iyresynadireki wahe. ¹² Juhuu tahe aruta wesele toite Kristu-ki aõkõ. Judeu mahādu-ribi rihitxinymy nyimyhÿde. Deuxu rybe ywisidÿÿna ludu aõkõ toite. Araròsòna renyõhyyre. Adeuxurenyõhyyre bededemy. ¹³ Juhu irehemy Deuxu-ribi toite mahā. Tahe wiji Jesuisi Kristu hālubu òraru-ki araòhòdÿÿnymy toite. ¹⁴ Jesuisi Kristu tahe iny ywidÿÿna rare. Kyarana tahe òtity wese itya-ki rÿimyhÿre judeu mahādu aribi kia rihitxinyre. Tahe kia òtity ritxiwire tahe sohoji mahādulemy riwinyre. ¹⁵ Tahe Kristu rurureu tahe ixāwire kia bededemy. Tahe inatxi wimy òludu mahādu sohoji iny tÿmyrahyyulemy riwinyre. Tahe ywina ròhònyre wiwana ributunyra tahe Deuxu taluuna tamy riwahinyra. ¹⁶ Jesuisi taitxeò-ki rurureki, ywina rieryrenyre. Tahe kyarana-ribi riixāwididÿÿnyre. ¹⁷ Jesuisi tahe ywinamy rarybere iòhò ludu kaiboho wahe tule irehe ludu, judeukõdu mahādu wahe. ¹⁸ Tahe kaiboho jiarÿboho-wana sohoji Deuxu Tytybytyhy òrarukile Deuxu-ò rekexitòdenyrenyke. ¹⁹ Kawese tahe kaiboho ityhydÿÿdu mahādu-ò talote. Iny-ribi lahitxi aõkõ toite, Deuxusÿ mahāduõle heka toite. ²⁰ Deuxu rybedu, tadeòdu-wana hetoõ wesemy kaiboho boibekre. Jesuisi Kristule iko ludu mana wese rare. ²¹ Jesuisi Kristu òraru-ki wiwesehyule heto awimy rÿire. Tai Inynyrÿ hetotyhy relemy rexihumyhÿre. ²² Kaiboho tule matybienybenykre Deuxu Tytybytyhy hetoõ wese wahe.

3

¹ Tai jiarÿ, Paulo, rotena-ki nodu wesemy rare Jesuisi Kristu òraru-ki. Judeukõdu mahādu dee kiamy heka watxiwāhāre, adeeremy wahe. ² Deuxu ruxetòena wadee riwahinyre. Kaiboho aõbo tuu taholatenyõmahāte. ³ Deuxu dori tawòtena diteòsinyde wadee. ⁴⁻⁵ Jiarÿ kiamy juhUU reritinyriòrere katyiritikile wahe. Idi mariabenykeu bierybenykemy idi watxireri, timybo Kristu wòtena rybe reeryremy wahe. Kristu wòtena tahe ihetxiu ibutu inyõ riteòsinyõhyyre. Wiji tahe riteòsinymy ihÿre Deuxu Tytybytyhy tahe deòdu-ò, rybedu-ò ritÿnynymy ihÿre. ⁶⁻⁷ Kiamy heka rare: kaiboho, judeukõdu mahādu, wii ributunyre inyboho-wana judeu mahādu wahe. Uriònowi jurawi juramy idi rokoirekre, sohoji mahādulemy wahe. Kristu Rybewihikÿ òraru-ki ityhydÿÿdu mahādu-ò rirònyrenyre. Kia rybe-di rybedumy diwateònyde, ruxetòena wahidÿÿnaõ wadee nade Deuxu ruruna sòwe-ribi. Ityhydÿÿdu mahāduduy-ribi jiarÿ aõ aõkõmy watxiwāhāre retyhynytyhymy aõkõ watxiwāhāre. ⁸ Ihārele Rybewihikÿ rybedumy ararekre Kristu aõmydÿÿnana

heka iny raykywydyna ratyre awimy ihÿre. Kiamy judeukõdu mahãdu-ò arelyykemy riwahitxinyre. ⁹ Ibutu inyõ rybe wòtena aritÿnynykemy watxiwãhãre juhuu Deuxu Jesuisi-wana ibutumy aõna aõna riwinyre kiau rybewòtena riwòmý roimyhÿre Deuxu-ki. ¹⁰ Wijina tahe riteòsinykemy ihÿre dohodÿÿna-ki. Tai tahe ibutumy biu-ribi rurunadu, bedeerydÿÿdu rierykemy timykibo Deuxu bede erysyna-di raremyhÿ ibutumy aõna aõna erysyna-di. ¹¹ Iwese Deuxu ibutumy aõhebo rotÿÿnykemy ratximyhÿre wese iny rierykre, Inynyrÿ Jesuisi Kristu òrarukile wahe. ¹² Tai tahe iny rexideòsinymyhÿre brebuõlemy Deuxu ixitòenadÿÿna-di Kristu dori inyboho rityhynymyhÿre. ¹³ Tai kaiboho ixiiiodÿÿrenyõmy ahãke, jiarÿ aõhõkÿmy ratÿÿnyreki kia dori awowydyna rare, waaõhõkÿmy dÿÿnana wahe.

¹⁴ Tai tahe umyreny Deuxu-ò rexitòenyre Inynyrÿ Jesuisi Kristu tyhy-ò wahe. Ibutu sÿ mahãdu tyby Deuxu rare. ¹⁵ Ruruna adeereny kidiwahinykemy idi watxireri, tawowydyna sõwe-ribi wahe. ¹⁶ Deuxu Tyytybytyhy ruru-tyhy araykywo-ò kidiwahinykemy watxireri. ¹⁷ Tai Kristu aworeny-ki kanasÿnymyhÿkemy rahõtinyinmahãre atyhyna direki kaiboho heka wiluutyhymy boibekemy watxireri. ¹⁸ Tai ibutu ityhydÿÿdu mahãdu-wana Kristu luuna bierybenyke. Inyõ Kristu luuna awire rieryõtyhy. Ihãrele tahe bierybenyke iwese rare wesemy. ¹⁹ Tai Deuxu-di bexilÿxinykemy idi watxireri.

²⁰ Deuxu iruruna dire. Tai iny ixitòena ratyre inydeereny kidiwahinykemy idi ihÿre. Iny irurudireki wahe. ²¹ Dohodÿÿdu mahãdu wowodyna riwahinykemy tamy watxireri, aõu aõu wahe. Bededÿÿnana konana-ò wahe. Kie.

4

¹ Inynyrÿ deòdu arixidu jiarÿ rare. Arexitòenykre inihe adeereny. Yrubuna-di aõhebo botÿÿnybenykemy adireny watxireri. Tai tahe Deuxudeewimy boibekre. ²⁻³ Tii dori juhuu adeereny irydu rare òbitimy boibekemy xiwedeõmy boibeke, ele eleõmy; wii biwiòhenanymy; luuna-di marurunymy boibeke. Ixi wesehyylemy boibekemy. Tai tahe Deuxu Tyytybytyhy aratorabutenyrenykre ywimy nodu dori kia diwiòhenanymyhÿde. ⁴ Sohoji mahãdule rare, sohoji Deuxu Tyytybytyhydile. Umy sohoji wese, ityytyby sohojilemy wese rare. Kaiboho tule araròsònareny sohojile rare, kaiboho ityhydÿÿdumy terònyteki wahe. ⁵ Inynyrÿ sohojile rare inytyhynareny sohojile rare. Tule iny ratisebena sohojile rare. ⁶ Deuxu tule sohojilere, ibutu tybymy rare ibutu ratyre rare. Ibutuy-ki tii rare. Tule ibutu rawo-ki ratxireri.

Ibutumy aõhebo rotỹnykemy iny-di riwisỹnyreri tawowina-di.
⁷ Kristu tahe iny sõwemy rareki sohoji ruxetõena sõwemy sohoji-ò riwahinyre. ⁸ Kiamy heka ritina-ki roire: —Iu Jesuisi raòwõnyreu biu-ò ròtena ludu mahãdu ridyre idi wahidỹỹna inydeereny diwahinyde. ⁹ Betehebenyke rybeweereõ-ò raòwõnyremy. Aõmybohe kia rarybereri. Tahe juhoo dori surawo-txi robehere kiakekile tahe idi raòwõnyke. ¹⁰ Kia robeherele taheka raòwõnyre biuratyremy ibutu aõna aõna-di rexilỹxinykemy. ¹¹ Inyõ-ò deòdỹỹna mahãdumy rarekemy diwahinyde aõwihikỹ widỹỹ wahidỹỹna wahe. Ijõ-ò Deuxu rybedumy mahãdu rarekemy diwahinyde. Ijõ-ò Rybewihikỹmy rybedu mahãdumy rarekemy diwahinyde. Ijõ ityhydỹỹdu mahãdu yrubudỹỹdu mahãdumy rarekemy. Ijõ bedeerydỹỹdumy mahãdu rarekemy. ¹² Ibutumy kia mahãdu ityhydỹỹdu riwiõhenanykemy idi ratxireri. Tai ityhydỹỹdu iaõmysỹdỹỹna riwinykre. Kristu umy wesemy ritibiedỹỹnykemy. Ibutu dee diwahinyde. ¹³ Ikonanau tahe ibutumy wiwese wesemy rõkõhõtinyrenyke, iny tyhynareny wahe. Deuxu Riõre rikierityhyrenyke, iny õbitimy rokoireke, Kristu õbiti wesemy rokoireke. ¹⁴ Tohouã wesemy aõkõ rokoireke inytyhynareny-ki. Uritere wixiradỹỹrenyõmy ibutu bedeeryna wixira wixira-di. Iwese yhy tiõ tiõ aõ riwymyhỹre wese kia bedeerydỹỹdu rare. Iwixira tyhydỹỹna-ò kia ityhydỹỹdu mahãdu ridykemy ratximyhỹre. Ijõ inatyhy rybe weselemy rarybere. Tahe aõkõre. Kia-ò ijohonarenyõmy. ¹⁵ Tahe luuna-di inatyhymy marybebenyke. Kristu aõmydỹỹnana-di bexilỹxinybenyke idi maumynybenyke. Tii dori iny wedureny rare. ¹⁶ Ityhydỹỹdu mahãdu heka Kristu umy wese rare. Ityhydỹỹdu sohoji sohoji wijura jura weselemy rỹira. Kristu ibutumy riwiõhenanymyhỹre iwese umy hona umy wese. Umyjura kia ibutumy iaõmysỹdỹỹ dire. Wiweselemy tahe raaõmysỹdỹỹnykeki tai tahe umy awimy rariamyhỹke. Ijõ widerakeki tahe, Kristu umy raumynyõtyhy.

¹⁷ Katahe Inynyrỹnimity adeereny kiamy rarybemyhỹre. Ityhydỹỹdukõdu mahãdu wesemy aõkõ boibenybeke. ¹⁸ Iraykyreny bedeluru-ki ihỹrenyke. Ieheherenyre, rieryõrenyke. Tai tahe Deuxu biu-ò hena umy tuedeõna rieryõrenyke. ¹⁹ Ixãruna ihoõhyre. Urile ibutumy õraruna-txi rexiwahinyrenyke. ²⁰ Kia Jesuisimy aõkõ teerytenyke inyribireny wahe. ²¹⁻²² Jesuisi inatyhyna teerytenyteki, ibutumy aõbina bina ixi-ribi bihitxinyke. ²³ Ibutumy awo arayky-wana bexitỹmyranyke. ²⁴ Deuxu umy tỹmyra wesena-di bexityhynybenyke. Kia heka õbiti rare; inatyhy rare.

25 Tai tahe ruirenyõmy wahe. Inatyhymy iny wixira-ò marybemahãbeny. Wiwese hyylemy widi rakatximyhÿrenyke. 26 Makyarananymahã-wana tahe urile òraru-txi ixẽõmy. Ixi-di txu iròtedÿÿõmy awobinana-di 27 Tule Satanasi deradÿÿna-ò nokõmy. 28 Inyõ juhoo wasidureki, ixityre tii wasiõmy. Tii wiji raaõmysÿdÿÿkre aõna aõna wiwihikÿ tebò-di riwinykemy wahe. Tai tahe iaõdikre iny aõkõmy rÿira riwiòhenanyke. 29 Kai uritere rybebinaõ ary-ribi iòlòdÿÿõmy Rybewiwihikÿlemy marybemahã. Kia rybe-di ijohodu riwiòhenanymyhÿrele kynyhetuukre. 30 Bibedeòtiidÿÿõmy Deuxu Tyytybytyhy. Tii dori arayrubunymyhÿre tarasanatxu-ò. 31 Òbina rybemy widi nokõmy, wimy ujõmoõmy, adebure ijà ijãõmy, aõbinamy inymy ijyyõmy, rybebina-di iny ihetedÿÿõmy. 32 Tahe ibutu dee ywimy boibekre, awimy wahe ainytyhymy iny-di boibekre. Aõbinamy iny adee rarybe-wana tahe iribi bexinohõtilosanymy biixãwididÿÿnymy Deuxu dori inyòraru riixãwididÿÿnyreki wahe.

5

1 Deuxu inytybytyhyreny rare. Tai tahe iwese uladu tyby wesemy rotÿÿnymyhÿre wese, kaiboho Deuxu wesemy matximahãbenyke Deuxu riòre luunadu wesemy matximahãbenyke. Wiluurenyke, Kristu dori aluurenyre. 2 Tule rexiwahinyre xiwe wesemy iny ritarenykemy. Tai tahe Deuxu dee kia lÿnyrena wiwihikÿ wese rare.

3 Tahe òta òtarenymy. Ibutumy aõna aõna bina bina widÿÿrenymy. Kaiboho dori ityhydÿÿdu mahãdu toite. 4 Rybebinamy uriteretere rybeõmy. Ixideòsidÿÿõmy. Kia widÿÿna tahe ibinare. Tahe aõwihikÿõ biwinyke, Deuxu deàlanamy. 5 Òta òtadu tahe Deuxu òlòna wahidÿÿna ritaõtyhy, iny binaõ aõkõ, inywobire aõkõ. Kia Deuxu tyhy biukõdu mahãdu rare. Bierybenyke kia. 6 Itxenadÿÿ rybe-ò ijohonarenymy. Ityhydÿÿdukõdu mahãdu Deuxu rybe riwinyõmyhÿre. Tai tahe Deuxu reburemyhÿre tamyreny.

7 Tiiboho-wana ratxiõhyymyhÿrenyre iaõmydÿÿnana binareki. 8 Hÿÿnau kaiboho bedeluru-ki toitemahã. Tahe wiji Inynyrÿ loosòna-ki toite. Loosònadÿÿdu riòre weselemy boibeke. 9 Aõbo loosòna-ribi nade tahe awire, òbitire, inatyhyre. 10 Tai aõbo Inynyrÿdewi kia riteòsinyre. 11-12 Iwese bedelurubina widÿÿdu aõhebo rotÿÿnyre wese uritere iwidÿÿrenymy tahe teòsaremy tamy marybebenyke. Aõbo tiiboho wasimy aõhebo rotÿÿnymyhÿre ixÿruna adee rare tuu maryhemahãkeki.

13 Ibutumy aõna aõna loosòna ritÿÿnyre. Tai tahe iny aõmydÿÿnana loosòna ritÿÿnyrekeki, iny rierykre itÿnydÿÿna dori loosòna rare. 14 Tyyritiõ kia wesemy rÿire: —Inyõ

rõrõmy r̃yikeki, rexixake rubuy-ribi r̃yike. Kristu tahe araloosònanykre.

¹⁵ Aõhebo bot̃ỹnybenykeò bexiijebenyke. Itx̃ỹte wid̃ỹỹdu mahãdu wesemy aõkõ ahabenyke, bedeerydu mahãdu wesemy ahãbenyke. ¹⁶ Iõnod̃ỹỹõmy abeded̃ỹỹnana. Wiji txu beded̃ỹỹnana tahe ibinatyhymy rare. ¹⁷ Tai tahe itx̃ỹteõmy ahãke. Bierybenyke aõbo Deuxu dee wire. ¹⁸ Vĩ mona-di axaxa rubud̃ỹỹna wesemy aõkõ matxibenyke. Kia tahe aõnityhyre, tumodu wahe. Tahe Deuxu Tyytybytyhy heka atykymy ralõmy boibeke. ¹⁹ Mawinymy bexirybenyke awo-ki. Bexirybenybenyke Inynyr̃-ò awi-ribi bitxienymy mawiunyke. Rybewiumy marybeke. ²⁰ Deuxu inytybyreny-ò ibutumy bealãmahãbenyke Jesuisi Kristu Inynyr̃ni òraru-ki tahe bexitõenyke. ²¹ Kaiboho ibutumy widee bexiywinyhyymy ahãbenykre.

²²⁻²⁴ Iwese dohod̃ỹỹna mahãdu Kristu rybe rityhynymyh̃ỹre wese, hãwyy tahãbu rybe riywinyke, ibutu aõmyd̃ỹỹnana-ki wahe. Hãbu dori tahãwyy dinodu wese rare. ²⁵ Ibutumy hãbu tahãwyy luukemy. Kristu dori dohod̃ỹỹna mahãdu luureki ture. Tamy tii rexiwahinyre rurukemy. ²⁶ Tai tahe kia òbitid̃ỹỹnamy rurure. Iwese bee aõ rasuhõmyh̃ỹre wese, tarybe risuhõmyh̃ỹre. ²⁷ Iòraru-ki tahe Jesuisi dohod̃ỹỹna mahãdu wi-wihik̃ỹõ ixidee rimykre. Òbiti mahãdulemy rarekre, aõbina binaõ heka tai r̃yiõhyymyh̃ỹre. Awi mahãdu wid̃ỹỹdumy rarekre. ²⁸ Kiamy heka hãbu tahãwyy-di r̃yirake. Iwese hãbu taumy luure wese tahãwyy luumy r̃yirake. Iny tahãwyy luukeki, kia-di ixiluuke. ²⁹ Iny taumyderamy r̃yiõhyymyh̃ỹre. Tahe aõkõre tule rexiõwenymyh̃ỹre rexiwesenanymyh̃ỹre. Iwese Kristu dohod̃ỹỹna mahãdu riwisinanymyh̃ỹre wese. ³⁰ Inyboho dori Kristu mahãduõ roire. ³¹ Kiamy heka Ritina roire: — Tai heka hãbuõ tybyboho heto ririmyh̃ỹre tahãwyy-wana wii ributunymy roirekemy. Inatxi umy ribi sohoji umyhyymy rõhõnymyh̃ỹre. ³² Kia aõmyd̃ỹỹnana heka ierysysirare. Tahe Kristu tohod̃ỹỹna mahãdu-wana rarybereri. ³³ Ihãrele tahe hãbu tahãwyy luumy r̃yira iwese ixiluumy r̃yira wese. Tule hãwyy tahãbu rityhinyke.

6

¹ Uladu mahãdu tybyboho rybe rityhynymyh̃ỹre Inynyr̃ òraru-ki. Kia tahe òbiti rare. ² Boo adi-wana bityhynybenyke. Kia tahe bede ywina rybe juhoo rare. Tule Deuxu rarõsõna kia bede ywina rybe-wana rare. ³ Kia biywinybenykeki, awimy mabeke, abeded̃ỹỹnana irehemy mabeke kabede-ki. ⁴ Uladu tyby, uladuse, ariòrereny adeburehyymy

idi iwisÿdÿÿrenyõmy. Tahe aõki reòsakeki tii riòbitinykemy tamy marybebenyke. Inynyrÿ deòsidÿÿna-di tamy marybebenyke.

⁵ Deòdu mahãdu kabede-ki awedureny bityhynybenyke. Awo-ribi tyhy tamywimy biwinybenyke. Bexiijemy ywimy biwinymy. Iwese Kristu dee tewinymahãte wesemy. ⁶ Aõ tabiteriki aõkõ biywinyke. Iwese Kristu deòdu wesemy mabeke. Deuxu dee wina awo-ribi biwinyke. ⁷ Deysana-di ibutumy òbitimy bisÿdÿÿnyke. ⁸ Ibutumy deòdu ada deòdukõdu Inynyrÿ-ribi aõna aõna rimyke. Tamy aõwiwihikÿ riwinykeki. ⁹ Tahe wedu mahãdu, kaiboho eòdu mahãdu-ò kia weselemy mabeke. Brebudÿÿ rybe-di eòdureny-ò rybeõmy. Awedu dori eòdureny wedu tule biu-ki ratximyhÿre. Tamy dori ibutumy wiwese wesele rare.

¹⁰ Ibutu-ò tahe ikonanamy ararybekre. Inynyrÿ ruruna-di bexirurudÿÿnyke. Iruru tahe aõni rare. Tahe ixidee bimyke. ¹¹ Bexityynyke aõbinanatyy-di, debõna aõmydÿÿnana bimyke. Tai tahe Diabo rybemy nodu biòludunyke. ¹² Iny ijesunareny dori moo iny-wana aõkõ rare. Iwitzira Satanasi ruruna-di rare. Dinodu ruru-di rare, kabede luruhukÿ wedu-di wahe. Tyytybybina ruru-di rare, biukihikÿle. ¹³ Tai tahe ibutumy Deuxu debõna aõna aõna bimyke. Idi txubina-ki biòlòdÿÿnyke. Aijesu bitakeu tahe, òraru rÿike. ¹⁴ Inatyhyna-di awereysana birarutxynyke. Òbitina-di abreti bitòbònyke. ¹⁵ Bexiywinyke ywina Rybewihikÿ rybena-ò. Tii heka adikre. ¹⁶ Ityhyna tahe awyhyitxenamy ihÿre, idi eorutà bitÿtenyke. Idi tahe Satanasi heòty wyhy biturinyke. ¹⁷ Tarasana tahe arataana wese rare. Deuxu Tyytybytyhy mayrehe heka Deuxu rybe rare. ¹⁸ Deuxu Tyytybytyhy-ki ibutumy ixitòedÿÿhyymy atx-imahãbenyke. Kia-di tahe biriranymy, boibeke. Ityhydÿÿdu mahãdu ibutumy bexitòenyhyymy boibeke. ¹⁹ Tule wadee, bexitòenybenyke. Deuxu wadee rybe kidiwahinykemy wahe. Tai brebukõlemy Rybewihikÿ aritÿnynykre, ierysy siramy wahe. ²⁰ Jiarÿ Rybewihikÿ deòsidÿÿdu rare wawomati rero-tidire hãrele wahe. Kristumy arelyykemy watzireri. Tii heka wawidÿÿnare.

²¹⁻²² Txitxiò tahe ityhydÿÿdu seriòreõ rare, waluunaduõ rare. Inynyrÿ rybe-di òbiti aõmysÿdÿÿdu rare. Tai tahe tii adeereny reteònyre waaõmydÿÿnana adee ritÿnynyky. Awo riteysadÿÿnykremy.

²³ Ywina ibutumy ityhydÿÿdu mahãdu seriòreõ kanakemy watzireri. Luuna tyhyna-wana kanakemy Deuxu, iny-tyby-ribi, Jesuisi Kristu, Inynyrÿ-ribi wahe. ²⁴ Ruxetòena kanakemy watzireri Jesuisi inatyhymy luunadu mahãdu-ò wahe. Tii Kristu rare, Inynyrÿreny wahe.

Filiposi Paulo Tyyriti, Filiposi Hãwã-ò

¹ Paulo, Tximòtxi-wana Jesuisi Kristu deòduren roire. Ka tyyriti tahe rewahinyrenyteri Filiposi hãwã-ki ityhydỹỹdu mahãdu-ò. Ityhydỹỹdu yrubudỹỹdu mahãdu-ò tule rewahinyrenytera dohodỹỹna wiòhedỹỹna mahãdu-wana. ² Ruxetòena, ywina-wana Deuxu-ribi adeereny kanakemy watzireri tule Jesuisi Kristu Inynyrỹreny-ribi.

³ Rexitòenyreu, tiu aribireny wanohòti rosaòhyymyhỹre. Deuxumy reàlàwãhãre umyreny. ⁴⁻⁵ Wadeysamy watxiwãhãre Rybe tymyra wihikỹ tewiòhenanymahãtenyteki, juhuu, wiji tule ahãtenyete. ⁶ Deuxu iaòmỹsỹdỹỹna wihikỹ inyworeny-ki rexideleny. Tahe Jesuisi Kristu bededỹỹnana txuu heka rexihumy kia rỹikre. Kia tahe reerytyhyre. ⁷ Kaiboho wawana Deuxu ruxetòena luuna-wana widee inyboho riubỹtỹnyre. Ròtena-ki rarewãhãu, tule ròtenaribiòlòmỹ rarewãhã. Tule Rybewihikỹ retỹnynymy rarewãhã kiamy heka rahòtinymahãre, wawo-ki adireny rahòtinhyymahãre. ⁸ Sòwemy arawehityynanyteri. Deuxule kia rierymyhỹre. Jesuisi Kristu ruxetòena uludumy iny widi roire. ⁹ Kia ixitòedỹỹna tule Deuxu-ò rewahinyre umyreny. Aluunareny sòwemy rỹikemy rexitòenyre. Tule araykywydynareny riixidorudỹỹnymyhỹke. ¹⁰ Tibo awityhymy rỹira kaiboho biijebenykemy rexitòenymahãre. Tule inatyhywidỹỹdumy rarekremy tamy rexitòenymahãre òbitihyylemy rarekemy Jesuisi Kristu bededỹỹnanatxu-ò. ¹¹ Òbitidỹỹna bederaty wesele rare. Kaiboho oworu taraty-di rỹimyhỹre wese tỹxihikỹlemy òbitidỹỹna-di matxibenykemy rexitòenymahãre.

¹² Jiarỹ ròtena-ki rãireu, kia tahe Rybewihikỹmy rybe riwiòhenanyra. ¹³ Kowa dori ibutumy yrubudỹỹdu mahãdu roholare, dinodu heto itxeredu mahãdu wahe. Tai tahe bierybenykemy tuu rarybere. ¹⁴ Jesuisi Kristu òraru-ki tahe ròtena-ki rãimỹ rarewãhã. Ibutumy iny tahe kia rieryre, iòraru-ki. Waròtena òraru-ki tahe ityhydỹỹdu mahãdu Inynyrỹ aòmỹdỹỹnadile ròhòtinyre, tule Deuxu rybe rarybemyhỹre ruberuòhyylemy ixitòedỹỹna-di. ¹⁵ Ijò heka ixityhydỹỹmy Rybewihikỹmy rarybemyhỹre. Ijò tahe inatyhymy Rybewihikỹmy rarybemyhỹre. ¹⁶⁻¹⁷ Rierymyhỹre waròtena Rybewihikỹ òraru-ki rare. Ixityhydỹỹna mahãdu tahe inatyhy òbiti aòkò rare. Aòhòkỹmy adotỹỹnykemy wadi ihỹre Rybewihikỹ-di. ¹⁸ Aòhebohe arotỹỹnykre? Arabedewomy

aõbo ada areysakre aõbo. Areysahyymy ararekre. Kristu rybe dori rarybemy rarehyymy iny inatyhynadiremy ada aõkõremy. ¹⁹ Jiarỹ areysatyhykre ròtenawo-ribi dori aròhònykre. Aixitòedỹna, Jesuisi Kristu Tyytybytyhy riwawiòhenanykreki. Kia tahe reeryre. ²⁰ Deuxu aõmydỹnana ariwiòhenanykemy watzireri waumy-di. Jiarỹ arurukeki ada aõkõkeki aõbo. Jiarỹ araixỹruòtyhykemy watzireri aõhebo arotỹnykreki. ²¹ Kristu dee warumy ararekre. Tahe arurukeki kia tule wadee awire. ²² Tahe ararekeki Kristu dee araaõmysỹdỹmy arareke iny-ò Rybewihikỹmy ararybekre. Tibo awityhyre reerykõre. ²³ Tahe ixityre aròhòtiwydynanykeki kiamy heka rahòtinyreri. Arakre Kristuòhyyle heka Kristu-ò arakele awire. Tii heka awityhyre. ²⁴⁻²⁵ Atòenarenkyile tahe warumy ararekre. Tai tahe kabede-ki ararikre aityhydỹna-di beysakemy maumynykemy. Tai tahe kaki ararekre. ²⁶ Iu ayreny-ki aralokreu, Deuxumy bealàbenykemy watzireri, ayreny-ki ixityre watzireriki wahe.

²⁷ Biyrybenykemy adireny watzireri iwese Kristu tyhydỹdu mahãdu rỹira wesekey adireny watzireri. Ayreny-ò arakeki aõbo ada araõkeki aõbo ijyy wihikỹ-ò adoholamyhỹkemy watzireri. Kaiboho wiwana wanale inatyhyna rybe-di tarybemahãtenyete. ²⁸ Uritere brebuõmy aòludu lau Rybewihikỹ òludu lau wahe. Tamyreny tahe kia rubu bina bede urihixina rare. Tahe adeereny biu-ò hena rare. Kia Deuxu-ribi nade. ²⁹ Aõ Kristu tetyhynytemy sohojile aõkõ tahe tamy aõhòkỹmy tatỹnytenyete tule. ³⁰ Inyboho dori ibutumy wiwana aõhòkỹmy rotỹnykre. Jiarỹ sòwemy aõhòkỹmy adotỹnymahãde. Kia-ò tahe taholatenyete wamy.

2

¹⁻³ Kaa aõbohe rỹire wiòhedỹna luuna-wana Kristu-ki, biòwana aõbo Deuxu Tyytybytyhy-ki. Kohe, kia ibutumy Jesuisi Kristu kilehekỹ rỹire. Ibutumy tahe wiluumy boibeke, wiwesehyyle mohòtinybenyke, wii bitòrabutenybenyke. Tai tahe areysakre aòrarureny-ki. ⁴ Iximy xiwederenyõmy. Tahe wiribi lahiximy boibeke, aõkõmy ixi-di marãkykynybenyke. Iny sohoji sohoji aõna aõnadirenyremy ixi-di nohòtirennyõmy. Tahe hitxihiximy bòwidỹke iny sohoji sohoji iny witzira aõmydỹnana yrubudỹmy marãkywydynanyke. ⁵ Iwese Jesuisi Kristu inywitzira aõmydỹnana-di ròhòtinymhyỹre wesele, kaiboho mohòtinybenyke. ⁶ Jesuisi Kristu juhuhyy raremyhỹ, Deuxule rarehãre. Deuxururu tahe rimoõhyre. ⁷ Tahe iribi ritare kaò idi kodobehekemy deòdu weselemy. Tahe inyumyõ rimoõre kaki inylemy rarekemy. ⁸ Tamy tahe ibinatyhymy nade itxeò-ki rurukemy wahe. Ibutu aõbo kaki

riwinyke heka, riwinyre. Tai tahe ibutu ratyre Deuxu Jesuisi risĩnyre. Ibutuni ratyre ini rare. ⁹⁻¹¹ Kiani-ò tahe ibutumy tatiowomy resekemy rĩre, biu mahādu, bedeludu mahādu, suwomy rĩra mahādu. Tahe ibutu rybe witxira witxiramy iny rarybemyhĩre: —Jesuisi Kristu ibutu wedu rare. Deuxu inytybomy ibutumy reālāmyhĩre. Kiamy waseriõre walu-uduboho. Awana watxireriki tule iwitxira bede-ki aratxikre hārele. Deuxukihyyle atximahābenyke. Warybe bityhinyke.

¹² Aityhydĩna-di òraru-ribi bexitabenyke, bexiebenyke òraru-txi ixelau. ¹³ Deuxu heka adeewina riwahinymyhyre òbiti widĩna. Tiile riwiòhenanymyhyre òbitina widĩna. ¹⁴ Uritere rybe binamy rybeõmy. Adeburemy iny iijeõmy. ¹⁵⁻¹⁶ Tai tahe inyõ rybe binamy umy rarybeõtyhy. Òbitityhomy boibeke kaiboho dori Deuxu riõremy toite. Kristu kodobehkreu, aòrarureny-ki areysakre. Retare dori aõmydĩnana wihikĩõ ayreny-ki. ¹⁷ Arurukewana ayreny-ki rybe wihikĩmy rybe òraru-ki, taile areysakre. Deuxu-ò dori rexiwahinyre xiwena wesemy arurukremy wahe. ¹⁸ Kaiboho tahe wadi beysahyymy boibekre ixideewimy tahe adeereny arurukremy wāhāre.

¹⁹ Aõwesele Tximòtxi ayreny-ò ariteònykemy idi watxiwāhāre. Jesuisi Inynyrĩ dee wikeki. Tai tahe arierykre timybo kaiboho toite wahe. Tai heka areysakre. ²⁰ Tximòtxi tahe arawiòhenanyrenykre iny witxira witxira ratyre wahe. ²¹ Ijõ dori ixidile rōhõtinyinmyhyre Jesuisi Kristu aõmydĩnana-di aõkõ. ²² Tximòtxi tahe teerytenyete iwese riwawiòhenanyre wese Rybewihikĩmy rybe-ki. Iwese tyby iriõre riwiòhenanymyhyre wese Tximòtxi riwawiòhenanyre. ²³ Aõbo wadee rōhõnyke arierykreu, tai wylemy ayreny-ò aditeònykremy idi watxireri. ²⁴ Jiarĩ òsana tule wylemy Deuxu riwateònykemy wadi ratxireri ayreny-ò. ²⁵⁻²⁶ Ijõ hābuõ iteòdĩmy raruwāhāre ayreny-ò, Epafroditu wahe. Tii wawana noduõ rare. Kaiboho juhū wadee teteònytenyete wawiòhedĩdumy rarekemy. Tii heka awehityyrenymy rurumyhyre. Tai tahe reòkesedĩnyreri kaiboho iwebinaduna-ò taholatenyete. Tai heka òkesemy riwisĩnyre. ²⁷ Inatyhy rare rurure inihe. Tahe Deuxu riruxetòenyreki riteytenyete. Jiarĩ tule Deuxu wadi raruxetòere. Tai rabadewoõhyre aõwitxira witxiramy ratĩnymahāreki. ²⁸ Tahe aõwesele ariteònykemy watxireri. Kaiboho beysabenykre kia araerymahārenyete. Jiarĩ tahe urihimy-ò arexielehinykre wanohõti yrena-ribi. ²⁹ Tii kedehemynykreu, tahe bididybedenykre biwowydynybenykre. Rexiõhārunymy rare Kristu òraru-ki riwawiòhenanykremy. ³⁰ Tahe tii inihe heka

rurure iòraru-ki. Arokoreny-ki tii riwawiòhenanyre.

3

¹ Ikonanamy tahe ararybekre: —Beysabenyke, Inynyrỹ deysanamy. Jiarỹ heka riwaixiranyòhyymhỹre heka tuu rybe. Awire tahe bohlabenykeki. ² Bexiijebenyke iny ijòròsa wesena-lau tii iixỹruterere aòbinawidỹỹdu mahãdu tahe tii rare. Bexiijebenyke notykyresydu mahãdu lau. ³ Inyboho dori notyky resydu mahãdu òbiti rare. Deuxu Tyytybytyhy deewimy nodu roire. Jesuisi Kristu dee winale inydeereny awire. Inyboho dori aòwiihikỹwidỹỹ-ò rikityhynyrenyòke. ⁴ Jiarỹ, Paulo ariòludunyleke aòbo ixi-wana ariwinyke. Jiarỹ ijò hàbu ratyre waaòmydỹỹnana diremy arexityhinyke. Jiarỹ dori judeu mahãdu ijoi tyhy-ki tybie rare noty resyna ijoi tyhy rare. Debò inataò reurotxu-di reareu. ⁵ Bejami mahãduò jiarỹ rare. Judeu mahãdu tyhy wãhãboho roire. Iriòremy jiarỹ rare. Fariseuò jiarỹ rare. ⁶ Tai tahe bedewina rybe retyhynyre. Jiarỹ heka iijaramy raeleemy reamahãre ityhydỹỹdu mahãdu aòhòkỹmy arisỹnykre-ò. ⁷ Wabede ywinareny òbitimy rare sana raholamahãre, ibutumy retyhynymy rarewãhã. Ibutumy wahe aòmydỹỹnana reatyra Kristu luuna òraru-ki. ⁸ Inatyhymy Kristu wabiu-ò hedu reeryreu, ibutu aòmydỹỹnana-ribi wanohòti rosare. Ibutumy retxiwire iòraru-ki, kia ibutumy aò aòkò rare, Kristu wabiu-ò hendale arimykre wabiu-ò hedukremy rare. ⁹ Waòbitina tahe aò wawidỹỹna aòkò rare. Jesuisi retyhynyre urenana tahe tii riwaòbitinyre. ¹⁰ Kristu arierykemy idi watxiwãhãre. Rubu-ribi ixixana arierykemy, aòhòkỹmy arotỹỹnykre iòrarukile, iwese tii rurure wesemy wahe jiarỹ heka arexiywinykremy watxireri. ¹¹ Tai rubu-ribi ixixana mahãdu-wana arexixakre. ¹² Jiarỹ òbitityhy aòkò rare ada ibutumy òbitina wadee riwahinyòre. Jesuisi riwamyre aòmysỹdỹỹnaò ariwinykemy. Tai tahe wako-ò rawãhãre araòbitinykemy watxireri. Tamy tahe araaòmysỹdỹỹnykemy watxiwãhãre. ¹³ Òbitityhy aòkò jiarỹ rare. Kia sohojile tahe ariwinykre. ¹⁴ Tahe arehemynykremy watxireri titxibo Kristu diwateònyde. Kowa bedewihikỹkile uriòno aritakre. ¹⁵ Tahe ityhydỹỹdu iumy kia-di mohòtinybenyke. Inyò aò rieryòkeki Deuxu tamy kia ritỹnynykre. ¹⁶ Uritere biijebenyke inatyhyna bityhynybenykemy wiwese weselemy ròkòhòtinyrenyke.

¹⁷ Ityhydỹỹdu seriòre, iwese rewinyumy rarewãhã wese biwinymy boibeke. Tule ijò-ò betehebennyke wawese dori riwinymyhỹre. ¹⁸ Sòwemy dori iny òbiti aòkò rỹira, Kristu òludumy wahe, itxeò aòmydỹỹnana òludu wahe. ¹⁹ Kia iny tahe

Deuxu rahukre. Rÿsÿnale ta ideuxure. Tiiboho tahe aõbina binaòle awirenyre. Bede aõmydÿÿnanadile rõhõtinyre. ²⁰ Iny bedereny tahe biu-ki roimyhÿre. Kowa-ribi reraòrenyleri iny tarasadu dehemynyna-ki. Inynyrÿ Jesuisi Kristu wahe. ²¹ Tii inyumyreny riwixiranykre. Tii taumywelese iny ritxi-ienykre, taumy wihikÿtyhy wesemy. Tii ruru dire. Tahe ibutu aõna aõna wedumy ronykre irurudireki.

4

¹ Waluunadu, waseriòreboho, kaiboho wadeysana warataana wesemy toite. Ywihyulemy boibekre, waluunaduboho.

² Warybe rewahinyre inatxi hãwyy-ò Eòdia, Sintxiki-wana. Kialemy wahe Inynyrÿ tyhydÿÿna-di wiwesehyulemy maraykynyke. ³ Adee tule wawiòhedÿÿdu tyhy waryhe rewahinyre. Kai biwiòhenanykre hãwyy Rybewihikÿ wiòhedÿÿdu mahãdu wahe. Tule Lemetxi riwawiòhenanyre ijõ-wana wahe. Ibutumy inireny heka Tyyritina rubuonanakõdu-ki rÿire.

⁴ Inynyrÿ-wana beysahyybenyke. Tahe ixityremy ararybekre. Beysabenyke. ⁵ Ywina-di bisÿnyke ibutu iny-ò. Inynyrÿ dehemynyna dori iòhòmÿ ihÿre. ⁶ Ibutumy aõmydÿÿnana heka biyrydÿÿnybenyke. Ibutumy bexitòenyke Deuxu-ò, àlàna-wana bexitòenyke. ⁷ Deuxu ywina awo-ò bitidikre arayky ibutumy riyrubunyke. Deuxu ywina dori inraykyreny rieryòtyhy timyrekibo awityhyre.

⁸ Ikonanau tahe ibutumy aõmybo ararybekre maraykynybenyke ibutu inatyhyna, ibutu aõeryhykÿ, ibutu òbiti, ibutu tiiphyule, ibutu iluuna, ibutu tyhyna awimy tahe roirekeki àlàna-wana rÿikeki, tahe kia-di ibutumy maraykynybenyke. ⁹ Araerynanyreny, kaiboho teerytenyete, rarybereò tahe taholatenyta. Timybo watxireri wese kaiboho wamy tabitenyta. Tai iwesemy boibeke, ibutumy wahe. Deuxu heka ywina rare. Tii umywanarenyle rarekre.

¹⁰ Jiarÿ heka reysare Wanyrÿ dee. Kaiboho heka ixityre watxi òhõtireny reare. Tiu waribi òhõtireny rosaõhyre urile kaiboho wawiòhedÿÿmy tarutenyete tahe isirare. ¹¹ Kaa tuu rarybereri heka aõmy raruõhyreri. ¹² Jiarÿ dori reeryre aõbo wamy rÿira idi reysamy watxiwãhãre. Ibutumy waki rÿimyhÿre-wana tule awilemy rahõtinyinmahãre. ¹³ Reeryre dori awimyno tule ramamy rubu reeryre. Xiwersyna wese reeryre tule aõhòkÿmydÿÿ reeryre rama jubreré. Kia tahe reeryre. Ibutu ariwinyke Kristu dori ruru wadee riwahinyre. ¹⁴ Tule umy arealækemy watxireri tiwawiòhenanyteki. ¹⁵ Filiposi hãwã dohodÿÿna mahãdu, kaiboho sohojile nieruò

wadee tewahinytenyete, juhoo Macedonia hãwã-ribi rareu wahe. ¹⁶ Tesalonia hãwã-ò wadee nieru tewahinyamahãtenyete, inatxi nonanamy taditeònytenyete. Tahe riwamyre wadee rasiranymy idi rewyré. ¹⁷ Aõ rexitòenyneri aõkõ nierumy. Sohojile aõmydỹnanamy aribi aritakemy watzireri. Deuxu aõmydỹnanale aritakemy rarumahãre. Umyreny Deuxu wehityhynamy arobikemy. ¹⁸ Remyre awahidỹna. Epafroditu aribi riwawahinyre. Tai tahe sówemy waki rỹireri. Iwese lỹnyrena sówemy watxi reamyhyre wese awahidỹna wadee rare. Iwese Deuxu-ò xiwenaõ awire wese wadee ihỹre. ¹⁹ Aõhere inyDeuxureny ihewoludu atyhyna loosòna adeereny kadiwahinykre, Jesuisi Kristu òraru-ki. Aõbo adeereny rasiranyneri. ²⁰ Deuxu kidiwahinykemy adeereny watzireri. Kia tahe inyDeuxureny-ò loosòna kidiwahinykemy watzireri tiemy heka rarehykre. Kie.

²¹ Iny sohoji sohojimy warybe-di biwehityynanykre Jesuisi Kristu òraru-ki. Kaki ityhydỹdu mahãdu tarybe wehityyna adeereny diwahinyde. ²² Ibutumy ityhydỹdu arãrybeweityhynanyre. Iòlò heto ityhydỹdu mahãdu yribi-hyyle adeereny diwahinyde.

²³ Inynyrỹ Jesuisi Kristu ruxetòena adeereny kanakemy watzireri.

Òlòsò Paulo Tyyriti, Òlòsò Hãwã-ò

¹ Paulo, Jesuisi Kristu deòdu Deuxudeewimy rare kia tyyriti rewahinyre. Tule Tximòtxi inyseriore rybe we-ityhyna riwahinyre, ibutumy ityhydỹ̃du seriòre-ò Òlòsò hãwã-ki. ² Wiòhedỹ̃na, ywina, Deuxu inytyby-ribi adeereny kanakemy watzireri.

³ Jesuisi Kristu-ò àlàna rewahinyhyymahãre, tule Deuxu Inynyrỹ tyby-ò. Adeereny dori rexitòenyhyymahãre. ⁴ Kaiboho Jesuisi Kristu tetyhynymahãtenyete. Tule kowa ityhydỹ̃du mahãdu wiluurenyre. ⁵ Rybewihikỹ inatyhyõ juhoo taholatenyete. Idi tahe araròsòna tetatenyete. Tai tahe biu-ribi kia ibutumy kanakre. ⁶ Iwese Rybewihikỹ bede bedelemy rariamyhỹre wese adeereny tule dehemynyde. Rybewihikỹ aõwihikỹ adireny riwahinyre. Iwese òwòru taraty riwahinyhỹre wese, kaiboho inywitxira-ò aõwihikỹbo tewahinytenyete. ⁷ Epafa jiarỹ wiwana Deuxu deòdurenyre. Kia iribi tadoholamahãte. Tii Kristu rybemy rybedu òbiti rare. ⁸ Tule wadee relyyre Deuxu Tyytybytyhyòraru-ki wiluuna-di ahãtenyete.

⁹ Kia inyboho roholarenyre, adeereny rexitòenyhy watiwãhãrenyre. Rexitòenymyhỹ Deuxu dee wityhymy kaiboho bedierybedenyke. Deuxu Tyytybyerynatyhy-di boibekemy, bedeerydỹ̃na-di. ¹⁰ Deuxudeewihyymy kaiboho atximahãtenyete maratynyke wesemy aõwihikỹmybo. Biubỹ̃tỹnomy boibeke Deuxumy bierybenytyhykre. ¹¹ Ibutumy ruruna-di boibeke Deuxu ruruna wityhy-di texihymy tadonymahãte ibutumy aõhòkỹmy bodotỹ̃nykre deysana-di. ¹² Deuxu inytybyreny-ò àlàna biwahinybenyke. Tii iny riywidỹ̃nyrenyrya inyjura juramy ritakemy. Kia jura jura ityhydỹ̃du mahãdu hõrõ rare Deuxu loosònawo-ki ratximyhỹrenyeki. ¹³ Tii bedeluru òlòna-ribi diwatade tahe diwadyde taRiòre luuna òlòna-ò. ¹⁴ Kristu heka iny ritare. Tii iny òrarunareny riòwynyre. Ibutumy òraruna riixãwidinare. ¹⁵ Jesuisi heka Deuxu lobixidỹ̃na rare. Deuxu tahe alobixina aõkõ rare. Ibutumy widỹ̃na-ribi tii juhoo rãire. ¹⁶ Tii tahe ibutumy bededỹ̃nana widỹ̃dure. Ibutumy biu-ki bede-ki lobixina lobixiõna-wana riwinyre. Iòlòna wedu tyhydỹ̃na ruruna. Dinodu widỹ̃na. Ibutumy tii riwinyre ixidee. ¹⁷ Tii ibutu aõna aõna-ribi juhoo rỹire. Ibutumy aõna aõna taruru rimireri tai. ¹⁸ Iwese umyriti umy wedu rare kia wese Jesuisi ityhydỹ̃du mahãdu riti rare. Tii juhuna

rare. Iwedu rare. Tii rubu-ribi ixixana juhuu ludu rare ibuturatyre dori Deuxu risỹnyre juhuuludumy ratxikemy. ¹⁹ Jesuisi-ki ibutu wiwihikỹ rarekemy. Kia tahe Deuxu dee wire. ²⁰ Deuxu ywina diwahinyde Jesuisi hãlubu-di itxèò-ki. Jesuisi hãlubu xiery ibutumy Deuxu riwaaxidỹnyre biu-ki bede-ki. ²¹ Kaiboho Deuxu ery aõkõ juhuu toite. Iòludu toite, arayky-ki aõbinahakỹ widỹỹ tadexinohõtinytenyte. ²² Jesuisi umy-di Deuxu arainythydỹnyre Jesuisi rurureki. Tai Deuxu tako-ò akanatamadỹnykre taòbitidỹnyteki aòraru lyrana-di, aòraru tuedena-di inyõ umy ibinamy rarybeõtyhy. ²³ Urile tyhydỹna-ki boibebenyhyke araròsòna-ribi ixihitxidỹõmy. Araròsòna dori Rybewihikỹ-ribi nodu rare. Tii-ò tahe taholatenyta. Ibutumy iny biurawoludu-ò Rybewihikỹlemy narybede. Iribi jiarỹ, Paulo, Rybe wihikỹmy rybedu ròhònyre.

²⁴ Wijile reysamy watzireri adee aõhòkỹmy ratỹnyreriki, aõ aõhòkỹmy dỹnanabo Kristu-ò rauhenyre. Tai jiarỹ aõhòkỹmy arotỹnykre waumy-ki hyumy. Kristu-ò rỹira mahãdu dee kiamy ratỹnyre, dòhòdỹna mahãdu dee. ²⁵ Iribi jiarỹ Rybe wihikỹmy rybedu ròhònyre. Kiamy Deuxu dee wimy diwateònyde tarybemy rybedumy. ²⁶ Tii ihetxiu rybe inatyhy ibutu lau rexiwore. Wiji tahe rexitỹnyre ityhydỹdu mahãdu dee. ²⁷ Kia-ò Deuxu rexitỹnykemy ratxireri iwese aõwihikỹ, taloosòna ratxireri, ibutu iny witxira dee. Kristu inywo-ki, kia tahe iny iraròsòna rare. ²⁸ Kia Rybewihikỹmy relymahãrenyre ibutumy iny-ki reerydỹnanamahãre bederysyna-di. Kia wesele ibutumy ityhydỹdu mahãdu òbiti Kristu-ò ariteòsinykre. ²⁹ Kiaòle tahe rexirurudỹnyhyymahãre, Kristu rurudile waki rỹimyhỹre.

2

¹⁻² Warayky-ribi ijesu nihikỹmy resumahãre awo umyreny rahõtieremahãre reysakemy Òlòsò hãwã-ki. Laodisia mahãdu tule wamy robiõmyhỹre mahãdu tule wiluutyhyrenykemy kaiboho ibutumy Deuxu bedeerysynatyhy bierybenykemy adireny watzireri. Kristu-ki tahe bede erysynatyhy-di atxiteri idi watzireri. ³ Kristuwo-ki ibutumy bedeerydỹna bede erysynatyhy ityhyna wesemy riyrubunymy rỹire. ⁴ Kawese rarybera inyõ arãitxenanyõmyhỹkemy rybe rayky-ribi ije-di. ⁵ Waumy awanareny ratxiòreri, watytyby tahe awanareny ratxireri, riwadeysanyreri, aõwityhy òbiti-di riwaerynanyreri Kristu-ki aityhydỹna-di riwaerynanyre.

⁶ Iwese Jesuisi Kristu heka Inynyrỹhyny tetyetynte wese. Tai tii-wana mabehybenyke. ⁷ Iwese oworu irarutiò rimymyhỹre wese myike. Anaerynadỹnymahãde wese maumynyke àlàdỹnamy.

⁸ Bexihārubenyke, inyõ anaitxenadỹnyke lau. Tarayky-ribi ije rybe-di lahirybe-di anaitxenanykemy ihỹre rybe uritere ije ije-di. Kia rybe iny aõmydỹnana-ki rỹire bede tyytyby aõmydỹnana-ki. Kia Kristu aõmydỹnana aõkõhyomy rỹirake. ⁹ Kristu umy-ki tahe ibutumy Deuxu ixitỹnydỹna rỹire. ¹⁰ Tule Kristu-ki kaiboho tyhynamy toite, texihutenyete. Tii heka ibutumy hãbu rurudỹna ratyre rare, iòlòdỹna ratyre rare. ¹¹ Iwese uladunotyky riòròre wese Kristu aòraru urarina aribi diorode. Notyy resyna inatyhy aõkõ rare. Kristu iwesenalemy riwinyre. ¹² Taratisebenytenyete, Kristu rubu wesemy tewesenatenyete deledede. Tule beribi tadòhònytenyete irubu-ribi ixixanamy tewesenanytenyete. Deuxu tyhydỹna-di rubu-ribi texixatenyete. ¹³ Kaiboho aòraruna-ki tòimyhỹteu rubu wesemy notyynaresy aõkõ-di toimyhỹteu, adeereny runa Deuxu diwahinyde, aòrarureny diixãwidinyde. ¹⁴ Kristu iny òraruna widỹnareny-ribi tòhòti rosara. Kia tyyritina-di riixãwididỹnyre taitxeò-ò rareu. ¹⁵ Rurudỹna mahãdu ruru dinodu mahãdu ruru ritara, ibutumy iitxerenarenymy ibutu-ò riteòsinyre. Kristu taitxeò-ki irurureny ritara.

¹⁶ Kaiboho tahe uritere iny rybemy deòbyrenykyõmy roxina bemomo, ada ahãdu herinau ixenamy, ada sabado bededỹnanamy. ¹⁷ Kaiboho dori aõ kanakre wesemy rare. Kristu tahe ibre tuu rare. Kia aõmydỹnana aõ aõkõ. ¹⁸ Inyõ adeereny rarybekeki: bexitxiõnyke ýju biteàlànykemy, rasina-ki ierysomy mohòtinykemy. Tamy ijohonarenymy urile erydỹdumy rohòtinyra. Tii tahe Kristu rityhynyòhyymyhỹre. ¹⁹ Inyummy wese inyboho ihỹrenyrye. Kristu tahe umy ratiwesere. Umybutule-ribi ibutumy iukỹna wiwana reare. Ibutumy òhòna tusina-wana umy rabutumyhỹre. Deuxu umyna-di umy raumymyhỹre.

²⁰⁻²² Kai Kristu-wana taruta-wana bede aõmydỹnana-ribi, aõherekibo wiji bede aõmydỹnana-wana arummy ahãte. Aõherekibo bede ywina witxira witxira tetyhynymy ahãte: imyny wedeydỹòmy. Tamy ade rexiõmy, roxina urihixiõmy. Kia wese hãbu bede ywina tetyhynymahãtenyete. Kia aõmydỹdỹkeki, rexihuke. ²³ Bede erydỹna wese ratxireri. Kia dori ixideele rexytyhydỹnyre iyubu wesemy rawesenanyreri, taummy ixidee aõhòkỹmy rexisinyre. Ibutumy kia tahe riwiòhenanyòhyymyhỹre umy òraluna lau.

3

¹ Kaiboho Kristu-wana texixatenyeteri wana, biu ludu aõmydỹnana-di mohòtinybenyke, tai Kristu Deuxu ruruna weribi rasỹnymy ronymyhỹreki. ² Biu ludu aõmydỹnana-di

mohõtinybenyke, kabede ludu aomydỹnana-di aõkõ. ³ Rubu wesemy dori ahãtenyete, aumy tuedeõna runa Kristu-wana rare –Deuxu-ki riyrubunymy ratximyhỹre. ⁴ Kristu rehemnyre, tule tii-wana rakatxirenyke.

⁵ Tai õhõti bitosanyke bedede ludu aomydỹnana aki rỹire: uri uri rỹira mahãduhemy ijara, õbitiõna, deõsana hemy nodu, iõbi retỹnyre õbiti-di aõkõ rare. Inyõ rỹire-di õtena kia ritxoo àlàdỹna wese rare. ⁶ Kia aõna aõna Deuxuwo binana rare, kia-ò Deuxu ykarana kanakre kia òrarudu mahãdu-ò. ⁷ Kaiboho kia tewinytenyete aõrarunareny òrarudumy toiteu. ⁸ Wiji tahe ibutumy kia aomydỹnana aribi rexihukemy idi watzireri –wobinana, ujõmo, rybe ije ije. ⁹ Iny witzira-ò ruiõmy, araybidinatyby dori aribi dexihude, iwidỹnabina-di. ¹⁰ Araybidina tỹmyra-di tahe texiumydỹnyete tii araijõnyre bedeerysynahakỹ-di, Kristu raybidina wesemy araybidina rarekre õbitimy araijõnykre. ¹¹ Kowa-ki wii rikininirenyõkre: judeu mahãdumy, judeukõdu mahãdumy, notyky resydumy, bedeeryõ mahãdumy, txiebese wese mahãdumy, deõdu mahãdumy, deõdu aõkõ mahãdumy ibutumy Kristu dee wiwese weselemy rỹire. Kristule tahe ibutumy ihỹre inydeereny. Tii ibutu inywo-di ratximyhỹre.

¹² Kaiboho Deuxu ijesemy anadymyhỹde tahõrõ luunana mahãdukremy. Tai ruxetõena-di boibekre ixãwidina-di, inythyyna-di, ywina-di. ¹³ Wii riwiõhenanymy rỹike. Wii riixãwididỹnyemy rỹike. Inyõ adee aomy rotynykeki ixirawomy biijeranyke. Iwese Inynyrỹ araxãwidinyre wese iny biixãwidinyke. ¹⁴ Ibuturatyre wiluurenkemy kiadile kaiboho wiwana ibutumy boibeke iweselemy mohotinybenykemy. ¹⁵ Kristu ywina heka umyy-ki itxeredumy rarekre. Kristu hõrõ mahãdu sohojilemy mabeke. Tai tahe àlàna tamy biwahinybenyke. ¹⁶ Kristu rybe-di awo-ki mabehyymy mabekre idi watzireri. Wii bierynadỹnyemy bitohonymahãbenykemy bedede erysyna-di. Deuxu-ò àlàna biwahinymahãke wiurybe-di, wiu-di Deuxu Tyytybytyhy wina-di. Mawinyke àlàna-di aworeny-ribi. ¹⁷ Ibutumy tuu marybekremy, ibutumy tuu botỹnykremy Wanyrỹni-ò, tuu botỹnykre Jesuisi Kristuni-ò. Inytyby dee àlàna biwahinykre, Deuxu-ò wahe.

¹⁸ Hãwyy! Kai ahãbu bityhynyke, Deuxu ersydỹna-di. ¹⁹ Hãbu! Kai ahãwyy luuke, idi tudõrenyõmy. ²⁰ Uladu! Borybe, adirybe-wana bityhynyke. Kia tahe Inynyrỹdeewire. ²¹ Uladuse, uladutyby! Kai ariõre ikyaradỹõmy, bedede wona-di aõkõ ratxikemy. ²² Deõdu mahãdu! Kai kabede-ki awedurybe-di ibutumy bityhynyke aõ idi retehererikile aõkõ, awedudeewi sohojilemy aõkõ, awo-ribi tyhy Inynyrỹdeewimy

tuu botỹỹnyke. ²³ Aõbo botỹỹnymahãke ibutu Deuxudeewimy botỹỹnyke. Hãbudeewimy aõkõ. ²⁴ Deuxu-ribi aõwydỹỹna kanakre. Kristu-ò dori taaõmysỹdỹỹnymahãte. Adeereny rahetoõ riyrubunymy roimyhỹre. ²⁵ Inyõ tahe aõbina riwinymyhỹkeki, ihewomy aõbinale ritake. Deuxu dori ibutu dee wiwese weselemy idi rotỹỹnymahãre.

4

¹ Wedu mahãdu, kai eòdureny dee òbitimy idi ahãbenyke. Kai tahe tule awedu dire biu-ki. Kia nohõti losaõmy.

² Bexitòenyhyymahãbenyke. Betehehybenyke. Bealàhyymahãbenyke. ³ Inydeereny kia bedexitòenykre. Deuxu rybe wihikỹ-ò iny dee hãwã wixira-ò kidiraynykre, Kristu inatyhynamy arelyyrenykre. Iòraru-ki womati reroti nihikỹ-di watxiwãhãre. ⁴ Kia ritynynykre idi watxiwãhãre. Waaõmysỹdỹỹna kiemy dori ihỹre. ⁵ Biu ludu bedeerydỹỹna-di boibeke ityhydỹỹdukõdu mahãduy-ki. Aõwihikỹrybe hexitỹnynykeki, turybelemy idi beake. ⁶ Arybe aõwi weselemy biyrubunyke, iwese rỹsỹna juwyrana wana raurinymyhỹrewi wesemy. Tai arawyòna ijòdikre tỹỹraxina-ò.

⁷ Txitxiò ibutumy waaõmydỹỹnana adeereny relyykre. Tii waityhydỹỹdu seriòre waluumy rare. Tii rybedu òbiti iny-wana ratxireri. ⁸ Adeereny reteònyreri waaõmydỹỹnanareny erydỹỹnamy awo deysadỹỹmy. ⁹ Onesimo heka tii-wana ariteònykre. Tii tule òbiti ityhydỹỹdu seriòre ratxireri. Ahãwãreny yluduõ rare. Tiiboho kedelyydenykre ibutumy timybo wãhãremy.

¹⁰ Aristarku wawana ròtenawo-ki wãhãre. Tarybe adeereny diwahinyde. Marku adeereny tarybe tule diwahinyde. Tii Banabe exi rare. Markumy, warybe teeryte, adeereny rybe rewahinyre wahe. Tii adeereny kedehemynykeki, bidiwìhenanyke. ¹¹ Josue-Justu ibutumy eryna rare. Jesu-isi inityhy rare. Kaiboho sohojile tahe judeu mahãdu-ribi iny-wana raaõmysỹdỹỹreri Deuxu òlòna òraru-ki. Tiiboho riwawiòhenanyhyymyhỹreny. ¹² Epafa tule aeryrenyõ rare tarybe adeereny diòde. Tii adeereny rexitòenytyhyymyhỹre kaiboho Deuxudeewimy boibehyykemy. ¹³ Jiarỹ reeryre tii adeereny tòemy ratximyhỹre, tule Laodisia mahãdu dee tule Ieryopoli mahãdu dee. ¹⁴ Luka, tarybe diwahinyde. Tii ityhydỹỹ òhotibedu rare. Dema tule tarybe diòde. ¹⁵ Warybe wehityhyna biòke Laodisia ityhydỹỹdu seriòre. Ninfa-ò tule wehityhyna biwahinyke dohodỹỹna mahãdu taheto-ki rỹireriwana. ¹⁶ Watyyriti-di dohodỹỹnaheto-ki rariakreu, idi tule Laodisia mahãdu-ò biòkre tako-ò rariakemy. Tule watyyriti kowa-ò rewahinyre, wimyeke amahãduko-ò rariarenykre.

¹⁷ Arikipu-ò warybemy marybeke. Tii aõmysyðdỹnaõ ritare Deuxu-ribi. Kia-di tii ratxihyykemyidi watxireri.

¹⁸ Kia tyyriti wadebò ritidỹna tyhy rare. Womati reroti-di rataataamy nadoimyhỹderibi õhõtireny lusarenyõmy. Deuxu wohyna adee kanakemy idi watxiwãhãre. Paulo.

1 Tesalonia Mahãdu-ò Juhuu Tyyriti Tesalonia Dohodỹna Mahãdu-ò

¹ Jiarỹboho, Paulo, Sila, Tximòtxi-wana heka Tesalonia hãwã ityhydỹdu mahãdu-ò tyyriti ariwinyreny Deuxu ijoimy kaiboho toiteki. Deuxu wohyna, Deuxu ruxetòena heka Waha-ribi, Jesuisi Kristu Iòlò-ribi akirenykemy he wadee awire.

² Aõu aõu Deuxu dealànamy adeereny rexitòenymahãre. ³ Atyhyna tiu inynohõti-ribi rosaõtyhy. Aluunareki dori Deuxu dee taaõmysỹdỹmahãte, Jesuisi Kristu iny Iòlò dehemynyna teraòteri. ⁴ Kaiboho, Deuxu luuna mahãdu, Deuxu iyreny ariajere. ⁵ Rybewihikỹ adee retỹnynynymahãre. Kia heka rybe sohojile aõkõ rare. Tii ruruna rare Deuxu Tyytybytyhymy. Erynatyhy teeryte. Iwese iny ako-txi ratỹnyreny wese, kaiboho teerytenyta. Aluureki dori kawesemy ratỹnyreny. Tai tahe iwese inyboho ratỹnyre wese tule kaiboho tatỹnytenyte. Tule Inynyrỹ-wesemy tatỹnytenyte. ⁶ Aõhõkỹmydỹnana hãrele heka kaiboho rybe-ò taholatenyte. Tii aradeysarenyre, aõhõkỹmy dỹnana-ki hãrele. Eysanareny dori Deuxu Tyytybytyhyribile namyhỹde. ⁷ Kaiboho tahe ityhydỹdu mahãdu wihikỹ toite. Ibutumy ityhydỹdu mahãdu heka awesereny roirekemy ratxirenyrerì Macedonia bedeki, Akaia hãwãdỹna-ki tule. ⁸ Aeryna ibutumy hãwã hãwã rieryra Deuxu tetyhynyteki, Macedonia bedeki tahe tule Grecia bedeki. Tahe kia-ò ixyby bohohabenykekõ dori rare. ⁹ Iny arora-ribi dehemynydeu inyko relymyhỹre. Kaiboho asuritxoo deuxu-di tehutenyte tahe inatyhy Deuxu tetyhynytenyte, Deuxu iru wahe. ¹⁰ Iriòre biu-ribi kanakremy teraõmahãtenyte. Kia heka Deuxu rubu-ribi riixixanyré rare. Jesuisi sohojile heka Deuxu debure-ribi riwatarenykre. Deuxu dori òraruna òraru-ki sõwemy rakyaranynihikỹmyhỹre. Tule kia umy inydee relymyhỹrenyre.

2

¹ Kaiboho teerytenyte arora-ò roirenyreu, jiarỹboho Deuxu aõmysỹdỹna sõwemy rewinyrenyre. ² Jiarỹboho aõhõkỹmy ratỹnyrenyre Filiposi hãwã-ki. Tai tahe adee rehemyre Tesalonia hãwã-ò wahe. Deuxu taruru diwahinyde. Tai heka jiarỹboho adeereny roirenyre Deuxu ijyywihikỹmy arelyreny kemy. Sõwemy inydeereny òbinadu rỹire. ³ Iny rybe-di tỹnydỹnareny inatyhymy rare. Inyboho òbitimy

rõhõtinyrenyre. Jiarÿboho anaitxenanyrenyõtÿhy. ⁴ Iwese Deuxu inydeereny riwateònyre wese kialemy heka rarybeke. Aõbo inysõwehekÿ deewimy aõkõ raryberenyre, tahe Deuxudeewimy. Tiile rieryre aõbo inywo-ki ratximyhÿ. ⁵⁻⁶ Tii rieryre iwese inyboho adeereny rarybemahãrenyre wese. Nieru tarasakemy aõkõ inyboho watxirenyre rui-di raryberenyremy rybewihikÿ adee rewahinyõhyymy. Awowydyna, arybe wiwihikÿ heka inydee aõkõhyymy idi watxirenyre. Ijõ iny-ribi tule aõkõ kia rybe idi watxirenyre. ⁷ Jiarÿ tiu ararybeõmahãrenyre idi anierureny aritakemy. Kia ariwinyrenykeki tahe, tule awire. Inyboho dori Jesuisi Kristu deòdÿÿna inyboho ratxirenyreri. Tahe iu jiarÿ ayreny-ki raremahãu, aluurenyre. Iwese hãwyyõ tariòre riyrubunyre wese adireny watximahãre. ⁸ Deuxu Rybewihikÿ sohojile aõkõ adeereny ariwahinykemy aõkõ, tule wabededÿÿnana tule adeereny ariwahinykemy watxireri, aruruke adeereny, jiarÿboho sõwetyhymy aluurenyreki wahe. ⁹ Sõwetyhymy jiarÿboho raaõmysÿdÿÿnymahãre ayreny-ki raremahãu, tai tahe õwyõ aõkõ teòwynymahãtenyte. Rummy raaõmysÿdÿÿmahãrenyre, txummy tule. Tai ixiaõmysÿdÿÿnadile inyboho rÿimahãrenyre. ¹⁰ Jiarÿboho ayreny-ki òbitimy roiremahã. Aõhe inatyhy, waityhydÿÿdu seriòreboho. Kia teerytenyte. Deuxu tule riwaeryre. ¹¹ Iwese tybyõ tariòre riywinyre wese, jiarÿ araywinyra, wariòre wesemy. ¹² Arãwiòhenanykemy adi watxireri arateysadÿÿkemy. Warybe dohodÿÿna-ò boholabenyke. Tai tahe kaiboho Deuxudeewina-ki atxibenyke. Tule tii-wana masÿnybenyke taòlòna-ki, toosòna-ki.

¹³ Tai tahe àlàna sõwemy Deuxu-ò rewahinyrenyre. Ayreny-ki raremahãu, Deuxu rybe tÿnydÿÿmy, kaiboho tetyhnytyhymahãtenyte. Deuxurybele taholatenyte. Tii heka inatyhy kia rare, Deuxu ijyÿtyhy wahe. Waityhydÿÿdu seriòre, Deuxu ayreny-ki ratximyhÿre. ¹⁴ Waseriòreboho, iwese Judeia ityhydÿÿdu mahãdu heka aõhõkÿmy rotÿÿnyre wese, kaiboho iwesele aõhõkÿmy tatÿÿnytenyte. Kaiboho aõwitxira witxira aõbina bina teòludunymahãte aõhõkÿmy dÿÿnana-ki. Abede ludu mahãdu tuu riwinyre. Iwese Judeia mahãdu heka judeu mahãdu debò-ki aõhõkÿmy rotÿÿnyre wese, kaiboho tule aõhõkÿmy tatÿÿnytenyte. ¹⁵ Judeu mahãdu heka juhoo Deuxu rybedu mahãdu rirubunyre. Jesuisi tule rirubunyre. Inyboho tule ribinadÿÿnykemy ratxireri. Deuxumy dòdu tiiboho roire. Ibutumy inymy òludu ratxireri. ¹⁶ Tiiboho iny ribinadÿÿnykemy ratximyhÿre, iny dori rybe tÿnydÿÿdumy inyboho ratxireri judeukõdu mahãdu-ò. Kia-di heka ijõ òraruna tiiboho ributunyre. Deuxu tahe wiji tiiboho

ribinadỹnykre. Ityrereny-ò Deuxu kyarana bededỹnana kedesekre.

¹⁷⁻¹⁸ Waityhydỹdu seriòre, aribi irehemy watzireriu, awehityhyna sòwemy wadi ratxireri. Sòwemy adi aretehekemy watzireri ixityrele. Tiubo aroramy arake, Satanasi riwabinadỹnyra. Tahe aòkòre. Araòke. ¹⁹⁻²⁰ Kaiboho dori iny raròsonatyhy, inydeysana, iny biu-ò hena Inynyrỹ Jesuisi òraru-ki atxitenyte. Tii dori kanake. Kaiboho ixityhydỹnaò heka toimahâte.

3

¹ Ikonanau tahe reòludunyrenyòtyhy. Tai tahe ixisohojile Atena hãwã-ki rỹikremy watzireri. ² Tai Tximòtxi adee reteònyre, inyseriòre wahe. Tii heka wawanareny Deuxu aòmỹsỹdỹna-ki riwiòhenanyre Kristu Rybewihikỹ tỹnydỹmy. Adeeremy dori reteònyre aityhydỹna wiòhedỹmy. ³ Tai tahe bede jei jei òraru-ki, kaiboho ahewo-ò booseòtyhy. Kia ibutumy Deuxudeewina inydeeremy rare. ⁴ Iu ayreny-ki rarewãhãu, kiamy rarybewãhãre aòma adeeremy aòhòkỹmy dỹnana kanake. Kiale tahe inatyhymy nade. ⁵ Tai tahe Tximòtxi reteònyre, omy arierykemy timybo aityhydỹna-ki tatỹnytenyte. Satanasi òsana waaòmỹsỹdỹna ayreny-ki ribinadỹnyre. Aòkòre, tii Deuxu aòmỹdỹnana ribinadỹnyòtyhy. ⁶ Tximòtxi heka Tesalonia hãwã-ribi ròðsera. Ijyy Wiwihikỹ tahe raholara. Aityhydỹna aluuna wana raumynyre. Tule tii relyyre iwese kaiboho awehityhyna dire inlyure wese. Wadeysamy watzireri, waseriòreboho, aòraru-ki. ⁷ Waaòhòkỹmy dỹnana hãrele heka wadeysamy watzireri, aityhydỹna awireki wahe. ⁸ Kaiboho awimy matxibenykeki, awimy jiarỹ watzimahãre, warumy watzimahãre. ⁹ Aòraru-ki tahe Deuxu-ò àlàna rewahinyre. Deuxu-ki tahe wadeysamy watzireri. ¹⁰ Rummy txu-wana adeeremy arexitòenykre arora-ò arake, aityhydỹna wiòhedỹmy wahe.

¹¹ Deuxu Inytyby, Jesuisi Kristu Inynyrỹ-wana riwawiòhenanykemy idi watzireri arora-ò arake. ¹² Wiluummy ibutumy ityhydỹdu mahãdu luummy idi watzireri. Iwese aluure wese wiluuke. ¹³ Tii inydeeremy ruruna riwahinykemy idi watzireri. Òbitimy tahe rakatxirenyke Deuxuko-ò, Inytybyko-ò. Inynyrỹ Jesuisi kedehemynykreu, tamahãdu-wana, tai iny imahãdule rakatxirenykre.

4

¹ Waityhydỹdu seriòre, timybo òbitimy ahãbenykemy rebedeerynyre Deuxudeewina wahe. Iratyre tahe arexitòenykre Inynyrỹ Jesuisi òraru-ki, òbitityhymy boibenybekemy. Kia tahe teerytenyte. ² Jesuisi bede

erydỹyna heka adeereny rewahinyreny. Kia teerytenyete.
 3-4 Kia tahe rare. Òbitityhymy ahãbenyke, òta òtarenyõmy. Iny sohoji sohoji òbitimy ahãwyy-wana matxibenyke. 5 Iwese ityhydỹydukõdu mahãdu riwinyre wese aõkõ idi ahãke. Tii dori Deuxu rierykõreny. 6 Tuleke kia aõmydỹynana-ki iny sohoji sohoji aityhydỹydu seriõre ibinadỹyõmykemy. Iwese rarybere wese ixityre ararybekre. Inyõ kia aõmydỹynana riwinykeki, debure bededỹynana tii ralõke. 7 Òta òta aõmydỹynana aõkõ Deuxudeewire, òbitina aõmydỹyna tamywire. 8 Inyõ kia bede erydỹyna rityhynyõkeki, Deuxule heka tii rityhynyõre, hãbu bede erydỹyna aõkõ. Deuxule Tatytybytyhy inydee riwahinyre.

9 Kaiboho aityhydỹydu seriõre mahãdu luurenyre. Tai ixyby kia adeereny ariritinyõtyhy. Deuxu dori araerynanyrenyre timybo wiluummy boibekemy. 10 Kia luuna-di tahe ibutumy Macedonia hãwã hãwã mahãdu luummy. Ihãrele tahe waseriõreboho iratyre wiluummy. 11-12 Ywina-di wi-ò wi-ò boibeke. Aaõmysỹdỹyna-di iximynamy boibeke. Tai ibutumy ityhydỹydukõdu mahãdu umyreny robikreu anatyhynyrenykre. Tai tahe ijõ iny aaõmydỹynana ixi-di nokõmy. Ixisohojilemyta ixi-di maaõmysỹdỹynyke.

13 Waseriõreboho araerynanykre rubu mahãdu aõmydỹynanamy. Tai ijõ inywese mahinybenyõke, bobubenyõke. Tii dori rarõsõna-di aõkõ ratxirenyre 14 Kristu heka rubumy roire ribile rexixare. Kia tahe retyhynyrenyre. Kiawesele tii-wana heka Deuxu taityhydỹydu mahãdu kididyke, rityhynymy rurure mahãdu tule. 15 Inynyrỹ riwabedeerynyrenyre kiamy: inyboho irumy ratxikeki kiadxuu juhuummy timy inorenykõna. Rubu mahãdu tuukre. 16 Tahe yju wedu juhUU rarybekre. Deuxu jurõna-di ritxurõnykre. Idi Inynyrỹ kodobehekre biu-ribi. Juhuu ibutumy ityhydỹydu rubumy rỹira riumynykre, riumywitziratỹmyranykre, riixixanyrenykre. 17 Tahe ibutumy inyboho irumy rỹira mahãdu heka Inynyrỹ-wana ributunyrenykre biu-ki. Tai tiwanahyy roirenyre 18 Kia rybe-di wii beysabenyke.

5

1 Ityhydỹydu seriõre, tiubo kia ibutumy aõhebo rotỹynykre. Kiamy adeereny ariritinyõtyhy. 2 Rumy wasidu wesemy kia txu kanakre. Kia teerytenyete. Ibededỹynana iny rieryõtyhy. 3 Inyõ rarybekeki: —Ibutumy awire. Ibutumy ywina-di ratxireri. Kiatxuu kedexihukre. Inyõ rahenyõtyhy. Iwese hãwyy txuberere wese, uladu ijera iõhõreu

kia rare. ⁴ Kaiboho, waseriòreboho, tetyhynytenyte tai ki-atxu adeeremy bede òtiidỹỹ aõkõ rarekre. Kaiboho dori kia teerytenyte, wasidu wesemy kanakemy wahe. ⁵ Inyboho ibutumy txuu mahãdu atxitenyte, loosõna mahãdu wahe. Bedeluruhukỹ mahãdu aõkõ inyboho ratxireri. ⁶ Tai tahe rõkõrõnyõtyhy. Bexixabenyke. Ijõ iny wese aõkõ atxibenyke. Betehebennyke. ⁷ Rummy ibutumy iny rõrõmyhỹre. Tule kiau ibutumy riõmyhỹre, axaxaluudu mahãdu wahe. ⁸ Inyboho tahe iximy rekexiòbitidỹỹnyke ywina-di. Ityhyna, luuna-wana heka iny òrarunareny itxena wesenamy rikitidikre. Tarasana tahe inyratiywina wesena rare, tarasana rarõsõna wahe. ⁹ Debure bededỹỹnana-ò aõkõ inyboho ralòõtyhy. Deuxu aõhõkỹmy dỹỹnana kia Deuxudeewina aõkõ rare inydeeremy. Biu-ò hena-ò tahe inyboho ralòrenykre Jesuisi Kristu Inynyrỹ òraru-ki. ¹⁰ Tii dori inydeeremy rurure. Tai tahe tii-wana rarehyummy rỹikre irummy ada rubummy iny ratxirehãre.

¹¹⁻¹³ Kiarybe-di widee beysadỹỹnymahãbenyke. Deuxu rybe tỹnydỹỹdu mahãdu biwiòhenanybenyke, bityhynybenyke. Kia tahe wadee awire. Tii dori awiòhedỹỹdu ratxireri Inynyrỹ òraru-ki. Ibutumy widee òbitimy atxibenyke, tii Deuxu deòdu rareki. ¹⁴ Tule adeeremy ijõ dohodỹỹnaõ aratohodỹỹnykre. Iehehe mahãdu biòbitinybenyke. Ityhyna kyhynakõ mahãdu bikyhynanybenyke. Ibutumy widi atximyhỹbenyke. ¹⁵ Inyõ aõbinamy adee rakeki, ixiòwydỹỹõmy. Ywina-di tamy bisỹnyke. ¹⁶ Beysahyybenyke. ¹⁷ Ixitòedỹỹhyummy boibehyybenyke. ¹⁸ Ibutumy bealãmahãbenyke. Kaiboho dori Kristu ijoi atxitenyte. Kia adeeremy Deuxudeewinare. ¹⁹ Deuxu Tyytybytyhy-ò boholake, awo-ki arayky-ki tii ratxire. ²⁰ Deuxu dee rybedu mahãdu awire irybe awire. Ibinamy aõkõ tai marybebenyõtyhy. ²¹ Ibutumy biurihibenyke. Aõbo awirele tahe idi bimyyke. ²² Ibutumy òraruna-ribi irehemy atximahãbenyke.

²³ Deuxu heka ywina rare. Tii araòbitidỹỹnytyhyke. Adeeremy rexitòenyre. Araykywydyna, õhõtiwydyna, aummy-wana ibutumy raywidỹỹmy ratxike idi watxireri. Jesuisi dori eleelemy kodobehekre. ²⁴ Tii kia ibutumy juhuru rarybere wese, tii adeeremy riwinyhyykre.

²⁵ Waityhydỹỹdu seriòre, inydeeremy bexitòenybenyke.

²⁶ Deuxu deysana òlusò-di wii birybebenyke. ²⁷ Wadee boholake Inynyrỹ òraru-ki. Kia watyriti heka ibutumy ityhydỹỹdu seriòre roholakemy watxireri. Idi mariake.

²⁸ Jesuisi Kristu Inynyrỹ ruxetòena heka adeeremy ratximyhỹkemy idi watxireri. Kie.

2 Tesalonia Mahãdu-ò 2 Paulo Ryberiti Tesalonia Hãwã-ò

¹ Paulo, Sila, Tximòtxiboho-wana tyyriti rewahinyrenyire Tesalonia dohodỹỹna mahãdu-ò. Deuxu Inytyby, Jesu-isi Kristu Inynyrỹ ijoi toiteò. ² Wiòhedỹỹna, ywina-wana adeeremy kanakemy watxireri Deuxu Inytybyreny-ribi, Jesu-isi Kristu Inynyrỹreny-ribi.

³ Inyseriòrenereny, Deuxu-ò adee reàlamahãrenyire. Kia tahe awi rare. Kaiboho aõu aõu texityhydỹỹnytyhymy atximahãtenyteki, ityhydỹỹdu seriòre wiluuna-di iluutyhymy teletenyteri. ⁴ Tai heka ijõ Deuxu dohodỹỹna heto-ki aõwiwihikỹmy umy rarybemahãre. Kaiboho dori aõwitxira witxira aõbina bina teòludunymyhỹtenyite, aõhõkỹmy dỹỹnana-ki ixiwesehyymy toitemahã ire tetyhynytyhymahãtenyite. ⁵ Kiawesele Deuxu aõna aõna òbitimy riwinyomyhỹre. Kaiboho Deuxu teywinytenyteri Iòlòna-ò malòbenykremy, aõhõkỹmy tatỹỹnytenyteriki wahe. ⁶ Deuxu, tiiboho aõbina bina-di riòwinyrenykre, aõhõkỹmy dỹỹnana dori adeeremy riwahinyreki. Kia tii òbitimy ròhõtinyre. ⁷ Biu-ribi Inynyrỹ Jesuisi tarurunareny ýju-di kodobehekrey, aõhõkỹmy dỹỹnana-ribi elehyna adeeremy, tule inydeeremy Deuxu kidiwahinykre. ⁸ Heòtyloona-di tii kanakre riòwinykremy Deuxu rieryõmy rỹira mahãdu dee, tule Inynyrỹ Jesuisi Rybewihikỹ riwinyõmy rỹira mahãdu dee. ⁹ Kia mahãdu aõu aõu aõhõkỹmy rotỹỹnykre Inynyrỹ òsỹnỹ-ribi iteòdỹỹna-ki taruruloosòna-ribi. ¹⁰ Tii kanakre tahe ibutumy ijoi mahãdu tamy làhàna riwahinykremy. Ribedeòtiidỹỹnyrenykre ibutumy taijoi dee aõmydỹỹnana riwinyreki. Tetyhynymahãtenyite, Deuxu rybe dori jiarỹboho adeeremy rewahinymahãreki. ¹¹ Kaiboho iwese Deuxudeewimy rarekemy boibeke. Tai tahe adeeremy rexitòehyymahãrenyire. Deuxu ruruna-di atyhydỹỹna-di sòwemy aõwiwihikỹ riwinykemy idi watximahãre. ¹² Tai tahe ibutumy Inynyrỹ Jesuisi Kristu nimy sòwemy beàlàmyhỹkemy. Tii loosòna adeeremy riwahinykemy watxireri. Kia Deuxu dee, Inynyrỹ Jesuisi dee awi rare. Wiòhedỹỹna iribi bitabenyke.

2

¹ Waseriòreboho, Inynyrỹ Kristu òkesenamy iximy iny ritakemy adeeremy warybe ariwahinykre. Inyõ rarybekeki Inynyrỹ òkesena txumy rehemynymy rỹire, kia rybe-di

iòtiidỹỹõmy. ² Inyõ rarasinykeki, Deuxu-ribi ijyy ritakeki, urile ityhydỹỹrenyõmy. Inyõ waribi tyyriti itarasamy rarybekeki, ityhydỹỹrenyõmy. ³ Inyõ aitxenadỹỹõmy boibeke. Ityhydỹỹdu atysyna nihikỹ juhoo kanakre, idi tahe kia txu kanakre. Juhoo hãbu ibinatyhy kedexideòsinykre. Heòtybedeluduõ tii rare. ⁴ Tii ibutu Deuxumy òludunadu rarekre Deuxumy iny rininire mahãdu wahe. Ibutumy àlàna aõmydỹỹnana riatykre. Deuxu dohodỹỹna hetowo-ò ralore tahe Deuxu weselemy ronykre. Iximy rarybekre tii Deuxu raremy. ⁵ Tuu heka adeereny rarybere, akireny raremahãu, õhõtireny aõbo itxi rearenyõra? ⁶ Ibededỹỹnana raòbitikre xiery, kanakre. Deuxu ruru dori rimymyhỹre. Kia tule teerytenyte. ⁷ Iaõbinahakỹ aõmydỹỹnana inyy-ki ratxireri. Tii tyhy wiji kanaõkre. Imynydu iribi rexitare xiery, tahe tii kanakre. ⁸ Taile tahe hãbu ibinatyhy kedexideòsinykre. Inynyrỹ Jesuisi kanakreu, tii tuu kidirubunykre taryeledile. ⁹ Juhoo tahe kia hãbu Satanasi deòdu tahe iruru-di kedehemynykre. Aõna aõna wiwihikỹ widỹỹmy ròitxenadỹỹreri. ¹⁰ Inyõ sõwemy riitxenanykremy bedeòbydỹỹ wesemy. Ityhydỹỹdukõdu mahãdu tii riitxenanytyhykre. Tiiboho dori inatyhyna rybe rityhynyõmyhỹre, tuuõmyhỹre, tai rexirutaõrenyre. ¹¹⁻¹² Deuxu dori rilawere tuu rityhynyrenykremy ibinare hãrele. Kia ruina rityhynyrenykre, tai Deuxu rihitxidỹỹnykre inatyhyna rityhynyõreki, taòrarudỹỹna luureki.

¹³ Deuxu tahe juhuutyhylemy aratarenyre, waseriòreboho. Biu-ò hena adeereny riwahinyremy inatyhyna tetyhynytenyteki. Deuxu Tyytybytyhy aralyradỹỹnyrenyre. Tai, Inynyrỹ luuna mahãdu, Deuxu mahãdurenymy belebenykemy atximahãtenyte. ¹⁴ Deuxu adeereny Rybewihikỹ diteònyde. Inyboho tahe ijyydumy roire. Iny òraruren-ki tahe Inynyrỹ Jesuisi Kristu loosõna bitabenykremy idi toite. ¹⁵ Kia ibutumy, waseriòreboho, itxi õhõtireny reake. Aõmybo araerynanymahãre kowa-ki raremahãu, tule watyyriti-di rebedeerydỹỹnymahãrenyre, idi mohõtinytyhybenyke, òbitimy idi boibeke.

¹⁶⁻¹⁷ Inynyrỹ Jesuisi Kristu Deuxu Inytyby, luuna luuna, wiòhedỹỹna, raròsõna sõwemy inydeereny diwahinyde. Inyboho aõhyymy aõkõ roire. Iribireny raybidina adeereny kanakemy watzireri. Tule umy kanawiòhenanykemy watzireri ibutumy aõhe botynyke, marybemahãbenyke.

3

¹ Watyyriti-di konanamy tahe adeereny ararybekre. Waseriòreboho, inydeereny bexitòenyke. Inynyrỹ rybemy

araryberenykemy, inywitzira-ko arelyyrenykemy, tule Inynyrỹ rybe-di iwese rybe ayreny-ki aõwiihikỹmy raremyhỹ wese. ²Tule bexitòenyke kia iny iehehe-ribi arexitarenykemy. Ibutu iny dori inatyhyna rityhynyõreri. ³⁻⁴ Tahe Inynyrỹ òbiti rare tii arawiòhenanykre. Tii ararurudỹnykre kia reeryre. Satanasi-ribi arayrubunyenkre. Tahe, aõmybo reerynadỹnyre wese kaiboho aõhebo tatỹnytenyterimy heka adireny watximahãre tule kia wesehyyle rakatxirenyke. ⁵ Inynyrỹ-ribi Deuxu luuna, Kristu itxõmotxina bede erynahakỹ adeeremy kanakemy watximahãre.

⁶ Kia Jesuisi Kristu Inynyrỹ bede ywina wese rare adeeremy ararybekremy. Waseriòreboho bexiweresykye iny deoruxere-ribi, ibutumy iny waerysydỹna roholaõre mahãdu-ribi, tii ityhydỹdu mahãdu hãrele. ⁷ Ayreny-ki roiremahaũ, raaõmysỹdỹhyemy roiremyhỹ. Tai kaiboho teerytenyte iwese mabekemy. ⁸ Tiu iny witzira rỹsỹna rerỹsỹrenyõhyre, iõwyõmy. Txuu ruwana raaõmysỹdỹre waaõna aõna òwydỹmy. Tai tahe adeeremy isiramy aõkõ ayreny-ki jiarỹ raremyhỹ. ⁹ Inyõ-ribi rỹsỹnaõ arirỹsỹmahãkeki, kia tahe ibinamy aõkõ rare, jiarỹ Deuxu rybemy rybedu-ki wahe. Tahe aõkõre urile rexideòsinykemy rerỹsỹmahãreny. Iwese aõmysỹdỹna awirewesele umy reerynanyreny. ¹⁰ Tai rarewãhãu kia bede ywina rewahinyre: —Iny raaõmysỹdỹõmyhỹre riroxiõtyhy. ¹¹ Jiarỹ raholawãhãre iny deoruxeretyhy-ò ayreny-ki ratximyhỹreny, tiiboho aõmysỹdỹ derareny, urile raujõmomyhỹreny. ¹² Jesuisi Kristu Inynyrỹni-di tamyreny ararybekre rayrubunyenkemy, raaõmysỹdỹrenykemy ixideeremy. ¹³ Tahe adeeremy, waseriòreboho, ararybekre. Aõwiihikỹ widỹ-ò ixirarenyõmy. ¹⁴ Inyõ ka waryberiti riywinyõkeki, mobo tii rare bierybenyke tahe kie-ribi irehemy biijeke, tai tii raixỹrukemy. ¹⁵ Urile tii aõludumy aõkõ ratxireri. Aseriòre wesemy tamy marybeke. Biijemy idi ahãke.

¹⁶ Inynyrỹ ywina wedu rare. Tii adeeremy ywina ibutumy aõmydỹnana-ki kidiwahinykemy idi watzireri. Inynyrỹ awanareny ratxikemy idi watzireri.

¹⁷ Kia konana warybewehityyna jiarỹle ariritinykre wadebò-di. Ibutumy waryberiti-ki rỹire wese kawesele wani retidire. Paulo. ¹⁸ Jesuisi Kristu Inynyrỹ wiòhena ibutumy adeeremy ratximyhỹkemy idi watzireri.

1 Tximòtxi-ò Paulo Juhuu Tyyriti Tximòtxi-ò

¹ Jiarỹ Paulo watxiwãhãre. Jesuisi Kristu deòdỹỹna watxiwãhãre. Deuxu iny tarasadumy riwateònyre, tule Jesuisi Kristu Inynyrỹ riwateònyre. Tii tahe inyararòsònareny rare. ² Katyyriti adee rewahinyreri Tximòtxi. Kai inatyhymy wariòre wesemy atximyhỹte ityhydỹỹdu mahãduy-ki. Tahe Deuxu-ribi Jesuisi Kristu-ribi luuna, ywina, ruxetòena, adee kanakemy watzireri.

³ Jiarỹ Macedonia-ribi rareu, adee warybe rewahinyre kai Efesu hãwã-ki mabekemy. Kia adiwahinyde warybe tamy kia beòbykemy; kowa dori inyõ Bede ywina tyyriti witziramy ròerydỹỹnanyre riki. ⁴ Ihetxiu ijyymy heka rusake kiawesemy heka kai tamyreny marybekre. Talahi talabie òraruòraru-di he ròhòtinyòhyymyhỹkre. Kia aõna aõna tahe rybenatyhytyhyre. Kia aõna aõna iny lahi òraru rybena-di ixinohòtidỹỹòmy. Kia ityhydỹỹnadile kanakre. ⁵ Kia wiluuna tahe inywolyrahakỹwo-ribi ròhònymyhỹre, iny raykylyrahakỹ wo-ribi, iny ityhydỹỹnatyhy-ribi. ⁶ Kia aõna aõna wihikỹ-ribi iny rexixãwididỹỹnyre. Tai tahe aõmybo rarybemyhỹre heka rieryòhyymyhỹre. Aõtyhymy aõkõ widee rarybemyhỹreny. ⁷ Bede ywina tyyriti erysydỹỹdu wesekey rexinohòtinymyhỹre, tahe rieryòhyymyhỹre aõmybo raremy. Aõmy rierynanymyhỹreny tahe timybo ihỹremy rieryòlemyhỹreny. ⁸ Katahe inyboho rieryreny. Inyõ bede ywina tyyriti òbitimy rityhynykeki, Bede ywina tyyriti heka awi rare. ⁹ Inywihikỹ-ò heka tiu bede ywina tyyriti riwahinyòhyymyhỹre. Inybina binaòle iwahidỹỹna rare, iny òrarudu-ò, iny ityhydỹỹdukõdu mahãdu-ò, iny aleerydu-ò, iny tadi tyby-wana rirubunymyhỹre mahãdu-ò. ¹⁰⁻¹¹ Kia iny-ò bede ywina tyyriti rỹimyhỹre. Ibutumy bina bina widỹỹdu-ò. Bede ywina tyyriti rỹimyhỹre ka mahãdu-ò: inydỹỹwe mahãdu dee, taòtaòta witziramy òtadu mahãdu-ò, inywasidỹỹdu-ò, ruidu mahãdu-ò. Deuxu ijyy tỹmyra wihikỹ dee wiòkeki, tii aõna aõna riwinykeki, tamy. Deuxu bede ywina tyyriti roimyhỹre. Deuxu bedeerydỹỹna òbiti aõkòreki, Deuxu wiwihikỹ loosònadewimy aõkòreki kia erysydỹỹnadu jiarỹ rare.

¹² Jesuisi Kristu, iny wedu waruruixiòlòdỹỹdu rare. Jiarỹ tamy wawimy raremyhỹ. Tai tarybe-di wiòhedỹỹdumy riwatare. Kia-ò Jesuisi Kristu heka jiarỹ rewowydyny. ¹³ Juhuu jiarỹ tuu rarybere. Ityhydỹỹdu mahãdu-ò wadeburemy rarewỹhỹ. Tule Jesuisi-ò wedeburemy

rarewỹhỹ. Tahe wadee raruxetòenyrenyrene. Tahe ibutумы kia reerykõlemy rewinymy raremyhỹ, retyhynyõlemy rewinymy raremyhỹki. ¹⁴ Inywedu sõwemy wadee raruxetòere. Tii riwasỹny ixiluuwehikỹkemy, rikityhynymyhỹrenykemy. ¹⁵ Jesuisi Kristu kabede-ò dobehede òrarudu ritakemy. Ka rybe heka inatyhy rybe heka rare. Jiarỹ heka òrarudutyhy nihikỹ rare. ¹⁶ Iurenanamy tahe tii riwaruxetòenyre. Tiu heka waki rexiraõre. Tii riwateòsinyre juhUU ityhydỹỹdu wesemy. Ityhydỹỹdu mahãduõ-ò itxerenamy, iwese tii mahãdu kidityhynykemy. Tai umy tuedekõdu mahãdu-ò ralòkemy. ¹⁷ Bealãmahãbenyke Deuxu-ò. Tii heka bededỹỹnana tuedeõdu hukỹ Iòlò rare. Tii lobixina aõkõ rare. Tii sohojile rare. Bealãmahãbenyke aõu aõu, wowydyna tamy biwahinyke. Kie.

¹⁸ Ka inatyhymy rybemy adee ararybekre Tximòtxi —kai dori wariõre wesemy tate. Kia rybe heka ihetxinarybe wesele rare. Deuxu aratareu, kia biyrubunywihikỹke. Besuke arurutyhymy aõbo òbitimy ratximyhỹre wihikỹ-ò. ¹⁹ Aõhewe õhõtitydynawimy mabekre. Bityhynymy mabekre. Inyõ heka idi rõhõtinyrenyõra, tai reserenyra ityhydỹỹ-ribi. ²⁰ Ijõ Imineu inire, Alexỹdre ijõre. Jiarỹ rewahinyre Satanasi-ò, Satanasi bedeburana tamyreny riwahinykre. Tiiboho rybebinamy tii Deuxu-ò rarybeõthy.

2

¹ Delemy kamy ararybeke: Àlàna sõwemy idi rawahinyke, ibutумы iny-ki bexitòtenykre. ² Iòlò dee, ibutумы dinodu dee tule bexitòenykre. Tamyreny biixitòedỹỹnanymy Deuxu-ò, tule Deuxummy beòbykemy, tai ibutумы iny iworana bedehesimy rỹikre. Deuxummy iny rõkõhõtinyrenykemy idi òbitimy tamy rokoirekemy. ³ Kia wese awire Deuxu dee. ⁴ Deuxudeewimy ibutумы iny ritakemy raerykemy tibo inatyhy raremy. ⁵ Deuxu sohojile rare iny-ki rybedu tule sohojile rare, Deuxu-ò iny mahãdu tii sohojile kia riwinyre. Tii hãbutyhyhykỹ rare. Tai tahe tii tiò tiò rare, Deuxu, iny mahãdu-wana widee ributunykemy, Jesuisi Kristu wahe. ⁶ Jesuisi rexiwahinyre ibutумы iny òraruna òwydỹỹmy. Tii heka riòwinyre sohojihyylemy. Kia heka tiiehyymy deòsidỹỹmy rarekemy. Tiu iny mahãdu rahenykemy Deuxu rexinohõtinyre. ⁷ Jiarỹ heka imynynamy riwamyre kia rybe-di arelyykemy. Tule jiarỹ rybe-di dohodỹỹdukemy riwamyre iny wixira bederydỹỹmy judeukõdu mahãdu wahe. Kia raerykemy tibo inatyhy raremy. Kia dori inatyhy rare.

⁸ Ibutумы dohodỹỹna hetowo-ki ibutумы rexitòenyre rexythynymy. Ujõmomomy rõhõtynymy aõkõ. ⁹ Hãwyy uritere

ixidi nohõtityhyõmy ixiaõmydÿÿnadÿÿmy urile ywilemy ixidi rõhõtinykemy. Hãwyy ityhydÿÿdu ixiywidÿÿna tahe tyywihikÿ aõkõ, iradesihodÿÿtyhy aõkõ, deorutylududike aõkõ. ¹⁰ Urile tahe iyrubukemy Deuxu-di rõhõtinyke tamy aõwiwihikÿ riwinykre. ¹¹ Hãwyy ityhydÿÿdu mahãdu rðeryrenykre yrubu-ki. ¹² Jiarÿle heka hãwyy ariwahinyõtyhy hãbumy hÿÿnakemy, hãbu erydÿÿdukemy tule tuu areõnyke aõkõre, hãwyy heka urile iyrubumy rÿike. ¹³ Adaõ heka Deuxu juhule riwinyre idi Eva riwinyre. ¹⁴ Tule tahe Satanasi Eva juhuu riitxenanyre, Adaõ aõkõ tai raòrarunyre. ¹⁵ Hãwyy uladu reakeule rexitake. Idi ròtyhydÿÿmy. Inyluumy idi rexityhynykreki.

3

¹ Kia rybe inatyhy rybe rare: –Inyõ dohodÿÿdu dinodumy rarekeki. Kia heka rexiburemyhÿre aõwihikÿmy ratximyhÿre. ² Tahe rybe-di dohodÿÿ aõmysÿdÿÿdumy ralòkeki, tii heka òbitimy rareke, tahãwyy sohojidile, rexityhynymy rarekemy, iny inatyhy, iny aòraru rarekemy, eryladyÿÿdutyhymy rarekemy. ³ Tii heka iaxaxa luuõre aõbina luumy aõkõ rare tule iyrubure. Tahe tule iaõmy nohõtidu aõkõre. ⁴ Tii heka taijoimy reõnymyhÿre, tariõre rierynanywihikÿmyhÿre ixirybe rityhynykemy. ⁵ Inyõ tahe taijoi reõnyõkeki, Deuxu aõmydÿÿna-di òbitimy raaõmysÿdÿÿõtyhy. ⁶ Tii ityhydÿÿdu tÿmyra aõkõmy rarekemy. Raxiwedenymy rarekeki tahe urile Satanasi alòsena-txi tii reseke. ⁷ Ihãrele tahe ityhydÿÿdu mahãdu aõkõ rare ihÿre, awimy tuu rarybemyhÿre. Tuu heka raujõmorenyõtyhy tule tii Satanasi ireitidisi-txi reseõtyhy. ⁸ Tule dohodÿÿdu wiõhedÿÿdu mahãdu, kiawesele rarekemy. Tii tule òbitimy rarekemy irybe òkese òkese aõkõ, iaxaxaluu aõkõ rare, tule aõna aõna sõwemy nohõtidu aõkõ rare. ⁹ Iny inatyhydÿÿnareny òbitimy tuu rotohodÿÿnanymyhÿrenyke, tarayky òbiti-di. ¹⁰ Tule kia wesele raurihikre. Iribi òbitimy ròhõnykeki, tai dohodÿÿdu wiõhedÿÿdu mahãdu-ò ralokre. ¹¹ Ihãwyy tule òbitimy rarekre. Ujõmodumy aõkõ rarekre, iyrubukemy, urileta rexityhynymy rarekemy. ¹² Tule dohodÿÿdu wiõhedÿÿdu mahãduõ ihãwyy sohojidilemy rarekre. Tariõre, taijoi-wana reõnymyhÿkre. ¹³ Kia mahãduõ Deuxu aõmysÿdÿÿna òbitimy riwinymyhÿreki, inatyhymy tii iny rityhynykre. Tai Deuxu aõmydÿÿna tii riòbitinykre ibutumy inydee.

¹⁴⁻¹⁵ Aroramy jiarÿ wylemy arakemy watzireri. Aõkõkeki urile warybe ritina adee rewahinyreri. Kia warybe-di bierynanybenyke aõhebo ityhydÿÿdu mahãdu warybe-di rotÿÿnykemy. Ityhydÿÿdu mahãdu Deuxu ijojio rare. Inatyhy rybe yrubudÿÿdu rare. ¹⁶ Iny tyhydÿÿnareny awi tyhytyhy

rare. Kia wese rare: —Jesuisi heka hãbu wese nade. Tii Deuxu Tyytyby-di òbitimy rityhynyreu, ýjureny tuu robirenyre. Taaõmydýñnanarenymy ibutu bede bedemy relyyrenyre. Sõwemy iny rityhynyrenyre. Roosere biu botorahaký-ò.

4

¹ Deuxu Tyytyby rarybera: —Ihewoladu bededýñnana txuu hãbu tyytybybina rybe-ò roholakre. Tai iny tyhydýñnanareny ririkre. ²⁻³ Tahe ruina rybe rityhynyre, hãbu aõmy nohõti erykõ rybe-ò. Kia heka hãbu raerynadýñmyhýre uritere hãwyymy heriõmykremy, ijõ rýsýna aõtxi irýsýðkremy. Kia rýsýna iny rirýsýke Deuxu riwahinyre. Juhuu àlana Deuxu-ò rawahikre. ⁴ Kia heka ibutumy Deuxu riwinyre awire. Aõ aõkõ heka awiõre. Deuxumy beõbyke, kia tahe ibutumy awike. ⁵ Ixitòedýñna Deuxu rybe kia ibutumy awimy risýnykre.

⁶ Kai heka ityhydýñdu mahãdu bierynanykeki, kai heka Jesuisi Kristu aõmysýdýñdu mahãduwihikýõ tate. Kia inytyhydýñnareny erydumy mabekre. ⁷ Kai ihetxiu nohõtiwidýñna ijyy bityhynyõtyhy. Marurunymy mabeke Deuxu aõmysýdýñnana-ò. ⁸ Aumyruru urihimýõmy idi mohõtinykre, atyytybywi-di tahe kia idi sõwemy mohõtinykre kai kabede-ki adeewikre tule tiu bede-ki awikre. ⁹ Kia rybe heka òbiti rare. Ibutumy iny rityhynyke. ¹⁰ Inyboho raaõmysýdýñnymyhýre inatyhymy. Deuxu dori iny rityhynyre. Tii ibutumy iny tarasadu ratximyhýre, ityhydýñdule tarasadure. ¹¹ Kia warybemy bierynanybenyke. ¹² Iny aratyhynyõkeki kai matuari aõkõ tateki, tai ityhydýñdu wihiký mabekremy bexityhynyke. Tai tahe arybe-ò aratyhynykre aityhydýñna, aluuna, òbitina òraru-ki wahe. ¹³ Adehemynykre kotyre, Deuxu rybe-di mariakre dohodýñna heto-ki, idi belykemy mabekemy tule bierynanykemy. ¹⁴ Uritere nohõti lusaõmy kai erydýñdu wihiký tatemyhý. Dohodýñna matuari mahãdu debòtidina-di arateõnyrenyre, wahisidýñna weseõ tetate rybe-di týnydýñna òraru-ki. ¹⁵ Kia aõmydýñnanamy mohõtinywityhymyhý. Ixidile bexiywinytyhymyhýke bede erydýñnana-di tule bexiywinytyhymyhýke. ¹⁶ Tai kai òraru-ribi bexitake tule aijohonana-di òraru-ribi bitakre.

5

¹ Matuari ityhydýñdu mahãdu-ò ywimy aõki tamy marybemyhýke, bowese idi atximahãke Weryrybò mahãdu, aseriõre wesemy bitohodýñnyke. ² Senadu mahãdu adi wesele bierynanykre. Ijadõma mahãdu aseriõre wesere ibutumy òbitilemy biywinykre. ³ Inatyhytyhy wytese

mahãdu kai bityhynykre iòsÿnÿ biywinykre. ⁴ Iriòredikeki, iriòkòredikeki, juhUU iriòre bierynanyke imahãdule òbitimy biwiòhenanyke idi watzireri. Kia dori Deuxu dee awire. ⁵ Wytese mahãdu ixisohojilemy rasÿnymyhÿre iriòrekòkeki, Deuxu-ribi aõna aõna riraòmyhÿre. Deuxu dee sòwemy rexitòenymyhÿkemy. ⁶ Kia tahe wyteseò òraruna luukeki kia tahe irulemy ratximyhÿre hãre rubu rare. ⁷ Tximòtxi, kia bede ywina tahe rewahinyreri urile wytese mahãdu òwe òweòmykremy bibedeerynanykre. ⁸ Inyò juhUU tasÿreny dee idi aõna aõna taijoi dee kanawyòkeki, tii ityhydÿÿdukòdu mahãdu ratyre rabinare. Tii ityhydÿÿdu mahãdu wese aòkò dotÿÿnymyhÿde. ⁹ Wytese tÿmyrani tyriti-ki iritidÿÿòmykre 60 ibeòraòkeki. Tule tii sohojihyyle roire hãbumy. ¹⁰ Tule tii aõna aõna wihikÿ riwinyemyhÿre, tariòre ritybienyre, taroraludu-ò awimy raremyhÿ, ityhydÿÿdu mahãduwa risuhòmy raremyhÿ, aòhòkÿtyhytyhymy rotÿÿnymy rare mahãdu riwiòhenanymy raremyhÿ. Aõu aõu heka iny witzira riwiòhenanymy raremyhÿ taworana bedehesi-di. ¹¹ Wytese tÿmyrani heka tyriti-ki iritidÿÿòmykre. Hãbumy herimy ròhòtinymyhÿre wana, tai Kristu-ribi tòhòti rosamyhÿre. ¹² Tarybe ywidÿÿna riywinyòlemyhÿre, tai iurenana tahe tuudÿÿdumy Deuxu-ò ratximyhÿre. ¹³ Hetomy rawerywerynymyhÿre kia urenana urile raujòmomomyhÿre aõna aõnalemy. Aò heka riwinyòlemyhÿre. Kia ratyre bina tahe tuu rybenanamy aòkò rybebinamy rarybemyhÿre. ¹⁴ Kia heka wadee awire wytese tÿmyra hãbumy roikre, rariòrerenyemy, tule taheto riywinykemy. Kia wese iòludu inydeereny aõna aõnabinamy rarybeòhÿkÿkre. ¹⁵ Wyteseò dori Satanasi hemy roire. ¹⁶ Wyteseò ityhydÿÿdusÿ-ki rarekeki, tii heka riwiòhenadÿÿ rÿikre. Kiawese dohodÿÿdu mahãdu nieru tamy ritakre. Kia nieru rayrubunykre. Tahe rawahikre ixisohojile ratximyhÿre-ò.

¹⁷ Matuari ityhydÿÿdu mahãdu iny rityhytyhynykre. Dohodÿÿna mahãdu aòmydÿÿnana òbitimy retehemy ratximyhÿkeki, ratyhytyhynykre. Inatyhytyhywityhymy kowa òbitimy relyymyhÿre tule rybe wihikÿ rierynanymahãre kia heka raòwywikre. ¹⁸ Tai tahe raritidÿÿmy roimyhÿre: —Broreni maixòmotyre iwysydÿÿmy rariamyhÿu, iry ratòbònyòtyhy ibyre lau. Tule ròritidÿÿmy roimyhÿre:

—Mobo raaòmysÿdÿÿmyhÿre, tii heka iny riòwynymyhÿre.

¹⁹ Matuari mahãduò iny tuu raujòmokeki, tuu arityhynyòtyhyke. Tuu lobixidu inatxi ada inataòkekile, aratyhydÿÿkre. ²⁰ Tii inatyhymy òraruna-txi resereu, kai tamy marybeke iòrarumy ibutumy inyko-txi. Iurenana tahe ijò iny ruberumy rÿimyhÿkremy. ²¹ Adee ararybekre.

Deuxu, ÿjureny, Jesuisi Kristu-wana ibutumy warybe-ò roholareri. Kai warybe biywinykre. Myheka wiratyre widi röhötinyötyhy. Tiiemy wiwese weselekemy rÿikemy. ²² Uritere rybe-di tÿnydÿÿdu tÿmyra juhu biurihike idi tahe debòtidina-di biteònyke rybe tÿnydÿÿmy. Kawese aökökeki heka häbu òrarunamy tuudÿÿdukremy òsana mabekre. Aömydÿÿnana tiiemy òbitimy biwinyhÿ. ²³ Bee sohojilemy aökö biökre urihimyòmy vÿimy biökre. Kai dori awo ibinareriki tiiemy tuu abinareri. ²⁴ Ijõ òraru aöwesele iny kanatÿnykre, bedeluura aöwesele kòdòhònykre. Ijõ òraru taheka idile kanatÿnykre. ²⁵ Ruxetòenawihikÿ iwesele rare. Ele tii raeryötyhy idi tahe iny rierymyhÿre.

6

¹ Ibutumy wetxuõ tawedu rityhynykre. Tawedu rityhynyökeki heka Deuxu nibinarybemy iny rarybekre. Tule ityhydÿÿdu eryna binamy rarybekre. ² Weduõ ityhydÿÿdukeki, kia heka ire ratyhydÿÿmyhÿke tule aönityhymy tamy aömysÿdÿÿkre. Tii dori ityhydÿÿdu seriðre wese rare. Kia dori taaömysÿdÿÿnyteri ityhydÿÿdu widee. Kaiboho ixideerenyle wiluukemy. Kia tule bierydÿÿnykre.

³ Inyö erydÿÿna witxira ròernanykeki kia òbitimy aökö Jesuisi Kristu Rybewihikÿ wese aökö ratxikeki, ⁴ kia häbu ixiwede rare, aö rieryölere. Kia häbu urile dÿÿraxidÿÿ luure. Kia dÿÿraxidÿÿ-ribi ibutumy rybe jei jei röhònymyhyre. Iribi tahe tule rexinaanymyhyre, raujòmomyhyre, rexiwodohonanymyhyre. ⁵ Raruimyhyre. Kia ibutumy rotÿÿnyrerí, häbu töhötina òweðwere. Inatyhyna-ribi kia häbu töhöti rosare. Ityhydÿÿdureki tii ròtakemy ixidi ratximyhyre. Kiamy heka röhötinymyhyre. ⁶ Inatyhymy ibutumy heka tai iny aötyhydÿÿdu-ki taaò-di teysakreki. ⁷ Aö kabede-ò iny ixihemy diwyöhydenyde inatyhymy heka rukururenykreu tule aö ixihemy kabede-ribi rikiwyötyhyrenykre. ⁸ Iny tydyrenykeki, iny rÿsÿnadirenykeki, urile reysarenykre. ⁹ Tahe inyö ityhymy ixidikeki, tii òraruna-txi resekre. Kia heka iny rexiburemy, rexibinanymyhyre, tule rexiraykyitxÿtenymyhyre. ¹⁰ Inyö nieru luukeki, tii aö òta òta òraruna-txi resekre. Kia-di heka iny sòwemy ityhydÿÿdu mahädu-ribi röhònyra aöhökÿmy rotÿÿnyrenyre.

¹¹ Kai Deuxu ijoi tate. Ibutumy kia-ribi bexiemy mabekre. Uritere ityhymy ixidi nohötioömy tahe awimy mabekremy mohötinykre. Deuxu wiwese, ityhydÿÿdutyhy wese, Deuxuluu wesemy. Tiiemy heka òbitimy atximahäke, ywimy ainytyhymy atximahäke. ¹² Aöu aöu òbitimy atximyhykemy maruronyke, umy tuedekönahakÿ bitakemy, kai tule inatyhy

rybemy tarybete inysõweko-ò, Deuxu dori adee rarybere juhuu. ¹³Inatyhymy adee ararybekre. Deuxu adee ijohonadu rare. Tule Jesuisi Kristu wadee ijohonadu rare. Tii inatyhy rybemy tarybete Ponsiu Pilatoko-txi. ¹⁴Kaheka warybe rare: Kai heka bede ywina bityhynyke aõ bede ywina tyyriti òraru-ki aõhe botỹỹnyõtyhy. Biraòke Inyweddu Jesuisi Kristu dehemynyna txuu. ¹⁵Tiutxukremybo Deuxule kedexitỹnynykre, tii deysana wedu rare. Tii sohojile heka Iòlòmý rare. Ibutumy Iòlòweddu rare. Ibutu wedu wedumy rare. ¹⁶Tii sohojile heka tiu ruruõhyy rarekre. Tii irehetyhymy loosònawo-ki rasỹnymyhỹre. Tiimyy heka inyõ tuu robiõtyhyre. Inyõ tiu iòhòmý tamy rehemynyõtyhy. Tamy rikiwodeysanyrenykre. Tiòhe aõu aõu taruru-di ratximyhỹ.

¹⁷Kai marybekre iaõdi mahãdu-ò uritere ta aõna aõna-di rexiwowydynyõtyhy, iaõna aõna dori rỹiõhyykre. Tahe Deuxule rityhynykre. Tii dori ibutumy aõna aõna wiihikỹ inydeereny riwahinyre. ¹⁸Tii aõna aõna wihikỹ inydeereny riwahinymyhỹre. Iaõdi mahãdu uritere aõwihikỹ-di ijõ-ò rawiòhedỹỹnykre. Aõu aõu ròwirareamyhỹke iny-ò. ¹⁹Kia wese tiiboho ributunyrenykre. Aõna aõna wihikỹ biu-ki awimyy idi rarekre. Tule umytedekõnahakỹ tiiboho ritarenykre.

²⁰Kai Tximòtxi, aõbo adee rawahidỹỹre, kia biyrubunykre. Rybe òwe òwe-ribi irehemy mabekre. Aõbo heka raninireri bedeerydỹỹ kia heka inatyhy aõkõ rare. ²¹Inyõ kia aõ erydumy ixi-di nohõti-ki, rexitara ityhydỹỹdu mahãdu-ribi. Deuxu deysanamy adee ratximyhỹkemy idi watxireri.

2 Tximòtxi-ò Paulo Inatxina Tyriti Tximòtxi-ò

¹ Paulo jiarỹ rare. Jesuisi Kristu deòdu jiarỹ rare. Kia jiarỹ rare Deuxudeewireki wahe. Jesuisi Kristu juhoo rarybere, umy tỹmyra tuedeõna inydeereny kidiwahinykremy. Tii kia wedu rare. ² Kai Tximòtxi, wariòre waluunadu wesemy atximahâte. Kia tyriti adee ariwahinykre. Wiòhedỹỹna, ruxetòena, ywina, Deuxu Inytyby-ribi, Jesuisi Kristu Inynyrỹ-ribi adee kedehemynykemy watzireri.

³ Deuxumy reàlàreri iwese wahabohomy reàlàre wese. Wanohòti Deuxu-ò ywile jiarỹ rare. Aõu aõu adee, Tximòtxi, rexitòenymahâre. Txuõ txuõlemy, ruwana Deuxu-ò rexitòenymahâre. ⁴ Iu rareu, arube-ribi wanohòti rosaõhyymyhỹre. Arora-ò arakemy watzimahâre, wadeysatyhymy ararekemy. ⁵ Atyhydỹỹna-ribi wanohòti rosaõtyhy. Alahi, Lòide, juhoo rityhynymyhỹre. Idi adi, Eunisi, tule rityhynymyhỹre. Kai tule wiji tetyhynymyhỹte inihe. ⁶ Kia dorihe itxi õhòti reijaranyreri. Wadebò tahe aratityre retidireu, arayky-ò Deuxu aõ riwahinyre awahisidỹỹna weselekremy. Wiji kia arayky woludu rõrõra wana biixixanyke. Kia dori Deuxu wahisidỹỹna rare. ⁷ Deuxu-wana iny ruberuõtyhy. Tii dori inydee ruru riwahinyra, luuna riwahinyra, tule bedeerydỹỹna riwahinyra. ⁸ Tule Deuxu rybemy rybe-ki ixỹruõlemy. Deuxu rybemy rybe-ki wamy maixỹruõtyhy. Deuxu rybemy rybe-ki tahe, ròtenawo-ò riwatidire. Kia tahe awire. Deuxu rybe wityhydỹỹna-ò aõhõkỹmy rokotỹỹnykre. Deuxu dori inydee ruru riwahinymyhỹre. ⁹ Tii heka iny ritarenyre biu-ò hena riwahinyre wahe. Tai taaõmysỹdỹỹna inydee diwahinyde. Iny awirerimy rareki aõkõ inydee diwahinyde. Taruxetòenale-ki inydee diwahinyde ixideewireki. Juhu bedeu Jesuisi Kristu òraru-ki ruxetòena inydee diwahinyde. ¹⁰ Kia ruxetòena wijile rehemynyra inydee. Jesuisi Kristu inytarasadu kia diwyde. Tii rubunale riixãwididỹỹnyre. Biu-ò hena Rybewihikỹmy kia ritỹnynymy diwyde. ¹¹ Riwatare tarybemy rybedumy. Rybedumy riwateònyre, tule bedeerydỹỹdukemy riwateònyre. ¹² Tai judeukõdu mahãdu òraru-ki aõhõkỹmy ratỹỹnymahâre. Ihãrele tahe raixỹruõlemahâre. Rexieryre dori tii retyhynymahâre. Reeryre dori tii ruru dire waaõmydỹỹnana tamy retidire iyrubudỹỹmy kiatsu-ò. ¹³ Waõbiti rybe biywinyke juhoo kia wamy taholate, ityhydỹỹna-di. Biywinyke luuna-wana. Jesuisi-ki tahe luuna

tyhy rare. ¹⁴ Timybo Deuxu adee diwahinyde, biyrubunyke. Deuxu Tyytybytyhy dori inywo-ki ratxireri.

¹⁵ Ibutumy kabede ludu Asia ludu riwarira. Fikelu ijõnre. Erimojini tahe ijõre. Kia tahe kai teeryte. ¹⁶ Inynyrỹ ruxetõena kidiwahinykemy watzireri Onisiru s̄mahãdu-ò. Tii dori aõu aõu riwawiõhenanyre areysakemy. Tiu riixỹrudỹnyõtyhyre wawomati reroti-di jiarỹ ranyreriki. ¹⁷ Tai tahe Roma hãwãhãkỹ-ò ritehemynyreu, riwaijehyhyre; idi tawa-ki rahare. ¹⁸ Iny Iòlò ruxetõena tamy kidiwahinykemy watzireri kia txuu. Efesu hãwã-ki dori Onisiru riwawiõhenanytyhyre. Kia teeryte waratyremy.

2

¹ Kai tahe wariõre wese tate. Jesuisi Kristu làhàna-ribi ruruna bitake. ² Aõbo wary-ribi taholatemy iny s̄weko-ò relyyreu, kia ijõ iny òbiti-ò tuu belyykre. Iny rexihumy rarekoòle tuu belyykre. Idi tahe tiiboho inywitzira ribedeerynyrenykre. ³ Waaõhõkỹmydỹnana wawana tuu botỹnykre. Jesuisi Kristu soldadowihikỹ-wesemy kai mabeke. ⁴ Soldadoõ tadinodu aõmydỹnanale rityhynymyhỹre. Tii ixideewimy rarutaaõtyhy. ⁵ Ijesudu ijesu ritake òbitimy resukekile. ⁶ Oworuwidỹdyle juhUU suribi bederaty ritamyhỹ. ⁷ Aõmybo wiji raryberadi mohotinyke, raweseranyreki. Inyiòlò ibutumy araerynanykre. ⁸ Jesuisi Kristu rubu-ribi ixixadu-txi õhõti reake. Ihetxiu Davi Jesuisi labiemy raremyhỹ, iwese inyrybewihikỹ rarybere wese. ⁹ Rybe wihikỹmy relyyreki dori womati reroti-di rataamy aõhõkỹmy ratỹnyreri, aõbina widỹdu wesemy. Deuxu rybe tahe, inyõ ritaaõtyhy. ¹⁰ Ibutumy reõludunymahãre ityhydỹdu mahãdu dee, Deuxuhõrõ dee. Kiaboho Jesuisi Kristu tarasanamy ritakemy idi watzireri. Tarasana, làhàna aõu aõu ritakemy idi watzireri. ¹¹ Rybe inatyhy rare. Jesuisi Kristu-wana iny rurukeki, irumy tii-wana aroireke. ¹² Inyboho rikityhynyhyrenykeki, tii-wana riòlõnyrenyke. Inyboho Jesuisi rikitxiõnyrenykeki. Tii tule iny ritxiõnykre. ¹³ Iny rikityhynyõrenykeki, ihãrele tii ityhyhyummy rarekre. Tii rexitxiõnyõtyhy.

¹⁴ Iny nohõti kia-txi reakemy biwisỹnyke. Tamy marybeke ujõmohyyõmy rarekemy. Ujõmo tahe wiõhedỹna aõkõ rare. Ujõmo-ò ijohonadu urile ujõmodumy relekre. ¹⁵ Kai tahe marurunyke Deuxudeewimy belekemy. Kai Deuxu deòdu tate. Kia rybe inatyhy-di òbitimy maraykynyke, idi tahe, bierynanyke. Tahe bexiixỹrudỹnyõtyhy. ¹⁶ Rybe òweòwemy rybedu-ribi irehemy bexieke, rybebina-ribi tule. Kia rybedu urile raõrarunynihikỹmyhỹke. ¹⁷ Kia erydỹna reurõmyhỹre yyy

wese. Imineu, Filetu-wana kia wese rierydỹnanyre. Kia rybe inatyhy-ribi rexihitxinyre. ¹⁸ Tii rarybemyhỹre: –Iny ixixana dorihe reara. Kia rybe-di ityhydỹũduũ wimy uriurile rityhynyeri. ¹⁹ Deuxu hõrõ tahe inatyhymy rỹirakre. Kia tahe urihixina rare:

–Deuxu tahõrõ mahãdu rierymyhỹre.

Ijõ tahe:

Inynyrỹ ijoimy iximy rybedu, òraruna heka riatykre.

²⁰ Ityhy mahãdu hetonihikỹwo-ki womati tỹrỹrỹhỹkỹhyna, pratahyna sohojile aõkõ rỹire. Òwòruhyna, suhyna tule rỹire. Hynaõ tahe rỹsỹnawihikỹ hyna rare. Ijõ tahe rỹnysi-di dehuna rare. ²¹ Kia hyna wese iny rỹira. Ijõ rỹnysihyna wese rỹikeki, idi rexisuhokeki, rỹsỹnalyralya wesemy reuròke. Tawedu-ò awimy rỹike, tawedudeewimy. Tai tahe aõ wihikỹhynamy rexiywinyrỹ rỹire. Kai tahe iwesele mabeke. ²² Kai ijoi tỹmyra tate, amahãdu òraruna-ribi bexiekemy; ixi-ribi aõ-di rõhõtinyreri, kia-ribi mahenyke. Òbitina, ityhyna, luuna, ywina-wana biheludunye. Deuxu-ò rexitòenyke òbiti mahãdu-wana. ²³ Erysydỹỹna itxỹtemy wiribi rybeõmyke. Kiaribile ujõmo rõhõnymyhỹre. ²⁴ Deuxu deòdu raujõmonyõtỹhy. Tii tahe iny ibutu dee ywimy risỹnymyhỹre, erydỹỹnamy rexihumy ihỹmyhỹre. ²⁵ Ywina-di riòbitinyreri iny ixitxiõdỹỹna mahãdu. Tii heka riraòreri Deuxu worahõresena tamy riwahinykemy. Idi tahe inatyhymy rierykemy. ²⁶ Tule itxỹte-ribi ròòsekemy, Satanasi reroti-ribi rexitakemy. Tai tahe Satanasi rimyrau tahe ritaataara teewimy riwinykemy.

3

¹⁻² Bededỹỹnana konanamy bededỹỹnana sirahakỹ kỹnyikre. Kia tahe bieryke. Iny ixideewimy riwinykemy ixi-di ratxikre. Nieru tarasalemy ixi-di rexinohõtidiỹỹnymyhỹke. Rybetyhyhykỹlemy iximy rarybekemy ratxikre. Ixidee awihikỹlemy rõhõtinykemy ratxikre. Rybebinalemy rarybemyhỹkre. Tyby ise-wana riywinyõhyymyhỹkre. Inyõ-ò aõmy reàlàõhyymyhỹkre. Òbitiry rityhynyõhyymyhỹkre. ³ Iny-ò tuuna ihoõhyyre. Inyõ ibiòwamy rareõtỹhy. Aõbina binalemy inymy relyymyhỹkre. Rexiywinyõhyymyhỹkre. Reburehekỹ rariamyhỹkre. Òbitimyno ibinahyymy rarekre. ⁴ Iny deòsadỹỹdumy rarekre. Ixiluunadumy rarekre. Ywimy aõkõ rarekre. Iwisỹdỹỹna luuhyymy rarekre. Deuxu tahe tuuõkre. ⁵ Òbitimy risỹnymyhỹre wese tahe òbitiruru ritxiõnymyhỹke. Kai, Tximòtxi, kia iny-ribi irehemy mabeke. ⁶ Kia hãbu tahe hetoõ-ò ralõmyhỹre. Hãwyy uri uri rỹira xiwedeõ-ò òrarulỹxina-di ralõmyhỹre. Kia tawisỹdỹỹna-di rierynanymyhỹre tarybewiwidile, tahe

hãwyy rityhynymyhÿre. ⁷ Kia hãwyy aõu aõu ròerykemy ixidi rõhõtynymyhÿre, urile tahe inatyhyna tiu rieryõtyhy. ⁸ Iwese ihetxiu Ijãni, Ijãbri-wana Moisesi òludumy rÿire wese. Wiji tule kia hãbu inatyhyna òludumy rare. Irayky rawerynyre. Ityhydÿÿna-di deõsanamy rÿimyhÿre. ⁹ Tiu tako-ò raõtyhy, iitxÿtereriki, kia iruina òraruna ibutumy iny rierykre, iwese Ijãni, Ijãbri òraruna ibutumy iny raeryre wese. ¹⁰ Kai, tahe waerydÿÿna-ò taholahyymahãte. Iwese raremahã wese tiwaheludunymahãte. Watyhyna teerymahãte, wadeybina, waywina, waluuna, waixiòlòdÿÿna. ¹¹ Aõu aõu inybinahakÿ wadi riwisÿnyreri, tule aõhõkÿmy ratÿÿnyreri. Kia ibutumy teerymahãte. Kia wade rotÿÿnymy rÿire Atxiòkia hãwã-ki, Ionio hãwã-ki, tule Listra hãwã-ki. Aõwitxira witxiramy aõhõkÿmy ratÿÿnymahãre. Wanyrÿ tahe ibutu-ribi riwatare. ¹² Inyõ òbitimy ratxikeki Jesuisi Kristu-ò, tii aõhõkÿmy rotÿÿnykre iòraru-ki. ¹³ Hãbu bina bina rabinahykymy rarekre, tule hãbu inatyhy aõkõ rabinahykymy rarekre. Inyõ tiiboho riitxenanykre, tule tiiboho inyõ kidiitxenanykre. ¹⁴ Kai tahe aõbo teeryte, kia-di mohõtinyke aõbo tetyhynymahãte-di. Tahe tiribibo teeryte, õhõtikile idi mabekre. ¹⁵ Uladuribile teeryte Deuxu Tyyriti. Kiadile bierykre Jesuisi Kristu tarasadÿÿna idi bimykremy. Kia adee kanake bityhynykekile kÿnyhe. ¹⁶ Ibutumy Tyyritityhy Deuxu elewesenamy nade. Bedeerysyna urenana heka rare. Òrarudu òbitidÿÿna heka rare, ibutumy riòbitinykemy. Tule aõbo awihikÿmy raremy rierynanykre. ¹⁷ Deuxu deòdu dori òbitile rÿirakemy. Aõwiwihikÿ widÿÿna aõbo dori rexihulemy rÿirakemy.

4

¹ Deuxu, Jesuisi Kristu kiaru-ki arãteònykre. Jesuisi Kristu dori rubu mahãdu iru mahãdu-wana wiribi rihitxinykre, tii taòlòna kaò kidiwykreu. ² Belyyke Deuxu rybemy, inydee awikeki, tule inydee awiõkeki. Ywina-di iny biòbitinyke. Iny biwiòhenanyke. ³ Bededÿÿnanabina kanakre. Kia txuu erydÿÿdu òbiti-ò roholaõhyyre. Erydÿÿdu ributunykre tamydeewimy. Iwese iny tõhõti nohõtijuty-ò rotÿÿnymyhÿre wese tamy wimy aõna aõnaòle roholamyhÿkre. ⁴ Inatyhyerydÿÿna-ò roholaõhyymyhÿre. Urile ihetxiu ijyyòle roholakemy ixidi ihÿre. ⁵ Kai tahe ywimy maraykynyke. Ibutumy aõhõkÿmy botÿÿnyke. Deuxu Rybewihikÿmy belyyke kia tahe aõmysÿdÿÿnare Deuxu adee riwahinyre. Idi hyulemy mabekre. ⁶ Iny riwawahinyke xiwena wesemy rubu-ò. Waixituededÿÿnana heka rehemynyreri. ⁷ Ijesu wihikÿwesemy tahe

rexiijesudỹnyre wese. Rekonananyra heka waumy ijera. Retyhynyhyra tahe ityhyna. ⁸ Òbitiwidỹna raheto wese wadee rexihumy roire. Wanyrỹ, ywisidỹdu òbiti, riwawahinykre kiadxuu. Jiarỹ sohojiòle aòkò. Tahe tule iraròsòdu mahãdu-ò. Jesuisi dehemynyna luumy kia mahãdu roimyhỹre. Tamy tule rataanaò raheto wese riwahinykremy.

⁹ Wylemy inihe waroramy manake. ¹⁰ Dema riwarira Tesalonia hãwã-ò rara. Tii bede aòmydỹnana luure. Kalatxia bede-ò Kresetxi rara. Dalimasia bede-ò Txitu rara. ¹¹ Luka-wanale watzireri. Tahe kai Marku bididykre, wawiòhedỹdu wihikỹmy rarekemy. ¹² Txitxiò heka Efesu-ò reteònyre. ¹³ Kai tahe manakreu warahana bidiwykre. Troaji hãwã-ki Karpu heto-ki tahe warahana rerire. Watyyriti tule bidiwyke tyriti welỹte tule nohòti losaòtyhymy. ¹⁴ Alexỹdre womati loresedỹdure warybe dibinanymyhỹde. Wanyrỹ iòwydỹna tamy kidilidikre riwabinanyreki. ¹⁵ Kai bexiekre kowa-ribi, inyrybe dori rityhynyòhymyhỹre. ¹⁶ Juhuu dinodu-ò rewyònyreu inyò riwawiòhenanyòhyre. Ibutumy rirahure waribi. Aòbo wabinamy riwinyre-ribi Deuxu tòhòti rosamy watzireri. ¹⁷ Wanyrỹ tahe, riwawiòhenanyra Deuxu rybemy rybe-ki. Iny witxira dori, judeukòdu mahãdu roholamyhỹre. Leaòry-ò, wadi rehukòra. ¹⁸ Wanyrỹ tule riwatakre ibutumy aòmydỹnana bina bina-ribi. Kowa bede wihikỹ-ò riwadykre. Tuu rekeàlàkre aõu aõu bededỹnana roobymy. Kie.

¹⁹ Warybe wehityyna Prisila-ò, Akila-ò biòkre tule Onisiru sỹ mahãdu-ò. ²⁰ Erasto, Oritxi hãwã-ki rarire. Trofimo, Miletu hãwã-ki binamy resere. Taile heka rarira ibinamyhỹreki. ²¹ Wylemy manake inihe beòrako-ki. Ubulu tarybewehityyna adee riwahinyre. Tu Prudente, Lino, Laujia ijõre. Tule ibutumy ityhydỹduseriòre rybe wehityyna adee riwahinyreri.

²² Wanyrỹ awana ratxikemy watziwãhãre. Tule làhàna umy-wana ratxikemy watzimahãre. Kie. Paulo

Txitu-ò Paulo Tyyriti Txitu-ò

¹ Jiarỹ Paulo rare. Deuxu deòdu rare. Jesuisi Kristu riwamyre inatyhyna aritỹnynykemy. Kia tyhydỹyna, Deuxu tarasana mahãdu hõrõ rare. Kia ityhydỹyna dee inyõ rierykeki, rityhynykeki, Deuxu deewimy tii rarekre. ²Umytuèdeõnahakỹ iny riraõmyhỹre. Deuxu dori tuu rarybere ihetxi bedeu. Deuxu heka tiu raruiõtyhy. ³Ibededỹynana õbiti dehemynydeu, Deuxu aõmydỹynana rarybekemy rotỹnyre. Kia aõmysỹdỹyna wadee Deuxu riwahinyre, iny tarasadurenymy rybe-ò. ⁴Txitu-ò kia warybe rewahinyra. Kai iny-wana Deuxu tetyhynyteri, kia dori inatyhymy wariõre wesemy tate. Deuxu, iny tyby-ribi, Jesuisi Kristu, iny tarasadu-ribi, Deuxudeysana-di, ywina-wana adee kanakemy watzireri.

⁵Inyaõmydỹynana biõbitinykemy dori adee adiride. Kreta bede-ribi rõhõnyreu, dori waaõmysỹdỹyna rehuõre. Kia-ki dori kowa-di anaride. Ibutumy hãwã hãwã-ki ityhydỹydu mahãduy-ribi kai matuari mahãduõ bimyke. Iwese jiarỹ rarybere wese kai bimyke. ⁶Matuari õbiti bimykre. Matuari ihãwyy sohojiõ rỹira bimyke. Inyõ ityhydỹydummy riõrenadule bimyke. Iriõre iõraruluukeki, iehehekeki, kia hãbu bimyõke. ⁷Ityhydỹydu mahãdu yrubudỹydu õbitilemy dori ihỹkemy. Inyõ-ki heka ibinamy mahakeki, imynyõmy. Tii dori, Deuxu dee raaõmysỹdỹykre. Ixidile nohõtidu mynyõmy. Hãbukyara rybebyby, mynyõmy, vñ luudu aõkõ, hãbu aõbinaluudu aõkõ, hãbu ityhymy nohõtidu aõkõre. Kia mynyõmy. ⁸Iny inatyhyle, õbiti luunadule, taroraludu-ò awire mahãdu, iny aõwityhy luunadule, ixiwedule, Deuxu rybe tyhydỹydu, kiale bimykre. ⁹Deuxu rybe-di kia hãbu õbitimy rõhõtinkyre, õbitityhylemy rierynanykemy. Inyõ ierysydỹyna rityhynyõkeki, erydỹydu irayky riywinykre tai ihewo-ribi rieryke, rityhynykemy. Tule iny iwitxira erydỹyna-di rarybemyhỹreki, tii riõbitidỹnyre.

¹⁰Iny sõwemy inatyhymy rityhynyõreri. Tii dori aõna aõnalemy rarybemyhỹre, ityhydỹydu mahãdu riitxenanyhỹkemy. Kia mahãdu-ribi, judeu mahãdu ibutu ratyre kia aõna aõnamy rotỹnynyhỹre. ¹¹Inyõ kowa mahãdury riyrykemy tamy rarybeke. Iny sõwemy heka riitxenanyhỹre. Òbitimy aõkõ heka iny rierynanyhỹre. Nieruõle heka iny rierynadỹynanyhỹre. ¹²Kowa mahãduõ, ierydỹyduõ rarybera:

—Inyboho, Kreta bedeludu mahādu, ibutumy ruidu roire. Iròdu brebuna wese iny roire. Inyboho heka teoruxere roire. Byrelemy inyboho rōhōtinymyh̄renyre.

13-14 Aōmybo kahābu rarybera heka inatyhy rare. Urenana tahe arurumy rityhynkemy. Judeu mahādu ihetxiu ijyy-ribi tōhōtirenny rosakemy kai marybeke. Hābu mahādu bedewina rityhynyōkemy. Kia hābu dori inatyhyna aōkō rityhynnyre. ¹⁵ Ōbiti mahādu dee ibutu ōbitire. Ityhyd̄ȳdukōdu mahādu-ò aō aōkō ōbitire. Tōhōtinarenny dori aōbina binalemy rōhōtinymyh̄re. Aōu tii rexieryre aōbinahak̄y riwinykemy. Deuxu-ribi tōhōti rosare. ¹⁶ Tiiboho rarybemyh̄renyre: — Deuxu inyboho reeryrenyre. Tiiboho tahe Deuxu erydu wesemy aōkō aōna aōnany rot̄ȳnymyh̄renyre. Tiiboho iny riojinyrenyre rybemy reōbyōlemyh̄renyre. Aōwihik̄y wid̄ȳrieryōrenyre.

2

¹ Kai, Txitu, aōerynawihik̄y dibo bierynanymyh̄ke. ² Matuari mahādu kai bierynanyke hābu ixiwedu mahādulemy roirelemy, ywimy nohōti wydynadu mahādu roirekemy, ōbitilemy rityhynkemy, ibutu ōbiti luukemy, iixiraterkemy. ³ Senadu mahādu tule bierynanyke iyrubumy r̄yikemy iujōmoōmy r̄yikemy, tule v̄i luuōmykemy. Aōerynawihik̄y dibo bierynanybenykemy. ⁴ Hāwyy t̄ymyra hābumy heridu t̄ymyra tahābu luukemy, tariōre luukemy, kia senadu mahādu rierynanykre. ⁵ Tuu iyrubumy r̄yikemy, ōbitimyy raraykynymy r̄yikemy, taheto riywinymy r̄yikemy, awimyy r̄yikemy, tahābu rybe riywinymy r̄yikemy. Kia wesekeki, Deuxu rybemy inyō ibinany rarybeōtyhy. ⁶ Weryrybō mahādu tule bierynanyke iyrubumy r̄yikemy. ⁷ Kai, Txitu, aōna aōna wihik̄y my bot̄ȳnykre, tai tahe ityhyd̄ȳdu mahādu awesele aōna aōnany rot̄ȳnykre. Kai bierynanykeu, ōbitilemy inatyhymy bierynanykre. ⁸ Arybe ōbitityhyd̄ile bierynanykre. Tai tahe aōludu raix̄yrukre aōmy dori umy rarybeōtyhy. ⁹ Kai bierynanyke urideōdu mahādu tawedu rityhynkemy. Tamy awimyy raaōmys̄d̄ȳnykemy. Tamy heka rōrawyōd̄ȳōtyhykemy. ¹⁰ Rawasinyke aōkōre, ibutumy ōbitilemy riwinykemy. Kiawesekeki, ibutumy Deuxu iny tarasadu deewimyy riwinykemy. ¹¹ Deuxu taeryd̄ȳna-di taluuna ibutumy iny-ò rexideōsinyre. Taluuna tahe iny tarasana-ò rehemy nymyy raremyh̄. ¹² Kia heka iny tuu robikeu, awimyy eryd̄ȳna rahake. Riwaerynanymyh̄ aōbina bina wid̄ȳmy tule ōbitina-di yrubud̄ȳna-di iny rariakemy kabede-ki. ¹³ Tule iny riraōmyh̄rennykemy iny Deuxu wihik̄y iny tarasadu Jesuisi Kristu loosōnatyhywo-ki kedehemy nykre.

¹⁴ Iny òwymy dexiwahinyde iny òraru òwydÿÿrenymy. Kiawese heka iny riwyre idi riratisebenyre iny ijoi lyrahakÿ ixidee rimyre. Kia ijoi iluure.

¹⁵ Kai, Txitu kia aõna aõna inyko belyyke. Tai Deuxu-deewimy riwinykemy urenana rakatxirenykemy. Iny biery-nanykre. Iny biòbitinykre. Iny ibutumy rityhynykemy matx-ibenyke.

3

¹ Kai ityhydÿÿdu mahãdu ixi bitõhõtijeranyke ibutumy hãwã dinodu, bede dinodu rityhynykemy, tabede ywina rityhynykemy. Tule aõmysÿdÿÿnana wihikÿ riwinykemy.

² Modee heka ibinamy rarybeõtyhy, raaõbinanyõtyhy ywimy rarekemy, moheka iehehemy riwinyõmyhÿre.

³ Inyboho heka tule iehehe roiremyhÿ, iitxÿtemy roiremyhÿ, òraruluunamy iny riitxenanyemy roiremyhÿ, òtaluumy roiremyhÿ. Aõbina bina luumy iny witxira aõna aõna-di wii risÿnyemy roiremyhÿ, wideramy roiremyhÿ. ⁴ Tahe Deuxu iny tarasadu luuna, ruxetòena-wana inydeereny dehemynydeu, tii kia-ribi iny ritarenyre. ⁵ Kia aõna aõna wihikÿ iny riwinyrenyrekiki aõki, iny Deuxu ritarenyre, taluuna-di tahe iny ritarenyre, Jesuisi òraru-ki xiery heka Deuxu riwatÿmyranyre Tatytybytyhy-di. Umytÿmyra riwahinyrenyre, riwasuhòrenyra.

⁶ Tatytyby inydee riwahinyre Jesuisi Kristu iny biu-ò hedureki. ⁷ Kiawese iny riwaòbitinyrenyre taluuna-di. Katahe inyboho umytuedeõna ijòdire. ⁸ Kia heka inatyhy rare. Ka aõna aõna bierynanytyhykeu, tahe wadee awikre. Kia wese Deuxu ityhydÿÿdu mahãdu aõwihikÿlemy rõhõtinyinmyhÿke tule rewinymyhÿkemy. Kia heka awire. Kia iny riwiòhenanymyhÿre.

⁹ Ýraxina itxÿte kai rÿÿraxidÿÿõmy, iwyòdÿÿõmy, rybe jei jei-ribi irehemy mabekre, tule lahi òraru rybe-ribi. Kia rybe aõ aõkõ rare. Awi aõkõ rare, iny riwiòhenanyõtyhy. ¹⁰ Hãbuõ rybe òwe òwe-di ityhydÿÿdu rierynanykeki, aruru rybemy tamy marybeke. Kai inatxi rybemy marybekeki, tii rexiòbitinyõkeki, tahe uritere aõna aõnamy tamydÿÿõmy. Tii òrarudu dori ratximyhÿre. Hãbu òbiti aõkõ. ¹¹ Tiile rieryre tuudÿÿdumy ratximyhÿre.

¹² Jiaryÿ, Txitxiò, Atema-wana aòrysomy ariteònykreu. Niòpòli hãwã-ò wadee manakre. Kowa arasÿnykre ibutumy biu bedeu. ¹³ Zena, bede ywina erydÿÿdu, Apòlo-wana kai itÿinarenny-ò biteònylebenyke aõmybo tamy biwahinymyhÿke.

¹⁴ Bierynanyke iny aõmysÿdÿÿ wihikÿkemy rotÿÿninymyhÿkemy. Kia wese aõbo rauhenyreri tamyreny ijòdikre. Tai riwiòhenanykre.

¹⁵ Ibutumy kaki jiarỹ-wana iny rybe weityhyna adee re-wahinyrenyleri. Warybe biwahinyke ibutumy inyluudu ity-hydỹỹdu mahãdu-ò ibutumy adeereny Deuxu deysanamykre. Kie.

Filemo-ò Paulo Tyyriti Filemo-ò

1-2 Jiarỹ Paulo rare. Jesuisi Kristu òraru-ki ròtena-ki wãhãre. Tximòtxi iny seriòre wese jiarỹ-wana adee Filemo-ò rybe rewahinyrenyre. Kai inyluunareny, iny wiòhenadỹỹdu tate. Tule Afia-ò, rewahinyreri, tii iny wyòrenyõ rare. Tule Arikipu-ò, rewahinyreri iny rybe tỹnydỹỹdu-ki ijoiõ rare. Tule ityhydỹỹdu mahãdu-ò rewahinyreri, aheto dohodỹỹna ijoi-ò wahe. ³ Ruxetòena ywina-wana Deuxu iny tyby-ribi, Jesuisi Kristu iny iòlò ribi adeeremy kanakemy watzireri.

⁴ Deuxu-ò rexitòenyreu, atxi, Filemo, wanohõti reamyhỹre. Tai umy rarybera. ⁵ Kai dori Jesuisi tetyhynyte, inyiòlò luumy, ityhydỹỹdu mahãdu luumy atximahãte. Kia-ò raholamyhỹre. ⁶ Tule rexitòenymahãreu kiamy jiarỹ rarybemahãre. Kai iny wixira-ò Deuxu aõmydỹỹnanamy belyykeu, Kristudeewimy bierynanyke. Kia inydeeremy rexitòenyre Deuxu-ò. ⁷ Jiarỹ wadeysatyhyreri, kai dori aluuna iny wixira dee ratximyhỹre. Kia heka deysana nihikỹ ityhydỹỹdu mahãdu-ò rare, tii riwawowesenymyhỹre.

⁸ Jiarỹ timy atxikemy adee ararybekeki, tule ke heka arateranyke. Jiarỹ dori aityhydỹỹdu seriòre rare. ⁹ Tahe aluudỹỹna òraru-ki tahe adee arexitòenykre. Jiarỹ Paulo rare. Ròtenawo-ki jiarỹ roire Jesuisi Kristuluu òraru-ki. ¹⁰ Wariòre wese dee rexitòenyneri. Onesimo wariòre wesemy redyreri Kristu tyhydỹỹna-ò waribi umy wese kaki ròtenawo-ki rare. ¹¹ Tiu heka adee riwahinyõmyhỹre tii dori juhUU awiòhedỹỹdutyhy aõkõ rare. Wijile tahe iny diwiòhenanymyhỹde adee wadee tule. ¹² Tii adee reteònyreri. Ixyby araòkesedỹỹnyreri. Kai ixi-ki binyke wawesemy, wadee dori tii awityhy rare. ¹³ Jiarỹ dori ixideele remyõre wawiòhedỹỹdu kaki ròtenawo-ki Rybewihikỹ dohodỹỹ òraru-ki. Kia òsỹny adee awire. ¹⁴ Urile aõkõmy marybekeki tii arimyõthy. Kai aõ wadee bidiwahinykeki, kai ixi sohojile inihe biwahinykre. Waixitòena-ki aõkõ. ¹⁵ Onesimo heka aribi irehemy rexijere ijõ bededỹỹnana wixirau, tahe wijile tiemy abrysimykre. ¹⁶ JuhUU wesemy aõkõ ihỹre deòdumy wahe, wiji aseriòre wesemy heka rare. Tii heka waluutyhy rare, adee tulekemy ityhydỹỹdu wese wiluukemy wadee awire. ¹⁷ Kai wabiòwakeki, tii birybenyke iwese tiwarybenymyhỹte wese. ¹⁸ Aõ adee rasiranyreki, jiarỹ ariwyònykre teròwymy. Jiarỹ iximyna kaa retyyritinyre: Jiarỹ Paulo ariòwynykre. ¹⁹ Kai waòraru-ki ityhydỹỹdumy atximahãte. Kia tahe adee tuu ararybeõthy.

20-21 Warybe mynamy ta kai bòwidỹỹkre Kristu òraru-ki, tai ta biwadeysanykre. Jiarỹ warybe rewahinyreri, araerye, waixitòedỹỹna ratyre biwinykre. ²² Ijõmy adee arexitòenykre: wasỹ waherina ahetowo-ki biwinykre. Deuxu-ò hexitòenykreki, tai jiarỹ aõhe-wana adeereny aròðekre.

²³ Epafa wabiòwa ròtenawo-ribi adee riwehityhynanyreri (jiarỹboho kaki watzimyhỹrenyre Jesuisi Kristu Rybe òraru-ki), ²⁴ tule Marku, Aristarku, Dema, Luka-wana rexiwehityhynanyreri. Kia ibutumy heka Deuxu-ò aõmysỹdỹỹdumy roire.

²⁵ Jesuisi Kristu làhàna awo-ki ratximyhỹre.

Hebreu-ò Tyyriti judeu ityhydỹdu mahãdu-ò

¹ Juhuu Deuxu inytybyreny-ò rarybemy raremyhỹ. Deuxu rybe-ò ijohonadu-di tamy rarybere. Tule sówemy aõna aõna wixira wixira rarybere tamy. ² Tahe ikonana wiji txuu inydeereny tariòre diteònykemy rarybera. Tii rarybere tybyderòwmy. Iriòre tahe ibutumy aõna aõna wedu rare. Deuxu iriòre kia rarekemy rarybere. Tii tule juhuu bede widỹdu rare. ³ Tii Deuxu loosòna tỹnydỹdumy ratxireri. Deuxu wesehyomy ihỹmyhỹre. Iriòre, taryberuru-di, ibutumy aõna aõna rimomy roimyhỹre. Iny òrarunareny riixãwididỹnymy rahudi, biu-ki Iòlò Deuxu ruruna weribi ronyre. ⁴ Iriòre ranire niwihikỹmy. Tii dori ýjuratyre awityhyre. ⁵ Tiu heka ýjuò-ò rarybeòhyomyhỹre: –Kai wariòre tate. Bohyomy wiji wãhãre. Ijò ritidỹmy rỹire, kawesemy: –Jiarỹ tybomy ararekre. Tii wariòremy rarekre. (Kia tahe ýju-ò tii rarybeòhyomyhỹre.) ⁶ Iriòredela kabede-ki reareu ixityre ijõmy rarybere: –Ibutumy Deuxu ýju tuu reàlakemy. ⁷ Ýjummy tahe kawesemy Deuxu rarybere: –Jiarỹ ýjuboho tahe yhy ele elewesemy retxienyre, wadeòduboho heòtyloosòwesemy retxienyre. ⁸ Tahe tariòremy kawese rarybere: –Wariòre, Deuxulemy atxiteri. Kai ibutumy inyiòlòhyomy rare. Aruru tuedeõna debòna dire. Wiwesemy nonana-di ibutu-ò atximahãte, òbitimy. ⁹ Òbitinaluumy kai atximahãte òraruna deramy tahe atximahãte. Tai tahe Deuxu, aDeuxu amahãdu ratyre awimy teleta adee riwahinyre deysana. ¹⁰ Ijõmy Deuxu rarybere tariòremy: –Kai Wanyrỹ juhuu bede widỹdu tate. Bede ibutumy tewinyte. Tule biuludu aõmydỹnana tewinyte. ¹¹ Kia bede aõmydỹnana ludu ibutumy rexihukemy. Kai tahe tiu atuedeõna. Iwese uwòhi retybyre wese, kia aõna aõna retybyke. ¹² Tule wesirahana rawerasemy roimyhỹre wese ibutu tyy retybomyhỹre, rawitxiradỹmyhỹre. Kai tahe ixiwesehyy ahãte. Abede dỹnana tahe tiu itueòtyhy. ¹³ Ýjuò-ò Deuxu tiu rarybeòmyhỹre: –Bodonyke waruruna weribi. Aòludu mahãdu ako-txi resemyhỹkemy. Eòdumy rarekemy. Kiamy tahe tariòre-ò rarybere. ¹⁴ Ibutumy ýju mahãdu Deuxu deòdu rare tyytyby wesemy rare. Deuxu diteònyde ityhydỹdu mahãdu wiòhedỹmy tule ibutumy biu-ò hedu mahãdu wiòhedỹmy.

2

¹Tai tahe, waseriòreboho, ityhyna rybe-ò rokoholarenyreki,

tamy tahe rikimyrenykre rikityhynyrenykre. Tai tahe iribi tiu ròkòirenyõtíhy. ² Ibutumy ýju rybe inatyhymy raremyhỹ. Ibutu òrarudu rimyre aõhõkỹmydỹñana-ò irybe riywinyõreki. ³ Kia inatyhy rare. Tarasana rybe wityhy-ò rokoholarenyõreki, timybo inyboho rikiòlònyrenyke. Kia rybe wityhy Wanyrỹ Jesusile juhúu inydeereny relyyre. Idi tahe, ijohonadu mahãdu tuu rarybere tule. ⁴ Deuxu irybe myna rotỹñnyre, ròbedeòbydỹñnyre tai ròbedeòtiidỹñnyrenymy tai Deuxu ruru ritỹñnyre. Tule Deuxu Tatytybytyhy iaõwidỹñnamy ixideewimy inymy riubỹtỹnyre.

⁵ Ýju-dee aõkõ bede riwahinyre-kia iòlòmy rarekremy. Jesusi-ò kia riwahinyre. ⁶ Juhúu inyõ rybe txiõdỹñnamy rarybere: —Ritina-ki kia rybe roimyhỹre: —Aõbo heka hãbu tyhy riõre rare? Tii aõ aõkõ rare. ⁷ Ijõ bededỹñnanaõ Deuxu riõre ýju-ribi tyhymy aõkõ ihỹre. ⁸ Tahe wiji wowydyna tamy rawahire iwese iòlò dee iny riwahinyre wese, tamy rawahire. Tule ibutu wedumy rarekemy. Iny ruereny dee ibutu ihõrõ aõkõ òsana rare. Ibutu rurudu wese aõkõ iny ruereny-ki rỹire. ⁹ Tahe inyboho Jesusimy robirenyre. Tiile tuu ihỹre. Urihimyò bede aõmydỹñnana be-deu ýju-ribi tyhymy aõkõ Deuxu tii relere aõhõkỹmy dỹñnana rimykre. Tahe rurure. Rubu riurihire inyderòwyrenyumy. Tai tahe rataana raheto wesena Deuxu tamy riwahinyre dealàna-wana. ¹⁰ Deuxu riwinyre ibutu aõna aõna ix-idee. Tii kõkeki, bede ihoõhyymy roiike. Tii ityhydỹñdu mahãdu ridymyhỹre taloosònasy-ò, taijoimy. Tai tahe Jesusi aõhõkỹmy rotỹñnyre Deuxudeewireki. Tarasana wydudumy heka wityhymy Deuxu deledede aõhõkỹmy rotỹñnyreki, tai awityhymy ròhònykemy tarasadudikemy. ¹¹ Òbiti widỹñdu tahe òbitina mahãdu-wana wimahãdu wese roire. Wiwanale sohoji tybyribile doidenyde. Tai tahe raixỹruòlemy Jesusi seriòremy rininire. ¹² Ritina-ki rarybere: —Ani aritỹñnykre waseriòreboho-ò. Dohodỹñna heto-ki àlànawiu-di adee ari-wiunykre. ¹³ Ijõ Ritidỹñna-ki rarybere: Tii arityhynyhykre. Ijõ: Kakile wahe watxireri, tule roire wariõre Deuxu di-wawahinyde. ¹⁴ Iwese ibutumy inyumy wiwesele roire wese, tule Jesusi umyõ rimyre, inyumy wesele, tai inywese-my rurukremy. Tai tahe rubu dinodumy rahaananyre, Diabo wahe. ¹⁵ Kia rubu mahãdu lau ruberumyhỹre mahãdu, ibrebu iribi ritare. Kia mahãdu dori rububrebu deòduhyymy ihỹrenyde. ¹⁶ Ýju aõkõ ritakemy namyhỹde, Abraõ riõre riõre ritakemy namyhỹde. Tahe wiji tule ihỹre. ¹⁷ Iseriõre wese hyymy roirekemy ihỹrenyde. Tii dori Deuxu Xiwena widỹñdumy rarekemy inydeereny tai ruxetòena wahidỹñdu òbiti tii ihỹre. Ibutumy iny òraru òwydỹñnamy rỹimyhỹkemy.

¹⁸ Ibutumy ixiradÿÿna mahãdu tii riwiòhenanymymyhÿre, ibutumy ixirana-di aõhõkÿmy rotÿÿnymyhÿreki.

3

¹ Tai tahe, waityhydÿÿdu seriòreboho, bohولاتyhyke Jesuisi rybe-ò: —Kaiboho dori tule bimybnykemy biu bede aõmysÿdÿÿna. Jesuisi iny ityhydÿÿna Xiwena wahidÿÿdu wedu tyhy rare tule inatyhyna deòdÿÿna tyhy tii rare. ² Deuxu tii riwinyre Xiwena wahidÿÿdu wedumy. Tai tahe tii òbitimy riwinyre Moisesi riwinyre wese Deuxu sÿmahãduy-ki raaõmysÿdÿÿnymyhÿreu. ³ Jesuisi-ò tahe sòwemy wowydyna rawahikremy. Moisesi wowydyna ratyre rawowydynanykemy. Hetowidÿÿdu iny riwowydynymyhÿre, hetoratyremy. ⁴ Ibutuheto iwidÿÿdu dire. Ibutu widyydu tahe Deuxu rare. ⁵ Moisesi Deuxu heto-ki òbitimy rybe riwinyymyhÿre teòdu aõmysÿdÿÿnanamy. Tai tahe teòsidÿÿna ririre ijesenareki. Deuxu rybe tÿnydÿÿdu tahe Moisesi rare. ⁶ Kristu tahe Deuxu sÿmahãdu wedu rare Deuxu riòre rareki. Inyboho Inynyrÿreny-ò ròkòtyhydÿÿrenykeki tuu rokoirekre. Tai iny brebutererenymy iny raròsònarenymy inatyhymy rakatximyhÿrenykeki tahe Deuxu ijoi inyboho roire. ⁷ Kiawesemy tahe Deuxu Tyytybytyhymy narybede: —Wiji tahe tamy bohólabenyke aworeny iòlududÿÿrenyõmy. ⁸ Judeu mahãdu wesemy aõkõ boibeke, tybyboho wesemy aõkõ wahe boibeke. Tiiboho dori tamy raujòmomyhÿre bedero-ki Deuxu riurihirenyreu. ⁹ Deuxu rarybere: —Aõbede wiwihikÿ rewinyre hãre, alabierenymy riwaitxenanyrenyremy tamyreny watxireri iny inatxiwaitue beòramy aõbedewiwihikÿ riraõmyhÿre. ¹⁰ Tahe Deuxu rarybere: —Waky reamy tamy wãhãre. Tiu heka wawana ratxiõhyymyhÿre ryòbiti tamy retÿnynyre hãrele. Tawo-ki teòsahyymy ratximyhÿre. ¹¹ Deuxu rarybere: Waky reatyhymy tai tahe ixidee resere, inatyhymy rarybere: —Tiu tiiboho elehyna bede-ò ralòõtyhy. ¹² Bexiijebenymy waseriòreboho uritere awo-ò ròtedÿÿõmy raykyitxÿtena. Kia òraru-ki aDeuxutyhy-ribi irehemy bexilòhòrarienyheny aDeuxu tyhy dori irumy ratximyhÿre. Tii inatyhy rare. ¹³ Txuõ txuõlemy wii biòbitinybenyke. Òraruna dori itxenadÿÿdu nihikÿ rare. Tai tahe wiji kiamy botÿÿnybenyke. ¹⁴ Deuxu rikityhynyrenyhyymy rakatxirenyke. Irybe rikiywinyrenykeny rakatxirenyke iwese juhu rityhynyrenyra wese. Kia wesekeki, Kristu leinamy rakatximyhÿrenyke. ¹⁵ Kiawesemy tahe Deuxu Tyytybytyhymy narybede: —Wiji tahe tamy bohólabenyke aworeny iòlududÿÿrenyõmy. Iwese ihetxiu mahãdu riwinyre wese aõkõ boibebenyke. ¹⁶ Timahãdubohe roholare Deuxu

rybe-ò iribi tahe wimy raòludure. Kowa Egito bede-ribi doimyhÿde mahâdu roire. Moisesi tamahâdu-wana doimyhÿde. ¹⁷ Mobohe Deuxu kyaradÿÿdure 40 wyra sôwe. Kia mahâdule bederahykile rexihure raðrarunyreki. ¹⁸ Moòbo Deuxu rarybere taelehyna bede-ò ralòðtyhymy? Rybe ywisidÿÿdukòdu mahâdu-ò rarybere. ¹⁹ Inyboho tuu rieryrenyre. Rirònyrenyõremy rityhynyõrenyreki.

4

¹ Deuxu juhuu rarybere: –Inyõ taelehynabede-ò ralokremy. Inatyhymy heka aõmybo rarybere rÿire. Inyõ òsana kaibohoõ tamy rehemynyõtyhy rityhynyõmyhÿrenyreki. Tai tahe bexityhynymyhÿbenyke kia-ò. ² Inydeereny tahe Rybewihikÿ tÿmyra ròhònymy roimyhÿre, iwese Moisesi mahâdu-ò ròhònyre wese. Tamyreny tahe awityhymy aõkò tamy ròhòtinymyhÿre rityhynyõhyymyhÿreki. ³ Deuxu tyhydÿÿdu mahâdu ralòke taelehyna bede-ò. Deuxu dori rarybere: –Jiarÿ inatyhymy anarybede. Iny rityhynymyhÿrele tamy ralokre. Deuxu kiamy rarybere: –Taelehynabede tamy rewinyre xiery juhuu bededÿÿnana rewinyroireu. ⁴ Inyboho rierymyhÿrenyre tii riraõmyhÿremy Ritidÿÿna roireki: –Deuxu taelehyna-kiele rihynyre debòinatxitxu bededÿÿnanamy. Taaõmysÿdÿÿna ibutumy rahure aõbo riwinykemy idi raremyhÿ riwinyre. ⁵ Ijõ rybe tule kia-wana roire: –Tiu ralòðtyhy waelehyna bede-ò. ⁶ Tuu heka Deuxu rarybere inatyhy raremy. Ijõ mahâduõ ralòmyhÿre Ijõ mahâduõ ralòrenykre. Moisesi mahâdu tahe ralòõre Deuxu rybe riywinyõreki. ⁷ Wiji bededÿÿnanamy heka Deuxu rarybereri. Kia rybe rare iwese Davi rarybere wese: –Wiji tamy bohoolabenykeu, aworeny iòlududÿÿrenyõmy. ⁸ Josue ridyre Moisesi mahâdu Suwixiraõ-ò. Kasu tahe kabede aõkò rare Deuxu elehyna bede. Deuxu idihyy tuu rarybemy ihÿre. Wijina ròtena bededÿÿnanamy Deuxu rarybemyhÿre. ⁹ Tai tahe Deuxu mahâdu dee elehynasu bede roimyhÿre. Deuxu elehynatxu wese heka rare, iwese Deuxu debò inatxitxu-di rexielehynyre wese. ¹⁰ Iwese Deuxu raelehynanyre wese raelehynanyre inyboho taaõmysÿdÿÿna-ribi, inyboho rukururenykreu. ¹¹ Awityhymy rokoireke tamy rikirònyrenykemy tule. Rekeixijerenyke. Deuxu rybe rikiywinyõrenykeki iwese judeu mahâdu wese rikirònyrenyõtyhy. ¹² Ibutumy Deuxu inydeereny rarybere iruru dire. Iwese mayrehe wiòtxureemy rÿrira wese Deuxu rybe rare. Inyrayky wydyna riòròmyhÿre, òhòti wydyna-wana. Mayrehe rayky riraynymyhÿre aõmybo inyrayky Deuxu ibutumy rierykemy. ¹³ Ibutumy

Deuxu rierymyhÿre inyraykyreny. Iny Deuxureny irumy ihÿre. Ibutumy aõna aõna tamy itÿnyhÿkÿle rare. Aõ heka iwasi aõkõ tamy rare. Ikonanau ilau ibutumy aõhebo iny rotÿÿnymyhÿreny re rikitÿnynyrenykre.

¹⁴ Jesuisi Deuxu riõre iny xiwenadÿÿdu tyhy rare. Tii rare biu-ò iny wiõhedÿÿmy. Tai tii rikityhynyrenyhyymyhÿke. ¹⁵ Tii iny aõkõnareny rierymyhÿre; ixiradÿÿna rierymyhÿre tai iny riruxetõenyre. Tii kabede-ki tiu heka raõrarunyõhyyre, ixiradÿÿna hãrele. ¹⁶ Tai tahe rekexiterenymy rekexitõenyrenyke iny iòlõreny rynana-ò. Tai tahe ruxetõena sõwemy inydeereny kidiwahinykre. Bedeòbyna kidiõkre tuu rokorurenkykre.

5

¹ Hãbuõ Deuxu rimyre xiwena widÿÿdu mahãdu wedumy rarekemy. Tii ibutu iny deròwymy Deuxu-ò rybedumy raremyhÿ. Tii iny uriõnosõna Deuxu-ò riwahinyre. Tule õraruna brò-ki xiwena tamy riwahinyre. ² Tii dori hãbu rare tamahãdureny-ò dori ywina-di ixi-ki ratxireri iõrarureny rierymyhÿreki. Imahãduõ ibedeeryõre ijõ tahe reòsamyhÿre tiemy aõna aõna bina riwinyhyymyhÿre. ³ Tai tahe xiwena riwahinyhyymyhÿre tamahãdu õraru-ki tule ixiõraru-ki. ⁴ Inyõ ixideewimy aõkõ xiwenawidÿÿdumy raremyhÿ Deuxudeewi xiery tahe tuu rareke. Deuxu tamy rarybemyhÿrekile tahe tuu rÿike. Iwese Araõ-ò Deuxu rarybere tuu rarekemy. ⁵ Tahe Kristu tule reximyõhyyre xiwena widÿÿdu wedumy rarekremy Deuxu tuu rimymy rarybere: —Kai wariõre tate wijile kai inihe anatara. ⁶ Ijõ ritina-ki ijõ rÿire: —Kai xiwena wahidÿÿdu atximahãte urenana. Xideki xiwena wahidÿÿdu wesemy atximahãte. ⁷ Jesuisi kaki raremyhÿu hãbu wesemy iruberytynymy rexitõenymy reàlàmyhÿre. Rahinymy riajuamy Deuxu-ò rarybere. Tii heka Deuxu rityhynyre tai tamy roholare. ⁸ Deuxu riõre heka tii rarehãrele tahe aõhõkÿmy rotÿÿnymyhÿre. Tai tahe ròeryre rybe ywidÿÿmy. ⁹ Tii heka raõbitinytyhyre. Tai tarasana widÿÿdu rÿimyhÿre iywidÿÿdu ityhydÿÿdu mahãdu dee. ¹⁰ Deuxu dori tii rimyre xiwena wahidÿÿdu wedu rÿirakremy Xideki wesemy.

¹¹ Sõwemy tuu adee ararybekemy watzireri. Urile adee isirare ierysyna, teeryõhyymy taholamahãte. ¹² Kaiboho ihetxiu tetyhynytenyete. Tahe inyõ bibedeerynybenyke. Ihãre tahe teerynanyõhyymahãte. Ihyymy textiõkesedÿÿnyta tai tahe inyõ anaerynanykemy adi ratxireri timybo ityhydÿÿdu-ki tatemahãmy. Juhuu erydÿÿna wahe. ¹³ Tohouã howÿtõdu weselemy atximahãtenyete, ityhydÿÿdu aõmydÿÿnana teerytyhyõmahãtenyete, rybeerysydu õbiti aõkõ atximahãtenyete. Kaiboho taumynyõmahãtenyete iwese

ityhydÿÿdu mahãdu rÿirawesekemy. ¹⁴ Deuxu erylasyntyhy inyummy rÿsÿna wesemy roire. Aõbinahakÿ aõwihikÿ erylasyduòle kia rÿsÿna roire, tiiboho dori rierymyhÿre aõbo awire aõbo ibinare, tuu rotÿÿnyrenyre aõbo awireki.

6

¹ Tikiemy juhoo Kristu rybetyhynamy araerynanymahãre. Rekexitõmonyrenyke. Iwixira erylasyna rikieryrenyky. Tai tahe rakaumynyrenyke ityhydÿÿdu tyhymy ityhydÿÿdu rudÿÿna-di. Inyõ rarybemyhÿre. Iny raõbitinymy ratxike xiery iny ratakemy ihÿre. Kia aõmydÿÿnana reerydÿÿnanyõkre tahe. Iny rityhynmyhÿkekile iny ratake. ² Ratisebenamy heka anaerynanyõkre, tule debòlidisinamy, tule rubu-ribi ixixanamy, tule bede konana ritxuakre txummy ibutumy heka tuu ararybeõkre. Tii heka juhoo erydÿÿna rare. Kaiboho dori teerytenyte. ³ Wanyrÿ dee wikeki tahe iwixira erylasyna heka ariwiuronykre. ⁴⁻⁶ Inyõ biu-ribi loosõna wãhidÿÿna riurihymy ritakeki. Deuxu Tyytybytyhy aõmydÿÿnamy ijõ ritake wana, Deuxu rybe riurihike wana, kowa bede wihikÿ ruru rieryke wana. Tii ibutukeki tahe Deuxu-ribi tahewo-ò dòðsede inatyhyna ririre. Isiratyhyhyre ixityre ròte taòraruna Deuxu-ò relyyõtyhy. Tii dori Deuxu riòre ixityre itxeònihikÿ-ki ritidire, inyru-ò ritidire ibinamy rarybemyhÿre. ⁷ Biu heka suõ risebenymyhyre. Òwòruty iribi ritxuhudÿÿnymyhyre tòbòròdÿÿdu-ò. Aõratybo raratynykeki tahe Deuxu bedeòbydÿÿna kia rare. ⁸ Tahe edeweweju kidiwahinykeki, awiõre heka inydee kia sumy ibinamy rarybere. Urile roomyhyre. Kia suu tahe iny ityhyna ririre mahãdu wese rare.

⁹ Kiawese jiarÿ urile rarybereri. Ihãrele tuu aõkõ umyreny rahõtinyreri. Inatyhymy rahotinyreri kaiboho aõ òbiti tewinymahãtenytemy. Iwese tarasana mahãdu weseekemy kaiboho ahãtenyte. ¹⁰ Deuxu dori òbitityhy rare. Kaiboho tamy taaõmysÿdÿÿnihikÿmahãtenyte tai aribireny tõhõti rosaõtyhy. Iwese Deuxu-ò aluunareny teteòsinyta wese ityhydÿÿdu seriòre tewiòhenanytenyteki ihãre tadiwiòhenanymahãte. ¹¹ Wiluu hyymy boibeke bede dÿÿnana konana-ò. Tuu raruhymahãre. Tule iny raròsònareny-di mohõtinybenyke. ¹² Tai tahe ityhydÿÿdu aõmydÿÿna irisirenyõmy boibeke. Òbiti widÿÿdu iele ele aõkõ rare. Rityhynyneri Deuxu wahisidÿÿna ritakremy iwese Deuxu rarybereki. Kaiboho òbiti widÿÿdu mahãdu wesemy ahãbenyke.

¹³ Deuxu Abraõ-ò rarybereu, inatyhymy ixideele rarybere. Inyõ dori Deuxu ratyremy ratxiõmyhÿre. ¹⁴ Kawesemy

rarybere. Deuxu tiiemy ixirybe riwinyhyymyhÿre Inatyhymy anabedeòbynykre, idi anaixijuradÿÿnykremy tai ariokoreõ rasòwekremy. ¹⁵ Tahe Abraõ riraòmyhÿre, raeleleõmy. Idi Deuxu tarybe myna rotÿÿnyre. ¹⁶ Inatyhymy aõmy inyõ rexirybenykreu aõmy rarybekre. Kai tahe aõ ijyy ri-ixãwididÿÿnymyhÿre. ¹⁷ Deuxu tule ixidee rexirybedÿÿnyre inatyhy rybe-di. Tai rybe tarasadu mahãdu rierymyhÿre Deuxu rawitxiranyõtyhy. ¹⁸ Inatxi aõmydÿÿnana iny rierenyre. Deuxu rarybere-wana tiu raruiõtyhy. Tai tahe inyboho inyararòsònareny rimymyhÿre. Iny ixiwòtena-ò ralòmyhÿre tarasana-ò ralòmyhÿre wese. ¹⁹ Inywo-ki inyrayky wiòhedÿÿdu ijõdire hãwòjurasu rimymyhÿre wese iny roire Jesuisi koludu wesemy inydeereny ralòmyhÿre wesirahana webòrò-ribi, Deuxusÿ wahe. ²⁰ Jesuisi juhuu ralore tai. Tai tahe Jesuisi Xiwena wahidÿÿdu wedu rÿihyykemy Jesuisi tahe Xideki axi weseõ xiwena wahidÿÿdure.

7

¹ Xideki tahe Salẽ hãwã iòlò rare. Deuxu Tyhydÿÿdu Xiwe wedu rare. Abraõ heka aõbina ritara. Xideki ròhònyre itxi reakemy, tahe ribedeòbyrybedÿÿnyre. ² Tai Abraõ tamy riwahinyre ibutu aõbina aõmydÿÿna-ribi, debòwiò-ribi sohoji riwahinyre, Xidekini tahe òbiti Iòlò rare iwitxira rybe-ki. Salẽ hãwã Iòlò tahe ywina nodu rare iwitxira rybe-ki. ³ Tybyõre, iseõre, isÿõre. Tii heka itxu ròhònyõhyre tule bedekonanaõhyre. Tii heka Deuxu riõre weselemy ihÿre. Tii Xiwena wahidÿÿdu urenana ratxihyymyhÿre.

⁴ Kaiboho mohòtinybenyke timybo tii aõnityhymy raremyhÿdi. Abraõ inytybyreny tamy diwahinyde: debòwiò aõmydÿÿna-ribi sohoji tamy riõre. Iòlò taòludu aõbina aõbina aõmydÿÿna-ribi tamy riõre. ⁵ Xiwena wahidÿÿdu mahãdu Levi sÿriõre mahãdu-ribi doidenyde. Tamy bede ywina riywinymy riteònyre debòwiò-ribi sohojina ritakemy iny-ribi. Taijoityhy-ribi. Tiiboho dori Abraõ sÿjioiluduõ tule roire. ⁶ Xideki tahe Levi sÿjioiludu aõkõ rare. Ihãrele tahe Abraõ tamy debòwiò-ribi sohojina riwahinyre. Xideki tahe bedeòby rybe-di heka Abraõ rirybedÿÿnyre. Abraõ juhuu ityhydÿÿdu rare Deuxu dori tamy ityhyna rybe riwahinyre. Xideki tahe ityhytyhy rare. Aõhe inatyhy? ⁷ Bedeòbymy rybedÿÿdu aõnityhy rare. Moòbo rarybemyhÿre ratyre aõnityhy rare. Ibutumy kia rierymyhÿre. ⁸ Levi xiwedÿÿdu mahãdu hãbumy ituerenyre. Xideki tahe ruruõhy ihÿre. Kia ritina-ki roimyhÿre. ⁹ Levi debòwiò-ribi sohojina tarasadu rare. Ihãrele tahe Abraõ teròwmy debòwiò-ribi sohojina riwahinyre.

¹⁰ Levi dori natibienyõde, ihãre Abraõ-ki ratximyhỹ iu witxi Xideki-wana witxi reareu.

¹¹ Bede ywina rybe xiwedỹỹdu mahãdu-wana iny rataõtyhy. Tai tahe iwitxira xiwe wahidỹỹdu inyboho riijemãhãrenyre. Araõ ijoi ribi aõkõ nade, Xideki nade wese tahe Kristu nade. ¹² Xiwena aõmydỹỹnana rawitxirakeki, tule rybe bede ywina rawitxirake. ¹³⁻¹⁴ Inynyrỹ tahe Levi xiwewahidỹỹdu mahãdu-ribi aõkõ nade. Tii Juda mahãdu-ribi nade. Tiiboho heka tiu xiwewahidỹỹdu mahãdu-ki riwiõhedỹỹõhyymyhỹre. Moisesi dori tamy kia aõmysỹdỹỹna riwahinyõre. ¹⁵ Kristu iwitxira xiwewahidỹỹduõ rõhõnyre Xideki wesemy raremyhỹ. Tuu heka teerytenyte. ¹⁶ Tii heka bede ywina rarybere wesemy aõkõ nade. Tahe iwitxi rare. Tii umy witxira tuedeõna-di nade. Kia ruru òraru-ki nade. ¹⁷ Rybe riti-ki rỹire, Kristumy rarybereu: Kai xiwewahidỹỹdu mahãduõ tate Xideki wesemy ahãte. ¹⁸ Aõmydỹỹna tyby rawitxiradỹỹre awimy aõkõ dori rare. Irurudimy aõkõre dori rỹire tarasana wiõhedỹỹmy aõkõ. ¹⁹ Kia iny riõbitidỹỹnyre aõkõ. Wiji tahe raròsòna wihikỹ rõhõnyre inydeereny Kristu dori Deuxu-ò inatyhymy iny ridymyhỹre. ²⁰⁻²¹ Deuxu rexirybedỹỹnyre inatyhymy Kristu xiwena wahidỹỹdumy rarekemy. Tahe iwitxira xiwenadỹỹdumy aõkõ kiawese narybede. Kristu-ò tahe Deuxu rarybere: –Deuxu rexirybedỹỹnyre. Tiu rawitxiranyõtyhy arybe. Kai xiwena wahidỹỹdu atximahãte urenana. ²² Tai tahe Jesuisi riòludunyre wijina aõmydỹỹnana tỹmyra. ²³ Xiwedu sõwekemy idi rõhõtinyinymyhỹre, ijõ ruryumyhỹreki. Ijõ tahe teròwymy ralòmymyhỹre. ²⁴ Jesuisi tahe xiwena wahidỹỹdu mahãduy-ribi rõhõnyõtyhy. Kristu tahe aõu aõu ratxihyymy rarekre. Tai ixiwe òlòdỹỹnamy aõu aõu iweselemy rarekre. Ijõ-ò tiu raõtyhy. ²⁵ Tai tahe moõ Deuxu-ò Kristu-di kanakeki, tii tahe Jesuisi ritalekemy ratximyhỹre. Tii dori Deuxu-ò inydeereny rexitòenyhyymyhỹre.

²⁶ Tii dori iny deròwymy rarehyymy rareke Deuxu sỹdee. Jesuisi biu-ki rononymyhỹre Deuxu-wana. Sỹwihikỹ worana bedehesina-ki rononymyhỹre urenana. Tai tahe tii xiwenadỹỹdu wedumy inyboho ruryumyhỹrenyre. Tii òbiti rare, tyrare, iòraruna-ki aõkõ, òrarudu mahãdu-ribi hitximy. ²⁷ Xiwena wedu txuõ txuõlemy xiwena diwinymyhỹde juhoo taòraru hetydỹỹnamy riwinymyhỹre idi tahe ibutumy inyòraru hetydỹỹnamy riwinyre. Jesuisi kia Xiwena wedu wesemy aõkõ ihỹre. Tii xiwena wahidỹỹdu mahãdu-ribi lahixi rare. Sohojihyy dori xiwenamy rexiwahinyre rubu-ò ikonana xiwena wahe. Tii txuõ txuõlemy aõ rubu xiwe wesemy riwahinyõre, iwese iwitxira xiwedỹỹdu riwahinyre wese. Juhoo taòraruna òraru-ki raxiwenyre idi iny òraruna òraru-ki raxiwenyre.

28 Bede ywina hãbule ritidire xiwena wedukremy. Hãbu tahe iruruõre idi tahe sohoji rybeõtyhy bede ywina hewomy nade. Kia tahe Deuxu riõrele tuu risõnyre, tii õbitityhyreki.

8

1-2 Kiamy heka jiarõ rarybere. Kia awese iny xiwena wedu ijõdire. Iõlõ tarynana-ki ronymyhõre. Jesuisi tahe Deuxu ruruna-ribi ronyre. Iheto-di itxeredu tahe Jesuisi rare. Deuxusõle iyrubudõõdu rare. Kia hãbu aõkõ riwinyre Deuxule riwinyre. ³ Kristu iheto raroowo-ki Deuxu deewina riwinymyhõre. ⁴ Kristu kabede-ki ratxikeki tii xiwena wahidõõduõmy aõkõ ratximyhõke. Kabede ludu dori bede ywina rybe riritinymyhõre wesemy riwinymyhõre. ⁵ Tiiboho biu aõmydõõnana wesemy urihimyõlemy aõna aõnamy rotyynymyhõrenyre. (Deuxu Moisesi-õ riteõsinyre aõwesemybo tealãna heto-ki raremyhõ. Tai tahe Moisesi riwinykemy timybo riteõsinyre wesemy hãwãlõ ratyy-ki riteõsinyre.) ⁶ Kristu tahe iwitxira aõmysõdõõna iaõmysõdõõnare. Bede õtiidõõna urenana heka Kristu aõmydõõnana rõimyhõre bede ywina widõõdu aõmydõõnana ratyremy ihõre. Kristu tahe bede ywidõõna tõmyra riwinyre Deuxu iny-wana heka widee rilorore. Deuxule rarybere tahe juhoo-ribi awityhyre irybe. ⁷ Juhoo bede ywidõõna awi aõkõ rare. Awikeki tahe ijõ tõmyraõ rõhõnyõtyhy. ⁸ Deuxu dori ihetxina-ki tamy awimy aõkõ ihõre. Kawesemy dori rarybere: –Txuõ kanakreu tahe, bede ywidõõna tõmyra aritobinykremy Juda sõmahãdu-wana judeu sõmahãdu-wana. ⁹ Bede ywidõõna tõmyra ihetxina-ribi iwitxira rarekere. Ihetxina retobinyre tybyreny-õ. Iu Egito-ribi retareu, retobinyre. Tiiboho bede ywidõõna tõmyra-õ rieryõre. Tai riywinyõre bede ywidõõna. ¹⁰ Kiawese bede ywidõõna tõmyra rarekre, Wanyrõ Deuxu rarybere: –Wabede ywina iraykywydyna-di ariritinykre iwo-õ aritidikre wabede ywina. Jiarõ iDeuxumy ararekre, tule tiiboho wasõ ijoimy roirekre. ¹¹ Kia txuõ rahukredi tahe ibutumy riwaerykre tasõmo-wana, tanihikõ-wana. Tiu wii rierynanyõtyhy Wanyrõ Deuxumy. ¹² Ruxetõena tamy ariwahinykre taõrarutedenamy. Iõrarureny ibutumy wanohõti iribi rosakre. ¹³ Bede ywidõõna tõmyramy Deuxu rarybereu, ihetxina retybyra raseruserunya. Taita awiõra heka.

9

¹ Juhoo bede ywidõõna-ki bede rybe ritina rõimyhõre Deuxu-õ dealãna timybo rawahinykemy. Tule rõimy raremyhõ tykyheto bederahy-ki. ² Iwo-ki inatxi rareamy rõimyhõre. Juhoo irareasana-ki Deuxu iõhõnasõ heka inire iwo-ki tahe adõõ loosõna rõimyhõre. Tule tii paõ

brebuna deòtena òwòrubesetyre-ki rỹimyhỹre. ³ Tyky ijòtòbòna hewo ludu rareasa tahe Deuxu sỹle inire. Òkòsy nihikỹ rihitxinyre ijò-ribi. Tule tahe òwòruwodỹỹò rỹire womati tỹrỹrỹhỹkỹle ihetyre. Iwo-ki tahe xiwena deòtena. Tai riwosinymyhỹre tỹnyre reakemy. ⁴ Òwòrudỹỹrawo-ki tahe womati tỹrỹrỹhỹkỹ butxi riòre ibòbese-di rỹire, iro-ki ihina rỹire mana ta irybereny-ki inire. Tule Araõ hoju rỹimyhỹre tai ruhunymy raremyhỹ. Tule bede ywidỹỹna riti mana tyre-ki tai roimyhỹre. ⁵ Tule iratyty tyre-ki rỹimyhỹ ỹju ritxoo inatximy. Teubrorodile tahe riwòmyhỹre. Òwòru wodỹỹ ratòbòna tikibo Deuxu iny òraruna riixãwidỹỹnymyhỹre wahe. Tahe tuu rỹbeònyrenykre kia aõmydỹỹnana tai rỹiremy. ⁶ Kia ibutumy rexihureu xiwena wahidỹỹdu mahãdu ralòmyhỹre juhoo rareasanawo-ki taaõmysỹdỹỹna tyhy widyymy. ⁷ Ihewoludu rareasana-ò iwedule ralòmyhỹre. Beòra bededỹỹnana sohojimy sohojile tamy ralòmyhỹre. Iròdu riwymyhỹre ihãlubu ritxiwikemy xiwenamy. Taòraru-ò iny wixira òraru-ò tule. Inyòraru-ki tii mahãdu aõna aõnamy rotỹỹnyrenyre rexieryrenyòhyylemy, kiabro-ki. ⁸ Deuxu Tyytybytyhy kia ijyy-di iny ribedeerynymyhỹre. Juhoo tyky heto rỹireu, inybohoõ heka Deuxu iòlònasỹ-ò ralòmyhỹre. ⁹ Kia heka wijina bedeerynare. Juhoo dori xiwena wixira wixira wahidỹỹna wixira wixira uriòno rare. Kia urile iwahidỹỹdu iwo irayky-wana riòbitinyòhyyre. ¹⁰ Juhoo ludu aõmydỹỹnana bede ywinale rare. Rawitxirakekile tahe ròhonyke. Tii tahe rỹsỹna bede ywinamy rare, monatyhy bede ywinamy, aõna aõna surona bede ywinamy. Iny kia bede ywina ibutumy rityhynykemy rỹimyhỹre.

¹¹ Kristu dehemynde, iu tahe rawitxiradỹỹre. Kristu Xiwena wahidỹỹdumy ratximyhỹre. Tai tahe ibutumy rawitxiradỹỹmy roimyhỹre. Tii ralòmyhỹre tyyheto tỹmyra-ò. Itỹmyra tahe biu-ki rare. Kabede-ki aõkò ihỹre; hãbu iwidỹỹdu aõkò rare. ¹² Kristu ralore Deuxu Tyytyby sỹnawo-ò tahãlubu òrarukile ralore. Sohojihyyle ralore iny tarasanarenymy inydeereny riwahinykemy. Iròdu hãlubu-di aõkò ralore, broreni riòre-di aõkò, budoeni hãlubu aõkò wahe tahãlubudile. Tai iny tarasanareny rimyhyyre. ¹³⁻¹⁴ Juhoo budòe broreni Oriòre hãlubu-di raxiwenanyrenyre. Broreni bryby riubỹtỹnyre iny tyre-ki iaõsusu-ribi rahòkemy. Juhoo xiwena iny taòraru-ribi risuhòkeki, iratyty tyhy Kristu hãlubu iny risuhòke. Tai iny raykybina bina ritamyhỹre tule inywo aõ aõkò rare, ritamyhỹre. Idi tahe iny Deuxu irumy ratximyhỹre dee wimyri kiwinyrenykre. Tii òbitimy ihỹre iny dee rurureki. ¹⁵ Kristu tahe bede ywidỹỹna tỹmyra wedu rare. Tai tahe ibutumy bede ywidỹỹna tỹmyra mahãdu namyhỹde ibutumy aõmybo

rarybere ritakemy. Tii dori rurure iny òrarureny dire-ki ihetxiu bede ywina aõmydÿÿnana rÿimyhÿreu, tii rubu-ò rexiwahinyre. Tai inyboho òraruna-ribi rexitarenyre. ¹⁶ Inyò rurumyhÿre-wana tii iny dee ritinaõ ririmyhÿre kia ritina rarybere: —Moòbo taaõna aõna riwahinymy ririkre. Iny rururemyhÿre xiery tahe, ritina awi rare. ¹⁷ Kia ritina aõ aõkõ rare iwidÿÿdu tyhy irumy ratxikeki, rubumy roimyhÿrele ritina aõ rare. ¹⁸ Tai tahe juhoo bede ywidÿÿna ijõ hãlubu txiwixina dire. ¹⁹ Moisesi Deuxu bede ywina wahidÿÿ rahudi, tii bede ywina tyre ritxiwire, iny ratytyre riubÿtÿnyre bu- doeni hãlubu-di broreni riòre hãlubu-di bewana riurinyumy riubÿtÿnyre. Tule buddè siratykysò-di riubÿtÿnyre. ²⁰ Iu tahe tuu rarybere: —Kia bede ywidÿÿna tÿmyra hãlubu rare. Deuxu wadee rarybere kaiboho bityhynkemy. ²¹ Tule tyky- heto-ki hãlubu riubÿtÿnyre deàlana aõmydÿÿnana-ki ²² Bede ywina rybe ditÿnynde ibutumy hãlubu-di risebenyre, hãlubu txiwixina ihoõkeki òraruna rexihuõtyhy.

²³ Kabede aõmydÿÿnana biu aõmydÿÿnana wesele rare. Tai tahe Kristu tahãlubu-di kia ibutumy risuhore. Tai iratyre ty- hymy ihÿre. ²⁴ Kristu heka templo hãbu widÿÿna-ò ralòõre. Kia tahe inatyhy heto aõkõ rare. Biu-ò Kristu ralore Deuxuko-ki kia tahe isÿtyhy rare. ²⁵⁻²⁶ Tii sohojihyyle heka rare iny òrarureny riixãwididÿÿnykemy rubu-ò rexiwahinyre. Xiwena wedu wesemy aõkõ ralòre. Kia xiwena wedu aõu aõu beòralemy hãlubu-di rara xiwemyhÿre. Kristu tahe sohoji hyyle rubu-ò rexiwahinyre. ²⁷⁻²⁸ Iny rurumyhÿre soho- jihyylemy idi tahe Deuxu ywisidÿÿna hitxinatxu kanakre ibutu iny. Kristu rurure sohojile sòwemy iny òraru ixityre riatykemy. Inyò tamy retehemy riraòmyhÿre wana, tamy ixityre kanakre òraru ixãwididÿÿnamy iny tarasanarenymy.

10

¹ Juhu bede ywina rybe urihimyòle iny ribedeerynyre Kristu aõmydÿÿnamy. Bede ywina itÿnytyhymy aõkõ iny dee roire aõmybo Kristu inydeereny riwinykre. Ubòròròna wesemy inydeereny dobehede bede ywina. Tai tahe tiu iny riòbitinyõtyhy xiwena-di reamyhÿre beòra ihyymy aõkõ. ² Aõkõkeki beòra beòrau idi reaõtyhy. Aõkõkeki sohojihyylemy xiwena riwinykre. Sohoji bede dÿÿnanadile iòrarureny rexi- huke. Tahe aõkõre beòra ihyymy aõkõ xiwena-di reamyhÿre. ³ Tai tiemy òraru-di hyy heka rõhõtinymyhÿre. ⁴ Broreni hãlubu, bu doeni hãlubu òraruna rahuõtyhy. ⁵ Tai Kristu kabede-ò dehemynydeu, rarybere: —Deuxu, broreni hãlubu buddè hãlubu adee awimy aõkõ ihÿre. Tai tahe waumy tey- winymy ahãte axiwenamy aroikremy. ⁶ Kai heka awimy tai

tahaõhyyte iròdu hãlubu xiwena-ki òraru tuedenamy. ⁷ Tahe jiarỹ rarybere: –Betehe inihe waumy rubu-ò rewahinyraò iwese ritidỹña rybe roimyhỹre wesemy, adeewina ibutumy arityhynykre wahe. ⁸ Tai Kristu juhuhu rarybere: –Deuxu, broreni hãlubu budòe hãlubu adee awimy aõkõ ihỹre. Tai tahe waumy teywinymy ahãte axiwenamy aroikremy. Kai heka awimy tai tahaõhyyte iròdu hãlubu xiwena-ki òraru tuedenamy. Kia rarybere bedeywina rybe hãrele. ⁹ Tahe ixityre rarybere: –Deuxu kakile watxireri adeewimy ariwinykemy. Juhuu bitake xiwena ihewoludu ritidikemy, Kristu xiwena wahe. ¹⁰ Kristu rurure iny òraru-ki. Ixiwena sohojilemy rỹire tuhy ramyhỹre Deuxu deewina wahe. Kabede ywidỹña tahe itỹmyra ihỹre. Tai tahe iny riòbitidỹñny hyy rarekre. ¹¹ Xiwedỹñdu txuõ txuõlemy rixiwenanymyhỹre. Tii tahe tiu inyòraruna ritaõtyhy. ¹² Jesuisi tahe sohojihyylemy òraru xiwena riwinyre. Iny òrarunareny riixãwidinymy rahudi Deuxu rurunawe-ribi ronyre, riwowydynymyhỹreki. ¹³ Tahe Kristu riraòmy rononymhỹre. Taòludu ruru iribi ritakemy tawarawo-ò Deuxu ritidikemy. ¹⁴ Jesuisi dori sohoji xiwehyy-di, iny riòbitidỹñnyhyymyhỹre. ¹⁵ Deuxu Tyytybytyhy tule kiamy rarybere. Kiawese ritidỹña roire: ¹⁶ –Kiawese bedeywidỹña tỹmyra rarekre. Wanyrỹ Deuxu ijõmy rarybere: –Wabede ywina irayky wydyna-ki ariritinykre, aritidikre wabedeywina iwo-ò wahe. ¹⁷ –Idi ixityre rarybere: Ruxetòena tamy ariwahinykre iòrarutuedenamy. Iòrarureny ibutumy wanohõti-ribi rosakre. ¹⁸ Òraru wanohõti-ribi rosareu, idi rehureu, tiu xiwena rỹiõtyhy tuu rahukemy.

¹⁹ Katahe, waseriòre, rekexiuwaresemy rikirònyrenykre Deuxusỹ-ò. Tamy rekexitòenyrenykeny Jesuisi hãlubu dejuxuna òraru-ki sohojile rikirònyrenykre. ²⁰ Jesuisi dori rytỹmyra riraynyre Deuxu-ò wesirahana yra-di ralòkemy. (Iwese xiwedỹñdu wedu ralòmehỹre wese, inyboho wiji ralorenyke.) ²¹ Tule iny xiwe wahidỹñdu nihikỹ ijòdirenny Deuxu heto-ki. ²² Tai rikitehemynyrenykre inyraykytyhy ywinakemy inatyhynatyhymy òbitinatyhymy nohõtmy, rati betyhy ixãwina-di sebena-di inyumyreny. ²³ Inatyhyna rikiyrubunyrenyke inyararòsònareny wahe. Aõbo Deuxu inydeereny riwahinykemy rikiraòrenyke. Tii dori inatyhy rare. ²⁴ Tule widi ròkòhõtynyrenyke wiluurenymy rakatxirenykemy wiwiòhedỹñmy rakatxirenyke. ²⁵ Uritere ixihitxidỹñõmy tamy beahyy rakatximahãrenyke. Ijõ dori dohodỹña-ò noderamy reamyhỹre kia awi aõkõ rare. Inyõ ryribi rexidòrarienykehỹkeki, tamy rakarybemyhỹrenyke kòdòòsekemy ixyby. Inynyrỹtxu dori iòhòmy resera. Tai tahe sòwemy ròkòteòsidỹñnymyhỹke.

²⁶ Iribi inyboho inatyhyna ibutumy rieryrenymy rahudi, tahe kia hãrele heka òraruna-di rariamyhỹkeki, òraruna xiwena roiõmyhỹre inydeereny iny òraruna tarasana wahe. ²⁷ Kia-ribi tule brebu rỹimyhỹre Deuxu ywisidỹnyatxu lau. Deuxu heòty ratyradỹydu lau ruberumyhỹre. Kia Deuxu òludu rahukemy rỹimyhỹre. ²⁸ Ruxetòena-di aõkõ inyõ rurure Moisesi bede ywina riywinyõreki. Itxeredu inatxi ada inataõ-di aõbo raryberenykemy. Tai rirubunyre. ²⁹ Kia-di dori mohõtinybenyke. Inyõ Jesuisi rybe-di risinykeki, iratyremy ibinatyhymy rarekre tamy. Tii sõwetyhymy aõhõkỹmy rotỹnykre ibutu ratyre. Inyõ Deuxu Tyytybytyhy ruxetòena aõ aõkõmy idi rõhõtinyre ibinamy tuu rarybemyhỹre. Jesuisi hãlubu aõ aõkõmy idi rõhõtinyre ibinamy tuu rarybemyhỹre. ³⁰ Deuxu kia rarybere: –Txiòhe iny òwydỹydu jiarỹ rare. Inymy jiarỹle arexiòwynykre.

Inyboho rierymyhỹrenyre kiamy rarybemyhỹre. Tii kiawese rare. Tule ijõmy rarybere: –Inynyrỹle taijoi-di ywisidỹyna-di riywisidỹnykre. ³¹ Deuxu irumy rare. Tii brebuna-di tyhy rareke. Iu iny tamy ibinakeki, tii dori idi rehuke.

³² Juhuu Kristumy teerytenyeteu, awimy heka ahãtenyete. Kia-ribi õhõti losarenyõmy. Kristu òraru-ki aõhõkỹmy tatỹnytenyete. Ihãrele tahe Kristu-wana hyy toitemahã. ³³ Inyõ umyreny robireu, tai akireny rutzuenyre, tule akireny òhòte itamadỹnyre. Ityhydỹydu seriòre mahãdu inyõ aõhõkỹmy risỹnyre, kaiboho tewotòenytenyete. ³⁴ Inyõ ròtenawo-ò ridykeki tai tewotòenymahãtenyete. Inyõ ahõrõ-di rawasinyreu, urile teysate. Ahõrõ dori iratyre sõwemy rỹimyhỹre biubede-ki. Tai aõna aõna tiu rabinaõtyhy. Kia teerymahãtenyete. ³⁵ Uritere araròsòna-ribi awo xieresyõmy. Kai dori uriõno nihikỹ bitakre. ³⁶ Ywinihikỹ-di heka rokoireke Deuxudeewimy rikiwinyrenykemy. Tai aõwihikỹmybo Deuxu rarybere, rikitarenykre. ³⁷ Ritinamy tahe rỹire: –Txiokre inihe. Urihimyò biraòke. Kia kanakre inatyhymy. Tii raroorehenyõtyhy.

³⁸ Waityhydỹydu mahãdu òbiti iruhyymy rỹirake, riwatyhynyreki. Inyõ tahe ròsekeki tamy wadeysaõtyhy.

³⁹ Inyboho heka tahewo-ò òkòsedu aõkõ roire. Ityhydỹydu dori roire, iruhyymy nodu, biu-ò hena mahãdu wahe.

11

¹ Aõbohe ityhyna rare. Aõna aõnaõ iny inatyhymy ri-ràomyhỹreu, kia tahe ityhyna rare. Inatyhymy dori kanakre iny rierymyhỹre, iny tuu robiõlemy. ² Ihetxina mahãdu Deuxudeewimy tuu ihỹre, rityhynymyhỹreki. ³ Juhuu Deuxu aõna aõna bede bedemy riwinyre. Iny inatyhy hynale

kia rierymahārenyre. Deuxu lobixiōna-di ibutumy aōna aōna riwinyre. Idi tahe lobixinamy rōhōnyre iny itxerenarenymy. Deuxu rarybere. Tai tahe aōna aōna ritxienyre. ⁴Taityhydỹna òraru-ki Abeli Xiweō riwahinyre Deuxu-ò. Kaĩ xiwedỹna ratyre tamy riwahinyre. Abeli rityhynyrekile riwahinyre, tai tahe Deuxu reysare, òbitimy rareki. Tai ixiwedỹna Deuxu riwyre. Abeli tahe rurure. Ihārele, iwese tii ityhyna-di raremyhỹ wese rokoireke. ⁵Enoi tatyhydỹna òraru-ki tiu ruruōhyyre. Enoi Deuxudeewimy riwinyre tuu Deuxu juhū rarybere. Aōwesele iōmy reare. Deuxu ridymy reare. ⁶Inyō ityhynaōkeki, tiu Deuxudeewimy aō iwidỹōna. Inyō Deuxudee iōhōmy ratxikeki, tii rityhynymyhỹke inatyhymy Deuxu-wana ihỹre. Deuxu dori tamy rexideòsinykemy ratxireri. ⁷Noe tule ityhyna dire. Tii hāwò nihikỹtyhy riwinyre. Aōhebo rotỹnykremy robiōhyyre. Ihārele tahe Deuxu rybe rityhynyre. Tai tahe tasỹ mahādu ritare rubu-ribi. Bedeludu mahādu tahe rurure. Noe tahe Deuxu riòbitidỹnyre, ityhyna òraru-ki. ⁸Abraō tule Deuxu rityhynyre. Deuxu ijō bede-ò diteònydeu, Abraō irybe riywinyre, rare taijoi-wana. Deuxu tamy rarybere suō tamy rihitxinykemy isỹmy. Tai Abraō rexitare, rare ihāwā bede ierykōna-ò. ⁹Ityhyna-di rasỹnyre kia bede-ki. Tyky heto-ki rahetonymyhỹre iwese ijō bedeludu witxira mahādu rahetonymyhỹre wese. Ibede rarehārele tahe ihōrōmy aōkō rōhōtimyre idi tuu aōkō rexinohōtinyre. Tariòre Ijai, Ijaò-wana rasỹnyre. Tamy tule Deuxu rarybere iwese tyby-ò narybede wesemy. ¹⁰Abraō tahe hāwāō riraòmyhỹre. Deuxu widỹna hāwā biu ludu-ki. Kia hāwā Deuxu nohōti-ribi nyide. Kia hāwā dori tiu rabinamy rejuxunyōtyhy ihetotira kyhyna direki. ¹¹Sara ityhyna dire. Tai ruru dire uladusemy ronykemy ibeòra sōwere hārele. Tii tahe rityhynyre tuu raryberemy. ¹²Sara iōhōmy irubu roire rasenadunyreki. Ihārele tahe sōwemy rariòreriòrenyre. Iwese taina rudera wese, ŷnyra sōwewese.

¹³Kia heka ibutumy rityhynymyhỹre. Idi tahe ituerenyre aō heka rimyōre Deuxu rybe lidisinaō. Ireheribile tuu robirenyre; reysarenyre. Tiiboho rarybemyhỹrenyre kabede ludu mahādu aōkō raremy, isỹreny mahādu aōkō raremy. ¹⁴Tii heka rarunymyhỹre sỹwihikỹmy tai raerymyhỹre tuu rarybereki. ¹⁵Tamy wikeki riòkeserenyra inihe tahe aōkōre, noderare. ¹⁶Wiji tahe tii sỹwihikỹmy biu-ki rarunymyhỹre. Tii dori ijō ratyre rare. Deuxu isỹ wihikỹ riwinyre tai tahe inyō iDeuxurenymy rarybekeki, tai Deuxu tiu raixỹruōtyhy.

¹⁷Deuxu Abraō urihixina-di reareu riwahinyre Ijai xiwenamy. Tariòre sohoji riywinymy rỹire xiwenamy rurukremy. Tii Deuxu rybena-ki iriòre rarehāre. ¹⁸Deuxu dori juhū

rarybere: —Ariòre Ijai ariokoretybomy rarekre. ¹⁹ Abraõ rieryre Deuxu iruru dire rubu-ribi riixixadyñnyke, tii Deuxu rityhynyreki. Abraõ dori rōhōtinyre rawasenanyre. Ijai juhuu rubu-ribi ixixa wesemy reare, raumynyre. ²⁰ Iribi tahe Ijai tyhyna-di rarybere Ijaò dee, Ijau dee aõbo kabede-ò kanakremy aõwiihikỹ wahe. ²¹ Iribi tahe tule Ijaò rarybere Jyje riòre dee, tariokoreboho-ò. Ityhyna-di rarybere. Ijaò iòhòmy rubu-ò ihỹre, òwòru-ò reximomy rariamyhỹre. Tahe òwòru-di rexilamadỹñnyomy rỹire rexitòenykemy Deuxu-ò, riwowydynyremy wahe. ²² Iribi tahe tule Jyje iòhòmy rubu-ò ihỹre. Tule ityhyna-di rarybere judeu ijoj Egitò bede-ribi kòdòhònykemy. Tule tahe tarybe ririre titxibo itityby rỹikremy. ²³ Iribi tahe Moisesi reareu, tybyboho iseboho riwòrenyrene inataõ ahādumy tatyhynareny-di ihỹrenyreny. Moisesi itohouã ruxerare. Iòlò rubudỹñ bede ywina rybemy rarybere. Moisesi tyby-wana kia bede ywina rybe lau ruberuõhyyre. ²⁴ Moisesi raumynyreu, Faraò riorerioresy noderare tii tatyhydỹñna òraru-ki. ²⁵ Tii heka tamywire Deuxu erydu mahādu-wana aõhòkỹmy rotỹñnykre. Urihimyò òrarumy reòwarike derare heka rare. ²⁶ Moisesi, Egitò bede-ki aõna aõna wiwiihikỹ rỹiramyhỹ derare. Iny tamy aõmy rarybehinamyhỹre. Tahe ibinamy rōhōtinyõmyhỹre. Kristu dori riraòmyhỹre, biu-ki uriòno idi rōhōtinymy hỹre. ²⁷ Moisesi Egitò bede-ribi rōhònyre, ityhyna direki wahe. Ruberuõhyymy hỹre heka tii iòlò deburehekỹ lau. Iwese Deuxumy lobixiònadu iko-txi robire wesemy, rōhònyre. Tii tahewo-ò ròdseõhyyre. ²⁸ Moisesi heka Deuxu rityhynyre. Tai tahe pascoa worana bedehesi riywinykemy beòra beòramy rarybere. Hālubu ijò-ò ritxiwire. Tai ýju heka iny riòre delareny rirubunyòre. Egitò riòre delareny rurure tai. ²⁹ Iwese surubu tyre-di reurore wesele judeu mahādu Ahobesò rawo-di reurore beòlemy. Iu Egitò mahādu reuròkemy rareu, urile bee idi raratòbòre. Kia riwinyrenyrene ityhydỹñnadireki. ³⁰ Ijeriò hāwā mana òtity nihikỹ resere judeu mahādu rityhynyreki. Debò inatxi reurò txuumy hāwā rora-ki rariare tahe resere. ³¹ Raabe heka hāwyuriuri ixidinodu rare, wedena wahe. Tahe Deuxu tyhydỹñdukòdu mahādu rexihureu, Raabe ruruòre tatyhydỹñna-ki. Bede-di itxeredu riwòreki.

³² Timybohe ijõmy ararybekre? Wasirare heka ibutumy tuu ararybekre, sòwereki. Kideõ ijo, Barake, Sansaõ, Ijete, Davi, Samueli, tule Deuxu rybemy rybedu mahādu sòwere. ³³ Kaheka ibutumy riwinyrene tyhyna-di. Ijõ iòlòhāwā-di rahỹñnyrene. Òbitina riwinyrenyrene. Ritarenyrene aõmybo Deuxu rarybere. Leaõry dori rirarytxinyrene. ³⁴ Rirònyrene heòtywo-txi ihārele ruruòrenyrene. Mayrehe rubudỹñna-ribi rexitarenyrene.

Bina-ribi ixyby rarurunyrenyre. Ijõ aõbina-ki irurudityhymy ratximyhÿre. Tai sõwemy aõbinadu iribi rahenyre. ³⁵ Tasÿõ rubu-ribi riixixanyre hãwyyõ rityhynyreki. Ijõ mahãduõ aõhõkÿmy dÿÿnana-ki tamy reare. Ixitarasamy rõhõtinyõhyyre aõhõkÿmy dÿÿnana-ribi. Tii dori umytuedeõna wihikÿ-di rubu-ribi rexixakredi rõhõtinyhÿre. ³⁶ Ijõ ityhydÿÿduõ idi rybe jei jeina-ki ratximyhÿre. Tule tai òhòte rÿire reruti òhòte-di. Tule ijõ womati reroti-di rataataare, ihyymy idi rehure ròtenawo-ò. ³⁷ Ijõ mana-di riwere. Ijõ sehòtxi-di riwetyaòròre, wiere riatyre. Ijõ mayrehe-di rirubunyre. Ijõ ityhydÿÿdu-ò budoeniyty-di watxinityy-di idi rexityynyre, rama risarenyre, aõhõkÿmy risÿnymy inyõ tòtxi ririõhyyre. Ijõ heka aõbinalemy tamy reare. ³⁸ Kia ityhydÿÿdu mahãduõ ibutu iny ratyre Deuxu dee wire. Kabeledudu ityhydÿÿdukõdu mahãdu wese aõkõ tiiboho roire. Hãwãlòmy, bederahymy, hãloomy, kia ibutumy bede-di rariamyhÿre iwese iny isÿkõmy rÿire wese. ³⁹ Ibutumy iribi rakaraykynyrenyke tiiboho dori inatyhynarenydireki. Tahe urile Deuxu rybe wahisidÿÿna ritaõmyhÿrenyre. ⁴⁰ Deuxu dori iny-ò riraòmyhÿre Kristu dehemyryna wahe. Ihewo-ribi tahe kia inydeereny riwahinykre, wiwanahyyle. Tai tahe idi awityhymy iny ibutumy ròhònykremy.

12

¹ Sõwere inydireny itxeredu. Iny robirenylemy rÿirerimy ihÿre. Tai tahe tako-ò rekekoamyhÿrenykre. Deuxu dori inydeereny riwahinyre. Òraru iutxiere inykireny rÿire. Tai tahe rikiatyrenyke òraru ibutumy inyboho dori rimymyhÿrenyre. ² Jesuisi-ò sohojile reketehemynyke. Tii dori inatyhydÿÿna deledÿÿdu rare tule inatyhydÿÿna konanadÿÿdu rare. Jesuisi deysana kanakredile rõhõtinyhÿrenyre. Tai tahe rahõtinyhÿre. Tai tahe aõhõkÿmy rotÿÿnyre, itxeò nihikÿ-ki rurure. Tai tahe ixÿru tamy reaõhyrurureu. Wiji tii ronymyhÿre Deuxu ryna ruruweribi-ki. ³ Jesuisi dee hãbu binahakÿ aõbinamy reare. Tahe rawobinarybenyõhyyre. Tai tahe idi ròkõhõtinyrenyke iwese rakatxirenykemy. Uritere bede worennyõmy bede òtiidÿÿrennyõmy. ⁴ Boholabenyke, òraru ijesu òraru-ki inyõ aribireny ruruõhyymy ihÿre. ⁵ Deuxu tariòre dee rybe wesele adeereny rarybemyhÿre. Kia-ribi aõbohe õhõtireny rosara. Kia wese Deuxu rarybera: —Wariòre, araòbitidÿÿnyreu, uritere adebureõmy, alisina aõkõ dori rare. Deòsana rybemy adee ararybekeki, uritere bedewoõmy. ⁶ Deuxu dori aluurekile araòbitidÿÿnykre. Deuxu tariòre wesemy inyõ rimykeki, aõhõkÿmy risÿnymyhÿre iòbitidÿÿmy. ⁷ Tybydiò aõbohe uri

tariòre-di uri aõbohe tyby idi rỹira tariòre riòbitinyõmy? Aõkõre. ⁸ Ibutumy iny òbitidỹỹmy Deuxu rurumyhỹre. Inyõ òbitidỹỹnadiõkeki tii iriòre inatyhy wesemy aõkõ rare. ⁹ Tule inytybyreny inydeereny retehemyhỹre inyboho riòbitidỹỹnymyhỹrenyre. Tai tahe iny riywinymyhỹrenyre. Deuxu tahe inytybyreny rare. Inytybyreny ratyre tahe tuu rikiywinyrenyke, tahe irumy rokoireke iurenana. ¹⁰ Iny tybyreny urihimyò bededỹỹnana-di riòbitidỹỹnyre iwese tamywimy rõhõtinyre wese. Deuxu tahe iny riòbitidỹỹnyre rekexiywinyrenykemy. Iwese òbitimy tii raremyhỹ wese rokoirekemy. ¹¹ Inyõ òbitidỹỹnamy deramy reakeki, tii deysamy aõkõ rareke. Òbitidỹỹna bedewona-di rare. Rexihuredi, tahe wiòhedỹỹnamy reamyhỹre modeebo reamyhỹreò, irumy ywina-di rarehyyke. ¹²⁻¹³ Kai bedewokeki, aumy-di, arayky-di iruruõra, ihãrele tahe birurudỹỹnymy bimyeke. Ati tule iruruõre ihãrele tahe, myike òbitimy. Betehemy, biywinymy ryòbiti-di mariake. Tai tahe ijõ iny reyterenykre, raòwenyõtthy.

¹⁴ Ainytyhymy inydee ibutumy ahãbenyke tule bexiòbitidỹỹnymy ahãbenyke. Iny òbitimy rỹiõkeki, tiu Deuxumy robiõtthy. ¹⁵ Inyõ tahewo-ò Deuxu ruxetõena-ribi ròoseke lau kaiboho bexiebenyke. Tule amahãdurenny-ki alòbòrònahyre wesemy inyõ ihỹke lau kaiboho bexiebenyke. Kiakeki, sòwemy iny rahyrenyke òraruna uri wesemy. ¹⁶ Tule bexiebenyke inyõ òta òta òraru-txi reseke lau ada Deuxu tõhõti ribi rosake lau. Ijau tahe Deuxu-di rõhõtinyõre. Tyby rurukreu aõ tarasana-di tii rohonyre byrena sohoji òwylemy tahelỹỹna-ò rohonyre. ¹⁷ Iribi tahe õhõtireny losarenyõmy. Tii dori rõhõtinyre taaõwi-di icyby imynymy reare. Tahe aõkõhyyre rahinyrehãrele. Rabedewomy ronyre Ijau dori rỹsỹna deròwymy taaõwi riwahinyre taexi-ò. Inyboho tahe rekexiywinymahãrenyke itxỹte lau.

¹⁸ Deuxu tabede ywina rybe heka judeu mahãdu-ò riwahinyreu, tiiboho Sinai hãwãlò heòtyko-txi rỹire. Sòwemy heòty bedeluru yhynihikỹ tai reare. Tiiboho rubuerurenre. Kaiboho tiu breburennyõmy ahãbenyke iwesereny. ¹⁹ Txurõnaõ rurònyre nihikỹmy. Tule rybeò rarybere. Iny ibinamy tai rõhõtinyre. Tai tahe riixãwidinykemy Deuxu dee rarybere. ²⁰ Iròduõ hãwãlò-di tawa ritidikeki, iny mana-di tamy rehuke irubudỹỹmy Deuxu rybemynamy. ²¹ Tai tahe iny tahewo-ò rexihejire brebumy. Moisesi tule, rexiòhãrunyre tuu ro-bireu. Ramytatamy brebumy. ²²⁻²³ Kaiboho dori iwitxira hãwãlò-ò tetehemynyta, Siaõ hãwãlò-ò, Deuxu hãwã-ò. Kia biu-ki Jerusalẽ rare. Sòwetyhymy tai ýju mahãdu rỹire bede hesina-ò. Ibutu butuna rare. Deuxu riòre sohojile butuna-ò

tehemynyte, dohodÿÿna mahãdu wahe. Ibutumy ityyriti-ki ini roimyhÿre tamy rehemynyre. Deuxu-ò tehemynyte ibutumy erydumy ratximyhÿreò. Inyhÿkÿna mahãdu òbitimy rÿira mahãdu-ò tehemynyta. ²⁴ Tule Jesuisi-ò tehemynyte. Tii iny lobitÿmyradÿÿdu rare. Ihãlubu-ò tehemynyte. Abeli hãlubu ratyre awimy ihÿre. Jesuisi hãlubu dori inydee aõwiihikÿ rare iny òrarureny òraru-ki dori ritxiwire iny riòbitidÿÿnykremy. ²⁵ Boholabenyke Deuxu rarybemyhÿreu, boholabenyke. Kia Deuxu roholaõmyhÿre mahãdu, rexihumyhÿre kabede-ki. Tii biu-ribi narybedeò, rokholaõrenykeki, tule inyboho rekexihurenyke. Inydeereny aõnityhykre. ²⁶ Iu rarybereu, bederamytatatyhyre. Tahe tii rarybere: –Sohojimy ixityre bede biumy arimytatadÿÿnykre. ²⁷ Kiamy heka rarybereri. Aõbo relemy, urile ixãwikre aõbo ixãwidikõnalemy rÿirakre. ²⁸ Tai tahe Deuxumy rikiãlãrenyke. Inyboho dori Iòlõnasÿõ rokoirenykre kia rÿihyymy rarekre. Iwese Deuxudeewire wese rikiãlãrenyke ityhyna-di òhãruna-di. ²⁹ Deuxu ykarana dori heòty riworonumyhÿre wese rare.

13

¹ Ityhydÿÿdu seriòre wiluumy ahãbenyke. ² Aõtxile aroraluduõ bimyhymy ahãbenyke. Inyõ kawese risÿnykeu, ÿju dori riwiòhenanyre, rieryòhyre mobo rare. ³ Ròtenawo-ki rÿire mahãdu-ribi nohõti losarenyõmy. Iwese kai tii-wana atximahã wesele, aõhòkÿmy botÿÿnykre. Aõbinahakÿlemy tamy reamyhyre mahãdu-ribi nohõtilosaõmy. Iwese inyõ adeereny aõbinahakÿ riwinumyhÿre weselemy idi mohõtinybenyke. ⁴ Ibutumy bityhinybenyke ahãwyymy herina, hãbu tahãwyy-wana sohojile roike. Deuxu dori aõhòkÿmy risÿnykre òta òtana nodu tule òbitimy raòdònyõre mahãdu ixi-di ròtemy aõkõ boibeki. ⁵ Aõnihikÿ nieru tarasamy ixinohòtidÿÿrenyõmy. Aõbo akireny rÿiredile, beysabenyke. Deuxu dori rarybere: –Tiu kaiboho wanohõti aribi rosaòtyhy. Tiu heka araatyrenyòtyhy. ⁶ Tai tahe rikityhynymy rakaryberenyke: Inynyrÿ iny wiòhedÿÿdurenre. Tai tahe tiu rukuberurennyòtyhy. Inyõ wadee aõbina riwinyòtyhy.

⁷ Aerydÿÿdurenre-ribi nohõti losarenyõmy, tii adeereny Deuxu rybe rotohodÿÿmyhÿreki. Aõbo iruna konana-ò riwinumyhÿredi, mohõtinybenyke. Iwese inatyhyna-di rÿimyhÿre wese kaiboho inatyhyna-di atximahãbenyke. ⁸ Kanau, wiji, Jesuisi Kristu wiwesele ratxireri. Tiiemy iwesele rarehykre. ⁹ Deuxu ruxetòena ixinamy arayky rirurudÿÿnyke. Roxina bede ywina wiòhena aõkõ ratxireri. Kia heka moo tiu riwiòhenanyòhyre. ¹⁰ Inyboho ixiwena wixiradirenyre. Iribi tyby hetowo xiwena widÿÿdu mahãdu

riroxiõtyhy. ¹¹ Iròduõ didyde tykyhetoworanora-ki hãlubu ritxiwikemy. Xiwena widyõdu mahãdu wedu tuu ritxiwire òraruna tuedenamy. Uritere iròdu umy hãwã òtity webò-ribi riwòsinyre. ¹² Tai tahe Jesuisi tule hãwãhãkỹ jìò webò-ribi aõhõkỹmy rotỹnyre, iu tahãlubu ritxiwireu inydeereny tõemy, iny riòbitidỹnykemy. ¹³ Rokoirenyke tahe tamy hãwã webò-ribi rikimirenykemy iixỹrunayreõ. ¹⁴ Inatyhymy inydeereny tiemy hãwã kabede-ki ihoõre. Tahe inyboho riraõmyhỹrenyre biu-ki ijõdikre. ¹⁵ Jesuisi òraru-ki tahe Deuxu rikiwowydnyrenyke. Kia iny xiwena wahidỹreny rare tamy. Tii iny rityhynyrenymyhỹre, tai tuu rekealãrenyke. ¹⁶ Tiu rikiwinyrenyke aõwiwidỹỹ. Tii Deuxudeewire. Tule wii rikiwiòhenanyrenyke. ¹⁷ Aerydỹỹna mahãdu biywinybenyke. Bityhynybenyke. Tiibocho dori aijesedureny ratximyhỹrenyre. Tii idi Deuxu-ò rirawyònymyhỹre. Kaibocho bityhynybenykeki, tii teysamy raaõmysỹdỹỹkre. Aõkõkeki bedewomy ratxikre. Tai arawiòhenanyõtyhy.

¹⁸ Wakireny bexitòenyhyymahãbenyke. Jiarỹbocho wodeysanale-di rahõtinyinmahãre, õbitina widyõdu-di rahõtinyinmahãreki. ¹⁹ Tule Deuxu-ò bexitòenyhyyke jiarỹ ele elemy adeereny aròserenykemy.

²⁰ Inynyrỹ Jesuisi Kristu heka Deuxu rubu-ribi riixix-adỹỹnyre. Tii iny-di itxeredureny nihikỹ rare. Budoeni-di itxeredu weselemy indyreny retehemyhỹre. Tii tahãlubu ritxiwire iny-wana bede ywina iixihudunakõna riwinykemy. ²¹ Deuxu adeereny ibutumy riwahinyke tamy wimy kaibocho biwinybenykemy. Kia heka wadeewire. Jesuisi Kristu-ò wowydyna ibutumy rarehykemy watximahãre. Kie.

²² Waseriòrebocho, kia watyryiti nihiỹmy aõkõ rewinyre. Tai tahe ywinamy idi boholabenyke rybe wiòhedỹỹna rybe tahe rare. ²³ Iny seriòrereny Tximòtxi heka ròtena-ribi riteònyrenyre. Ele elemy kanakeki, rakre wawana aro-rarenymy. ²⁴ Wawehityyna rybe ibutu dohodỹỹna mahãdu-ò biwahinykre, aerydỹỹdu mahãdu-ò tule. Italia bede ludu mahãdu irybe wehityhyna adeereny diwahinyde.

²⁵ Deuxu ruxetòena akireny ratxikemy watximahãre.

Txiau Txiau Ryberiti

1 Jiarỹ Txiau rare. Deuxu Jesuisi Kristu Inynyrỹ-wana deòdu rare. Ròritidỹreri Deuxu mahãdu inatyhy-ò. Ubỹtỹmy iny rỹira mahãdu-ò. Warybe weityhyna adeeremy rewahinyreri.

2 Waityhydỹdu aõna aõnasira seriòre, araurihixinanykeki adeeremy kanamyhỹkeki, beysamahãbenyke. 3 Kia-di tahe ityhydỹdu tyhymy beleke. 4 Aurihixina ixinamy rexiòlònyke atyhykemy. Ixinamy kanake araurihikemy. Tai tahe raòbitidỹnykre adee aõ rasiranyòtyhy.

5 Inyõ bedeery ihoòkeki, rexitòenykre Deuxu dee, tii dori ibutu dee riwahinymyhỹre. Inyõ lau dori ritòenyòhyymyhỹre. 6 Urile tii iseòdỹỹomy bexityhynymy tamy bexitòenykre. Riseònykeki yhy òbò-di tiò rehumyhỹre wese rare. 7-8 Kia hãbu iòreki, awimy aòkò aõhebo rotỹỹnymyhỹre ywiòreki, tii Deuxu-ribi aõ ritaòtyhy, irybe inatxire.

9 Iny aõ ijòkòmy rỹimyhỹre, teysamy rỹirake, aõ ijòdikreki Kristu dori rityhynyre. Kia iaòdimy ityhymy rỹira, tule teysamy rỹike ityhydỹdumy. Rỹiraki aõ ijòòkre hãre. 10 Ityhyna heka iny-ribi wylemy ituemyhỹre kie iwese noijese ramoròmyhỹre wese. Tahe ityhydỹdu mahãdu dee kia aõ aòkò rare. 11 Txutòeetyhy ròhònymyhỹre dori alòbòròna rimoròdỹỹnymyhỹre. Tahe noijese rejuxunymyhỹre. Tahe iruxerana riixãwidinymyhỹre. Kia wesele hãbu ityhymy rỹire rexihumyhỹre. Aõhebo rotỹỹnymyhỹre wetyatxile.

12 Urihixina inyòdee kanakeu, tahe ijesu binaò wesemy ritakeki. Tai tahe tii reysakre. Tii tahe umytuedeõna heka Deuxu-ribi ritakre. Deuxu dori kia wahidỹỹnamy rarybere taluunadu mahãdu dee. 13 Inyõ aõbina bina ixirana-di rexi-rakeki. Tii rarybeòtyhyke Deuxu riixiranymyhỹremy. Inyõ dori Deuxu tiu riurihiòtyhy. Tule Deuxu riixiranyòtyhy aõbina bina widỹỹ-di. Ixiradỹỹdu aòkò tii rare. 14 Kiawese iny ixiribile rexirake, aõ-di sòwemy ròhòtinykeki, tii arabònyre, araitxenanyre. 15 Kia urari-ribi tahe òraruna ròhònymyhỹre. Iribi tahe òraruwidỹỹna-ribi rubu rỹimyhỹre. 16 Ixitxenadỹỹomy waluuna mahãdu, waseriòre mahãdu. 17 Wahidỹỹna ibutumy bedeerydỹỹnatyhy Deuxu biu-ribi diwahinyde kia ibutumy loosònatyby-ribi naderi. Tiu heka rawitxiraòtyhy, tii aõu aõu iweselere. 18 Tii iny ixityre riwinymyhỹre ritỹmyranymyhỹre tatyhyna rybe-di. Tai ibutumy iwidỹỹna-ribi inyboho juhu-urenyre, awirenyre.

19-20 Idi mohõtinybenyke waluu waseriòre mahâdu. Ibu-tumy bexiywinymahâbenyke iny-ò boholamyhÿbenyke, tahe aõwimy aõkõ marybeke lau, wymy adebureõmy. Hâbu debure-ribi Deuxu òbitina rahenyõtthy. ²¹ Abinamy aõhebo tutÿÿnymyhÿte ixi-ribi bitake idi biatyke. Tahe Deuxu rybe-ò boholake, kia dori iruruna dire atyytyby kanatakemy. ²² Kaiboho bede ywina widÿÿdumy, bede ywina tyhydÿÿdumy boibeke. Aõ ijohonadu mahâdulemy aõkõ boibeke. Kiawesekeki bexiitxenanyke. ²³⁻²⁴ Inyõ ijohonadule ronykeki, rybemynamy nodu aõkõ rare. Tii hâbu itxerena-di itxerenadu wese rare. Itxerena-di ixidee retehereu, rexierye iwese raremy. Tahe rexitareu, aõwesele ixi-ribi tõhõti rosare timybo tii rare wahe. ²⁵ Inyõ tahe bede ywina òbiti-ò retehemyhÿreki, rityhynymyhÿreki tii tahe teysamy ratxikremy ibutumy aõhebo rotÿÿnykremy. Tii dori ijohonamy nohõti losadu aõkõ rare. Bede ywina rybe widÿÿdu rare, ityhydÿÿna wahe. ²⁶ Inyõ bede ywina rybe widÿÿduõmy rõhõtinykeki, tahe tõrõtò riyrubunyõhyymyhÿkeki, tabedeywidÿÿna aõ aõkõ rare. Tii tawokile rexiitxenanymyhÿre. ²⁷ Iny Deuxu, Inytyby-ò kia bede ywina widÿÿna òbiti rare. Uladuwyte, wytese-wana riwiòhenanykemy. Tule aõbina bina aõmydÿÿnana widÿÿõmy.

2

¹ Waseriòre mahâdu, kaiboho Inynyrÿ Jesuisi Kristu, tetyhynytenyete loosõna wedu tii rare. Tai iny wiribi lahitxiõmy, wiweseweselemy iny-di atximahâbenyke. ² Kie inyõ tahe dohodÿÿnawo-ò kanalòkeki, womati debo tÿrÿrÿ-di tywihikÿ-di kanalòkeki, tahe tule iny aõkõdu mahâduõ kanalòkeki. ³ Kai tywihikÿ dinodu-ò marybekeki: Kaò bodonyke rynawihikÿ-ò. Tahe marybekeki iaõkõ-ò: Kiakile myike lamalemy ada bede-txi aõbo bonyke. ⁴ Kia wese wiribi hitxidÿÿ-ki tatÿÿnymyhÿtenyete, araykyreny rabinamy kia wese tumahâre. ⁵ Boholake, waseriòreboho, kaiboho juhoo iny aõkõ mahâdu wese toite. Iribi ityhy ityhydÿÿdukõdu mahâdu iaõrarumy roirekemy, kaiboho Deuxu weselemy tadeletenyete atyhyna òraru-ki. Aratamyhÿreny inatyhyna-di ityhydumy boibekemy, tule kaiboho kowa biu-ò hena bitabenykre. Deuxu dori rarybere: –Waluudu mahâdu tuu arisÿnykre. ⁶ Kiawese, kaiboho urimynodu derareny aõhebo tatÿÿnyteri. Ityhy mahâdu tahe ararutÿkÿnymyhÿre tule aradyrenymyhÿre soldadu dohodÿÿna heto-ò. ⁷ Tiiboho tule Kristunimy aõbinamy rarybemyhÿreny. Kaiboho ini-di texininimyhÿtenyete. ⁸ Kia bede ywina rybe-ki roire: iwese ixiluure wese, aerykõdu mahâdu luuke, wery mahâdu wahe, abireludu wahe. Kia bede ywina biywinykeki,

awimy botỹny nymy mabeke. ⁹ Tahe iny wiribi lahixinykeki, taðrarunyeri, teywinyõteri. Bede ywina aõkõ atximahâte. ¹⁰ Inyõ tahe bede ywina rybe ibutumy riywinykeki, tahe sohoji aõmydỹna riywinyõreki, tai tahe bede ywina rybe ywidỹdu aõkõ ratxireri. ¹¹ Deuxu tarybe ririre. Kia rarybera: —Òta òta widỹõmy. Tule rarybera: —Rubudỹõmy. Tai òta òta biwinyõkeki tahe inyõ terubunyteki, kai bede ywina rybe yrubudỹdu aõkõ atxiteri. Òrarudumy tate. ¹² Iwese iny bede ywina rybe-di tỹmyra ahâbenyke. Deuxu dori bede ywina-di arararutxỹnyrenykre. Taita õbitimy botỹnybenyke, marybebenyke. ¹³ Inyõ riwotõenyõmyhỹkeki, tule tamy riwotõenyõleke tawiribihitxinatxu-u. Wotõedỹna wiribihitxina ratyre rare.

¹⁴ Waseriõre mahâdu, inyõ rarybekeki: —Jiarỹ watyhyna ijõdire. Tahe iaõmydỹna wihikỹ-di aõkõ rare. Kia tahe aõ aõkõhyky heka rare tamy. Ityhynale kahâbu ritakekõ aõbo. Tahe reruinyreri. ¹⁵⁻¹⁶ Inyseriõreõ tyy, rỹsỹna ihoõke-wana. Tahe inyõ tamy rarybekeki, ywina-di bõhõnyke, aheto-ki biroxikemy. Tahe aõ riwahinyõra tyy, rỹsỹna-wana. Aõbohe irybe rare. Aõkõhykyre irybe. ¹⁷ Kiawese taheka kia hâbu inatyhyna rare, iaõywidỹna ihoõkeki kia ityhyna ihoõke wese rare. ¹⁸ Inyõ rarybeke-wana: —Kai atyhyna dire. Jiarỹ waõwidỹna ijõdire. Biteõsinyke wadee atyhyna sohojile tamyreny wina-di aõkõ. Tahe jiarỹ tamyreny waywina-di adee ariteõsinykre kia òraru-ki bobike jiarỹ Kristumy retyhynyrimy. Watyhyna iny idiõre waõwidỹna ijõõre-wana. ¹⁹ Kai bityhynyke Deuxu sohojile raremy. Kia tahe awire urile diabo tyytybybina tule Deuxu rityhynyre. Tai ilau ruberumyhỹre. ²⁰ Inatyhyna iaõmy widỹnana ihoõkeki, aõ aõkõ wese rare. Kia tetyhynyõlemahâte aõbo, hâbu itxỹtere. ²¹ Inylabiereny Abraõ tariõre-di Ijai rixiwenykemy idi ratximyhỹu, kia-ki Deuxu riõbitinyre. ²² Tabimahâte aõbo. Abraõ tatyhyna iwidỹna-wana aõna aõna riwinyre. Ityhyna riwiohenanyre. ²³ Tahe iwese ritidỹnyamy roire wesemy tuu rotỹnyre aõmybo heka rarybera Abraõmy: —Boholake, Abraõ heka Deuxu rityhynyre. Tai Deuxu tii riõbitidỹnyanyre. Tule, Deuxu tabiõwamy rininire. ²⁴ Betehebeny ini. Inyõ iõbitidỹny ronyke-wana inatyhyna sohojidile aõkõ tii ihỹke, tahe iwidỹna-di tule wahe. ²⁵ Ijõre tahe: Raabe, aderanamy raremyhỹ. Iribi tii Deuxu rybedeõdu mahâdu riyrubunyra rubu lau, tahe riteõnyre rywasi witxira-di. Kia widỹna Deuxu Raabe riõbitidỹnyre. ²⁶ Iwese umy tyytyby-di aõkõ rubumy rỹimyhỹre wese, tule inatyhyna sohojile aõ aõkõ rare tamywina-di aõkõreki heka rubu wese rare.

3

¹ Uritere, waseriòreboho, bedeerydỹdu mahãdumy aõkõ ixi-di norenykõmyke. Ibede õnana hitxina txuu dorihe aõnihikỹkre bede erydỹdu mahãdu dee. ² Inyboho ibutumy sõwemy òraruna-txi aõu aõu resemyhỹrenyre. Inyõ tarybe-ki raòrarunyõkeki, tii iny òbiti rare. ³ Iwese awaru iny riraòmyhỹre wese taumy ibutumy riraòmyhỹre. Awaruru-ki juraròsõna rirutymyhỹreu, tii iraròsõna-di rare. Tai tahe awaru iny riywinymyhỹre iumy ibutumy iny riraòmyhỹre. ⁴ Betehebenyke iny heòty lawò nihikỹ-ò iraròsõna iyjatyhyre tahe iraròsòdỹdu idile riraòmyhỹre titxibo inonana-ò yhy nihikỹ iwetxi kedeakreki, ihãrele iraròsõna riraòmyhỹre. ⁵⁻⁶ Iwesele iny dòròtò rare. Iyjatyhyre ihãrele aõnihikỹmy rarybemyhỹre. Betehebenyke iny heòty helỹresi iyjare, ihãrele òtiranihikỹ ritoonymyhỹre. Dòròtò tahe heòty wese rare. Sõwemy heka òraru riwinymyhỹre. Dòròtò bede aõmydỹnanabina dinodu wese rare, inyumy susudỹdu dòròtò rare. Sõna bede tòtee-ribi diabo mahãdu-ribi heka nade. ⁷ Ibutumy iròdu brebuna, nawii wixira wixira, iròdu beraludu, utura, riinytyhydỹnynymyhỹre. Iny mahãdu iratyre irurudỹna dire. ⁸ Inydòròtò inyõ tahe riinytyhydỹnyòtyhy. Ibinatyhy rare. Rubudỹna uri-di ratxireri. ⁹ Inydòròtò-di Deuxu inytybymy iny reàlãmehỹre tule idi inumy raujõmomyhỹre. Deuxu ixiwesemy iny riwinyre, ihãrele iny wimy raujõmomyhỹre. ¹⁰ Inyõ tary-di Deuxu rirowòwydynmahãre tule idi ujõmomy reamyhỹre. Waseriòreboho, kiamy aõkõ idi boibeke. ¹¹ Beijirana-ribi ibree ihỹre-wana wiule heka ròhònyòtyhy. ¹² Òwòru inatxi wiribi lahixire. Ijõ aõbo wiraty-di raratynyke aõkõre? (Figueira azetonamy raratynyòtyhy) Videira figomy raratynyòtyhy. Juwyrabe hãloo-ribi bebreke ròhònyòtyhy.

¹³ Inyõ bederykeki ibedeerynadikeki, tii ywiny ratx-
imyhỹke. Ibutumy òbitimy ratxirerimy aõ riwinymyhỹremy
rexityhynymy ixidi rõhõtynyòtyhy tyhymy rabekemy.
¹⁴ Kaiboho awo-ki ixiburena ijòdikeki, inywixira hãrosu
ijòdikeki tai tii deysamy atxiõke tai tuu marybeõke. Kai
ruiwidỹõmy. ¹⁵ Kia bedeeryna biu-ribi aõkõ nade,
bederibile, iny hãrosu diaboribile nade. ¹⁶ Inywixira
hãrosu ijòdike-wana, tai jei jeina rare. Ibutumy aõbina bina.
¹⁷ Bedeerydỹna biu ludu juhule òbiti rare, idi ywina rare,
rutaõna rare, wityhyna rare, ruxetòena rare. Awihyymy nodu
widỹna rare. ¹⁸ Òbitina aõu aõu kanakre ywinawidỹdu-ò.
Iwese aloborodu rehumyhỹre wese, tiiboho ywinamy
rekoamyhỹrenyre.

4

¹ Aõherekibo ayreny-ki jei jei r̃imyh̃yre. Awo-ribi namyh̃yde araykywydyna ribi. ² Kai s̃owemy aõdikemy tahõtinyinmahâte aõhebo aõkõ tetate. Tahe terubunymahâte. Inywixira aõmyd̃ỹna-di òbire, tahe aõkõre. Tai aõbina tetelenymyh̃yte ijei jei-di. Aõ ijõõre textidenyõma hâteki. ³ Textidenyteki, tetaõmahätenyete. Teòsamy dori textidenyamahätenyete. Ixidee sohoji dehunalemy tahõtinyinmahätenyete aumydeewimy behukelemy. ⁴ Bede aõmyd̃ỹnana luudu mahãdu heka Deuxu òludumy ih̃yre. Kia aõbo teeryõtenyete, òbitiõna, mahãdu. Inyõ bede aõmyd̃ỹnana bina biòwamy ratxikeki, Deuxu òludumy rare. ⁵ Aõ aõkõ aõbohe rybe riti kawese roire: Aõhe rare. Deuxu taTyytybytyhy inywo-ki heka Deuxu ris̃ỹd̃ỹnymyh̃yre. Tai tahe iny-di riijetyhymy ratximyh̃yre. Aõbo heka kia rare? ⁶ Tii tahe iny riruruted̃ỹnymyh̃yre. Kawesemy ritina rarybere: —Ixiwedu mahãdu heka Deuxu xixi-ribi rirehed̃ỹnymyh̃yre. Tahe ruxetõena s̃owemy xiwedekõ mahãdu-ò riwahinymyh̃yre. ⁷ Deuxudeewi biwinymahãke. Diabo xixi-ribi birehed̃ỹnykeki, tahe tii aribi rahenyke. ⁸ Deuxu-ò bexiòhòd̃ỹnykeki. Deuxu adee rexiòhòd̃ỹnkr̃e. Òrarudu mahãdu, ebòm̃y bexilyraranyke aòraru-ribi bexitake, rybe inatxi mahãdu, araykyworeny biòbitinybenyke. ⁹ Mabedewoke, bobuke, mahinyke aòraruna òraru-ki. Ajuedena-ribi arube rytynykre, eysa-ribi mabedewomy atxikemy. ¹⁰ Ayrubumy Inynyr̃yko-txi boibekeki, tii aratamad̃ỹnykre; tii ixideewimy riwinykemy.

¹¹ Waseriòreboho, uritere aõmy wimy ryberenyõmy. Inyõ taityhyd̃ỹduseriòremy tuu ibinamy rarybekeki, iaõna aõna riaõkõkeki tii bede ywina ibinamy rarybereri. Bede ywina rybe riaõkõd̃ỹnyreri. Inyõ bede ywina rybe riaõkõnykeki, tii bede ywina ywid̃ỹdu aõkõ rare. Tii bede ywina rybe hitxid̃ỹdu rare. ¹² Deuxu sohojile dori bede ywina hitxid̃ỹdure. Bede ywina dohod̃ỹna dinodu tii rare. Tii itarasad̃ỹdu rare ih̃are irubud̃ỹdule rare. Mobehe kai atxiteri; abireludu hitxid̃ỹmy aõbo texinohòtid̃ỹnyteri? Aõkõre.

¹³ Boholabenyke, tuu tarybetenyteri: wijile aõbo ada biurasòm̃y aõbo rokoirenykre hãwãõ-ò. Tai beded̃ỹnana sohojimy rikierenykre. Tai nieru tarasamy rakaõmys̃d̃ỹnykre. ¹⁴ Txìòhe rare. Kaiboho dori teeryõlemahätenyete aõhebo bede rot̃ỹnykre. Timybo mabekre? Iwese biuwetyy yja aõwesele rexihymyh̃yre wese heka timybo mabekre? Kiawesemy aõkõ marybeke. ¹⁵ Kamy heka marybeke: —Inynyr̃ydeewikeki iny rummy rokoireke, tai tahe kia ada kowa aõbo rikiwinyrenyke. ¹⁶ Iwese wiji ratximyh̃yre wese. Biurasou aõnihik̃y wid̃ỹmy

marybekeki, kia tahe awi aõkõ rare. ¹⁷ Inyõ aõwiwidỹỹ rieryekeki, tahe riwinyõmyhỹ-wana kia rexiòrarunanymhỹre.

5

¹ Boholabenyke warybe-ò ityhy mahãdu. Mahinybenyke, bobubenyke aõhõkỹmy botỹỹnybenykreki. ² Aõmydỹỹnana wiwihikỹ rabinamy rỹire. Atyywytyhy isibrey tysini riròre. ³ Aorotỹrỹrỹreny awomatiurareny raruxinyra tabededỹỹnana riõnonyrerimy. Anieru susudỹỹna awobiredỹỹnami kiditynynykre. Iwese dee heòty risõmyhỹre wese, kia sudỹỹ anasõmyhỹkre. Aõna aõna sõwemy ixidee tebutunymahãte kia atxukonana-ò. ⁴ Abaderòwysydỹỹdu òwydỹỹdu aõkõ dori kai tate. Kai ixideele tebutunymahãte iribireny tawasinymahãte. Tiiboho rahinomy rirajuamyhỹreny tahe kia wysydỹỹdu mahãdu hina-ò Deuxu roholare. Tii ruru mahãdu wedu rare. ⁵ Kaiboho abeòrareny teõnonytenyteri isikile. Ixideehyyle texideysadỹỹnymyhỹte. Ibutumy aõbo adeeremy wiwi ixidee temytenyete, iwese rubutxudỹỹnatxu broreni riòwenymyhỹre wese. Kai ahãte. Deuxu akanarubunykre. ⁶ Òbiti mahãdu teteõnymahãte terubunymahãte. Tii tiu adee rexiòwynyõtyhy.

⁷ Ixieleeledỹỹõmy tahe waseriòreboho. Inynyrỹ kanakreu. Betehe inihe. Òworudu heka taaõwi riraõmyhỹre biu bedeu. ⁸ Kia wese kaiboho tule eleelemy aõkõ biraõmyhỹke aworeny-ki beximymyhỹbenyke, Inynyrỹ nonana dori iòhòrehe. ⁹ Waseriòreboho uritere wimy ibinamy ryberenyõmy Deuxu dori arahitxinyreny. Ihitxidỹỹdu nonana tahe iòhòre ijòkiwesele riijemy rỹimyhỹre. ¹⁰⁻¹¹ Waseriòreboho ihetxiu Deuxu rybemy rybedu mahãdu iyrubumy rỹiramyhỹ. Iwese tiiboho rỹiramyhỹwese boibeke aõhõkỹmy dỹỹnana-ki rare. Kia aõhõ kỹmydỹỹnana-ki òbitimy rotỹỹnymyhỹre. Iwese Jòò iyrubumy raremyhỹre taholamahãtenyete. Tule iwese ionanau Deuxu riwiòhenanyre wesemy teerytenyete. Inynyrỹ dori ruxetòenatyhy-di rare làhànatyhy-di.

¹² Ibutu ratyre waseriòreboho inatyhymy sohojilemy marybeke ijõ rybemy rybeõmyke Deuxu arybe ritxiõnyõtyhy. Aõna aõnamydỹỹnanaribike aõkõ iximyhỹle marybeke. Kohemy marybekeu kohelemy marybeke. Aõkõmy marybekeu, aõkõlemy marybeke. Kawese-ki inyõ aratxiõnyõkre.

¹³ Inyõ aõbo ayreny-ki aõhõkỹmy rotỹỹnyreri. Tahe tai bexitòenykre. Inyõ aõbo ayreny-ki teysamy ratxireri. Àlànawi-di tii wana mawiunykre. ¹⁴ Inyõ aõbo ayreny-ki webinadumy roireri wana. Tahe dohodỹỹna rybedu mahãdu-ò tamy bididybedenyke tamy rexitòenyrenykemy.

Adỹ ityre ritxiwikemy Inynyrỹni òraru-ki. ¹⁵ Ixitòedỹỹna tyhynale webinadu riteytenykre. Inynyrỹle ritamahỹỹnykre. Tii òraru-ò raòrarunymyhỹke-wana Deuxu iòraru riixãwidinyke. ¹⁶ Iny wiò wiòmy aõna aõnarenymy belyybenyke. Wiò wiòmy wii biixitòedỹỹnybenyke, ibutu-ribi beytebenykeny. Inyòbiti ixitòedỹỹna irurudire, aõna aõna sõwemy riwinymyhỹke. ¹⁷ Eliasi heka inywesereny rare. Tii rexitòenyhyymyhỹre biu ròãtyhykremy bedè-ò. Tahe inataõ beòra-di biu ròãhyyre. ¹⁸ Tahe ixityre rexitòenyre. Tai biu ròare. Tahe oworu-ki ixityre aõwi ruhunyre.

¹⁹⁻²⁰ Waseriòreboho, inyõ ay-ki inatyhyna-ribi ròhònykeki. Inywitzira tuu rarybekeki, teòsary-ribi ridykeki, tahe ityytyby ritara, rubu konana ixãwina lau sõwemy araru-di riixãwidinyre. Kie.

1 Pedro 1 Pedro Tyyriti

¹ Jiarÿ, Pedro warybe ritina rewahinyreri ubÿtÿ deòdÿÿna jiarÿ rare. Ibutumy judeu mahâdu-ò rewahinyreri Ponto-ò, Alaxia-ò, Apadosia-ò, Asia-ò, Bitinia-ò. ² Kaiboho heka iitxe itxemy toite Deuxu Inytybyreny-ò, Deuxu Tyytybytyhy araòbitinyrenyra, Jesuisi Kristu bityhynybenykemy tule tahâlubu-di arasebenyrenykemy. Wiòhedÿÿna sòwemy ywina-wana adeereny kanakemy watrixiri.

³ Ibutumy àlàna Deuxu Inynyrÿ tyby-ò rikiwahinyrenyke. Tii dori sòwemy ruxetòena inydeereny diwahinyde. Tai inyboho ixityre reamyhÿrenyre ratybienyrenykemy Deuxu sÿ mahâdu wo-ki. Inyboho wijile iraròsònarenny òre, Kristu rubu-ribi rexixareki. ⁴ Tii wiòhedÿÿna wiwihikÿ inydeereny ririre. Biu bedekile riyrubunymy roire. Tiu rasunyòtyhy, retybyòtyhy, iruxerahakÿlemy lyrahakÿlemy roire. ⁵ Deuxu tarurusòwe-di arayrubunynyrenyke kia wiòhedÿÿna bitabenykemy tetyhnyteki. Tarasana heka kia rare. Ikonanatxu Deuxu bedexiteòsinykre. ⁶ Tai tahe beysabenyke. Bededÿÿnana tòbò reakreu, mabedewobenykre òsana aòmydÿÿnana sira òraru-ki. ⁷ Tii tahe kawese-ki atyhydÿÿnarenny ityhymy ròhònykre. Atyhydÿÿnarenny womati tÿrÿrÿhÿkÿ òwy ratyre iòwy òre. Tiu rabinaòtyhy. Heòtyru-ribi womati tÿrÿrÿhÿkÿ ròhònyre wese atyhynarenny kòdòhònykre àlàna, wowydyna, luuna Jesuisi Kristu-ò, tii kedehemynykre. ⁸ Kaiboho tuu tabitenyòte ihârele tuure. Tetyhynytenyteri, tai tahe tÿxihikÿlemy deysatyhy-di ahâtenyte. ⁹ Tai atarasadÿÿna-di teteheteri, tetyhynytenyteki. ¹⁰ Juhuu Deuxu rybedu mahâdu ritÿÿraxinyra kia tarasanamy. Tule wiòhenadÿÿmy rarybere adeereny kanakemy. ¹¹⁻¹² Idi tahe dierydenyde ibededÿÿnanau kanaòkre urile ihewo-ribi kanakemy. Katahe adeereny reare Deuxu Tyytybytyhy nade òraru-ki. ÿju mahâdu dori tamywimy tuu rieryrenykemy ihÿrenyre. Jesuisi Kristu aòhòkÿmy dÿÿnanamy tule toosònadÿÿnamy rarybemyhÿrenyre, tiubedemybo kia kanakemy riijemyhÿrenyre.

¹³ Arayky-ki birarutxynybenyke wereysana rara rotÿÿnymyhÿre wese. Òbitimy maraykynybenyke wiòhedÿÿna-di bidimybedenykre-ki Kristu kedehemynykre. ¹⁴ Wijile kaiboho ywimy nodu riòre wesemy boibeke. Iwese juhu aykaraòtamy tatÿÿnymy tatemahâ wese noòmy, abedeerykòmy tatemahâu. ¹⁵ Iweseòmy. Uritere adee rybedu òbitimy raremyhÿwesemy kaiboho ibutumy tuu

botÿÿnybenyke kia-ki òbitimy boibeke. ¹⁶ Raritinymy dori rÿire: —Òbitityhymy boibeke, jiarÿ dori òbitityhymy raremahã. ¹⁷ Deuxu iny wiribi rihitxihitxinyre aõbina bina widÿÿ òraru-ki. Deuxu wiwese wesele iny luure tuu rarawetyynyõhyymyhÿre. Iwese bodee textitõenymahãte wese tamy bedeerykõ rira wese boibeke. ¹⁸⁻¹⁹ Kia teerymahãtenyete tuu ararybekre. Ixinamy rexihumyhÿredi aõkõ iwese womati tÿrÿrÿhÿkÿ iurahakÿ-di aõkõ atarasanareny riõwynyre. Tahe Kristu hãlubu-di aõhebo ibina botÿÿnybenyke-ribi textitatenyta aõwidÿÿnabo booreny-ribi teerytenytaki. Kristu tahe budoeni òbiti lyrahakÿ wesemy rare. ²⁰ Tii juhu bededÿÿnanau taumy rubu-ò riwahinykremy rexieryhyymy raremyhÿ, wijile kaõ nade rurukremy aluunareny òraru-ki. ²¹ Tule Deuxu tetyhynymahãtenyete Kristu òraru-ki, Deuxu rubu-ribi riixixadÿÿnyre tahe tamy loosõna riwahinyre, tai ararõsõnareny aityhydÿÿna Deuxu-ki roimyhÿre.

²² Kaiboho atytyby tesurõnanytenyete inatyhyna dori teywinytenyta. Tai tahe wiluuluutyhymy rakatxirenyke. Wiluummy wesenedÿÿrenyõmy atximahãtenyete. ²³ Wiji umydÿÿna juhu wese aõkõ iny bõtõdÿÿna raumydÿÿre wiji tahe Deuxu Rybe aumydÿÿnamy ihÿre. Kia tahe ituerenyõtyhy. Umytuedeõna diwahinyde. ²⁴ Iwese ryberiti rarybere wese: —Ibutu iny asi wese rare. Inyloosõna asi noijsa wese rare.

Asi ramoenymyhÿreu tõijsa rejuxunymyhÿre.

²⁵ Deuxu Rybe tahe aõu aõuhyy rÿira. Rexihuõtyhy rÿira. Kia rybemy tahe adeereny rarybemyhÿre, Rybewihikÿ wahe.

2

¹ Ibutumy idi behuke ixi-ribi, aõbinatyhyna-di, rui-di, iny-witxira aõmydÿÿna xibure-di aõ ikõkõmy ujõmo-di ibutumy. ² Tahe iwese tohouã howÿsy luure wese rybe-ò bexibore-nanyke. Atytyby howÿsyna wese rare. Idi maumynykemy tarasana inatyhy-ò. ³ Wanyrÿ dori wihikÿ rare. Kia teerytenyete. ⁴ Tamy bodoibedenyke. Tii dori manairuhykÿ wese rare. Heto tira widÿÿdu kia mana-di rehura. Tahe Deuxu dee kia ixitarasanamy rare. Awimy heka tai rahare. ⁵ Kaiboho tule mana iruhukÿ wesemy tõimahãte heto òbiti wesemy aijõreny-di kanaijedÿÿnydenykemy. Xi-wena wedu mahãdu òbitimy boibeke, Deuxu dee wina xi-wedÿÿna òbiti biwinybenykemy Jesuisi Kristu wowydynamy. ⁶ Kawese dori Ryberitina-ki rÿire: —Betehebenny inihe Siaõ bede-ki iny mana heto tiramy iwidÿÿ wesemy ritidire. Tii aõwihikÿtyhy wadee rare. Kia iny rityhynymyhÿkeki, tiu raixÿruõtyhy bede õtiidÿÿ ribedewonyõtyhy. ⁷ Kaiboho ityhydÿÿdu mahãdu, adeereny tii aõwihikÿ rare. Ityhydÿÿdukõdu

mahādu dee tahe kawese tii rare: —Hetotirawidỹ̄du kia mana-di rehura. Kia mana tahe wiji juhuludu mana ritidimy roire. ⁸ Tule ijō kiamy rare: —Mana idireny kedese denykre. Kia mana awi aōkō tamyreny rare. Reserenykre rybe ritxiōnymyhỹrenykeki Deuxu heka rierymyhỹre reserenykre. ⁹ Kaiboho tahe iny iitxese itxesemy aratarenyre, xiwena wedu mahādu òbiti boibebenykremy, inyijoi òbiti boibeke, Deuxu hōrō mahādule, iruxeranamy marybepenykemy adee dori bededorohokỹ-ribi anadydenyde taloosòna wiwihikỹ-ò. ¹⁰ Kaiboho juhū inyijoi aōkō toitemahā tahe wiji Deuxu taijoimy aratara. Juhū ruxetòena tuu inyō riwahinyōhyyre adeereny, wiji tahe tii riwahinyra adeereny.

¹¹ Waluuna mahādu adeereny ararybekre. Kaiboho iwitxira bedeludu mahādu wese atximahātenyteki. Uritere òtaòtarenymy atyytyby òludu dori kia rare. Atyytyby aōbina dỹ̄nana adeereny diwahinyde. ¹² Ahotiludu mahāduy-ki òbitimy boibeke. Tai omy ibinamy rarybekeki, tiiboho aumytuedeōnamy robimyhỹkemy tahe Deuxumy kiditoosòdỹ̄nadenykre Deuxu hitxidỹ̄na txuu.

¹³⁻¹⁴ Bede dinodu bede ywina rybe biywinyamahābenyke Wanyrỹ òraru-ki Iòlòrybe, aōbo kai deòdu rybewydydu aōbo ibutumy birarennybenyke. Iòlò deòdu mynyduhykỹ doidenyde aōbinahakỹ widỹ̄du aōhōkỹmy risỹnomy rimymy risỹdỹ̄nykremy ritamadỹ̄nykremy tule aōwiwihikỹ widỹ̄du ritealādỹ̄nykremy. ¹⁵ Aōwi wihikỹ widỹ̄na-di kaiboho hābu bina biyrydỹ̄nybenyke. Kia Deuxudeewi rare. ¹⁶ Kaiboho hābu ixihyyludumy ahātenyete urile aōbina bina widỹ̄ōmy boibekre. Deuxu deòduweselemy boibeke. ¹⁷ Iny ibutumy iòsana biywinyke. Ityhydỹ̄du seriòre luumy boibeke. Deuxu biwowydynnybenyke. Iòlò bede dinodu biwowydynnybenyke.

¹⁸ Deòdu mahādu, awedu bityhynybenyke awedu wiwihikỹle-ò sohojile aōkō ibina bina-wana dori bityhybenyke uritere bedeòtiidỹ̄my rỹiōmy. ¹⁹ Aōbina riwinyōhymyhỹre deòdu tawedu-ò. Tahe wedu teòdu-ò aōhōkỹmy risỹnyre. Deòdu riòludunymyhỹre aōmy rarybeōhymyhỹre, Deuxu rityhynymyhỹreki. Kia wese tahe Deuxudeewina rare. ²⁰ Iny raòrarunymyhỹkeki, tai tahe òhòtenamy inyboho ratximyhỹrenykeki, aòloosòna widỹ̄na bohe kia rare. Inyboho riòludunymyhỹreki. Aōwiwihikỹ widỹ̄na-di inyboho ywina-di òhòtenamy riòludunymyhỹrenykeki, kia Deuxudeewina rare. ²¹ Kaiboho biòludunymyhỹbenykeki tai iitxemy aratarenyra. Kristu tule dori òrarureny-ki aōhōkỹmy rotỹ̄nyre. Iwese timybo tii riwinyre wese kaiboho biwinybenyke. ²² Kristu dori tiu raòrarunyōtyhy, tule aōbinahakỹmy rarybeōtyhy,

raruiõtyhy. ²³ Tamy adebure iràmý ryryreu wobinamy aõkõ dirawyònyde. Rihetenyreu, aõma aõkõ dirawyònyde. Urile tii rexiwahinyre Deuxu dee. Deuxu dori òbitina-di rihitxidỹnyre. ²⁴ Inyòrarureny dori riwyre itxeò nihikỹ tyre-ki. Tai tahe òraruna dee rakarurunyrenykre, tahe òbiti widỹna-ò rakatximyhỹrenykre. Kristu wotòmomy iny riteytenymyhỹre. ²⁵ Iwese budoeni reòsamyhỹre wese kaiboho toite. Wijile tahe kaiboho tòðsemy atxitenynte aitxeredu-ò atyytyby wiòhedỹdu-ò.

3

¹⁻² Hãwyyreny, ahãbureny rybe bityhynybenyke. Tai inyõ ihãbu ityhydỹdu aõkõkeki, tii kidityhynykre tahãwyyhe-ki, aõrybebo aõkõ roholareki ihe-ki robireki. ³⁻⁴ Hãwyy ruxerana heka ixidee itidisirenyõmy atximahãbenyke aõ taumy-ki ritidimyhỹre aõkõ hãwyy ruxerana rare. Aõ iwo-ribi teysare, Deuxu Tyytybytyhy widỹna inytyhyna tii tahe hãwyy ruxerana rare. Rade sihodỹtyhy ibutu ratyre aõkõ rare. Womati tỹrỹrỹ noho tule aõkõre, tyy wiwihikỹ-di rariamyhỹre tule aõkõre. Kia tahe Deuxu dee aõwiwihikỹtyhy aõkõ rare. ⁵ Tule ihetxiu hãwyy òbiti tuu rotỹnyre, tahãbu riywinyre, Deuxu rityhynyre. ⁶ Sara, Abraõ riðrese, tahãbu riywinyre. Itxi õhõtireny beake tawedumy tamy rarybere. Kiaboho hãwyyreny iriðre riðre atximahãtenynte. Tai aõwiwihikỹ widỹnyamy botỹnybenyke. Bededỹnana jei jei lau brebuõmy.

⁷ Hãbu mahãdu, kaiboho tule asỹreny-ki abedeeryna biyrubunybenyke. Ahãwyyreny biywinybenyke hõraõmy idi ahãbenyke, tiiboho dori itxõmotxirenyre iruruõreny. Iòsỹny bityhynybenyke. Wiwana Deuxu ruxetòena tarasadỹdu atximahãtenynte. Tai aixitòedỹnyamy òbitimý bexitòenybenyke.

⁸ Tahe kaiboho ibutumy widi mohõtinybenyke wiwesewe-sele. Ityhydỹdu seriðre dee tòena luuna-wana biwahinyke. Ruxetòena-di boibeke iny-ò ixityhydỹ aõkõ. ⁹ Inyõ aõbinamy adee rakeki, ixidòwydỹõmy. Inyõ rybe-ki aõbinamy adee rakeki, irawyòdỹõmy. Wityhymy tamy marybeke. Kia-ò tahe Deuxu aõwiwhikỹ adee riwahinykre, tai ijõtxu Deuxu wityhynamy adee riwahinykre. ¹⁰ Tai inyõ tabededỹnaluumy ratxike-wana, tatxuu teysamy ratxikeki, tahe dõròtò rexi-taake rybe bina lau iry riyryke wobina rybe lau. ¹¹ Aõbina bina-ribi bihenybenyke aõwiwihikỹlemy botỹnymahãbenyke. Ywina biijemahãbenyke ywina-di ahãbenyke. ¹² Deuxurue tahe òbiti mahãdu-di retehemyhỹre. Tanohõti tahe ixitòena-ò riijohonanymy rononymhỹre. Aõbina widỹnadu-ò tamyreny rayaranymy idi retehemyhỹre.

13 Kai aõwiihikỹ widỹylemy tiu matxibekeki aõhe iny adee rotỹỹnyõtyhy. 14 Kai òbitiwidỹỹ òraru-ki aõhebo bòtỹỹnykeki, deysamy atximahãke. Breburenyõmy iwese ilaureny ixiohãrudỹỹrenyõmy. 15 Urile Kristu awedurenywesemy bisỹnybenyke aworeny-ribi. Inyõ adeereny aratỹỹraxinyke-wana aõherekibo Kristu tetyhynymyhỹtemy, kai bexiywinyhyy tamy ixidee rybena bydỹỹna biywinyhyymy idi ahãke. Arawyòdỹỹna ywina-di tamy marybeke iòsỹny bityhynymy arayky òbiti-di marybemahãke. 16 Tai tahe biixỹrudỹỹnyke umy ibinamy rarybekeki, tai dori òbitilemy Kristuko-txi tariamahãte. 17 Tahe Deuxu dee wikeki, aõwiihikỹwidỹỹ òraru-ki inyõ aõhõkỹmy rotỹỹnykeki, kia tahe Deuxu dee awi rare. Aõbinahakỹwidỹỹ òraru-ki aõhõkỹmy rotỹỹnykeki, kia tahe Deuxu dee awi rare. 18 Kristu tahe sohojihyyle rurure iny òraruna òraru-ki. Òbitiwidỹỹdu tahe rurure òbitiwidỹỹdu aõkõ òraru-ki, kaiboho ruruweselemy atximahãtenyete. Deuxu Tyytybytyhy direki kaiboho iruweselemy atximahãtenyete. 19 Kristu Tyytyby rara rotenawo-ò, tyytyby-ò ritỹnynymy rarybeke. 20 Noe hãwò nihikỹ riwinyreu, Deuxu riraõmy raremyhỹu urile hãbu mahãdu rityhynyõmyhỹre. Debò inataõ reurò inymy rohonyre rubu-ribi bera-ò rabòròròre. 21 Wiji, kia sebedỹỹna ijyy wese heka rare. Tahe aõsebedỹỹna aõkõ iny tarasanare. Sebedỹỹna-ki Kristu rubu-ribi ixixana inyboho riteòsinyreri iny Deuxu-ò retehemyhỹre tarasana ritakemy. Bee tahe hãlubu suròdu aõkõ rare. Rexitòdenymyhỹreki inywo rityranymyhỹre risuhònymyhỹre. 22 Kristu tahe wijile biu bede ronyre Deuxu rurunawe-ribi tii ýjuboho, dinoduboho, rurunaduboho wedu Kristu rare.

4

1 Tahe Kristu taumy-wana aõhõkõmy rotỹỹnyre. Tai tahe iwesemy mohõtinybenyke. Inyõ dori aõhõkỹmy rotỹỹnyre. Tai tahe òraruna-ribi ixixawididỹỹmy rõhõtinyreri. 2 Tai kabede-ki iny bededỹỹnanareny uhe hãbu òta òtawidỹỹ nohõtina wesemy aõkõ rakatximyhỹrenyke. Deuxu deewina widỹỹna-ò rakatximyhỹrenyke. 3 Juhuu kaiboho sõwemy taòrarunyenye, iwese ityhydỹỹdukõdu mahãdu wiji rỹira wese. 4 Aòraru-ò biòwa mahãdu wiji bederiòtiinyre kai tii-wana taòrarunykõmahãteki iwese tiiboho naòrarunymyhỹdenyde wese. Tai adee ibinamy rarybemyhỹrenyre. 5 Tule tiiboho ywisidỹỹdu Deuxu-ò rirawyònykre. Idi dori òbiti ywisidỹỹna-di rihitxidỹỹnykre iru mahãdu, rubumahãdu wana. 6 Tai tahe inyõ ituekre mahãdu-ò Rybewihikỹmy rarybemyhỹre iumy dori rihitxidỹỹnykre ibutu hãbu wesemy. Tahe ityytyby Deuxumy irumy

rarekre.

⁷ Boholabeny inyhe, bededỹynana konana iòhòra. Tai tahe inatyhymy mohòtinyke Deuxu-ò òbitimy bexitòenykemy. ⁸ Ibutu ratyre wiluutyhymy atximahābenyke. Kaiboho dori aluunadirenykeki wiòraruna-di itxerekòmy ahābenyke. Inyò dori iluunadikeki, wiòraruna-di itxerekòmy ihỹke. ⁹ Iny wixira dee awimy rỹira, roraludu isỹòmy rỹira aheto-ò bisỹdỹnyke. Bitỹhidỹnyke roraludu luomy atximahā. ¹⁰ Wii biwiòhenanymy ahābeny iwese bede teerytenyte wese bi-wiòhenanybenyke. Deuxu wiòhedỹỹdu wiitxura wahidỹỹdu wiwihikỹmy boibeke. ¹¹ Inyò rarybekeu, Deuxu rybedile kana rybeke. Inyò reòbykeu. Deuxu ruudile kedeòbyke. Tai tahe Deuxule loosòna kia-ribi kanatake Jesuisi Kristu òraru-ki ibutumy aõna aõna-di. Aõu aõu ibutumy ruruna, loosòna Jesuisi Kristu hõrõ rare. Kie.

¹² Waluuna mahādu, ixibedeòtiidỹỹòmy bede aõmydỹynana sira adee kanakreu. Kia tahe aõ brebudỹỹna aõkõ rare aõhebo adee kodotỹỹnykeki. ¹³ Tỹxihikỹlemy deysa-di atximahāke kia aõhòkỹmy dỹynana dori Kristu aõhòkỹmy dỹynana-ò biòwa atximahāte. Idi tahe tule kedeysakre Kristu loosòna òraru-ki. ¹⁴ Inyò adee ibinamy Kristuni òraru-ki rarybekeki beysake. Kiau Deuxu Tyytyby heka loosòna sõwe-di atyre-ki kanakre. ¹⁵ Kaibohoõ rubudỹỹrenyòmy, wasirenyòmy, aõna aõna bina widỹỹòmy, inywixira aõwysyna-txi ròte. Kiake-wana iòwydỹỹnamy aõhòkỹmy botỹỹnybenykre. Tii dori wadee awiòre. ¹⁶ Inyò tahe aõhòkỹmy rotỹỹnykeki, ityhydỹỹdumy rare òraru-ki tai ixyrũòmy mabeke. Urile Kristunimy riwowydynykemy idi rare. Bededỹynanahe rehemynymy roire ityhydỹỹdu mahādu-di rihitxidỹỹnanymy riteranykemy. ¹⁷ Tahe inydee ywisidỹỹna ritelenykeki, timybohe Deuxu Rybewihikỹ ityhydỹỹdukòdu mahādu-ò kòdòhònykre. ¹⁸ Ryberiti-ki roimyhỹre kia: —Òbiti mahādu dee tarasana isirakeki, timybohe òrarudu mahādu ròhònyke. ¹⁹ Tahe inyò Deuxudeewi òraru-ki aõhòkỹmy rotỹỹnykeki, Tatytyby Deuxu-ò rawahike tahe aõwihikỹ widỹỹmy rareke. Deuxu dori aõu aõu iny widỹỹdureny rare; iny wiòhedỹỹdureny rare.

5

¹ Ityhydỹỹdu-ò itxeredu mahādu-ò aritohonykre ararybekre. Jiarỹ tule itxeredu-ò rare. Kristu aõhòkỹmy rotỹỹnyreu, jiarỹ tuu rabire. Taloosòna kiditeòsinykreu jiarỹ awana watxire tewebromy rikitarenykremy. ²⁻³ Biwisinanyke aityhydỹỹdu butuna iwese itxeredu budoeni-di retehemyhỹre wese idi beteheke. Ixideewimy kia biwinyke. Inywixira

deewimy aõkõ. Aõ nieru tarasa sohojilemy aõkõ, ityhydỹỹdu wiõhedỹỹmy. Aõ ityhydỹỹdu wedu wesemy aõkõ bisỹnybenyke, urile bexideòsinyke iwese ityhydỹỹdu òbiti rỹira wesemy. ⁴ Tahe itxeredu mahãdu wedutyhy kedehemynykeu, tii adee kidiwahinykre loosòna araheto. Tii tiu toosò ixãwiõtyhy. ⁵ Itxeredu mahãdu tỹmyra bierybenyke itxeredu mahãdu matuari-ribi widee ixiwedeõmy ahãbenyke. Ixiwede mahãdumy dori Deuxu rarawetyynymyhỹre. Ixiwede aõkõ mahãdu-ò tahe ruxetòena riwahinyke.

⁶ Ywimy ahãke Deuxuru-ò iximy xiwedeõmy. Tii dori bede òbiti kanakeu akanaloosònykre. ⁷ Aõmydỹỹna witxira witxira biwahinybenyke Deuxu-ò tii dori arawisinaymyhỹrenyre. Anawiòhenanykre. ⁸ Bexihãrubenyke aòludureny Satanasì-ò. Òbitimy mohõtinybenyke. Tii dori leaõ reburemyhỹre wese rare. Tii rariarerimy ihỹre tibo riròkemy. ⁹ Atyhynatyhy-di idi bexiumynyke. Aityhydỹỹdu seriòre-dori awana aõhõkỹmy rotỹỹnyreri kia ixiradỹỹduhukỹle-wana. ¹⁰⁻¹¹ Iny Deuxu ruxetòenatyhy rỹire. Kaiboho urihimyo aõhõkỹmy botỹỹnybenykeu akanawiòhenanykre, akanarurudỹỹnykre, akanaòbitidỹỹnykre, anaijohonadỹỹnykre. Ibutumy ruruna ihõrõmy aõu aõu rarekehymy idi watximahãre.

¹² Kia waryberatiyla Sila-wana adeereny riritinyre. Tii iny seriòrereny òbitityhy rare. Jiarỹ rarybereri kia Deuxu wiõhedỹỹna inatyhy rare. Kaiboho idi tyhy mohõtinybenyke. ¹³ Kowa hãwyy Babilonia hãwã ludu tule tarybe weityhyna adee diwahinyde. Tii tule itarasana mahãdu-ò. Tule wariòre Marku arãrybeweityhynanyrenyre. ¹⁴ Widee buòbenyke narybewehityhynanyde. Ywina adeereny kanakemy watxireri Kristu tetyhynmahãtenyteki.

2 Pedro 2 Pedro Tyyriti

1 Jiarÿ, Simaõ Pedro, Jesuisi Kristu deòdu rare. Jesuisi Kristu rybemy rybedu rare. Warybe ritina rewahinyre ityhydÿÿdu mahãdu-ò, Deuxu ywisidÿÿna mahãdu-ò, Jesuisi Kristu inyтарasadu òbitina òraru-ki, inatyhyna inyboho ijòdirenyreki. 2 Ruxetòena wiòhedÿÿna-wana adeeremy kanakemy watzireri Deuxu erydÿÿna-ki, Inynyrÿ Jesuisi erydÿÿna-ki. 3 Tahe Deuxu rurutyhy-ribi inydeeremy aõna aõna sòwemy riwahinymyhÿre òbitimy inyboho rokoirekemy iny bededÿÿnanareny-ki. Tii inyboho ridyrenyre taloosòna òbitiwo-ò, tii inyboho rieryrenytyhyreki. 4 Tai inydeeremy tuu rarybere, sòwemy aõna aõna kanakremy awityhymy inydeeremy kia rybe rare. 5 Kia rybe bityhynybenykeki, bede aõmydÿÿnana bina-ribi bexitabenyke, òta òta widÿÿna-ribi bexiebenyke. Tule Deuxu rayky wesena-di urihimyo boibeke. 6 Tai tahe ibutumy aruru-di marurunyke aityhydÿÿna-ò òbiti widÿÿna bibutumyke, kia-ò bederydÿÿna bibutumyke, kia-ò ixiwedudÿÿna bibutumyke, kia-ò widÿÿnahyyna, kia-ò òbitimy nonana. 7 Kia-ò ityhydÿÿdu seriòre luuna, kia-ò wiluuna bibutumyke. 8 Kia aõna aõna dori awo-ki ratximyhÿkeki, rexiòlònykeki, arawiòhenanykre Jesuisi Kristu Inynyrÿ bierybenykemy. Tai ityhydÿÿdu wihikÿmy boibekemy. Iny wixira biwiòhenanybenyke. 9 Kia aõna aõna inywo-ki ratxiòmyhÿkeki, tii heka iruetàlemy ihÿre. Aõbo iòhòmy ratxirerilemy robimyhÿre. Juhu òraruna iribi risuhoremy idi tòhòti rosare. 10 Tai waseriòreboho marurunybenyke atyhymy boibekemy, aityhydÿÿna tyyhydÿÿmy boibekemy. Tai tiu òraruna-txi aixeõna. 11 Kia wesekeki tahe deysana-di birònybenykre Jesuisi Kristu inyтарasadu òlòna bede-ò.

12 Kia aõna aõna teerytenyete. Inatyhyna tetyhynyhyy atximahãtenyete. Ihãrele tahe itxi aròhòtijiiradÿÿnyhyrenykre. 13 Tule warumy mahãreu, awimy idi rahòtinymahãre kia inatyhyna-di akanaixixadÿÿnydenykremy. 14 Waumy dori kaki ele elelemy aririkre reeryre. Inynyrÿ Jesuisi Kristu dori kia wadee diteòsinyde. 15 Aõu aõu tahe ararurunytyhymy ararekre kaiboho kia ibutumy òhòti-ribi rosaõtyhykemy. Tule warubuhewo-ribi kia-di mohòtinyhyy boibekre. 16 Tahe adeeremy Jesuisi Kristu themynynamy rarybereu, aõ uritere tere ijyymy aõkò heka relyyleri hãbu ijyyna-ribi aõkò ijyityhymy. Inyboho dori iny iòlòreny loosònatyhymy

robimyhÿrenyrene. ¹⁷ Tii dori Deuxu inytyby-ribi loosòna wowydyna-wana ritare. Tuu Deuxu loosònawo-ribi narybede: Kai heka Wariòre waluu tate. Jiarÿ reysamy watxireri adee. ¹⁸ Kia rybe-ò jiarÿboho raholarenyrene tii-wana hãwãlò ratyy tyre-ki roiremyhÿu. ¹⁹ Iwese juhu rybemy rybedu mahãdu rarybere wese, kiamy heka wiji inydeereny ritÿnynymy roimyhÿre. Kaiboho tule kia-ò boholahamahãbenyke bityhynmahãbenyke. Iwese iny loosòna-di bedeluru-ki, retehemyhÿre wese. Idi tahe Kristu kòdòhònykre, iwese tainahakÿ ròhònyrene wese. Tahe aworeny-ki kanasÿnykremy ratxikre. ²⁰ Kia heka juhoo bierykre: Tyyritirybeò tiu ixiwanale ritÿnydÿÿnyòtyhy. ²¹ Deuxu rybe dori hãbudeewimy aòkò heka nade juhu Deuxu Tyytybytyhy hãbu dee rybe ritÿnynyrene aòmybo rarybekemy.

2

¹ Iwese juhoo inyy-ki rybedu inatyhyòna rarybere wese, tule ayreny-ki rybedu inatyhyòna kidierydÿÿnykremy. Tiiboho kedeerynanykre aòbinabinahãkÿmy. Tiiboho kidiitxenanydenykre. Tule Inynyrÿ kidiseònykre. Tai tahe aòwesele rexihukre. ² Sòwemy iny iòta òta erydÿÿnyra rityhnykre. Tai iny witxira inatyhyna ery dee ibinamy rarybekre. ³ Kia rybedu inatyhyòna adyna-di ratxihyymy roireke tai adeereny raruimyhÿke. Anieru tarasanareny-ò. ⁴ Iatysyna heka iòhòmy namahãde tule idi dehuna inatyhymy kòdòhònykremy ihÿre. Ýju mahãdu raòrarunyreu Deuxu tòtxi ririòlemy reare tahe idi rehulemy reare bedebina heòty-ò. ⁵ Iu bee-di Deuxu suu ritÿmynyreu, òrarudu mahãdu ituere Deuxu tòtxi ririòre. Noe, òbitina rybedule, ritare debò inatxi reurò iny-wana. ⁶ Sodoma hãwã Omora hãwã-wana aòwesele Deuxu ritoonyre, raòrarunyreki. Brybymy relere. Tai heka iny ribedeerynymyhÿre òraru lau. ⁷ Kia hãwã-ribi heka Lòijoi sohojile ritare. Lòò òbiti rare. Tii heka terare òrarudu mahãdureki. Tòtxi ririòhyre. ⁸ Imahãdu-ki Lòò rasÿnyreu, txuò txuòlemy iwo rabadewotyhyhymyhÿre, aòbinawidÿÿmybo robire idi roholareki. ⁹ Tahe òbiti widÿÿdu urihixina-ribi Inynyrÿ ridykemy rierymyhÿre. Tule ibinamy widÿÿdu mahãdu aòhòkÿmy dÿÿnana riraòmyhÿre. Ywisidÿÿnatxu kedehemynykreò. ¹⁰ Ibutu ratyre urari òta òta widÿÿdu mahãdu aòhòkÿmy rotÿÿnykre. Tiiboho Deuxu ruru riseònyrenymyhÿre. Ixi-di xiwededu wesemy rÿirenyrene, ixiluudu wesemy rÿirenyrene. ¹¹ Aòbinahakÿlemy biuludu mahãdumy rarybemyhÿrenyrene. Tahe ýju mahãdu iruruna ratyre-di hãre tamy ibinamy rarybeòmyhÿre, Deuxuko-txi. ¹² Tahe kia iykaraluu mahãdu iròdu deborehekÿ wesemy

ratximyhÿre. Iròdu debore tahe bedehuduna widÿÿmy rare ada ròtenawo-ò rakelemy. Kia hãbu mahãdu aõmybo ròeryõhyymyhÿre dee ibinamy rarybemyhÿ. ¹³ Tiiboho ixi-di dehuna-di ixi dee kedexiixãwinykre. Tiiboho òraru luumyhÿre txumy dori raòrarunyrenymyhÿre. Awanareny dori riroximahãre, aõbinahakÿtyhy wesemy ayreny-ki ratximyhÿ iòrarunarenymy rybe luureki. ¹⁴ Tiiemy iru hãwyydihyy retehemy ihÿre tamy òta òtalemy ròhòtinymyhÿre. Kia hãbu hãwyydÿÿweduna rierymyhÿre. Hãwyy urihimyo tÿÿwekeki kia hãbu idyna rybe-di rierymyhÿre hãwyy-di aõbo tai riurarinymy taòbirenareny rihydÿÿnymyhÿre aõbo tai riurarinymy idi ratximyhÿre. Tiiboho tuedena nihikÿ-di ituerenykre. ¹⁵ Òbitiry ririmyhÿreny. Reòsamyhÿreny. Balaaõry dori riheludunymyhÿreny Balaaõ, Beoro riòre òraruòwydÿÿnamy ritakemy ratxireri iòraru luureki. ¹⁶ Aõbinahakÿ riwinyreki rexiòwinyre. Kiamyre heka. Jumenta wesena rybeteremy tamy rarybere inyrybe wesemy iitxÿtena-ribi riixãwidinykemy. ¹⁷ Tiiboho bedidehuna wese roire bee ihoõreki. Yhy biuwetyy tiò ridymyhÿre wese kia hãbu mahãdu roire. Tamy bede luruhukÿ bede riyrubunymy rÿire. ¹⁸ Tiiemy taòrarumy rarybehymy raremyhÿ inyõ aõta òta rybe-di ridykemy. Inyõ deòsary-ribi ròhònykeki, tii ridylemyhÿre ixybyle òraruna-ò. ¹⁹ Tamyreny rarybemyhÿre ixideewimy boibekemy. Urile irybedureny òrarunawidÿÿna deòdumy ihÿreny. ²⁰ Iwese inyõ ijesuna-ribi riatymyhÿkeki, iatysydÿÿdu deòdumy rarekre wesemy. Kiawesele tahe òraruna rare. Inyõ bede aõmydÿÿnana òraru-ribi ròhònykeki, tahe ixybyle ròðsekeki, teleu raremyhÿ ratyre ikonanau ratÿÿnykre. Inynyrÿ Jesuisi Kristu dori tii rierymyhÿre juhuru tahe idi rexideyresanyre kia aõmydÿÿnana òraru-ò. ²¹ Tiiboho ryòbiti rierymyhÿreny. Tahe bede ywina òbiti-ribi rexiòlòdÿÿnyre. Rieryõhyykeki tamy wimy tuu raremyhÿ, rytÿmyra erysy-ribi rohonyrenykeki. ²² Tiiboho kia rybedÿÿna hitxina wesemy ihÿreny: —Ijòròsa tahylòina-ò ròðsere. Tule ijò rybedÿÿna wesemy: —Ixÿni bedi risuhòkeki, tii tasu burena-di ixybyle rexisunyke.

3

¹ Kia, waluuna mahãdu warybe ritidÿÿna juhuludu aõkõ rare ihewoludu rare. Warybe riti wiwanadile anohòti ijiradÿÿmy watxireri anohòti riraixixanykemy. ² Deuxu rybemy rybedu òbitimy rarybemyhÿre òhòti-ribi rosaõkre, tule Inynyrÿ iny tarasadu bede ywina nohòti losaõmy iwese tarybe deòdu adeereny rierynanyre wese. ³ Ibutu ratyre, kia-ribi nohòti losaõmy. Ikonana txuu hãbu binahakÿ

rybe binatyhy-di kòdòidenykre. Kia hãbu òta òta widÿÿlemy ròhòtinyinmyhÿre. ⁴ Kiamy hãbu rarybekre. Tiubo Jesuisi Kristu nonana kanakre. Juhu inytybyreny ituereu wiji bededÿÿnanau tiu naòhyymyhyÿde. Ibutumy heka juhu bedeu ixi wese hyylemy bede roimyhÿre. ⁵ Iribi tòhòtirenny rosare ixideewimy Deuxu irybedile biu bede-wana riwinyre. Beribi riwinyre, bedi riwinyre. Iribi tahe bedi bede rahure. ⁶ Bedi juhuru bede ibutumy rexihura. ⁷ Tule wiji irybedile bederÿimyhÿre. Tahe ixibylye kanahukre. Heòty-di kanahukre. Kia txuu ibutumy inybinahakÿ ituekre kia-ribi ixideewilemy kia hãbu tòhòti rosare.

⁸ Tahe aòsohojibo, waseriòreboho, nohòti-ribi loosarenyòmy. Kia heka rare: Inynyrÿ dee. Txusohoji 1000 beòra wese heka rare. Tule 1000 beòra txusohoji wese rare. Tamy bededÿÿnana aò aòkò rare. ⁹ Inynyrÿ tarybewesele aòna aònamy kodotÿÿnykre. Aò raroorehenymyhÿre aòkò rare urile tahe hãbu riraòhyymy rÿimyhÿre hãbu taòraru-txi tòhòti reakemy. Ibutumy tarasana-ki rÿikemy dori idi ratxireri. ¹⁰ Wasidu namyhÿde wasimy Inynyrÿ txuu kòdòhònykre. Biuwetyy, bede-wana rexihukre. Ibutu suludu heka ramyijy heòty adÿÿwesemy ritxiennykre. ¹¹ Òbitimy rakatxirenyke. Kia ibutumy ròhònyreki. ¹²⁻¹³ Inyboho heka riraòmyhÿrennyre biuwetyy tÿmyra sutÿmyra-wana. Inynyrÿ dori rarybere kia kidiwahinykremy.

¹⁴ Tai heka waseriòre waluuboho, òbitimy atximahãbenyke kia-ò dori teraòmahãtenyete. Tii kanakreu umyrenny robikre ywimy, òbitimy, inyò heka umyrenny ibinamy rarybeòtyhy. ¹⁵ Rexiroorehenymyhÿre ibutumy iny tarasanarenny. Tule inyseriòre Paulo adeereny ròritidÿÿre ibede eryna Deuxu tamy riwahinyre. ¹⁶ Kiamy tule aòna aònamy tii ròritidÿÿre. Tahe iritina-ki aòbo isiratyhyre ierykònatyhymy roire òbiti mahãdu aòkò kia rybe-di aòwitxiramyo rierynanymyhÿre. Iwese ijò Ryberiti-di riwinyre wese. Tai heka tiiboho ituereny. ¹⁷ Kaiboho tahe waityhydÿÿdu seriòre bexihãrubenyke ilau teòsana-di aradyrennyheny. Tai kaiboho beòsabenyke. ¹⁸ Inynyrÿ Jesuisi Kristu wiòhedÿÿna-di ibedeerydÿÿna-di maumynybenyke. Wowydyna ibutumy tamy kanakemy idi wãhãre wiji tyhymy rareke. Kie.

1 Juaõ

1 Joaõ Tyyriti

¹ Jiarỹboho akoreny retỹỹnynyneri, Jesusimy. Tii Rybe rininirenyra. Tii juhubedeu raremyhỹ. Jiarỹboho rabirenyra, tarybemy aholarenyra, tamy reteherenyre, aõbo riwinyreð, tule tamy iny rerimyhỹre. Tii inydeereny umytỹmyra riwahinyneri. ² Umytỹmyra tuedeõna Deuxu inytyby-ribi rehemynyra. Kia umytỹmyra tuedeõna Jesuisi-di rare. Jiarỹboho tuu rabirenyre. Tii rexideõsinyre inyrenyko-ò. Kia tahe adeereny relyreri iwese raremyhỹ wese. ³ Aõðbo iny roholare wese, tuu rabire wese, kia tahe tuu relyreri inyboho wiluurenykemy winohõtiwesele rõkõhõtinyrenykemy. Inyboho rahõtinyrenyneri iwese Deuxu inytybyreny, Jesuisi Kristu Deuxu Riðre-wana wiwese rõhõtinyre wese. ⁴ Kia tahe waryberiti adee rewahinyneri adeysamy rakatximahãrenykemy.

⁵ Kiamy tahe Jesuisi inydeereny relyreri: –Deuxu txuloosõna wese ratximyhỹre. Deuxu-ò bedeluru aõmydỹỹnana rehemynyõtyhy kiamy adeereny relyreri. ⁶ Inyõ rarybekeki: –Jiarỹ Deuxu-wana winohõtiwesele rahõtinyamahãre. Kia iny bedeluru aõmydỹỹna-di ratxireriki, kia iny raruimyhỹre. ⁷ Tahe inyboho loosõna waõmydỹỹna riwinymyhỹrenykeki iwese, Deuxu loosõnawo-ki ratximyhỹre wese, tai inyboho wiwesele rõhõtinyryhỹke. Tahe Jesuisi, Deuxu Riðre hãlubu ibutumy iny òraru-ribi iny risuhõmyhỹke. ⁸ Inyõ rarybekeki: –Jiarỹ raðrarunyõhywãhãre, kia rybe-di tii ixidee riitxenanyryhỹre. Tii raruire rityhynyõre. ⁹ Iny taðrarurenymy relyrenykeki, Deuxu tiemy õbiti rare, tii iny òrarureny iny-ribi riixãwididỹỹnykre. Aõbo iny iwo-ki isuisumy ihỹre tii rityranyke. ¹⁰ Inyõ òrarudikemy aõkõ raryberenykeki, inyboho Deuxu ruidumy rarybemahãreny. Kia iny Deuxu rybe rieryõhyryhỹre.

2

¹ Kaiboho wariðre wese atximahãtenynte. Adeereny waryberiti rewahinyneri, kaiboho òrarurenyõmykemy. Iny òraruna-txi resekeki, iny wiðhedỹỹdureny dire. Tii Jesuisi Kristu rare. Òbiti rare òraru iyyydumy rarekemy Waha Deuxuko iny wiðhedỹỹmy. ² Tii dori itxeðnihikỹ-ki rurura iny òraruðwydỹỹ-ki. Inysohojile òraru aõkõ rurura tahe ibutumy iny òraruðwydỹỹ-ki. ³ Tiwesebo inyõ rexierykre Jesuisi rieryrenykemy rityhynymyhỹkeki karybe bede ywina wese rierykre tii rexierykre Jesuisi rityhynyneri

wana. ⁴ Inyõ rarybekeki: —Jiarỹ Jesuisi reeryre. Irybe bedede ywina riywinyõkeki, iny ruidu rare. Inatyhyna rityhynyõre. ⁵ Inyõ Jesuisi bedede ywina riywinykeki, inatyhymy tawo-ki Deuxuluu rare. Kiawese heka iny rierykre Jesuisi mahãduwo-ki ratxireri-wana. ⁶ Inyõ rarybekeki: —Jiarỹ Jesuisi mahãduwo-ki watzireri. Tamy kia wese rỹikeki. Aõmybo Jesuisi rotỹnyre wese, tii tule rotỹnyre. ⁷ Ityhydỹduseriõre, adee bedede ywina tỹmyra aõkõ rewahinyreri. Bedede ywina tyby kia rare. Kia juhUU teerytenyete. Inyboho wiluurenkyemy, kia bedede ywina tyby rare, juhUU taholatenyete. ⁸ Kia rybe bedede ywina itỹmyra rare. Jiarỹ adee rewahinyreri. Kristu dee inatyhy rare tule adee inatyhy rare. Bedeluru rõhõnyra, loosõna inatyhy bedede-ò ralõmyhỹre. ⁹ Inyõ rarybekeki: —Jiarỹ loosõnawo-ki watzireri. Kia iny taityhydỹdu seriõre luuõkeki, bedeluru-ki ratximyhỹre. ¹⁰ Inyõ taityhydỹdu seriõre luukeki, kia sohojile loosõnawo-ki ratxireri. Aõ aõkõ tii riatydyỹnyra. ¹¹ Inyõ taityhydỹdu seriõre rexihitxinykeki, bedeluru-ki rariamyhỹre. Titxibo rakre rieryõhyymyhỹre. Bedeluru dori ruetàna rare.

¹² Adeeremy warybe rewahinyreri wariõre wese aõraru dori, tii riixãwididỹnyre Jesuisi õraru-ki. ¹³ Iumy mahãdu-ò warybe riti rewahinyre adiwahinyde, kaiboho dori tuu teerytenyete. Tii hykyle dori juhUU raremyhỹ. Ijoityhy-ò waryberiti rewahinyre, Satanasimy tahaỹnanytenyete. ¹⁴ Wariõre, inytyby Deuxu teerytenyete. Iumy mahãdu, adeeremy aratyryritinykre, kaiboho dori tuu teerytenyete. Tii hykyle dori juhUU raremyhỹ. Ijoityhy, adeeremy aratyryritinykre, Deuxu rybe dori õhõtireny-ki ratxireri, arurudireny dori. Satanasimy tahaỹnanytenyete. ¹⁵ Bedede aõmydyỹnana luurenkyõmy boibeke. Inyõ bedede aõmydyỹnana luukeki, Deuxu inytyby luuna rieryõke. ¹⁶ Kia bedede aõmydyỹna rare: õraruluuna, aõmy robira-wana tuure, aõna aõnamy ixityhydỹna. Kia Deuxu-ribi aõkõ nade. Kia bedede aõmydyỹna-ribi nade. Kia bedede aõmydyỹna-ribi nade. ¹⁷ Kabede ixãwikre taaõmydyỹna õta õta-wana. Deuxudeewimy widỹdu tiu ixãwiõtyhy. Tii awimy rỹirakre.

¹⁸ Wariõre wese. Ikonana bededyỹnana iõhõmy roire. Adeeremy narybede Kristu õludu kanakemy. Betehe inihe, Kristu õludu sõwemy dehemynyde. Kiawese inyboho rieryrenyere ikonana bededyỹnana iõhõmy roire. ¹⁹ Kia Kristu-ò õludu iny mahãdu wotya-ribi rõhõnyrenyra. Tii ityhydỹdutyhymy aõkõ ratximyhỹre. Ityhydỹdu mahãdu tiu rõhõnyõtyhy. Rõhõnyrenyreu, ibutumy rieryre, kia iny mahãdu aõkõ ratximyhỹre. ²⁰ Kaiboho aõmydyỹnana ibu-

tumy teerytenyte Deuxu Tyytybytyhy direki. ²¹ Kia rybe adee aratyyritinyke, kaiboho dori Deuxu rybe inatyhyna teerytenyte. Tiu rui Deuxu inatyhyna-ribi rõhõnyõhyymyhÿre. Kia tahe teerytenyte. ²² Moheka ruidu rare. Inyõ rityhynyõkeki Jesuisi Deuxu deodÿÿna raremy, tii tahe ruidu rare. Inyõ Kristu Deuxu-wana ritxiõnykeki, tii Kristu òludu rare. ²³ Inyõ Deuxu Riõre ritxiõnykeki, tii Deuxu-wana aõkõ ratxieri. Inyõ rarybekeki: —Deuxu Riõre retyhynyre, tii Deuxu-wana ratxireri. ²⁴ Juhuu aõòbo roholare taholamy toitemyhÿ idi mohõtinybenyke. Idi mohõtinyamahãbenykeki, Deuxu, Iriõre-wana aõu sõu matxibenyke. ²⁵ Jesuisi Kristule juhUU inydeereny narybede, umy ituedeõna inydeereny kidiwahinykemy. ²⁶ Kia waritina jiarÿ wiji rehura. Aitxenadÿÿdu lau adee reritinyra. ²⁷ Abedeerydÿÿna Kristu tatyytyby adeereny riwahinyre. Tii tahe awanale ratxireri. Aerydÿÿdu aõkõ adeereny rauhenyrenyeri. Tii tahe inatyhy bedeerydÿÿna ibutumy araerynanyeri. Rui aõkõ rare. Iwese tii araerynanyreri wese, ibutumy biyrubunymahãbenyke. Kia tahe Kristu-ki hykyle bexiemyhÿbenyke. ²⁸ Wiji, wariõre wese aõu aõu boibekemy Deuxu mahãduy-ki. Tai Jesuisi kaò kedehemynykeu, buberuõtyhy ada maixÿruõtyhy ilau. ²⁹ Deuxu òbitityhyhyy ratximyhÿre. Kia teerytenyte. Inyõ òbitimy rarekeki, Deuxu riõremy rareke. Kia tule teerytenyte.

3

¹ Boholake, inytyby Deuxu taluuna nihikÿ inydeereny riwahinyre. Inyboho dori tii rininirenyre Deuxu Riõremy. Inatyhymy inyboho Deuxu Riõremy roire. Kia tahe ityhydÿÿdukõdu mahãdu rieryõre. Tiiboho dori Deuxu inytyby rieryõhyymyhÿre. ² Waluuna mahãdu, inyboho Deuxu Riõremy roire. Rierykõrenykre timybo iny rokoirekremy. Kia inyboho rieryrenyre: Jesuisi kodobehekrey, inyummy taummy wese risÿnykre. Inyboho dori kodobidenykre iwese rarybemyhÿ wese. ³ Inyõ Jesuisi wesemy rarekemy ratxikeki, iwese Jesuisi òbitimy raremyhÿ wese tii rareke. ⁴ Inyõ Deuxu bede ywina rybe rityhynykeki, tii rexiõrarunyke. Kia heka òraruna rare. ⁵ Jesuisi dobehede òraru tarasadummy rarekemy. Kia teerytenyte. Jesuisi inatyhymy raõrarunyõhy raremyhÿ. ⁶ Inyõ Jesuisirykihy rarialeke, tii òraruõmy rareõtyhy. Inyõ òrarummy rarehyykeki, tii Deuxu rieryõhyymy rareke tuu robiõhyymy rareke. ⁷ Wariõre wese, itxenadÿÿdu lau bexiyrubunyke iny aõmydÿÿnana òbitimy riwinykeki, iny òbitilemy rareke, iwese Jesuisi òbitimy raremyhÿ wese. ⁸ Inyõ òrarunadityhy raretyhykeki, tii Diabo mahãdu-di rareke, Diabo heka òrauna-ki hyy nodure. Tai kaò Deuxu riõre nade Diabo aõmydÿÿnana

ixãwikemy. ⁹ Inyõ Deususỹ riõrekeki tii òraruna-txi reseõlemy ratximyhỹre Deuxu dori iwo ritymyranyre. Tii reseõhyky rareke. Deususỹ dori rare. ¹⁰ Kia wese iny rieryrenykre inyboho iriõre Deuxu riõremy roire ada Diabo riõremy aõbo, inyõ Deuxu deewimy riwinyõkeki, tii Deuxu Riõre aõkõ rare. Inyõ taityhydỹỹdu seriõre luuõkeki, tule Deuxu Riõre aõkõ rare. ¹¹ Kia bede ywina rybe juhoo taholamy tatemyhỹ ihãre tadoholamahãte. Kia heka rare: iny wiluukemy. ¹² Iwese Kai taserõre rirubunyre wese aõkõ rikiwinykre. Tii dori Satanasi mahãdu rare. Aõherekibo tasewriõre rirubunyre. Iaõmydỹỹna Deuxu dee awiõre Iserõre aõmydỹỹna Deuxu dee õbitire tai tahe rirubunyre.

¹³ Waseriõreboho, ityhydỹỹdukõdu mahãdu eramy ratximyhỹ. Kia-di bedeõtiidỹỹomyke. ¹⁴ Inyõ ityhydỹỹdu seriõre luukeki, tii rubumy rỹire wese mahãdu-ribi rõhõnyre. Kia reerymyhỹrenyre. Tahe umytuedõna-ki rahara. Inyõ luuõkeki, tii rubumy rỹirawese mahãdu-ki ihỹmyhỹke. ¹⁵ Inyõ taseriõre derakeki, tii rubudỹỹdu wese rare. Boholake, kia teerytenyte. Rubudỹỹdu umytuedeõna-ki rahaõtyhy. ¹⁶ Kiawese luuna rikeryrenke dori Kristu rubu-ò rexiwahinyre inydeereny tõemy. Tai tahe inyõ taseriõre dee rurukeki iluuna sõwereki. Tii tahe awire. ¹⁷ Inyõ ityhydỹỹdu seriõre aõhokỹmy rotỹỹnykeki, rama rahukeki, tuu robike aõ ijõdikeki, tahe iny riwiõhenanyõkeki, tii Deuxu luuna-di aõkõ ratximyhỹre. ¹⁸ Wariõre wese, luuna urile tuu rybena aõkõ rare. Aõhebo rotỹỹnykemy ihỹre. Kia tahe aluuna inatyhymy biteõsinyke. ¹⁹⁻²⁰ Kiawese iny reeryrenyre inatyhyna mahãduwo-ki ratximyhỹre. Jiarỹ arahõtinykeki. Jiarỹ aõkobo ityhydỹỹdumy watximahãre. Deuxu warayky riwiõhenanymy ratxireri. Deuxu warayky ratyre raraykywydynanymyhỹre. Tii ibutumy aõ rieryre. ²¹ Waluuna mahãdu, ruberuõhyymyhỹre tahe iny ityhydỹỹdu mahãdu-ki ratximyhỹre wana rieryreki Deuxu iny rityhynyre. ²² Tahe aõmy iny rexitõenykeki tii inydee kidiwahinyke. Iny dori ibede ywina rybe rityhynymyhỹre. Deuxu deewimy iny riwinymyhỹre. ²³ Kia heka Deuxu bede ywina rare. Jesuisi Kristu, iriõrenimy rikityhynykemy. Tule iny wiluuna wiluukemy. Iwese tabede ywina rybe diwahinyde wese rarekemy. ²⁴ Inyõ Deuxu bede ywina rybe rityhynykeki, Deuxu-wana rareke. Tii-wana ratxikemy. Kia wese heka iny rieryrenyre Deuxu-wana iny ratxireri. Deuxu Tatytybytyhy dori inydee riwahinyre.

4

¹ Waluuna mahãdu, ibutumy rybe bityhynybenyõke inthe ityhydỹỹrenyõmy. Tai biurihike iny rybe Deuxu-ribi

inatyhy aõbo ada aõkõre aõbo. Sõwemy rybedu mahãdu røhònymyhÿre. Tahe inatyhymy Deuxu rybemy rybedu aõkõ rare. ² Kiamy Deuxumy rybedu mahãdu inatyhymy bierykre, inyõ rarybekeki: Jesuisi Kristu hãbu wesemy nade, tii inatyhy Deuxu mahaduõ ihÿre. ³ Inyõ kiamy rarybeõkeki, tii Deuxu mahãdu aõkõ ratximyhÿre. Kia Kristu õluduõ rare. Tamy taholamahãte kanakreõ, tahe, kia ratximyhÿre. ⁴ Wariõre wese, kaiboho Deuxu mahãdumy toite. Rybedu inatyhy aõkõ rare, kia ruru tetatenyte. Deuxu dori aworeny-ki ratximyhÿre Deuxururu, Diabo ruru ratyre rare. ⁵ Inatyhymy rybedu aõkõ aõmydÿÿnana binamy relyymyhÿre. Tii dori ka bede aõmydÿÿnana bina mahãdu rare. Tahe ityhydÿÿdukõdu mahãdu tamy roholamyhÿre. ⁶ Inyboho Deuxu mahãdu roire. Inyõ Deuxu rierykeki, inydeereny roholamyhÿre. Inyõ Deuxu rieryõkeki, inydeereny roholaõtyhy. Kiamy rikierymyhÿrenyke inatyhyna mahãdu inatyhyna aõkõ mahãdu.

⁷ Waluuna mahãdu, wiluumpy rakatximyhÿreny. Luuna dori Deuxu-ribi nade. Inyõ luukeki, Deuxu-ribi tibie rare. Iny Deuxu rieryre. ⁸ Inyõ luuõkeki Deuxu rieryõre. Deuxu dori luuna rare. ⁹ Kiawese inyboho rieryreny Deuxu inyluuremy ratxire. Deuxu Tariõre sohojile diteõnyde bede-õ inyboho Iriõre-ki umy tÿmyra-ki rahakemy. ¹⁰ Kia heka luuna rare. Juhuu Deuxu iny tuu aõkõ rare. Tii tahe inyluure. Tule tariõre diteõnyde inyõraru õwy õwydÿÿnanykremy. ¹¹ Waluuna mahãdu, Deuxu inyluurenytyhyreki, tai tahe inyboho wiluumpy rokoireke. ¹² Tiu Deuxumy inyõ robiõhykyre. Inyboho wiluumpy rÿikeki, Deuxu inywo-ki ratxike. Tai tahe inatyhymy Deuxu luuna inywo-ki ratximyhÿre. ¹³ Deuxu iny-õ Tatytyby riwahinyre. Kiamy tahe inyboho rieryreny tamahãdu-ki ratximyhÿre. Tule rierymyhÿreny tii iny-wana ratximyhÿreny. ¹⁴ Deuxu Riõremy inyboho robirenyra Tulobixidumy inyboho roire. Tuu adeereny relyreri. Deuxu Tariõre diteõnyde iny tarasadumy rarekemy. ¹⁵ Inyõ rityhynykeki idi rarybekeki: Jesuisi Deuxu Riõre rare, tii Deuxu-di tawo-ki ratxireri. Tii Deuxu-wana ratxireri. ¹⁶ Inyboho rieryreny Deuxu inyluurenyre. Kia iny rityhynyreny. Duexu heka luuna rare. Inyõ luuna-ki ratxihyykeki Deuxu tii-wana ratxihyyke. Tii Deuxu-wana ratxihyymyhÿke. ¹⁷ Iny luunareny Deuxu-õ rauhenyõreri. Tai tahe Deuxu wiribi ritxuakre kia txuu inyboho kitxulau ruberuõtyhy. Iwese tii ratximyhÿre wese inyboho kabede-ki ratximyhÿreny. ¹⁸ Inyõ luuna-di ratxityhykeki, tii ruberuõtyhy. Luunatyhy rebreuna-di rehumyhÿre. Aõhõkÿmydÿÿnana rebreuna kidiwahinyleke. Inyõ rebreuna-di

ratxikeki, tamy aõhỹkỹmy dỹỹnana kanakre. ¹⁹ Juhuu Deuxu inyluurenyre, tai tahe inyboho iluurenyre. ²⁰ Inyõ rarybekeki: —Jiarỹ Deuxuluure. Tai tahe tii ityhydỹỹdu seriõre luuõkeki, tii ruidu rare. Inyõ taityhydỹỹduseriõre luuõkeki, timykibo Deuxu luumy rarekemy iximy rõhõtinyke Deuxu dori tiu tuu robiõhyymyhỹre, taseriõremy tahe robihyky ihỹre. ²¹ Kia bede ywina rybe heka Kristu inydeereny riwahinyre: Iny Deuxuluumy ratxikeki, tule tii taityhydỹỹdu seriõre lumy ratxikre.

5

¹ Jesuisi inatyhymy Kristu rare, Deuxu deòdỹỹna rare, inyõ rityhynykeki, tii inatyhymy Deuxusỹ mahãduwo-ki ratximyhỹre. Inyõ Deuxu luukeki, tule iriõre luukre. ² Inyboho Deuxuluukeki tarybe ywina rikiywinykeki, tai Deuxu ti-biedỹỹna mahãdu luumy rikierenyre. ³ Deuxu rybe ywina rikityhynykre, irybe ywina dori isiraõre. Tai inyboho Deuxu luuna riteòsinykre. ⁴ Deuxusỹ mahãdu bede aõmydỹỹnana bina bina ruru ritamyhỹre iny Deuxu rityhynykeriki, kia bede bina bina ruru ritareri. ⁵ Mo tahe kia ijesu tarasadure. Inyõ Jesuisi Deuxu Riõre raremy rityhynykeki, tii bedebina bina ijesu tarasadu rare. ⁶ Jesuisi Kristu nade. Inyõ tii riratisebenryre idi rare rurukremy tahãlubu ritxiwikremy. Rexiratisebenrykemy sohojile aõkõ nade, tule tahãlubu ritxiwikemy nade. Kiamy heka Deuxu Tyytyby tuu rarybere. Deuxu Tyytybytyhy tahe inatyhymy rare. ⁷ Inataõ aõmydỹỹnanamy inydeereny rarybere: Deuxu Tyytybytyhy ijõre, Jesuisi ixirati sebedỹỹna ijõre, Jesuisi rubudỹỹna ijõre. ⁸ Kia inataõ aõmydỹỹnanamy wiwese wiweselemy rarybereri. ⁹ Hãbu rybe iny rityhynymyhỹre. Deuxu rybe hãbu rybe ratyke rikityhynymy rakatximyhỹrenykre. Kiamy Deuxu Tariõremy rarybereri. ¹⁰ Inyõ Deuxu Riõre rityhynykeki, aõbo inatyhy ixidee rieryre. Inyõ rityhynyõkeki, tii Deuxu-di ruidumy rõhõtinyreri. Tii dori rityhynyõreri timybo Deuxu tariõremy rarybere. ¹¹ Kia rybe rare: Deuxu inydeereny umytuedeõna riwahinyre. Tii tiu umy ituedeõna iriõre-ki inyboho rakaharenyke. ¹² Inyõ Deuxu Riõredikeki, tii umytỹmyra tuedeõna-ki rahake. Inyõ Deuxu Riõre-di aõkõkeki, tii umytỹmyra tuedeõna-ki tahasaõna. ¹³ Kia aõna aõna adeereny retyyritinyre kaiboho umytuedeõna-di atxitenyteri bierybenrykemy. Deuxu Riõre tetyhynytenyete. ¹⁴ Inyboho Deuxudeewimy rexitõenymyhỹrenyreu, Deuxu iny-ò roholamyhỹre. Kia tahe inatyhymy rybena rare. ¹⁵ Inyboho rierykeki tii inydeereny roholamyhỹre, tai rierymyhỹreny tii inydeereny riwahinyke aõmybo iny tamy rexitõenyneri. ¹⁶ Iny ityhydỹỹdu

seriõre rubu-ò aõkõ òraruna-txi resekeki, tamy Deuxu-ò rekexitðenyrenyke, Deuxu kia riwiòhenanykemy ixyby Deuxu-ò ròðsekemy. Tii rubu-ò òraruna-txi resekeki, jiarỹ adee ararybeõkre tamy bexitðenykemy. ¹⁷ Ibutumy òbiti aõkõkeki, òraruna rare. Òraruõ rubudỹỹnahyky kidiwahinyõkre.

¹⁸ Inyõ Deuxu-ribi tybiekeki, òrarunahyy-ki rareõtyhy. Kia inyboho reeryrenyke. Deuxu Riõre ryrubunymyhỹre. Diabo iribi ròtaõtyhy. ¹⁹ Deухuhõrõ inyboho roire. Kia inyboho rieryrenyke. Kabede bina mahãdu taaõmydỹỹna-wana Diabo hõrõ rare. ²⁰ Tule inyboho rieryrenyke: Deuxu Riõre inatyhymy kað nade. Tii rierynanyre mobo Deuxu inatyhy raremy. Deuxu-wana inyboho ratximyhỹrenyke, inyboho-dori Jesuisi Kristu Deuxu Riõre-wana ratximyhỹrenyke. Kia heka inatyhymy Deuxu rare. Kia inatyhymy umytuedeõnamy rare. ²¹ Wariõre wese, bexihãruke ibutu bedèòraruna lau.

2 Juaõ

2 Juaõ Ryberiti

¹ Jiarỹ dohodỹỹna matuari mahãduõ warybe rare. Watyyriti rewahinyreri Deuxu ywisidỹỹna hãwyyõ-ò, iriõre-ò. Jiarỹ ibutumy inatyhyerydu mahãdu-wana tiiboho inyluutyhyrenyre. ² Inatyhyna dori inyworeny-ki ratxireri. Ratxityhyhymy ratxike. ³ Kia dori inatyhy inydeereny tate luuna-di. Deuxu deysana, ruxetõena, ywina adeereny kanakemy watzimahãre Deuxu Waha-ribi, Jesuisi Kristu, Iriõre-ribi.

⁴ Ariõre mahãduy-ribi inatyhymy ijõ ityhydỹỹdumy ralore. Kia reeryreu, jiarỹ wadeysatyhyre ariõre Deuxu bede ywina rityhynyreiki. ⁵ Adee arexitõenykre hãwyy. Bede ywina rybe tỹmyra rewahinyreri wese aõkõ rare. Juhuu-ribi teeryte. Urile bede ywina hetxina õhõti reijeradỹỹnyreri. Kia heka rare: iny wiluukemy rakatzximyhỹrenykemy. ⁶ Bede ywina rybe rikityhynyhyykeki, kia heka inatyhy luuna rare. Kia bede ywina juhUU Deuxu-ribi taholate. Tuu txuõ txuõlemy biwinyke. ⁷ Sõwemy hãbu itxenadỹỹdu tyhy kabede-ò dòhõnyde. Tiiboho Jesuisi hãbuwesemy nade rityhynyõlemyhỹre. Kia itxenadỹỹdutyhy tule Kristu òludutyhymy roire. ⁸ Tamyreny bexiebeny, inyaõmydỹỹnana aõmysỹdỹỹnatyhy-di ritaremy iõkõkemy, Deuxu wahidỹỹnaõwy ibutumy ritakemy. ⁹ Inyõ Kristu erydỹỹnana-ribi rõhõnykeki tule iwitxira erysyna rierynanykeki, tii heka Deuxu hõrõ aõkõ rare. Inyõ Kristu erydỹỹnana-ribi rõhõnyõkeki, tii Deuxu dire iriõre dire. ¹⁰ Tai tahe itxenadỹỹdu Kristu erydỹỹnana erydỹỹdu aõkõ aheto-ò rehemynykeki, uritere irõtedỹỹõmy, irybedỹỹõmy. ¹¹ Inyõ rirybenykeki, iaõmydỹỹnanabina-ò riwiõhenanyreri.

¹² Jiarỹ warybe sõwemy adibutunywãhãde. Urile tyyriti-di ariritinyõkre. Arorarenymy dori arakemy watzireri. Kiamy rybe sõwemy rõhõnykre inysõwemy reysakremy. ¹³ Aseriõre Deuxu ywisidỹỹna mahãdu senadu, kia riõre tarybe wehityhyna adee riwahinyreri. Kie.

3 Juaõ

3 Juaõ Ryberiti

¹ Jiarỹ, dohodỹỹna matuari mahãduõ rare. Wabiõwa-ò, Kaio-ò watyriti rewahinyreri. Inatyhymy aluумы watzimahãre.

² Waliina, juhuutyhy Deuxu-ò arãixitòedỹỹnyra aaõmydỹỹna tule aумы wihikỹhykymy mabekemy, iwese atyytyby awire wesele ratxireri. ³ Inyseriõre wese aribi rehemynyrenyreu, wako relyyrenyre умы iwese kai òbitimy tate wese tule inatyhyna-ki tateri wese. Tai wawo reysamy watzimahãre. ⁴ Jiarỹ raholamahãreu wariõre wese Deuxu inatyhyna rityhynyreiki, kia ibutu ratyre wawo riteysadỹỹnytyhyre.

⁵ Kai tahe, Kaio, kowa inyseriõre tule iwitxira ludu seriõre teeryõteki, tewiõhenanyteu aõmydỹỹnana wihikỹ tewinymahãte. ⁶ Inyboho wirotyra-wana, kia hãbu iny seriõre aluunamy rarybera. Ibedetỹinana-ò biwiõhenanykeki, aõwihikỹ biwinymahãke. Tuhyykeki Deuxu deewimy atximahãke. Tii dori iny-wana Deuxu inatyhyna-ò raaõmysỹdỹỹnykre. ⁷ Kia dori kianimy ròhõnyre. Ityhydỹỹdukõdu mahãdu-ribi aõ ritaõhykyre. ⁸ Kia wese tahe tuu rikiwiõhenanymyhỹke. Tai tahe Deuxu aõmydỹỹnana tỹnydỹỹna riwiõhenanymyhỹre.

⁹ Ratyritinymahãre kowa ityhydỹỹdu mahãdu-ò. Inyõ tahe warybe-ò roholaõmyhỹre. Tiibocho dori juhuludukemy ratxireri. Diõtesi inire. ¹⁰ Aõu arehemynykreu, ararybekre aõmybo tii rotỹỹnyre tule aõbinamybo rarybere inymy. Aõ tiihykyle aõkõ, iny ityhydỹỹdu seriõre hãwãwitxira ludu ix-idee tarora-ò rimyõtyhy. Inyõ kia seriõreõ rimykeki, tii ri-ixãwidinyre idy-ribi tii seriõredyna-õ dohodỹỹdu mahãdu-ribi hitximy riteõnyre. ¹¹ Waleina, kai Kaio, òrarudu mahãdu aõhebo rotỹỹnyre wese aõ kai tate. Iny wihikỹ wese kai tate. Inyõ aõwihikỹ riwinykeki, Deuxu hõrõ tii rare. Aõkõkeki Deuxu rieryõre. ¹² Ibutumy Dimitiu dee inatyhyna-di aõwihikỹmy rarybere. Inybocho tule. Kaile teeryte inybocho inatyhy rarybere.

¹³ Sõwemy rybe adee ariwahinykemy watzireri. Tahe aõkõre tyyriti ritina-ki. ¹⁴ Eleeemy arakemy dori watzireri aroramy tai tahe widee rakarybekre. ¹⁵ Deuxu awo-ki riirykemy idi watzireri. Abiõwaboho kaki awehityhy risareri. Wabiõwaboho sohoji sohoji kowa-ò warybe wehityhyna biwahinykre.

Judas Judas Tyyriti

¹ Jiarỹ Juda rare. Jesuisi Kristu deòdu jiarỹ rare, Txiau exi wahe. Deuxu heka aluudu rare. Tii arayrubunymyhỹre òraruna-txi reseke lau. Tai òbitimy ahābenyke Kristu nonana-ò. Watyyriti adee rewahinyre. ² Ruxetòena adee kanakemy watzireri Deuxu-ribi. Ywina sòwemy aworeny-ki atxibenykemy adireny watzireri. Wiluuna sòwemy akireny ihỹke, Deuxu-ribi.

³ Jiarỹ kaiboho ibutumy aluurenyre. Deuxu ibutumy inyboho ritarenyre. Kia ibutumy ariritinykemy idi rahõtinyra. Inyboho heka ibutumy Deuxu sỹ mahādu roire. Iwese iny rityhynymyhỹre wese tii iny ritỹnynymyhỹre. Iribi tahe iny mahāduò adee nade iny inytyhyna riwixiradỹnykemy adireny ratxireri. Iny heka inatyhyna biyrubunybenyke òbitimy rarehyyke. ⁴ Kia òbitikò mahādu ayreny-ò ralòra. Tiiboho Deuxu rityhynyòre. Deuxu inydeereny awi heka rare òraru-ribi iny ritarenyreki. Kia òbitikò mahādu tahe kia wese rarybere: —Òraru-di atxikeki, kia aõ aõkò rare. Deuxu dori iny òraru-ribi ritare. Jesuisi iny wedu rare, iny Iòlò wahe. Tiiboho tule rarybere: —Deuxu bityhynybenyòke. Deuxu ihetxiu rieryre kia wese tiiboho rarybekemy. Tai tahe tii ritỹnynymy ihỹre tiiboho bedehèotybina-ò riteònyke.

⁵ Deuxu inatyhymy riteònykre ritỹnynyraki. Iwese tii ihetxiu iny-di rehure wese, tii wiji iny rehukre. Judeu mahādu heka Deuxu ritare Egito bede-ribi. Idi tahe imahāduò rityhynyòre. Tai tahe imahādu rahurenyre. Kia teerytenyte. Itxi òhõtireny reakre. ⁶ Ýju mahāduò tule juhuu Deuxu deòdumy ihỹre. Idi tahe taaòmysỹdỹyna ririre. Tai Deuxu ròtena bedeò-ò riteònyre. Bedelorohokỹ ihỹre. Kabederawo-ki roire. Tiu heka iribi riòlòdỹnyòtyhy. Deuxu bededỹnnana riywinymy roimyhỹre aõhòkỹmy isỹdỹnnana-ò. Tai tahe ýju wesemy kia òbitikò mahādu rỹike, Deuxu itỹnydỹydumy rỹikre. ⁷ Ijõ ijyy teeryte. Inatxi hāwā ihetxiu ibinatyhy rare: Sodoma, Omora-wana. Ijõ hāwā tule ibinatyhy rare. Kia hāwā yludu mahādu ibutumy heka òta òtanale riwinymyhỹre. Hābuò dori wiwana rexiòrarunymyhỹre, hāwyy tule wiwana wahe. Tai tahe Deuxu ihāwā rahure. Biu-ribi heòty diteònyde. Idi Deuxu dibedeerynyde òraruna derare tii. Tiiemy aõhòkỹmy dỹnnana riwahinyre. ⁸ Kia tule òbitikò mahādu-ò riwahinyre. Tiiboho dori ibinamy riwinymyhỹre. Aõbinalemy raraykynymyhỹrenyre, taumyreny

risurisunymyhÿrenyre òraruna-di. Deuxu rityhynyõre tule ÿju ruruna-di risinymyhÿrenyre. ⁹ Tiiboho Mieli wesemy aõkõ riwinyre Mieli heka Deuxu ÿju dinoduõ rare. Tii Satanasi-wana wiribi òtummy rarybemyhÿrenyre, Moisesi umy òraru-ki. Mieli heka ritirÿmyhÿre iummy ridyke lau. Iu Mieli Satanasi-ò rarybereu urihimyò rityhynymy rarybere, ixinohõtidle ritehiòtyhy. Urile rarybere: —Deuxule aratehikre. ¹⁰ Kia òbitikõ erydu mahãdu aõbina riwinymyhÿrenyre. Aõbinalemy tyytyby bede aõmydÿÿnanamy rarybere kia rieryõmahã hãrele. Kabede aõmydÿÿnanale rierymyhÿre iwese ibutu iròdu mahãdu rierymyhÿre wese. Tiiboho heka iròdu aõna aõna nohõtijuranadile aõna aõnamy rotÿÿnynymyhÿre. Tai rexihurenyre. ¹¹ Deuxu heka kia mahãdu kiditynynyke, Kaï reòsamy raremyhÿ wese dori reòsareki. Aõbo Kaï ixidi riwinykemy ròhòtinymyhÿré heka riwinymyhÿre. Kia mahãdu tule Balaaõ wesemy riwinymyhÿre. Balaaõ nieru sòwemy ritakemy ixidi ihÿmyhÿ. Tai tahe Deuxudeewimy riwinyõre. Tule kia mahãdu Kore wesemy riwinymyhÿre. Deuxu òludumy rexisÿnyre. Tai rexihurenkyre iwese Kore mahãdu rexihure wesemÿ.

¹² Kaiboho wiluuna roxina-ò tebutunyteu, kia mahãdu tule ayreny-ò ralòra. Aworana bedehesi tiiboho ribinadÿÿnynymyhÿre òbitimyno rieryõreki. Urile rexihydynymyhÿre, inywitxira-txi tòhòti reaõhyymyhÿre. Iwese yhy debure wese tiiboho roire. Urile yhy biu ridyòtyhy. Ròaaõtyhy. Sòwemy taheka relemyhÿre, ihãrele aõhomy aõkõ namyhÿde. Òwòru bederaty wahidÿÿdu wese tiiboho roire. Iratydikemy ratxireriu, ihãrele aõkòlere. Òwòru rubu wese roire tiiboho. Raòròmÿhÿre, rurumÿhÿre. Kia wese heka kia mahãdu rare. ¹³ Kia òbitikõ erydu mahãdu tiu ele risaõhyymyhÿre. Ahohokÿ aõwetari òbòhòkÿ idi rehumyhÿre wesemy tiiboho inyrenyre. Iwese òbòbexi-di ròhònymyhÿre wese. Iòraruna òraru-ki aõbina bina iribi ròhònymyhÿre. Tiiboho dori Deuxu inatyhyna ririrenyre. Iwese taina resemÿhÿre wese tiiboho iribi resemÿhÿrenyre. Deuxu kia mahãdu-di ritÿnynymy riteònyke bede luruhukÿ-ò. Iribi ròhònnyòtyhy. ¹⁴ Enoi heka Adaõ dee yreõ rare. Adaõ juhoo hãbu rare. Debòinatxi riòreky-ribi Enoi rare. Enoi Adaõ riòre roko rare. Ihetxiu Enoi rarybere wijinabòdu mahãdumy. Iwese òbitikõ erydu mahãdumy roirekre. Enoi rarybere Kristu nonanamy: —Tii kanakre tamahãdu sòwe-wana. ¹⁵ Idi ibutumy iny ritÿnynykemy. Inyò tii taaõhòkÿmyna aõhòkÿmy rotÿÿnykre òraruna òraru-ki. Ibutumy òrarudu mahãdu rehukremy Deuxu-my ralahatxinanymyhÿreki. ¹⁶ Tiiboho rexirahemyhÿre, tiu reysaõhyymyhÿre, aõdibo tamywimy

rabinadỹmyhỹreki ratxikelemy. Rarybenihikỹmyhỹre. Riwiòhenanymyhỹre aõ ritamyhỹre xiery.

¹⁷ Waluuna mahãdu, õhõtireny reake aõmybo Wanyrỹ Jesuisi Kristu teòdỹna mahãdu juhuu raryberé. ¹⁸ Tiiboho adeereny rarybere: –Bededỹnana roomy tahe ijesu kòdòhònykre, ix-idee wilemy tuu rotỹnymyhỹre. ¹⁹ Kia hãbu iny wiribihitx-imy risỹnykemy, bede aõmydỹnana luudu mahãdu. Deuxu Tyytybytyhy-di aõkõ ratximyhỹre. ²⁰ Kaiboho waluuna mahãdu aityhydỹna-di arurumy bitỹnykyke, Deuxu Tyytybytyhyna-di bexitòenyberihyy. Deuxu luunay-ki iximy boibeke. ²¹ Wanyrỹ Jesuisi Kristu ruxetòena biraòbenyke. Tii heka umytuedeõna kidiwahinykre. ²² Biwiòhenanymyhỹke ka ritxiõnomy rỹira mahãdu. ²³ Kia mahãdu iworonawe-ribi wese bitake. Ijõ-ò ywina-di brebuna-di bisỹnykemy taòraruna deramy bekowabenyke. Iòraruna aõna aõna-ò akyreny reake.

²⁴ Òraruna lau taruru-di Deuxu arayrubunymy ratximyhỹre. Tii arateòsinykre yramy, tako-ò wowydyna-wana. ²⁵ Wowydyna, àlàdỹna, ruruna, Iòlòtyhydỹna, iny Deuxu sohoji-ò kanakemy watzireri tule Inynyrỹ Jesuisi Kristu iny tarasadu-ò. Kata juhuuna-ribi, wiji aõu aõu-ò rahyykre. Kie.

Apocalipse

Deuxu heka Joaõ-ò bede ritÿnynyre

¹ Katyyriti-ki tahe bede aõmydÿÿnana roire. Kia heka Deuxu Jesuisi-ò ritÿnynyre. Idi Kristu Joaõ-ò ritÿnynyre. Aõhebo ele elemy rotÿÿnykre heka inydeereny riteòsinyreri, teòdu mahãdu wahe. Ýjuõ heka Kristu riteònyre Joaõ-ò ibutumy relyykemy, ritÿnynykemy. ² Iribi tahe Joaõ ibutumy relyyre. Kaki heka riritynyre. Kia heka ijyy rare. Jesuisi Kristu inatyhyna rare. ³ Inyõ katyyriti-di rariakeki, eysamy ratxireri. Inyõ kiamy roholakeki, eysamy ratxireri. Inyõ kia rityhynykeki, eysamy ratxireri. Bededÿÿnana dori iòhòmy ratxireri. Kia ibutumy rotÿÿnyke.

⁴ Jiarÿ heka, Joaõ wahe, dohodÿÿna mahãdu-ò watyyriti re-wahinyreri. Debò inatxi reurò mahãdu Asia bede-ki watyyriti re-wahinyreri. Ruxetòena, ywina-wana adeereny kanakemy idi watxireri. Deuxu-ribi dori ratxireri, ihetxiu rare, tule tiemy rarekre. Tii dori ruxetòena adee riwahinykre, tule iry-nana tyytyby riwahinyke, debò inatxi reurò mahãdu wahe. ⁵ Jesuisi Kristu tule adee kia riwahinykre. Tii tahe inatyhyna ijyydu rare. Tii juhUU rubu-ribi ixixadu rare. Tii ibutu iòlò dinodu heka tii rare. Tii inyluure. Inyòraru iny-ribi tii riwatarenyre tahãlubu òraru-ki. ⁶ Tii Xiwe wahidÿÿdu mahãduõ ixidee riwinyre, inyboho wahe. Ibutumy ityhy-dÿÿdu heka xiwe wahidÿÿdu mahãdu wese rare, iòlò mahãdu wese wahe. Deuxu rekeàlàmyhÿke. Ibutumy wowydyna, ruru-wana heka Jesuisi Kristu-ò rawahidÿÿmy rarekre ihyy hyymy. Kie ⁷ Beteheke, tii biuwetykywo-ki naderi. Ibutumy iny tuu robikre. Irubudÿÿdu tule tuu robikre. Ibutumy iny rahinykre, robukre iòraru-ki. Inatyhy rare. Kie.

⁸ Jiarÿ AA rare YY rare. JuhUU ludu rare, tule ikonana ludu rare. Deuxu jiarÿ rare ibutu ruru wahòrò rare. Aõu aõu jiarÿ watxiwãhãre.

⁹ Jiarÿ Joaõ rare, aityhydÿÿdu seriòre wahe. Jiarÿ tule awese aõhebo ratÿÿnyre. Jesuisi Iòlòna òraru-ki. Patmos bedebute-ki jiarÿ ratxire, ròtena wese heka tai ratxire. Jesuisi inatyhyna dori retÿnynyre. ¹⁰ NobiuTxuõ heka jiarÿ aõma Deuxu Tyytybytyhy wadee dobehede. Iu tahe ry-beõ-ò raholare, juròna wodÿÿ wese heka rare. ¹¹ Tahe wadee rarybere: —Biritinyke aõma ibutumy aõbo kai bobikre. Ibutumy dohodÿÿna mahãdu-ò kia tyyriti biwahinyke. Ka tyyriti tahe biteònyke heka debò inatxi reurò hãwã-ò: Efesu hãwã-ò, Esmirna hãwã-ò, Pergamo hãwã-ò, Txiatira

hãwã-ò, Sardesi hãwã-ò, Filadelfia hãwã-ò, Laodisia hãwã-ò. ¹² Retehera wahewo-ò mobo wadee rarybereò. Tahe debò inatxi reurò loosòna mynynalemy rabira, womati tÿrÿrÿÿle wahe. ¹³ Itya-ki tahe hãbuò wese rare. Ityky urarehe heka ratxire. Iwereysana heka womati tÿrÿrÿÿÿ heka rare wyò wòtena-ki roire. ¹⁴ Irade iurahakÿ ratximyhÿre. Iruè heka heòty wese rare. ¹⁵ Iwa tahe bronze womati wese rare. Irybe wodÿÿ heka bee ijiranahakÿ wese heka rare. ¹⁶ Iruruwe-ribi debò-ki heka taina debò inatxi reurò sòwe rimyre. Irybe mayrehe wiòtxu wese iry-ribi ròhònymyhÿre. Iòsÿny tahe txu tòtee wese heka rare, itÿnytyhyre. ¹⁷ Kia ibutumy rabireu, jiarÿ resera bede-ò rubu wesemy. Tii ruruwe-ribi debò watyre-ki ritidire, rarybere: —Buberuòtyhy! Jiarÿ juhuludu rare, ihewoludu rare. ¹⁸ Jiarÿ rurure, iribi tahe rexixare rubu-ribi, aõu aõu tahe jiarÿ watxireri. Tiu aruruòtyhy. Rububede dinodu heka jiarÿ watxireri, ityre waruru rare. ¹⁹ Biritinyke ibutumy tuu tabita wiji. Tule aõbo idi kanakemy biritinyke. ²⁰ Adeè aritÿnykye aõbo kia ibutumy rare. Debò inatxi reurò taina heka wadebò-ki rare. Kia taina heka dohodÿÿna mahãdu ÿju wese rare. Loosòna mynyna heka dohodÿÿna mahãdu wese rare.

2

¹ Kia heka biritinyke Efesu dohodÿÿna ÿju-ò: —Kaa heka inyò rybe rare. Tii taina debò inatxi reurò rimymy idi rÿimyhÿ iruruwe-ribi debò wahe. Tii loosòna mynyna yky-ki rari- areri. Kia womati tÿrÿrÿÿÿÿkÿ-di relere wahe. ² Aaõmysÿdÿÿna wiwihikÿ reeryre, awoxierysytere tule. Hãbu bina tiu aitx- erenaõna toite. Inyò Deuxu deòdumy iximy uritere rybedu, teurihitenyte. Kia iruirybe teertynyte. ³ Kaiboho tawox- ieryterenytenyte. Tule aõhòkÿmy tatÿÿnytenyte waòraru-ki, wijile tule wahe. ⁴ Kiaremy tahe sohojile wadee ibinare. Iwese juhuu waluu wesemy aõkõ wiji ahãtenyte. ⁵ Kaiboho heka atyhyna-ribi ahewo-ò taddòsetenyte. Kiaremy ta idi bex- inohòtinymy bexirãhÿbenyke. Iwese juhuu atximahãte wese, ixityre boibekemy. Kiamy aõkõkeki, aloosòna mynyna ay-ribi aritakre. ⁶ Kiaremy ta akireny sohojile awire wadee. Kaiboho heka Nikolaita mahãdu iaõaõna widÿÿ derarenyre wawe- semy. ⁷ Iny rybeò ijohona mahãdu boholabenyke Deuxu Tyytybytyhy rybe-ò timybo Ityhydÿÿdu mahãdu-ò rarybe- myhÿre: —Inyò òraruna ijesu ritakeki, tamy jiarÿ umytuedeõna ariwahinykre. Kia tahe Deuxu bederaty ritokre, Deuxu oworu-ki rÿimyhÿre wahe. Kia bederaraty inyru wahidÿÿdu rare.

⁸ Kia heka biritinyke Esmirna dohodÿÿna ÿju-ò: —Kia heka Juhuuludu rybe rare, ihewoludu rybe rare. Tii rururibile

rexixare. ⁹ Aõhõkỹmy dỹỹnana reerymyhỹre. Uriterenodu wesemy toite. Ihãre tahe aõna aõnawiwi ahõrõreny rare. Aõludu mahãdu umy rarybereri ibinamy. Tiiboho Satanasi mahãdu roire. Judeu mahãdu aõkõ roire tiiboho tuu rarybrehãre. ¹⁰ Buberuõtyhy kaiboho! Aõhõkỹmy dỹỹnanaõ kanakre debò wiò txumy wahe. Tahe buberuõtyhyke. Rõtenawo-ki boibenykre. Burubenyke hãrele heka õbitimy biwatyhynybenyke. Iribi tahe irudỹỹna rataana adee ariwahinykre. ¹¹ Kaiboho nohõti-di mahãdu, boholake timybo Deuxu Tyytybytyhy heka ityhydỹỹdu mahãdu-ò rarybemyhỹre.

¹² Kia heka biritinyke Pergamo dohodỹỹna ýju-ò: —Kia inyõ rybe rare. Tii mayrehe wiòtxuree dire:

¹³ —Jiarỹ reeryre asỹ, ahãwã wahe. Kaiboho Satanasisỹ-ki tasỹnyteri, irynana rareri wahe. Tahe Kaiboho aityhy-dỹỹna teriõtenynte. Tai tiiboho warybedu Antipasi õbiti rirubunyhãrele.

¹⁴ Ihãre tahe akireny sohojile wadee ibinare. Ayreny-ki inyõ Balaaõ erydỹỹna rityhynyre. Tii ihetxiu Balake õraruna-txi aatysydỹỹmy ribedeerydỹỹnyre resedỹỹkemy. Tii Israeli mahãdu-ò rarybere:

—Xiwena aõma ide tahe birõbenyke tule òta tahe urihimyò tahe ibinare.

¹⁵ Tule ayreny-ki tahe Niolaita tohodỹỹna ijõreny rityhynyre, timybo rexiõrarunanykemy. Kia ibinare wadee. ¹⁶ Tai marybeke tiiboho rexirahĩkemy idi iribi rexixãwidỹỹnykemy. Tukõkeki, anakre warymayrehe wiòtxuree-di iõludumy areakre wou-ki. ¹⁷ Iny nohõti-di mahãdu, boholake Deuxu Tyytybytyhy rybe-ò timybo Ityhydỹỹdu mahãdu-ò rarybemyhỹre: —Inyõ õraruna ijesu ritakeki, tamy biu-ribi rỹsỹna rỹikre. Manauratyre-ki heka nii tỹmyra raritimy roire. Õmo nii rieryõre. Tunidukrele rieryre.

¹⁸ Kia heka biritinyke Txiatira dohodỹỹna ýju-ò: —Kaa heka Deuxu Riõre Rybe rare. Iruue heka heòty wese rare. Iwa bronze womati wese rare. ¹⁹ Aaõmysỹdỹỹna reeryreri, luuna, ywina, tyhydỹỹna, juhUU ratyre wiji aaõmysỹdỹỹna. ²⁰ Kiaremy tahe sohojile wadee ibinare: Kaiboho heka Jezabel teijemahãtenynte. Kia hãwyy dori Deuxumy rybedu ixi-di rare. Ihãre tahe òtaõtamy, xiwe rỹsỹmy rotohodỹỹmyhỹre, ritxoo hõrõ wahe. ²¹ Jiarỹ tule txiò reijere òtaòta-ribi ixãwikemy. Tahe tuuõhyyre. ²² Idi herina-ò arilidikre ihãbu mahãdu-wana. Tai aõhõkỹmy rotỹỹnyrenykre. Tiiboho kia rexirãhĩnyõrenykeki, tuu ele elemy ariwinykre. ²³ Iriõre bina arirubunykre. Tai ibutumy aõwidỹỹnamyna ityhydỹỹdu mahãdu riwaerykremy. Jiarỹ heka inywo erydu dori rare.

Kiaremtya iny sohoji sohoji ariòwinykre. ²⁴ Ayreny-ki tahe inyõ rÿire. Tiiboho bedeeryna bina rityhynyrenyõre. Tii-boho bedeeryna bina rieryõhyyre. Txioinihe, bede ywina sira aõkõ adeereny ariwahinykre. ²⁵ Iwese kaiboho tetyhynyte wese wiji bityhynybenyhyyke. Ele ele dori arehemynykre. ²⁶⁻²⁸ Kaiboho heka òraruna ijesu bitakeki, adeereny ruru ariwahinykre. Kaiboho ihyymy wadeewimy biwinybenykeki, bede bede dinodu mahãdumy boibebenyke, iwese ruru Waha-ribi remyra wese wahe. Tamywikeki womati òhòte-di bede bede mahãdu rihukre, iwese butxi ribòhònryre wese wahe. Tule adeereny ariwahinykre aõma biurasò taina wahe. ²⁹ Iny nohòti-di mahãdu, boholake Deuxu Tyytybytyhy rybe-ò, timybo tii ityhydÿÿdu mahãdu-ò rarybemyhÿre.

3

¹ Kia heka biritinyke Sardesi dohodÿÿna ÿju-ò: —Deuxu Tyytybytyhy debò inatxi reurò dinodu, taina debò inatxi reurò dinodu kia rybe rare: —Aõhebo tatÿÿnymahãtenyte reerymyhÿre. Arumy anireny ratÿÿnymyhÿre ihãre tahe tarumy ahãtenyte. ² Bexirawahatebenyke ainatyhydÿÿna-ki, urikõ-ribi kiemy ixãwiheny. Deuxuko-ki awityhymy aõkõ ixi-di texiemyhÿtenyte. Kia reerymyhÿre aõmysÿdÿÿnareny tewinymahãte. ³ Inatyhyna juhu taholatenytedi, bexinohòtinybenyke. Idi bityhynybenyke aõnanabina-ribi bexirãhike. Tukõkreki wasidu wese ierykõmy adeereny anakre. ⁴ Ihãre tahe Sardesi hãwã-ki inyõ rexinymy òbitimy rarekremy ihÿre. Tiiboho wahe-ki tyky lyra urahakÿ-di kanariarenkyre kiemy dori òbitimy reximyrenyrene. ⁵ Mobo ròtarenkyre, tyurahakÿ-di rexitynyrenyrene. Inireny Rutyryiti-ribi aritaõtyhy. Idi Wahakõ-ò wahòròrenymy aritÿnykre tule iÿjuko-ki. ⁶ Kaiboho nohòti-di mahãdu, boholake timybo Deuxu Tyytybytyhy heka, ityhydÿÿdu mahãdu-ò rarybemyhÿre.

⁷ Kia heka Filadelfia dohodÿÿna ÿju-ò biritinyke: —Kaheka inatyhymy Deuxu deòdÿÿna rybe rare, òbitimy nodu wahe. Tii Davi ijò rayna dinodu rare. Tii ijò riraynykeki tiu inyõ riratòbònyõtyhy. Tii riratòbònykeki tiu iny riraynyõtyhy. ⁸ Aõhebo tatÿÿnymahãtenyte reeryre. Akyhynakõmy atximahãtenytemy rieryre warybe dori tetyhynymyhÿtenyte. Tai ijò adeereny reraynyra. Tii inyõ riratòbònyõtyhy. ⁹ Bodoholabenykre. Satanasi mahãdu heka Judeumy rexininimyhÿre tukõdu hãrele. Idi adidydenykre akoreny-ò tatiowotimy kedeseke. Iu alu-urenymy riwaeryrenyrene. ¹⁰ Aõhòkÿmy dÿÿnana kanake ibutumy iny urihidÿÿmy. Kaiboho warybe tetyhynyta, ywina-di tetyhynyta. Tai ilau arayrubunyrenyrene. ¹¹ Ele elemy dori

adehemynykre. Ahõrõreny biyrubunyke inyõ aribi rawasiny-heny arudỹỹna rataana wahe. ¹² Oraruna ijesu inyõ ritakeki. Tii ixbyby rubumy ruruõkre. Tii Deuxu heto-ki rasỹnyihyykre. Deuxuni ityre raritinykre tule Kristuni tỹmyra wahe. Jerusalëni tỹmyra tule ityre raritidỹỹmy rỹikre, biu-ribi dobehede wahe. ¹³ –Iny nohõti-di mahãdu, boholake Deuxu Tyytybytyhy rybe-ò timybo ityhydỹỹdu mahãdu-ò rarybemyhỹre.

¹⁴ Laodisia hãwã dohodỹỹna mahãdu yju-ò heka biritinyke: –Kie rybe kaa rare. Tii inatyhyna inatyhy rybe rare. Tii Deuxu-wana bedede relereu, ratximyhỹ. ¹⁵ Aõhebo tatỹỹnymyhỹtenyte ibutumy reeryre. Ainatyhyna-ki inatyhymy aõkõ, txiõlemy aõkõ toite tule. ¹⁶ Tai tahe iõraru-ki ixi-ribi aratarenykremy rexinohõtinyre. ¹⁷ Kaiboho tarybetenyte: –Waaõwiwi-di roire. Awityhymy watzirenyreri. Wadeereny aõ rasiranyõhyreri. Idi urile texibõnytenyteri. Kaiboho dori abina, iaõkõ mahãdu, adehekỹ, aruety toite. ¹⁸ Kia aratohonykre: –Waribi womati tỹrỹrỹhỹkỹ aworibityhy biõbranykre, aityhynamy wiwihikỹ. Tasỹse tyyurahakỹ tule, ade wõtenamy. Tasỹse rueluahina tule, arue ywinamy. ¹⁹ Waluuna mahãdu òhõte-di aribedeerynymyhỹre warybemy tule. Tahe eryrewemy aõsusu-ribi bexitabenykre wadee. ²⁰ Bodoholabenyke. Ijõ-ki rarymy watzireri. Inyõ roholakeki ihetowo-ò aralokre. Tai tii-wana ariroxikre. ²¹ Òraruna ijesu inyõ ritakeki, tii wawana waryna-txi ronykre iwese jiarỹ waha-wana nadonymyhỹde wese. Rõtare dori wawouna-ki. ²² Iny nohõti-di mahãdu, boholake Deuxu Tyytybytyhy rybe-ò, timybo tii ityhydỹỹdu mahãdu-ò rarybemyhỹre.

4

¹ Iribi tahe biu-ki ijõmy rabira rasina wese. Rybeõ raholare, jurõnajurõ wesemy. Iwese wadee rarybere wese. Kiamy narybede: –Mana òwõnyke, aõhebo itxõmo rahudi rotỹỹnykre ini ariteòsinykre. ² Iule tahe Deuxu Tyytybytyhy riwamyre. Iu, inyõ ryanamy rabira biu-ki. ³ Iòsỹny heka roosõnymyhỹre womatiwihikỹ rỹsỹ wese, Jaspe wesenana, Sadonio wese. Uwajiõ witzira tỹre heka rare iryna rirurawonyre. ⁴ Tahe 24 ryna iryna rirurawonyre. Ityre tahe 24my wedu mahãdu ronyre tyyurahakỹ-di. Irati-ki womati tỹrỹrỹhỹkỹ-di rarataanany. ⁵ Biudelaa, biumyta, irynana-ribi dohonyde. Heòtyloo heka debo inatxi reurõmy sõwe iko-ki rỹire. Kia heka Deuxu Tyytybytyhy tuu sõwedu rare. ⁶ Tule iko-ki mana aho roire iuramy raurananyre. Iru-rawona-ki wiõwiõ-ki aõni inaubiõwa rãire, irue sõwe ihewo-ki,

iko-ki. ⁷ Aõni delena heka hãlðehékỹ wese rare. Ijõ heka karõtihikỹ wese rare. Ijõ tahe hãbu òsỹny wese rare. Ikonanareny tahe nawiihikỹ dowòmý nade wese rare. ⁸ Ibutumy tiiboho debò sohoji reuròmý tesõwereny. Ta tiiboho tetya wirawyò rawyò irue dire. Tahe tiiboho rexielehynyðhyylemy txumy rummy rawiunymyhỹ: —Òbitityhy tate, Òbitityhy tate, Òbitityhy tate Inynyrỹ Deuxu rurutere. Kai tate, tule kai mabekre. ⁹ Kia heka inaubiòwa boho rawiunyre: —Wowydyna, àlàna-wana rynana-ki rỹdu-ò, iki kiemy nodu-ò wahe. ¹⁰ Iu tahe 24 wedu mahãdu heka tatiowotimý taòsỹny sutxi ritidimý riwowodynymyhỹreny resemý iko-ò. Tamy tarataana-di rehumy raryberenyre. ¹¹ —Wadinodureny, waDeuxureny adee sohojile heka wowodyna, loosòna, àlàna rawahike. Ibutumy dori aõna aõna tewinyte. Adeewimý rỹimyhỹre idi rariamymyhỹreny.

5

¹ Ryna-ki rỹdu ruruna debò-ki heka tyyriti werywery wesemy rabira. Tyyriti tahe wirawyò rawyò-ki iriti dire, tii debò inatxi reurò iratòbòna sòwe. ² Ýju ruru ruruhukỹ-my ryrymy dỹrxi-di: —Mobo ityhykre tyyriti ratòbòna aresydỹdúkre iraydỹ-ki tule. ³ Tai tahe inyõ ijõhyre: —Biu-ki, bede-ki, surawo-ki ijoõhyre. ⁴ Inyõ ityhyõre iraydỹ-ki tamy itxere-ki. Iòraru-ki ta urile jiarỹ rahinymyhỹre. ⁵ Iule tahe matuariõ wadee narybede: —Hiõmyke, betehe ta inihe Juda mahãdu hãlðehékỹ-ò, Iòlò Davi iriõre riõre wahe. Tii dori tyyriti ratòbòna riorokre idi riraynykre, tii sohojile dori wou-ribi ròtare. ⁶ Kiamy tahe rabira, Budoeni Riõre wahe. Tii rynana ubey-ki rỹimyhỹ. Aõni inaubiòwa ijõre. Tiiboho-wana tahe matuari mahãdu rỹire. Budoeni rurure wesemy rỹire. Iò tahe debò inatxi reurò rare. Irue tahe tule. Kia rare Deuxu Tyytybyõ rare, tii bede bedemy nodu mahãdu. ⁷ Budoeni riõre tahe rynana-ki rỹdu ruru debò-ribi ditade, aõma tyyriti wahe. ⁸ Iule ta aõni inaubiòwa, 24 matuari boho-wana tatiowotimý rejújure buddeni riõreko-ò. Tii sohoji sohoji wiuna-di, womati tỹrỹrỹhỹkỹ hyna-di ratximyhỹreny. Sohoji sohojiro-ki tahe òwòrusò wydysilỹnywi-di wese rare. Kia Deuxu tyhydỹdu mahãdu ixitòedỹna violão wese tule ratximyhỹreny. ⁹ Tiiboho wiutỹmyramy rawiunymyhỹrenyre kamy wahe:

—Kai atyhy tate Tyyriti raydỹ-ò, iratòbòna eresydu tule. Arubumy heka Deuxu-ò Ixỹju ixỹju teõbranyte. Irybe wixira wixira, ibede wixira wixira iixỹjuna tule.

¹⁰ Iòlòmý tewasynytenyte Deuxu dee tule xiwena wahidỹny mahãdu wahe. Idi hãwã hãwã ariwedunyrenykremý. ¹¹ Ýju sòwetyhymý rabira rynana werora-ki, aõniboho matuariboho

tule. Miliaõ hõkỹmy rasõwerynyre. ¹² Tiiboho rirajuahakỹmy rawiunymyhỹrenyre: —Wowydyna, ruruna, deysana, àlàna, loosõna tamy sohojile rawahinyrenyke buddeni riõre-ò. Tii dori rurure ityhymy ¹³ Tai tahe ibutumy biu iròdu iròdu, suityre iròdu, bera iròdu iròdu ibutumy aõna tule rawiunymyhỹrenyre rynana-ki rỹdu-ò. Budoeni riõre-ò tule kia rawiunymyhỹre. Rarehykyle, rarehykyle heka rarekre. Kie. ¹⁴ Aõni inaubiõwa rirawyõnyre: —Kie, Matuari 24 tahe reserenyre iko, kiemy noduko-ò.

6

¹ Tahe Budoeni riõre heka tyyriti ratòbõnaõ riòrõre. Kiamy rabire. Tule aõni inaubiõwa mahãdu-ò narybede rybenihikỹmy biumyta wodỹỹ wese. Mana ini itxeremy. ² Tai retehere awaru urahakỹmy rabire. Tairỹdu iwaxiwahate dire. Tamy irudỹỹna rataana riwahinyrenyre. Tahe rare wou ròtakremy.

³ Tahe ijõ ratòbõna riorore. Ijõ aõni tahe narybede inatxina wahe: —Mana ini itxeremy. ⁴ Idi awaru sòhòkỹ ròhõnyre. Inyõ ityre rỹdu-ò ruruna riwahinyre, wou ritelenykemy bededemy. Tai hãbu mahãdu wii rahukremy. Tule inyõ mayrehe ityre rỹdu-ò riwahinyre.

⁵ Tahe inataõna ratòbõna riraynyre. Ixyby inataõna aõni rybe-ò raholare: —Mana ini itxeremy. Tai retehere. Awaru lybymy rabire, ityre rỹdu urihina-di tebò-ki. ⁶ Tahe aõniy-ribi rybeõ-ò raholare: —Womati nieru sohoji-di heka urihina sohojile heka trigo rawykre, txusohoji aõmysỹdỹỹna òwy wahe. Tule inataõ urihina sevada rawykre, txusohoji aõmysỹdỹỹna òwy. Uritere ta uva-ò, adỹỹ-ò aõhe isỹdỹỹõmykre.

⁷ Tahe inaubiõwana ratòbõna riraynyre, Budoeni riõre wahe. Ixyby inataõna aõni rybe-ò raholare: —Mana ini itxeremy. ⁸ Tai retehere. Awaru bisamadòbòlỹre wesemy rabire. Ityre-ki rỹdu heka Rubu inire, heòty bededemy rubunana iheludumy. Inyõ ityre rỹdu-ò ruru riwahinyre. Tai ròhõnyre iny rirubunykremy. Inaubiõwa iny-ribi heka, sohoji rirubunykremy. Wou-ki, rama desemy, rubutyhy-di, iròdu debure-di heka iny rurure.

⁹ Tahe iruyrena ratòbõna riraynyre. Tahe Xiwena wahedỹỹna rawo-ki iny mahãdu rabire Deuxu rybe òraru-ki, tatyhydỹỹna òraru-ki rururenyre mahãdu wahe. ¹⁰ Tiiboho rirajuamyhỹre: —Deuxu Inynyrỹhỹkỹ, kai tyhy tate, òbiti tule. Tiu waxi waòwyreny bilidikre, warubudỹỹdureny-ò? ¹¹ Tahe iximynamynamy tyyurahakỹ-di rexityynyrenyre. Tahe tamyreny rarybere urihimyo rexielehynyrenykre. Ijioireny

iwesereny rurukreu riraðrenykremy. Isõwereny rexihureu wahe.

¹² Tahe debò sohoji reuròna ratòbòna riraynyre. Kiata idi suu ramytywatare inihikỹmy. Txuu urile rurunyre, ahãdu isòmý relere, halubusò wese. ¹³ Taina tahe sutxi dejujude iwese bederaty yhydebore ritxiwinyhỹre wese. ¹⁴ Biu titxibo ikõre, iwese tyyriti rarasemyhỹre wese. Ibutumy hãwãlò bedebute tule taherina-ribi ratare. ¹⁵ Iu tahe ibutumy iny rexiwore hãloohokỹwo-ò, manahakỹ hewo-ò tule. Tii roire Iòlò mahãdu, bededinodu mahãdu, soldado dinodu mahãdu, ityhy mahãdu irurutere mahãdu, ibutumy ijõ mahãdu rexiwore. ¹⁶ Tahe taixiwotena-ribi rirajuamyhỹrenyre: —Watxireny mana heka bedesede rynana-ki rỹdu lau rekexiwòrenykemy. Budoeni riòre debure lau tule. ¹⁷ Deburena txu, kyarana txu heka reare tamy, mobo riijekre.

7

¹ Idi tahe inaubiòwa ÿjumy heka tuu rabire. Tiiboho heka inaubiòwa bedehitxihitxi bedemy rỹire. Tahe rimyrenyre yhyhykỹ tebò-ki heka rimyrenyre. Tiu heka òwòru radeõ raykỹhyky roire. Bede-ki aõkõ, aho-ki aõkõ rebònyra? ²⁻³ Tule ijõmy rabire ÿjuõmy ibryra-ribi rarerimy. Deuxu irumy nonadu hãletena nihikỹ widỹỹna heka diwymy idi nade. Iribi tahe inaubiòwa ÿju-ò tii rryyre: —Txiokre in-ihe. Iwotõmodỹỹõmyke wa suu, bee, òwòru. (Kia ÿju mahãdu dori, bede, bero, wotõmodỹỹdu mahãdu ihỹre.) Biraðriòreke heka Deuxu hãletena deòdu òru-ò aritidikre. ⁴⁻⁸ Tiwesebo kia ritidỹỹna rimymy idi rare. Tahe raholare heka jiarỹ tiweserebo. Ta 144.000 iny ibutumy. Israeli ijoi waðinatxi reurò kia ijoimy heka ixidee rimyre. Sohoji sohoji ijoi-ribi 12.000 inymy heka rimyre: Juda ijoi-ribi, Gade ijoi-ribi, Asser ijoi-ribi, Naftali ijoi-ribi, Manases ijoi-ribi, Simeaõ ijoi-ribi, Levi ijoi-ribi, Issacar ijoi-ribi, Zebulõ ijoi-ribi, Jyje ijoi-ribi, Benjami ijoi-ribi, Kia ibutu ijoi-ribi heka 12000 inymy rimyre.

⁹ Iribi tahe sõwemy inymy rabire. Timy heka idi wari-ramahãduõkre. Ibutu 12.000 hãwã hãwã-ribi wirotyre. Bede ibutu rybe witxira witxira rybedu ibutu ijoi witxira wahe. Tai tahe Budoeniube-ò tiiboho rotamanyrenyre. Budoeniko-txi ryanako-txi wirotyre. Ibutumy tiiboho ityyurahakỹlemy roiremy. Horeni iru-di heka roiremyhỹ. ¹⁰ Tahe rryrenyre —irariemy rryrenyre: —Biu-ò hena waDeuxu-ribi nade rynana nihikỹ-ki ronyreri. Tule Budoeni-ribi nade. ¹¹⁻¹² Tahe ÿju ibutumy heka widotyde ryanawerora-ò, tule matuari mahãdu tule iwo-ki. Inaubiòwa aõni ibutumy reserenyre rynana nihikỹko-txi resere taõsana sutxi ritidimy Deuxu kia wowydynamy relere. Kie, myheka rarybere: —Wowydyna,

Bedeerydÿÿna, deàlana, loosona, aruru, aixiòlòdÿÿna. Ibutumy heka kia kanakre inyDeuxu-ò. Rarehykyle, rarehykyle heka rarekre. Kie. ¹³ Tahe wawiò inaubiòwa matuari mahãduò wadee rÿÿraxire: —Kai aõbo teerymahãte kia tykyurahakÿ-di ratxirenyrerìò, tule tiribibo ròirerì? ¹⁴ Tahe rarybere: —Aõkõre wanyrÿ, reerykõre. Bedelyyke wako. Tahe wako tuu delyyde. Kia heka dòhònyde heka aõhòkymy dÿÿnana-ribi dòhònyde rare. Ityky rityranre heka Budoeni riòre hãlubu-di. ¹⁵ Taiki heka rynana nihikÿko-ki ratxirenyrerì Deuxuko-ki. Kaheka ruu, txuu-wana heka rããhimy ratximyhÿrenre taheto bededÿÿnana-ki. Kia rynana-ki rÿdu tahe riyrubunyrenkre. ¹⁶ Tiu rama rirubudÿÿrenyõmy heka be-momo boho. Tiu txutòteehekÿ-wana wirisÿnyõtyhy ybòtò boho-wana, txutye boho-wana. ¹⁷ Budoeni riòre dori rynana nihikÿko-ki ratximyhÿre. Tii heka aryÿna adee riwahnymyhÿkre. Tii heka adi itxeredukre heka aradykre heka Umyituedeõna ube-ò. Deuxu irube rirubudÿÿnykre.

8

¹ Budoeni riòre debò inatxi reurò hãletenamy ribòhònyreu, aõdee biu-ki roholaõhyyre heka byy, myle roire: aõwodÿÿ wodÿÿhomy aõkõ. Wadee meia hora txumy bedemy bedewyre. ² Debò inatxi reurò ÿjumy tuu rabire Deuxuko-ki nyidemy. Tahe inyõ tamy riõremy idi retehere debò inatxi reurò ajurònamy.

³⁻⁴ Tahe iwitxira ÿju nade. Tii womati tÿrÿrÿhÿkÿ atara nihikÿ. Tahe xiwenatyre orarade rÿny wihikÿ ritoonyre. Inyõ riwahinyre ÿju-dee sõwemy. Riurinykemy Deuxu ijoi ixitòedÿÿna-wana xiwenatyre-ò risòkemy aderòna rÿnyrehekÿ heka womati tÿrÿrÿ xiwenatyre-ki ritxiwire Deuxu ryanako-txi. ÿju iribi tahe kia ibutumy raòwònyre Deuxu-ò. ⁵ Tahe heòty-di heka ÿju atara ritÿxinyra idi heòty-di rehure biu-ribi bede-ò. Tai tahe biumytxi ramytxynihikÿnyre heka suu biu tawe rihetenyre rybe wese wodÿÿ ramytatate.

⁶ Tahe debò inatxi reurò ÿjumy heka rexiywinymy rÿire ajuròna-di jurònykremy.

⁷ Juhu ÿju heka rurònyre. Iribi tahe bedejutytyhykÿ heòty hãlubu-wana raurinymy bede-ò rejuxunre. Bedejura tahe roomyhÿ asirade, bedero-wana inataõ-ribi, sohoji roomyhÿ.

⁸⁻⁹ Iribi ihewoludu txuròna-di rurònyre. Tahe berahakÿ-ò resere hãwãlò nihikÿ wesemy. Tai ibutumy heòtylawò txuramy ituere. Iyre bee tahe hãlubuhukÿlemy relere. Iyre utura tahe ituere.

¹⁰ Tahe ihewoluduhe txuròna-di rurònyre. Iribi tahe tainahakÿò berohokÿyre-txi resere berayre-txi tule. ¹¹ Tainahakÿ

heka ihyre inire. Tahe sōwemy iny ituere ihyre bee ri-urinyreki.

¹² Tahe ihewotyhy tyaludu txuròna-di rurònyre. Tahe aōwesele txutyemy txuu roosòdhyyre. Tahe ahādu tawekremy turutyhy inihe relere taina tule. Tahe bederurunytyhyre heka.

¹³ Tahe idi retehemy jiarỹ rāiwāhā. Tahe tuu rabire nawii nihikỹō ruòmý ratxireriō. Tii iryru-di heka rarybemyhỹ: —Bede heka rabinakre. Bede heka rabinakre. Suludu bede iny-ò ryrymyhỹ: —Txioinihe sōwemy aōbina binahakỹ rexiòtỹmyranykre. Tahe hewotyhyludu ýju txuròna-di kudurònykreu heka bede rabinatyhykre.

9

¹ Ijō ýju tajuròna rurònyre. Tii heka iruyre hewoludu rare. Tahe ijō inymy rabire. Biu-ribi suò taina resere wese tii resere. Tamy ijò raynaò diwahinyde, hāloo nihikỹ ratòbòna rayna wahe. Hāloo nihikỹ heka irehehekỹ rare. ² Tahe riraynyre. Wàdasi iribi tahe dòhònyde. Iwese tahe bede rurunyre wawerorareny-di. Txuu, ibutumy rurunyre wàdasi lybyhykỹ òraru-ki. ³ Tahe seihikỹlyby wese heka wàdày-ribi dòhònyde tahe desede suò. Seihe heka itytibòròhòkỹ wese heka ihe rare. ⁴ Asi rubudỹōmykre bederaradeō tule, òwòru tule. Inyò Deuxu kia ritidỹyna iòru-ki rỹiòkeki, tahe tule tamy ijira rỹikre. ⁵ Iny rubudỹmy aōkòre. Tahe iny aōhòkỹmy rotỹnykemyre heka iruyre ahādumy. Aōhòkỹmy rotỹnymyhỹre kia ihe juberereri riijererimy ihỹre. ⁶ Kia txuu tahe ixirubudỹmy reamyhỹre. Tahe aōkòre heka timyhe ixirubudỹkòmy tamyhe rubu dehemyndhyymyhỹde. Tukemy heka riwisỹnymyhỹre. Tahe aōkòre rubu iribi rahenymyhỹre. ⁷ Seihikỹ heka awaru wese rare. Iwese awaru rexiywinymy wou-ki ralòkremy rỹimyhỹre wese heka rare. Irati-ki rỹire womati tỹrỹhỹkỹle irataana wahe. Iòsana heka iny òsana wese rare. ⁸ Irade irehehekỹre hāwyy radehekỹ wesele. Txuu tahe leaò juhukỹ wesele rare. ⁹ Wyhy itxena ibreti-ki roimyhỹre. Womatile ibreti rare. Bede heka urile rawodỹnyhỹkỹmyhỹre. Iwese tewe awaru-di nodu sōwe iwodỹ rare. Iwese aōbina-ò rajaramyhỹre wodỹ wese wahe. ¹⁰ Seihikỹ heka bòròhywe nihikỹ wese heka rare. Tahe iruru-di rare. Iny riwotòmonymyhỹkemy iruyre ahādumyhỹmy. Iherona ramytxytxyre iruyre ahādumyhỹmy. ¹¹ Iiòlò heka hāloo rahejihikỹ wedu heka rare. Ini heka hebreu rybe, Abadu rare. Grego rybe heka, Apoliò heka rare. Iny rybe heka iny hàdu hàduhukỹ rare.

¹² Juhuu bedebinahakÿ ituera ròhònryra. Katahe ijò iwitxira kòdòhònkyre inatximyhÿmy wahe.

¹³ Ijò ÿju tajuròna-di rurònryre. Tii heka debò sohoji hewoludu rare. Raholare heka rybeò-ò. Womati xiwena-ò-ribi ròhònryre. Xiwena-ò heka inaubiòwa sòwe. Kia womati tÿrÿrÿ xiwena heka Deuxu ryananako rÿire. ¹⁴ Kia ÿju-ò heka rarybere ijuròna dinodu wahe: –Inaubiòwa ÿju besedÿÿnyke ixinamy ròhònkyre. Tii heka Bero nihikÿ ròtena-ki, bero Eufatesi-ki. ¹⁵ Tii heka ròtena-ki ratximyhÿre kia bededÿÿnanau, kia txuu, kia ahãduu kia beòrau. Iribi tahe riòlòdÿÿnyrenyryre. Iribi tahe ihewoludu iny ibutumy rahure. Iyreyre inataò hãwã jurajuramy heka rahure. Inataò jura-ribi sohoji sohoji rirubunyryre. ¹⁶ Tahe jiarÿ raholare tiweserebo aòbinadumy rÿire. Iny 200.000.000 inymy rÿire. ¹⁷ Tahe aòbinadumy rabira awaru tyre ronyreri. Awaru tyre ludu tahe iwyhy itxena dire. Ibutumy wako-ki rÿire. Ibutumy rabire. Womatihikÿle, heòtyhykÿwesele heka rare. Ijò heka tÿreura rare safira wese. Ijò tahe tÿre raramadòbò wesele. Awaru rati heka leaò ratihikÿ wesele rare. Heòtyle iry-ribi ròhònryreri wàdasi enxofre-wana wahe. ¹⁸ Kia heòty heka inataò jura-ribi sohoji jura iny rahure. ¹⁹ Tule awaru nohewòru heka iruru dire. Iryribile tahe iheòty ròhònryre. Taile iruru rare. Hemylala rati wese dire ruròmmy heka inatxi hemylala juwesele. ²⁰ Iny ituere sÿtybymy tahe rarònyryre. Deuxu deàlana dee heka reòbyòhyyre. Diabo mahãdu luulemy ratximyhÿrenyryre. Aõma rityhynyrenyryre womati tÿrÿrÿhÿkÿ ritxoo, òwòru ritxoo suritxoo, mana ritxoo. Kia ritxoo heka aõki robiòhyyryre, aõ roholàòhyyryre. Rariaòhyyryre. ²¹ Iòraru-ribi roxirãhiòtyhy iribi tahe rahòtinyrenyryre aò òtaòtamy, rubudÿÿnamy, wasinamy, òwòrumy. Kiale ròhòtinyryre.

10

¹ Tahe iwitxira ÿjuhukÿ rabira biu-ribi suò robehererimy. Biuwetykywesehekÿle iweroramy rÿireri. Tahe owaji wese iratikile roireri. Iòsÿny tahe txuwewehekÿle, iwaube tasÿ heòtyhykÿwesele roosòmmy. ² Tii heka tyyritinadile debò ritÿtenymy ratximyhÿ. Tahe itÿte heka deboube-ki roimyhÿre. Tahe tawaube ruruludu heka betye ritidimy idi rÿire. Tawahyweludu tasÿ ityti-ò ridemy idi rÿire. ³ Tii ryyryre heka tarurumy. Leaò iràhàkÿwesele ryyryre. Iu tii rarybereu, debò inatxi reuròmmy heka ramytxynymy dirawyònyde. ⁴ Tahe riritinyre heka aõmybo timykira raryberenyryre wahe. Tahe rybeò-ò raholare: –Kia widÿÿòmmy. Kia rybe hewa ierysyna aõkò rare ixinamy tahe tuu roike. Biritinyòke

aõmybo ramytyna rarybere? ⁵ Tahe ýju suki ratxireri, beki ratxireri ruru ludu debò biu-ò riteòsinyre: ⁶—Deuxu-ribi heka tuu raryberé, warybemy inatyhymy. Deuxu heka tiemy rarehyyle rare. Ibutumy heka riwinyre biu-ki rýira bede-ki rýira-wana. Tai heka warybe inatyhymy rare. Ararybekre heka raroorehenyõtyhy kaki. ⁷ Debò inatxi reurõna ýju tajurõna ritxurõnykreu heka, Deuxu ibutumy relemy rýikre iwese rarybere wese. ⁸ Iribi tahe rybe biu-ribi wadee nade. Wadee rarybere: —Biõryke hewa tyyritina ýjudebò-ki naderi suki bera-ki kia rýireri. ⁹ Tai tahe tamy rehemynyreri iòhòmy tyyriti tamy rexitòenyre. Tahe wadee rarybere: —Biwyke. Birýsýke. Juhuu tahe bidi wesemy ary-ò bidekre. Birýsýkreu tahe ibutumy rahyrenykre awo-ki. ¹⁰ Iribi rewyrá rerýsýra. Iwese tii juhUU rarybera wese rare. Ibreere juhUU. Iribi rerýsýreu tahe, wawe rubererenyre. ¹¹ Tahe wadee rarybere: —Kai heka dohodýýmy makre ixityre ibutumy inywitxiramy heka botohodýýkre. Ibutumy inywitxira witxira-my botoho. Ibutumy rybewitxira witxira botohomy. Ibutumy iòlòmy botohodýýkre.

11

¹ Iribi tahe inyõ wadee diwahinyde urihixinaõ. Wadee rarybere: —Biurihikesý titxibo Deuxusý rýimyhýré. Iwo tule xiwena wahidýýna biurihike. Idi mariake tiwesebo iny iwo-ki rýirémy. ² Tahe ahana-ki iube idi riraõmyke. Tii dori ityhydýýdukõdu mahãdu dee wahisidýýna rare. Tiiboho dori 42 ahãdumy idi rariakre. ³ Jiarý dori inatxi rybedu idi watxiwãhãre. Tamy ruru ariwahinykre. Tii heka saumy-tykyle rariakre. Tii heka rybe ritýnynykre beõra inataõ weeremy. ⁴ Rybedu inatxi heka bederaty òwòru inatxi wese rare. Tahe tule inatxi loosõna mynydu wese heka rare. Kia Deuxuko-txi rýire wese heka rare. ⁵ Inyõ idi ibinamy riwisýnykeki, tahe ixirubudýýmy rorukumyhýre. Heòty iryribi-hikýle ròhonyke heka iny rirubunyke. ⁶ Tii heka irurudire biu dejuxu lau riekemy. Tahe tiu biu reseõtyhy heka inataõ beõra weeremy wahe tii Deuxu rybemy rarybereriu wahe. Ihãre tahe tii rexirahòreke bero nihikýmy aho nihikýmy hãlubumy rexirahòreke. Ihãre tahe ibutudee bina riwahinyke, rubuna riwahinyke tiiboho awimy tai raharenykeki. ⁷ Kia heka inataõ beõra weere rikonananykeu, rybe týnydýýdu inatxi rikonananykeu, hãloo rehe nihikýwo-ribi aõni kòdòhònykreu, tahe aõbina nihiký-ki heka iu rýikre. Tahe inatxi rybedu rirubunykre. ⁸ Iumy rubu tahe hãwãry-ki roikre, tibo inyry rirubunyrele. Rawesenanyre, kia hãwã arininikre Sòdõma ada Egito wese. ⁹ Inataõ txuu weere riwydi hãwã ube-ki

iumy rubu roikre. Inyõ heka tiu rituunyõtyhy. Ibutu iny hãwã hãwã-ribi ibutu rybe wixira-ribi heka tamy itxeremy rehemynykre. ¹⁰ Ibutumy heka iny teysamy rÿikre urile iny widee aõna aõnamy riwahinymyhÿkre. Tiiemy inyõ raaõmysÿdÿÿõtyhy kiatxuu. Tai heka tahõti heka itxi reakre kia inatxi rybedu rurure tahõti itxi reakre. Lisini heka rÿikre, worana bedehesi. ¹¹ Kia txu inataõ txuweere-di, iumyreny iruna kòdòòsekre tamy Deuxu-ribi. Tiiboho lamamy rotamanykre. Iny rarokonykre heka ruberu nihikÿmy rÿikre heka. ¹² Inatxi rybedu-ò heka rybetereõ biu-ribi nade: —Kaiboho bòdòibedenyke kaò. Tahe biuwetyky raòwònyrenykre kia iòludu mahãdu idi retehemy rÿireri yrubule. ¹³ Kiaule tahe bede ramytatakre. Debò wiò heto jura jura-ribi heka sohoji resere. Tahe 7000 inumy rurure. Tahe iny rarokonykre tahe iuhe ruberu nihikÿmy rÿikre. Tahe wowydyna riwahinykre Deuxu biu-ki ratximyhÿreò.

¹⁴ Inatxina bede dÿÿnana bina tahe ròhònyre. Tahe ijõ kanakre.

¹⁵ Debò inatxi reurò ÿjumy heka juròna rurònyre. Tahe sòwemyhe iny rarybemy rÿimyhÿ, ryrymy rÿimyhÿ: —Kia bede dÿÿnana, iòlòna, inynyrÿ hõrõ rare. Kristu hõrõ rare. Aõu aõu tii ibutu ibutu iòlòmy ronykre. ¹⁶ Wawiò inaubiòwa matuari tahe, rynana-ki ronyrenyreri Deuxuko-txi. Tahe Deuxuko-txi reserenyre. Wowydyna tamy riwahinyrenyre:

¹⁷ —Kai Deuxu, tuu tate ihyummy, ibutururu ratyre aruru rare. Aruruteremy bonykre bede dinodumy. Umy reàlàmy kia-ò.

¹⁸ Iny heka ibutumy alau ruberumyhÿre ibutumy òludumy rÿire, adee deburemy rÿimyhÿre. Rubu hitxidÿÿna heka bede reamy heka roire. Eòdurenyle heka riòwynykre, aijoi riòwynykre, rybedu mahãdu wahe. Ibutumy ani rityhynumy rÿira, nihikÿ iyja-wana, kia bede huduhukÿ rare. Ibededÿÿnana reamy heka roire.

¹⁹ Biuwetyy riraynyre Deuxu heto. Ibutumy heka lobidÿÿna tyyriti hyna iwo-ò iny robimy rÿire. Iu tahe biumytxi, biudelaa ibutu yhynihikÿ, ibutumy bede ramytatamy rÿire, berahakÿ tule resere.

12

¹ Iribi tahe ròhònyre warasina-ki aõbo. Aõhebo bede ritÿÿnykremy, biuwetyy-ribi hãwyyõmy rabire. Txuu wese tahe itykyra. Tii lamamy rÿire ahãdu tyre. Tarati tyre-ki tahe tainahakÿ rataana idi rÿire, waòinatxi taina wahe. ² Tii heka bòtòmy ihÿmyhÿ. Ryrymy heka txubrere riijemy tabededÿÿnana-ò resera uladu reakremy. ³ Iribi tahe aõna aõna biu-ki rexisÿnymy, aõni hemylalasò nihikÿ wese wahe. Irati

tahe debò inatxi reurò sōwe iratimy. Debòwiò sōwe heka iòm̄y. Irataana heka iratimyna myna r̄ym̄yh̄ȳre. ⁴ Tii tahe tōhewòru-di taina ributunymy ridyre. Bede tyre-ki idi rehure, taina jurã. Tii hãwyyko-txi r̄ȳire. Uladu reakreule tahe uladu riròkremy. ⁵ Tahe tohouã reare, hãbumy heka reare. Tii iòlòm̄y heka ronykre, ibutu bede bede iòlòteremy wahe. Ihãre tahe Deuxu ridyre. Raòwònyre heka Deuxu rynana-ò. ⁶ Hãwyy tahe rahenyre bederahy-ò. Tii 1260 txumy heka tii bederahy-ki bede riekremy. Deuxule heka tii riywinyre.

⁷ Biu-ki heka aõbina nihik̄y r̄ȳire. Mieli, ȳju dinodu heka, tajoi-wana raaõbinanyre aõni-wana tajoi-wana. ⁸ Aõni tahe resera tajoi-wana. Ròtara. Biu-ribi ròhònykemy tahe idi ratxireri. ⁹ Riteònyre biu-ribi, aõni nihik̄y heka ròhònyra. Tii heka hemylala nihik̄y wese rare. Satanasi inire, Diabo wahe. Itxenad̄ȳȳdu heka rare ibutumy iny. Suki resera, tajoi-wana. ¹⁰ Raholare tahe biu-ribi rybeò-ò: —Deuxu tarasana heka rehemynyre. Tii taruru riteòsinyre iòlòtyhy raremy. Kristu taruru riteòsinyre. Aõbina bina rybedu tahe Deuxu-ò rarybehymy ratxireri, txu-wana, ruwana. Tii tahe ròhònyra biu-ribi. ¹¹ Waityhyd̄ȳȳdu seriòre mahãdu heka ròtara Budoeni hãlubu-di, inatyhyna hãletena-wana. Rurukemy ratxireri tiiboho tamydeewikeki. ¹² Beysabenyke biu mahãdu. Koityhyxe tahe ahohok̄y, bede-wana. Diabo dori adee rehemynyre. Tii reburere, ibeded̄ȳȳnana dori iòhòm̄y reare.

¹³ Iu hemylala aõni heka bedekile ratxirerimy rieryreu, tahe hãwyy tohouã-wana kia-ò aõhòk̄ymy rot̄ȳnykemy ris̄ȳnykemy idi ratxireri. ¹⁴ Tahe hãwyy heka nawiihik̄y-ribi idei rihuòtera, tahe idi ruòra bederahy-ò, tas̄ȳ-ò. ¹⁵ Hemylala aõni tahe bee sōwemy tary-ribi rarybexinyre hãwyy ribòròbòrd̄ȳȳkemy. ¹⁶ Tahe aõkõre. Suu tary riraynyre tahe ibutumy bee riõre. ¹⁷ Hemylala aõni tahe reburemy reare hãwyy dee. Ibutumy hãwyy ijoì mahãdu rirubunyky idi ratxireri. Kia mahãdu tahe Deuxu bede ywina rityhynyre, iwese Jesuisi tuu rit̄ȳnyre wese. ¹⁸ Tai hemylala aõni ȳnyrakile r̄ȳire.

13

¹ Iribi tahe aõnimy rabire berawo-ribi ròhònyre warasina-ki. Tii heka debò inatxi reurò iratimy tahe debò wiò iòm̄y ijòdire. Rataanaõ tahe sohoji sohoji iò-ki r̄ȳire. Irati-ki tahe nibinamy heka r̄ȳire. ² Tii heka hãlòe wesetyhymy rare. Iwa heka ursowa wesele heka rare. Iry heka hãlòery wese rare. Aõni heka tamy ruru sōwemy riwahinyre, irynana wahe. ³ Iribi heka rabire iratiõ, sohoji heka wotõmonahak̄y dire. Tahe reytereri. Ibutumy iny riòtiinyre. Aõni riheludunyre. ⁴ Aõni

hemylala heka taruru riwahinyre aõni-ò. Tai tahe ibutmy iny heka aõni riwowydynyre. Iny rarybere: —Mobo heka aõni wese rare? Mobo ijesedukre? ⁵ Aõni heka aõbina bina rarybere. Inyõ ribyrenyõtyhy. Ahãdu 42 tii heka kiawesemy rÿikre. ⁶ Tii Deuxu dee heka aõbinamy rarybere, Deuxusÿ dee, ibutumy biuludu mahãdu tule rybebina-di ribinabinadÿÿnyre. ⁷ Inyõ tamy ruru sõwemy riwahinyre Deuxu ijoi mahãdu-wana raaõbinadÿÿkemy. Tuu rahaÿnanykemy heka ibutumy iny wixira wixira, ibutumy rybe wixira mahãdu, ibutumy bede bede mahãdu. ⁸ Ibutumy iny ityhydÿÿdukõdu mahãdu tamy wowydyna riwahinyke. Budoeni Rìore ijoi mahãdu tahe aõkõre, kia dori ini rÿirenyre tyyriti-ki. Juhu bededÿÿnana inireny iwo-ki roire. ⁹ Tahe inyõ roholakeki heka, boholake. ¹⁰ Inyõ ridyke. Riròtenyke ròtenawo-ki. Ijõ tahe rirubunyke. Deuxu ijoi mahãdu tahe rexityhynykre idi òbitimy roirenyrekremy. Kie.

¹¹ Tahe ijõ aõniny rabira. Tii ròtuòreri bede-ribi. Iò heka inatxire. Budoeni wese heka rare. Ihãre tahe aõni wesele rarybere. ¹² Tii juhu aõni wese rare, iruru. Rarybere: —Juhuludu aõni biwowydynyke. Kia ratiwotomona-di. ¹³ Budoeni aõni heka aõna aõna wiwihikÿmy riwinyre. Tii heòty biu-ribi resekemy tii rotÿÿnyre. Ibutumy iny tuu ro-bire. ¹⁴ Tii ibutumy iny riitxenanyre kia aõna aõna wiwihikÿ òraruki. Iny ibutu-ò rarybere: —Suritxooõ nihikÿ biwinyke aõni dee. Tii mayrehe-di rawotõmore hãrele ruruõre. ¹⁵ Tahe ihewoludu aõni heka rabunyra suritxoo-ò tahe irumy rÿire. Idi suritxoo rarybere. Inyõ tamy wowydyna riwahinykeki, tii tahe rirubunyre. ¹⁶ Tii rarybera ibutumy iny-ò: —Kaiboho waritina bitidike aòru-txi, eboreny-txi, ruruweludu wahe. ¹⁷ Aõkõkeki tahe aõhoho aõkõ riwyke. Iny kia ritina ijõdiõkeki aõhoho aõkõ rohonykre. ¹⁸ Kai erydÿÿna sõwekekile, aõhebo tatÿÿnytemy kaiboho bierybenykre. Kai erydÿÿnadikeki, aõni heka rieryke. Ini heka iritina raròsõna wese rare 666 ihÿre.

14

¹ Idi tahe budoenimy rabire lamamy nyidemy Jerusalē hãwã-ki. Aõma Siaõ hãwãlòkile rÿiremy. Tii-wana heka rÿire 144.000 kia inymy heka tii-wana rÿire. Ibutumy tiiboho heka tybynimy, inymy heka ibutumy iòru-ki raritinymy rÿire ibutu òru-ki. Tahe tuu rabire rasinaõmy. ² Biuwodÿÿ nihikÿmy raholare, tule biuwodÿÿhÿkÿ ada benihikÿ lesetere wese iwodÿÿ rare. Tahe sõwemy iny rawiunymy rare violaõ-wana, kia wodÿÿ wesehekÿle wahe. ³ Kia heka wiu tÿmyra riryrymy ròirenyre kia iny tÿmyra rirahura mahãdu. Kia Deuxu rynana nihikÿko-txi heka rotÿÿmynyrenya. Kia inaubiõwa aõnityhy

heka waitue inaubiòwa matuarimy tahe ijõmy rÿire. Tahe 144.000 kia inyle heka rawiunykeki, awimy rÿike. Tii dori aõma tarasadumy ratximyhÿrenyre. ⁴ Tiiboho heka tyra roire, tiiboho heka òbiti roire iwese ijadòma ratxirerimy ihÿre wese òtadu mahãdu aõkõhyyre. Tahe budoeni riòrehemy heka rare titxibo tii rare hemy. Tii dori wydynamy rare. Kia hãbuy-ribi. Bede ywisidÿÿna juradÿÿna kia dinodumy heka rare. Deuxu heka Budoeni Riòre-wana wahidÿÿnamy heka roiremy. ⁵ Tiiboho heka raryberenyõtÿhy tiiboho ruidu roiremy. Òbiti heka tiiboho roire. Tiiboho heka rahitxirenyre Deuxu dee.

⁶ Tasÿ ijõmy rabire ÿjuõmy aõma biuwetyky kiako-txi raramy ruòmy rabirerimy. Tii heka Rybewihikÿ tÿmyra rimymy idi rara aõ inywitxira-ò ritÿnynykremy. Ibutu bedede inywitxira-ò ritÿnynykremy. Ibutu rybe-di ritÿnynykremy, Rybewihikÿ tÿmyra wahe. ⁷ Kiamy heka ryryre: –Deuxu bityhynyke. Marybebennyke tii awi raremy nihikÿ raremy. Bededÿÿnana rehemynymy roire ihitxidÿÿdu bedede-ò. Bityhynybenyke tii dori bedede ibutumy riwinyre bee, biu ibutumy riwinyre.

⁸ Tahe ÿjuõ heka ihewomy ruòmy ratximyhÿre. Babilonia hãwã nihikÿ rexihura. Ibutu iny dori òraruna-txi resera. Kia hãwã mahãdu dori ibutumy iòrarudÿÿnyra.

⁹ Iribi tasÿ iwitxira ÿjusÿ tamy nade iheto-ò. Tii tahe ryrymy nade: –Inyõ aõnimy ada iritxoomy rityhynykeki, iribi riwykeki iwotõmona iòru-ribi tebò-ribi riwykeki iritidÿÿna, tii tahe Deuxu ykarana heka iribi riwykre. ¹⁰⁻¹¹ Tiiboho heka aõhõkÿmy rotÿÿnyrenykre ÿjuko-txi. Budoeni Riòreko-txi aõhõkÿmy rotÿÿnyrenykre. Heòty kia bedede dÿÿnana tyhy tiemy raòwònyhyy rarakre. Tiiboho dori tiemy aõnityhy nihikÿle, iritxoo-wana rityhynymyhÿrenykeki, tiiboho heka iritidÿÿnale ixi-ki riwymyhÿrenyre. ¹² Tai tahe ibutumy iDeuxuhe ywina-di heka iwitxira iny ronykemy heka ratximyhÿre. Ibutu aõ òta ibina bina biòludunybennykemy, tiiboho dori aijoi òbitihyy boibekemy ikonana-ò. Jesuisi bityhynykemy.

¹³ Iribi tasÿ ixityre ijõ rybe-ò raholare watyre-ki. Rarybere: –Kiahe biritinyke: Aõ roorehemy aõkõ heka dehemynymy deade. Kia Jesuisi-ò rurure heka uriõno heka tamy dehemynymy deade. Iribi tahe tule rarybere: atyytyby reysamy ratxireri. Myle. Tahe rexielehynymy heka rorukumyhÿrenyre aõhõkÿmy dÿÿnana-ribi. Tii dori aõwiwihikÿle riwinyrerimy ihÿre. Reeryre heka.

¹⁴ Idi tahe iwitxiramy aõmybo rabire wiribi hitxiramy. Nonoe wetyky urahakÿle wese heka rare. Inyõ ityre-ki

ronomyhỹ. Hãbuõ wesehekỹlemy heka rare. Irataanadihikỹlemy ronymy heka tarati-ki heka idi ronymyhỹ. Womati tỹrỹrỹhỹkỹle wesehekỹle irataana rare. Tahe ijõ heka itieresynaõ-di heka tebòkihikỹle heka rỹire. ¹⁵ Ijõ heka Deuxusỹ-ribi nade, ýjuõ. Tamyhe ryryre: –Bexitỹmyranyke, itieresyna-di tasỹ bexitỹmyranykre. Bededỹỹnana rehemynomy roire adee aõ biõrõrõkemy. ¹⁶ Tahe kia nonoe wetyky tyre-ki ronyreri tahe rexidelenyre riõrõrerihe. Riwyrehe ibutumyhe aõna aõna riwyre tahe ributunyre.

¹⁷ Kia ijõ Deuxusỹ-ki ratxireri tasỹ tule debõnadimy ratximyhỹ kia tieresynadile ratxireri. ¹⁸⁻¹⁹ Kia ýju aõma heòty kia loo-di ratxireri tahe dyryde heka tieresynadile tamy rehemynykemy. Tieresynadile biorobeke idi atxibeke. Ibutumyhe bede bede kia biorobeke. Ceifale dori biorobeke. Rubumy dori rỹire hitxidỹỹna-ò. Iribi tahe reare. Tiò tiò idi reamy tahyna-ò rabutumy reare kia Deuxu ykarana-ò. ²⁰ Tai tahe bederatyhe risorunyrenyre hãwã-ribi hitximy. Sõwemy hãlubu ròhõnyre. Kia urihixina heka sohoji metro weere heka rare. Irehere heka bero wese 300 quilometros irehemy. Awarulomy heka rabeheõmy roire ibero.

15

¹ Ijõ aõna aõnamy rabire biu-ki ihewo-ribi riteòsinyreri. Debò inatxi reurõmy ýjumy heka rimyra kaa aõmysỹdỹỹna. Kidiwydenykre heka debò inatxi reurò aõhõkỹmy dỹỹnanamy. Idi tahe Deuxu ykaranamy rexikonanamyhe roikre.

² Iribi tahe bero nihikỹmy rabire wako-txi aõma heòty wese, womati tỹrỹrỹ wese. Sõwemy heka inomy rabire kia sutyre-ki nyidemy bero iòhõmy. Ibutumy heka aõni debure deburehekỹ kia rubu-ribi ritamy nyide. Iu heka aõni tai roiõhykyre heka, aritidỹỹna roiõhykyre heka. Tahe aõma aõniny rahaỹnanyrenomy ratximyhỹre iritxoomy tule violaõ oworuwodỹkỹhe tai rỹire, Deuxu rawiunyrenyreri riryryreri.

³ Moisesi Inynyrỹ deòdu wiu riryrynyreri. Tule Budoeni Riõre wiu riryrynyrenyreri. Kiamy heka rare: –Oi Deuxu, Kai heka aruru-di tate. Aõni tewinymahãte. Ibutu tarasana tewinymahãte. Ibutu heka ary òbiti rare. Awi heka rare. Kai heka ibutu iòlò tate. ⁴ Iòlòhyky tanamahãte. Tiiemy heka rityhynomy hyky hyky tanamahãte Inynyrỹbohomy. Wowydyna heka adee riwahinymahãke. Kai sohojile heka òbitityhymy atximahãte. Ibutu bede bede ludu heka anatyhynykremy kede kedeakre. Ibutumy aõbo tewinyte. Ibutumy bede òbitidỹỹnymahãte heka reryre.

⁵ Kia bedeõ heka Deuxu hetomy roimyhỹre ierykõnamy roimyhỹre. Iwòte ierykõna. Tii heka riraynyrenyre heka

kia bede. ⁶ Kia debò inatxi reurò kia ýjuhe ròhònyre Deuxu heto-ribi. Diwydehe debò inatxi reurò aòhòkýmy dýýnana. Aõma itykyrenyrene, linho urahaký itykyrenyrene. Irawo-di ibreti wereysanamy tahe womati týrýrýhýký reare. ⁷ Sohoji aõniõ aõma Deuxu ykarana hyna sohoji sohoji-ò tamy diwahinyde. ⁸ Deuxu hetowo heka aõma wadàhàkýlemy reare. Loosòna dori iruru dori sòwemy rýimyhý. Tai heka urile roosòhòkýmy ratýrýrýhýkýmy. Inyõ heka iròteõna. Debò inatxi reurò ýjumy. Kia ritxiwimy rexihudile tahe iny ralòke.

16

¹ Deuxu hetowo-ribi ijõmy raholare rybetereõ-ò. Rarybereri ýju mahãdu-ò: Boibenyke hewa abede-ò. Debò inatxi reurò hyna bitxiwibenyke kia Deuxu ykarana hynamy. Tahe ýjumy dòhònymy deade tahyna-di ditxiwide bede-ò.

² Iribi tahe rexidelenomy reare aõma juhuu ýju ihyna ritxiwire bede-ò. Ýju binahakýmy ròhònyre ibutu inymyhe robýtýmy reare. Kia aõma aõni kia ritina iòru-ki rýirele kýnyhe tuu rýximy. Tule suritxoo rityhynymyhýrele kia mahãdule heka yjy yjy ròhònyre.

³ Tahe ihewoludu heka tahyna-di dòhònymy deade. Betyre ritxiwire. Bee hãlubu hukýlemy reare. Ibutumy bera-ki raremyhýre ituere.

⁴ Juhu ludu hewoludu tahe ritxiwire berohoký tyre heka ritxiwire. Bee ibutumy bewydysyna rihòrònyre. Ibutumy hãlubu hukýlemy relere. ⁵ Tahe ýju rybe raholare aõhebo bera-ki rotýýnyrerìò: —Kai Deuxu, Kai awi tate. Kai òbiti tate. Tuhy ahãte ihãre tahe tuhy ahãte. ⁶ Rybe týnydýýdu mahãdu heka ituere, rurure. Deuxu ijoi hãlubu ritxiwire suò. Katahe rubudýýdu kaihe iòwydýýdukre. Hãlubu tetxiwiteriki tule iòwydýýdukre. ⁷ Tahe raholare ijõ ýju rarybereri-ò, Xiwena-ribi heka ròhònymy: —Kia InyDeuxu heka ibutumy ruru dire. Ibutumy tewinyte òbitimy awimy.

⁸ Tahe ihewotyhy konana ludu tahe ritxiwire hyna txu-tyre-ki. Tahe txuu ratòteenyrene itòtee nihikýmy relere. Sòwemy heka iny risòre bedetòtee. ⁹ Tai tahe rirajuamyhýre Deuxu nibinahakýmy rirajuarerimy ihýre Deuxu dori diteònyde heka bededýýnana binahaký. Tahe inyõ heka tòhòti rawitxi-ranyòhyre iraykywydyna. Kiamy ixiwesehyy ròhòtinyrenyrene. Kia iny heka aõhe rotýýnyòhyre wowydyna loosònabo.

¹⁰ Iwitxira ýju tahe aõma ritxiwire tahyna aõni ryna tyre. Kia heka aõni beludu rare. Tarynana tyre ronymyhý. Tahe ibutu irynanareny torohokýlemy reare. Ibutu iòlòna torohokýlemy reare. Tahe tòròtò-ki ruruare taaòhýkýhýkýnareny-di. ¹¹ Tiiboho heka Deuxu nibinahakýmy

ryryre webinadumy roireki taaõhỹkỹhỹkỹnareny-di. Timy heka rexinohõtilosanyõhỹmyhỹre aõbina binahakỹ riwinymy roiremyhỹ-ribi.

¹² Tahe iwitxira ýju tahyna ditxiwide. Eufratesi bero-hokỹ tyre ritxiwire. Tahe ibutumy heka ruỹre. Oriente iòlò mahãdu dee tahe ryy kia riraynyre. ¹³ Tuu rabire heka inataõ tyytyby binahakỹ. Rexitykynyre òrò tyky-hykỹ wese rexitykynyre. Aõni heka hemylala aõni inire tahe iry-ribi rexiòlòdỹỹnyrenyrene. Tule aõnibina wixirary-ribi, tule aõni rybedubina-ribi. ¹⁴ Iribi heka aõni bina tyytyby kia tyytyby ibutumy heka bede dinodu iòlò ributunyre. Raaõbinanykemy heka dirahude Deuxu kia mahãdu-ò. Deuxu ihitxidỹỹnatxumy rỹikemy heka anade tii dori ibutu ratyre aõna aõna-ki. ¹⁵ Kristu rarybere: —Tahe boholabenyke. Aõwesele heka anakre. Wasidu wesemy heka adehemynymy adeakre. Ibutumy iny wararòsòdu mahãdu teysamy rỹikre. Atyky heka biywinymahãbenyke tai timyki maixỹrubenyõtyhy adehemynykreu. ¹⁶ Kristu rarybere: —Ibutumy heka widotyde aõbinakedu Mikidu hãwã-ki wahe. Hebreu rybe-ki tahe Armagedom inire.

¹⁷ Tai tahe ikonanatyhy ýju tahyna ritxiwire yhykile. Tahe raholare biumytxihikỹ raholare Deuxusỹ-ki. Deuxu ry-nana-ribi dòhònyde: —Ibutumyhe rakonanamy roire. ¹⁸ Tahe biumytxihikỹle ibutumy rawodỹỹnyre. Tule biu relaanyra. Biu ramytataõmyhỹre idi tahe ramytatare. Tii heka lahityhy rare. ¹⁹ Tai tahe Babilonia hãwã rabòhòre inataõ jura juramyhỹmy. Ibutumy hãwã nihikỹ-ribi hetohokỹ rejuxunyre. Tai tahe kia Babilonia kia òraru-txi tahe Deuxu tòhòti reare. Tai tahe aõhòkỹmy risỹnymyhỹ ibutumy aõbede binahakỹ tamy riwahinyre. ²⁰ Bedebute ibutumy rexiwore. Iribi tahe hãwãlò tytyhykỹlemy reare bedero wesehekỹle. ²¹ Idi inytyre resemyhỹre bera ere erewesele resererimy ihỹre. Ijõ iutxie tahe 40 quilo bede heka iutxie rare. Kia tahe iny sumy rỹire nibinahakỹmy Deuxumy rarybemy.

17

¹ Tahe ýju monahyna-ki wadee rybemy nade: —Adee aritỹnynykre aõbo Hãwã Bero sòwe aõhebo rotỹỹnykré heka. Kia hãwã adee ariteòsinykre timybo rare. Wedena wese aõhòkỹmy rotỹỹnykremy. Deuxu heka aõhòkỹmy dỹỹnana riwahinyke kia hãwã-ò. ² Bede iòlò dinodu tamyhe iòraruna tamy rexiòrarunyre. Tule iny bedemy rỹira mahãdu ralòre tamy òtaòtamy. ³ Tai ta kia ýju tamy riwadyre bederahy-ò. Deuxu Tyytyby wadee dobehede? (Riwatyytamy watyytyby heka ridyre). Tai tahe tuu rabire heka hãwymy aõma iròdutyre-ki ronyrerimy. Iròdu heka isòhòkỹlemy roire. Debò

inatxi reurò irati rỹire, tahe iò debò ituemy sōwe. Iritina heka aõkõre rarỹỹnymyhỹre. Deuxudee heka aõbina binahakỹlemy tai iritidỹyna rỹimyhỹre. ⁴ Hãwyy heka isòhòkỹ ityky rare, iwihikỹ rare. Ityky tyre heka womati tỹrỹhỹkỹ roire. Mana rỹsỹ wiwihikỹ, woumana-wana. Bemona debò-ki idi rare. Iwo-ki tahe bemonawo-ki tahe aõna bina nibina tai roire. ⁵ Tai tasỹ iòru-ki tule rỹire iniõ. Aõbo rare tahe iny rieryõtyhy. Babilonia Nihikỹ rare. Ibutu wedenase tii rare. Ibutu inybinase tii rare. Kia luunadu ibutumy bede bede-ki. ⁶ Iribi tahe rabire hãwyy ixityre. Tii iny hãlubu riõre. Ityhydỹỹdu mahãdu hãlubu-di rexiòdewãriny my heka rare. Tiiboho rurure, òbitimy Jesusimy rityhynyreki wahe. Kia hãwyy my tahe rabireu, rexiòtiidỹỹnyre. ⁷ Tai tahe ýju wadee rarybera: —Aõherekibo bede teòtiiny my tỹite. Adee arelyykre aõbo rare —kia hãwyy iròdu-wana, aritỹny nykre tiiboho aõbo raré. ⁸ Iròdu tuu tabita, irumy rare tahe rurukre ele elemy. Tii hãloorehehekỹ-ribi kòdòhònykre. Iribi tahe rexihukre. Tii rurure idi ixiby dòdòsede. Bede iny mahãdu bede riòtiinykre idi heka iròdu debure binamy robirenykreu, bede riòtiinykre idi. Tiiboho dori ini ihoõre iru tyyritiwo-ki. Tai tahe iròdu deburebina lau ruberure. Iròdu dori ihetxiu irumy rare tahe wiji aõkõre. Idi tii irumy kanankre ixibylye. ⁹ Kia ibutumy adee aritỹny nykre: Debò inataõ rati tahe iròdule rare. Kia hãwyy ityre ronyre kia hãwãlò wesere. Iròdu rati tule iòlò mahãduõ rare, debò inatxi reurò sōwe. ¹⁰ Iruyire iòlòõ tahe reserenyire. Sohoji iòlò tahe ratximyhỹre. Ihewotyhy ikonanaludu tahe, kanakre wijina. Tai ibededỹỹnana iòhòlere. ¹¹ Iòlò debòinataõ ludu tahe iròdu rare —kia irumy juhoo rare tahe wiji rurumy rare wahe —tii juhoo iòlò mahãduõ rare. Tii tule ituekre. ¹² Debò itue òmy tuu tabitamy wahe tule iòlò mahãdu rare. Tiiboho kanakre iòlòwesemy. Iròdu-wana tiiboho hãwã wedumy ronyrenykre iròdu aõni-wana sohoji horamy. Tii tyytyby bina rare. ¹³ Tyyritiõ riwinykre idi tahe ibutumy ruruna iròdu bina-ò riwahinykre. ¹⁴ Raaõbinanyrenykre my heka Budoeni Riòre-wana. Tahe Budoeni Riòre aõbina-ki haỹnadukre. Tahe ýju wadee rarybere: —Tii dori butu iòlò, ibutu iòlòna ratximyhỹre. Ibutu inynyryỹ ratximyhỹre. Ijoi heka kia ywimy tii-wana roire itarasaõ-ki. Kia rityhynykre my rỹirerimy ihỹre. ¹⁵ Tahe kia ahohokỹ, berohokỹ tai kia hãwyy ronymyhỹré. Tiiboho iny rare ibutu rybe-ribi, bede-ribi wahe. ¹⁶ Debòwiò òmy tuu tabita iròdu-wana heka hãwyy derarenyire. Tii irurawonykre. Tii heka heòty-ò risõmy, riròrenykre wiò wiò. Ityky iribi ritara idi. ¹⁷ Ibutumy inywese rare. Bede bede iny ibutumy rybe òta òta rarybemyhỹre. Tahe Deuxu heka riwahinyre aõbo ixideewimy riwinykre my. Tai tahe aõwaxiny

aõ tamywi heka riwinykre. Tai tahe ibutumy iròdu sòhòkỹ taru riwahinykre, Deuxu Rybemyna bede rỹidi. ¹⁸ Hãwãhãkỹ nihikỹ tabite heka wedena wesemy roire. Kia Hãwãhãkỹ heka ibutu wedu iòlò rare.

18

¹ Tai tahe ijõmy rabire ÿjumy rabire biu-ribi ròhònyreri. Tii sõwemy iruru rare. Tii sõwemy iloosòna rare. Ibutumy bede ritoosònyre. ²⁻³ Ta rryre tarurumy tii rryre: —Babilonia nihikỹ resera! Resera! Katahe aõma wedumy, bede bede iòlò heka tii-wana òta riwinyre. Ibutu iny-ò tamona riwahinyre iòtaòta boho boho. Nawii wixira wixira ibinahakỹ tai rasỹnymyhỹre, tyytybybina-wana. Ijohodu mahãdu idi nieru sõwemy ributunyre. Idi rexityhynyre.

⁴ Iribi tahe raholare ixityre rybeõ biu-ribi rarerí. Manake hewa, Bòdòhònyke wa kia hãwyy-ribi. Kai heka wajioi toite. Tii-wana bexiòrarunybenykemy aõkõ! Bexiòrarunybenykeki tii-wana, tai tii-wana aõhòkỹmy botỹỹnykre. ⁵ Tii heka iòraru sõwe nihikỹmy ratximyhỹre. Deuxu heka aõhòkỹmy dỹỹnana tamy riywinymy ratximyhỹre iòraru-ki. ⁶ Biwinymyhỹre heka iwese tii riwinymyhỹre wese. Aõ ibinamy ibinatyhymy tamy relekre. ⁷ Aõ ibinamy ròhònyke inatxi bededỹỹnanamy tamy ròhònykre. Ibutumy aõbo tamywimy idi raremyhỹ heka riwinymyhỹ ixideewimy. Katahe iwese aõhòkỹmy rotỹỹnykre tahe rabadewokre. Hãwyy tahe ixidee rarybere: —Jikarỹ ikòlò rare. Wytese anokõ jikarỹ rare. Tiku heka rabadewokõtyhy anohòkỹmy ratykỹnykõtyhy. ⁸ Tai taheka aõwesele heka tamy bedeòtiidỹỹdu kedehemynymy bedekre: rubu, aõdese, rama uritereribile tamy kedehemynykre. Heòty ibutumy ritoonykre. Deuxu urihixina-di dehudu ratximyhỹre. Tii ruru-di ratximyhỹre. ⁹ Kia bede dinodu mahãdu rahinykre itòenamy. Tii-wana dori òta òta riwinyrenyra. Tiiboho robikre wàdà iribi ròhònyreriò wahe. ¹⁰ Irehemy iribi rỹire. Ruberureri iaõhòkỹmy dỹỹnana lau. Tahe raryberenyre: —Babilonia hãwã, kai hãwã nihikỹ rare. Tahe wiji ituera atximahãte. Kobelãhãxe. ¹¹ Ibutumy aõna-ribi ijohodu rahinykre itòenamy. Inyõ dorihe iaõ tamy riwydyõmy tamy ijohonamy aõkõ. ¹² Juhuu heka raaõbradỹỹmy aõma iny mahãdu ratyre. Womati tỹrỹrỹ riòbranyõre. Tule woumana riwyrerimy ihỹre juhuu. Tykysìdòwihikỹ wixira wixira heka riwyrerimy ihỹre. Tule òwòrulỹnyre, iròdu nohõmy riwinyrerimy ihỹre. Bede ritxoo ibutumy aõna iòwyhykỹre. Womati òta òta wiwihikỹ riwyrerimy ihỹre. ¹³ Aõma rỹsỹna uri wiwihikỹ tule aderòna wiwihikỹ, tule vỹi riwyre, paõ widỹỹna, adỹỹ-wana riwyrerimy ihỹre. Tule maixõmo, broreni, budoeni, awaru,

tewe, ityti heòty, tule iny deòdu iòwydimy. ¹⁴ Tahe ijohodu mahādu rarybere hāwā-ò: –Ibutumy aōna aōna wiwihikŷ ituera, kia kaiboho riwyrerimy ihŷre. Tiu ixityre aōna aōna riwyòtyhy, ixāwira. ¹⁵ Tahe aōna-di ijohodu mahādu rabe-dewokre, rahinykre tiiboho dori iòraru-ki raityhynyrenyrene. Irehe-ribi retehere. Ruberurenyre. Ryryreri: ¹⁶ –Kobelāhàxe hāwā wihikŷ. Ibutumy atykysò ituera, awomati wiwihikŷ ituera, woumana, manawiwihikŷ ibutumy ixāwire. ¹⁷ Sohoji òraule ibutumy iaōna aōna ixāwira. Ibutumy hāwòhòkŷ din-odu urile, iwiòhenadŷŷdu mahādu tule suludu mahādu retehereri irehe-ribi. Tii dori nieru ritamyhŷre iaōna-di. ¹⁸ Iu hāwā wādàsima robirenyreu tahe, ryryre: –Kia hāwā wihikŷ rare. Ijò hāwā iwese ihoòhyyre. ¹⁹ Tahe brybysi ityreneny rehurerimy ihŷre. Rahinyreri, ryryreri: –Bobrekŷ, bobrekŷ hāwā wihikŷ. Aōwesele heka ixāwira. Ibutumy ityhy mahādu, iaōna rexihura. ²⁰ Tahe kaiboho beysabenyke biu ludu mahādu. Hāwā nihikŷ dori ituera. Deuxu hōrò mahādu, Deuxu deòdŷŷna mahādu, Deuxu dee rybedu mahādu ibutumy beysabenyke. Deuxu dori iaòhòkŷmy dŷŷnana tamy riwahinyre aòrauru-ki.

²¹ Tahe ŷju nihikŷ heka manaò rimyre, mana nihikŷò, iwese maixòmosyna mana wese wahe. Idi rehure ahobero-ki rehure. Tahe ryryre: Kiawese heka Babilonia hāwā-di arehukemy watzireri waruru-di. Ixāwikre. ²² Tahe wiu wodŷŷ kia hāwā-ki roholaòtyhyke, harpa wodŷŷ aòkò, flauta wodŷŷ aòkò, juròna wodŷŷ aòkò. Aaòmŷŷdŷŷdu aòkò kia hāwā-ki raaòmŷŷdŷŷòtyhy. Mai rŷŷna, manasyne iny heka iwodŷŷ roholaòtyhy. ²³ Loosòna ay-ki ritoosònyòtyhy. Herina mahādu rybe ay-ki iny roholaòtyhy. Iaōna ijohodu mahādu ibutu hāwā-ribi ityhy rare. Tule ibutumy iny riitxenanyre aòtaòta-di, bede bede iny wahe. ²⁴ Babilonia hāwā heka aòhòkŷmy dŷŷnana rotŷŷnyre. Deuxu rybedu mahādu hālubu dori kai tetata tule Deuxu hōrò mahādu. Rirubunyrene mahādu wahe.

19

¹ Iribi tahe ijoi nihikŷmy roholare. Ryrymy heka rŷimyhŷ sòwemy iny rŷimyhŷ biu-ki. Deuxu deysanamy heka ryryreri: –Wowydynamy Inynyrŷ-ò. Tarasana dori inyDeuxu-ribi rare. Wowydyna, ruruna ibutumy ihōròle rare. Aòbo tii riwinyré, òbiti rare. ² Aòhòkŷmy dŷŷnana òbiti rare. Aòhòkŷmy rotŷŷnyre heka kia aderana-ki heka rare. Tii aòhòkŷmy dŷŷnana ritare. Bede iny heka riòrarudŷŷnyre. Tahe Deuxu riòwynyrene teòdu rubudŷŷna heka riòwynyrene. ³ Ixityre ijoi ryrynyrene, rawiunyrene: –Wowydyna Inynyrŷ-ò. Wādà

raòwònyreri tai rawòsi-ribi. Ihyemy raòwònykre, hãwã nihikỹ-ribi wahe. ⁴ Tahe ibutumy rejuxunyre Deuxu luukemy. Wawiò inaubiòwa matuari rare. Tule inaubiòwa aõni rare. Deuxu tahe rynana nihikỹ-ki ronyre. Tamy rirajuare: — Kia, Kia, wowydyna deysana Deuxu-ò. ⁵ Iribi heka ròhònyre Deuxu rynana nihikỹ-ribi heka rybeunimy ròhònyre: — Biwowydynybenyke Deuxu-ò ibutumy deòdu mahãdu, ibutumy iny rityhynymyhỹre mahãdu, iyja ta nihikỹ-wana. ⁶ Tahe ixityre ijoi-ò raholare. Ryrymy rỹimyhỹre. Tahe benihikỹlesetere wese heka iwodỹỹ rỹireri, biumytxi wesehekỹle heka iwodỹỹ rỹireri: —Wowydyna Inynyrỹ-ò biwahinyke. Tii iruru dire. Tii heka iòlò rare. ⁷ Ibutumy iny rekeysarenyke. Tamy wowydyna rikiwahinyrenykre. Tii dori inihikỹre. Iòhòra dori kia Budoeni Riòre kia hãwyyemy herina kia bededỹỹnana-ò. Worana bedehesi kỹnyikre. Ihãwyy heka rexiywinymy ratxireri. ⁸ Tyyurahakỹle-di rexityynykre. Awityhymy ityy doimyhỹde wahe. Deuxu dee awihikỹ widỹỹna wese heka kia ratxireri. ⁹ Kiamy heka ýju wadee rarybere: —Kia biritinyke. Ibutumy lobidỹỹna mahãdu reysamy ratxireri. Ýju wadee rarybere ijò: —Kia heka Deuxule tuu rarybere. Inatyhy rare! ¹⁰ Tahe jiarỹ resere ýjuko-txi ariwowydynykemy. Tahe tii wadee rarybere: —Kia widỹỹõmyke hewa. Jiarỹ tule Deuxu deòdule heka jiarỹ rare, awesele wahe. Aityhydỹỹdu seriòre tule awesele rare. Rarybemyhỹre dori Jesuisi tyhydỹỹnamy. Deuxule biwowydynyke! Ibutumy Jesuisi relyyre heka tuu rybedu mahãdu ritỹnyre.

¹¹ Iribi tahe tuu rabire awaruurahakỹõ biuwetyky-ki. Inyò ityre-ki ronymyhỹ. Ini heka Òbiti rare, Inatyhy rare. Tii heka aõbinanymyhỹle rare. ¹² Iruwe heka heòty wesele rare. Irati heka sòwemy raheto rỹire. Iò-ribi heka nii roire, ini wahe. Urile inyò rieryòtyhy mobo ini rare, tyyriti wixira dori tiile heka rieryre. ¹³ Ihety heka hãlubuhukỹle-di ityre rare. Deuxu Rybe heka inire, hãbu wahe. ¹⁴ Sòwemy iny heka awarutyre-ki rỹire, biu-ribi dòidenyde Deuxu Rybe hewomy, soldado wese wahe. Iny ibutumy ityyura-di rexityynyre, ityratyhy wahe. ¹⁵ Tii heka mayrehe rabuhukỹle iry-ribi ròhònyrerimy ihỹre. Idi tii heka iny rirubunykemy ibutu bede bede-ò. Iribi tahe tii ròhònyre iòlòtyhy tii rare. Aõhòkỹmy dỹỹnana tamy riwahinyre, ibinatyhymy heka riwahinyre, Deuxu iwona, Deuxu ruruwedu wahe. ¹⁶ Ihety-ki heka iti-ki rỹire iniò: Iòlò iòlò wedu tii rare, ibutu wedu wahe.

¹⁷ Iribi tahe ýjumy rabire, txu-ki rỹire. Nawii ibutu-ò ryrymyhỹ: —Bòdòibedenyke heka, Deuxu worana bedehesina-ò bòdòike rỹsỹna birỹsỹbenykemy. ¹⁸ Aõmade biròbenyke, iòlòde, soldadu wedude, iawarude, ibutumy inyde

biròbenyke, ixihy mahādu, deòdu mahādu, nihikỹ iyja-wana.

¹⁹ Iribi heka tuu rabire aõni binahakỹ, iòlò mahādu, tasoldado mahādu wana. Wii ributunyre aõbinamy. Awaru tyre-ki ronyrerimy kia mahādu-wana tiiboho raaõbinanykremy. ²⁰ Tahe aõni bina rimyrenyre, rybedu bina-wana. Teròwmy tii aõna aõna witxirawi riwinyre. Iribi ridyrenyre heka heòtyaho-txi idi rehurenkremy, enxofre-di riworonyre wahe. ²¹ Ibutumy isoldado heka ituemy rỹimyhỹre rurumy. Mayrehe-di rurumyhỹre, kia awaru ura tyre-ki ratxireri kia ryribi ròhònyreri kia-di rurure. Tahe rararesa deadeade ide riròkremy.

20

¹ Iribi tahe ýju nademy biu-ribi. Irayna heka debò-ki idi rỹire. Hāloonihikỹ rayna wahe. Tule womati rerotihikỹle iruty-ki roire. ² Kia aõni rimyre, Diabo wahe, Satanasi wahe. Inyò tule hemylala raninire. Tahe 1000 beòra riekre ritaataare womati reroti-di. ³ Idi heka rehure hāloo nihikỹ-ò tahe riratòbònyre, rirarytxynyre. Tai tahe tii riitxenanyòtyhy bede bede iny. Kia 1000 beòramy bede reakreule, tahe rexihumy iròtena. Urihimyò bededỹñana bede riijekre, ixihyyle tai ixybyle ròbòdỹñkre.

⁴ Iribi tahe rynana sòwemy rabire. Iny ityre ronyreri mahādu ywisidỹñdu mahādu heka rare. Iribi heka tuu rabire Jesuisi dee rurure mahādu. Inatyhyna rybe tỹnydỹñ òraru-ki heka rurure. Aõni rityhynyòre, iritxoo rityhynyòre, iritina òraru iòru-ki ritidiòtyhy, deboreny-ki ritidiòtyhy. Rubu-ribi tiiboho rexixarenyre. Kristu-wana ratxireri 1000 beòramy. ⁵ Kia heka juhuludu ixixana heka rare. Ijò rubu mahādu heka wiji rexixaòkre. Tahe 1000 beòramy reareu, tahe rexixarenykre. ⁶ Juhuludu ixixana mahādu heka reysatyhymy rarekre. Ixyby rubunamy heka ruruòkre, inatxina rubunamy wahe. Deuxu dee, Kristu dee heka tiiboho Xiwena wahidỹñdumy roirekre. Tii-wana 1000 beòramy riwyrenykre, iòlò mahādu wesemy heka ratxirenykre.

⁷ Kia 1000 beòra reareu heka Satanasi ixihyymy ròhònykre bedeki. ⁸ Tii itxenadỹñdumy ròhònykre ibutu iny riitxenanykremy. Kia Kòke bede, tule Makòke bede rare. Satanasi heka sòwemy iny ributunykre raaõbinanykremy. Tiiboho sòwemy ihỹre ýnyra sòwe wese. ⁹ Tiiboho tahe ibutu bede-ò rariarenykre ityhydỹñdu hāwā rirurawonyrenyre kia Deuxu hāwā Deuxudeewi wahe. Idi heòty biu-ribi isòrenymy desede. Idi wewòsimy rururenyre, Deuxu iny mahādu òludu wahe. ¹⁰ Tahe diabo iitxenadỹñdureny heka Deuxu rehure heòty

aho-ò. Tai aõnibina, ruimy rybedu-wana juhu delemy tamy reserenyre. Tai txumy rummy aõ rotỹnyrenyhykre.

¹¹ Iribi tahe ryanaurahõkỹmy rabire ityre rỹdu-wana. Suu biu-wana iribi rexitare, titxibo iõrenyre. ¹² Tahe iny rubumy rabire, iny ibutumy iko-ki rỹirenyre. Tyyriti rarayre. Ijõ tahe rarayre, irutyriti wahe. Tyyriti-ribi Deuxu iaõna aõna rierumy aõhebo risỹnykre. ¹³ Ahohokỹ-ribi tahe rubu mahãdu dõhõnyde. Rubunahakỹ bede-ribi iludu mahãdu dõhõnyde. Idi iaõna aõnamyna Deuxu timybo rexinohõtinkyremy idi rare. ¹⁴ Idi rubunahakỹ, rubuna-wana heõtyaho-txi idi adehu rỹikre. Kia ixyby rubu rare. ¹⁵ Iru ityyriti-ki inyniõ roiõkeki, tii tule heõtyaho-txi adehu rỹikre.

21

¹ Idi biu tỹmyra sutỹmyramy rabire. Juhusu juhubi titxibo ikõrenyre, ahohokỹ tule. ² Deuxu hãwã wihikỹ tỹmyra desemy nade biu-ribi. Iwese ijadõma tỹmyrawesemy ramyhỹre wese kia hãwã nade. Deuxu-ribi nade. ³ Tahe rybehekỹ biurnana rỹdu-ribi nade-ò roholare kiamy: —Kahe Deuxu sỹ heka akireny rare. Deuxu ikyreny-ki rarekre. Tii iwe-durenykre. Tiiboho Deuxu dee roirekre. ⁴ Idi Deuxu irubereny risuhokre. Tai rubu, hii, ibru, txuberere ijõõkre. Bede tyby dori rexihura. ⁵ Idi rynana-ki rỹdu narybede: —Wiji itỹmyramy ibutumy aõna aõna ariwinykre. Wadee tule narybede: —Kia bityyritinyke. Kaa rybe dori rybetyhy rare, ibutumy iny ratyhykremy. ⁶ Kia ixyby narybede: —Ibutumy relera. Jiarỹ dori AA rare YY rare Juhuludu rare ikonanaludu rare. Inyõ bemomo risakeki, tamy iõwykõlemy ariõkre, beolõnaberu-ribi wahe. ⁷ Inyõ tarasadu heka ibutumy waribi rimykre. Jiarỹ iDeuxukre. Tii wariõrekre. ⁸ Idi kamahãdu heõty aõho enxofre-ò rekoarenyre kamahãdu wahe: —Iny brebu, watyhydỹkõdu, õrarudu, maleerudu mahãdu, õta õta mahãdu, iny rubudỹỹdu mahãdu, hãri mahãdu, ritxoo tyhydỹỹdu, ruidu mahãdu. Kaboho rubunatyhy-ò rururenkykre. Kia tahe inatxina rubuna rare.

⁹ Tahe ýjuõ wadee nade, debò inatxi reurò mahãdu-ò. Tii hyna-di ryireri. Hynawo-ki tahe aõna aõnabina debò inatxi mahãdu-di. Kiamy narybede: —Mana ini, Budoeni hãwyy ini adee ariteòsinykre, hãwyy wese wahe. ¹⁰ Deuxu Tyytybytyhy wamy reare. Ýju tahe riwadyre hãwãlõnora-ò. Jerusalé hãwã tỹmyra awityhy wadee riteòsinyre. Tii biu-ribi desemy nade. ¹¹ Deuxu loosõna-di yla aõkõ. Tii tahe manawiwihikỹ wese rarỹỹnymyhỹre. Jaspe wese, womati wese mana wiwihikỹ wese rare. ¹² Tii ijõtõbõna irariere, waõinatxi reuròmy ijõtõbõna, iitxedu ýju tule. Ijõ-ki tahe waõinatxi

reuròmý Judeusý mahāduni wahe. ¹³ Inataõ ijòtòbòna sòwe, iraro-ò, ibòò, biura-ò, beà-ò. ¹⁴ Hāwā rurawona tahe waðinatxi reurò mana tyre-ki rýimyhý. Mana sohoji sohoji-ki budoeni deòdu mahāduni rýire. ¹⁵ Ýju wadee rybedu tebò-ki womati týrýrýhýký deòho-di nade idi hāwā, hāwā ijò, hāwā rurawona iurihinamy. ¹⁶ Hāwā tahe iurihina wiwesele rare. Tahe 2.200 iurihixina rimyre teòho-di tuu riwinyre. ¹⁷ Rurawona raru tahe ýju taurihixinamy riurihixinanyre idi 64my rimyre. ¹⁸ Rurawona tahe jaspe mana-di relere. Hāwā tahe womati týrýrýhýký-di relere. ¹⁹ Rurawo òraru heka mana wiwihiký-di juhumana heka jaspe rare. Inatxina safira rare. Inataõna, agata rare. Inaubiò-wana esmeralda rare. ²⁰ Iruyrena sardonio rare. Debò sohoji reuròna sardio rare. Debò inatxi reuròna trisolito rare. Debò inataõ reuròna berilo rare. Debò inaubiò-wana topazio debò ituena crisoprazo rare. Wasohoji reuròna jasinto rare. Wainatxi reuròna ametista rare. ²¹ Woumanahaký sohoji-di heka ijò sohoji sohoji relera, 12my ijò wahe. Ryy heka womati týrýrýhýkýhyky-di relera. ²² Tohodýyna heto tahe ihoòhyre. Deuxule dori tuu rare, Budoeni-wana. Tai ihoõre. ²³ Txuu ahādu-wana tai ijõõre Deuxu loosòna, budoeni loosòna dori itxuuxaranarenyre. ²⁴ Bede bede mahādu iloosòna-di rýikre. Bede bede mahādu heka taaõna aõna wiwi-di tamy kidirahukre. ²⁵ Tahe ijò raratòbòòhykre, tai dori ruu ihoòhyre. ²⁶ Bede bede iòlò mahādu heka wowydyna-di tamy kidirahukre. ²⁷ Inybina bina, iny òrarudu mahādu tamy ralòõtyhy, ruidu mahādu tule. Inyni heka Budoeni tyyriti irумы rýimyhýre mahādu sohojile wahe.

22

¹ Idi ýju wadee riteòsinyre, iru wahidýyna berohoký. Ibelyramy Deuxu rynana, Budoeni rynana-ribi òlòdu wahe. ² Ryrohoký tya-di kaa bera namyhýde iwyòwyò-ki iruwahidýyna bederarade rýimyhý. Tii bederarade wað inatxi reuròmý raratynyre. Kia ta ahādu ahādu-di sohojile raratynyre. Otxirarade tahe bede bede mahādu deytana rare. ³ Kia hāwā-ki ihetxi txuhòbina tai ijõõkre, Deuxu aõ ritxuhònyõra tai. Deuxu ryanahaký itya-ki rýikre. Kia teòdu mahādu riwowydynykre. ⁴ Tiiboho iòsýnymy robikre inireny iòru-ki rýikre. ⁵ Tai ruu ijõõkre. Tai txuloosòna ijõõkre. Deuxu dori itxurenykre. Tiiboho tai ihyymy rýikre iwese iòlò mahāduõ.

⁶⁻⁷ Kia tahe ýju wadee rarybere: —Kaa rybe tahe inatyhy rybe rare. Bityhynybenyke. Jesuisi rarybere: —Analekre heka tule adehemynylekre heka. Deuxu heka taýju deòdu adee kanarybekre. Kaheka wylemy ibededýynana kedeakre.

Deuxu rarybehyy ratximyhÿre tÿnydÿÿdu mahãdu-ò, aõhebo bede rotÿÿnymyhÿkremy roimyhÿré. Ibutumy kia tyhydÿÿdu mahãdu heka reysamy rÿikremy rÿira.

⁸ Jiarÿ tahe Joaõ rare. Rabirahe, ibutumy kia raholare. Rabimy rexihurau tahe, jiarÿ watiowotimy resere ÿjuko-txi.

⁹ Ixityre wadee rarybere: —Iwidÿÿõmy hewa, Jiarÿ heka Jesuisi deòdu tÿnydÿÿduõle jiarÿ watzireri. Ibutumy Deuxu tyyriti ityhydÿÿdu biõwa jiarÿ rare. Deuxule bityhynyke.

¹⁰ Tahe ÿju ijõmy wadee rarybere: —Aõbo teritidÿÿnyteri ibutumy iny-ò rybe bitÿnynyke. Kia bededÿÿnana iòhòlemy ratzireri. ¹¹ Kia bededÿÿnana kedehemynykreu, aõbina bina widÿÿdu heka aõbinale riwinykre. Iny binabina heka, ibinamy rÿikre iu. Inywiwihikÿ tasÿ awimy rÿikre iu. Kia òbitimy rÿira tahe, awityhymy relekre, òbitityhymy rÿira. ¹² Boholake warybe-ò, aõwesele heka anakre. Uriõno heka adiwymy wadi anawãhãde. Aõbo wadee aõ riwinymyhÿre wahe iwese aõbo riwinymy raremyhÿwesemy heka araòwynykre. ¹³ Jiarÿ heka AA jiarÿ rare. Yÿ tule jiarÿ rare. Tyyriti juhoo rare. Tyyriti konana rare. Jiarÿ heka juhuludu rare. Ihewoludu tule jiarÿ rare, ibutumy wahe. ¹⁴ Ibutumy tatytyramy rÿira —teysamy rÿira. Tiiemy teysahyyhy rare. Iru òwòru wahidÿÿna bederaty heka ritokre. Tule rarõnyrenykre kia hãwãhãkÿ-ò. ¹⁵ Ibutumy òrarudu mahãdu tule òwòru widÿÿdu tahe irehemy Deuxu hãwã-ribi nyimyhÿde. Tule iny rirubunymyhÿre mahãdu, tule suritxoo luunadu mahãdu, tule ibutumy ruidu mahãdu. Ibutumy irehemy hãwãhãkÿ-ribi roimyhÿre.

¹⁶ Jesuisi heka jiarÿ rare. Waÿju reteõnyre adeereny kia aõnaaõna bededÿÿnana relyykemy. Kaiboho heka dohodÿÿna heto mahãdu-ò relyyrenyke. Jiarÿ iòlò Davi juhu rare, tule Davi riokore rare. Biurasò taina Jiarÿ rare, loosòna rare.

¹⁷ Deuxu Tyytybytyhy rarybere: —Manake! Tule hãwyymy hãbumy heridu tule rarybere: —Manke! Ibutumy ijohodu tule marybeke: Jiarÿ, Juaõ, tule rarybere: —Manake! Ibutumy iny bemy rurumyhÿre mahãdu tule manake irube biõke. Iõwy-di aõkõ heka rare.

¹⁸ Jiarÿ, Juaõ, rarybere ibutumy iny katyyriti rariamyhÿre mahãdu-ò. ¹⁹ Iny ributunyekiki aõmybo kaki ritydÿÿna roiré, Deuxu tamy bededÿÿna binahakÿõ riwahinykre karitidÿÿna roireki. Inyõ karitidÿÿna-ribi ritakeki, Deuxu òwòru runa ijuraõ wahe heka iribi ritakre tule Hãwãhãkÿtyhy-ribi nadedi wahe. Tai rÿire tyyriti-ki.

²⁰ Tule aõmybo narybede inatyhymy tule rarybekre (Jesuisi wahe): —Analekre hewa idi. Araroorehenyõtyhy. Juaõ, tule rarybere: —Kie, Manake Wanyrÿ Jesuisi.

²¹ Deuxu deysana, Inynyrỹ Jesuisi Kristu kia deysana ibutumy adee kanakremy watxiwahãre.